

ХИЗГИЛ АВШАЛУМОВ



ЗЕН  
БИРРОР

**ХИЗГИЛ АВЩАЛУМОВ**

**ЗЕН  
БИРОР**

*Вихде оmore произведениегьo*

Дагестанское книжное издательство  
Махачкала 1994

**Авшалумов Х. Д.**

А-22 Зен бирор: Повестьгъо, новеллагъо, рассказгъо, пьеса, поэма.—Махачкала: Даг. кн. изд-во, 1994.—448 с.

Жена брата: Повести, новеллы, рассказы, пьеса, поэма.

Э и книг эн писатель хэлгъи Догъисту Х. Д. Авшалумов дешенде оморет вихде оmore произведениегъой энун эн жуър-бежуре жанргъо: повесть «Зен бирор», е бэхш эн повесть «Кук гудил», новеллагъо э товун Шими Дербенди, ихдилотгъо, пьеса «Кишди хьомоли», поэма «Гюльбогъор».

Омбардеки произведениегъой эн писатель гъисдуът эз зиндегунни одомигъой хэлгъ иму, э мерэгълуьиревоз нуьувъсде оморетгъо чуйтам э лугъонд дануьсдеиревоз зиндегунни эн хэлгъ имуре э пушотенне ве имогъоине вэгъидегъо, гъемчун гъэдотгъо, традициегъо ве гъисмет энуре.

ББК 84 Татск

А  $\frac{4702570100-59}{М 123 - 93}$  78—93

© Гилядов Н., предисловие, 1993  
© Авшалумов Х. Д., 1993

ISBN 5-297-00887-5

## ПУШОЙ ГОФИ

(Э товун автор эни (книг ве творчествой энү)

И суьфдеи книги вихде юморе произведениегьой эн нишонен-  
луье (корсох культури Российская Федерация ве Республикай  
Догъисту, писатель хэлгъи Догъисту Хизгил Давыдович Авшалу-  
мов, ведироморигьо э зугьун (дедеи э глүьзет юбилей энү.

Те ебо э кутэхъэ жире гүфдире э товун творчествой Хизгил  
Авшалумов, мере воисдени эн суьфде гүфдире э товун че-  
тине, оммо мерэгълуье фэхъ эн зиндегунни эн писатель хэлгъиму.

Хизгил Давыдович хъэсуьл оморни ве келе бири э (дигь Нюгди  
(Муьшгүьр) район Дербенд э косибе кифлет эн ранжбер. У лап  
чуькле глэилле гъисдики мунди (дедесуьз. Э пушойгофи э кин книга  
хуьшде, «Глэмелдане Шими Дербенди», ведироморегубуьго э зугьун  
уриси (э 1982 сал, у нуьвуьсдебу: «Ме гъич е гилеш негүьрдем  
эри гъемей глэилгьой глүьлом лап глэзиз гъисдигьо гофе «дедей».  
Дедейму гъич э ёрмеш немунди. Юммо лап хуб э ёрмени бебейму  
э хуне венбебеймуре овурденге, э дуьимуьн руз (у мере, чорсале  
глэиллере, терс, гъелебуле доре, (э хуьршевоз мугу: «Мере (дедей»  
мегу!..

Оммо неденишире э (жире суруле гъэдэгъэй эн венбебейму е  
гиле (гоф «дедей» э божэхъэвсз ведиромо (эз синей ме. И кор бис-  
до э фронт, э август 1942 сал, кейки тикей эн снаряд фашисти  
мере гурунд яралуь сохд э зир (чепи лапаткай кемер ме, жунмере  
кем мунде небердени. Ки дануьсде, белки и глэлемете гоф «де-  
дей» э (у тувтем хилос сохд мере эз (глэжел...»

Хизгил Давыдович сиздегъ (сале гъисдики у мундени эз бебеш  
етим. (У межбур бирине эри фъишде хундеире, дарафде э колхоз  
эри кор (сохде. У суьфдеи сал (кор (сохдени гуселовчи (эн (колхоз ве  
эн жэглмет дигь, пессе гъеме (колхозчигьо-дигьбонигьой хуьшдере  
хуно бил, кутон зерени, зими, хир, бусду кошдени, бичин сохде-  
ни, хэрмон куфдени.

Э (дигь зигъисдеи, келе бирей кумеки сохдени эри лап куьнд  
шинохде, (дануьсде зиндегунни эн юдомигьой дигье, (глэдотгьо, тра-  
дицигьо, суеверигьо, овосунегьо, метелегьо, мэглнигьой хэлгъи-  
ре,-холисе зугьун хэлгъире.

Э эхир 1934 сал республикански гозит «Зэхьметкеш» (суьфдеи гозит э зугьун тати), ведироморенбугьо увэхди э шегьер Дербенд, чуьн еки эз активлубе селькоргьой хуьшде теклиф сохдени Хизгил Авшалумове эри кор сохде э аппарат редакция.

Гье эз суьфдеи сал кор сохдеи э гозит и дигьне жовоне колхозчи, кук кентуьсдони бирмундени хуьшдере чуьн активлубе ве божоренлубе журналист, литературни корсох. (Очеркьго, ) фельетонгьой энуре, дефус зере моренуьтгьо э верэгьгой ) «Зэхьметкеш» э келе мерэгьлуьиревоз хунденуьт хундегоргьой эн гозит. Э товун увэхдине салгьой кор сохдеи Хизгил Авшалумове э гозит «Зэхьметкеш», ведилубе шогьир, писатель ве драматург иму Миши Бахшиев, комики у салгьо (1933—1936) хунденбу э институт э Масков, нуьвуьсдебу гьечи. «Нум Хизгил Авшалумове ме шиновусдем суьфдеи гиле хунденге э минжи эн сиимуьн салгьо э гозит тати «Зэхьметкеш» лап фирегь мэглуьм биребугьо фельетун энуре «Фурухде оморе гларуьс», э комики э тижиревоз шерменделуь сохде оморенбируьт зарал зеренуьтгьо куьгьне гледотгьо, охмури ве элчэгь сохденуьтгьо обур ве лоигьи одомиети эн духдере-зине». (Гозит «Дагестанская правда», 22 дек. 1963).

Чуьн еки эз лап хуб дануьсдегоргьо зугьун дедеире, редакция э у тапшурмиш сохдени гьемчун эри тержуьме сохде э зугьун тати омбардеки официални материалгьоре, вожиблубе гээроргьой хуькуьмете, докладгьой эн рэхьберчигьой вилеете.

Э май 1938 сал Хизгил ~~Давыдовиче~~ теклиф сохденуьт эри кор сохде э Дагестанский научно-исследовательский институт эн торих, зугьун ве литература (э сектор зугьун ве литература). Инжо у кор сохдени э ижире ведилубе векилгьой культурай хэлгьгьой Доғьистуревоз: гьумугь Алимпаша Салаватов, даргин Сагид Абдуллаев, авар Шихабутдин Михаилов, лезги Магомед Гаджиев ве диеш. Э и салгьо у шинох бирени э ижире ведилубе шогьиргьо ве писателгьой Доғьистуревоз: Гамзат Цадаса, Абуталиб Гафуров, Эффенди Капиев, Раджаб Динмагамаев, Аткай Аджаматов, Тагир Хрюкски ве угьонигеревоз.

Э институт кор сохдеки Хизгил Давыдович нуьвуьсдени, кура-жэгьм сохдени, ведешендени суьфдеи сборник фольклор эн хэлгь имуре (1940 с.). Э и сборник дешенде оморенуьт овосунегьо, мэгнигьо, метелегьо, хубе воегьой эн хэлгь иму. Эз гофгьой эн еки эз лап меглуьмлубе данандее овосунечигьойму Хьизгьий Эмин (Дадашев) у нуьвуьсдени эри эни сборник ижире гьэдимие овосунегьой хэлгь имуре «Рустом Зол», «Бежон ве Менежон» ве диеш. Хэйли эни овосунегьоре, дешенде оморевугьоре э и сборник «Фольклор тати», нуьвуьсдебу эз гофгьой овосунечигьойму куьнде ховир энур, ведилубе шогьир иму Монувэхь Дадашев, пуч бисдогьо песде э Келе довглой Ватани. Гье э и сал Хизгил Давыдович гуьнжундени ве ведешендени суьфдеи альманах татире, ре-

дактор эн комики бу Миши Бахшиев. Э альманах дофус зере оморенуьт произведеениегьой эн шогьиргьо ве писательгьойму. Э и альманах гьемчун дефус зере оморени е ченд суьфдеи ихдилотгьо ве е чукле повесть энун, комики гьеле эз тараф литературни усдоети унгуэде звер небу, юмо нуьвуьсде оморобугьо э раче ве бемзерлуье зугьун хэлгьиревоз.

Э и салгьо Х. Авшалумов хундени заочно э Пединститут э исторический факультет, комиреки варасдени довгло варасде бэгьдо.

Э 1940 сал уре веирдени э член Союз писателгьой СССР Э вассал 1941 сал ведироморени «Русско-татская терминология», комиреки у хьозур сохде, ведешендени.

Хизгил Давыдович сер гирдени эри кор сохде э сер гофнемей уруси-тати (русско-татский словарь), омо сер гирде омогьо Келе довглой Ватани мешет бисдо э эжиге овурдеи и коре. Гье э суьфдеи руз довгло Х. Авшалумове берденуьт э солдати. Э вэхд довгло у женг бердени э гьэршуй гьупермишчигьой фашисти э казачий кавлерийский полк. У э довгло Юь гиле бирени яралу ве контузия. Довгло варасде бэгьдо у ченд салгьо кор сохдени эонный корреспондент э ченд военни округгьой вилеет.

Э апрель 1955 сал Хизгил Давыдович вогошдени эз лешгер, сер гирдени эри кор сохде э гозит «Дагестанская правда». Э вэхд кор сохдеи энун э гозит у омбар бири э гьеме районгьой Догьисту, гьемчун э лап дуре догьлуье районгьой энун. Эзи командировкагьо э районгьо ве шегьергьой республика у овурдени неки материалгьо, очеркгьо эри гозит, гьемчун тозе темагьо, сюжетгьо эри ихдилотгьо (рассказгьо) ве новеллагьой хуьшде, комигьореки у гьемише рефус зерени э верэгьгьой гозит «Дагестанская правда».

Э 1959 сал э Масков гирошдени Гьемеурсиетие семинар рассказчикгьо э куьнди е мегьним. Э и семинар эз гьер республика ве область миёсде бире бэхшвегир энун энжэгь е одоми э конкурс гирошдеиревоз. Э гьечиревоз бэхшвегир эни семинар эз Догьисту бирени Хизгил Авшалумов.

Э кутэхьэ пушойгофи хуьшде э кин ихдилот Х. Авшалумов «Вохурдеи э сер билогь», дефус зере оморобугьо э гозит «Литература и жизнь» 3 июнь 1959 сал литературовед проф. Н. Замошкин нуьвуьсдебу: «Э творческий семинар: эн рассказчикгьо, гирошдебугьо э апрель-май э Малеевка, рассказгьой Х. Авшалумов гьобул сохдебу верзирение гьимет.

Э и ихдилот энун, комики тефиглэтлуьни э лаконизмаревоз, юморовоз, тиже мэглноревоз норе омори пурьсуьшгьой зиндегунни, келе мэглнолуь гьисдуйтгьо эри хэлгьгьой догьи.

Э 1964 сал Хизгил Давыдович вихде оморени член Правление ве секретарь эн Союз писательгьой Догьисту э товун прозой Догьисту. Э инжо у кор сохдени те 1972 сал.

Х. Авшалумов автор эн ченд сборникгьой ихдилотгьой, повестьгьой, нуьвуйсде оморетгьой, чуйтам э зугьун (дедеи, гьемчун э зугьун уруси (у произведениегьой прозой хуьшдере нуьвуйсдени э зугьун тати ве э зугьун уруси): «Чуйтам ме зинде биремге», «Вохурдеигьой э сер билогъ», «Глуэруйс э сюрпризовоз», «Э хэтой эн е моч», «Шими Дербенди», «Кук гудил», «Зен бирор», «Муьрде э глэрэй зиндегьой» ве диеш. У гьисди гьемчун автор эн дегь е актлэе ве эн чор пураактлэе пьесагьой: «Кишди хьомоли», «Толмач эн имам Шамиль», «Шими Дербенди» ве угьониге.

Эри нишонендегьой энэ э пушой эн литературай тати ве омбаре миллетлэе литературай Догъисту Хизгил Давыдовиче э 1960 сал доре омореху Орден Знак Почета. Эри книг эн ихдилотгьой энэ «Невеста с сюрпризом», ведироморехуьгьой э зугьун уруси, э 1967 сал у гьобул сохдени глуьзетлэе нум лауреат эн республикански премия э нум Сулейман Стальский.

Э товун творчествой гьемватаниму, ведилуье писатель иму гуфдирет, нуьвуйсдет, чуйтам э республикански печать, гьемчун э централни ченд ведилуье критикгьой, литературасьедгьой, писательгьой, в глэрэй энугьой: Леонид Соболев, Расул Гамзатов, Николай Замошкин, Владимир Огнев, Ахмедхан Абу-Бакар, Камал Абукаев, Сулейман Ахмедов, Дмитрий Трунов, Евгений Белик, Малик Гасанов ве диеш, гьемчун ижире писательгьой, шогырьгьой, журналистгьойму: Миши Бахшиев, Еггэгъуй Агарунов, Менешир Азизов, Михаил Дадашев, Михаил Гаврилов, Иосиф Бахшиев, Яков Ильягуев, Яшор Манувахов ве диеш.

Э и пушойгофиме унггэде эз хуьшде нэгг, омбариш миьрум угьой чуй гуфдиребируьтге э товун творчествой Хизгил Авшалумов, эн произведениегьой энэ.

Э интервью хуьшде эри гозит «Дагестанская правда» шогырь хэлггэи Догъисту, Лауреат эн Ленински премия, сернуьш эн правлений союз писателгьой Догъисту Расул Гамзатов э товун прозой Х. Авшалумов гуфдиребу: «Мерэггэлуье ве чумтиже прозаики Х. Авшалумов». («Дагестанская правда», 4 март 1964 с.)

Писатель Дмитрий Трунов, комики бу бэхшвегир эн декадай литература ве искусствой Догъисту э Масков э 1960 сал э рецензийей хуьшде э товун книг Х. Авшалумов «Вохурдеи в дер билогъ» шогьоди дорени: «Леонид Соболев (увэхдине председатель эн Союз писательгьой РСФСР), рэхьбери сохденбуьгьой пуьруьш сохдени произведениегьой дагестански прозаре э декада, гуфди е ченд рассказгьой Х. Авшалумове («Вохурдеи э сер билогъ», «Дердимендигьой эн пире Хасан», «Хэбер ве гьинггэр») глэемете рассказгьой, рассказ энуре «Чуйтам ме зинде биремге» — нуьвуйсде оморэ э жирей эн Твен» (Марк Твен). («Дагестанская правда», 12 июль 1960 с.). Хуьшдени автор эн рецензиеш келе гьимет дорэ рассказгьой Х. Авшалумове.

Э товун повесть гьемватаниму «Кук гудил» (э зугьун уруси у ведиромори, чьутам э Догъисту, гьемчун э Масков э е нумигеревоз «Возмездие», еки эз ведилуье литературоведгьо-критикгьой Догъисту Камал Абуков нуьвуйсдебу: «Х. Авшалумов — усдой эн юмористически рассказгьо бирмунди хуьшдере гужлуь гьемчун э произведений эн фирегье план».

У нуьвуйсдики, гьер «герой» эн повесте доре омори эри энду дивэглуй гьисдигьо хосиет. Хуьшдени повесть лугъонд ве фирегь бирмундени зиндегуни хэлгэз, Ыбнегьой зиндегуире, глэдотгьой хэлгьире. («Дагестанская правда», 11 авг. 1965 с.)

Э и ологъо э товун эни повесть «Возмездие» мере воисдени нушу доре э е чьукле мугъоле, дофус зере оморевугьо э и гозит 13 февраль 1966 сал э ижире керлевгьеревоз «Сафар (путешествией) эн «Возмездие». Автор эни мугъоле нуьвуйсдебу, ки повесть Х. Авшалумове ведешендебу Дагестанское книжное издательство энжэгъ эри республикайму гьеме пенж гьозор тираж. Нуьвуйсде омори гьо э повесть гъозие-гъэдер хьэз омори неки хундегоргьой-муре-догъистонигьоре. «Ини э нум эн директор Дагкниготорг оморет заявкагьо эз идорегьой алвари эз Грозный, Ярославль, Куйбышев, Брянск, Архангельск...»

Келе гьимет доре Миши Бахшиев, чьутам ихдилотгьой Х. Авшалумове, гьемчун и повесть энуре. Э гуфдирей энуревоз повесть «нуьвуйсде омори э лугъонд дануьсдеиревоз зиндегуни хэлгэз», глэдотгьой энуре. Чьутам бирмундениге, М. Бахшиев, зугьун эн писатель лап холисе зугьун хэлгьини. («Дагестанская правда», 22 дек. 1963).

Писатель хэлгьи Догъисту Ахмедхан Абу-Бакар э пушойгофи хуьшде э кин новеллагьой Х. Авшалумов, дофус зере оморевугьо э московский журнал «Наш современник» (июль 1969 с.) нуьвуйсдебу: «Хизгил Авшалумов мэглуйми э Догъисту чьун усдой эн чьуклете жанр проза. Произведениегьой энду нуьвуйсде оморет э антигъэе жире ихдилот сьхде омореиревоз, э тиж диреиревоз ве келе хосдеиревоз хэлгъ хуьшдере».

Ологъие жиге гирде э творчествой гьемватаниму юмористически ве сатирически новеллагьой энду э товун Шими Дербенди. Ченд критикгьо, литераторгьой Догъисту э келе хогьиревоз нуьвуйсдет э товун эни новеллагьо ве «герой» энду — Шими Дербенди, комики фирегь мэглуйми э глэрей хундегоргьой республикайму.

Э еки эз номергьой «Комсомолец Дагестана» (№ 30, июль 1991 с.) э интервью э писателевоз, дефус зере оморевугьо э гозит э ижиресерлевгьеревоз «Уре гьеме дануьсдени», корреспондент сер гирдени уре э ижире гофгьоревоз: «Божэхьэт э Догъисту офд миёв одоми, комики нешиновусди э товун мэглуймлуь писатель Хизгил Авшалумов. Ки егиле семе хундиге «Фамильная ар-



каре» енебуге «новеллагьоре э товун глэмелдане Шими Дербенди, фурмуш сохде нидануь и нуме».

Новеллагьо э товун Шими Дербентди гьисди, гуфдире мибу, хуьшденжирее художественни торих зиндегунни эн хэлгъ иму. Омбардеки одомигьой хэлгъ иму, иллогьки э шегьер Дербенд ве район эню, эжеки зигьисденбируьт омбардеки могьлугъ татгьоегьудигьо, те революция косибгьо, батракгьо бируьт. Э вэхд власть совети угьо колхозчигьо бируьт. Э чигьрет Шими Дербенди, комиреки автор нуьвуйсди э келе хосдеи ве муьгьбетевоз, у бирмундени социальный тип эни хэлгъэ. Шими Дербенди пушой эн революция жогьиле батрак бу, э вэхд власть совети — пушолуье колхозчи. Э фикирмеревоз эслогъ дуз нуьвуйсди доктор филологически гилмгьо С. Х. Ахмедов э статьей хуьшде «Э лугьонд дануьсдеиревоз зиндегуннуре» гьечи э товун герой эни новеллагьо: «Шими Дербенди гьисди нушулуье социальный тип, жэгилмуье чигьрет (образ) эн векили хэлгъ тати. У эз Дербенди. Гьисмет эню нен хэлгъ эню екини. Э жогьиле вэхд те революция у бири батрак... Э товун эни вэхд виндегунни эню ихдилот сохденуьт новеллагьо: «Шими Дербенди э гьурлугъ падшогьи», «Эгьуьл не глошири» ве диеш.

Имогьой Шими Дербенди огьиле колхозники, у делхэккимсие, оммо хуьрметлуье одомини. У гьисди э хуьшде вечирегор юмор хэлгьире, виндегуннихогьире ве оптимизмаре. У дубруьсде одомини, ве гуфдире мибуки, глэмелдане, хьиллее коргьо нисе дануьсденигьо одомини, уре «глэмелдане Шими Дербенди» гуфдиренуьтгеш». («Дагестанская правда», 15 янв. 1977).

Гье ижире хосиетноме доре уре э рецензией хуьшде «Новеллагьой Хизгил Авшалумов» критик Ввг. Белик «И динж нисе поисденигьо, очугъэ дуьл ве дуьлшоре одоми, кимвэгидо глэиле хуно седо-туьлкдузе одомини». Унегуьре у э гьовхо бердеки э кемсуьгигьой зиндегуннуревоз гьемише бесгьунчи нисе ведироморе. Чутьтам Шими хуьшдению гуфдирениге э товун хуьшде: «Гьерчуь дануьсдуьм — гуьрдем, оммо диренуьм, ме хуьшдениме — офдо-рем». («Дагестанская правда», 3 февр. 1989 с.)

Эз елойге Шимире гьисди — жэгилмуье чигьрет догьистони, хосиетгьо, глэдотгьо, дивзгльо, чигьрет зиндегунни эн комики омбар ухшеши эн одомигьой эн де хэлгъгьойгей Догьистуревоз.

Омбардеки критикгьо хумне зеренуьт уре э мэгилуьмуье ге-рой эн новеллагьой хэлгьиревоз Молла Насратдиневоз. (М. Гасанов. «Ориентиры творчества», «Дагестанская правда», 11 окт. 1984 с.), С. Ахмедов, гье э звер нушу доримгьо статьей эню). Журналист Б. Нувахов гозит «Советская культура» (26 март 1983 с.) статьей хуьшдере э товун новеллагьой Шими Дербенди нум нори «Дагестански бебей эн Насретдин». У нуьвуйсди, ки э десдин яратмиш сохдегор хуьшдеревоз Шими гьисди Ходжа Нас-

редтине хуно фольклорни жире фирегь мэгІлұьмлуь э гІэрей хэлгь.

С. Ахмедов хумне сохде Шими Дербендире э Молла Насратдиневоз, эз елойге дуз нушу доре э у иму гуфдиримгьо статьей энұ, ки «У куьнди э дуьшоре ве бэхдсуьзе Молла Насретдиневоз, оммо Шимире эзу бешгьэ гьисди гьэдъигьэти биографиею, ологъолуь гьисдигьо э вэх-земонеревоз ве э у социальни зйлон-меревоз, эз гІэрей комики у ведиромори».

«Куьгьне нисе биренигьо чигьрет» — гьечи нум нори статьей хуьшдере э товун новеллагьой Шими Дербенди Иосиф Бахшиев. («Знамя коммунизма», 13 янв. 1983 с.) Э и фикир автор эни статьяревоз куьнди е чубкле мерэгълуье стихотворенией эн шогьир тати Яшар Машияхов «ГІов немируьм» («Бессмертная вода»), комиреки мере воисдени овурде инжо:

Шими Дербенди нечогь биребу,  
Ченгъэдер мэхъл бу э хьэлов добу.  
У не чи хурденбу, не хисиренбу.  
Шимире хьол небу, гьер гоф ю бу женг,  
Зен ю эз «огь» Шими биребу лап бенг.  
Хьовиргьо-хьэрмэхьгьо кура бисдорут,  
Эз ченд жигегьо дерму восдорут.  
Ченд жире духдир огол зеруьт угьо,  
Ченд жире жерэхьгьо омо эз дигьгьо.  
У эз гофе-гофгьо днеш бисдо гурунд.  
Шими не дерму хурд, не жерэхь шинохд.  
Э гуш Шими сес диromo: «Туь нимире,  
Эз дигь Муьшгуьр е хубе кук э рэхь дери...  
Сес дуз бисдо. У хубе кук дузиш омо,  
Шими Дербендире «ГІов немируьм» до...

(«Ватан», 22 февр. 1992).

И книг — вихде оморе произведениегьои писатель вокурде оморени э повгьсть энуревоз «Зен бирор» (э зугьун уруси у ведиромори э е нумигеровоз — «Фамильная арка»). Повесте э мерэгълуьиревоз хундет омбаре одомигьой республикаймұ, э товун комигьоки шогьоди доренуьт неки критикгьо, гьемчун хэйли когъозгьо, комигьореки автор гьобул сохди эз хундегоргьой хуьшде. И дес и повесть хуьшдере э хьозур сохдеки эри эни книг, у гене хэйли кор сохди эсер энұ, дешенди хэйли тозеигьо ве дегиишгьо, гьозиегьо эз зиндегуни хэлгь иму э пушой эн революция, песде эз революция е ченд-ченд салгьо гирошде бэгъдо. Гьемей эни гьозие-гьэдэргьо эз зиндегуни эн сербинелуье героиней эни повесть — Марал бирмунде оморени э фирегье шон зиндегуни, гІэ-

догъо, традицией эн хэлгэ иму. Автор э назар вегирде кими верзирение теклифигъой эн хундегоргъоре, лугъонд ве фирегъте сохди сюжет энуре.

Сюжет эни повесть вегирде омори эз зиндегуни. Автор дирербу и зене э 1936 муьн сал э пушой эни раче тох сенгъи, эн фамильная арка, (энжэгэ э зиндегуни уре Марал нэгI, е нумиге бу). Шиновусдебу гъозие-гъэдер энуре эз гъэреулчи эн онгурбогъгъой колхози «лелей Юсуф», пушотеине батрак эк Марал, комики э у жогъиле вэхдгъой хуьшде омбаре жогъилгъой Дербенде хуно ошугъ бугъо э и гуьзел.

Омбардеки произведениегъой Х. Авшалумов гъеме эз зиндегуни хэлгэ имуни. Эри автор эни произведениегъо оморенуьт когъозгъо эз ченд жире шегъергъо ве районгъо Догъисту, гъемчун эз де жигегъойгеш. Э гIзрей энугъо деруьт колхозчигъо, фэхълегъо, студентгъо, гIилмчигъо, школеигъо. Эри эз гъер эни когъоз эри овурде е-дуй келме семе минкин нисди э е пушойгофи. Оммо эз кими энугъо мере воисдени е-дуй гоф овурде.

Ини э пушой ме когъоз эн буьзуьрге гъемватанимуни эз 4 май 1977 сал, эн Игид Жофой Социалисти, Лауреат Ленински Премия академик Гаврил Абрамович Илизаров, нуьвуьсде оморигъо э бланкай идорей энур. Эз когъоз энур ведини, ки неденишире э келе,шевруз лап мухшул бирен энур э кор хуьшде, у хунди книг писателе «Фамильная арка».

«Хуьърметлуье Хизгил Давыдович! — нуьвуьсди у э когъоз хуьшде.— Ме Эришму эдег гуфдиренуьм келе согъбошимере эри книг ишму эз зиндегуни хэлгэ иму. Ме-э келе хъэвесевоз хундум уре. Хосденуьм эришму келе творчески барасигъо».

Э. хуьрметевоз Г. Илизаров».

Профессор Михаил Шахнович эз Ленинград нуьвуьсди эри автор: «Э гIзрей данандегъо, тиге гофдангъой гIуьлом герой ишму Шими Дербенди песини жиге нивегируь». Э е когъозигей хуьшде эз 16 янв. 1977 сал у нуьвуьсди: «Фамильная арка» лап э келе мерэгълуьи ве хъэвесевоз хунде оморе. Келе согъ боши эри нуьвуьсдеи и мерэгълуье книге...»

Э гIзрей эни когъозгъо, гуфдиренуьтгъо хуьърмет ишуре э ки писатель гъисдуьт когъозгъо эз Дербенд, Буйнакски, Кизилюрт, Рутульский, Тляратинский, Цунтинский, Магарамкентский, Акушинский, Гергебильский, Кулинский, Сулейман Стальский районгъо ве диеш.

Эриме лап мерэгълуь омо э еки эз когъозгъо, нуьвуьсде оморетгъо э хосдеи ве хуьърметевоз э кин писатель, фирсоре оморигъо эз дигъ Шилячи Кайтагский район вери фамилегъо ве гъулгъой эн 26 ученикгъой 10-муьн класс эн миёнее школай эни дигъ.

Э и книг эн вихде оморе произведениегъой эн писатель дешен-

де омори гьемчун еки эз пьесагьой энэ «Кишди хьомоли», нуьвуйсде оморебугьо э 1960 сал. Музыкаре э кин эни пьеса нуьвуйсдебу талантлуье композитор иму Джумшуд Ашуров.

И гьисди суьфдеи музыкални комедия эз зиндегунци, гьэдотгьой хэлгэ иму, нуьвуйсде ве норе оморигоь э сегней театр тати. Ведилуье писатель ве драматург иму Миши Бахшиев э товун эни пьеса э гозит. «Дагестанская правда» (15 фев. 1962 с.) нуьвуйсдебу рецензия э ижире серлевгьеревоэ «Жизнеутверждающая комедия», доре келе гьимет чуйтам хуьшдени пьесаре, гьемчун вози эн актергьой театре. Э ёрмени, у салгоь, сер ебо артистгьой эн театр пьесай «Кишди хьомолире» норе, э театр жиге нисе биренбу эри нуьшде, омбаргоь э пой посденбируьт. Государственный музыкально-драматически кумыкский театр» норебу пьесай энуре «Толмач эн имам Шамиль», э товун комики э гозит «Дагестанская правда» 8 май 1968 сал ве э кими республиканси гозитгоь нуьвуйсде оморебу хубе отзывгоь.

Э и книг дешенде омори е бэхш (се серне) эз повесть «Кук гудил», ведироморобугьо э Махачкала, песде э Масков э зугьун уруси э е нумигеревоэ — «Возмездие», поэма «Гюлбогьор» — э товун жоборде зен эн хэлгэ иму Игид Жофой Социалисти Гюлбогьор Давыдова.

Писатель хэлгэи Догьисту Хизгил Давыдович Авшалумов еки эз песини гьейсэгьэт зинде гьисдигоь писателгьоймуни. Уре бири дусди ве творчески одогьо э гьеме шогьиргоь ве писательгьоймуревоз, корсохгьой театр ве искусстворевоз, чуйтам эн суьфдеи эрхэ, гьемчун эн жогьилте эрхэревоэ.

Хизгил Давыдович холисе интернационалист, дусди ве бирори хэлгэгоьре хосденигоь одоми биреки, у гьемчун лап омбар хосде хэлгэ хуьшдере. Э нуьвуйсдеигьой хуьшдеревоэ у хьэрекет сохдени эри бирмунде жофодусди, шолумихогьи, гьуногьсевени ве де хубе чигьретгьой хэлгэ имуре, дошде хуьрмет энуре э Гьэрей де миллетгьойге. Неки э нуьвуйсдеигьой хуьшдеревоэ. Э хьэрекетигьой энуревоэ э пушой органгьой власти эн республика ве Масков тозеден энжом сохде омори радиовещание э зугьун иму. Довгоь варасденге ченд салгоь э зугьун иму, мибу гуьфдире, литература нисе ведироморенбу. Миши Бахшиев ве Хизгил Авшалумов эз лешгер вогошденге (еки энугьо эз лешгер вогошдебу э 1954 муьн сал, униге э 1955), сер гирденуьт эри ведешенде альманах ве литература э зугьун иму.

Э песини паздегь-бисд салгоь э инициативай Х. Авшалумовоз литераторгьойму, активистгьойму Борис Гаврилов, Яков Ильягуев, Семен Садыков, Александр Рафаилов, Михаил Гаврилов, Хьэнуьх Анисимов, Борис Ханукаев, Лазарь Амиров, Яшар Машияхов, Наида Авшалумова нуьвуйсдет эз гофгьой эн овосунечигьойму Гьэзерье Мишиев, Рафаил Рафаилов, Серьё Юшваева,

Сенем духдер Исроил Хьисибо, Томор Юнаева, Бинсиюн Авадиев, Зина Ханукаева, Тирсо Имануилова ве угьониге хэйли овосунегьо ве метелегьой хэлгъимуре, комигьоки дефус зере оморенуьт э альманах.

Хуьшдени писатель нуьввьусди эз гофгьой овосунечигьойму омбаре овосунегьо, метелегьо, мэгIнигьой хэлгъимуре. Нуьввьусди э товун гIэдотгьой хэлгъиму, комигьореки у дири э дигь хуьшде, эз товун комигьоки э шегьбергьо зигьисденуьтгьо одомигьой хэлгъ иму кем дануьсденуьт енебуге нисе дануьсденуьт.

Омбаре рассказгьо, новеллагьой Хизгил Авшалумов тержуьме сохде оморет э зугьунгьой эн де хэлгъгьойгей Догъисту. Кими рассказгьо ве новеллагьой эн дефус зере оморет неки э зугьунгьой эн кими хэлгъгьой вилеет иму, гьемчун э зугьун поляки, немци, французи, испани, болгары. У бири делегат эн хэйли сьездгьой писательгьой РФ вэ СССР, бэхшвегир эн юбилей эн ижуре классикгьой Восток: Низами, Физули, Вагиф, Мирза-Фатали Ахундов ве диеш.

Э и книг омбаре ве хэйли ихдилотгьо ве новеллагьой энудешенде не оморет. Дешенде неоморет гьемчун де повестгьойге, очеркгьо ве пьесагьой энуде е пьеса бэгъэй, оммо гье и дешенде оморетгьош произведениегьой эн писатель дорени хундогоре шинкини эри хуб шинох бире э творчествой энуревоз.

И пушойгофимере мере воисдени варасуьм э гофгьой эн еки эз бине норегоргьо литературни зугьун имуре, ветеран культураймуре ЕгIэгъу Агаруневоз, комики э ёровурдигьой хуьшде «Чуьтам яратмиш бириге литературай тати», э товун автор эни книг нуьввьусдебу гьечи:

«Ме хундем нуьввьусдеигьой Хьызгил Авшалумове э альманах, э ведироморигьо книггьой энуде: «Зен бирор», «Кук гудил» — э зугьун тати, э зугьун уруси — «Сказание о любви», «Фамильная арка» ве диеш... Данандеи энуде, дорун зиндегуни хэлгъ хуьшдере дануьсдеи энуде ве э гьечиревоз жэгIм офрунум (творчествой энуде) норени уре э е жерге э пушолуье писательгьой хэлгъиревоз». (Альманах тати, 1977 с.).

Нисон ГИЛЯДОВ

# ЗЕН БИРОР

*(Трагедией эн е гуьзел).*

**П О В Е С Т Ъ**

Э ДЕГИШИГЬО ВЕ ЗИЕД СОХДЕ  
ОМОРЕИГЬОРЕВОЗ

## ВОХУРДЕИ

Ме суьфдеи гиле расд оморум э и зен у гьеле жогьилте одоми бугьо вэгдо, гьеминон 1936 сал. Ме увэхди тозеле эз дигь омор, суьфделе сер гирдебируьм эри кор сохде э гозит «Зэхьметкеш», ведироморенбугьо э зугьун иму э Дербенд. Эзу вэхдевоз омбаре салгьо гирошдет, оммо гьейсэг!этиш эз ёрме нисе рафде, чуйтам ме у руз нэхэбереки вохурдебируьмге э и зен. Гьеймогьиш шекуьл энугуйге э гузги дирере хуно э пушой чумгьоймени.

..Еки эз лап герме рузгьой эн мегь август бу. Ме э тапшуьрмиши эн редакцией гозит имуревоз у руз оморум э онгурбогьгьой эн еки эз колхозгьой эн шегьер «Заря Востока». Онгурбогьгьой эни колхоз гьечи е чор-пенж верс дур бу эз шегьер. Лап хушмензерие жиге бу инжо. Э звер, э серней богьгьо, э рэхь дерие кервугьой девегьоре хуно, веди бируьт догьгьо, ёнмегьой комигьоки эз гьызгьине чуйшмей гьеминони зерд биребируьт кулевуьше хуно. Э пойней онгурбогьгьо лап фирегье савзелуье мейдузире хуно лос дегешдебу ковре дерьегь. Тегьенгьгьой эн онгур э фирегье, савзе, дигил-дигиле велгьо депичире, гуйге парталгьой дараи вокурде, жерге-жерге поисдебируьт дуь э рачей еки. Генлегьгьой эн кегьреборе хуно эз зир велгьгьой тегьенгьгьо дуллу бируьт пуре солхумлуье хушегьой эн онгур. Эз товуш эн чуйшме иловле гьеме эдембу шевгь доре.

Э минжи онгурбогьгьой эн колхоз, э гьйрогь рэхь илчи, э лугьонде, нерме тузевоз дегирде бугьо, гьуьндуьр поисдебу комуней асмуре хуно е дер недерие тох (гьолуй эн сенгьи). У вебу э гьйрогь эн е тенге эрхле, эз гьэд комики евошлей, мугьум хунде, эдембу рихде э ранг гилове хуно бугьо глов энугу.

Ме э куьнди тох сенгьи омор расиренки, мивинуьм э минжи эн илчи, э гьэд герме туз, э пушой эни тох сенгьи поисди е нешинохэ зен. Уре диремунде меш поисдуьм, э келе махьтелиревоз денишире э у. Чуйтам ниесдуьм махьтел мунде?! Руз гьечи герм бу, чуйшме гуйге эдембу лепуьр гэтоше рихунде эз гьово, оммо и зен дуь чум хуьшдере доноре э и тох сенгьи, юш гьоймей сенгьире хуно лос мунде, посидебу э пушой энугу. Энжэгь ловгьой энугу

эдембируйт жуьмуьсде. У чуйбуге э зир зугьун хуьшде эдембу хунде. Эриме гьечи оморенбу, ки у эдее нимаз хунде э пушой эни тох, буьтперез э пушой буьт хуьшде хунугьоре хуно. И зен гьечи сэхд мухшул бу э и кор хуьшде, ки гуйге э ёр-хэёл энущ небу, чуьтам келегъзи энущ эс сер энущ э душгьой ю фураморевуге, бирэхьне сохде хэсде, сиегье, тов доренбируйтгьо шевее муйгьой сер энуре.

Э тен энущ вебу увэгидегьо эз гуймуьр миёнее ве огьиле зенгьойму вокурденбируйтгьо партал. Булши энущ эз ужуге ковре чит бу, гьеми фирегь ве гьеми дураз. Жуьле-жуьле пожей энущ, те пошней пой ю бугьо, гье эзу мол эн булши бу, гьирогьгьой ю э суьрмеревоз гирде. Энжэгь э сер энущ вебугьо кэлгъзи — эврүшүми бу, гьирогьгьой ю нэхче гирде. Оммо у куьгьне бу, ранг рафде бу. Э пойгьой эни нешинохэ зен назуге дарбигьой алати вебу. Е кем звере гьэд бугьо тиже буз эн дарбигьо э хумней эн нерме туз эн рэхь е пертовуш веди бируйт.

Ме е ченд луьнг пушо оморум э лой энущ эри эз куьнди хуб фегьм, томоше сохде и гложоибе зене. Оммо увэхдиш у е тилтелеш эз жигей хуьш де нежуьмуьсд, гье гьечу чуьтам поисдебуге, дениширебу, чум неведгирде эзи тох сенгьи. У гуйге гьейсэглэт э иловлей хуьшде е чиреш сеч нисе сохденбу, нисе диренбу эзи тохэ бэгъэй. Гуйге эри энущ гьейсэглэт э томом эни келе дуьнэгь гьичиш нисди эзи тох сенгьи бэгъэй.

Э ме поисдебируйтгьо жиге те буй-балайме е ченд кулей эн бэгъуэлуь ве шевелуь вебируйт. Ме гирошдуьм э песой эни кулолугь, сер гирдуьм э тигъэтевоз эри денишире э и зен, томоше сохде уре эз гирей луьгегьой эн кулего. Эз дениширемун у эз гуймуьр мибисдо гьечи е сивхьофд-сивхьэшд сале, гьэрезки эз чуьл сале звере нэгл. Сифет энущ назук бу, сипи, темиз, ширмовире хуно, чумгьой ю — келе, сиегь э ранг расире сие бэгли, мижегьой чумгьой ю хэсд, сие берхит кеширере хуно. Э чумгьой энущ гьеле шевгь жогьили домундебу. Оммо и чумгьо э дуьлпесои, дуьлдэгьдэгъэн ве гьаежонлуьиревоз дениширенбируйт.

Ме денишируьм э тигъэтевоз э лой тох сенгьи эри винире, дануьсде: эйчуь эхи и зен, э и гьизгьин герми, кейки гьер зинде нешумо эдее далде-серини гешде, поисди э минжи эни рэхь гьите хуно, дуь чуме доноре гьишди э и тох, э зир зугьун хуьшде чуьниге хунде-хунде?..

Э еки эз эз лап хуб тириш зере оморе сенгьгьой эн нимелит гиргинее звери бэхш эни тох чигьрет сифет эн е мерд вебу э жуьтэхьэ гьайчи зере рушлеревоз. Э чепи тараф эни чигьрет — шекуьл эн ранг михэжие бурмее тегьенг вебу. Э тегьенг фирегье велгьо ве солхуме хушегьой онгур вебируйт. Эзугьо зверте нишоней эн чуьшме вебу э дуразе ригазгьоревоз, лов бируйтгьо э гьер лой ю. Э иловлей эн гьемей энугьо чорчуьбе гирдере хуно



зенжире (венок) бу эз гуыл не савзе. Э звер эну дуй э рачей еки поисдебируйт дуй ковтергьо, дунгуггьошуре э еки веноре. Денишируым гьемчун э гиргине сутунгьой эни тохиш. Унжо чуй хэтгьоиге вебируйт. Хуб денишире мивинуым — хэтгьо ве гофгьой туронни. Э еки эзу хэтгьо вебу: «Темэхь месох эритуь хуней эн одомитурье, не зен энуре, не хори энуре...»

Эз диремун ве ди бу, ки и тох сентги инжо эз зуревоз норе оморебу, кидан чендсалгьо гиросдиге эзу вэхдевоз. Рангьой эну э кими жигегьо нимелит пузмиш биребируйт, э кими жигегьо эслогь ве ди небируйт, туз гирдебируйт.

Бирден ме нэхэбереки суьвруьсдуым. Нешинохэ зен гье усэ-гIэт серсоне хуно дениши э иловле. Мере виники э песой кулегьо, у э дуьлпесоиревоз дениши э лойме, теретэгIди дегирд сер хуьшдере. \* Песде у сие дуразе гьошгьой хуьшдере гьэгрлуь гьуйжунде, чаруьсд песово, рафд тэгIди сохде-сохде э лой шегьер, э тиже буз эн дарбигьой хуьшдеревоз тузгьой эн рэхэ вор доре-доре.

Ме е кемигеш поисде э жигейме, э мэхьтели ве думитевоз денишируым э лой эну, те у рэхэ бурмиш бире, эз пушой чумме вир бире. Гьечи фикир эни гIэжонбе кор эни зен э дуьлме дери, ме луьнг шендуым эз сер эрх, евош-евош пой вечире, рафдуым эз сер лап пойтэхде бире жилгэ эз гIэрей тегьенгьо. Е минутиш негирошд, киниге огол зе мере, нуммере гирде. Эз ме гьечи е бисд-бисдпенж луьнг дурте е гьуйндуьре чордогь бу. Эз звер чордогь куме вебу, э гьэмиш не хуьшге гиёвовоз дегирде. Э пушой чордогь е дуразе шефде нердуи вебу. Ме эдембируым дире, чуьтам эз чордогь, э сер нердуи гьуз бире, песово-песово фураморениге е мерд. Гьетте ме дире и руьшверие, эз гуьмуьр е чуьлпенж сале бугьо, сие чердее, остгьугьой сифет ю екем бируне ведироморе мерде, ранг кегьребое хушлуье чумгьой энуре, ме уре шинохдуым. У бу гьэреулчи эн колхоз Юсуф Собоев.

Эзи дуй мегь зуло, пушой бэгIличирегьо, инжо э онгурбогьгьой эн колхоз «Заря Востока» доре оморебу Государственни акт эри гьемишелуьг муьздсуьз менфигIэт вегирде эз уре доре омориго хори. У руз инжо гьеме колхозчигьой эни колхоз э куьнди е дивисд одоми кура биребируйт э мигIиде хуно. Э зир серине доргьо, э сер савзегийёвгьо вараюнде оморебируйт суьфрегьо о гIошгьо, егьнигьо, кобобгьо, чорекегьой шоробовоз. Государственни акте эри доре э колхоз эз нуминей хуькуьмет оморебируйт рэхьбирчигьой эн район. Э гIэрей теклиф сохде оморебирутгьо гьуногьгьо бируйт гьемчун корсохгьой эн гозит имуш э редактор имуревоз эеки.

---

\* Э гIэдот имуревоз зен сер бирэхьне поисде э пушой кес келе гIэйб ве хуьрди бу эри эну.

Пушой колхоз «Заря Востоке» Государственни акте доре, иму э гІуьзет эни гъозие э зиндегуни эн колхоз, доребирим согъ е верэгъ эн гозите. Э и верэгъ доребирим статьягъо, мугъолегъо ве сиротгъой эн сернуыш колхозе, секретарь эн партийни организациере ве эн е ченд пушолуье колхозчигъо-зарбчигъой эн жофоре, гъемчун эн пушотейне батраке, имогъой гъэреулчи эн онгурбогъгъой колхоз — Юсуф Собоеве. Мугъолей энуре эри эни верэгъ эз гофгъо, ихдилотгъой энуре эз зиндегуни хуыште, ме нуьвуьсде ве хъозур сохдебируьм. МэгІной эн гъемей эни статьягъо ве мугъолегъо, бируьт, гъелбет; чуьтам тэхъл, гурунд буге зиндегуни эн хорисуьзе ранжбергъо, батракгъо э пушотейне вэхдгъо, э девр падшогъети ве чуьтам хуб, мозоллуь бириге имогъой э девр эн совети, эз колхозгъо бине норе оморе эйло..

Гъечи ме шинох бисдорум э Юсуф Собоевоз. ГъейсэгІэт лелей Юсуф куьнд буре э киме, э шоре, мигъровуне хэндеревоз десмере сэхд гирд, хошомори сохд мере. Песде э мэхсере кимси денишире э сифетме, э тегънимиревоz вегирд эз сер хуыште зерде килэхъ гусбендире. Гиргине сер энуре э серчиревоz темиз чиребу. Унегуьре гъейсэгІэт бирэхъне сер энуре э офдои эн чуьшме э гъобугъ векеде сер дуруп ухшеш зеренбу. Эз гъэд килэхъ, эз зир астар энуре у ведешенд чоргъэде сохде верэгъ гозите, лов сохд уре э пушойме. Лове э хэнде веберде, э гъолинде энгуьшд хуышдеревоz бирмунде э сирот ве мугъолей хуыште э гозит, э эрклуьи ве шориревоz мугу:

— Вениш, хэлефме, чуьтам дошденуьмге ме и верэгъэ? Ме уре гъемише э хуыште гирденуьм.

Те ебо дуборе килэхъ э сер хуыште веноре, лелей Юсуф гене гъе гъечу э тегънимиревоz, тэгІди несохде, чоргъэде сохд верэгъэ, доно э кун килэхъ, песде вено уре э сер хуыште. Гъе и туьтем у э ёр ю е гоф оморе одомире хуно, денишире э ме, лове э суьпле хэнде веберд, э луттиревоz чум зере мере, э десевоз э лой тох сеньги бирмунде, мугу:

— Гъи, гъи!.. Диребири «раче гъэлифоре» — Марале? Чуьтам инжо хуышг буре поисдебуге?..

— У зен эз расдекиш Марал ю?! — эз ело э мэхътелиревоz, эз елойге шор бирере хуно пуьрсируьм ме, гъе у сэгІэт э сер офдоре э товун эн коми Марал у гуфдирениге.

Лелей Юсуф е чуме гъуьжунде, чуькле сохде, э ме бовор несохдере хуно, гумонлуь дениши э ме, лове е пертевуш э хэнде веберде.

— Туь уре бегем теимогъой ебош гъич недирей, нешинохдей? Нум энуре эз зуревоz перти-пурти. Уре э и шегъер нешинохдогор кес нисди. Дуразруй бебе-дедейтуь, уре сеггъо-назугъой Дербендиш шинохденики.

Лелей Юсуф нисе дануьсденбу ме инжои, дербенди нисдуьм

гуфдире, энжэгъ и ченд мегъи оморем эз дигъ эри кор сохде э гозит. Унегуьре, гьелбет, мэхътеле кор небу, ки ме теимогъой егилеш недирем и «одинечево» зене, «раче гъэлифоре». Оммо, нединашире э у кор, ки ме инжо, чуйтам гуфдиренуьтге, и перигъо оморем, оммо э товун эни зен омбаре гофгъо-хэбергъо шиновусдем. Э товун эн Марал э глэрей одомитгъой эн шегьер ченд жире усоле, руьхшенде, хэндее хэбергъо, овозегъо дебируьт. Э ёрме омо гьейсэгъэт ме шиновусдемгъо песини хэбере э товун эни зен эз бухгалтер эн редакциейму эзи е орине пушо. Расдире гуюм, ме э гофгъой энуп бовор нисе сохдембируьм у эз руй, се-сифет гьечи е шэхслуье, обурлуье одомире хуно ве ди бирембугеш. Эз Гуьмуьриш у кем небу, е чуйлдуь-чуйл пенж сале мерд бу. У э 1916—1917 салгъо э Тифлис хунде, дуь салине курсгъой бухгалтерире верасдебу. Унегуьре у хуьшдере «интеллигент» хунденбу. Чуйн интеллигенте одоми, у гьемише э сер-тен хуьшде, э партал хуьшде хуб дениширембу, рач вокурденбу. Галстук э герде недери у э куче нисе ведироморенбу. У е гьюндуьре, шивитие одоми бу. Сифет энуп екем зерд бу, эн зэгинфе одомире хуно, оммо рач бу. Бешгей эн сие бигъгъой энуп гьемише дарам бурмиш сохде бируьт. Оммо неденишире э интеллигенти хуьшде, э салгъой хуьшде, уре хьэз оморенбу хэберберигъо, глэйбине гофгъо, ихдилотгъо сохде. Чуйтам, эже, э коми зенгъоревоз у гешдиге. Руз нибисдо, у е шулухэ «тозе» хэбер, анекдот неовурде э редакция, песде э лезетевоз эри ихдилот сохде эри де одомигъойге. Эрме гьечи оморенбу: омбардеки эни хэбергъоре у эз хуьшде ведешенденбу.

Е руз себэхъмунде «интеллигент», тозе сипре парталгъо вокурде, э иловлей хуьшде буй эн духи лов сохде-сохде, лове э руьхшендие хэнде веберде, диromo э утогъ иму, эжеки се жогъиле корсохгъой эн редакция нуьшдебирим, суьфделе сер гирдебирим эри хьозур сохде материалгъо эри нуботлуье нумир эн гозит.

— Нешиновусдейт тозе хэбере эз товун Марал? — эжигей себэхъ эхйрбу доре имуре, гьетте эз дер диromоре, пурси у эз иму э хэндеревоз, бешгей бигъгъой хуьшдере тимор сохде-сохде. Те иму лэглэ вокурде: воисдениге имуре ихдилот энуре шиновусде, нисе воисдениге, «интеллигент» э сер стол эн е корсох иму нуьшде, сер гирд эри ихдилот сохде хэбер хуьшдере. Э гофгъой энуревоз эзи е орине пушо, Марал е гъирмизине хурузе вегирде не дегъ монет пуле рафди эки эн е фолчи питик-хьэйкел сохдегор, у гловунгъоюре эз сер ю вегируь, э пушой худо уьзиэгъ ведиров. нешумой ю э генгидин гьисмет бу гуфдире. Марал гуйге э фолчи гуфдири: ю гловунгъо сохдере хуно, суьобе коргъош омбар сохди, етим-кутуме нун, партал дори, э глони-бичоре кумеки сохди, белле-филон. Фолчи эри Марал фол вешенде, гуйге гуфдири эзу гье-

чи: «Говунгьойтуь, Марал, э сугьобгьойтуьревоз сербесери, эри-туь мундигьо гье у кун-кефел дурраигьои...»

Оммо гуфдире гереки, ки омбардеки эни овозегьо, хэбергьо э товун Марал эз жогбиле вэхдгьой энү бируьт.

ГьейсэгIэт эз гьовой эн гофгьой лелей Юсуф э товун Марал, чуьтам уре у «раче гьэлифо» хундиге, нум энү «перти-пурти» гуфдиге, ме эриме верасируьм, ки уш бовор сохдени гуфдире э лэгIэй хэлгь деруьтгьо усоле хэбергьо, овозегьо э товун Марал. Оммо ченгьэдер ме увэхди жовон бируьмгеш — увэхди ме эн-жэгь э бисди дебируьм, — дануьсденбируьм, ки нум одоми ебо э беда, биёбури ведерафдге, э лэгIэй могьлугь офдоге, э сер энү небире гофгьо, коргьореш мешенуьт, небире гIэйбгьореш эзу ми-журут. Негьогь нисе гуфдире: «Эз лэгIэ те лэгIэ дерзе э гьит мичаруь, гьит — э дерзе». Оммо гьейсэгIэт ижире гофгьоре ши-новусдуьмки эз лелей Юсуф, комиреки ме хуьрмет дошденбируьм, ме бовор сохдуьм, ки гьемей эни гофгьо э лэгIэй хэлгь деригьо э товун Марал, ведини, дургу нисдуьт.

Ме негуфдируьм э лелей Юсуф эйчуь ме де одомигьойгей эни шегьере хуно те имогьой егилеш недиремге и нум ю «перти-пурт» гьисдигьо зене, оммо гуфдируьм, ки меш кем-биш шиновусдем э товун энү. Гуфдире гьечи, ме пуьрсируьм эз лелей Юсуф Марал инжо эйчуь оморегубе?

— Гьо-о, гьо! Туь гьерчуь дануьсдени у суьфдеи гилеи инжо оморенигьо? — ловгьоре чарунде, э биразириревоз гуфди гьэреул-чи колхоз: — Песде у сер ебо оморе, э сэгIэтгьоревоз поисдени э пушой эни тох сенгьи соере хуно, керг гьуьртире хуно гье фугьун-дени э зирзугьун хуьшде, нисе дануьсденуьм у вор хундеге, э хуьшдеревоз гоф сохдеге, небуге нифри-гьэргьуш сохдеге. Ки дануьсде уре? Оммо гьетте одомире дире э куьнди хуьшде, гье усэгIэт гьэгьр вечирере хуно бирени, зир эн дуьм ю шишире ма-ра хуно пич-пич сохдени, зурн-зурн вогошдени рэхь хуьшдере песово. Унегуьре кимвэгIдо ме э куме дерики у инжо оморе по-исденге, ме сермере эз кумеш нисе ведешенденуьм, нисе воисде мере э чум энү вохурде. Хубчи туь гьейсэгIэт омори ведиромори, небуге гьеле е сэгIэтигеш мипоисд инжо. — Лелей Юсуф е дэгь-дэгьэ гоф хуьшдере поюнд, песде суьпле хэнде сохде, мугу: — Эй гуфдиреш гIэйб оморе одомире: кимвэгIдо и гьэлифо инжо омор-енге, эз сербот энү ме эри десгIов, пишгIов сохдеш фираморе нисе дануьсденуьм.

— У белки чешмиши? — пурсируьм ме, гене э ёр овурде эри-ме, чуьтам у поисдебуге э пушой эни тох сенгьи.

— Божэхьэт, — мугу лелей Юсуф, сере жумунде. Песде у екем э хуьшде демунде, душгьоре вешенде, евош, екем дуьлсухуни сох-дере хуно эри эни гIэжоибе зен, мугу: — Ки дануьсде уре, хэ-лефме. Эзу жире зиндегунни энү, эзу жире э сер энү оморе гьозие-

гъо, эз у дире синемшигъо, неки чешмиш бире, де одомиге э жигей энү белки хуьшдереш зере микуьшдге.

Ме диренге, ки лелей Юсуф жугъоб недо э пуьрсуьшме: эйчуь оmore э и герми, э и дури Марал э ки эни тох сенгъи, ме гофмере дуборе вогоруш сохде, хогъиш сохдуьм гуьу гуфдире себеб эни гӀэжонбе кор энуре.

— Гъо-о!.. Эхи и тох сенгъире э у вэхдгъо Ошир Килэхь Лугуи вокурдебу.— У хэндуйсд, бирмунде сэхде, дуьруьжде дендугъой хуьшдере, комигъоки е кем зерди кеширебируьт эз омбар папрус кешире. Гуйге воисде юре верасуну э ме себеб эни хэндуйсдей хуьшдере и гофе э ме гуфдиренки, лелей Юсуф мугу: — «Килэхь лугуи» — ижире хэндее лэгъэм бу фэгъире шуьвер энуре... И тох сенгъи едигори шуьвер энүни, шекуьл энү вери э сенгъ, егӀни фомильни тох хуней энугъои. Гъемей эни онгурбогъгъо — ихдилотчиме, расди десе пушово кешире, бирмунд э онгурбогъгъо эз тох сенгъи сер гирде те зерде гъумлуье гъирогъ эн дерьёгъ,— гъемей эни онгурбогъгъо эн шуьвер энү бу. Шуьвер энү муьрденге, сэхъиб эн гъемей эни онгурбогъгъо, те колхозгъо гуьрд сохде оmore, Марале раскулачивать сохде, эн Марал бу. У бурд сэхъиб энугъо. Ме гуюм э туь, ме лап хуб дануьсденбируьм шуьвер энуре, Маралеш лап хуб шинохденуьм. Чуьтам нешинохум ме угъоре! Е ченд салгъо ме эри шуьвер энү э и богъгъо фэхълеи сохдем э вэхд бил зерегъо, тегъенг бурра, ологъ сохдегъо, капарус шендегъо, богъ вечирегъо. Э вэхд поиз не зимисду э гъомборгъой энугъо шороб эхте сохдем, э челегъой шороб мугъоет бирем, угъо эз гуж шороб бенд нешенуьт. Песде шуьвер Марал муьрденге, эри Марал кор сохдем. Туьре дануьсде воисдениге, у те э шуьвер рафдеш ме уре шинохденбируьм, э мэхъалейму зигъисденбу.

Лелей Юсуф и песини гофгъоре гуфдиреки э товун Марал сифет энү е кем могъбуле хуно бисдо, е суке охиш гуйге верафд эз синей энү. Песде у дениши виники, ме лап э тигъэтевоз, э томошеревоз эдее гуш веноренуьм гофгъой энуре, гоф хуьшдере поюнде, э синемширевоз дениши э сифетме, песде гъебо мугу:

— Воисдениге туьре ихдилот сохум эритуь э товней эни зен? Гъо! Гъозие-гъэдер эни зен, э жун кукгъойме, лап муьгӀуьжуьзи, э гозитгъо, книггъо нувуьсденини.

И гофгъоре гъэреулчи колхоз э товун Марал гуфдики, мере лап воисд эри шиновусде эзу гъозие-гъэдер эни «легендарни» зене.

Песде эз лелей Юсуф бэгъэй ки мидануь эриме гъечи хуб ихдилот сохде гъозие гъэдер энуре? Унегуьре, ме гъеусэгӀэт рази бисдорум э и теклифи энү. «Эгенер согъ дуь сэгӀэтиш гирошдге ихдилот энү, фикир сохдуьм ме эриме,— мере вес мисоху вэхд эри кура сохде герек гъисдигъо мэгӀуьметигъоре э товун э ме

тапшуърмиш сохде омorigьo статья эй гозит: чуйтам колхоз хьозур бириге э сезон онгур вечирей. Дуьлме эри эни кор олхогьин бу эзу товунеш, ки ме ди те ебо инжо оmore, э шегьер э кантур колхоз э блокнотме нуьвуьсдебируьм е ченд мере герек гьисдуьтгьo фактгьo, мэгIлуметигьo. Песде гьеле руз нимеш небу. Чуйшме гьеле э гьугь асму оmore нерасиребу.

Лелей Юсуф шиновусденге разимендимере, эз ме мугу:

— Туь екемлей инжо пой, ме гьейсэгIэт могордум.

Гуфдире и гофе, у эз зир чордогь вегирд е кунбологьово норе омборебугьo севере, дерафд э гIэрей тегьенгьo, е ченд минут у эз далдай энугьo э чум веди небисдо. Песде у эз дуь дуьм пура север онгур гирде, вогошд э киме, э серевоз, чумгьоревоз э лой энжилдор бирмунде, эзиму е дегь луьнг дурте бугьo э гьирогь эрх эн гIов, берд но севере э зир эну.

Иму нуьшдим э рачсберачей еки э зир эн энжилдор, сугразани зере, э хуне нуьшдере хуно. Э эрхле гье гьечу эдембу э мугьумевоз рихде гIов. Келе луьгелуье энжилдор э фирегье хэсде велгьой хуьшдеревоз серини лов сохдебу э иловлей хуьшде. Эз гIэрей эн велгьo, ведибируьт расире, нерме, лиловрангие энжилгьo. Э гьово эз гIэтош чуйшме эвир лепуьре хуно эдембу лерзире э пушой герме тонуре хуно, комики пур бу эз журай эн журжурагьo. КимвэгIдо эз дури, эз гьирогь дерьегь оmoreмбируьт сесгьой келе гофе-гоф, мэгIнигьo хунден э зофру кор сохденбируьтгьo колхозчигьo.

Гьэреулчи колхоз э бел гьул эн сие рушейни сетини хуьшдеревоз эрэгь пушони хуьшдере покурде, эз куьф хуьшде ведешенд пура кисей томбокуре, э тегьнимревоз декуьрд э кугьозле хирде венжире томбокуре, папрус сохд, доно э лэгIэ. Песде э дуь десевоз куьнд овурде э пушойме север онгуре, эз лэгIэ дуьо ведешенде-ведешенде, мугу эз ме:

— Имогьой туь, хэлефме, ху эзи онгургьo, ме сер гируьм гьозие-гьэдер Марале эри ихдилот сохде эритуь.

Э сер эну лелей Юсуф эриме сохдебугьo ихдилот э товун эни зен, ме энжэгь зиёд сохдум екем е ченд тафсилгьo, фактгьo, э товун комигьoки ме дануьсдуьм песде.

### «ДУХДЕР ХЬЭЛВОЧИ ДИЕШ ШИРИНИ» \*

Э Дербенд е куьгьне соките, гьемиге кутэхье кучей. У э де кучегьойге гуьре э пушой чум унгьэде веди нисе бире. Уре имогьой кучей «Садовая» гуфдиренуьт. Унегуьре гьейсэгIэт одоми эзи куче гиросденге, четини эй веровурд сохде, бовор сохде, ки е вэхд и куче лап омбар одоми биренбугьo жиге бу э зофруи нимей эни бэхш шегьер. Инжо дуь э куьнди еки се нимаз бу:

«Келе нумаз», «Чуькле нумаз», «Нумаз Хьивро». Э дуй рачей эни куче, гуйге дуй э гъэбуьргъэй еки вогосире, дуй екире сигъмиш сохде, гуйге хъэрекет сохде дуй екире эри ведешенде эз гIэре, жигей хуьшдере фирегъу сохде, э пушой чум муьшдери эри хуб веди бире, дураз кеширебируьт жергей богъолтукугъо, галантерийни, гушдтукугъо. Э пушой тукугъо пойбирэхъне гIэиллегъо эри е шогъи эз себэхъ те шохъонгум те бугъозгъошу гирде, огол зеренбируьт муьшдеригъоре эри восдоре эз тукуй ишуре э киро гирдегоргъо: кишмиш ирони, тутун турки, дуней хони. бобли хъэштерхуй, ширине хэмзей мюшгуьри, келэгъигъой генжеи эри гIэруьс-духдер, хъозуре тирохгъо, нефт, спичке ве уьзге чигъойге. Гъе э инжо э минжи куче «алварчигъой базари» мифурухдуьт дулме, масд, «душунде гIэрму бугъэ-бугъ», тара, савзи, хинике «гIов шохселэхъ». Кимигъой энугъо э сер ишу веноре ленгеригъоре, гъэжгъугъоре э бодиегъой масдевоз, дулмаревоз, душунде гIэрмуревоз мигешдуьт э гIэрей одомигъо, келе-келе «мол» ишуре тэгIриф доре-доре. Инжо э пушой эн гъеме доллок, пушесиней алати э тен ю вери, эн гъэсобчире хуно, нушунде «муьшдерире» (клиенте) э сер бирэхъне мастовой, сер юре эз хъофдофой чугуни тар сохде э гIововоз, э дуй десевоз массаж сохде, жарунде, сер мигирд эри чире.

Оммо омбаре одомигъой эни бэхш шегъер, иллогъки косиб-кусуб инжо кура биренбируьт унгъэде э хотур э инжо нумазгъо, тукугъо бирен нэгI. Э минжи эни куче е чуькле мейду бу, месе гирде. Уре «Фэхъле базари» гуфдиренбу. Инжо руз, иллогъки гъовой шохъонгум кура биренбируьт батракгъо, косибгъо, эжеки подрядчикгъой эн сэхъиб богъгъо, ветэгъгъой жэгIи, угъоре э кор э киро гирденбируьт эри гIоширгъой шегъер — сэхъиб онгурбогъгъо ве ветэгъгъой жэгIи. Песде инжо эри омбаре одомигъой эни бэхш шегъер фэхъле-базари бу гъемчун эжигей мейду енебуге, эжеки угъо кура биренбируьт хэвлете вэхд хуьшдере эри гировунде, дуй экиревоз ихдилот сохде, тозе хэбергъо, енебуге овосунегъо-нэгъуьлгъо шиновусде.

Инжо э Фэхъле-базари э гъомборе хуно бугъо чухуре неме хуне хъэлво душунденбу. Диворгъой энэ эз неми кара гирдебируьт, сергъови энэ эз дуно — сиетов зеребу. Сэхъиб эни хъэлвотуку Худод гуфдиренигъо е мерд бу. У е жалуьсдее, бишерке огъиле одоми бу. Синей энэ эз эгIифи доруне дерафдебу, лэгъере сифет ю ранг эн гилове хуно бу. Сер зиэди у лап гъургъур бу. Эз гъургъури э гужевоз пой норе гешде дануьсденбу. Оммо уре хуно лезетлуье хъэлво сохдегор божэхъэт дие э гIуьлом одоми офд миёмоге. Эз согъ руз рэхъо бугъо дер эн хъэлвотукуй энэ э куче е раче буй эн тозе душунде хъэлво оморенбу, чуьтам гуфдирениге, муьрде одомиреш хъез миомо дэгIэм энэ хъэлворе эри дирэ. Унегуьре гьер одоми эз ён тукуй энэ гирошдогор, буй

хьэлвой эн Худодот э винию верафденге, э куьф ю е шогьиш дериге, тоб доре нисе дануьсденбу. У дироморе э хьэлво тукуй эн е тике хьэлвой энуре нэхурде, довом нисе доренбу. Унегуьре гьеймогьиш согъ гьисдуьтго келе мердгьой Дербенд, э у вэхдго е гиле семе диретгьо дэгIэм эн хьэлвой Худодоте, э гуфдирей энугьоревоз, ужире лезетлуье хьлворе эзумогьоевоз дие гьич э гIуьмуьр ишу егилеш нэхурдет.

Ченгэдер ширин бугеш хьэлвой эн Худодот, кими жогьиле «романтически» муьшдеригьо, хьэлвой Худодоте кем-кем гIэселе хуно э хурдеки, чумгьоре э дуру гирде сергьови туку доноре, марч сохде-сохде э ниет-нугьоревоз мугуфдируьт: «Пегь-пегь! Духдер хьэлвочи диеш ширини!» Кимигьо гуфдиренуьт гуйге метеле: «Духдер хьэлвочи диеш ширини» эзумгьоевоз э лэгIэй хэлгъ лов бири, ки и метеле суьфде эзинжо ведиромори.

Эз расдиш эз гьеме раче духдергьо, гIэруьсго нибисдогеш, духдер эн хьэлвочи Худодот еки эз лап энтигьее раче духдергьой эн Дербенд бу. Духдер энугьо Марал у вэхди гьевдегь сале бу. Э и салгьой энугьо кем бу духдергьо гьеле э шуьвер нерафдогоргьо, омбаргьой энугьо дедей эн е-дуь гIэйил бируьт. УвэгIдон духдергьоре лап зу э шуьвер доренбируьт. Гуфдиренбируьт: духдере эри э шуьвер доре э сер ю килэхъ ше. Эгенер э у килэхъ расиренге неофдеге, уре хосдехунд сохде, э шуьвер доре гIэмел миёв. Оммо хьэлвочи тэгIди ~~ниесе сохденбу~~ е теке духдер хуьшдере эри э шуьвер доре. У дануьсденбу ижире раче гуьзеле духдер дир-зу э шуьвер мирав, «тиршов зере» э хуне нидомуну. Уре воисденбу духдер хуьшдере э гьерки бисдо нэгI, э лап верзирение одоми э шуьвер доре. «Верзирение» одоми эри хьэлвочи бу ужире домор, комижи доре миндануь уре эри духдер ю келе рэхъпули.

Марале хэсде сие муйгьо вебу. Гьолинде бендгьой муй энугьо сер те тубугъ пойгьой энугьо расиренбируьт. Сифет энугьо сипи бу, шумол бу, хунширин. Чуькле, екем бируне ведироморе пушони энугьо гуйге эз мармар тирошире омореву. Сие, шевгьлуье чумгьой энугьо э одоми дениширенге, гуйге э лугьонди дуьл одоми кори сохденбируьт. У эз бала унгьэде гьундуьр небугеш, оммо омбар инчебеле духдер бу. Омбаре духдергьо, жогьиле гIэруьсгьо уре эз рачи энугьо, эз бэхилишу Дедей-Ол\* гуфдиренбируьт, оммо кукгьо,

\* Одомигьой хэлгъ иму бовор сохденбируьт, ки дуьл омбаре зенде зенгьоре Ол берде гуфдире. Дедей-Ол гуйге зигьисдени э више. Уре чигьрет эн е раче зен вери. Жендек энугьо гьемише бирэхънеи. Дуразе, э иловлей жендек энугьо, лов гьисдуьтго муйгьой сер энугьо, эжигей партали эри энугьо, гьемиге тилисим энугьо. Зенде зене эри фурмунде у дироморени э утогъ энугьо, зенде зен э хуне тэхьно дебиреки, э чигьрет, хумней эн еки эз куьнде одомигьой энугьо. Шуш-жигер эн зенде зене ведешенде, у зури-зури вогошдени э више, шушдени-угьоре э гьэд гIов, гье унжо фубердени. Гье э и туьтем зенде зен нешумо дорени...



жогъиле мердгъо э гъаежони дуьлевоз — «бике» гуфдиренбируът.

Жогъиле духдергъо, гІэруьсгъо дуз небируът духдер хьэлвочире эри Ол гуфдирен. Эгенер духдер хьэлвочи берденбугеш енебуге яралуь сохденбуге юре хуьшдениюре эзи кор хэбер небиреки, дуьлгъой эн зенгъо-духдергъоре нэгІ, энжэгъ эн «езугъэ» мердгъоре.

Э рузгъой эн мигІид Марал э темизе нуьгърее гІов шихсалахъвез сер хуьшдере шушде, шуне зере, гъуьжум вегирде, э ён дер гъопуй хьэёт ишу, э пушой куче поисденге, омбаре эз куче гирошде жогъиле мердгъо уре диренге, эз рачи, буйбалай энугъейрон бире, е ченд бойгеш дениширенбу э лой энугъехьэсротире хуно. Кимигъо эзуре дире эйло хэйли рузгъо билбул, э хуьшде недерире хуно гешденбируът, э ховгъо, ниетгъошу диренбируът уре.

Марал дануьсденбу, ки ю гуьзеле духдери, чум омбаре жогъилгъо э ю домунди, кими энугъо эз дерд эн билбулуът, оммо неденишире э и кор у эз рачи хуьшде келегеди нисе сохденбу, хуьшдере сокит, хъземенд гирденбу. Гуфдиренуът: «Э песой чо-гъэ гов корде мибу, э песой раче духдер — гоф». Неденишире э теууьзлеи, хъэменди, хубе хосиетгъой эн Марал кими бирече, бишерке, сиemosдиле духдергъо эз гъэгр, эз бэхили довом нидоруът негъогъие довори-гъой энуре негирде, э сер энугъо дургуне гофгъо, дургуне хъэшегъо вешенденбируът. У э гъевдегъ сале биреки гъелеш э шуьвер нерафдеи, неденишире э ижире рачи хуьшде, уреш бэхиле, хэбербере духдергъо чуьн гІэйб, кемсуьги энугъохьисоб сохденбируът, егІни уре усале сохиетгъо, дивэгІгъо дери, унегуьре не е гъезэгъэ супое кук, не е жогъиле бие мерд ние ди-ромореу ре эри хосде.

Эижире бэхиле, гъэйбетчие духдергъо, гІэруьсгъо гуйге нисе домунденбируът е пара нефое, шулухе, буше келегеде, зугъгун ишу муьрдал гъисдуьтгъо жогъилгъо. Еки энугъо эри энугъо ижире мэгІниш гуьнжендебу, хундед уре, лов сохденбу э гъэд шегъер:

Баратынски куче \*  
Э коми уром дери,  
Марал духдер Худодот  
Э лэгІэй гуьлом дери...

Оммо кем небируът ужире жовонгъош э Дербенд, шэхс, рачи эн духдер хьэлвочи дуьл ишуре, берде, яралуь сохдебугъо, коми-гъоки э межлуьсгъошу, мэгІрекегъошу хунденбируът дердимендлуье мэгІнигъо э товун энугъо. Э мэгІнигъошу угъо неки гуфдирен-

\* Еки эз келе главни кучегъой Дербенд бу э нум князь Баратынский А. И. (1815—1879). Э 1856—1862 салгъо у бу сервор гъушунгъо ве наместник эн падшогъ э Кавказ.

бируът э товун хъэйрони, гъаежони дуъл, мугъбет ишу э ки эни гуъзел, гъемчун гъэдерсуъз тэгГриф мидоруът рачи, обурлуъи, хъэёменди энурс, хумне зере уре э марал догъиревоз, асдарай себэхъиревоз, гуъл эн чеманевоз, «хъэлоле шир эн ковторевоз», эз елойге шуъкеет мисохдуът э «сурули», «биинсофи» эни эз дуъл, хьол ишу «гъейгъусуъз, бейхэбер гъисдигъо дилбер».

Е гиле хэбер лов бисдо духдер хъэлвочире хосди гуфдире, ки уре хосдигъо одоми келе Гюшири, эз гъумолетлуъе, Гэсуълменде одомигъой шегъери.

Э рачи духдер хъэлвочи ошугъ бире, уре хосдебу е келе Гюшир эн Дербенд, сэхъиб богъго, хунегъо, глэйлсуъзе бие мерд Ошир, чуъл сале пура, денуъшдее одоми, комиреки вебу рангшогъбалудие рач гъэйчи зере кутэхъэ рушле ве хэсде фирегъе бигъго.

Ошир Гэжоиб, сечкуе, лап бешгъэлуъе одомире хуно ве ди биренбу э Глэрей эн гъемватанигъо, дигъ-жэгмет хуъше. Увэхди эзу бэгъэй екиш эз гъемватанигъой энунисе вокурденбу ижире европейски партал. Бугъолуъе английски костюм, верфе хуно сипи бугъо рушейни энунэ крахмал зере, гъуъндуъре ехэлугъэвоз, бесде бугъо э сие бантевоз, эри энугъо лап Гэжоиб, мэхътели оморенбу. Эз гъеме э тен энуне вебугъо партал эри гъемватанигъой эни Гюшир мэхътели ве руъхшенди оморенбу тирольски шляпай энуне. Угъо дануъсдещ нисе дануъсденбируът чухъ нумиге у э сер энуне веригъо «гъээре». Угъо лап мэхътел мунденбируът: чухтам мерд, уш ижире ведилуъе одоми, э жигей эн килэхъ — ярашуъгъи сер ве нишон келегели эн мерд менуъ мигешдуъ гуфдире э сер хуъше ижире бидэглэтичире. Э фикир энугъоревоз эгенер у э сер энуне веригъо «гъээрей Лугуи» эри гъерчухъ бисдо глэмеллуъ гъисдиге, энжэгъ эри лулей гъэжеле э више енебуге эри келе зен туп эн русму не бофденигъо телгъоре эри доноре. Белки у эри е коригеш глэмел омоге шев глэйл эз хъэлов вэхуъшденге э гъэд энуне эри пишГлов сохде. Эзумогъойлеревоз дербендигъо духъ э Глэрей еки уре «Ошир Гъээрей Лугуи» лэгъэм норут. И лэгъэм э сер энуне, дуъмбег э кемер бонгъуз вогосугъоре хуно, гъечу сэхд вогоси э шум энуне неки у зинде бугъо вэхд, гъемчун муърде бэгъдош. Уре сер ебо э ёр оворде, э и лэгъэмевоз нум энуне гирденбируът.

Ошир Гъээрей Лугуи неки эз партал, вокурдемун, гешдемун ве хосиетгъой хуъше бешгъэ бу эз де одомигъойгей эни шегъер — гъемватанигъой хуъше. У е тэхъно одоми бу э Глэрей энугъо хундебугъо, верасдебугъо гимназияре, суъфде э Темир-Хан-Шура, песде э Ставрополь. У вэхдгъо неки косибе одомигъой эни шегъер гъеме нэхундегоре одомигъо бируът, гъемчун Гюширгъой эни шегъериш е эслогъ соводсуъз енебуге кемсоводлуъе одомигъо бируът.

-Ошир Гъээрей Лугуи еки эз ведилуъе одомигъой шегъер бу.

У бу еки эз членгьой Думай (парламент) шегьери, вихде оморенбугьо эз гIэрей эн бекгьой жиген ве гIоширгьо — сэхьибгьой келе богьго, келе хунегьо-хьэетгьо, эн ветэгьэгьой жэгIи. У гьер сал эри е мегьи-дуй мегьи рафденбу э загранични курорт Карловы Вары. Песини ладшогь Урсиет Николай II э гьозори нуьгьсади сиздегьимуьн сал оморенки э Дербенд, миллионер Сафдер Ахундов э гIуьзет энү келе межлуьс сохдебу. Э и межлуьс э де ведилуье одомигьой шегьеревоз гьемчун теклиф сохде оморенбу Ошир Гьээей Лугуи, эжеки ладшогь дес энуре гирде, эз у согбоши гуфдиребу эри э хэзинеи шегьер келе пул дорен эри оводунеети энү.

Бебей эн Марал, Худодот хьэлвочиреш хьэз нисе оморенбу эз партал вокурдемун эн домор хуьшдеу, партал энуре «руьхшенди, похпохуи» эн уюнчнире хуно хьисоб сохденбу, қомики гуьнжо, лоигь нисди э гIэдотие партал эн одомигьой хэлгь иму, э гIэдотгьо, вердишигьой энугьо, пой зерере хунои. Оммо эз елойге у лап шор бу, эз шори, келегеди уре жиге небу ижире вегирлуье, хурметлуье, гIошире одоми расд омори гуфдире эри духдер ю, домор ю бири. Э у гуьре имогьой хьуьрметиюш, худоре шуькуьр, звер мибу э пушой хэлгь, эн дире-шинохдогор. Иллогьки у омбар шор бу эзу товуне, ки у эри духдер хуьшде эзу келе рэхьпули вегирди. Унгьэде пуле у э ховгьо, ниетгьой хуьшдеш недиребу.

Ошир Гьээей Лугуи э хотур эн одохлуй хуьшде, гоф эн рэхьпули вероморенки э гIэрей энү нен хьэлвочи, ю хуьшдени ю гьозор монет суьрхи э кисей эврुьшими доноре доренбу Худодоте.

Хьэлвочи эз хуьшде лап рази бу тэгIди несохдебу гуфдире эри духдер хуьшдере доре э гьерки бисдо, сабуьр сохде, дениширебу гуфдире, кей еки эзини пуллуье одоми мидиров эри духдер ю. Эри эни кор у хуьшдере тэгIриф доре, мугуфди: «Эз сабур зиьдте э гIуьлом чи нисди».

Эри косибе Худодот и гIошире мерд духдер юре хосдеи эз есири э говлеи ведироморере хуно бу. У шев-руз эдембу кор сохде, э хуьшде гьимиш несохде, кепике дошде, эри демунде руз хуьшде е кем пул кура соху гуфдире. Оммо эзи чуькле хьэлво тукуй энү уре лап кем пул биренбу. У биренбугьо пулгьош энжэгь вес сохденбируьт эри кирой тукуре, налуге доре, эри хьэлво сохде лепе, гIэсел ве де чигьойге восдоре, эри еботот хурдевокрудей ю нене теке духдер ю. Песде хьэлво мунде пуч небу гуфдире, у межбур бу э ужузте гьимет фурухде уре, чуьнки муьшдеригьой энү омбарнш косиб-кусубе одомигьо бируьт, комигьореки зиьдте пул небу э ижире чигьо эри эхржи сохде. Эз елойге Худодот сал бе сал эдембу эз гьувот, эз хьол офдоре. У омбар эдембу дуьлесди кешире эзу кор, ки, худо меьро, миьв ужире руз, у эз пой морфону, дие эслогь кор сохде нидануь, песде ки мидору уре не духделей энуре? Увэхди у эри э гиснеи не-

муърдеи войгеш-невойгеш межбур мибу, чейтен э герде доноре, эри э хунегьо, хьээтгьой хэлгъ дерафде, вечи-вечи сохде. Эзи жире руз у терсиренбу эз глэжел терсуьгьоре хуно. Оммо духдер ю э шуьвер рафденге, у э хуней домор, э духдер хушдеревоз мизигуь гуфдире, неки э фикир энунисе оморембу, эгенер миомогеш, ижире фикире у гьесуьсэгьэ эз дуьл-хьэл хуьшде шенденбу, пертово доренбу. И коре у эри хуьшде келе номус, келе хуьрди хьисоб сохденбу. Э глэдот одомигьой хэлгъ энуревоз мерд э домор хуьшде вемунде, э хуней энунисе эри энунисе глэйб, хуьрдире хунои. Бебере э пире руз энунисе бие кук ю дору, эз кемер ю оморигьо, домор — кук кес нэгл.

Имогьой дуьл хьэлвочи лап шор, олхогьин бу. У имогьой хуьшдере хумне зеренбу э ужире косиб-глони эз товун комики э овосуне ихдилот сохдени, э нэхэбереки эз хори хэзине офде, гьебо глошир бири. Унегуьре у неки келегеди сохденбу эз глошире, деслове домор хуьшде, гьемчун э дуьл хуьшде гьозор гиле эдембу «худо рази» гуфдире эри энунисе, лово хосде, худо днеш девлет, пулмол энуре эид соху, сад сал глумуьр ве жунсогьин дуь уре.

Имогьой сэхьиб эн ингьэде пул-суьрх биренки, э дуьл хьэлвочи омо тозе ниетгьо. У имогьой эри хуьшде фикир сохд, хьэлвотукуй хуьшдере эри фирегъ сохде, хуб оводу, рач сохде гьэд энуре, муьшдеригоь омбарте биев гуфдире, гирде эри хуьшде э кире дуь фэхьде не сажумечи, э угьо тапшуьрмиш сохде гьеме коре, ю вэхд хуьшдере эри гировунде э олхогьини, форигьэти э глэрей эн обурлуье келемердгьой эн шегьер. Имогьой у эри хуьшде хьисоб сохденбу, ки ижире рузгор гировундеи э хуьшде э ю лонгьин, у имогьой эз омбаре одомигьой шегьер, худо мебуро, кем нисди, эиде: у сэхьиб гьозор монет эршефини, хуьсуьр эн келе глошири, бебей эн гуьзеле духдери. Эзижире бэхд э сер энунисе омор эйло, хьэлвочи эри хуьшде гьечи фикир сохденбу, ки худой офирогор, нум ю э ники гирде биево, э гьэвл-хьол ю дерафде, Ошир Гьэзей Лугьире эри энунисе шолиехъ фирсори уре эз тенги эри э говлеи ведировунде.

Хуьшдени Марал эз ело шор бу, эз елойге могьбул бебешу юре э Ошир Гьэзей Лугуи дори гуфдире. Гьовой эни гьевдегь сале гуьзеле духдере, гьелбет, эри верасире четин небу. У шор бу юреш имигьой одохлуьни гуфдире, эриюш эри де духдеригоь-гере хуно глэруьси мибу. Имогьой эзу пушоте глэруьс биребируьтгьо, э шуьвер рафдебируьтгьо хэгьергилигьой энунисе уре диренге, кимигьо езугьбери, дуьлсухуни сохде эри энунисе, кимигьойге эз рачи энунисе бэхили сохде, э руьхшени, ком вегирдеиревоз пушотеинере хуно э у вохурденге нигуют эз ю: «Туй гьелеш э шуьвер не-рафдей? Текей нунисе поисдей э хуней бебе? Э ки денширей? Небуге э кукгьой беггьо, базургангьо денширей? Бигьил буре

дне е худо доре гъисмет туь имуре хуно. Туь нисе дануьсде беге: «Э сер гуьл гешдуйгъо э сер гуьгъ мофдону?..»

Марал шор бу гъсмчун эзу товуне, ки гъетте у шев у хосде-хунд бире, сэхьиб келе бэхшгъо бисдо. Эри эню одохлуй ю ченд жире раче бугьолуье парталгъо овурди, эз энгуьшдери гъуьдуш-бенди бэгъэй е гъулбогъ, е бугъозалти, гушворгъой бурлиянт дери. Екиш э шуввер гъисдигъо хэгьергилигъой эню ижире чигъоре, бэхшгъоре э чум хуьшдеш, э хов хуьшдеш недири. Одохлуй ю сэхьиб келе богъгъо, хуногъи, э сер фейтун гешде, вегире одо-мини, дусд, хьэрмэхь эн келегъой шегъери.

Эз елойге, чуйтам гуфдире омоге, духдер хьэлвочи могъбул, дуьлхуьрд бу у зен Ошир Гъээей Лугуи мибу гуфдире. Недениши-ре э Гошири эн одохлуй эню, эгенер ихдидейери эн Марал, э дес ю мидебисдоге у э Ошир Гъээей Лугуи гъич нирафд, эзу суьрх не гъесел тигъи мибисдогеш. Себеб энижире фикиргъо, могъбулигъой эн Марал бу эзу товуне, ки угъо эз елош той еки небиреи, домор эз дуьли ю небиреи. У кеми е бисддуй-бисдсе сал желе бу эз одохлуй хуьше. Ошир Гъээей Лугуи эз гъуьмуьр гъеле чуйлсале зиьд небугеш, эри гъевдегъ сале Марал «келе мерде» хуно нушу доренбу. У э пушой эню чуйкле гъэилле э пу-шой эн нешинохэ келе одоми гъэйб кешуьгъоре хуно неки лап гъэйб кеширенбу. Сер зиьди. и гъолинде, огъире, текебура одо-мире мидиге, жовоне одохлуй энуре гуйге сегъм шиширенбу, зугъун ю кут бире э лэгъэй ю домунденбу.

Э гъэд е мегъ Марал хосдехунд э хуней бебе дерики, Ошир Гъээей Лугуи уре э фейтун венишунде, дуь гиле э кино бердебу, комиреки инжо одомигъо «илизион» гуфдиренбируьт. Согъ рэхь, э вэхд киноре фегъм сохдеи Марал э ён эню гъе сергъуз нуьшден-бу. Ошир эзу гоф минуьрсиге у э жигей жугъоб энжэгъ сере ми-жумунд енебуге гъе е жире: е «эри», е «нэгъ» мигуфди. Не и чуйл сале домор, эз руй, буй-бала диеш «пирте» веде биренбугъо мерд, комики эз зугъун дедеи хуьше бэгъэй лап хуб дануьсден-бугъо зугъун урус, азербайджани не французире, гозитгъо, книгъо хунденбугъо, э гъэрей членгъой Думаи шегъери мэгълуьм бугъо чуйн еки эз лошунлуье одоми, оммо э и раче «вэхъшие» жо-воне одохлуй хуьшдеревоз, «хьэрф» чуйгге э чум хуьше неди-ригъо торике, соводсуьзе, эз хуне-мэхъэлей хуьше бэгъэй де жи-гейге недиригъо духдеревоз, у гоф нисе офденбу эри гуфдидире, уре э гоф овурде нисе дануьсденбу.

Шев гъэруьси кем мундебу духдер хьэлвочи, серсу бире, неви-рихде эз ки эню э хуней бебешу.

Руз гъэруьси, гъэруьсе э хуне овурденге, гъетте сер шев бире, чуйтам гъэдот гъисдиге, енггъо дефирсоруйт доморе эки эн гъэ-руьс э жейлее утогъ эри гелин-гъев бире. Э келе хьэёт эн Ошир Килэхь Лугуи, чор тараф эн комики э гъуьндуйре сенгъгъой бо-

руиревоз кешире бируьтгъо, гъуногъгъо эдембируьт хурде, кейфсохде. Э сер фирегье холинчегъо, сумогъгъо, эри энугъо вераюнде оморобируьт буле суфрегъо э э жуьрбежуре гюшгъо, нухорушгъо, закускагъо ве ичкугъоревоз. Гъэд эн хъэет рузе хуно товушбу эз ченд дегесунде бергулугъо.

Енгегъой эн домор нен гІэруьс гьетте доморе эки гІэруьс декуьрде, ишу поисдуьт э куьнди дер э гузети. Эз тараф гІэруьс енге бу е келе зен, сифет гъуьж дироморе, гъиругъгъой коврегъобой аталаси ю сурме гирде. У момуй эн омбаре зенгъой шегьер бу. Марале у эз гІэлиревоз шинохденбу. Дедей Маралигъосогъ гисдики у момуй энущ бу. Эз тараф домор енге бу е эз гІуьмуьр миёнее мерд, еки эз дуре гъовумгъой эн домор, эри энугъо э фэхълеи кор сохденбугъо. Чуйтам гІэдот буге: домор шев гІэруьси дир некешире биё чодуре гІэруьсе ведировуну дугъ э енгегъе. Угъо эз тараф ишу, чодур бирмунде, биё мэгІуьм сохут э куьнде одомигъой домор, домор не гІэруьс э шори-пикиревоз «гелин-гиёв» бирет гуфдире. И хэбере гье у шев угъо биё расунут гьемчун э бебе-дедей эн гІэруьсиш.

У шев Ошир Гъээей Лугуй э ки гІэруьс дироморенге эри гелин-гиёв бире, Марал сергъуз нуьшдебу э сер хъэлов, дешенде оморобугъо э сер эн е келе гуьле-гуьле холинче, гьемей хори хунере дегирдебугъо. Э тен энугъо е назуке сипре, кем ехэн очугъэ шеи эврүүшми вебу. Сер энугъо бирэхъне бу. Дугъ гъолинде бендгъой муй сер энугъо, эз сер душгъой ю, эн гиргине синей ю фураморе, гуьмбез зеребируьт э пушой энугъо э сер руй эн коврегъо лухъуьф эврүүшуьми. Э дивор, э звер сер энугъо э е рангсуьрхие чорчуьбе дери вебу кел рангис сирот эн сэхъиб хуне — эн Ошир Гъээей Лугуй.

И ченд салгъо бие мундебугъо чуьл сале домор гьейсэгІэт и раче гІэйбкеше жовоне одохлуй хуьшдере виники э сер хъэлов, э муьдириевоз дениширигъо э ю, гьеусэгІэт билбуле хуно бисдо. И эз хоснет олхогъин, гьемише сабуьрлугъо ве селигъэлуь бугъо мерд, гьейсэгІэт парталгъой хуьшдере теретэгІди векенде, шенд угъоре гьерчуьтам бисдо э гъиругъо холинче, нефес ю вепичерере хуно куьнд омо эз гІэруьс. Эз душгъой гІэруьс гирде, у тэгІдитэгІди вено сер энуре э сер фирегъе, гъуьндуре болуш. ГІэруьс гьетте винире бирэхъне, гъолинде, муйлуье сине, жендек эн э сер ю гъуз биригъо доморе, рушверие пура сифет энуре э сер сифет хуьше, тасире нефес энуре э сер нефес хуьше, у гьебо зэхълевежэгъэ хуно бисдо, гьемей ю лерзи, кулок шувунде велг доре хуно. Дуйл энугъо гуйге эз гІэйб, эз терс, эз негиреи э ки энугъо гьейсэгІэт пара чатламиш мибу. Эри Марал гьечу омо, ки эгенер у е дэгъдэгъйгеш домундге э гъэл эни «муйлуье ою» дуйл ю эз расдекиш нивотову, пара мибу, мимуьруь. Марал бирден эз некуми е буьруьж вегирде, э зарбевоз ведешенд хуьшдере эз гъэл энугъо,

серсуре хуно вэхшд эз хьэлов, пой бирэхьне видов-видов омо э куьнж хуне. У сифет хуьшдере э десевоз пэхьни сохде, сер гирд э зэхьлевежэгъи, э хуьшде недерие одомире хуно эри хьэрой сохде:  
— НэгI!!! НэгI!!.. Эз ме куьнд мее! Вой дедей!..

Э и туьтем эз расшид эри жовоне гIэруьс гьечи омо, ки юре киниге э суруле, бирэхьме десевоз гьуьл зере э мугьорей эн сегьмлуье ою дешенди, комики гьейсэгIэт уре пара-жарче мисо-ху. Уре воисд те у гене оморе э сер энун эри вирихде, жун хуьш-дере хилос сохде.

Домор виники гьовой эн духдере, у э чуй хьол омоге гьейсэгIэт, гьеебо эз пиьни ишор бире одомире хуно бисдо. Гьемишеине сабурлуьи, олхогьини энун гьеусэгIэт вогошд э ки энун. Те ебо эз Марал куьнд оморе, у ебо тэгIди несохде, парталгьой хуьшдере вокурд.

— Хомуш бош, хомуш, жон Марал,— евош, э нерме, мигьровуние сесевоз гуфди у эз гьирке сохде, келе-келе гирисде, шуршур гIэрсгьо рухундебугьо гIэруьс.— Бэхшлемиш сох э ме, туьре чуйтам воисдеге гье гьечу бугу.— У е кем э хуьшде демунде, гуфди гене: — Воисдениге ме гьич э туь дес низенуьм, мизигьим бирор-хэгьере хуно. Эгенер туьре лап воисдениге вогорд э хуней бебешму. Эз ме бебешмуре эри рэхь-пули доремгьо пулгьо э хотуртуь е кепкиш нивегируьм эзу у туьре эри вогошдеи серкуш незенуь, гоф негую, инжишиш несоху. Гьеме ме туьре доре бэхшгьош мунугу эритуь. Ошир Гьэзей Лугуи гене поисд, и дес диеш э хуьшде омбарте демунде, песде э мбгьбуле, оймо жуьргIэтлуье сесевоз мугу: — Э нумаз э жэгIметиш мигьилуьм гуфдире, мэгIлуьм сохде, туь чуйтам э киме хьэлол, духдер оморейге, гьечу духдер хуне вогошдей гуфдире, туьре хою гуфдире туьре воисденигьо жогьиле кук...

Марал гьейсэгIэт э-де фикиргьойге дебугеш, эз зир чум е пертевуш виники, у э энун супой непоисди, парталгьой энун вокурден гье гьечу, чуйтам эзи е ченд минут у эз дер дироморевуге, у и гофгьой энуре шиновусде, е кем хомуш бисдо. У диеш хомуш бисдо, бовор сохде э гофгьой энун, кейки Ошир Гьэзей Лугуи и гофгьоре гуфдиремунде, тэгIди несохде, ведерафд эз утогь энун, дер энуре хуб сэхд сохде эз песой хуьшде.

Гьетте домор эз утогь гIэруьс ведироморе, енгегьой энун, э лушой дер поисдебируьтгьо э гузет энун, суьфде ебо денишируьт э дес энун. Диренге э дес энун чодур недери, угьо омбар мэхьтел мундуьт. Ошир дануьсденбу: эгенер у гуфдиге эз енгегьо гIэруьс нисе гьишде гуфдире юре куьнд оморе эз хуьшде, енге-келе зен мидарав гьеусэгIэт э ки энун, сер мигиру гIэруьсе эри хоши гирде, терс доре, э номус дешенде, гуфдире:

— И чуй кори туь сохдени?. И эри гьемей гIуьлом биренигьо

корн. Сер гъемс э е туморе, сертуь э е туморейге дери беге? Белки е кор-чи гъисди, туь терсирени, унегуьре нисе гъишде?!.\*

Енгегъо э гІэруьс хъэлово небошут уре инжимиш несохут гуфдире, домор эз куьф хуьшде ведешенд дуй тозе червонце, екире э дес е енге доне, скигере э дес е енгейге, песеде э олхогъинире-воз ве разимендире-воз мугу эзугъо:

— ГІэруьс екем нэхуши. Э ки энун медаарит, уре инжимиш месохит. Бигъил форигъети вегируь. Согъ бошит, 'бурайт нуьшит э гъуногъьгьоревоз.

Гуфдире и гофгьоре эз енгегъо, домор юш ведерафд э хъэет э ки эн э гІэрисию оморегоргъо, эз руй олхогъин, рази, шор. Унегуьре у шев екиш недануьод чуь 'бисдоге э гІэрей гІэруьс не домор, чуь гирошдге эз дуьл эн Ошир Гъэзей Лугуи.

Гелин-гиёв энугъо бисдо энжэгъ е мегъ гирошде бэгъдо.

Домор хъэлвочи эз сер-сифет, эз жендек, эз олхогъине хосиет хуьшде е келе жонлуье, жунсогъэ одоми нушу доренбу. Гъич екиш егилеш недиребу уре у туьндлемеиш бу, гъаежон бу, эз хуьшде ведерав, э сер гьерки бисдо хъэрой соху, енебуге тэгди соху. Уре куьнд шинохдогоргъо э товун энун ченд гилегъо ижире томошее гъозие ихдилот сохденбируьт, комики неки шогъоди дорени э товун гъэдерсуьз олхогъине, сабирлуье хосиет энун, гъемчун э товун энун кор, ки у недане одоми нисди гуфдире.

Егиле э заседаний Думаи шегъери эдембу пуьруьш сохде оморе е «назуьшлуье» пуьрсуьш э товун э шегъер вокурде оморебугъо зинохне. Е зен ференги эзи е ченд сал пушо овурдебу э хуьшдеревоз е десде жогъиле кучерне духдергьоре, зенгьоре. Эз севдегергъой жигеи э мэгІемеле пул вегирде, вокурдебу э куьнди Шуирински гъопу е зинехоне. Омбаре вэхд негирошд, «корхоней» эни мадам гъечи келе гъэзенж овурд эри энун, ки у неки дануьсд гъэрдгъо, мэгІемелегъой хуьшдеге вогордунде, оммо гъемчун бисдо-еки эз пайшикгъой эн келе ветэгъэй жэгъи э куьндигъой Дербенд.

Оммо эзи биёбурие беднуме хуне э шегъер вокурде оморе эйло, могълугъ эн комики лап сэхд дошденбу гъедимие гІэдотгъо-шуре, номус, хъэёменди хунегъо, кифлетгъошуре, омбаре бебегъо-

\* Пушотегъо э куьгъне гІэдот гуьре, эгенер шев гІэруьси домор не гІэруьс э гелин-гиёв биреки, гІэруьсе чодур (ейлугъ хуни) нибисдоге, уре гъе у шев эн гІэруьси миёсде вогордунде оморе э биёбури ве нэгІетиревоз э хуней бебе-дедей энун. Э тен энун миёсде вокурде оморе парталгъой мердуне, е бенд муй энун бурра оморе э хэнжелевоз, сифет ю совусде оморе э гъурум эн тов кинлере-воз. Гъечи ижире духдер неведироморигъо гІэруьсе венушунде э кул хэр, руе кефел эн хэр, э гъовой «Ошгуновое гъоволевоз» берде уре э хуней бебей ю. Бебе енебуге бирор эн гІэруьс миёсде куьшде уре э демой дер хунешу, э гъечиревоз вегирде эз сер ишу номусе, биёбурие, у овурдигъо эри кифлет, гъумолет бебешу. Эгенер э жун энун гъэсд сохде ниомогеш, у миёсде зигъисде э хуней бебе чуьн келе хетекор э пушой чум энугъо. Лап беде нифри эри духдер хуне пушоте бу: «Ошгуновое гъовол куфде биёво эритуь!»



дедегьой эн кифлетгьо лап келе бирази ве глоси бируйт эз товун ижире зинокуне э шегьер ишу бирей. Э песой эни Шурински гьопу нэхире себэхьмунде кура сохденигьо, шохьонгум овурденигьо жиге бу. Гов, кечи бирегоре одомигьой шегьер гьер себэхь мивовурдуйт инжо мол-гьэрешуре, гьер шохьонгум оморенбируйт эри берде. Инжо угьо кимвэгидо диренбируйт эз зинехоне ведироморе пиёне салдатгьоре, луги-путигьой шегьере э гьеле-гьэл моче-моч сохдеки э нхэн лов, сер, сине бирэхьне хьэёсуьзе зенгьой эни зинохонеревоз. Омбаре хурафатие одомигьо лап дуьлпесо бируйт, терсиренбируйт, ки эз серботи эни нолоигьэ мадам, и «мурдале хунере» вокурдигьо, худо гьэгьр сохде э шегьер ишу, неёру э сер эн э сер эн Содом не Гоморре \* овурде зэхмгьоре. Унегуьре угьо э коллективни эрзошу нувьуьсдебируйт э сер эн властгьой жигей, э комики сэхд талаб сохдебируйт дир несохде сэхд сохде биёв гуфдире зинохоней эн мадам, комики «биёбурини эри шегьер ве охмурини эри хьэёменди инсони», хуьшдени эн мадаме е дуьсдогь сохдени дешендени э гьэземет, енебуге пиш сохде ведекуьрдени эз Дербнд.

И эрзой эн дрбендигьоре-мисурмугьоре, егьудигьоре, эрменигьоре э фегьм сохдеки, кими членгьой Думей шегьери, терсире э пушой жэгмет эн шегьер усол неведировт, ишуре бихьёменде одомигьо нэхунут, гье усэглет рази бисдорут э эрзо нувьусде оморигьо талабиби энугьоревоз. Оммо сербоши эн шегьер рази небисдо э ижире «суруле чорегьоревоз». У рази небирен хуьшдере гьечи мэглуьм сохд: и зинохонере мадам вокурди э гьонуневоз, ихдиёри вегирде эз хуьшдени высокопревосходительствой энугу генерал-губернатор эн Дагестански область, ки ижире заведениегьо гереки «эри лап кем сохде гьурбунигьой темпераментгьой жэгмиетире», песеде гье ижире хунегьо гьисдуьт э омбаре шегьергьой эн «цивилизованни гуьлом». Ижире хунегьо гьисдуьт гьемчун э шегьергьо Порт-Петровск, э Темир-Хан-Шура, чуьтам гуфдиренуьтге, э бинебуз эн хуьшдени генерал-губернатор.\*

Унегуьре, мугу, губернатор, имуре ихдиёр нисди э гьонуневоз, э ихдиёри эн генерал-губернаторевоз вокурде оморигьо зинохоней эн мадаме эри сэхд сохде, хуьшдени энуре эз шегьер ведекирде. У энжэгь мугу, ю гьэршу нисди, эгенер заведений энугу гировунде омоге «э е глэмеллуьте жиге», дурте эз пушой чум жэгмет шегьер э хотур гьэгьр протест энугьоре невэхизунде.

---

\* Э гуфдирей Туро ве Гьуроневоз худо глэтош рихунде, сухунд, вечарунд, гирбегил сохд шегьергьой Седуьм ве Гимроне (Содом и Гоморро), куьшд гьемей одомигьой эни дуь шегьере, угьо диное, гловункоригьо сохденибируйт гуфдире, пуч сохд гьеме мэхьсуьлгьой энугьоре. (Библия. Бытие. (Бершит) XI, 24—28.

\* Резеденцией эн генерал-губернатор Догьисту э шегьер Темир-Хан-Шура бу.

Э и заседаний эн Дума эри эни кор теклиф сохде оморегу-  
гьо мадам гье усэглэт эз жигей хуышде вэхишде мугу, ки ю ра-  
зини эри гировунде заведений хуышдере э е жигегейге, эгенер  
рэхьбери эн шегьер доге гьеме хэржигьо ве заралигьой энуре,  
ологьобуль гьисдуйтгьоре э вокурдеиревоз тозе зиноконе ве э гъэ-  
дер вэхд бикор мундеи энуревоз, небуге у шуькеет мисоху эз дес  
энугьо э сер хуышдени эн огьо генерал-губернатор...

И талаби эн мадам терсунд, э четини дешенд келей эн ше-  
гьере. Хэзиней эн шегьер гьечинигеш косиб бу. Пул вес нисе  
сохденбу кучегьоре бегьем эри гьир зере, мостовой гирде, товуш  
сохде, хьэжотхэнегьоре э вэхд ю темиз сохде, герек гьисдигьо  
оводунеэтире э шегьер гировунде. Унегуьре у эз теклифи хуышде  
гье усэглэт атказ сохд.

Эрзой эн дербендигьо эз сер нерафдки гьеусэглэт инжо сер гир-  
де омо хьэрой-хьэрой, дуь екире нифри сохде, дуь э еки офдоре.  
Е гъэдер вэхд заседаний эн Думаи шегьери э жевгьулье духон  
хумне зерере хуно бисдо, эжеки лап пиён, серхуш бире одомигьо,  
ичку э келлей сер ишу вешенде, сер гирдетге дуь э екиревоз  
женг, гьолмогьоли сохде. Э глэрей эн членгьой Дума, рази би-  
руьтгьо э гофгьой эн сербоши эн шегьеревоз эри гьишде дес не-  
зере заведений мадаме ве эн де членгьойгей Дума, гирденбируьт-  
гьо тараф дербендигьо нуьвуьсдигьо эрзоре, веромо лап келе  
хуьжет. Уьткеме, текебура, глэсуьллуье беггьо, огьурлуье глос-  
ширгьо, обур ишуре вир сохде, сер гирдуьт, десгьо, муьшдгьоре  
вежегьунде-вежегьунде, келе-келе дуь екире нифри сохде, вешмер-  
де-ведоре, терс, гьелебуле доре дуь екире. Э глэрей эн членгьой  
Думаи шегьери е Ошир Гъээей Лугуи бу э и гьолмогьол гъэриш  
нисе биренбугьо. Э сер нерме куьрси нуьшде, фирегье кемер  
хуышдере э нерме кемер энуревоз, сернуьггьорее десдечуре евош  
э дес жумунде э ижире келе сабур ве олхотгьиниревоз нуьшдебу  
э жигей хуышде, ки гуйге у инжо гьичиш нисе диренбу ве гьичиш  
нисе шиновусденбу. У э и вэхди эзи дорихмиши кеширшенигьо  
одомире хуно дениширебу эз пенжерей дуь тебэггьэи хуней эн  
«городское управкение», э пушой комики бу мейду, эжеки поис-  
дебируьт э зир егьер дерие глэсбгьо, фейтунгьой эн членгьой Ду-  
ма, нуькергьо, фейтунчигьой энугьо, э гузети энугьо. Э звер, э  
савзелуье, берхите хуно кешире оморегуьо душ эн Джалгански  
догь гьуьндуьр, буьзуьрг поисдебу гьедимие гьэлебенди Нарын-  
Кала — лоле шогьоди эн чендсадсалине торих эни куьгьне ше-  
гьер, эн келе хуьрмет ве келе биёбуригьой энур.

Энжэгь увэхди, кейки кими лап хуьршлуь, туьндлемиш бисдо-  
рутгьо беггьо, антиггьее парталгьой черкеси э тен ишу вери, сер  
гирдуьт э салланмее гъэишгьой нуьггьорейшу вебируьтгьо хэнжел-  
гьоре эз гьоб ведешенде, сербоши эн шегьер минет сохде эз  
«глуьзетлуье бебегьой эн шегьер» хомуш бошут, «сабур, эгьуьл

ишуре вир несохут», полицмейстер хээрэй вегирде э сер энугьо, терс доки угьоре эри огол зере «наряд полицияре» порядка венгесде», ве эз терс энугьо лап хьэлежигер бисдогьо мадам, белгьой эн дуразе ковре, сине рэхьое булши хуьшдере те ён кефел хуьшде вокошире э жив-хьэроевон вирихде ведерафдки эз зал, эхириш Ошир Гьээей Лугуи недуьл-недуьле хуно жуьмуьсд э жигей хуьшде, тэГди несохде вэхьшд эз сер куьрси. У э бешгей десдечуй хуьшдеревоз е ченд бо зе эз паркет эни тенге зал, еГни огол зере э и тегьеревоз угьоре хомуш бошут гуфдире, гуш венуьт фикир энуреш э товун эни кор. Эхирки угьо сокит бисдоруьтки, Ошир Гьээей Лугуи, комиреки хубе хуьрмет бу э Глэрей энугьо, э дусди ве суьпле хэндеревоз ебо дениши э гьеле томом серин небире-бируьтгьо, нефес ишу гирдебируьтгьо коллегагьой хуьшде, песе мугу э олхогьине, саламете сес хуьшдеревоз.

— Фикирме гьечини, хуьрметлуье огьогьо, эгенер Глэмел нисе оморениге сэхд сохдеи заведений эи м... мадаме, рэхьбери эн шегьер нисе дануьсдеге эри вегирде э сер хуьшде хэржигьоре, эри э «Глэмеллуье жигейге» гировунде уре, ме эдее доренуьм ижире теклифи... — У десе тик гирд, еГни бигьилуь юре те эхир фикир хуьшдере гуфдире.— Энжэгь, хосденуьм эз ишму те ебо гофме верасде, лэГлэймере мезенит!.. Эриме оморенигьо э ижире овхьолет энжэгь е рэхьи, е чорей. Заведений мадан мунгу гье э жигей хуьшде, оммо э ижире игьролевоз... у вегируьгу э сер хуьшде гьэрдхунди эри дир несохде вокурде э иловлей хьэет эн заведений хуьшде боруй сенгьи, чор гез гьуьндуьрию кемте нэГ, пенжерегьой эн хуно веде небирени, э и тегьеревоз одомигьой шегьер невинуьт чуй бирениге, чуй гирошдениге э и заведений мадам ве хьэет эн у.

Гуфдире гереки, ки эз ижире теклифи эн Ошир Гьээей Лугуи гьемере хьэз омо, эз дуьли гьеме бисдо. Коргьой гуюгьоре хуно: «Гуьргьош сиронни, гусбендгьош согьи». Расдире гуфдиримге, еки энугьореш эз дуьли нисе воисденбу гьээрор эн губернаторе пузмиш сохде, э сер гоф энугу гоф оворде, комиреки угьо хуьрмет гирденбируьт ве эз комики, гьелбет, терсиренбируьт, чуйш гуфдириге — падшогь норе одомини. Эзу бэгьэй е пара членгьой эн Думаи шегьери, гьемчун кими эзу беггьо, Гюширгьо, комигьоки гьечи сэхд, жуьрглэтлуь талаб сохденбируьт эрзой эн нуьвуьсдегоргьо э жиге оворде биёв гуфдире, ишу хуьшденишу Гювунсуьз небируьт. Кими энугьоре эз пэхьники эн муьдие зенгьо, хунеигьошу хьэз оморембу дерафде, «сер кешире» э «кефлуье заведений» мадам, гировунде э сэглэтгьоревон, кими вэхдгьо согь шеве э гьэл «гьуригьой» эн у. Кими энугьо дусди гердунденбируьт э хуьшдени мадамевоз, комики гьеле юш келе зен небу, эз жендек, буй-бала, сер-сифет, жирей партал вокурдемун ю омбаргьоре э темэхь оворденигьо бу.

Эхирки бэгъдовой эни гофгъо, хуьжетгъо э товун эни «на-  
зуьшлуье» пурсуьш э протокол эн заседаний Думай шегъери  
нуьвуьсде омо ижире, «торихлуье» э «эгъуьл Шелмуь» гуьнжо  
гъисдигъо гъэрор: «Хуней эн мадам гъишде биевгу э жигей ю,  
оммо эз гъер гараф кешире биевгу бору гъундирию чор гез кем-  
те нэгI, э унжо дебиренуьтгъо зенгъо веде небошут эз пенжере-  
гъой эн у ве э герек нисдигъо вэхд неведировт эз гъопу буру зуло;  
кире воисдениге эри вокурде гъе ижире хуне, ихдиёр дорени эри  
вокурде гъе э ижире игъролгъоревоз».\*

Оммо Ошир Гъээей Лугуи гъечи эз руй лап олхогъин, сабур-  
луь, жонлуь, пегъливоне хуно веде биренбугъо, гъечиниге келе  
нечогъ ве бедбэхде одоми бу. Шуьгъэм эн у зэгIиф бу, дуьл, ду-  
гъуй эн у хэрэб бу. КимвэгIдо уре гъечи эз дуьл гирденбу, гуйге  
уре эдее хуьрсенг\*\* бугъмиш сохде. И гIошире одоми, комирека  
бу минкини эри хурде гьерчуь юре воисд, дуьл ю хосд, хъэз сох-  
де, оммо эз серботи гурунде гIэзор, нечогъи хуьшде эз гъеме  
бэхдевере лезетлуье чигъой гIуьлом эри хуьшде нэгI сохдебу.  
У эз шир не шите суьзме, эз комики лап визор оморебу, комире-  
ки э келе войгесуьзи ве негиреиревоз хурденбу, де чигъойгере  
нисе хурденбу.

У лап хосденбу жовоне гуьзеле зен хуьшдере, лап мигърову,  
гIээиз бу э уревоз. У эри е кориш хотур эн зен хуьшдере нисе  
гъишденбу, омбар гъимиш сохденбу уре. Э ужире вэгIдош, кейки  
астма бугъмиш сохденбу уре, синей юре гуйге э манжаревоз  
сигъмиш сохде, лап сэхд гIээнет доренбугъо вэгIдош, у эри пэхъ-  
ни сохде эз зен хуьшде хьол хуьшдере, гъаежонлуь, гъереболугъ  
несохде дуьл энуре, хъэрекет сохденбу эри дошде э ранг хок бир-  
е сифет хуьшде олхогъини. У лов хуьшдере э мигъровуне хэнде  
вэберде, эз Марал пэхъники э лэгIэ дерму доноре, э ейлугъэвоз  
мипокурд эрэгъ шишире пушони хуьшдере.

Марал дануьсденбу, ки шуьвер ю нечогъэ одомини гуфдире.  
У гъич егилеш э у, енебуге э ки эн у шуькеет несохдебу гуфдире  
эз товун нечогъи, дорд дореигъой хуьшде, унегуьре Марал гьер-  
чуь дануьсденбу нечогъи эн у унгъэде сэхд, гурунд нисди, э ку-  
меки худоревоз белки гирошд рафдге.

Имогъой угъо е сал бу э екиревоз зигъисденбируьт. Э гъэд эни  
е сал Марал неки селт фурмуш сохдебу, чуьтам у суьфдеи шев  
терсиребуге эз шуьвер хуьшде, хьозур буге эри вирихде эз ки эн у,

---

\* Гъэрор эн Думай шегъер Дербенд овурде омори инжо гъе гъечу, чуь-  
там у нуьвуьсде омориге э протокол.

\* Хуьрсенг э чумевоз дире нисе биренигъо руьхьи. У гуйге э чул, э више  
тэхъно хисире одомире диренге, венуьшдени э сер синей эн у, сер гирдени уре  
эри тасуьде. Э сер эн у гуйге тIлисимлуье килэхъ вери. Гьерки э и туьтем да-  
нуьсдге дес кешире, килэхъ энуре эз сер эн у вегирде, у лап зу гIошир мибу-

эз секенои, эз гьеждегъо вирихуьгъоре хуно. Э гъэд эни сал у неки хуте, вердиш виребу э урезоз, оммо эз дуьл лап вогоси э у. Сабури, рэхьмедуьли, мигъровуни, дуьлфирегъи, деслови эни мерд келе хосдеи венгесд э дуьл жовоне зен э ки шуьвер хуьшде. У гьейсэгIэт гуйге эслогд гьис нисе сохденбу ижире эз гIуьмуьр келе тефигIэт дери гуфдире э гIэрешу, ки у жогьил, хушбуйбала, «муйлуье ою» нисди. Марал уреш дануьсденбу, ки шуьвер ю юре лап омбар хосде, гьимиш ю нисди юре, у лап гьечу очугъ нисе бирмунденбугеш муьгъбет, хосдеи, мигъровуни хуьшдере э ки эню.

Э шуьвер оmore эйло Марал диеш рач, гуьгчек биребу. У лап шор ве рази бу эз гьисмет ве зиндегунни хуьшде. Э шуьвер хуьшдереоз э богъгъо э рафдеки, енебуге э кучегъой шегьер э гешдеки э сер фейтун ишу венуьшде, у эз сер те пой геймиш э раче бугъолуье парталгъоревоз, суьрхгъо, бирлиантгъой хуьшдере доноре, э бархатлуье нерме кемер фейтун кемер хуьшдере э уьткемиреоз ведоре, э ижире вэхд у хуьшдере зен шогъе хуно гьис сохденбу, нуьшдигъо э сер тэхд э рачей эн шогъ — огъо ве шуьвер хуьшде. Хуьшдени келей эн шегьер, гIэсуьл ю эз гъэдимие дворянски гьумолет уруси гьисдигъо, э сер комики вери э сер шуьвер ю ухшеш зеренигъо килъхъ, угъоре эеки зен-шуьвере диренге, э эдеблуьиревоз килэхъэ эз сер тик гирде. Келей эн гарнизон шегьер, (Э Дербенд эз товун гьемише сокитсуьз бирей гIэрей эн Урснет э гьуншие Турция ве Иронеоз инжо келе гарнизон гирде оmoreнбу) куьгъне э ченд довгIогъо бэхш вегирде генерал э келе сипре бигъгъоревоз, бакенбардгъоревоз добонгъой эн зенгугъо верие тов-товие чекмегъой хуьшдере э еки зере, синере бируне ведешенде, жовоне, гьучогъэ корнете хуно э дилбоширеоз белли митирд. Жогъиле мердгъо, кукгъо эз зир чум э темэхъ ве бэххиревоз миденишируьт э и раче гIошире зен дуьл ишуре нугъор бердере хуно. Марал э дуьл хуьшде шори, келегеди сохденбу эзи ю диренбугъо коргъо.

Иллогъки келе шори ве келегеди гирошденбу эз дуьл эню у э шуьвер хуьшдереоз э сер фейтун вери, оmore расиренге э пушой гьуьндуьре нимелитгиргинее, рангибарангие тох сенгъи э келе гиргине муьхъкеме сутунгъоревоз, хэтгъо, шекуьлгъоревоз, эжеки энки эз зевери сенгъгъой эню вебу шекуьл эн хуьшдени Ошир Гъээей Лугуи — нишон эн девлет ве бэхдевере зиндегунни энугъо те согъ гIуьмуьрлуьгъ ишу. Сер ебо у э шуьвер хуьшдереоз эз гIэрей эни э сер онгурбогъгъой шуьвер ю вебугъо тох сенгъи гирошде эри эни гIэиле хуно надан ве овом бугъо дуьлшоре жогъиле гIэруьс гьечи оmoreнбу, ки гуйге у э хори нэгI, э хьофдимуьн тебэгъэй асму вери, эдее эз гIэрей менг не чуьшмере хуно тов доренигъо гъопуй эн женнет-генгIидим э генгIидим гирошде, эжеки гьемей рачи, були ве бэхдевери гIуьломи эритуь-

ни, эжеки гыч нисди не дерд, не гъэм, не нечогыи, не жейлеи, не муърдеи, эжеки энжэгъ кефи, хъэзи, шорини...

## БИЕ ЗЕН БИРОР — ЗЕН ЭН БИРОР

Гъеме одомигъо ховгъо диренуът: келе ве чувкле, мерд ве зен, Гошир ве косиб. Хубе ховгъош, зобуне ховгъош.

Эз лап гъэдимие девргъоревоз одомигъо жэхът сохдет эри да-нуьсде сур эн ховгъоре, чъуниге хов дирени, эйчуь одоми э хиси-реки дирениге жуьрбежуре, кимвэГдо фантастически ховгъо гуй-ге э эври биленуътгъо коргъоре хуно. Чъуниге мэГной эни угъо диренуътгъо ховгъо э гъеррузине зиндегунишу, э гъисмет ишу, эри хуби, никиниге, енебуге эри усולי, могъбули, бедбэхдиниге. Уне-гуьре э гъер девргъо миллионгъой одомигъо неки бовор сохдет э хов дире коргъо, гъемчун э гъер девргъо бирет «усдогъо», ховгъо-ре тэгИбир сохдегоргъо. Гъеле эзи чор гъозор сал пушо э гъэди-мие Египет нуьвуьсде омореву «ховнемс» («сонник»), эжеки нушу доре омореву дивисде жире ховгъо ве тэгИбири энугъо.

Маралиш омбаре хурофотие одомигъоре хуно бовор сохденбу э ховгъо ве тэгИбири энугъо. Оммо омбариш у раче, шоре ховгъо диренбу. Унегуьре эз дире ховгъой хуьшде у дуьлпесои, могъбу-ли нисе кеширенбу. Суфдеи мегъгъо у э шуьвер оморенге, у е гиле дире хов хуьшдере ихдилот сохдебу эри энугу, гузет сохде чув мутуиге у э товней хов энугу. Ошир Гъээзей Лугуи, лове э хэнде веберде, сер энуре сер эн гъэиле хуно тимор сохде, мугу эзу: хов-гъоре неки одомигъо, хъейвугъош дирени. У ховгъоре е мэГнош нисди, унегуьре э угъо бовор сохде, эзугъо е шори, енебуге могъ-були кешире герек нисди. Энжэгъ овоме, торике енебуге хурофо-тие одомигъо бовор сохденуът э ховгъо, э угъо фикир доренуът.

Нибу гуфдире, ки хундогоре шуьвер энугу э и гофгъой хуьшде-ревоз дануьсд верасунде, гъондурмиш сохде э «овоме» жовоне зен хуьшде э хов биренигъо коргъо гъеме дургуни гуфдире, э хов-гъо бовор сохде герек нисди. Оммо Марал эзу эулеревоз, гъэЙб кешире эз шуьвер хуьшде, дне е гилеш дире хов хуьшдере эри энугу ихдилот несохд. Оммо е гиле у эри хуьшде сэхд теслих сохд ёгъин эри гуфдире эри шуьвер хуьшде ю диритгъо хове, чъунки у виниребугъо хов омбар дуьлпесо, билбул сохд дуьл энуре. Уре воисд неки дуьл хуьшдере гъейсэгГэт тигъи соху эри энугу, гъемчун шуьвер э гофгъой хуьшдеревоз хомуш, олхогъин соху дуьл энуре.

Э и хов ю не шуьвер ю э фейтун ишу венуьшде, геймиш,— гуьйдермиш, дуьлшор, ловхэнде эдембируът э богъгъошу рафде эз рэхъ келе илчи эн богъгъой Дербенд. Фейтуне гъемишеинере хуно эдембу гъей сохде, вожей гъэсбгъоре э дес гирде, гъуьллуьгъ-чи-нуькер хуней энугъо шаздегъ-гъевдегъ сале кук Бобой. Эзи

келе рэхь гьер руз рафде-оморенбируйт «туьнде» фургьунгьой глэсби, евоше глэребегьой гомиши, глэтлуьгьо, э кул хэр венуьшде одомигьо, пейделуьгьо: богьбонгьо, фэхьлегьо э богьгьо кор сохденуьтгьо, чейтен, бил э душ вери, дигьбонигьо-ранжбергьо эз куьнде ве дуре дигьгьо, овурденбируьтгьо э шегьер эри фурухде э базар небуге э тукончигьо тэхуьл, глорд, мол-гьэре, хэмзегьэрпуз ве де чигьойге, песде эз шегьер эри восдоре берде э дигьошу нефт, спичке, жоме, чит, карасдигьой ранжбери.

Бобои юш э е шориревоз эдембу гьей сэхде бежид глэсбгьоре эз ён «сайлов» эн э рэхь дебируьтгьо глэребегьо, глэсбгьо, одомигьо. Эз бежид видовусдеи эн глэсбгьо муйгьой лужуьгьой энугьо эдембируьт лов бире э эвир.

Ошир Килэхь Лугуи у руз лап дуьлшор бу, эз салгьой хуьшде чентгэддер жогьил нушу доренбу. Э зарифатие гофгьой хуьшдере-воз эдембу хэндунде зен хуьшдере, юш келе-келе хэндусде э юревоз. Бирден э пушой тох сенгьи оmore расиренки, Ошир Килэхь Лугуи гьишд Бобоире поюнде фейтуне. Эз гьул зен хуьшде гирде, фиравунд уре эз фейтун, юш фирамо э уревоз. Песде э екиш е гоф негуфдире рафд зури-зури пушово эз гьэд рэхь, ён зере гирошде тох сенгьире, гьич э иловле неденишире. Гьечи рафде-рафде бирден у сур бисдо эз пушой чум. Э песой энугьо видовусд нуькер эн хуне — Бобои. Уш гье э ужиге оmore расиренки вир бисдо. Глэсбгьо бирден серсуре хуно бире, келе-келе шихьне зере-зере э фейтуневоз видовусдуьт гье э у рэхь, булуте хуно туз вэхизунде. Е ченд минут негиросд глэсбгьош э фейтуневоз эеки сургум бисдоруьт эз пушой чум э хори офдоре дерафдере хуно енебуге хьэл бисдорут дурей эн тове хуно. Дуьл эн Марал лап сэхд тенги, дуьлпесои, дорихмиши сохд, гуйге гьейсэглэт пара мибу. У хьэрой сохде-сохде, угьоре огол зере-зере, пой но эри юш видовусде э песой энугьо э сирогь энугьо эри расире: чуй бириге угьоре? Бирден гье и туьтем гьоворе эз некуми булут шиши, келе сесгьой гром-гром омо, э асму глэтоше тиркомугьоре хуно биренгьинегьо жесдуьт. Хори чемуьсд, лерзи, эз дорун хори омо сегьмлуйе сес вой эн женевере хуно. Гье и туьтем э пушой чум энугьо тох сенгьи лойлум хурде, вачаруьсд, чаруьсде э е келе гьембиз хурд бире сенгьгьо, пушой рэхь Марале ведебурра.

Марал терсире, хьэлежигер бире, шенд хуьшдере песово, божэхь дешенде. У эз божэхь хуьшде гье усэглэт хэбер бире, чаруьсд э хьэлов э лой шуьвер хуьшде, сэхд гьэл гирд уре, воисде юре хэбер соху, гуно гье гьейсэглэт эри энугьо и хов хуьшдере, олхогьине гоф шинову эз лэглэй энугьо. Оммо гьетте дес энугьо э жендек шуьвер ю расире, у э терс, мэхьтелиревоз кеши дес хуьшдере песово, гуйге гьэбер расиге э дес ю. Марал гьейсэглэт лухьхуьфе эз кул хуьшде пертово доре, зури-зури вэхисд нуьшд э сер хьэ-

лов, дениши э дуьлпесоиревоз, э сифет шуьвер хуьшде. У дегеш-дебу шенсуьз, э сер кемер, руй зверо, муйлуье, фирегье синей хуьшдере тик гирдере хуно. Сифет энугьейсэгIэт миле хуно сип-сипи бу, е дугъле хун недерире хуно. Э гъэд эн е шев вемасире бунгьой чум энугьейсэгIэт коври зеребируьт. Чумгьой энугьейсэгIэт рэхьо бируьт, миже некуфде дениширебируьт э сергьови эн хуне, лэгIэй ю вокурде, гуйге эдее сессуьз хьэрой сохдеге.

Марал теиногьой егилеш гьечи куьнд э чум хуьшдеревоз недиребу муьрде одомире. Дедей энугьейсэгIэт муьрденге у гьеле гIэлле бу, муьрдей энугьейсэгIэт э ёр ю немундебу. Эри энугьейсэгIэт оморенбу, ки муьрде одомигьейсэгIэт эз руй хисире одомигьейсэгIэт хуно нушу доренуьт: чумгьейсэгIэт, ловгьейсэгIэт энугьейсэгIэт сэхд биренуьт. УнегуьрейсэгIэт сер суьфде у угъэде нетерси, ченгъэдер мэхьтел мундге, гьейсэгIэт сер гирд уре эри жумунде, огол зере, хэбер сохде:

— Эй мерд! Эй! Чуьй, чуь бири туьре?!

Оммо Ошир Гъэзей Лугуи неки жугьоб недо э сес эн зен хуьшде, гьич е пертевушиш э лой юш недениши. Марал и дес лап «дуьлпесо», гьаежон бире, сер гирд э хьэлежиггериревоз эри шувунде уре, келе-келе хьэрой сохде э гьемей хуне, огол зере уре э нумевоз:

— Ошир! Оши-и-ир! Хьэлежигер месох мере! Туь эйчуь мере жугьоб нисе доре?!. Оши-и-ир!

Фикир энугьейсэгIэт кор, ки мерд энугьейсэгIэт зинде нисди, муьрди, биренгьейсэгIэт-нере хуно сухунд дуьл энугьейсэгIэт. У гьечи чумгьейсэгIэт, лэгIэй ю рэхьейсэгIэт гьисди муьрди гуьфдире у гьерчуь дануьсд, у и дес э хьисобовоз юре усол биренге, дуьл ю лап сэхд дорд доренге, хэбер бири, хьэрой сохди, э кумеки огол зери юре, оммо ю, «худо зере, фетге вегирде» э ижире вэхд зэхьмет энугьейсэгIэт э ширине хов дебири, нешиновусди сес энугьейсэгIэт, унегуьрейсэгIэт лэгIэй энугьейсэгIэт гьечу пара, чумгьейсэгIэт ю вокурде мундет. УнегуьрейсэгIэт у тэхсир муьрдеи энугьейсэгIэт эз хуьшде жусд.

Марал дануьсденбу шуьвер ю нечогъэ одомини гуьфдире, оммо муьрдей энугьейсэгIэт эри Марал беде некумире хуно, э гьизгьин герми гьейсэгIэт э сер одоми нэхэбереки терегр-жилид рихугьейсэгIэт хуно омо. У эз ело лап терсире, эз елойге э ижире фикиргьейсэгIэт-ревоз э дуьл дерики, серсоне хуно вэхьшд эз сер хьэлов, сер бирэхьейсэгIэт, пой бирэхьейсэгIэт, э е назуке шеиревоз, шивен сохде-сохде, сер синей хуьшдере куьфде-куьфде видовусд э хьэйт..

Чуьл руз, чуьл шев жогьиле бие зен, э сиегьейсэгIэт геймиш бире, э келе дерд-гъэм дери, гьич пой норе эз дер э буру неведерафде, э ёс нуьшдебу эри шуьвер хуьшде. И чуьл рузе у гировундебу э гIэрей э ки энугьейсэгIэт э «ёс хуне» оморегоре зенгьейсэгIэт э угьоревоз гирьейсэгIэт сохде, гирисде эри муьрдигьейсэгIэт шуьвер хуьшде. Раче сифет энугьейсэгIэт шев-руз дердлуь, гьэмлуь бу.

Гьеме согъ чуьл руз эн ёс, шебирор эн Марал Обой э хуней



бирор хуышде биренбу Э гъэд эни чуыл руз у шевиш э хуней хуышде эри хисире нисе рафденбу.

Обой не эз сер сифет, буй-бала, хоснетгъо, дивэ҃гъой хуышде неки э муырдигъо бирор хуышде ухшеш нисе зеренбу, угъо эслогъ бешгъэ бируыт дуь эз еки, чуытам гуфдирениге, гыч эз рэхъгъой энущ нерафдебу. Эз гъолинде, денуышдее, очугъэ сифете бирор хуышде, комики бу обурлуь, сабурлуь, рэхъмедуьл, фегъмлуь ве эгъуьлменде одоми, Обой лап бешгъэ бу И гъуьндуьре, гъит-хъэчере хуно бугъо довдогъие сивпенж сале раглуье жэгъэрее, остгъун фирегъе мерд, эз хоснет лап туьнде, сабуьрсуьзе, хуйгире одоми бу. Сифте энү сие черде, чигъретгъой сифет ю дуьруьжд, муйгъой эн бигъгъою дураз, сиегъ бируыт. Чумгъой энү, эн гъуьре жингове хуно, келе, гиргине, екем бируне ведироморе биьрут. ю — жигей эн ярай хэнжел вебу. Гъемей чигърет энү э одоми Пигил эн зир чепи чум энү эз чаккай руй энү сер гирде те чуней гуйге терс, сегъм венгесденбу

Э гъэд шегъер у мэглуьм бу чуьн лап келе женгесур, довгокор ве секо нелуье одоми. Эз е биразие гоф, эз е чуькле дуьлмундеи у гъеусэгIэт туьндлемиш, хуьршлуь бире, баруте хуно мидегеси, эз хуышде медрэфд, хэнжеле эз гъоб медешенд. Э жендек эн ченд одоми эз хэнжел энү жиге ярагъо вебу, у ю хуышденнюш ченд гиле э ижире женггъо яралуь биребу. Э жигей энү де одомиге тсимогъой дегъ гиле э гъэземет дешенде мномо енебуге э дуре хоригъой Сибирь э дерей жегъендем фирсоре миёмо. Оммо сер ебо уре эри эни женггъо, екикуьшигъо хъокимгъой шегъер дуьсдогъ сохде, у гъеле те ебо эри энү суд бире, хилос бире ведироморенбу: ологъие дусдигъой эн хуьрмет ю лап келе, звер бугъо келеи бирор, ведилуье член эн Думаи шегъери, келе бэхшгъо-пишкешгъой энү кумеки сохденбируыт эри хилос сохде Обое эз тенбихьи, эз э гъэземет нуьшдеи енебуге уре э Сибирь фирсореи.

—Оммо Ошир Гъэзей Лугуи сохденбу и коре эз омбар хосден е теке бирор хуышдере нэгI, эз женгесуригъо ве вэхъшие коргъой эн комики у лап визор оморебу, сер зиёди уре э келе хэржигъош дешенденбу, эз елойге эри энү келе дуьлпесоигъо ве инжимишгъо биренбу. У дуьбэхшиш хилос сохденбу Обое, чуьнки гъетте у гене э е одомиревоз женг гирде, куде енебуге яралуь сохде уре, гъе усэгIэт и хэбер э гъемей шегъер лов биренбу, эз товун эни серсоне бирор ю нум юш, эн кифлет юш беднуме хуне биренбу э пушой хэлгъ, егIни ю, Ошир, келеи бирор энү биреки, ижире одоми биреки э гъед жэгIмет жилов бирор хуышдере сэхд гирде, поюнде нисе дануьсде. Ошир Гъэзей Лугуи ю э коргъо, рафдо-ригъой хуышдеревоз хъэрекет сохденбу гъемише хуьрмет хуышдере эри дошде ве зиёд сохде э пушой хэлгъ, эн одомигъо, э гIэрей комигъоки у дебиренбу. Хубе нум, лоигълуье хуьрмет биреи

юре э пушой чум эн одомигьой, жэгИмист эн шегьер эри энэ эз мол-девлет кемте небу Унегуьре у кумеки сохденбу э бирор хуьшде эри хилос сохде уре эз тенбихьи, чуьнки дануьсденбу, ки эгнер уре эри омбаре сал дешендуьтге э гэзезмет енебуге фирсоуьтге э Сибирь — гэьйгъу, середерди эн е шеле гІэилгьой энэ, пес-песоеки зенде оморенуьтгьо, гьеме э сер ю момуну. Унегуьре нжире усоле перспектива эри энэ гурундте ве тэхьлте оморенбу эз э кумеки дусдгьо ве пура бобожник хуьшдеревоз уре хилос сохде.

Оммо хуьшдени Обой лап эз дуьл, жун хуьшдеш зиёд хосденбу бирор хуьшдере. Чуьтам гІэдот гьисдге э хунегьо- кифлетгьойму, эжеки чуьклеи гІэилгьо хуте сохде, тербие доре оморенуьт э руьхь хосден ве хьуьрмет гирдеи келеи бироре, Обой э сер нум эн гІэилгьой хуьшде нэгІ, эн келеи бирор хуьшде шовгІо сохденбу, эри энэ э руй хори эзу куньдте, гІэизите одоми небу, эзу гьемише шори ве келегеди сохденбу. Э хотур энэ у хьозур бу, гьич е тикеш дир несохде, э хуьшде недемунде, хуьшдере эри энэ э гІов, гІэтошиш эри доре, жун хуьшдереш герек бисдоге суьперде эри бирор хуьшде. Е гиле у е одомире, юре хуно женгесур, двгІокор бугьоре, э жуче, эри е дуьл мундене гоф э Ошир гуфдиреи, гье усэгІэт жингире хуно бире, ведешенде хэнжэле, э е зарбевоз зере, буррабу, эз жиге фушенде е гьул энуре. Уш э согь мундебугьо гьул хуьшдеревоз гье у туьтем кеши хэнжел хуьшдере: **Уре воисд зенуь хэнжеле эз келлей сер Обой, оммо дес ю чеп рафде, хэнжел раси э чепи гьутиней энэ.**

Дэгьмей эн ярай эни хэнжэл, согь гІуьмуьр энэ гьемишелуьг нишоне мундебугьо эри Обой эзи женг, бишерк сохдембугеш сифет энуре, Обой пешмуни, тенги нисе кеширенбу эри эни кор. Сер зиёди у э дуьл хуьшде келегеди сохденбу эзи дэгьмей ярай хуьшде, чуьтам игиде солдат келегеди сохдениге эз дегьмегьой жиге ярагьо э жендек хуьшде э у э довгІо раситгьо.

Оммо гьечи бу пушоте. Оморе-оморе гьовой энэ э ки келеи бирор хуьшде дегис бисдо. Обой денишире диренге, ки келеи бирор энуре гІэил нисди, дануьсдки у лап нечогьи, у сер гирд хуьшдере эри хьисоб сохде е теке мирос эн мол-девлет энэ. И фикир гьечу э дуьл, муьвэхь энэ жиге гирдебу, ки уре нисе воисдембу бирор юре гІэил бу, шори, мозол бебеедире у винуь. Унегуьре, Ошир Гьэзей Лугун бие мунденге у дуьвойне шор бисдо, оммо у жовоне духдер хьэлвочире хосджи, эз гэьгьр, гэзоб дуьл хуьшде у эри хуьшде жиге нисе офденбу. Эзу рузевоз у э ки бирор хуьшде дие гьич рафде-оморе несохд, э уревоз дие ние вохурденбу, гоф нисе сохденбу.

Э товун себеб келе гэьгьр, келе бирази хуьшде эз бирор у, гьелбет, очугь э екиш нисе гуфдиренбу. Э товун эни гэьгьр хуьшде э ки энэ э ён хэлгь гуфдиренбу гьечи: у гуйге лап бира-

зини эз бирор хуьште у хосди овурди гуфдире э хуней хуьште духдер эн е элчэгъэ, гIэсуьл, бине нисдигъо одомире, гIовдол-косибе, э и кор, эгъуьлсуки хуьшдеревоз, егIни пой, охмури зери э нум, гIэсуьл кифлет ишу, сер зиёди и «буйгирде хьэлвочи» сер энуре пучунде, гъозор монет суьрх — рэхь-пули вегирди эзу эри эни «нелоигъэ» духдер хуьште.

Оммо у э чум дире нисе хосденбугеш жовоне зенбирор хуьш-дере, гъозор жире бедигъо, зобунигъо хосденбугеш эри келеи бирор хуьште, уре муьрдеи бирор хуьште нисе воисденбу. Эзу пушотейне келе гъисс, муьгъбет е кемлей семе демундебу э дуьл энур эри бирор ю.

Гьелбет, себеб келе гIоси, биразии эн Обой бу бирор ю э нум; хуьурмет кифлет ишуре э хори зери гуфдире нэгI. Себеб биразии энур бу у кор. ки Обой терсиренбу и жогъиле духдер хьэлвочи, худо мееро, е кук незендуь эри бирор ю. Увэхди дие у сэхьиб, мирос эн мол-девлет эн бирор хуьште бире нидануь. Оммо имогъой эз некуми муьрдеи бирор энур, комики гьечу гIэилсуьз рафд эзи гIуьлом, гьомин сохд дуьл энуре, хилос сохд уре эзи дуьл энуре гIэзиет доренбугъо фикиргъо, гъэйгъугъой ю.

Гье эз суьфдеи руз Ошир Гъэзей Лугуи муьрденге, Обой хуьш-дере сэхьиб хунегъо-жигегъо, мол-муьлж энур хьисоб сохде, сер гирд э хуней энур, э хуней хуьшдере хуно эри серберэхьи сохде. гуфдире, буйругъ доре чуь сохде герекиге, чуь сохде герек нисдиге. У ю хуьшдению гоф сохденбу э подрядчикевоз, ченгъэдер одомире э фэхълеи гируьге э богъгъой бирор ю (имогъой э богъгъой эн ю), эри кор сохде, кире руьхсет, рэхъо дуьге.

КимвэгIдо Обой мидиромо э хуне, зенгъо э ёс нуьшдетгъо жиге, минуьшд, чор зани зере э куьнж хуне, жинговие чумгъой хуьшдере буьхъ сохде мидениши э зен бирор хуьште. Сиь пар-талгъой ёси, гъэмлуьи ве е кем зерд бире ширмовие сифет энур гуйге диеш рач, обурлуь войгелуь сохденбируьт уре. Обой, неденишире э взэхъшие дивэгI, кубуте хосиетгъой хуьште, гъэдуьр раче, мезелуье зене дануьсденбу. У эденбу дире, синемиш сохде э дуьл хуьште, ки зен бирор ю эз расдиш лап гуьзеле сери.

Обой эзи хьэлоле, хьэёменде одомигъо небугеш, гьеле эзи е-дуь орине пушоте те бирор ю муьрде, гьич э фикиргъой энурш ниомо, ки зен бирор энур юре хъэз оморе гуфдире. Не ужире фикире у неки э дуьл хуьште ниовурд, эгенер миомогеш у э хуьште гъэгър, гIоси бире пертово мидо ижире лоигъсуьзе бинемусе фикире. Эзу бэгъэй, неденишире э дуьшмени энур э ки духдер хьэлвочи, келе гъэгъри бирен энур эз бирор хуьште уре хосди гуфдире эри хуьште, эгенер е гъурумсогъ е доне усоле, гIэйбине гоф мигуфдиге э песой Марал, охмури шенуьгъо э номус, хьэёменди энур, Обой эгенер хэнжел вегирде шуьгъэм энур одомире сула нисохдгеш, микуфд уре те хьэл бире, остгъугъой ю сов бире. Оммо

имогъой бирор энү муърде бэгъдо, кор эслогъ ежирейгеи бу. Э гӀэдот бебегъе-келебегъе гуьре, эгенер бирор эн одоми муърде, эзу куж гӀэил немундиге, согъ гӀисдигъо бирор энү, шебирор эн бие мундигъо зен, хӀисоб бирени неки гӀонунлуье мирос эн мол, хуне-жигей эн муърдигъо бирор, гӀемчун шуьвер эн зен энү. Зен бироре ихдиёр нисди эри ведерафде эз ки энү, рафде э шуьвер э е одомиге.

Расди обур, хуьрмет э пушой муърдигъо бирор талаб сохденбу эз согъ гӀисдигъо бирор те чуьл рузи овил эри муърде верасде, шебирор неки куьнд ние биёв эз бие мундигъо зенбирор хуьшде, у гӀемчун эслогъ гӀич э е жире тегъериш ние бирмуну войгей хуьшдере, гӀис хуьшдере э ки энү. И кор келе беднуми, биёбури ве бедгӀэсуьли хӀисоб биренбу. Оммо Обой, комики гӀеле и пушогъо бэхшлемиш нисе сохденбу э нечогъэ, бедбэхде бирор хуьшде у, егӀни, нум, хуьрмет хунешуре хуьрд сохди, э хори зери духдер эн е бинесуьзе-гӀэсуьлсуьзе хьэлвочире хосди гуьфдире, гӀейсэгӀэт эз э ёс кура бирогоре зенгъо гӀэйб неоморе уре, десдей телуре хуно бируьтгъо дуразе сиегъе бигъгъой хуьшдере тимор, бурмиш сохде-сохде, э темэхъэвоз, дуь чуме буьхь сохде, э сэгӀэт-гъоревоз денишире поисденбу э сифет, серсине, буй-балай зен бирор хуьшде, эзу чум не вегирде. У имогъой Марале неки нифри нисе сохденбу, «нелоигъ», «гӀэсуьлсуьз» хӀисоб нисе сохденбу, гӀейсэгӀэт у уре э дуьл хуьшде лап раче, хун ю эри ю дуьш зеренигъо зен хӀисоб сохденбу. ГӀеле и пушогъо э фикир энү миомоки и зен белки эри бирор ю гӀэил мизендуь, сэхьиб кук мисоху уре, эз гӀэгър, хуьрш энү лап вероморенбу, чорей энү мисисдоге мирафд микуьшд зенбирор хуьшдере. Оммо у гӀейсэгӀэт бебей хьофд гӀэил бугеш, и гӀэил дусде мерде воисденбу эзи раче зениш, имогъой, худо гӀишдге, э е-дуь сал эри гӀэил сохде.

Марал, гӀейсэгӀэт э келе дерд, гӀэм дебугеш, гӀеме фикиргъой энү э товун муърдигъо шуьвер ю бугеш, эдембу дире э чуь тэмэхъе ве гӀорсуьзиревоз дениширениге э ю шебирор ю. У чумгъой энуре диренге эз терс гӀуьж дироморе, эз гӀэйб э пушой зенгъо гогъ гӀирмизи биренбу, гогъ ранг руй ю рафденбу. У лап терсиренбу эзи одоми, э чум дире нис хосденбу уре.

Сер зиёди шебирор энү, комики имогъой миесде бире шуьвер ю, дуьзени бу. Имогъой у сеимуьн зен энү бисдоге, у миёсде чуьклей зен энү хӀисоб бире, э келеи зенгъой энү сер зере, муьди бире, сикегъой энугъоре вегирде, э сер гоф энугъо гӀич гоф неовурде. У чуьн чуьклей зен э гӀэдотевоз миёсде э зир буйругъи энугъо дебире, угъо чуь гуьфдигеш, чуь сохдгеш гӀемере ветовусде, тоб доре. Хуьшдени эн Обой, неденишире э туьнде кубуте хосиет хуьшде э зенгъой хуьшдеревоз хуб бу, муьгъровуш бу. У зенгъой хуьшдере нисе куьфденбу, гӀэзиет нисе доренбу кими мердгъой-гере хуно. Зенгъой энүш хосденбируьт уре. Гьер зен энү хьэрекет

сохденбу, эз пэхьники э дуй екиревоз бэхьс берде, эри ширин сохде хуьшдере э пушой шуьвер хуьшде, дилег, воисдей энуре бегьем сохде, э хуьшде вогосунде.

Марал дануьсденбу э товун эни овхьолет. Унегуьре у эри хуьшде фикир сохденбу, ки Обой юре эри хуьшде вегирденге э зени, эхир-эхириш хотур зенгьой хуьшдере эри негьишден, э гоф энугьо денишире, толөгь мидуь уре. Увэхди у межбур мибу эри ведерафде эз ки энур е ихдйериш небире уре эри мироси сохде эз хуне-жиге, мол-муьлк эн муьрдигьо шуьвер хуьшде. Не эри рафде имогьой уре жигеш небу. Дедей энугьо муьрдебу у гьеле гIэилле гьисди, бебей энугьош — Худодот-хьэлвочи имогьой зинде небу

Ошир Гьээей Лугуи уре доре пулгьо эри духдер ю э хэйр неведерафд. Се мегь гирошде бэгьдо эз гIэруьси духдер энур бире эйло, е руз себэхьмунде уре мивинуьт у э еки эз тор зере гьитгьой эн сергьовуй тукун ю асмиш сохде омори. Гуфдиренбируьт, ки е десдей эн дуьздгьо-хэспушгьо дануьсдет огьиле, нечогьэ, зэгIифе хьэлвочире гьозор монет пул эршефини, шев дироморет э хьэлво тукуй энур, суьрхгьой юре вегирдет, хуьшдени хьэлвочире, лэгIэ4 уре бесде, э сергьови дуллу сохдет.

Э сифет эн дуллу сохде оmore хьэлвочи хун жэгьуьсдебу демунде, лэгIэй ю пара бу, зугьун ю ведешенде, чумгьой ю э гьофой ю верафде. Ошир Гьээей Лугуи, зен ю митерсуь гуфдире, негьишд уре сифет бебешуре дире. Хьэлвочи гьечи муьрд рафд сохде ниетгьой ю э дуьл ю домунде: не сэхьиб пул, не сэхьиб келе тукуй хьэлвои, не сэхьиб хуне бире.

Оммо э шегьер е сесгьо-эжбергьойгеш дебу, э товун эн комигьоки дануьсденбу Маралиш: гуйге бебей энугьоре екиш некуьшди эз Обой бэгьэй. Себей энишире хэбергьо, э хьисобовоз, бири ишире кор.

Е дуй-орине гирошде бэгьдо эз 'Ошир Гьээей Лугуи Марале гIэруьс сохде овурде э хуней хуьшде, Обой эз гьэгьр бирор ю духдер хьэлвочире хосди гуфдире, серзиёди гьозор монет пулсуьрхиш дори гуфдире уре, е руз у гIэтош гирде одомире хуно, шиши диромо э тукун энур. Э пушой эн муьшдеригьой энур, гьейсэгIэт э тукун энур дебирогоргьо, Обой сер гирд келе-келе эри нифри-нэгI-лети сохде уре, «геде,гIовдол, угьреш» хунде уре. У гуйге эри эз «нечогьэ, нермехоснете бирор ю» эри гьозор монет эршефи венкенде, сер 'энуре пучунди, «гьэнжугьэ» духдер хуьшдере э гьэл бирор ю дешенди. Худодот-хьэлвочи 'эз ишире серкушигьой эн Обой, эз терс энур, эз хьэшегьой энур, эз хуьрш дуьл хуьшде гьемей ю эдембу лерзире, тиридендире хуно бире, севгенд-шовгIо сохде, ки те у руз Ошир Гьээей Лугуи э ки энур оmore, Марале э ю дуй гуфдире, у е гилеш э 'бирор энур вохурде, э уревоз уре е гоф-гелиж небири. Чуй ишире гоф-гелиж миёсде бире э уревоз уре,

е фэгъире, косибе, гложизе одомире э чуйн Ошири келе вегир-  
луье базургенде одомиревоз, имогьой э кумеки худоревоз домор  
ю биригьоре? У эже, Ошир эже? Коргьо, гьисметгьой худонни.  
Оммо у косибе одоми гьисдигеш, шуькуьр э худо, офирегор сэхьиб  
гьуьлом, гьич вэхд у эз номус хуьшде неведерафди, ехь, номус  
хуьшдере эз кими уьткеме, текебурлуье пул-мол ишу омбар би-  
регоре одомигьо кем нисе дошде. «Ме е вэхдиш,— мугу у, — э е  
доне одомиш, эри е келе хэзинеи падшогьиш, эри е муьрдеиш  
теклиф нисохдум, биё духдермере хогь гуфдире. Ме косибиш  
гьисдуьмге, номусмере нэхурдем».

Оммо лап хуьурлемиш бугьо у руз Обой гофгьой энуре кем  
гуш воно, гьелебуле гирд эри хьэлвочи, у эхир энуре мидуе гуф-  
дире.

Марал, комики лап хуб дануьсденбу хосиетгьо, туьндехуи эн  
шебирор хуьшдере, у келе бирази бу гуфдире, бирор энур юре  
ходси гуфдире, бовор сохденбу э хэбергьо: бебешуре Обой куьш-  
ди гуфдире. Унегуьре Обое неки дуьл энур гьобул нисе сохденбу,  
у гьемчун уре эри хуьшде дуьшме, хунки-гьонлуь хьисоб сохден-  
бу, неденишире э у кор, ки э куьшде ве талан сохде омореи хьэл-  
вочи э Обой эслогь е тэхсириш невебу.

Имогьой Марал и гурунде овхьолет хуьшдере эри хуьшде ду-  
мит, вогоруш сохде, нисе дануьсдембу чуй сохуге, чоре офуге эри  
эни бедбэхде сер хуьшде, э коми рэхь буравге. Фикиргьой энур дуь  
эз еки тэхьлте, ветете эдембируьт сула сохде дуьл энуре, гьэзиет  
доре жун энуре. «Кеми гьеле бебе муьрди э ижире зулумевоз,  
нешумой энур эдее гьуй зере гешде э гьуьлом гьелеш гьовун хун  
энур эз уре куьшдегор ведешенде неомори гуфдире,\* — эдембу э  
дердежериревоз фикир сохде эри хуьшде Марал,— гьеле серзи-  
ёди эз кемер эни мерд оморе духдер ю биё хисуь э гьэл уре куьш-  
дегор?!»

Марал бовор сохденбу, эгенер у юре невоисде, межбур бисдо-  
геш эри рафде э Обой, соей бебей энугьо гьемише э пушой чум-  
гьой энур миёв мипою, эхтуьр, нэглет мисоху у рузе, у сэгьэте,  
кейки духдер ю эз деде биригьо эри нум биёбури ве гьэжел жун  
энур. Унегуьре и жогьиле зен э гьэд эни дуь сал хуте биригьо э  
сирое, хубе ве бэхдевере зиндегуни, хьозур бу эри ветовусде гье-  
ме жире синемишигьо, дердгьо, зехьметгьоре, нэхурдеигьо-небер-  
денгьоре, гьэрэзки эри нерафден э шуьвер э хунки хуьшде.

Оммо диренге э чуй жире темэхьлуьи, чумшури ве беднефси-  
ревоз дениширениге э ю шебирор ю, эз чуйки э овил оморегоре

---

\* Одомигьой хэлгь нму бовор сохденбируьт э у кор: гьерки эз куьнде  
одомигьо, гьовумгьой эн куьшде оморигьо одоми, некуьшдге е хуьшдени  
куьшдегоре енебуге е куьнде одоми энуре, нешумой эн куьшде, гьуй мизенуь  
мигешдуь.

зенгъорш эдембу глэйб оmore, (угъо кимигъошу сер ишуре гъуз гирде поисденбируйт, кимигъойге э зир лов хэндусде, дуь экиревоз гуши-гуши сохденбируйт) Марал э дуьлвежэгъиревоз вераси эри хуьшде, ки шебирор эз ю дес никенуь. У юре тологъ ни-дуь е гъедер вэхд семе те э юревоз зигъисде э зен хуьшдере хуно. Оммо ихдиэри эн тологъ дорей, эз ки шуьвер ведарафдеи э дин, глэдотевоз энжэгъ э дес эн мерд дебу, эн сэхъиб ве огъой эн зен. Негъогъ фэгъире бебей энугъо у шев глэруьси уре э хуней домор фирсоренге, гъэл гирде духдер 'хуьшдере, гуфдиребу э рэхъ энугъ: «Дениш, духдерме, мидарай э хуней шуьвертуь э парталгъой глэруьсвориревоз, медирой эзунжо энжэгъ эхироти э тентуь верафденге». Марал энжэгъ гъейсэглэт эдембу верасире трагически мэгной эни суруле гофгъоре.

Марал хуте небиребу ю хуьшдению кор хуьшдере эри, чуьтам гуфдиреге, бурра-бесде. У духдер хуне гъисдики, э хуней 'бебе зигъисдеки, э жигей энугъо думит, фикир сохденбу бебей энугъо у чуь биё сохуге, чуь ние сохуге, э шуьвер оmore бэгъдо — шуьвер энугъо. Имогъой у биё зен, бебесуьз мундеки, тэхъно, кумексуьз, сэхъибсуьз, сер-сур гуьломе нисе дануьсденигъо жогъиле зен нисе дануьсденбу, чуьтам хилос сохуге жун хуьшдере эзи у эз некуми офдоре чолоки, ведировге эзи гурунде овхъолет.

Э гъэд эни рузгъой овил Марал эз хьол офдоребу, эз сифет, эз жендек лап лэгъэр биребу, гуйге гъемей ю хуьрд-хэсдере хунобу, нечогъэ хунобу унгъэде эз дерд-хьэф эн муьрде шуьвер хуьшде нэгл, ченгъэдер эз хьээжони, гилгули дуьл хуьшде, эз терс, дуьлвежэгъи, ки овил, чуьл руз верасде бэгъдо ю зен эн келе дуьшмен хуьшде, эн э чум дире нисе хосденигъо одомию биёбу гуфдире. Эгенер Обой э сабуьрсуьзе шориревоз эдембу тэгли сохде, кей марасуьге овил эн бирор ю, кей э гъэл хуьшде мигируьге и шивитие, гуьгчеке зенбирор хуьшдере, глэйб-глор неда-нуьсде э чумшури ве темэхъэвоз дуь чуме буьхь сохде доноре поисденбуге э у, Марал э терсевоз чумгъой хуьшдере э улойге чарунде, э дуьл хуьшде эдембу минет сохде эз худо: е нике кор, е муьлгуьжуьз соху — эхир эни ёс, овил гъич неверасуь.

Марал эз худо хосде муьлгуьжуьз небисдо. Неденишире не э войгей эн Обой, не э войгей эн Марал — чуьл руз эн овил омогиросд, гъе гъечу, чуьтам э нубот хуьшде оmore гиросденуьтте э гъонун природаревоз рузгъо, оринегъо, мегъгъо ве салгъо эз гуьмуьр инсонгъо. Марале имогъой де рэхъиге, де чорейге небу. У е миёсд муьди бире э гъисмет хуьшде енебуге дир несохе де чорейге дире, офде эри хуьшде. Оммо «чуь чорейге», «чуь рэхъиге» офуге эри хуьшде у нисе дануьсденбу, неденишире э у кор, ки гъемей эни чуьл руз овил у э и фикир дебу, эзи фикир гуйге де фикиргъойге, дердгъой энугъо эз ёр ю фурмуш бире, ведарафдебу. У э глэрей дуь кервони демунде одомире хуно нисе дануьс-

денбу чухь рэхь офуге эри хуыште.

Э чуьлекимуьн руз те ебо шебирор энун э ки энун дироморе чуьн шуьвер энун, Марал эз терс-бин ведерафдере хуно ю хуышдению омо э ки энун. Обой ижире коре эзу гыч гузет несохдебу, унегуьре и рафдор энуре у эри хуыште е жирейге вераси: «Чуь мийседе сохде дие и фэгьир худо!? — эз зир лов хэндуйседе, э дуьл хуыште шори сохде, думит сохд Обой.— Хьэйву э хьэйвиуш, комики эз одоми вирихдени, терсирени, оммо э келе секоней офдорениге ю, меселен, е сайлов, пожар, эри хуыште де рэхьигей хилоси нисе офдеге, войгеш-невойгеш э ки одоми куьнд оморени эри э ки энун далде, гьлхэнди, хилоси гешде эри хуыште, негуфдире э товун эни жовоне, синогьсуьзе, гьэлхэндсуьзе бисд сале зен, комиреки екиш нисди э руй хори нен гьово...»

Эри е дэгьдэгьэи э дуьл эн Обой рэхьм оморенире хуно бисдо эри жогьиле бие зен, уре воисд сер энуре тимор соху эн чуькле гьэйллере хуно, мигьровуни хуышдере бирмуну э у. Оммо у гирд и войгей хуышдере, чуьтам гирдге лап гужлюь сабуьрсуьзе войгей хуышдере эри гьейсэгьэт сэхд гьэл гирде уре, жарунде э гьэй хуыште... Оммо у хуышдере э дес вегирде, сабур сохд, поисд, дениши, кей Марал ю хуышдению гьейсэгьэт гьэл мидешенуь э герден ю, мугую эзу: э согь эни гьуьлом е туьни гуфдире эриме кумек, гьэлхэндчи...

Обой денишире, кей зенбирор гьэл гирде юре, мигуюге и эри дуьл ю лап хуш гьисдигьо гофгьоре, лове э фирегье эхэнде веберде, чум хуышдере э пара гьисдигьо гьирмизине зирчумиревоз гьуьж диловунде, фирегье телуье бигьгьой хуышдере асда-асда тимор сохде, эз лэгьэ е гоф неведировунде дениширебу э сифет, э инчебеле, эн духдер хунере хуне бугьо буй-балай эн Марал, лос, гуьм поисдебугьо гьейсэгьэт э пушой энун. У гьейсэгьэт э дуьл хуыште лап бовор сохд, ки зиндегуни Марал э юревоз зобу нибу э эз у э шуьвер хуышдеревоз зигьисдигьо вэхд, белки хубтеш бисдоге. Бирор энун Ошир Гьэзей Лугуи келе мерд небугеш, оммо нечогьэ, хьэвессуьзе, могьбуле одоми бу. Эзу чуь жире шуьвер биренбу эри энижире жогьиле зен эн комики лап хун ю дуьширенигьо, вежегьисденигьо вэгьдон!?

Э бихьэен, темэхьэвоз фегьм, томоше сохде гьейсэгьэт раче буйбалай эн Марале, Обой дие хьэйфбери нисе сохденбу эри бирор ю дорей гьозор монет пул суьрхи эри рэхь-пули энун. Имогьой э жигей гьозор монетгьой суьрхи омори э ки энун и раче инчебеле жовоне гуьзеле зен. У гьейсэгьэт э дуьл хуыште гуйге бэхши э муьрдигьо бирор хуыште ингьэде пул дорей Худодот хьэлвочире эри духдер энун. Обой ю хуышению сэгьэте одоми небу. Энжэгьэ э эзи корле у ухшеш бу э хосиетгьой эн муьрдигьо бирор хуышдеревоз, оммо эз де хосиетгьойгей хуыште, гьемчун эз шэхс, чигьрет гьечи угьо бешгьэ бируьт дуь эз еки, гуйге эслогь эз е деде



не эз е бебе небирере хуно.

Маралиш гьейсэгIэт э пушой энү поисде, эз лэгIэ гоф нисе ъе-ди ровунденбу, сере гьуз гирде поисдебу. Эз руй у ълхогьине ху-но бугеш, эз дуьл лап гьаежон, дуьледэгьдэгьэре хуно бу. Эн-гуьшдгьой дес энү эдембируьт дуь екире гьуьжунде, синей энү эдембу верафде-фираморе, нефес ю гирдебу, эз дуьлдэгьдэгьэи минкин нисе доренбу эри гоф сохде.

— Эйчуь лэгIэ гирде поисдей, е гофиш нисе гуфдире? — лове э фирегье хэнде веберде, пуьрси эхириш Обой э сабурсуьзиревоз.

— Тологьмере ди! — бирден сере тик гирде, гуфди Марал э лерзире сесевоз, оммо э жуьргIэтлуьзиревоз, э гужевоз сэхд гирде хуьшдере эз чумгьой ю гIэрс неьв гуфдире.

Нефес 'ю лап тасире эз гьэгьр, гьаежони, билбули дуьл хуьш-де, эз дуьшмени, бие зен мугу гене: эгенер Обой юре тологь не-доге, у хуьшдере нефт мидекуьнуь мисухуну э пушой эн гьемей шегьер шэгIмелере хуно.

ГьейсэгIэт Обой эзу шиновусдгьо гофгьо гьечи дур, бешгьэ бируьт эз ю 'ниет сохдебугьо коргьо, ки Обой, комиреки четин бу эри терсунде, гьелебуле доре, э и туьтем лап мэхьтел, гиже хуно бисдо. Эз сифет, эз сес эни эз хосиет сокит ве зугьун недерире хуно бугьо жогьиле зен, Обой вераси эри хуьшде, ки у эз расдиш гьелебулей хуьшдере э жиге миёру, эгенер у тологь эн зенбирор хуьшдере недоге. Кими жогьиле зенгьо эз расдиш хуьшдере нефт декуьрде сухунденбируьт, эри комигьоки зиндегуни э суруле, ишу-ре невое шуьвергьошуревоз, э зир сике ве зулум эн зенхуьсуьрго эз бигори, есири хубте небу. Эри энижире зенхуьсуьргьо э мете-легьо гуфдиренбируьт: «Э лэгIэй гIэруьс зугьун недери, э сер хуьсуьр худо невери».

Гьисди властгьо э гIэдотгьой эн могьлугьгьой жигеи э вераси-реи ве хуьрметевоз дениширенбируьтгеш, эгенер кими энугьо лап суруле жире бируьтгеш, Обой терсиренбу: эгенер и раче жо-воне зен эн и перигьо муьрдигьо ведилуье член эн Думаь шегье-ри э пушой гьеме хуьшдере доноре сухундге и коре угьо э назар невегирде нигьуьлуьт. Эри эни кор э Обой гоф миёв, белки уре э жуьгьобдориш кешируьт. Эз елойге э шегьер гьелеш хэбер-гьо дебу, гуйге Худодот-хьэлвочире Обой куьшди. Эгенер зенби-рор энү э Обой гьэгьр сохде хуьшдере сухундге, пушотейне жен-гесуригьо, хунризигьой энүш э ёр овурде-миёвт. Увэхди, кор энү, эн Обой лап четин мибу. Не дие уре эри хилос сохде пушотейне-ре хуно бирор юш нисди.

Обой унгьэде эгьуьлменде одоми небугеш, сабурсуьз, э песо-пушой кор дениширенигьо одоми небугеш, оммо виники ижире гьовой эн Марале, комики хьозури муьрдере э герде вегирде, ом-мо зен ю бире нэгI, рази бисдо «эз хэто» эри дур бире, «гьуше эз гьэфес ю эри ведешенде» — тологь юре доре.

Оммо эри шуьвер зен хуьшдере тологъ доре лап асанте кор бугеш, е пейле глов хурдере хуно, оммо тологъ эн бие мунде зенбироре эри доре ологъолуь бу э ченд жире четинигьоревоз. Мерде ихдиёр бу зен хуьшдере эри тологъ доре, эз хуне ведекирде неки эзу е глэйбле, е кемсуьги миофдге: хэриге, глэтошиге, э руй шуьвер гоф овурдеге, ленг бириге, сербирэхъне э куче ведерафдиге, уре зигил веромориге, хурек энуре э сер`кинле сухундиге... Уре ихдиёр бу зен хуьшдере эри тологъ доре гьемчун е глэйбиш эзу ниофдге, энжэгъ эзу товуне, ки зен энуре дие хьэз нисе оmore, е зениге хуш омори э пушой чум энуре. Эри мерд вес бу э когъоз эн тологъ нуьвуьсде миомоге: «Ме туьре эдее ведекуьрденуьм, эз хуьшде жейле сохденуьм...» И нуьвуьсде тологъэ шуьвере ихдиёр бу е эри доре э дес эн зен хуьшде, шенде э пушой энуре, енебуге доре уре э тологъ доре зен хуьшде э десдин эн кесигеревоз. Оммо зене е вэхдиш, эри е кориш эз ки шуьвер хуьшде ведерафде ихдиёр небу чуй жире глэйбгьо э мерд энуре веригеш, деригеш.

Оммо тологъ дорен эн биё мунде зенбироре — емоморе миесде гировунде оmore эслогъ э е глэдотигеревоз. Унегуьре себэхьимуйн Обой хуьшдению рафд э нумаз, овурд хьэзон эн нумазе ве чор-пенж келе мердгьоре эри эжиге овурде и глэдоте — «хьэли-соре».

Суьфден рузгьой мегъ эн июль бу. Лап гьизгьине вэхд эн герми гьеминон бу. Эз глэтош герми гьеминон э гиёвгьо, зимигьо э енишгьой догъгьой эн Жогълуь эслогъ зерд биребируьт, вэхд эн бичингьо, зими дурундегьо бу.

Э минжи эн фирегье хьэёт, э ён эн чол глови, э серини эн келе тутдор дешенде оmoreбу келе гуьле-гуьле холи. Э сер холи норе оmoreбу е ченд болушгьо. Е пенж келе мердгьо. сипре рушгьо э тегъними ве хуьшдере обурлуь гирдеиревоз, рушгьоре тимор сохде-сохде, нуьшдуьт э сер дешенде оmore нерме ламбалушгьо, чор зани зере. Э кишд эн кими энугьо хэнжелгьо вебируьт. Неденишире э гьизгьин герми э тен эн гьемей энугьо сие гьобогьо вебируьт, сэхд э чапрасевоз дезере, э сер ишу килэхьгьой гусбенди, э зир комигьоки гуйге эз герми мувэхь одоми мидуьшуь, хьэл мибу. Оммо келе мердгьо олхогьин нуьшдебируьт, глэтош герми э хэпер ишуш небирере хуно. i

Обой не Марале гьишдуьт поисде э гьирогъ эн холи, э пушой эн келе мердгьо. Хьэзон ю хуьшдениюш э юревоз оmoreбируьттё келе мердгьоре хуно гье тьечу вокурде бу, сипре рушгьо бу. У э энгуьшдевоз огол зе шомоше — е лэгъэре, синей ю доруне дерафде одомире. Луьнгьой энуре, не герден ю назук, дип дураз бируьт эн леглеге хуно. У овурд е той эн герде верие чекмере хуно но уре э пушой эн Обой. Руй не герден эн чекме э гьурум кинлеревоз зере оmoreбу. Чекме эз добогъ сохде назуке пусд эн гу-

селе духде 'оморебу. Эз пушо герден эн чекме те 'зевер бурра бу. Э бурра гъирогъгъой эн герден чекме дугмегъо ве назуже рушде-легъой алати 'вебируйт. 'Шомош гъуз бисдо э пушой эн Обой, ве-кенд эз расди пой чекмей энуре, вокурд э пой энучекмере, дезе гъеме дугмегъоре ве бесд гъеме рушдегъой эн 'герден чекмере, песеде э пой вэхидше, гиросд поисд э гъирогъ. Хъэзон тигъэзтлуь денишире э расдилой Обой 'поисдебугъо 'Марал, мугу эзу э ево-ше, олхогъинне сесевоз:

— Имогъой, духдерме, туь хуьшденитуй пой э сугъразани пушой эн шебирортуь, хъэрекет сох э расди 'десевоз эри векенде дугмегъо ве лов сохде рушдегъой эн чекмере э пой шебирортуь, Эгенер, худо гъишдге, туь 'э г'эдот гуьре дануьсдиге, дестуьре э гъурум сиегъ несохде, векенде дугмегъо, лов сохде рушдегъой эни чекмере, туь — азади, мидани рафде э шуьвер 'э е туьре во-исде одоми енебуге э хотур муьрдигъо шуьвертуь э екиш нефар-де. Оммо туь недануьсдиге векенде рушдегъо, дугмегъой чекмере енебуге дестуь пури бисдоге эз гъурум э чекме векендеки, туь биё тэг'уьмуьрлугъ бие зен муни, туьре екиреш ихдиёр нисди эри 'э зени вегирде, туьреш ихдиёр нисди эри э де мердиге э шуьвер рафде, зен энуче, дедей г'эилгъой энуче бире, енебуге туь биё зен эн шебирортуь ве дедей эн г'эилгъой энуче боши.\*

И суруле гъойдетгъой эни суруле г'эдот, эз товун комики гъей-сэг'эт хуб дануьсд Марал, э и коревоз у шинох бисдоки, терсунд уре. Оммо, виники уре де чорейге нисди, хуьшдере дуьл доре, поисд э сугъразани, сер гирд дугмегъо, рушдегъоре эри векенде. Суьфдеи се рушдере у э асантиревоз векенд, лов сохд. Уре э хуьш-де имид бирере хуно бисдо, чоримуьн рушдеш э векендеки у е келе четини невини. Оммо э пенжимуьн ве шешимуьн рушдегъой чекме расики, эри векенде угъоре четин бисдо. У гене дуьлдэгъ-дэгъэ бисдо. Оммо неденишире э и овхьолет хуьшде, уре имид бу де рушдегъойге ве дугмегъойгей эни нэхъсе чекмере мидануь векенде гуьфдире. Оммо ченгъэдер хъэрекет несохд жогъиле зен, рушдегъойгей эн чекмере векенде недануьсд, дес ю э гъурумевоз билесумол небире. У рушдегъо кункол русмуре хуно вепичиреби-руйт э еки, эри лов сохде угъоре гуйге минкин небу.

Лап лэгъэр биребугъо, зерди вешендебугъо сифет эн Марал эз шуьвер ю муьрде эйло, гъейсэг'эт эз тэг'иди ве тилгули дуьл

---

\* Э гуьфдирей И. Ш. Анисимовоз, комики э 1888 сал вешендебу книг э товун кими г'эдотгъо, традициегъой хэлгъ иму, дугмегъо ве рушдегъой эн гъурум зере чекмере эри векенде, дес пури небире э г'эдот гуьре, ингъэде четин бу эри емомо, ки омбаре шебироргъо «хъэлисо» нисе гировундениби-руйт. Емоме мунде зенбироре хосденбируйт эришу э зени. Песеде е шеш мегъ гирошде бэгъдо, эгенер шебироре зигъисде нисе вонсдеге э зенбирор хуьшде-ревоз, тологъ доренбу зенбироре, чуйтам де зенгъойге тологъ доре оморенуьтге. Увэхди дие эри эни кор «хъэлисо» герек нисе биренбу.

эну гьирмизи бире, гIэтош вешендебу, гуйге у э гьирог тонуй гIэтоши бу, э сер тону гьуз бире, эденмбу кор сохде. Эрэгь сифет энуре шишире, э чумгьою дерафдембу, гьутинегьой юре тар сохдебу. Дуьл ю эдембу верафде фураморе.

Келе мердгьо сессуьз эз нуьшде жигешу эдембируьт денишире э хьэрекетигьой эн жогьиле бие зен. У эдембу дире, синемиш сохде э хуьшде, чуьтам угьо дениширетге э лой энэ э тигьэтевоз. эзи товуне у диеш дуьлдэгьдэгьэ, серевире хуно бире, диеш хьэрекет ве тэгIди сохденбу и нэгIлетие рушдегьоре эри векенде, эз чуьки гьейсэгIэт бенд бу гьисмет энэ. Оммо ченгьэдер Марал хьэрекет сохденбуге, унгьэде у эдембу дире, жи и гуж ю рафденигьо кор нисди. Назуке энгуьшдгьой дес энэ эдембируьт лерзире, дуьл ю гьейсэгIэт гуйге синей юре пара сохде медировге. Уре дие имид небу дугмегьо ве рушдегьой эни чекмере векенде мидануь.

Эз билбули, гьаежони дуьл энэ чумгьой энэ лилов хурдере хуно бисдо. Бирден и сие чекме э пушой эн лилов рафдутгьо чумгьой энэ чарусьд э лап гьэдерсуьз келе сие чи, комики венгесд э дуьл энэ лап келе сегьм ве лерз, ведабурри гуйге эз пушой чум энэ томом дуьнъегье, товуше чуьшмере, ковре асмуре, гьемере чуь гьисдиге э руй эни гIуьлом.

Марал дануьсдки гьеме хьэрекетигьо ве имидигьой энэ негьогьинуьт, у бирден лап эз гьувот офдоре, гьолок бире одомире хуно, кеши песово э гьурумевоз пури бире десгьой хуьшдере эзи нэхьсе чекме. Песде у сер хуьшдере лап дуьллу гирде, эз жигей хуьшде невэхишде, э гьурум пури бире пенжегьой дес хуьшдеревоз сэхд сохд эз эрэгь тар бугьо, эз гIэтош сухденбугьо сифет хуьшдере эри недире э чум хуьшде Обою, эри неденишире гьейсэгIэт э руй эни гIуьлом, комики гуйге чаруьсд э пушой энэ э келе сегьмлуье гьэждогьое Обой, э пой комики ченд е дэхьор сие чекме вери, э комиревоз и «гьэждогьоре» воисдени э бирэхьмиревоз хьэл-хьовут соху уре. Виники юре де рэхьиге немунди эри хилос бире эз дес ю э чум дире нисе хосденигьо шебирор хуьшде, Марал, десгьой хуьшдере эз сифет хуьшде невегирде, офдо э сер хори, гьирке величире юре. Эзи лугьонде тэхьле гьирке душгьо, кемер энэ, гьемей жендек ю эдембу гуйге шувунде оморе, синей ю верафде-фураморе.

Келе мердгьо винируьтки дие ишуре инжо кор нисди, э сер ишу вебугьо гьэрдхундире э дуьруьсдиревоз бегьем сохдуьт, десгьошуре э сифет кешире, «шуькуьр э худо» гуьфдире, евош-евош вэхишдуьт эз сер ламбалушгьо. Песде угьо дуз сохде белгьой эн дуразе гьобогьошуре, э денду недерие лэгIэгьошуревоз лэгIэпаре сохде, э олхогьиниревоз, тэгIди несохде рафдуьт э лой гьопуй эн хьэет. Сие чекмере вегирде, рафд э песой энугьо э пичире лэгьэре леглегие пойгьой хуьшдеревоз шомош эн нумаз.

Обой гьеле поисдебу э жигей хуьшде, э ён келе-келе гирис-

денбугъо зенбирор хуышде, э фикир дерие одомире хуно, бигъ хуышдере кешире-кешире. У, гьелбет, эз дуыл шор бу, кор гьечи бисдо гуфдире. Имогъой дес-пой Марал бесден, у томом э ихдѣри эн у дери. Уре эз ки эн у ведерафде ихдиѣр нисди, у войгеш-невойгеш биѣ зен ю бу. Оммо эз е лойге дуыл эн Обой сокит небу. У терсиренбу, Марал эз жун хуышде визор оmore, воисдей эн у эжиге неомори гуфдире, эз расдиш гьелебулей хуышдере эжиге оворде, хуышдере дегесунде несухуну.

Обой зури-зури чекмей хуышдере вокурде, поисд е минутигеш э ън Марал, гьич е гофлеш неведировунде эз лэгIэй хуышде, не эри хуышдере расд ведировунде э пушой эн у, не эри хомуш сохде, хоши гирде уре. У верасирембу, ки гьейсэгIэт э уревоз гоф сохде эслогъ герек нисди эри гьичиш, эзи кор энжэгъ зобунни медиров, диеш гьэгър дуыл энуре зиѣд мисоху. Чув мидануысд гуфдире у гьэйсэгIэт э Марал? ЕгIни, мегирис, хуышдере дуыл ди, энтуъ биригъо-бири, туьре де рэхьиге нисди, ведини, гьечи нувуысде омори э гьисметтуъ: туъ биѣ сенмуьн зен эн шебирортуъ боши... Унегуьре Обой жуьргIэт несохд э у е гофиш эри гуфдире, гьечи гьишде Марале э жигей хуышде, рафд э лой товле — гIэсбгъой эн бирор ю дебугъо жиге: нуькер, гьууллугъчи эн хуней бирор хуышдере Бобоире эри дир.

Бобоире у офд э товле э ън гIэсбгъо. У эз гIуьмуьр е гьевдегъ сале жовоне кук бу, огъурдомогъ, гоф сохде хьэз нисе оморенигъо одми. Десгъой эн у келе бируьт, эз гурунде кор сохде месере хуно сэхд бируьт. Е кем остгъу бируне ведироморе сие чердее сифет эн у эз э вэхд гIэили гирде овле чупур-чупур бу. Келе, ранг михэкие чумгъой эн у гьемише ховолуь, шувкеетлуьре хуно бируьт. Э у дениширенге эри одоми гьечу оморенбу, гуйге уре э лап ширине вэхд хов эн у эз хов хэбер сохди, уре те сирои хисире негъишди, унегуьре у гьечи ховолуь денишире э кесиге. Песде, нуькер лап гIэжоибе одоми бу, э екировозиш э гоф-гелиж нисе поисденбу, эз гьирогъдеки одомигъо э екиревозиш дусди, шинохи нисе гердунденбу. Дуыл эн у гуйге тенги сохденбу э гIэре, мэгI-рекай одомигъо поисде. Уре омбариш тэхно мундеи хьэз оморенбу. У эслогъ гьэйгъусуьз бу: чувниге э иловле, э шегьер, чув хэбериге, чув хэбер нисдиге. Омбариш у вэхд хуышдере гировунденбу э ън гIэсбгъо, э товле, гьурлугъ сохде угьоре. Эз кор хэвлете вэхд у э сер гьембиз хуышге гневгъо дегешде михиси муьрде одомире хуно. ГьейсэгIэтиш, кейки э гьэд хьэѣт, э «ѣн гуш» эн у ижире драма-гъозие гирошдеки, у гьичиш невиниребу, нешиновусдебу, хисиребу эз хуышде рафдере хуно. Хов эн у гьечи сэхд, лугъонд бу, ки Обой межбур бисдо уре э тепуькгьоревоз эри хэбер сохде.

— Гуш вени Бобон,— мугу эзу Обой э негиреиревоз денишире э чупуре, эз омбар хисереи вамасиригъо сифет эн у, чувтам у миже

куфде-куфде э шуйкеетлуьн ве ховолуьиревоз дениширениге э ю, э енбоки поисдебугьо буй-балай эню, э гьуьж дироморе кубуте, э гиёв, суьмеревоз билесумол бугьо, тиже буй эн серги ве буй эн гьуьш гьэсбгьо оморенбугьо партал эню.— Гуш вени, Бобои, бикейтуь кефсуьзи. Е дуь-се орине те у хуб небу, бегьем э хуьшде недиров ме инжо нибошум. Оммо е кор-чи бисдоге э бикейтуьревоз, туь дир несохде зу-зу миёй мираси э киме, мере хэбер миди.

Обой и гофгьоре гуфдире э нуькер, лове э суьпле хэнде веберд. Гьовой эню, неденишире э у кор, ки дуьл эню динж небу эз Марал, хуб, шор бу э и туьтем. У те ебо рафде, дес зе э кемер Бобои, ведешенд эз куьф хуьшде е монет бэхш до уре «эри хьэлво восдоре».

Обой рафденге, Бобои, комики гьеле эз ховолуьн бегьем уёгь небиребу, сэхд э хуьшде демунде, э куьти ве мэхьтелиревоз чарунд э ило э уло монет когьозире, хьэрекет сохде эри дануьсде, э ёр хуьшде овурде: чуй гуфди э у жогьиле хазеин эню, эйчуь у гьеебо деслов бире, е монет доге уре? Эри видовусде э песой эню, пуьрсире дануьсде, чуй гуфдире воисденбуге Обою э у, чуйбуге гьурлугь эню, Бобои жуьргьэт несохд, терси гене е ченд лепуьг не гьопоз эзу вегирде, у дануьсденбу хурузе хуно женгесур бугьо Обою, туьндехуе хосиет энуре. Унегуьре Бобои, лове э шеке хэнде веберде, десе жумунде, э гьэйгьусуьзиревоз, венгесд хуьшдере э сер гьембиз эн хуьште гиёвгьо, гье усэгьэт гене хиси эзи эз зуревоз хов шишире одомире хуно.

\* \* \*

Э гьэд эни дуь-се орине, те Марал «э хуьшде дироморе», юре воисдгеш-невоисдгеш сеимуьн зен эн шебирор хуьшде бире, э гьуьлом гирошд зурбо келе гьозиегьо. Угьо э пушоки теслнх сохдуьтгьо гьисметгьой миллионгьой одомигьоре, те и вэхдигьо гьер мерд муьхшуьл бируьтгьо э фикиргьо, гьэйгьугьой хуьшде, дердгьо, шоригьой хуьшде, э гьер рузине кор-бор хуьшде. И гьозиегьо гьемчун э пушоки теслнх сохд гьисмет, мундеи енебуге немундеи эн е ченд падшогьети сохденбируьтгьо династиегьоре, комигьоки э гьэд ченд садсалгьо огьоеи сохдет э сер эл-вилеет ишу, эз хуькм эн комигьоки бенд бируьт зинден ве гьисмет могоьлугь рэглиет ишу — кутэхьи гоф, — сер гирде омо довгьо э гьэрей келе падшогьетигьо, комики е кем вэхд гирошде бэгьдо, чаруьсд э келе довгьой гьуьломи.

Э Дербенд гьетте хэбер расире Германия мэглуьм сохдн гуфдире э товун довгьо сохден э Урснетевоз, инжо э войгей эн властгьой шегьериревоз ве членгьой эн монархически партиривоз гировунде омо жевгьэе демонстрация. Э пушой эн домнстрация хьэрекет сохде эри бирмунде еклубишуре э и «синемиише

вэхд» эри эн «гъисмет ватан ве тэхд падшоги» э е жерге э келей шегьеревоз эдембируйт рафде членгой эн Думаи шегьери, начальник. эн военни гарнизон, келе гъурлугъчигьгой шегьер эеки э рэхъбирчигьгой проваславни, мусульмански ве иудейски диневоз. Э гӀэрей эни э пушой жерге рафденбируйтго одомигьго дебу гьемчун Обоиш, имогьгой эз бирор ю — Ошир Гъэзей Лугуи муърде эйло биригьго еки эз лап келе гӀоширгьгой Дербенд.

Манифестантгьго оморут расируйт э келе мейдуй эн шегьер э пушой дутьебэгъэи зданием эн управлением шегьери, э минжи комижи поисдебу лап келе килицей уруси э фирегье, ковре ранг зере гунбезевоз. Э зверсер эн гунбез е дуразе се митреои гӀовсуърх доре хоч вебу. Эз ригазгьгой чуьшмей августи хоч эдембу тов-тов доре, гуйге эдембу дегесире. Эз песой эн официални одомигьгой власть, вегирлуье одомигьгой эн шегьер, сэхд пой нореноре э сер мостовой эн куче, туьфенггьго э душ вери, эдембируйт рафде солдатгьго, э пушой энугьго, парадни мундиргьго э тен вери, э синешу орденгьго ве медалгьго вери эдембируйт рафде офицергьго. Эз песой эн солдатгьго эдембируйт пой вегирде гъэтмэгъэрише десдере хуно гурлугъчигьгой эн идорегьго ве жуьрбежуьре одомигьгой шегьер. Манифестантгьго эдембируйт рафде э сес-гром эн духовой оркестревоз, сиротгьгой эн падшогъ Николай II ве куклей эню — мирос эн тэхд падшоги, бейдогъгьго, транспарантгьго ве лозунгьго э дес дери. Бэхшвегиргьгой эни патриотически манифестация эдембируйт келе-келе хъэрой дешенде, фирсоре гъелебулее гофгьго, нэгӀлетигьго э сер «гъэчэгъгьгой немци», гуфдире патриотически лозунгьго, оголнемегьго.

Манифестантгьго оморе э мейду расируйтки, э пушой эн э мейду кура бире хэлгъ ве лос бире э жерегьоревоз поисдеби-кешуш уруси, проваславни архирей, е екелуье, жендеклуье мерд. Кешуш сербирэхъне бу. Муйгьгой сер эню дураз бируйт, э душгьгой ю расиренбируйт. Э тен эню дуразе сие гӀобо вебу, э синей ю э зенжил бесде — хоч нуьгъреи. Э сер мулла сипре мендил хъожии вебу, э тен ю рангмихэкие гӀобо, э дес ю тесбигӀгьго. Хъини зере рушгьгой эню гъэйчи гирде бируйт. Рушгьгой эн доен мазуте хуно сип сиегъ бу. Э сер эню нерме килэхъ бухорей вебу, э тен ю ковре гьобой эврүшми, э пойгьгой ю дараме мэхъсгьго. Гьерсей энугьго, дуй э песой еки хундуйт нимаз, лово-тошуво хосдуйт э согъи эн падшогъ, зен, кифлет ве гъумолет эню, борухо гуфдируйт эри энугьго, хосдуйт эз худо ерэгъ, гъушунгьгой эн урус бесгъун дуйт «худо нифри сохде бедкоре немцгьгоре».

Рэхъберчигьгой эн жэгӀметгьгой дини эн уругьго, мисурмугьго. егъудигьго гоф ишуре верасде бэгъдо, сер гирдуйт э техде сегъне, эри гоф сохде дуй э нубот еки вегирлуье одомигьгой эн шегьер. Фирегье тэхде сэгъне зури-зури гъуьч сохде оморебу эз хотур эни кор э ранд зере неоморе дуразе тэхдегьоревоз. Э минжи эн

трибуна веноре оморёбу ранглуе келе сирот эн падшогы Николай II. Э тен эню ковре мундир вебу э зар-зарие погонгой полковникревоз, э синей ю — фирегье ковре лент зврушми. Рушлеггой эню кутэхь бируйт, зерд, хьини зерере хуно. Э трибуна гоф сохдегорго омбардекиш бируйт келе гьуллугъчиггой шегьер ве эз вегирлуе одомиггой эню. Гоф сохд гьемчун Обоиш. У эз себэхь мундеревоз е гьэдер сорхош бу. Э и герми эз лэгIэй эню оморембугго буй эн туьнде шороб не гловгирде ненесир лап тиж расиренбу э вини эн э куьнди эню поисдегорго. Гуфдире гофгой эню э гьэрише, ворхундеие гофгой эн нечогэ одомире хуно ухшеш зеренбу. У «немцгьоре-хуггьоре» гьелебуле дореки, нифри сохдеки, эдембу гьерчуь гири пертово доре эз лэгIэй хуьше, э гIэйбине гофгьоревоз вешмерде угьоре. Э де вэхдиге, э де жигейге и эри эни жире гофго гуфдиреи уре гье эз поисде жигей ю пиш мисохдуьт, келе бирази ве негиреишуре эзу гуфдирегорго мибисдорут. Оммо гьейсгIэт «даматго ве господагго» инжо кура бирогорго, уре гуш дошдогорго э дуьлхоширевоз хэндуьсде, эдембируйт чек зере эз товун гуфдире гофгой эн «темпераментни оратор». Песде эз бугъ эн шороб ве гофгой хуьше лап туьндлемиш бире, келе жингове чумгой эню хун гирде, у ведешендки эз гьоб дуразе хэнжел хуьшдере, шувундки э дес хуьше, егIни, шогьоди доре э и коревоз, чуьтам у гуфдиге, «сергой хуги эн дуьшмегьоре эз герден ишу жейле мисохим», киниге эз гьэд эн кура биророгорго э мейду лап шори сохде эз гофго ве и хэнжел вежегьундеи эню, э тасире сесевоз хьэрой сохд «Ур-ра-а-а!». Э песой эню омбаре манифестантгьош сер гирдуьт эри «ура» хьэрой сохде. И сес ченд гиле унге хуно гьечи фирегъ, келе ловбисдо э мейду, ки э сер зар-зарие хоч килисе ве ковре гунбез эню нуьшдебируйтгго ковтерго, пар зере, учмиш бисдорут э лой савзие богъго, эзинжо лап куьнд бируйтгго.

Оммо гьовой эн хуьшдени могьлугъ эни чуькле азиатски шегьер, комики дебу э лап дуре южни кенергой эн империей Урсие, эслогъ бешгэ бу эз гьового ве фикиргой эн государственни гьурлугъчигго, чиновникго, офицергой эн гарнизон, вегирлуе одомиггой эн шегьер. Омбардеки могьлугъ эн шегьер, кокими зигьисденбу э торики ве михьтожи, дануьсдеш нисе дануьсденбу чуь гирошдеге э дуьньёгъ, чуь хэлгьнге немцго, комигьореки эдете нифри-нэгIети сохденуьт, еже угьо зигьисденуьтге, эйчуь хэлгъ немцго нен урусго э еки офдоретге... Оммо гье у косибго, зиндегуни комигьоки гьечинигеш лап четин бу, гьер руз э фикир-хэъл дебируьт, чуьтам кифлетгьошуре дорутге, хуб верасиренбируьт, довгIо эри энугго — келе бедини, келе гьурбунигго, налогго, дуьлесдигго ве хьижронигго.

Э дуьимуьн руз довгIо сер гирде оморенге э шегьер е ченд сад резервистгьоре огол зеруьт э лешгер. Э шегьер сер гирде омо



эри гуьнжунде отряд эз одомигьой жигей э войгешуревоз эри рафде э фронт. Е десде ученикгьой эн келеи классгьой эн реальный училище ве гимназией зени, гирденбируьтгьо мейл большевикгьоре, вэхишдсбнуьтгьо э гьэршуй довго, дуьсдогь сохде оморут. Дуьсдогь сохде оморут гьемчун кими учителгьо, гирдегоргьо мейл эн «Гэрегьэришкигьоре», огол зеренбируьтгьо одомигьоре эри бунт вэхизунде. Дуьсдогь сохде оморут кими фэхьлегьой эн депош. Увэхди энжэгь депо бу э Дербенд е теке промышленни корхоне. Омбардеки инжо кор сохдегоре фэхьлегьо, усдогьо уругьо бируьт. Фэхьлегьой депо эз товун «мемлекетгьой империалисти» сер гирдеи довгооре, мэглуюм сохдуьт забастовка. Властгьой эн шегьер, терсире, ки ижире гьовогьо, фикиргьой энугьолов мибу гьемчун э гьэд могьлугь, дуьсдогь сохде хэйли фэхьлегьоре вегирдуьт э солдати ве э этапевоз фирсоруьт угьоре э фронт, егъни, дур эз пушой чум.

Се руз гирошде бэгьдо эз э мейдуй шегьер манифестация бире эйло, эжеки Обой чуьн еки эз «эловуье» ораторгьо вэхишде гоф сохдебу, у э кул эн гъэсб вери, диromo э хьэет бирор хуьшде, комики имегьой хьэет энубу. Гъэсб э зир энубу дебугьо, гьуьндуьр бу, рач, бенек-бенек, ранг хокистери. Пойгьой гъэсб дипдуз бу, синей ю фирегь, шуьгьэм ю дерафде, кефел ю дарам. Чумгьой гъэсб эз гъуьри, жонлуьви эдембу гъэтоше хуно гуйге журкум шенде. Дуьм энубу энугуьле хуно бесдебу. Э зир эн Обой тозе зерде шумоле егьэр казаки дебу. Э кемер гъэсб дегирдебу ранг гьирмизие, нэхч гирде, жуьле-жуьле жуьл.

Сер-тен эн Обой гьейсэгъэт лап гъэлемет бу. Э тен энубу вебусипре чухо эз назуке пешм, э синей ю — везнегьой нуьгьрей. Чухо лап хуб нуьшденбу э гьуьндуьре, дарамлуье буй-балай энубу. Э чепилой кишд энубу е дуразе шушке вебу, э расди гьэбуьргьэй энубу — тапинже, э тозе гьоб тапинжен дери. Э сер эн Обой е гьуьндуьре, гьирогь ю гьэд сохде оmore, ранг нуьгьрее килэхь бухоре вебу. Э сер эн дип-дуз, тим-тик бируьтгьо душгьой энубу тозе вахмистрски погунгьо вебируьт, эз комигьоки у эз гьеме зиьдте лап келегеди сохденбу.

У хуьшдере екем бируне ведоре, э чепи десевоз логьум гъэсбе гирде, расди десе, эз комики гьирмож дуллу бу, э уьткемиревоз э расди бел хуьшде веноре, дир-дир, диromоре э хьэет, поисд э пушой эн сирой хуно.

Обой пушотеш бу вахмистр эн запас. У гирошдебу курс хундеире э школай эн унтер-офицергьо э кавалерийски полкгьо суьфде э военни гарнизон Дербенд, песде э шегьер Темир-Хан-Шура, эжеки бу резеденцией эн генерал-губернатор Догьисту. Школаре верасде бэгьдо уре доробу званием эн вахмистр запас. Веди бу, ки у имогьой лап шори минкин бири гуьфдире эри веноре э душгьой хуьшде вахмистрски погунгьоре, келегеди сохде эз

хуышде. Имогьой уре имид бу, э довгЮо рафденге, у, худо гышд-ге, эй зуригьо погонгьой офицернш менуь.

Обой э кул гІэсб вери э хьэът дироморенге, Марал и вэхди э сиро поисдебу. Сифет энду зерди вешендебу, могьбул бу. У десгьоре э сине веноре, сер дулу поисдебу. У сие парталгьой овилуре эз тен хуышде гьеле невекендебу, овил верасдебугеш. Эз диремуниш веди буки, у гьеле э хуышде недиромори эз э сер энду омо-ригьо гурунде синемшигьо.

Обой э ён хуне, э пушой сиро оморе поисденки, у кеши логьум гІэсбе, поюнд уре. Оммо е кем вэхд эз кул гІэсб нефурома. Гье гьечу, хуышдере е кем песово доре э сер егьер, расди десе э уьткемиревоз э расди бел веноре, у поисд гьечи э пушой Марал, егІни у денишуь, хуб томоше соху гуфдире юре, винуь чуь жире гІэсб э зир ю, чуьжире парталгьо э тен энду вериге, денишуь э шушкей ю, тапинжей ю, э кишд ю веруьтгьо, э погунгьой ю, э душ ю веруьтгьо. Э и коревоз Обое воисденбу мэхьтел бигьилуь Марале, «мигІуьжуьз» бирмуну э у, хуьурмет. гІуьзет хуышдере э пушой энду звер соху.

Обое юре, хуышдениюре эз хуышде гьейсэгІэт лап хьэз оморенбу, эз хуышде келегеди эдембу сохде. У лове э шоре хэнде веберде, эз зир чум э синемширевоз, сабирсуьзиревоз денишире э жогьиле зен хуышде, э комиревоз ки гьеле, хьэйф, е шевлеш нэхисири, е лой телуь бигь хуышдере тимор сохде-сохде, эдембу гузет сохде, кей Марал, шори сохде эз ю, э ю миденишуьге, э хуне теклиф мисохуге. Дуьл Марал гьейсэгІэт лап гурунд, могьбул бугеш, гьовой ю — лап хэреб, у виники, чуьтам Обой э пушой энду фурс дорениге, келегеди сохдениге, Марал тоб недо, лово э руьхшендие хэнде веберд. Марал терсире, ки дуьл энду тоб нидуь, гьейсэгІэт келе-келе михэндуь эзи уюне кор Обой, зир лов хуышдере э зир денду шишире, сер хуышдере диеш гьуз гирде, дениши поисд э хори сиро.

Обой эри хуышде фикир сохд, ки весси зен энду уре гьечи хуб томоше сохдеи, фушенд хуышдере эз сер гІэсб, жилов энуре вешенд э герден ю. Песде Обой, кемере тире хуно тик гирде, чепи десе э сер десдек эн шимшил веноре, зур-зурн верома эз сер пилонгьо, омо поисд э пушой эн Марал. Делхэки сохдере хуно, э расди десевоз, эз билег комики гьирмож дуьлу бугьо, белли доре Марале, э командир хуышде рапорт дуьгьоре хуно, мугу:

— Ваш-ше высокоблагородие! Вахмистр Обой Нисимов омори э ихдиёришму эри... е сэгІэти.— Воисде гуь, андурмиш соху э Марал эйчуь энжэун «эри е сэгІэти», у десе э гьирможевоз тик гуьрде, гуйге э товун е келе, вожиблуь шоре кор мэгІлуьм сохдере хуно, мугу диеш келе-келе: — Эдее э довгЮо рафденуьм!..

ГьейсэгІэт у э ки Марал омореки уре неки имид бу, у лап эри хуышде бовор сохд, ки Марал э гьэд эни е мегь угьо дуре екире

недиреи, хомуш бири, э хуыште диромори. Эгенер Марал дануьсд-ге ю, Обой, эдее э довгЮ рафде, у белки эз некуми, эз терс эни кор дуьлдэгъдэгъэ мибу, дуьл ю гъэреболугъ мибу, мигируьсуь гIэиле хуно. У зен гысдигеш, биё верасуь, ки довгЮ — возиле, «пэхъни-пэхъники» нисди. Унжо э довгЮ э гьержиге секонейни, гьер сэгIэт, гьер дэгъдэгъэ одоми эз гуниле, туп эн дуьшме е куыште миёв, енебуге шуькесд сохде миёв. У чуьш бисдоге шуь-вер энунн...

Обое сөхд имид бу, ки Марал и дес уре лап эз дуьли гьобул мисоху, э дуьлсухуни, мигьробониревоз. Э хотур эни кор у и дес гъилигъ негирде, гъэгъри небире, назбуз несохде мигъилуь уре юре э гъэл хуыште доноре, войгей юре бегъем сохде...

Ижире фикиргъо э сохдеки, эри Обой гьейсэгIэт мэхьтеле кор оморенбу, эйчуь эхи Марал гуфдиренбу, талаб сохденбу Обой юре тологъ дуь гуфдире. Э гьейсэгIетине овхьолет энунн и кор, и талаби энунн неки хэри, надани бу эз тараф энунн, гьемчун и келе чешмиши бу. Гьелбет, ижире раче, жогъиле зен, э песой ю «дуьм» нисди — гIэл нисди оубар шуьверсуьз нимунд. Оммо ки дануьсде, чужьжире одоми мибисдоге тозе шуьвер энунн? Оммо чуь Обои шуьвер, гьеми гIошир, девлетменд, гьеле жогъил, жонлуь эри офде аснт нисди. Белки Марале зен энунн бире невоисдеи эзу товуне, бу ки Обой лап гъэгъри бу эз биорор хуыште Марале хосдебу гуфдире?..

Оммо Обой нисе дануьсденбу, ки Марал те имогъоиш хьисоб сохдени бешуре, хьэлвочи Худодте куышдегор дуьздгъо-галавур-чигъо нисдуьт, уни, Обои гуфдире. Обой ю хуышдению у руз э хуьуршевоз шишире дарафденге э тукуй Худодот, нифри-офри сохде, гьелебуле гирденге эри энунн, егIни Худодот фирмунди бирор юре, духдер хуышдере дори э у, у эз гофгъо, шовгЮгъой Худодот вераси, ки э и кор э хьэлвочи е тэхсириш невери. У эз тукуй энунн э ведерафдеки гьелебуле гирденге эри энунн, Обой и гьелебулере эз расдеки нэгI, гьечи эз гъэгър, гIэтош дуьл хуыште гуфдиребу. Эзу рузевоз гъич э дуьл-хэьлгъой энунн недебу неки эри куыште хьэлвочире, дие эслогъ инжимиш несохде уре.

Оммо не имбурузине сер-тен, не погунгъой вахмистри э душгъой Обой, не хэбер энунн эдее э довгЮ рафде гуфдире, гуйге эслогъ кори несохд э фикир, э дуьл энунн Марал. Марал поисдебу э пушой энунн гье гьечу могъбул, ёслуьре хуно, уре э гуш негирдере хуно дениширебу э елойге, гуйге Марал гьейсэгIэт не юре диренбу, не гофгъой энуре шиновусдебу. Обой э хуыште домунд, мэхьтел, дуьлхуьрде хуно бисдо эзи кор энунн. У вераси, ки эз бирор ю муьрде эйло те имбурузине руз дуьл энунн эри Обой нисе вогошде. Эз сохде сабиргъо, имидигъой энунн Марал егIни оморе-оморе нерм мибу, михогъу, дусд мидору гуфдире, юре, ведини, негъогъи, дургу ведироморут.

Эзи е ченд минут лап шор бугьо дуьл Обой, гьейсэг!эт пешму, гьэреболугъ бисдо. У е лугъонд ох вокошире, э биразни ве могъбулиревоз дениши э шивитне буйбалай эн зен хуьшде, комики эз ело лап куьнд бу эзу, эз елойге гуйге — лап дур. Е кемигеш гьечи гоф несохде, э пушой Марал поисде, у э хьитиётиревоz гирд эз дес энү, э менэхьэфи, минет ве серкушие сесевоз му-гу эзу:

— Биё, жон зен, пушой рафдейме, дерайм э хуне, екемлей дуь экиревоз бошим, е гиле семе зени-шуьверн сохим, дуьлмере кош сох...

Марал дес энуре Обой гуьрдки, и гофгьоре эзу шиновусдки эз терс вешенд хуьшдере, зури-зури хуьшдере гьирогъ кеши. У чумгьоре келе сохде е негиреи, хьэлежигер бироре хуно дениши э Обой. Оммо Обой виники и гьовой эн Марале, уре нисе воисде гуфдире куьнд бире э юревоз у зен ю биреки жиге, уш гьейсэг!эт, кейки у биё бурав э довг!о, эз жеки мэг!луьм нисди у зинде моргудге, эз гьэгьр эни кор энү, хун э вешенд э келлей эн Обой. Фирегье гьошгьай энү гье усэг!эт гьуьж дирморуьт, чумгьой жингови энү хун вечируьт, сифет гьечу гьирмизи бисдо, ки дэгь-мей гьутиней энүш — нишон эн жиге хэнжел — гьейсэг!эт веди небисдо.

— Ме бөгө, э гуфдирейтуьревоз, эз гьит енебуге эз сенгъ офире оморем, туь мере гьечи г!эзнет дорени, билбул сохдени?! — хьэрой вегирд э сер Марал, чумгьоре чарунде,— Туь эн ме зен мени, небуге кеси?!.

И гофгьоре гуфдире мунде, Обой те ебо Марал э илоуле денишире, гьужогъ зе уре, суке парлере хуно вегирд уре э сер дес хуьшде, эз хуьрш, сабирсуьзи дуьл хуьшде, нефес ю гирде, зури-зури берд уре э хисиренигьо утогъ энү. Эз терс, хьэлежигери гьемей жендек эн косибө Марал лерзи, дуьл ю верафд-фурамо, у сер гирд ковтер э гьэрмэгъ шилоли тартапил сохугьоре хуно, хьэрекет сохде эри ведешенде хуьшдере эз пенжей энү, буьруьж дешенд:

— Рэхьо ди мерел!.. Рэхьо ди мерел! Ме туьре э чум дире нисе хосденуьм, туь дуьшмен мени!.. Рэхьо ди!..

Оммо Обой неденишире э тартапилигьо, хьэройгьой энү, эз хьэвес ве хуьрш дуьл хуьшде диеш делуьре хуно бисдо: Марал зен ю биреки жиге, е гилеш э юревоз неки нэхисири, гьейсэг!э-тиш рази нисе бире эри е ченд минути семе, пушей эз шегьер ведерафде, э довг!о рафде, жуьфд бире юревоз, у эз сер-суи э пойгьой хуьшдеревоz шишире-ширие э сер хори дуллу биребуруьт-гьо гьирогъ эн дуразе бендгьой муй Марале, деберд уре э хуне. Бирден тен Марал гьолоке хуно бисдо, сер ю гьуз, десгьою шуь-ле хуно фурамо. Эзу сес не ведиромо, чумгьой ю чаруьсд эн муьрдере хуно. Обой вераси, ки Марал суьсд бири, эз хуьшде

рафди, немуьрди. Неденишире э и кор, у лап терси у эз расдиш мимуьруь гуфдире эгенер у эз Марал дес некендге, олхогын негъишдге уре. Обой гье гьечу э хьюьрш, гьэгревоз гьетте э ён карават энэ куьнд оmore, шенд уре, суьсд, гьолок бире зене э сер хьэловгьо, ю зури-зури, дие е гилеш э лой энэ неденишире, ведерафд э хьэёт. У гье гьечу зури-зури фираморе эз сер пил-конгьо, куьнд омо э ён г'эсб хуьшде, комики поисдебу, э сабиревоз денишире э сэхьиб хуьшде. Обой пое э зонгу недоноре, вешенд хуьшдере э кул г'эсб. У гуйге хьюьрш дуьл хуьшдере э сер тэхсирсуьзе г'эсб хуьшде тигъи сохде, тик гирде гьэмчиле, сэхд зе эз гьэбуьргьэй г'эсб хуьшде. Г'эсб бирден хуьшдере вешенд. У э гьэгревоз шихьне зере, гьеебо э диб-диби поисд, сере шувунде-шувунде, Обой кем мундебу э и туьтем эз сер г'эсб неофдорени. Песде г'эсб дуь пушои пойгьой хуьшдере э зарбевоз э хори фушенде, гье эз поисде жигей хуьшде э чергьезовоз видовусд ведерафд эз г'эрей эн фирегь вокурде бируьтгьо э и туьтем гьопуй эн хьэёт.

Марал э хуьшде диromoжи, руз ние бу, чуьшме эдембу э пенжере денишире. Эз товуш энэ хуне деруьтгьо чигьо е жирейге нушу доренбируьт. Суьфде у лап мэхьтел мунд, невераси эри чуь у руз пишней э хьэлов дегешдиге, чуь бириге э юревоз эзи е лэг'эзо пушо. Оммо гирошд е ченд минутигеш, те ебо у евош-эвош бегьем э хуьшде диromоре. У дир-дир, гуйге эз г'эрей думон, э гужевоз хэбер, очмиш бирере хуно вини, э ёр ю омо, чуь гирошдге инжо эзи е нимсэг'эт эйло э хьэёт энэ, чуь бисдоте э юревоз.

У гьейсэг'эт лап хэсде, жендек ю шуьле хуно чумгьой ю лилову бердере хуно бугеш, у э хуьшде гуж, хьэрекет веноре вэхисд эз жигей хуьшде. У евош-евош, э сер суьрте хорире хуно э хьитиётиревоз пой норе, бирден лойлум хурде неофдону гуфдире. е ченд бо эзи сер хуне э у серигей хуне гешд. Песде у эз кемер каравт гирде, поисдэ минжи хуне, чумгьой хуьшдере тик гирде, дениши э зеверсер карават э дивор вебугьо рангие сирот эн шуьевр хуьшде — Ошир Гьэзей Лугуи. Эз сирот шуьвер энэ эдембу денишире э у э эгьуьлменде, олхогине, екем могьбуле чумгьой хуьшдеревоз. Гье и жире зинде шекуьл, чигьрет энэ мундебу гьемишелуьг э ёр энэ. Дуьл эн Марал э у дениширенге бирден буланмиш, гьэйнимиш бисдо, г'эрсгьо дуьши э дуьл энэ, г'ов гьэжгьу эз гьизгьине г'этош эн кинле дуьшуьгьоре хуно, шур-шур тигъи бисдорут эз чумгьой энэ.

— Ошир, жунме, жигерме, товуш эн чумгьойме, туьре хэбер гьисдими эз дердгьо-хьолгьойме, э ме деруьмгьо билбулигьо, дуьлесдигьо, г'эзиетгьо? — сер гирд у эри шуькеет сохде эз тэхьле гьисмет хуьшде.— Эйчуь туь шенди рафди мере, и бедбэхде, сэхьибсуьзе етима сермере. Эйчуь немуьрдуьм ме гье э у гьэре-

бэхде шев э туьревоз. ГӀэзроил неберд жунмере э жунтуьревоз эеки? Чуьтам мибошум ме нмогьой туьсуьз, э зир коми сенгь есиёв денуьт и гьэребэхде сермере?!.

ГӀэрсгьо эдембу воруже хуно тигьн бире эз чумгьой энуге, сэхде гьирке эдембу манжаре хуно тасунде синей энуге, минкин нисе доренбу эри гуфдире э дуьл ю гулумпе бире мунде гофгьоре. Дие э у негуфдире э ки миёсде гуфдире у гофгьоре? У эри энуге эз гьеме куьндте, ГӀэзизте одоми бу э гьемей эни гӀуьлом. Эхи э гьэд эни вэхд, эзу муьрде эйло, дуьл энуге, немер гӀов вечинугьоре хуно, дерд, гьэм вечири. Эгенер у э дуьл хуьшде деригьогьоре, дердгьоре негуфдиге гьейсэгӀэт, эри Марал гьечу оморенбу, ки дуьл ю ГӀэтоше оноре хуно пара-парче мибу.

Эз билбули, догьуногьн дуьл ю, сер эн Марал гене черх хурдере хуно бисдо, занигьой ю буш, шуьле хуно бисдо. У дие э пой поисде недануьсде, нуьшд гье э минжи хуне, э лилов хурде чумгьоревоз денишире э шекуьл эн шуьвер хуьшде э зарзарне чорегь дебугьо. Песде у сине, зани куфде-куфде, сер гирд эри гирье сохде, чуьтам зенгьойму гирьё сохденуьтге э сер мито эри муьрде куьнде одоми хуьшде, вой сохде эри шуьвер хуьшде не эри хуьшде.

Пушой шохьонгум Марал лап хьолсуьзе хуно бисдо. Эз хьолсуьзи у не поисде, не нуьшде нисе дануьсденбу. Эз елойге уре сер гирд эри лерз веноре, гуйге э у гьуьздурме офдоге. Э гуш энуге хуно эдембу сес омореге, гуйге у э хуне нисди, э гьирогь туьнде чой поисди, Сер зиёди уре верэхшире гирдере хуно бисдо, бугьоз ю эдембу тасире. Ведибу, ки гьеме э гьэд эни песини дуьмегь зиёд эз шуьвер энуге муьрде эйло у кешире билбулигьо, дьлелсдигьо эслогь эз хьол, гьувот венгесд жогьиле зене, хэсде сохд дуьл энуге. Унегуьре у фикир сохд эри хуьшде имбуруз эри зуте дегешде э хьэлов, хисире, э хов семе фурмуш сохде и имбурузине гьозиере, песде те себэхь бире у белки хуб бире, э хуьшде диромеге. Эри энуге гьейсэгӀэт е дуьлхоши мундебу: Обой, эз комики зэхьлей энуге рафденбу, комиреки у э чум дире нисе хосденбу, оммо эз комики у нмогьой бенд бу, дие эй зуригьо э чум энуге нивохуру, песде белки унжо э довгӀо эз гунле енебуге шимшил эн дуьшме муьрд, сер ю э зир кулегьо демунд, ю эзу хилос бисдо.

Е-дуь сэгӀэт вэхд гирошде бэгьдо лерз тен энуге гирошд, оммо лэгьэр бире, зерди вешенде гьутинегьой энуге э герми ГӀэтош вешендуьт. Гьемей жендек энуге гуйге эдембу сухде. Согь шев у эдембу эзило зуло чаруьсде, вор хунде, э хуьшде недери. У э вор хундеки, лухьуьфе эз кул хуьшде шенде, гоь эдембу десгьо, пойгьоре вешенде-фушенде, хьэрой сохде, кинигере огол зере э кумеки, гоь эдембу шогьгьо зере хэндуьсде делуьре хуно, гоь зар доноре гирисде, шуькеет сохде эз гурунде тэхьле гьисмет хуьшде.

Энжэгъ себэхь биренге у екем сокит бисдо, э хуьшде диromo. У чумгьоре вокурденге, суьфде гуйге дур, э гъэд думон дерире хуно, пезде лап куьнд ве очугъ вини э пушой хуьшде э ён карават гъурлуугъчи хунере Бобоире. У нуьшдебу э гъирогълей стул, э ён бонилей Марал. Пох-похуе, э мегъгьо, оринегъоревоз шуне зере нисе оморенигьо сер энду дуллу э синей ю вебу, чумгьой ю э хифлет вебируьт, лэгIэй энду фирегъ вокудебу, гуйге у гье э у туьтем лэгIэпара сохдеки бирден хисири сэхд, эз хуьшде рафдере хуно. Э расди дес энду, э сер занн энду вебугъо, тара десмол дебу. Фирегъе, остгъу бируне ведироморе, чупур-чупуре сифет энду вомундебу, ранг хокистере хуно бу. Веди бу, ки у согъ шев нехисиребу, энжэгъ и пушоле чум энду э хов верафди.

Марал евошлей огол зе уре. Гъурлугъчи хуне гьетте сес бикей хуьшдере шиновусде, э хов терсире одомире хуно, эз некуми вешенд хуьшдере. У сере сэхд жумунд, миже куфде-куьфде, гуйге хъэрекет сохде эри эз хов очмиш бире. Пезде у гьеёбо вэхишд э пой, поисд е кем гъирогъте, э и вэхд э нэхэбереки эз дес энду офдо тара десмол э сер холинче.

— Чуьтами имогъой хьолтуь, холей Марал? — е кем э хуьшде демунде, гIэйб оморере хуно, э могъбуле ловхэндеревоз пурси у. шори сохдере хуно, бикей энду э хуьшде диromори гушдире.

Сес эн Бобои эз согъ шев нэхисиреи гирде бу эн омбар шороб хурде одомире хуно.

Бикей эн Бобои эзу энжэгъ дуь-се сал зиьдте келе негубеш, Бобои уре, э у хуьрмет гирде, «холе» огол зеренбу.

— Согъ боши, Бобои, согъ боши, гIэззи,— э мигъровуни ве келераразимендиревоз жугъоб до Марал.— Оммо ме недануьсдем ме шову нечогъ бируьм гуфдире.

— Гьи... Нечогъиш гьечу беге! — э гофгъой Марал мэхьтел бирере хуно, келе-келе гуфди Бобои. Пезде у эз овоми, дуьлочугъи хуьшде э гъаежони ве могъбулиревоз мугу: — Ме мугум, бобо вой, туь селт эдее муьрде енебуге эз муьрденш бедте — жингир бирейге, дие гьич э хуьшде нидиройге. Погъ!.. Ме шову эз терс, эз хъэлежигери кеширенигъоре кеширем!..

Оммо ю согъ шев нэхисири, чум хуьшдере е дэгъдэгъэш э хов невенори гуфдире, гIэре недоре десмоле э хинике гIововоз тар сохде э гIэтош гирде пушони энду венори, э сэгIэти ю е гиле э лэгъэревоз э лэгIэй энду ширине шелбет декуьрди, дуьл эн бикей ю «жиге гируь» гуфдире, офдоре луьхуьф энуре э кул ю дегирди — э товун эн гьемей эни коргъой хуьшде у е доне гоф негуфди, эри хуьшде лонгъ несохд эри гуфдире. Бобои ю хуьшдению гьейсэгIэт эдембу э гужевоз э сер пой поисде, шуьл, хэсдере хуно бу эз шовуне терсгъо, дуьлпесегъо, нэхисирейгъо, оммо хъэрекет сохденбу эри хэсдеи, вомундеи хуьшдере небирмунде.

Бобои э хуней гIошир Ошир Гъээей Лугун нуькер, гъурлугъ-

чи хуне, хьэёт-божей энү бугеш, э у сэхьиб не бикей энү хуб де-ниширенбируэт, эри энү рэхьмедуэли сохденбируэт. Бобои гье умогой е эз гиснеи, енебуге э ён боругьой хуней кес эз хиники гьэнчуыл гирде е зуьгIбее шев зимисду бее зере мимуьрд, эгенер е гиле и хунесуьзе, бинесуьзе етима кукле э хьэёт эн Ошир Гьэзей Лугуи э у расд ниомоге. Эзи е чор сал пушо е руз васали себэхьмунде Ошир Гьэзей Лугуи, эз хьэлов вэхуьшде, хьофдофо э дес дери, ведиромо э хьэёт эри э хьэжетхоне дерафде. Гье э и туьтем э ён тону нен хэрек у вини э зир чордогь киниге дегешди. У екем куьнд оморенге эз тону, мивини э куьнди эн е одоми сег эн хьэетиш, черх зере, дегешди, хисри э олхогьиниревоз, э хов гогь-бир евошлей зузе зере-зере.

Э ён тону э сер бирэхьне хори гилови дегешдебугьо одоми кукле бу гьечи е сиздегь сале эз гуьмуьр. У лап лэгьэр бу — е пуст е остгьу. Э тен энү жундур-жундуре буйгирде парталгьо вебу. Э сер энү килэхь невебу, э пойгьой ю — пойвоку. Кукле хисиребу э сер кемер, лэгIэре фирегь вокурде. Остгьубгьо бируне ведироморе лэгьэре фирегье сифет энү чупур-чупур бу. Е филонгьэдер мегезгьо эдембируэт жуьз зере э сер энү, эн куьшде моле хуно. Мегезгьо риз гирде нуьшдебируэт э иловлей лэгIэй энү, э сер мижегьой чум энү, эдембируэт гешде э сер туз, хьуьрс гирде, гьэбер-гьэбер бируэтгьо лэгьэре кун пойгьой энү. Оммо кукле сэхд хисиребу эз гуьлом рафде одомире хуно.

Ошир Гьэзей Лугуи чуме эз лой кук вегирде, э гьэгьр ве мэхьтелиривоз дениши э лой сег, э шолуми-олхогьиниревоз хисиребугьо э ён эн дусд хуьшдере хуно, э е жиге э и хунесуьзе оворее куклеривоз. Эзи кор эн сег хуьшде у вераси, ки и кукле ведини суьфден шев нисди, эз пэхьники, э сер боруй хьэёт верафде, дироморенигьо инжо эри хисире. Сег неки хуте бири э ки энү, угьо эз дуь еки олхогьин, рази, дусдгьоре хуноют.

Сег бирден сэхьиб ю инжо биреире шек сохде, когьли-когьли вэхьшд эз жигей хуьшде. У лэгIэпара сохде, кеши жендек хуьшдере, э ховолуьи ве шуькеетлуьиривоз екем зузе зе. Песде у э хьитиёти ве техсирлуьиривоз енево дениши э лой сэхьиб хуьшде, гуйге эри дануьсде гьовой энуре. Виники сер-сифет эн сэхьиб ю гьэгьриве хунои, у гьошгьобогьлуьни, эгьуьлменде сег гье усэгIэт дануьсд, ки у рази нисди эзу инжо э хьэёт неки кесигере гьишди дироморе, уьсделуьге э олхогьиниревоз гьишди уре э ён гьэбуьргьэй хуьшде хисире. Унегуьре те ебо эз сэхьиб э ю гоф оmore, тембихь вегирде, сег зури-зури вирихд эз ки энү э дорун хьэёт.

Ошир Гьэзей Лугуиьни куьнд омо эз хисиребугьо кукле, сег несохде гьуз бисдо э сер энү, песде гьеебо эз некуми сэхд э зарбевоз гирд эз дес энү. Кукле гьелуьсди хуьшдере вешенде, гьеусэгIэт хэбер бисдо, фирегь вокурд чумгьой хуьшдере, э зэхьле-



вежэгъиревоз дениши э сифет эн сэхьиб эни хьэёт. У зур-зур и вэхьшд э пой, э у десигеревоз, комиреки Ошир Гъээей Лугуи э дес хуьшде негирдебу, вокоши, дуз сохд шовол хуьшдере. Веди бу, ки шовол энэ эз буши офдоренбу тогъбир эз пой энэ. У хьэ-рекет сохд эри ведешенде дес хуьшдере эз дес Ошир Гъээей Лугуи эри вирихде эзинжо, песово-пушово неденишире, оммо сэхьиб хуне диеш сэхд гирд дес энуре. Кукле дениши виники у эз дес энэ вирихде нидануь, лап терси, хьэлежигер бисдо, хьэрой дешенде, гирисд келе-келе, э хьвет бугьо дес хуьшдеревоз сифете пэхьни сохде (э хьисобовоз уре сэхьиб хунегьо, хьээтгьо куфден-бируйт эри шевгьо э хьээтгьой энугьо дироморе хисирей).

— Ой леле, жон леле, мезенит, мекуьшит мере! Ме дуьзд нисдуьм, э жун худо, ме дуьзд нисдуьм! Ме энжэгъ эри е хисиреле оморенуьм инжо. Мекуьшит мере! Уь-уь-уь!..

Ошир Гъээей Лугуи э расдиш воисденбу гьейсэгIэт е-дуь муьшд зере эз гIэил, нифри сохде, терс, гьелебуле доре уре, шевгьо дие э хьэёт энэ недиров гуфдире. У эри хуьшде фикир сохд, ки эгенер уре у гьейсэгIэт хуь куфде, терсунде, гьелебуле недоге, у песде неки ю тэхьно, э хуьшдеревоз юре хуно сэхьиб-суьзе, хунесуьзе гIэилгьоре-оворегьореш миёру инжо эри хисире, белки дуьздиш сохдуьтге. Оммо шиновусдки божэхь, гирисдеи, минет эни лэгъэре, гуйге эз хьэлов нечогъи вэхьшде гIэиле, э пара-парае парталгьоревоз, у э хуьшде демунд, э дуьл энэ рэхьм омо, уре езугъ оmore э гIэил.

— Метерс, ме туьре никуьшуьм, метерс! Ме э туь бовор сохденуьм, туь дуьзд нисди гуфдире, метерс! — дуьл ю гурунд бирере хуно э хоширивоз мугу у эз гирисденбугьо кукле.

Кукле э гофгьой ю бовор соху гуфдире, Ошир Гъээей Лугуи дес энуре рэхьо до эз дес хуьшде, межбур сохд хуьшдере лове екем э мигьровуние хэнде веберде. Песде у, негирей сохдгеш, э гьолинде, келе пенжей дес хуьшдеревоз дес кеши э сер эн сиегье, пичире, руьшг вечире муйгьой энэ, тимор сохдере хуно. ГIэил виники дес юре рэхьо дори, у э е десевоз гье гьечу шевол хуьшдере сэхд гирде, неофдону гуфдире поисд гьечи э жигей хуьшде, эз зир чум э терсирей ве шеклуьиравоз, денишире э Ошир Гъээей Лугуи, сигьмиш сохе оmore вэхьшие хьэйвулере хуно. ГIэрсгьо гье эз сери хуьшде непоисде эдембируйт шур-шур тигьи бире эз чумгьой энэ.

— Воисдениге пой э киме, эйтуь зобу нибу,— екем думит сохде бегьдо гуфди эз кукле Ошир Гъээей Лугуи.— Песде екем поисде пуьрси: — Э гIэсбгьо мугьоет бире мидани?

Ошир Гъээей Лугуи кими келе гIоширгьой Дербенде хуно и пушогьо восдореву фейтун, дуь хубе жинслуье гIэсбгьо. Уре гьемин герек бу одоми эри гIэсбгьоре гьурлугъ сохде, гьемише кор хьэёт-божере сохде.

Кукле гьетте шинире э товун глэсбгьо, гьовой энуге усэглэт ежирейге бисдо, эз шори уре жиге небисдо, гирисдей энуге поисд, тара чумгьой энуге бирден э шори не дилбоширевоз денишируйт.

— Э глэсбгьо?! — эз шори дуыл юре гирде, келе-келе гуфди кукле, шовол хуьшдере гье усэглэт сэхд гирде, комики и дес лап эдембу офдоре, чуьнки эз билбули дуыл хуьшде, у фурмуш сохде шовол ю офдорени гуфдире, гьердуь десе эз шори тик гирде, зверо вешендебу ижире теклифи эн Ошир Гьээей Лугуире шинувусдки. — Ме мугьует э глэсбгьо?!. Ме глэсбгьоре эз жунмеш зиёд хосденуьм!

Кукле гуйге селт фурмуш сохд, ки гьеле эзи дуь-се минут пушо у эденбу эз терс, хьэлежигери лерзире э пушой эни гьолинде огьурлуье мерд, э пушой эн Глэзроиле хуно. У сер гирд эри зури-зури, гофгьоре чешмиш сохде-сохде, гирде нум эн кими ведилуье одомигьой шегьере, ишуре глэсбгьо гьисдигьоре, чуьтам у эри е тике нун, кимвэгдо гьечи э гьовон бердениге глэсбгьой энугьоре э дерьёгь тен энугьоре эри шушде, песе зир энугьоре вечирени, э овхур ишу гиёв, жуьгь декуьрдени.

Ини гьечи Бобои эзу рузевоз бисдо корсох эн хуней Ошир Гьээей Лугуи. У бу гьеми э жигей эн глэсбон, гьеми э жигей фейтунчи энуге, гьеми э жигей гьэреулчи, гьемиге кор хьэёт-божоре сохдегор.

Кукле эз расдиш лап келе глэсбдусде одоми бу. У омбар хуб мугьует биренбу э глэсбгьо. Э е руз у ченд гиле зир энугьоре мечи, темиз мисохд, овхур эн глэсбгьоре гьич тигьи нигьишд, э вэхд ю эри энугьое э овхур гиёв, жуьгь мидекуьрд, э ён чол эн хьэёт овурде угьоре, эз чол тозе, хинике глов вегирде э бедире-гьоревоз, мидо угьоре, мигердунд э хьэёт, эз минжи весал те минжи эн поиз миберд угьоре э дерьёгь тен энугьоре эри шушде. Эз хуб дошде, хуб мугьует бире, муй тен энугьое эдембу товтов доре. Глэсбгьо диеш рач веде бошут гуфдире, у муйгьой дуьм ве лужугьой герден энугьоре гьэшов мизе, лов мисохд, жуьрбе-жуьре хубе, ширине нумгьое мидо глэсбгьоре, гоф мисохд э угьоревоз, гуйге э одомигьоре хуно, э дуьлю деригьое гофгьоре, «сургьоре», «ниетгьоре» мугуфди эри энугьое, гьеме хэвлете вэхд у э куьнж эн товле э ён глэсбгьо, э сер гьолинде гьембиз эн хуьшге гиёвгьое дегешде, михиси, сэхд, эз хуьшде рафдере хуно, неде-нишире э сес фир зере, пое-пой эн глэсбгьо.

Лап кел шори, холисе мигид бу эри Бобои ужире руз, кейки у э буйругьи сэхьиб хуьшдеревоз, хуб гьурлугь, тимор сохде оmore глэсбгьоре э фейтун дебесе, хэзени хуьшдере не зен энуре э фейтун венуьшунде, берденбуге угьоре э онгурбогьгьой энугьое. И эз хосиет-дивэгл гьемише когьли, ховолуь, охмурлуь, одомисевмезе хуно бугьое кук гуйге гье э пушой чум эслогь ежирейге биренбу. Уре э и вэхд эри дире гуйге е томоше бу. У э сер эн

кузлей фейтун нуьшде, вожегьой ГӀэсбгьоре гирде, э шори, э кейф дерие одомире хуно, вэхд эз вэхд э сабирсуьзиревоз мэхишд э сер пой. Вожей ГӀэсбгьоре вежегьунде, э гофгьо, сес хуьшдере-воз угьоре гьуьруьш доре: «Гьей-й-й! Жейронгьойме! Паруьсдекгьойме!..», мӀгӀни михунд эри энугьо, комигьореки екиш нисе дануьсденбу, нисе верасиренбу эз ю неГӀэсбгьой ю бӀгьӀэй, енебуге шори-шори михӀндуьсд эри хуьшде. Э ижире вэхд э чумгьой энущуькеетлуьи ве ховлуьи гьич нивинири, кимвӀгӀдо чумгьой энущуькеетлуьи э ижире вэхд дениширенбируьт э жуьргӀӀӀти, уьткемиревоз.

Хэзеин энущуькеетлуьи лап рази бу эз гьурлугьчи-нуькер хуьшде. Не эри энущуькеетлуьи уре унгьӀӀе пулиш хэржи нисе биренбу эз хурде не партал энущуькеетлуьи бӀгьӀӀэй. Ошир ГьӀэзей Лугуире хьӀэз оморенбу бирмунде э кукь разименди хуьшдере э у, фикир сохде эри хуьшде, ки у никисох энущуькеетлуьи, эгенер у э пушой чум Ошир расд ниомоге, белки Бобои те имогьой пуч-гьич мибисдо. Жогьиле зен энущуькеетлуьи, э хуней косибе одоми вероморе, комиреки сикелуьи ве уьткеми эн э ГӀошири хуьтте бире, вероморе одомигьо недебу, неденишире э ГӀӀэжоибе хосиетгьой эн Бобои, э у екем руьхшенд сохденбугеш, э хуби, рӀхьмедуьльиревоз дениширенбу э и етима кук, гьурлугьчи хунешу. ЭнжӀгь кими вӀгӀӀдо эри е кор чи у эзу бирази бире, гьӀгьӀр сохде э у, э негиревоз назуке, испогьие вини хуьшдере гьуьжунде, десгьоре вежегьунде, э вогьнеки «зӀхьлевежӀгьӀ хуно» бире, келе-келе мугуфди:

— Фу-фу-фу-у-у! Буй гирош! И чуь буи эз туь оморени?! Бура, ибуд бош эз пушой чумме!

Унегьуре гьейсӀгӀӀт Вобои сес эн бикей хуьшдере шиновусдки, зури-зури вӀхишд эз сер стул, комики э Ӏн бонлей энущуькеетлуьи бу, ГӀӀӀӀӀб оморере хуно, кеши хуьшдере э гьирогь, терсире ки эз ю, эз парталгьой ю оморенигьо буй эн товле, эн серги неверав э нефес эн Марал. Марал вараси эри хуьшде гьовой эн Вобоире, эйчуь у гьетте хӀбер бире, нуькер эн хуне тӀгӀӀди сохдге эри дурте поисде эз ю. Марал хижолет кеширенире хуно бисдо, э ранг рафде, нечоӀгьӀ сифет энущуькеетлуьи могьбуле хӀнде верафд.

— Мепой гьечу э сер пой, нуьш,— э чумгьоревоз бирмунде э стул у елӀгӀӀэзоиге нуьшдебугьо, мугу эзу Марал э гьолоке севоз.

— НӀгӀӀ, нӀгӀӀ, нинишуьм,— сере э жуьргӀӀӀтиревоз жумунде, мугу Бобои.— ГӀӀэсбгьойме гиснеуьт. Ме эз шовуревоз дуь гиле шихьиней энугьоре шиновусдем — угьо мере эдее огол зеренуьт.

Марал дие гоф негуфди, энжӀгь сере жумунд, еГӀни уре э гоф энущуькеетлуьи разини гуфдире. Марале гьейсӀгӀӀт эри гоф сохде гьувотиш небу, эз елойгеу варасариенбу, ки Бобби дузи, уре рафде гереки, не гьейсӀгӀӀт кумеки энущуькеетлуьи юре герек нисди. Песде у биӀ хьӀерекет соху, вӀхизуь эз хьӀэлов, кор-бор хуьшдере винуь, дес-руй

хуышдере шуру. Бобои тара десмоле эз хори вегирде, зурн-зури ведерафд э хьэёт.

Марал эз нечогъи хос бире, э хуышде дироморенки, эн суьфде у эри Бобои жиге сохд э еки эз чуькле хунеле э куьнж эн сиро, эслогъ жейле бугъо эз де утогъгъойгей эн хуне. И чуькле утогъ-ле пушоте хуьрд-пуьрт эн хунере донеренигъо жиге бу. Те и вэх-ди Бобои зигъисденбу э е чуькле хунеле э ён эн товлей гIэсбгъо бугъо жиге.

Марал Бобоире гировунденге эри зигъисде э и чуькле утогъ э куьнди хуышде у гъич эслогъ думит несохдебу, гъич э фикиргъо-хьээлгъой энущ недебу, ки чуь песеде мибуге э гIэрэй энугъо, чуь бедбэхди, трагедия миёруге эри гьердуьй энугъо, иллогъки эри эни жовоне, недане, овоме сэхъибсуьзе кук-етим. Оммо гьейсэгIэт у гировундебу нуькер хуышдере э куьнди хуышде эри дуьлгъо-мини, сокити, саламати хуышде. Марал зигъисденбугеш э сэхде бору кешире хьэёт, э сэхде хунегъо, сэхде гъопугъо, эри эндуьлгъемини бу э куьнди энущ, эн тэхъное, жогъиле зен гъемише е куьнде, эрию дуьлсухуни сохденигъо одоми бу гуфдире. Песеде Марал эри энущ омбариш сер гирд эри езугъбери сохде, гъэдуьр энуре зиёдте дануьсде иллогъки эзу шев, кейки у нечогъ биренге эз терсгъо, хьэлежигеригъой Обой, нуькер энущ Бобои согъ шев эз ён бонлей энущ невэхидебу, омбар келе дуьлпесои, гъаёжони кеширенбу те у чум вокурде, э хуышде дироморе. Э хотур эни ники энущ Марале воисденбу уш эри энущ никие кор соху, эзу «говду», эжеки у зигъисденбу э ён гIэсбгъо ведировунде уре, до е утогъле э сирой хуышде, одомире хуно зигъуь.

Гъеме чуь кор герек буге эри хуне, кор базарире, э тапшуьр-миши эн Маралевоз кими косибе, бие зенгъо сохденбируьт эри энущ, хуышдере, гIэилгъошуре эри дошде. Рэхъмедуьл, деслов бугъо Марал угъоре хубе гъэгъ доренбу эри кор ишу. Гъе и зенгъо эри энущ нун мибуржундуьт, партал мишушдуьт, хунегъо-жигегъой энуре мечируьт. Эри фэхъле э киро гирде эри э богъгъой энущ кор сохде: бил зере, гIов доре, тегъенг бурра, капарус шенде, онгур вечире, шире жарунде ве де коргъойге — и коргъоре серберэхъи сохденбу е дилбоше синогълуье подрядчик, комики эз шуьвер Марал согъинден кор сохденбугъо эри энугъо. КимвэгIдо Марал э фейтун хуышде венуьшде рафдембу э богъгъо э нуькер-фейтунчи хуышдеревоу, рафдембу дуь бэхшиш коре эри фегъм сохде нэгI, эз тенги дуьл хуышде, фикиргъо-хьээлгъой ю, дуьл юре шев-руз сигъмиш сохденбируьтгъо, екем эз ёр ю ведеравт гуфдире, дуьл хуышдере екем эри веровунде.

## СЕНГЪ Э ПУШОЙ РЭХЪ

Гирошдебу э куьнди е сал эз довгю сер гирде оmore эйло ве эз Обой э фронт рафде. Обой кем нувьуьсдембу когъоз эз фронт эри зенгьой хуьше, комигьоки зигьисденбируьт гье э е хуне э гӀилгьошуревоз. Оммо Обой эри Марал э гъэд эни е сал гьич е когъозлеш не нувьуьсдебу, е хэбериш недоробу.

Эз довгю эри омбаргьо э шегьер оmoreбируьт беде хэбергьо пуч бирет гуфдире куьнде одомигьошу: бироргьо, кукгьо, шуввергьо, бебегьой гӀилгьо, енебуге яралуь, шуькест бирет. Э омбаре хунегьо ёс, гирье дебуге. Марале хэбер бу эзи дердгьо, дуьлесдигьой эн бие зенгьо, етим мунде гӀилгьо, омбар дуьлсухуни сохденбу эри энугьо. Оммо Обой согъ саламат мундеи э довгю уре омбар дуьлпесо сохденбу. Шев, руз, э дегешдекиш э вэхишдекиш у эдембу эз худо лово хосде Обой эз довгю мевегорде гуфдире, сер энуге э зир кулегьо домуну, дие у Обое гьич э чум хуьшдеревоз невинуь. Эгенер Обой эз довгю зинде невогошдге, увэхди у эз дес энуге хилоси, азаде одомини, сэхьиб эн мол хуней эн муьрдигьо шуьвер хуьшдеи. Сер зиѐди Марал мидануь рафде э шуьвер э юре воюгьо одоми. Оммо те гьейсӀэтине «шуьвер» энуге — Обой согъ гьисдигьо и эри энуге эз сер рафденигьо кор нисди. Обой — сенгъ дохьорини э пушой рэхъ энуге.

Оммо имогьой Марал гьечу могъбул, дуьлхуьрд, гьэмлуь небуге, суьфдеи рузгьо, мегьгьо бугьоре хуно шуьвер энуге Ошир Гъэзей Лугуьи муьрденге. У оmore-оmore э хуьше диromo, гьовой ю хуб бисдо. У гьейсӀэт гье гьечу рач, сер-сифет ю шевгьлуь, гьейронлуь бу э шуьвер ю согъ гьисдикире хуно. Вэхд не жовони энуге э жун дировунд уре. Оммо сер ебо э ёр энуге оmore, ки у э муьдди, есири эн дуьшмен хуьше — эн шебирор дери, у гьейсӀэт э пушой чум энуге нисдигеш, чуьтам мибуге биевгьо зиндегуни энуге, эгенер Обой эз довгю вогошдге, дуьл энуге лап гъэреболугъ сохденбу, у гене ве генеш хуьшдере бедбэхд, гьэлхендсуьз, сэхьибсуьз, э тур, э желей суруле овчи офдорере хуно гьисс сохденбу. Вэхд эн келе довгю бугеш, зиндегуни эри омбарте одомигьо лап гъэдерсуьз четин ве гурунд бугеш, иллогьки э и вӀедотгьо, оммо хуьшдени эн Марал е михьтожи, четини синемеш ниссе сохденбу. ЭнжӀгъ эз себӀхъ те шохьонгум тӀхьно дебиреи э чор дивор эн хуне, жогьиле гъувот, войге, эшгъ э дуьл дери, очугъ, мӀгӀлуьм небиреи эри энуге биѐвгьо овхьолет зиндегуни энуге, гьисмет энуге, гьово, дуьл энуге гьечи гурунд ве гъэреболугъ сохденбу, ки у хуьшдере э сӀхде гьӀфес дерие гъуше хуно хьисоб сохденбу. Унегуьре эри энуге гьечи оmoreнбу, ки эз ю бедбӀхдте одоми нисди э руй эн гьемей эни гӀуьлом.

Гьечи руз бе руз эзи куьнж хуне энуге куьнжиге гешде, эри хуьше е муьшшули, дуьлхоши неофде, чорей энуге мибисдоге эз

могъбули, тенги дуъл хуьше хьэрой, шивен мидешенд э хуне. Эз дуьлтенги, могъбули эзу товуне, ки юре нисди гуфдире глэзи-зе шуьвер, глэнл, эри комики дуьл энү эдембу нугьор кешире, нисди бэхд, мозол кифлети, нисди шори, дуьлгьемини — гьемей эн фикиргьо руз бе руз э дуьл энү гужлуу бире, сэглэр мидо уре. Кимвэгдо эри фурмуш сохде и дуьл энуре сэглэр доренбируьт-гьо фикиргьоре, у гирфинкей шоробе э пушой хуьше норе, гра-мофоне зере, михурд шоробе, э сэглэтгьоревоз гуш мено заруьн-жие сесгьой мэгИнигьой мугьоммере. И зарунжие, шуьжетлууе, гьейронлууе сесгьой мэгИни гуйге эз лугьонди эн сэглэр, билбул хурденбугьо дуьл эн Марал ведироморенбируьт, деш буланмиш, дердинежер сохде уре эз мунде жигеш. Марал э ижире вэхдгьо эз сер хуьше гуьрде, лойлум хурде, сэхде дуьледерди гирде одомире хуно, зар доноре мигирисд.

Е гиле нимешев Бобои э утогьлей хуьше сэхд хисиребугьо вэгдо, киниге дер энуре куфде, хэбер сохд уре. Нуькер э гуже-воз ховолуе чумгьой хуьшдере вокурде, когьли-когьли вэхисд эз хьэлор, дере нимелит вокурде, муйпеллуе сер хуьшдере бируне ведешенде, дениши. Вэхд эн поиз бу. Менгине шев бу, товуш, сожит, оммо хиник бу. Бобои омбар мэхьтел мунд виники э пушой дер утогь хуьше бикей хуьшдере, поисдебугьо сере гьуз гирде. Имогьой е сал зиёд бу у инжо кучмиш бире эз жигей хуьше, оммо е гилеш небиребу Марал уре шев нимешев эри е кор-чи хэбер соху.

— Э холей Марал, хэйр гердо, чьуни, чьу бири? — муйлууе синей хуьшдере хорусде-хорусде, лэглэ пара сохде, э ховолуе сесевоз пуьрси Бобои, ведироморе эз дер.

Э жигей жугьоб энуре доре, бике э шевгьлууе сие келе чум-гьой хуьшдеревоз э глэжобиревоз дениши э у. Е гоф эз лэглэ не-ведировунде, лап куьнд омо эзу, дес Бобоире гирде, сэхд жарунд э дес хуьше. Нуькер энжэгь гьейсэглэт дениши вини, ки бикей энү, неденишире э хиники шев, пой бирэхьнен, э тен энү дуразе назуке зиршейни вери, сипре синей энү нимелит рэхьои, муйгьой сер ю лови. Э товуши эн пура менг глэжонбе ловхэнде верие сифет энү зиёдтеш темиз, ширмови ве сипи веди биренбу эз ру-зиш, мармаре хуно, чумгьой энү эдембируьт денишире э Бобои э хуши, мигьробониревоз.

— Ме тэхьно терсиренуьм э хуне, биё е кем нуьш э меревоз, — евош, э е кем лерзирере хуно бугьо сесевоз мугу Марал, дес энуре э дес хуьше гье гьечу сэхд гирде. Оммо не э сес энү, не э сифет ю гьич е тикеш нишон эн терси, сегьми невебу. Эз сес не сифет энү гьейсэглэт асант дануьсде мибисдо мнгробони, гьейрони, гьаежони ве пэхьникие минет энуре.

Бобои те е гиле э хуьше дирорморе эзижире нехэберекие кор, рафтор энү, Марал гьеебо ведешенд дес энуре эз дес хуьше,

гъэл дешенд э герден энү, куьнд овурде эз хуьшде вено сер хуьшдере э фирегье синей эн нуькер. Э вини эн перт-мэхьтел бисдогьо Бобои гье усэГлэт верафд этирлуье буй муйгьой энү, эн герме жендек энү, гьемчун буй эн туьнде шороб, оморенбугьо эз лэгЛэй бикей энү. Эз нукуми серхуше хуно сохде уре.

Гьелбет, эгенер нуькер надан-овом нибисдоге у эз зуревоз миёсде дире, верасире, ки сер ебо угьо гьердуьшу эри чи хурде нуьшде э сер суфре, сие шевгълуье чумгьой эн бике омбариш э лой энү биренбируьт, дениширенбируьт э у э дуьлхоши, муьгьорбони ве езугълуьйревоз, у сес хуьшдере нерм, ширин сохденбу. Бике кимвэгЛдо гуйге нэхэбереки душ хуьшдере енебуге эн духдер хунере хуно гиргине, дерам бугьо синей хуьшдере э душ энү зерену, енебуге э вогьнеки э гьуз биреки, дес кеширеки э сер суфре герме шумоле сифет хуьшдере э сэхде, руш нечире телуьтелуье гьутиней эн нуькер зеренбу. Оммо неденишире э гьемей эни коргьо эз тараф эн бике, нуькер нисе верасиренбу, э гьэвл нисе офдоренбу чуй воисдеге эз ю бикей энуре. Бобои ингэде дур бу эзижире фикиргьо, ки у гьич э хов хуьшдеш думит нисохд эри хуьшде, ки гуьзеле бикей энуре мою э юревоз, «буй гуьрде» кубуте нуькер хуьшдеревоз ошноети соху. Ижире фикире эгьуьл энү нисе бурранбу, нисе ветовусденбу. Эз елойге нуькер энү неки овоме кук бу, оммо эз хосиетгьо, дивэгЛгьой хуьшде лап хьэмендс, глэйбкеше одоми бу. Эзи товунеш ижире фикиргьо нисе оморенбируьт э дуьл энү.

Сөбэхьимуьн Бобои хэбер бисдо э хьэлов эн бикей хуьшде, комики дегешдебу э ки энү э сер кемер, дуь чуме э сергьови хуне доноре поисде, чуйге думит сохде эри хуьшде. У эз Бобои хэйли зуте хэбер биребу. Бобои хэбер биренге суьфде эри энү лап мэхьтеле коре хуно омо ю э хисиренигьо утогь бике, э юревоз э е хьэлов дери гуьфдире. Суьфде и кор эри энү эври нэгЛ, э хов дирере хуно омо. Песде э ёр энү омо шову нимешев, чуйтам бикей энү уре эз хисире жиге хэбер сохде, гьэл дешенде э герден энү, кеши дебердге уре э утогь хуьшде, песде дегердундге уре э хьэов э ки хуьшде...

Гьовой Бобои гьейсэГлэт эн екем серхуш бире одомире хуно бу. Жендек энү екем шуьл, оммо лап рэхьэте хуно бу. У имогьой дануьсджиш, верасикиш и эз расд бире кори, эдее дире, чуйтам бирэхьнее гьэбуьргьэй энү э герме, нерме гьэбуьргьэй эн бике расирениге, гене и эри энү муьгьуьжуйзе кор оморенбу. У виники рангие э зарзарие чорчуьбе дебугьо сирот эн Ошир Гьэзей Лугуи э дивор, э зверсер карават невери, омбар мэхьтел мунд:

— Э холей Марал, сирот эн лелей Ошир э дивор невери эхи? Чуй бири уре? — э келе мэхьтелиревоз пуьрси нуькер.

Марал гоф несохде э биразириревоз екем шефд дениши э лой энү. «Вой худойме, чуй куьте, хэре гедей и!..» — гуйге ноле зе-

рере хуно э дуыл хуышде гүфди Марал, песде гье усэгІлт э у гъэгър сохдере хуно, э улойге чаруьсде, кемер хуышдере чарунд э лой эну. Песде эри Марал эзи шову и кор бире эйло э гІэрей энугьо руьхшенди, лоигъсуьзи, гІэйбире хуно оморенбу Бобои уре пушотеинере хуно «холо» огол зере гүфдире...

Неденишире э ижире фикиргьой хуышде, имогьой е шевиш нисе гирошденбу тэхьное бике не тэхьное нуькер э е утогъ, э е хъэлов нехисуьт. Оммо Марал сер ебо эри хуышде думит сохде, ки э товун у э нуькер хуышдеревоз ошне биреи эхириш белки очугъ, мэгІлуьм бисдо, и кор уре лап терсунденбу, дуыл юре омбар гъэреболугъ сохденбу, зэхъэр зеренбу э и ологьой эну э нуькерюревоз. Марал дануьсденбу, эгенер, худо меёро, Обой эз довгІо вогошдге, дануьсдге у инжо э нуькер хуышдеревоз зигъисди, ошнеети сохди, сер эн Марале мибуьру. Обой ёгъин микуьшуь уре гьемчун э хотур эну кориш, егІни номус хуышдере эри дошде э пушой жэгІмет эн шегьер. Песде эри эни кор Обое екиш гІэйб нисоху, диеш дуьлсухуни мисоху эри эну, чуьнки зен эну уре фирмунди, э шуьвер хуышде хогъин ведиромори, обур, хъэёй хуышдере вир сохди. Эгенер Обой несохдге и коре, неведешендге и гъэгъре эз зен хуышде, одомигьо уре гІэйб мисохдуьт, серкуш мизенуьт. Уре эри килэхъ воноре, э пушой хэлгъ ведироморе сер нибу. Обой белки согъ вогошд эз довгІо. УвэгІдон чуй хуби эри эну? Ини се сали довгІо эдее гирошде, нисе верасде, оммо Обой гьелеш зиндеи, согъи. Не гунле, не шимшил эн дуьшме э у гьеле нерасири, гуйге тилисимлуьни. Оммо довгІо гьергой гири биё верасуь?..

Иллогьки терсиренбу Марал оmore бирден гІэйл немуну, дуыл эну эз зуревоз эри гІэйл нуьгор, тешне бугеш. У лап келе дуьлхуьрди, могъбули кеширенбу эз шуьвер ю у гІэйл немунд. Уре е гІэйллей нарине мибисдоге эз шуьвер ю, ижире гилгульгош э сер ю ниомо, эри эн хуышдени Маралиш келе шори, дуьлхоши, дуьлгьомини мибисдо. Гьисдими э и фоние «пенж рузине» гІуьлом эз гІэйл ширинте, гІэзизте ве зиёдте?!. Оммо гьейсэгІэт зехълей эн Марал рафденбу нум эн гІэйле э дуьл хуышде гирденге, жигербогъур ю рафдембу эз терс ю белки гІэйл мунд, юре гІэйл мибу гүфдире. Увэхди гІэйб-сур эну гье усэгІлт лов мибу э гьемей шегьер. Увэхди те егиле Обой уре куышде, Марал ю хуышдению биё зур-зур хуышдере вегируь зинде-зинде э гъэд чол, э гъэд дегесунде тону дешенуь.

Эгенер Марал гьечи дуьлпесо, дуьлдэгъдэгъэ буге эри эни кор, терсиренбуге эз жун хуышде, эз биёбуригьо, серкушигьо, овоме, эгъуьлбуше хоснет гІэйли дебугьо нуькер энуре гьич гуйге е фикир, дуьлесдиш небу эри эни кор, э хэпер юш небу. У лап шорбу раче, товтовие бикей эну уре эри хуышде ошне гирди гүфдире. Уре имид бу, ки и сур энугьоре екиш нидануь: Э и



хьэйт, хуней энугьо екиш нисе зигьисде эзугьо нен дуи бэгъэй. Ки дире, шиновусде, дануьсде шев чуй биреге э гIэрей энугьо. Э товун эз ю белки бикей энугьо гIэил мунд гуфдире э фикир энугьо нисе оморенбу.

Оммо чуйтам гуфдиренуьтге: сургьой хуно э базар шиновусде оморе. Омбаргьо э шегьер шек сохденбируьт, чуйтамыге гIэрей эн гIошире раче зен Марал э жовоне бухуре нуькер хуьшдеревоз, эз песой энугьо ченд жире гофгьо сохденбируьт, дивунгьодоворигьой Марале гирде, мигуфдируьт, иллогьки зенгьо: «хок э сер энижире зен вераво! Шуьвер ю э довгIои, шев-руз э зир гунле-барут дерн, э пушой гIэжели, и гьэнжугь, хьэёсуьз, филонфестер, номус-гIор хуьшдере хурди, эз хьэё-дово ведерафди, нуькер хуьшдере эри хуьшде пэхьникие ошне гирди».

Кими вэгIдо и хэбергьо э гуш Маралиш расиренбируьт, лап эз мунде жигеш хэреб сохденбу дуьл энуре. У юш нисе дануьсденбу чуйтам и сур энугьо мэгIлуьм биребуге э гьиргьдекигьо. И коре у эз эрию нун вебуржунденбируьтгьо, партал шуштенбируьтгьо де гьурлугьгьойгейюре сохденбируьтгьо зенгьо шек, гумон сохденбу. Оммо э пушой чум энугьо Марал гьечи гирденбу хуьшдере э Бобонревоз, чуйтам гереките бике э нуькеревоз, еки энугьош гьич э тикеш шек несохут, ки Бобон ошней энугьо гуфдире. Не хуьшдени нуькериш, неденишире э эгьуьлбуши, дусди, мугьбет энугьо э кин эн Марал, чум руз э пушой эн гьирогьдеки, эн кес хуьшдере гирденбу э сабуревоз, обуревоз, тевзуьлиревоз э песой бикей ю гоф-гелиж небу гуфдире.

Эхирки дуьл эн Марал эзи фикиргьо ве эзи шиновусде хэбергьо динж, э жигей ю небу. Унегуьре е гиле хьовугьой эн Марал — зенгьой эн Обои эзу когьоз вегирденге, э комики у нуьнуьсдебу, ки гурунд яралуь бири, оммо имогьой, худоре шуькуьр, хос бири, эй зуригьо могорду э хуне, Марал эз терс лап хьэлежигер бисдо. Терсире Обой и гьэгерэ э у нидегьилуь гуфдире, Марал гье у руз теклиф сохд э нуькер хуьшде, хьэлов-болуш хуьшдере вегирде, дир несохде гирору гуфдире э куьгьне жигей хуьшде, э ён товлей гIэсбгьо. Эзу рузевоз Марал ошнеети хуьшдере бурри э нуькер хуьшдеревоз. ГIэрей энугьо бисдо гене гье гьечу, чуйтам буге пушоте.

Оммо Обой чуй кориге оморе нисе ведироморембу. У эз песини когьоз нуьвуьсде бэгьдо, эжеки у гуфдиребу яралуь бири, эй-зуригьо могорду э хуне, кем-омбар э куьнди е сал гирошдебу, оммо Обой гьелеш веде небу. Э гьэд эни вэхд э Дербенд дуь гиле власть дегьиш биребу. Е гиле увэхди, кейки е ченд руз гирошде бэгьдо эз «э кумеки худоревоз Николай II гьисдигьо падшогь гьемейурсиети, падшогь эн польский, курляндский, эстляндский ве угьониге, ве угьониге, ве угьониге...» ведешенденге манифест э товун у эз тэхд падшогь хуьшде дунмиш бири гуфдире,

дуймуьн гиле — э Петроград власть э дес большевикгьго диromo-ренге.

Падшоь Николай II эз тэхд дунмиш биренге, эз гьеме госу-дарственный идорегьго вегирде омурут сиротгьой энуну ве бейдогьгьой эн падшоги, э комигьки вебируьт византийски дуй серверне суймуьргь э тожевоз. Э жигей эн бейдогьгьой империей падшо-гьети Урсиегьт вешенде омуруьт «гьирмизине бейдогьгьой эн рево-люция». Омбаре чиновникгьго э кор ишу рафде оморенбируьт гьирмизине бантгьго э синешу веноре, еГини бирмунде э и коревоз, ки угьо гирденуьт мейл эн Временное правительстворе ве хьозу-рут эри эжиге омурде гьеме гьонунгьго ве чорегьей энуре эри ве-дировунде вилеете эз лугьонде политически ве экономически кри-зис. Оммо эз фуй э вэхд рэхьберьети сохдеи эн Временное прави-тельством Керенски гуйге гьичиш дегиш небиребу. Гье у пушоте-ине чиновникгьго ве гьурлугьчигьго, кор сохденбируьтгьго э идоре-гьго, мундебируьт э жигегьошу. Гье ужире гьойдегьго-низамгьго би-руьт пушотенинере хуно. Довгьо поюнде неоморегьбу. Пушотенинере хуно гьер руз э вилеет эдембируьт зиьд бире бие зенгьго, етимгьго, шуьвергьго ве бебегьошу э довгьо пуч бирегоргьго. Хурдение ве вокурдение чигьго эдембируьт диеттеш гьит, кем бире, руз бе руз бугьго бире. Кифлетгьго, гьовумгьгой эн э солдати, э фронт бире-горгьго, шев-руз дуьлпесой энугьго бируьт. Унегьуре э ижире гу-рунде ве четине овхьолет э вилеет, э жэгьимет лозунгьгой эн большевикгьго: «Власть — советгьоре!», «Хори — ранжбергьоре!», «Фабрикгьго, заводгьго — фэхьлегьоре!», «Шолуми — хэлтгьоре!» эз дуьли омбаре одомигьго бисдоруьт.

Е салиш негирошд эн падшоь Николай II эз тэхд дунмиш би-ре, власть э дес эз Временное правительстворе диromоре, кейки э Петроград большевикгьго венгесдуьт Временное правительстворе, вегирдуьт власти э дес ишу.

Тозе власть эн большевикгьго э Дербенд гье э суйфдеи руз-гьгой ешемиши хуьшеде мэгьлуьм сохд эри вегирде (конфисковать сохде) мол-овгьот эн гьеме активлуье контрреволюционергьоре, вирихдетгьоре эз шегьер инжо власть Совети норе омори гуфди-ре. Тозе власть мэгьлуьм сохд гьемчун эри вегирдеи э дес хуь-куьмет завод шороби-каньякире, комики бу увэхди е тэхьное за-вод э гьемей шегьер. Норе омо хьэшдсэгьгьетине руз кори эри фэхьлегьго, батракгьго ве гьурлугьчигьгой идорегьго. Тозе власть вено е миллион контрибуция э сер келе гьоширгьгой Дербенд — сэхьиб келе богьго, хунегьго, эн севдегоргьго эри кумеки сохде э лап косибе одомигьгой шегьер, э бие зенгьго, етимгьго, шуьвергьго, бебегьошу э фронт пуч биретгьго, эри ерэгьлемиш сохде ве дошде красногвардейски десдегьоре, гувьжунде оморебируьтгьоре эз одомигьгой эн гьеме миллетгьго, зигьисденбируьтгьго э Дербенд: азербайджанигьго, аьгьудигьго-татгьго, эрменигьго, лезгигьго, уругьго.

Э иловлей шегьер бируйтгъо куьнде диггъо уполномоченни эн власть Совети хоригъой беггъоре вегирде доренбируйт хорисуьзе ранжбергъоре.

Мэглуйм сохде оморебу э товун лов сохден, гъонунсуьз хьисоб бирен монархически организацией шегьер ве гьемчун уьзге миллетперезие организациегъойге. Эхириш шиновусде омо Го-сие сес протест эн жэглмиет шегьер — беднуме заведений эн мадам э зерде фанаревоз э ён Шурински гъопугъо сэхд сохде омо, хуьшдени мадам дуьсдогъ сохде, дешенде омо э гъэземет чуьн дуьшмен эн революция. «Азад сохде оморе эз эксплуатация» «духдергъой мадам» лов бисдорут э гъэд шегьер, чорей сер ишуре эри офде.

Коргъо, чорегъой эн большевикгъо, гировунде оморенбируйтгъо э келе жуьрглэти ве хуькмевоз лап терсундуьт гюширгъой жигеире, гуйге «эхир земон» омори эри энугъо. Энжэгъ шишире диромореи лап гужлукъ ерэглуь бируйтгъо гъушунгъой гъээзгьи эн полковник Лазарь Бичарахов э Дербенд э суьфден рузгъой август 1918 сал, се меьг гирошде бэгъдо большевикгъо э Дербенд власте э дес ишу вегирде, сокит, хомуш сохд дуьл энугъоре.

Полковник Бичарахов гьетте шегъере вегирде, сер гирд эри дуьсдогъ сохде, куьшде рэхъберчигъой эн венгесде оморе власть Советире э Дербенд.\* Дуьсдогъ сохде, куфде, куьшде оморуйт гьемчун е ченд одомигъой шегьер, комигъоки гирдебируйт тараф эн власть большевикгъоре, кумеки сохдебируйт э угъо.

Хэйли одомигъой шегьер, комигъоки шор бируйт большевикгъо э власть оморет гуфдире, гирденбируйт мейл энугъоре, терсире режим Бичарахов и гъэзгъре э ишу нидегъилуь, енебуге казакгъо э шегьер погромгъо мисоху гуфдире, э кифлетгъошуревоз вирихде рафдебируйт эз шегьер сер ишуре, глэйилгъо, зенгъошуре эри хилос сохде.

4 \* 4

Обой вогошд э Дербенд гьемин увэхди, кейки власть большевикгъо венгесде оморебу, инжо норе оморебу оккупационни режим эн Бичарахов, мейл комиреки гирденбу омбардеки девлет-

---

\* Э август 1918 сал сипрегъушунгъой казакгъой эн полковник Л. Бичарахов, сигъмиш сохде кем ве лап усол ерэгълемини бируйтгъо десдегъой Гьирмизине гвардиере, э женгевоз вегирдуьт Дербенде. Э революционни штаб эн гъэлхэнди шегьер угъо дуьсдогъ сохдуьт рэхъберчигъой эн власть большевикире: Г. Канделакире, А. Эрлихе, И. Кобякове, песе дуьсдогъ сохде омо И. Бегъенцев. Се меьг угъо э гъэземет эн бичараховски контрразведка гирде ве келе глэзиет доре оморе бэгъдо, 27 август 1918 сал куьшде оморуйт. А Эрлих ве куьнде дусд-хьовир энугъо Г. Канделаки увэхди энжэгъ наздегъ сале жовоне кукгъо бируйт. Песе куьшде оморуйт К. Агасиев, Г. Таги-Заде.

Омбардеки зинде мундебируйтгъо большевикгъой Дербенд К. Мамедбеков, Е. Мататов, Ахундов, Л. Мамедбекова ве угъониге э вэхд гъээзобигъой Сталин е куьшде оморут, енебуге э канцлагергъо дешенде оморебируйт.

луе одомигьой эн шегьер, лап чумтерс биребируйтгьо эз коргьой эн большевикгьо, угьо э гъэд се мегь э власть биреки.

Гьеле пушоте, падшогь Николай II эз тэхд венгеседе оморенге, инжо э Дербенд энжом сохде оморебируйт «комитетгьой миллети» эн мисурмугьо, ёгьудигьо, эрменигьо. Угьо дуй эеки шефт, гумонлуй дениширенбируйтгеш, оммо метлеб энугьо эри гьовхо берде э гъэршуй «секонеи болфшевикгьо» еки бу, чуйтам гьудирениге: дуйшмен эн дуйшменме—дусдмени. Оммо гьетте э Дербенд большевикгьо власте э дес ишу вегирде э еки э суьфдеи директивагьой хуьште мэгьлуьм сохд э товун лов ве гъэдэгъэ сохде оморей и «комитетгьой миллети» чуйтам угьо нуьвуйсдебируйтге, чуйн «мэгьлон эн реакция ве миллетгьоре дуй эеки хъелово сохдеи». Оммо гьетте гъушунгьой Бичарахов Дербенде вегирде, и комитетгьо гене сер гирдуйт кор ишуре, гирде мейл эн режим Бичарахове.

Обой гье э суьфдеи рузгьо э ватан хуьште вогошденге, бисдо член эн «комитет миллети» эн татгьо-ёгьудигьо. Уре гьемчун вегирдуйт э гъурлугь э кин штаб гарнизон эн шегьер. Обой омореву эз фронт э чин эн прапорщик (эхириш эжиге омо ниет, метлеб энугьо — э уьткеме дуйшгьой энугьо погонгьой офицери верафдуйт), э дуй гиоргиевски хочгьо вери э синей ю. Тозе «главнокомандующий» Бичарахов э назар вегирде эз девлетменде одомигьо бирей энуре ве нишонендегьой довгьои энуре ве у коре, ки чуйн активлуе член эн гъэршуй большевикие организация у мидануй келе кумеки сохде э режим ю э гъэд шегьер, э е гъул кеширеиревоз уре гьебо сохд поручик.

Хуьшдени эн членгьой «комитет миллети» омбардекиш эз девлетлуе кифлетгьо бируйт. Угьо лап э келе шори ве разимендиревоз гьобул сохдуйт Обое э гьэрешу чуйн лап эришу герекие ве верзирение одоми.

Э гьонун вэхд довгьои гуьре членгьой эн комитет э салгьошу гуьре миёсдуйт гьемей энугьо э лешгер гъурлугь сохде.\* Оммо омбардеки энугьо э довгьо небиреву, дэгьэм окопгьо, гунле-баруте недиреву. Гьеме салгьой довгьо кими энугьо э олхогьиниревоз нуьшдебируйт э хунегьошу, э ён зенгьо, гьэилгьошу, зигьисде э кеф хуьште. Э гьэрей эн членгьой комитет бэхшвегиргьой эн довгьоре, уре хуно эри игидигьой хуьште э довгьо гьобул несохдебу дуй Гиоргиевски бэхшгьо.

Оммо бируйт гьемчун ужире членгьой эн комитет ве активистгьой энугьо, комигьоки гирденбируйт мейл эн «комитет миллетире», кор гирденбугьо э режим Бичараховоз энжэгъ эзу товуне, эзу хотур ки казакгьой энугьо, оккупировать сохдетгьо шегьере, таланигьо, куйшденгьо ве погромгьо несохут э сер эн хэлгъ.

Обой вогошденге э Дербенд э гъэд согъ е мегь е гилелеш оморей сер некеши э сеимуьн зен хуьшд э Марал, невохурд э у.

Гьелбет, лап эз дуьли эн Марал мибисдо, у хуьшдере бэхдевер, мозоллуь хьисоб мисохд, эгенер Обой гьич ниомоге э ки энү, гьич у э чум хуьшде нивнииге уре. Оммо эз елойге Обой э гьэд е мег е гилеш э ки энү неомореи эри Марал гумонлуье, шеке кор оморенбу, и кор терсунде, лап дуьлпесо, дуьледэгьдэгьэ сохденбу уре. Э дуьл энү жуьрбежуьре беде фикиргьо оморенбируьт. Эри жогьиле зен гьечу оморенбу, ки Обой белки шиновусди, дануьсдени э товун ошнеети ю э нуькер хунеревоз. У э дуьл хуьшде гьэгьр, гьелебуле гирди эри энү, имбуруз-себэхь у и гьэгьр хуьшдере ёгьин э жиге миёру, дивун, жозеюре мидуь. Кимвэгьдо Марал эри хуьшде фикир сохденбу, ки Обой э хьисобовоз гьэгьри бири эз пушотейне «наз-бузгьой» ю, эгерде невегирдеи, рази небиреи эн Марал эри э юревоз, Обоевоз, зени-шуьвери несохдеи. Имогьой уре э хьисобовоз воисдени эз товун энү сикегьо, назгьой энү, э Обоевоз е гилеш нэхисиреи, пиш соху ведекуьнүь юре, чуйтам сэхьиб эз хьэёт хуьшде пиш сохде ведекирдениге дие юре терек нисдигьо сёге, назуре.

Ижире шек сохдеигьо, гьаежонлуье фикиргьо лап эдембируьт хэреб, дегьуногь сохде дуьл эн Марале, терс, хьэлегигери венгесе э дуьл ю. Дануьсде хоснет эн Обое, э дуьл энү жуьрбежуьре, дуь эз еки беде коргьо, фикиргьо оморенбируьт. У гуйге имогьой хуьшдере э гьирогь эн лугьонде чилокон поисде одомире хуно гьис сохденбу: гьейсэгьт мофдону-ниофдону э гьэд энү.

Е руз себэхьмунде Марал э ижире гурунде фикиргьой хуьшде мухшуьл гьисди, э могьбулиревоз нуьшдебу э ён сер дегирде чол эн хьэёт, э сер тенге дуразе куьрси тэхдеи, э зир эн келе луьгелуье тутдор. У не шуьвер энуре — Ошир Гьэзей Лугуйре хьэз оморенбу э сэгьтгьоревоз нуьшде инжо. Е кем семе дуьл хуьшдере эри веровунде, и беде фикиргьоре эз ёр ведекирде, Марал тел не русмуй пешми э дес дери, эдембу чуйге бофде. Ижире коре эри мухшули хуьшде у пушотеш сохденбу.

Минжи эн сентябрь бу, оммо гьово герме руз эн гьеминоне хуно бу. Э Марал нуьшдебугьо жиге соей эн дор бенек-бенеке холилере хуно дегирдебу хорире э иловлей энү. Эз дорун эн дергьо вокурде товлей эн гьэсбгьо, эжеки гьейсэгьт эдембу кор сохде Бобои, зир энугьоре вечире, эдембу оmore сес фурр зере ве пойкуфдей эн гьэсбгьо, буй эн хуьшге гиёв ве серги. Сег эн хьэёт, муйлуье дуьм хуьшдере черхэ хуно гиргине сохде, лэгьэре фирегь вокурде, гьирмизине зугьун хуьшдере ведешенде, эри хьэз хуьшде эдембу видовусде э песой керггьой хьэёт. Угьо эз терс ченд е шивен шогьгьо зере-зере, пар куфде-куфдте эдембируьт вирихде э гьерлой хьэёт. Гье и вэхди бирден эз некуми дер гьопуй эн хьэёт э зарбевоз вокурде омо. Лет эн дер гьечи сэхд раси э гьопу, ки е тапинже шендере хуно сес омо. Марал э нуьшде жиге вешенд хуьшдере, телгьо э русмуревоз гьечу лос мундуьт рафд э дес энү.

Сегнш гье усэглэт понсд э минжи хьэёт, сер хуышдере чарунд э лой гьопу.

Суьфде эри Марал гьечи омо, ки и гьейсэглэт дер гьопуре гьечи э и зарбевоз вокурдгьо — Обои. Оммо эз дер гьопу диromo Обой нэгл, зенгьой энду дь э песой еки. Сег гье усэглэт сер гирд эри равуьсде э сер энугьо. Марал туп русмуре эз кишей хуышде вегирде, уре э телгьо ве бофдеиревоз э гьирогъ норе, гье у туьтем эз жигей хуышде вэхишд, хьэрой сохд ченд бо э сер сег. Сег э биразириевоз поюнд равуьсдей хуышдере, недуьл-недуьл рафд э дорун хьэёт, нуышд э куьнж боруй эн товле.

Зенгьой Обой суьфде, гьетте эз дер гьопу диromоре, эдембируьт э лой хуне рафде, оммо угьо сес Марале шиновусде, уре э зир тутдор дируьруьтки, шив кенде оморуьт э лой энду.

Еки эзи дь зен, э пушо 'дебугьо, гьуьндуьр бу, лэгьэркимси бу. Сифет энду сипи бу, чумгьой ю сипснэгъ, винию назук, эз минжи екемлей гьэд бирере хуно, ловгьойю сэхд шишире. Унигейге сарте бу, пура зен бу, сие черде, синей ю гьуьндуьр, чумгьой ю э ранг эн онгур гуьлобире хуно, ловгьой ю е кем гьолинд бу, гьирмизи бу. У эз белгьой эн дуьразе гуьле-гуьле булши хуышде гирде, екем уре зеверо вокошире, белгьой энду э зир пой ю недемуьт гуьфдире, эдембу э гужевоз пой вечире эз песой эн э пушой энду дебугьо, эз ю е ченд сал келете бугьо хьовуй хуышде, эз жендек лем зерезере.

Зенгьой Обой омореи инжо э ки энду, эри Марал келе мэхьтеле коре хуно омо. Гьеле Ошир Гьэзей Лугуй зинде гьисдиш зенгьой Обой э ки энду унгэде рафде-оморе нисе сохденбируьт. У муьрде бэгьдо зенгьой Обой гьич дие э лой энду нисе оморенбируьт, Марале э чум дире нисе хосденбируьт у имогьой хьовушу бири гуьфдире. Марал эз шуьвер ю муьрде эйло гьечи хуте биребу угьоре недиреи, эз елойге эз фикиргьо думитгьой хуышде угьо эслогъ эз ёр энду ведерафдебируьт, гуйге фурмуш биребируьт. Чуьтам э иму гуьфдирениге: «Эз сес эн эрх, эз сес эн чой гьичуш э гуьшме неде-рафд».

Те угьо эз Марал ебо лап куьнд бире, Марал ю чуьн чуьклен хьову, омо э пушой энугьо эри э хьуьрметевоз хош омори сохде угьоре, теклиф сохде э хуне. Оммоу виник гьэгьр, хун вечире сифтегьой энугьоре, гье усэглэт э хуышде домунд, вераси эри хуышде: инжо е кор-чи гьисди гуьфдире, унегуьге э келе мэхьтелиревоз пуьрси:

— Хэьр гердо, ники гердо: чуь кори, чуь бири?

— Хуышдере э наданиле, э хэре пэхьлуьки мевени, гьэнжугъ! — э хьуьршевоз мугу гьуьндуьре зен, хьэрой сохде э сер энду. Эз чумгьой энду гьейсэглэт гуйге эдембу журкум, гьэтош рихде, паргьой эн назуке вини энду эдембируьт паргьой вини эн лап омбар видовунде, э тенге нефес дерне гьэсбе хуно верафде-фураморе.—

Гу ебо туь чуь питик-хьэйкел сохдей шуьвер имуре эз иму гьечи дур сохдей, э хуьшде вогосундей? У эз оморейлеревоз гьич э иму нисе денишире, эз иму куьнд нисе оморе.

— Ме беге нисе дануьсденуьм шуьвермере чуьжире мердиге у,— хуьршлуье, гюсие жирере хуно нэгг суьфдеи зене хуно, э шуькеетлуье, могъбуле сесевоз мугу гьолинде зен Обой.— Пушоте у гIэнг гIэсилуре хуно вогосиренбу мунде э ме, гьечи ме ари энү ширин бируьм, оммо гьейсэгIэт э ме десиш нисе зере, гуйге нехьогъме хьэруьми.

Марал и гофгьой энугьоре шиновусденге гьогъ-перт бисдо муьнд э поисде жигей хуьшде. Эгенер угьо и гофгьоре э ижире хуьрш, гьэгр, дуьшмени, нифри сохдеиревоз нигуфдируьтге, у неки бовор нисохд э и гофгьой энугьо, у гьерчуь мидануьсд угьо эде зарифет сохде, сер энуре пучунде, делхэки сохде.

Дуьл эн Марал верафд-фурамо, нефес ю гирд, гьемей сифет ю гьирмизи бисдо эзи гофгьо, серкушигьо, охмуригьо, шерменде-игьой энугьо. У чумгьоре келе сохде, э дуьлдэгъдэгъэи, гьаежони ве серевиревоз дениши гогъ э е хьову, гогъ э униге, жугьоб доре недануьсде чуь гуьге э ижире бидэгIэти, эслогъ дургу бируьтгьо серкушигьой энугьо.

— Э жун мере офиригьо худо, шовгIо гердо, э ме е тикелеш тэхсир невери,— эз билбули дуьл ю э лерзиренбугьо сесевоз эхириш гуфди у.

— Гьа! Лап бовор сохдим рафд э гофтуь, туьлле мунош гье эзу расди! — ловгьоре дигил сохде, э руьхшендие хэндеревоз мугу бисенебее зен.— Туь э ширине гофгьо, мезегьойтуьревоз лап гиж сохдей сер эн мерд имуре. Туь э хьисобовоз э кишей энү э дегешдеки, гIэйби-гIори недануьсде, эзи хьэсуйзе зенгьоре хуно, гьечи э кор, э хьэвес овурдени уре, унегуьре эз туь бэгъдо у гьич имуре э гушиш нисе гирде.

Зенгьой эн Обой, комигьоки гьеле жогъиле одомигьо бируьт, и чор сал шев-руз чуме рэхъ, дуьледэгъдэгъэй шуьвер бируьтгьо, эз расдиш лап мэхьтел ве гьэгрйи бируьт эз шуьвер хуьшде эзу э хуне вогошде эйло. Шуьвер энугьо, гьемише зендусд, хьэвеслуь, жонлуье мерд бугьо, эз довгIо вогошде эйло э угьоревоз дегешде-вэхишде, зени-шуьвери нисе сохденбу, еки энугьореш гьэл гирде, тимор ние сохденбу, э гуш нисе гирденбу. Тэхсири эни коре угьо эз Марал жусденбируьт, егIни, у эз ишу гьеми жогъили, гьеми рачи, белки у шуьвер ишуре боде дори, э хуьшде вогосунди, дуьл энуре эз ишу дур сохди. Унегуьре дуь хьову э еки меслэхьэт сохде, гьэгрйи, гIоси бире эз дес жогъиле хьовушу, норут эришу гьэгр эни коре эзу эри ведешенде, нубой юре хунде.

— Э сер ишму худо невери беге? Эричуь вешенденит э серме небире коргьоре, хьэшогьоре, эзижире гофгьо, серкушигьой энугьо лап дуьлхуьрд бире, гирисдере хуно мугу Марал.— Ме э зир

эни хори деравом, эгенер эз шуьвер ишму оморе эйло ме уре гьич е гилелеш э чуммгьоймеревоз диремге. Эгенер ишмуре дануьсде воисдениге: мере сад салиш уре э чуммеревоз дире нисе воисде.

Хьовугьо, гьелбет, э гофгьо, шовглогьой Марал бовор несохдубьт. Угьо зришу норуьт, ки Марал эдее сер ишуре пучунде, фурмунде. И кор диеш гьэгьр, хуьрш энугьоре веровунд э сер эн Марал. Гьуьндубьре зен, сипре сифет, глэтош гирдере хуно, шилоли э сер вече биевгьоре хуно, шенд хуьшдере э сер эн Марал. У номус Марале эри хуьрд сохде, пой зере, э е зарбевоз кеши эз сер энү сефги энуре, шенд э хори, песеде десгьой хуьшдере доноре э хэсде муйгьой сер энү, сер гирд э гьемей гуж хуьшдеревоз муйгьой сер энуре эри кешире. Гьолинде зен Обой, гьуьндубьре синей хуьшдере вешенде-вешенде, зури-зури куьнд бисдо эз Марал, сер гирд эз кемер эри куфде уре э муьшдгьоревоз, глэнже-глэнж сохде кемер энуре.

Нибисдо дануьсде эхир эни женг энугьо чуй мибисдоге, эгенер э хьэрой, э шивен эн Марал видов-видов эз товле оморе нирасиге нуькер эн хуне, фирегье, серги вечиренигьо лапаткай тэхдеи э дес ю дери. У гьетте э ки энугьо оморе расире, лапаткей сергиуре гьово гирде, сер гирд тарпе-тарп э зарбевоз эри зере э кемер, душгьо, кефел эн дуй зенгьой эн Обой, хьэлово биребидруьтгьо э Марал. Угьо эз дорд доренгьо, эз хьэлегигери, хьэрой, шивен сохде-сохде вирихдубьт песово э лой гьопу. Бобои лапаткаре э песой энугьо шувунде-шувунде, видовусд е сер те нимей кучеш.

Омбар негирошд эзи женг, гьолмогьол э глэрей зенгьой эн Обой бире эйло, э товун эн у мэглуйьм бисдо э шегьер, иллоьгьки э гьуншигьо-мэхьэлейгьо. Кимигьо эз бэхили Обой еки эз келе глосиргьой шегьери гуфдире, шуьвер эн се раче жогиле зенгьои, кимигьойге эзу товуне, ки у дусд эн гьэзэгьгьои, шегьере оккупировать сохдигьо, гьурлугьчи Бичарахови, кимигьойге эри хуьшде томоше хьисоб сохде и коре, сер гирдубьт э руьхшенди, хэндуьсдеи, ком вегирдеиревоз дуй эри еки ихдилот сохде и гьозире, э сер е гоф дуй гоф веноре. Песеде э шегьер хэбер лов бисдо, ки э глэйбине жигей эн Обой гунилей эн немец расири, эзу эйлеревоз у имогьой эхте сохде мерде хунои, эри э зеневоз зигьисде у дие глэмели нисди. И хэбере овурдебу е мерд дербенди э Обоевоз э фронт э е полк гьурлугь сохдебугьо, эз довгю е гьул невери оморебугьо.

Гьелбет э довгю, э гьэд тутун глэтош екиш имид сохде нида-нуь эри хуьшде, дир енебуге зу, имбуруз енебуге себэхь у е куьшде миёв, енебуге яралуь шуькесд сохде ниёв гуфдире. Довгю гьисд довгю, гьер сэглэт, гьер минут, гьер дэгьдэгьэ глэжел э пушойтуьни, э иловлейтуьни. Оммо и кор э сер эн Обой омори-гьо э фронт, э гуфдирей энү э уривоз э полк гьурлугь сохдебугьо



мерд — гьемватаниюревоз, тэхсир эну э хуышдени Обой вери.

Е вэхд э понз э 1916 сал э Юго-Восточный фронт, полк э комики гьурлугь сохденбу Обой, гирдебу оборона э е мейдузие сэхьре. Эзугь е пенжсад зиёдте дурте нэгл бируэт позициегьой эн немцгьо. Гьердуэ э гьэршуй еки поисдебируэтгьо тарафгьо и е ченд орине пэхьни бире э окопгьо, траншейгьошу, эдембируэт гьувотгьо кура сохде эри рафде дуэ э сер еки. Неденишире э гьелелуьгее сокити, кимвэглдо эз гьердуэло оморенбируэт сес пулемет, туьфенг шендеи, эз гьердуэ тараф кори сохденбируэт чуькле десдегьой эн разведчикгьо. Оммо чум руз, лап сэхд герек небире бэгьдо, екиш не эз лой немцгьо, не эз лой урусгьо эз окопгьо, траншейгьошу нисе ведироморенбируэт э пушой чум эн дуэ еки.

Гьемин пушой эни эз ело беде, эз елойге томошее кор оморе э сер эн Обой у э куьнди согъ шев э офицерски билиндаж пиёнискеи сохдебу э хьэрмэхьгьой хуышдеревоз э хотур уре дуьимуьн нуботлуье бэхш Гиоргиевски хоч дорен.

Себэхь биренге, Обой гьелемиш эз согъ шев хурде ичку сорхуш бугьо, эз елойге уьткеми сохде эз тозе награда, ведиромо эз траншей эри пишглов сохде, неденишире э у кор, ки эри эни жире коргьо э траншейгьо далдее жигегьо — хьэжетхонегьо вокурде оморебируэт. Обой э гьэсдевоз поисде руе окопгьой эн немцгьо, зури-зури фушенд те сугьразани зофру шевол хуышдере. Песде э е десевоз у тик гирде векошире бел шеи хуышдере, э е десигеревоз гирде эз глэйбине жигей хуышде, лойлум хурде-хурде; гьичиш э гуш ю недерире хуно, хэндуйсде-хэндуйсде, сер гирд э келе сес хуышдеревоз хьэрой сохде э лой немцгьо:

— Эй хуг, эй немөц, дедейтуь гьечи!.. Инией, биёйт хурит! Хьэ-хьэ, хьэ!..

Сес эну э и сокити себэхьмундеи эдембу фирегь лов бире неки э и нимверсине глэрелугь э глэрей позициегьой энугьо нен немцгьо дебугьо, оммо диеш дурте. Лап себэхьмундей эн руз поизи бугеш, оммо гьово очугь бу. Э иловле гьеме: чуькле куле, чуькле тепеиле, дуз нисдигьо жигей хори э пушо веде бу. Эз тараф эн немцгьо вес бу эри куышде уре е кутэхьэ очердле шендеи эз пулемет. Оммо эз лой немцгьо чуьнге сес туьфенг, пулемет шенде нисе оморенбу. Веди бу, ки эз хосиет олхогьин ве сабурлуье немцгьоре унгьаде гьэгьр не омо эз нифригьо ве охмуригьой эни «серсоне, глэжоибе» офицер, ченгьэдер эри энугьо мэхьтеле, томошее кор омоге ижире «уин» эну. Обой диренге, ки эз тараф эн «хугьо-немцгьо» э сер ю гуниле шендегор нисди, у диеш терс-верс неда-нуьсде, сер гирд, лойлум хурде-хурде, диеш келе-келе, хэндуйсде-хэндуйсде эри нифри сохде, гьелебуле доре угьоре.

Те ебо е ченд одоми эз полк эну эз траншей ведироморе, лул-пиёне Обое зури-зури кешире деберде песово э унжо, бирден эз

гараф эн окопгьой эн немецгьо э сес эн туьфенг шендеи омо. Обой гье усэГэт хьэрой дешенде, ранг ю зерд бире, евош-евош нуьшид э гьил-гьили, ноле зере-зере денниши зофруво э Глэрей луьнггьой хуьшде э э хуневоз биетмиш бугьо глэйбине жигегьой хуьшде...

И теке гуниле э сер энү шенде оморебугьо, ведини, бу гунилей эн снайпер. Немец э олхогьини, тегьминиревоз э туьфенг хуьш-деревоз гьэлеж гирдебу гьемин гье у жиге, нубой эни текебуре пиёне офицере эри доре, у гьемишелуьг, те зуьнде гьисдигьо фурмуш несоху и э у оворде оморебугьо лубе. И кор эри эн снайпер, э туьфенг комики оптически гьэлежи вебу, е келе четиниш небу эри энү, чуьнки эз ки энү те э келлей пой поисдебугьо нимелит шоволбирэхьнее Обой пенжсад метро глэре зиёде недебу. Диеш келе томоше, хэнде миомо эри немец-снайпер, эгенер у мидануьсд-ге, ки у э снайперски гунилей хуьшдеревоз гьемишелуьг «эхте» сохди ижире хьэвеслуье мерде, комиреки э хуне се раче жогьиле зенгьо дери, гуфдире мибуки, е чуькле гареми уре.

Обой омо э ки Марал энжегь е мегьним гирошде бэгьдо у э Дербенд вогошде ве е орине бэгьдо эз зенгьой энү дуь э екире-воз жонг гирде, гьолмогьоли сохде. Оммо Обой ю тэхьно не оморебу, э хуьшдеревоз у овордебу е уресе полковник эн индентантски гьурлугьире. Полковник е сара, пура, денуьшдее одоми гьечи эз глүьмуьр е пенжогь пенж сале. Сифет энү гьолинд, гиргине, хэндеруй бу, чумлегьою кову, чуьккеле, комигьоки лутикимси де-ниширенбируьт э одоми. У бу жигегир эн начальник тыл э кин штаб эн лешгер Бичарахов. Эзи е ченд руз пушо Бичарахов э приказ хуьшдеревоз тоГин сохдебу уре гьелелуьге э Дербенд эри серберэхьи сохде кор интендантски гьурлугьире, эри рази, тегьмин сохде э инжо бируьтгьо войсковые подразделениягьоре э хурдение ве вокурдение чигьоревоз эз хьисоб эн «ресурсгьой жигеи», кутэхьи гоф эз э сер могьлугь эн шегьер веноре биевтгьо хэржгьо.

Овхьолет э Дербенд руз бе руз эдембу четин, гьизгьин, секо-нелуь бире эри гьээзгьгьой Бичарахов ве мейл эн оккупационни властгьоре гирденбируьтгьо одомигьо. Неденишире э у кор, ки кими ведилуье рэхьберчигьой эн венгеседе оморебугьо власть Совети куьшде оморебируьтгеш э десдин властгьой бичрахиревоз, э гьэд хуьшдени шегьер хуькм энугьо лап гужлуь бугеш, оммо э шегьер саламати небу. Могьлугь эн шегьер, иллогьки косибгьо, ишуре овгьот небире одомигьо, эдембируьт келе тенги, хьижрони, миьтожи кешире. Эри хурде косибе одомигьоре чи небу. Хурдение чигьо гьэдерсуьз бугьо бу. Терсире эз талемишигьой эн гьээзгьгьо э рэхьго э кин шегьер, э куьнде ве дуре дигьгьо зигьисденбируьтгьо ранжбергьо тэхуьл, глорд, дуне, молгьэре нисе оворденбируьт эри фурухде. Унегуьре хурдение чигьо гьечи бугьо бируьт, гьувот эн гьер одоми нисе рафденбу эри восдоре. Пулгьош

эз гымет лап офдоребу. Бичарахов ведешенде пулгьоре эслогь гымет, хуьрмет небу э пушой эн могьлугь. Эз елойге омбаре косибе одомигьоре кор небу. Эз шегьер гьирогь эри ведерафде терс бу, ветэгьэгий жэгин кор нисе сохденбируйт. Омбаре етимгьо, биегьо эри е тике нун эдембируйт дур зере. Гьер руз э шегьер эз тиф эдембу е ченд одоми муьрде. Нечогьгьоре эри хуб сохде э шегьер не бегьеме духдир бу, не дерму. Э ижире гурунде овхьолет одомигьо дуь эз еки глэзор гирденбируйт. Эз нэхурдеи, небердеи, гиснеи, чоренебиреи э кимигьо глэзор чухуткеи офдоребу, комики э у вэхдгьо хос небирение глэзор бу.

Косиб-кусуб эн шегьер бовор сохде э имидигьой эн большевикгьо, бовор сохденбируйт, эгенер угьо э власть мимундге, угьо хуб мисохдуйт дуланмиши эн хэлгьэ. Унегуьре, эгенер глэйб тэхсири эн михьтожи, юхсулишуре пушоте угьо эз падшогь Николай II жуьсденбируйтге, песде эз Временное правительство, имогьой тэхсири эни четинигьо, юхсулигьо ве сэглэргьошуре угьо эз гьээзэгий эн Бичарахов жуьсденбируйт. Э шегьер э пэхьники кор сохденбируйтгьо болшевикгьо, агитаторгьой энугьо э и овхьолет гуьре диеш гужлуь сохденбируйт нэхогьи, дуьшменире э кин властгьой эн Бичарахов, эн гьээзэгийой энугьо. Э кими куьнде дигьгьо бируйтгьо партизански десдегьо кимвэгидо шев э пэхьники дироморенбируйт э шегьер, куьшденбируйт казакгьоре. Партизангьо ерэгь энугьоре вегирде, партал энугьоре векенде эз тен ишу, э гьэргьи шев вогошденбируйт э базагьошу. Унегуьре кими рузгьо себэхьмунде э кучегьой шегьер одомигьо мивинуьруйт мегьит эн куьшде, суймиш сохде оморе казакгьоре. Э ижире овхьолет косибгьой эн шегьер неки властгьой Бичарахове, гьемчун э дуьшмениревоз дениширенбируйт э мейл энугьоре гирдегьоре.

Э Обоевоз оморебугьо полковник, комиреки, ведини, хубе келе синогьи бу э кор хуьшде, э приказ эн Бичараховоз фирсоре оморебу инжо овхьолете эри хуб сохде, кор тегьмин сохден э Дербенд бугьо гарнизон эн гьушун Бичарахове эз герек гьисдигьо чигьо, иллогьки хурдение чигьо эри эжиге овурде. Эри эни метлебуре доре оморебу лап келе ихдиьригьо. Э Обой, чуьн одоми, хуб дануьсденигьо овхьолетгьой жигеире, тапшуьрмиш сохде оморебу эри кумеки сохде э полковник у э барасиревоз эжиге овурде дануь гуьфдире «четине ве хуььрметлуь» везифей хуьшдере, э сер энугьо веноре оморигьо э десдин эн «Верховный главнокомандующи́ревоз».

Гуьфдире гереки ки, и вохурдеи эн «зен ве шуьвер» эри еки энугьош дуьлхоши небу. Е минут угьо дуь э рачеберачей еки поисде, нисе дануьсденбируйт чуь гуютге дуь зеки. Эз дуьлдэгьдэгьэи, гьаежони дуьл эн Марал сокит небу, эз сегьм бирден жилид зере энугьшдгьой дес энугьо эденбируйт гьирогьгьой эн сипре келэгьэире, э сер ю дебугьоре, тил-тил сохде. Обой э у дениши-

ренге эри энү гьечу омо, ки Марал гье гьечу рачи, гьэйронини, хунширини, чуйтам у уре дирбуге э песини руз пушой ю э довлго рафдеки. ГьейсэгIэт у руз э ёр, фикир энү омоки, дуьл энү лап буланмиш бисдо, гьовой ю хэребе хуно. У фирегье сие гьошгьой хуьшдере гьужунде, е гурунде ох кеши, чумгьоре э улойгечарунде невинуь гуфдире сифет эн Марале.

Эри Маралиш Обой, неденишире чор сал вэхд giroшдеи эзу руз зуло, кейки у недири Обое, у гье гьечу тики, екелуьни, эз диремун жонлуь, жуьргIэтлуьни пушотеинере хуно. Оммо эз сифет екем дегиш бири. У имогьой пушотеинере хуно унгьэде уьткөм, текабур ве сегьмлуь веди нисе бире, ченгьэдер веди бирениге огьурлуь, гьэгрйире хуно. Дэгьме-жигехэнжелиш, пара бугьо зир чум энүш гьейсэгIэт гьечу бед, сегьмлуь нушу нисе доренбируьт э сифет энү пушотинере хуно. Неденишире э у кор, ки Обой гьеле сивнуьгь сале зиьдте небу, пиглогьой сер энү э зир эн рангхокис-терие килэхь бухорей эз гIорд сили бирере хуно бируьт. Дуь ду-разе, келе гьуьжгьо ризгьоре хуно giroшдебируьт э фирегье пушони энү.

Те ебо гуфдире э товун метлеб гьейсэгIэт омореи хуьшде э полковникевоз, Обой унгьэде эз дуьли хуьшде нэгI, ченгьэдер эри «хотур немундеи» воисд пуьрсире эз Марал, чуйтам у э гьэд эни чор сал ю инжо нисди зигьисдиге, бириге, оммо виники жиге гьэрмэгьгьоре, зенгьою вегьишдетгьоре э назушменде сифет энү (Обой э дуьимуьн руз дануьсдебу э товун эни гьолмогьол-женг, гирешдебугьо э гIэрей зенгьою, дуьл юре омбар могьбул сохдгьо), гьирмизи бисдо эз гьэгр не гIэйб, дие е гофиш эзу непуьрси.

— Гуш вени, Марал,— е гьэдер э хуьшде домунде, хьэрекет сохде хуьшдере эри олхогьин гирде, сес хуьшдере жургIэтлуьре хуно сохде, эхир мугу у,— огьо полковник эн уруси е гьэдер вэхд мизигуь инжо э хунейму... — У гене гоф хуьшдере поюнд, гьошгьоблуь бисдо, песде эри зур-зур кутэхь сохде и эз дуьли энү нисдигьо гоф-ихдилоте, вохурден э уревоз, э лой полковник чаруьсде, лове э гужевоз э мигьровуни хэнде веберде, теретэгIди сохдере хуно, мугу эзу: — И бие зен эн бирормени. Мизигьит э и хуне э хунейтуьре хуно, чуьн лап гIэзизе гьуногь иму.

Обой э полковник гуфдигьо гофгьо э зугьун уруси гуфдире оморебу гуфдире, Марал унегуьре невараси, ки у юре, Марале э ки полковник зен хуьшде нэгI, бие зен эн муьрдигьо бирор хуьшде гуфди.

Полковник эз лэгIэ гоф неведировунде, э разимендиревоз се-ре жумунд э лой Обой. Песде лап куьнд бире эз Марал э хуьр-метевоз вегирд дес энуре э дес хуьшде, асда ловгьой хуьшдере зере э дес энү, эз рачи энү шори сохдере хуно, келе-келе мугу:

— О, чуь гуьзеле мадами!

Полковнике гене чуьиге гуфдире воисденбу эзижире гофгьо,

комплементгъо, оммо у хуб, куьндте денишики э сифет эн «гуь-зеле мадам» (у эз чумгъо наздикбин бу, энжегъ эз куьнди хуб чире дире сечмиш сохденбу) гъе усэГІэт э хуьшде домунд диренге жиге гъэрмэгъгъоре э шумоле, тиморе гъутинегъой энун, комигъореки эзи е орине пушо вегъишдебируьт келеи зенгъой эн Обой, оммо жиге гъэрмэгъгъо гъелеш вомундебу. И э хуьшде демунден эн полковнике шек сохд гъемчун Обоиш. Гъе и вэхд полковник э хуьшде демундебугъо вэГІдо, у э лой энун чаруьсде, белли гирде, гуфди эзу уре теретэГІдие коргъои гуфдире, ихдиёр дуь эри рафде. Вегирде эз полковник ихдиёри, Обой гъэгъри, могъбул, дуьлхуьрд зурри-зурри тэГІди сохд эри ведерафде эз хъэёт.

Эзу рузевоз Обой дие гъич е гилеш неомо э ки Марал, невохурд э уревоз. У энжэгъ кими вэГІдо мифирсо е-дуь човуше эз «комитет миллети» эри эз серине подволгъой бирор хуьшде шоробгъо эри овурде эри межлуьс эн офицергъой бичарахови.

Полковник эз расдиш веидубу, ки у желде корсохэ одоми бу. У лап себэхьмунде мирафд э гъурлугъ хуьшде, энжегъ торики шевмегошд. Эзу Марале е инжимишиш небу. Гъемише согъ руз у э кор биренбу. Энжэгъ кими рузгъой екишобот у э парадни мундир хуьшде геймиш бире, рафденбу э келе килесе э мейду э пушой городское управление бугъо енебуге э офицерски клуб э ён богъчей эн шегъер бугъо. Оммо сер ебо у Марале э диреки, у мипошд э пушой эн жогъиле зен-сэхъибхуне, добон чекмегъой хуьшдере э еки зере, э хуьрметевоз мегирд дес энуре э дес хуьшде, э чуькле, ковре наздикбине чумлегъой хуьшдеревоз э мигъровуниревоз лове э хэнде веберде, е ченд минут мидениши э сифет, э чумгъой энун. Оммо дануьсде, ки эз дес ю ниворов э песой эн жогъиле зенгешде, у Марале инжимиш нисе сохденбу, гъечиниге эри гоф-ихдилот сохде э уревоз, полковнике вэхд межол-небу. Песде не и «гуьзеле вэхъише зен» е гофиш э зугъун урусинисе дануьсденбу. Хуьшдени эн Марал, комики шинох небу э ижире светски гъойдегъо, ГІэдотгъоревоз, унегуьре у гъерчуь дануьсденбу и мерд урус-полковник е кем э хуьшде недери, е тэхдей энуре ГІов берди, шите, делхэке одомини.

Оммо дуьл эн Марал е дэгъдэгъэш динж небу, гъэребелугъбу, у лап чумтерс бу эз Обой. И песини гиле Обой э ки энун оморенге, у эз ело эгузети омореи энун бу, эз елойге терсиренбу эз омореи энун. Оммо эзи десине омореи-рафдеи энун дуьл Марал диеш гъэреболугъ, дуьлдэгъдэгъэ бисдо. У вини, чуьтам Обой э юревоз хиник, эгъурдомогълуь буге, е бегъем гоф непуьрсире, э юревоз гоф несохде, зурри-зурри ведерафдге эз хъэёт, полковник урусире инжо овурденки. Веденики э дуьл энун келе гъэгър дери эри Марал, дуьшмени дери. Обое ёгъин э сер ю е кор овурде воисде.

Ижире фикиргъо, эри хуьшде еровурди сохдеигъо эдембируьт

диеш терс, лерз венгесде э дуыл эн жогбиле зен, тэхъл, зэхээр сохде гьемей зиндегунн энуре. Эзижире думитгьо, фикиргьо у шевгьо лап келе беде ховгьо диренбу. Омбариш у э хов эз терс эн е беде чигьрет, нум комиреки у нисе дануьсденбу, жэхьт сохденбу эри вирихде, хилос бире эз дес энур. Оммо эз терс пойгьой энур гьургьшуре хуно гурунд бире, у пое эз хори вегирде нисе дануьсденбу, гуйге кун пойгьой энур шириш зере, вогосирет э хори. Унегуьре и беде чигьрет асанти э у оморе расиренбу. У гьетте Марале гирде, бирден гье э пушой чум энур чаруьсденбу э хуьшдени Обой. У сэхд гирде эз дуь гьул хьэлегигер бугьо Марале, э хун гирде чумгьой жингови хуьшдеревоз денишире э Марал, вергьирмизие дэгьмей эн гьутиней ю верафде-фураморе, хьэрой сохде э сер энур, мугуфди: «Эже вирихде туь эз десме, хунехэреб! Теимогьоиш туь беде неверасирей, э сер неофдорей, ки ме — гьисметтуьнуьм. Эз гьисмет хуьшде екиш не вирихде, не пэхьни бире нидануь. Нешиновусдей беде туь: «Эз тэхтме вирихуьм, эз бэхдме эже вирихуьм?!»

И гофгьуре гуфдиренге у эз хуьшде, эз гофгьой хуьшде шори сохде, келе-келе, шэхьитуьре хуно хэндуьсденбу. Марал эзини вэхд эз терс куте хуно биренбу, гьемей жендек ю лерзиренбу. КимвэгИдо у эзижире ховгьо, эз терс гьемей жендек юре эрэгь ширише, хэбер биренбу, пезде согь те себэхь эз гьаежони, дуьлдинж нисди хуьшде хисире нисе дануьсденбу. Эзи товуне у согь руз хэсде, гьолоке хуно биренбу, эз билбули дуьл хуьшде нуьшде-вэхьишдей хуьшдере нисе дануьсденбу, э келе сере-вири, келе середерди дебиренбу.

Оммо гьич э ховгьо, эвреигьой хуьшдеш Марал фикир несохдебу бирден оморе ижире кор мибу гуфдире. Е руз пишней у эдембу э хьэет э сер эн расе шушде парталгьо вешенде, кейки эз некуми омо диromo э хуней энур поисдебугьто полковник. Э уревоз е одомигеш бу, мерд жигей, дербенди. Гьовой эн полковник лап ежирейге бу, туьнд, гьаежонлуь бу. У е вэхдиш руз э хуне нисе оморенбу. Марал гье усэглэт эз гьовой эни гьолинде чога мерд, гьемише олхогьин, ловхэнде бугьо, вераси е кор-чи бири гуфдире. У гье усэглэт гуьзгьулогьэ хуно бире, поисд, э дуьлпесоиревоз дениши э лой мерд урус. Полковник зурн-зурн куьнд омо э ки энур, э лерзиренбугьто дес хуьшдеревоз вегирд дес энуре. Оммо и дес у гьемишеинегьой хуьшдере хуно дес энуре э дес хуьшде вегирденге моч несохд, недениши э уьшуьгьлуье раче чумгьой эн Марал э делхэки-луттииревоз, гуфди э гьаежони ве билбулиревоз:

— Мадам, ме межбурум гьейсэглэт эри мэглуьм сохде э ишму зовете хэбер: еки эз одомигьой эн умогь ишму, ведини, гьирмизине бандит-гьэчэгь, эзи е сэглэт пушо куьшди гьэзизе дусд ве жуьргьлэтлуье офицере, шебирор ишмуре...

Э полковникевоз оморевугьто одоми гьетте тержуьме сохде эри

Марал гофгьой эн полковнике, у е ченд минут гуйге хуышг бисдо мунд э жигей хуыште, эз лэгIэй хуыште е гоф ведешенде неда нуьсде. И гьейсэгIэт у шиновусдгьо гофгьо эз сло гьечи гузетсуьз, некуми бу эри энү, эз е лойге гьечи гьэдерсуьз ширин, войгелуь, ки у недануьсд чүь сохуге, чүь гуиге э и туьтем. Келе шори гьеебо пур сохд дуьл, гьэд синей энуре. Эри энү гьейсэгIэт гьечу омо эри ужире одомире хуно, комиреки дивун сохде омори эри куыште оморей энү, бирден хэбер омори уре хилос сохде гереки гуфдире.

Эзи дэгьдэгьэревоз у — азаде одомини. Дие эз екиш, эз гьичиш уре терс нисди не зиндегуни энуре, не хушбэхди энуре, не мозол энуре. Эри Марал гьейсэгIэт гьечу омо, ки хуышдени худо э десдин дес эни «гьирмизине гьэчэгьэвоз» ведешенди гуфдире гьэгр эн кешире хьэлегигеригьо, сэгIэргьой энуре эз Обой.

Полковник не э юревоз оморигьо мерд недануь гуфдире чүьжире гьейсэгIэт зурбое келе шори гиросдениге эз дуьл ю, у зуризури э дуь десевоз пэхьни сохд сифет хуышдере. Эзижире некумие шоре хэбер, гьаежони е келе хьэрой ведиромо эз бугьоз энү, гьемей жендек энү лерзи эз келе гьирке сохдеи, гирисдеи. Полковник уруси, комики нисе дануьсденбу гIэрей эн «мадам» нен шебирорюре, у гьерчуь дануьсд хэбер э товун куыште оморей шебирор энү лап зобу кори сохд э дуьл эн «косибе мадам»: Уре эзу товуне езугь оmore э Марал, куьнд омо эзу, сер гирд эри хомуш сохде уре.

— Мадам, мегирисит, хуышдере дуьл дит,— мугу полковник, езугьбери сохде э жогьиле зен э у минет сохдере хуно,— иму хун эн шебирортуьре медешеним эзу. Гье имбуруз у гьирмизине бандит лап гьэзоблуье жире жозе доре, куыште мийв.

И песини гофгьоре э гуфдиреки чүькле ковре чумлегьой эн полковник гуйге луьп гIэтоше хуно эз некуми дегесируьтге.

Гьетте полковник рафде э юревоз оmoreбугьо мердевоз, Марал десгьоре вегирд эз сифет хуыште. Сифет энү эз гIэрсгьо тар бугеш, келе шори энү э сифет ю вебу. Гьечи дуьл ю эз шори гупгуп сохде-сохде, у зури-зури дерафд е хуне, тэгIди сохде-сохде, векод парталгьой хуней хуышдере, геймиш бисдо э сие парталгьо, сие келэгьэире э сер дегирде, ведиромо э хьэёт. Оммо те ебо э куче ведерафде, у э ён гьопу омо расики, поисд, огол зе Бобоире. У гьейсэгIэт нуышдебу э ён хунейлей хуыште э товле вогосиребугьо, кемере э черх шуште, тов-тови сохде оmoreбугьо фейтун веноре, эдембу хомуте гьуьч сохде.

Сес бикей хуышдере шиновусде мунде, Бобои но хомуте э хори, зури-зури омо э ки эн Марал. Оммо гьетте у Марале э куьнди дире, мэхьтел бисдо муьнд э жигей хуыште, эз мэхьтели хуыште сер гирд эри бежид миже куфде. У эз зуревоз недиребу Марале гьечи дуьлшор, ловхэнде, мозоллуь. Оммо эз елойге у э сиегье

партал ёси геймиш бу. Эзижире муьгуьжуьзе кор сер энү нисе ведерафдембу. Марал гуйге э дуьл хуьшде хэндүьсде э ижире мэхьтели энү, эз лэгIэй хуьшде гоф неведировунде, дениширебу э у, Бобоире томоше сохдере хуно. Бирден Марал довом недоре, келе-келе хэндүьсд, песде гьебо куьнд бире эзу, гьэл дешенд э герден ю, эз дуь гьутиней Бобои сэхд моч сохде, евошлей гьуьл додо уре эз хуьшде. Э гьечи гьич е доне гоф э Бобои негуфдире, Марал лет гьопуре векурде, тэгIди сохде, ведерафд э куче, гьогь-перт гьишде нуькере э жигей хуьшде.

Гьетге э куче ведироморе, Марал, пойгьой ю эз шори гуйге хори негирде, бежид пой вечи э лой хуней эн Обой э «хьовугьой» хуьшдеревоэ эри «дерд кешире», э ёс нуьшде.

Э рэхь, э куче, э куьндигьой хьомум эн шегьер, э пушой энү омо вохурд е жогьиле сие чердее мерд. Э душ энү бил не чейтен туморей вебу. У е миёнее бала бу. Зевери остгьугьой гьутинегьой энү екем бируне ведироморебируьт. Ранг михэкие чумгьой энү э хуши, мигьруниревоэ дениширенбируьт э одоми. Гьовой энү лап шор бу, гуйге эз гIэруьси оmore одомире хуно, енебуге хэзине офде одомире хуно бу.

Марал хуб шинохденбу и жогьиле мерде, комики те ю э шуь-вер рафде э мэхьэлешу зигьисденбу. И жогьиле мерд бу Юсуф Собо, гьемин гье у «лелей Юсуф», комики эзи вэхдевоэ гьеждегь сал гиросше бэгьдо эриме э 1936 сал, ме э редакцией гозит «Зэхьметкеш» кор сохденге, ихдилот сохдебу гьозие-гьэдер зиндегуни эн Марале.

Юсуьф те зен хосде, гьеле гьээзегьэ кук гьисдики, бу еки эзу омбаре жогьилгьой эн мэхьэле, эн шегьер, комигьоки ошугь бируьт э Марал. У э сэгIэтгьоревоз э песой диш кучешу поисде, пэхьни бире, мидиниши, кей медировге Марал эз хьэёт эри денишире э у, томоше сохде уре эз дури семе. Уре нисе диренбугьо руз у могьбул, сер герде хуьрде хуно биренбу, е жигей хуьшдере вир сохде одомире хуно. Омбариш шевгьо Марал э ширине ховгьой энү оморенбу. Юсуф ченд бо э гIэмешу гуфдиребу гую э бебешу у дерав эри духдер Худодот Хьэлвочи илчиети соху, духдер энуре эри хосде эри ю, эри Юсуф.. Оммо бебей энугьо э герде нисе вегирденбу. У дануьсденбу, ки эри духдер Худодот ченд одомигьо э илчиети дерафдет, оммо у рази небири э еки энугьош духдер хуьшдере эри доре. Ведини, ки сарфакоре хьэлвочире воисдени эз рачи эн духдер хуьшде келе хэйр вегирде — доре уре э шуь-вер э е бирогоре одоми, эзу эри хуьшде хубе рэхьпули эри вегирде.

Оммо энжэгь е и кор небу себей эн бебей Юсуфигьо эри э герде невегирдеи эри дерафде илчиети сохде эри духдер хьэлвочи. Бирор энуре, лелей Юсуфигьоре, э хуне се духдер дебу. Келеи духдер энү той эн Юсуф бу. У бирач бу, сиегь бу нимесухде



хуно, сер зиѣди екем ленгиш бу. Духдер оморѣбу бисд сала бирѣбу, оммо гьелеш уре хосдогор небу. Дуй хьэгьеригей энущ, духдергІэмлегьойгей эн Юсуф, оморѣ расирѣбируѣт, вѣхд э шуьвер дорѣ бирѣбируѣт. Угьо унгьѣде рач небирѣуѣтгеш, оммо бишеркиш небирѣуѣт. Эри энугьо одомигьо дебирѣуѣт, угьорѣ хосдогоргьо бируѣт. Оммо гІѣдот небу, келеи хьгьѣр э пушо дерики, чуйклен хьгьѣргьорѣ эри э шуьвер дорѣ. И кор неки келе хуьрди, хижолети хьисоб бирѣнбу эри келе хьгьѣр, эри кифлет энущ, э элойге серкушире хуно бу эри чуйклен хьгьѣргьо. И гІѣдоте увэгІдоигьо де гІѣдотгьойгей хэлгьирѣ хуно лап сѣхд гирденбирѣуѣт.

Бирор хуьшдерѣ эри хилос сохде эзижирѣ четини, уре э номус эри недешенде э пушой хэлгь, рѣхь вокурде эри чуйклеи бирорзерегьой хуьшде, бебей Юсуфигьо эри хуьшде но: келеи духдер эн бирор хуьшдерѣ ѣгьин эри кук хуьшде Юсуьф хосде. Оммо у те ебо и метлеб хуьшдерѣ эжигѣ овурде, ебо Юсуф эз Марал чум вегируѣ гуфдирѣ, мугу эзу:

— Эри духдер хьэлвочи, хьѣлѣме, ченд одомигьо дѣрафдет, оммо у эз гьѣме атказ сохди, гуйге духдер эни эн косибѣ чухуткѣе гьургьѣре хоегьо нисди, эн ших угьли Шогь-Аббаси,— лове э шефде хьнде веберде, хьэлвочирѣ э пушой кук хуьшде эри хуьрд, элчэгь сохде, мугу келе мерд.— Унегуьре ме хуьшдерѣ хуьрд сохде эри духдер энущ э илчиѣти нидарам, чуйнки э пушоки дануьсденуьм у духдер хуьшдерѣ э имуш нидуь.

Юсуф и гофѣ эз бебешу шиновусденге дуьл энущ лап могьбул, гурунд бисдо. Оммо имиди хуьшдерѣ небурри. Уре имид бу бебей Марал уре э ю мидуь гуфдирѣ. У ю хуьшдерѣ усолѣ кук хьисоб нисѣ сохденбу. Эз расдиш э мѣхьѣлѣ екиш е усолѣ эн Юсуфѣ нисѣ гуфдирѣнбу, не усолѣ энурѣ эри гуфдирѣ себѣиш небу. Э у женгесури, делхѣки недебу, саламете, хотур-гевил дануьсденигьо кук бу, жофо дусд бу. Э бебешурѣвон себѣхьмунде мирафд, шохьонгум эз кор миѣмо. Омбарѣиш угьо бебѣ-писѣр э богьгьой эн Ошир Гьѣзѣй Лугуи кор сохденбирѣуѣт, комики хотур фѣхьлерѣ нисѣ гьѣшденбу, уре хубѣ гьѣгь дорѣнбу, кими гІоширгьойгей шегьѣре хуно лап сѣгьѣт, бирѣхьм небу эри фѣхьлѣ. Кирѣ э хунѣ кук домор сохдени, енебугѣ духдерѣ гІѣруьс сохдени гьисдигѣ, Ошир Гьѣзѣй Лугуи э подрѣдчик хуьшде талшуьрмиш мисохд э ужирѣ одоми кумѣки соху гуфдирѣ. Гьѣр орине у э хьѣѣт хуьшде мигьѣшд е тозе буржунде нун тонурѣ гІонигьо, косибгьорѣ дорѣ. Ижирѣ парѣдкарѣ у гирденбу Маралѣ хосде, э хунѣ хуьшде овурденгеш.

Юсуф эз бебешу шиновусденге, ки Худодот э ю духдер хуьшдерѣ нидуь гуфдирѣ, уре войсд е тилѣ эз хуьшдени эн Марал дануь, гьовой энурѣ. Себѣхьимуьн е вогьне офде у э бебешурѣвон э кор нерафд, не бебей энугьош, гьовой эн кук хуьшдерѣ дануьсде, межбур несохд э юрѣвон э кор бурав гуфдирѣ.

У пушотейнегъоре хуно омо поисд э диш эн куче эри гъэреул сохде Марале. Эхириш Марал тие совуй лугъи э кул ю вери, ведиромо эз хъэёт эри рафде эз билогъ Гов оворде. Те э иловле кес небугъо, Юсуф эз глэйби-глори ведерафде, омо гирд пушой эн духдере, билбуле хуно мугу, э минет ве имидиревоз денишире э раче сифет эну:

— Марал, расдире гу, ме туьре хосдуьмге, туь э ме миёй?

Духдер гъирмизи бире, э хуьшде демунде эзи нэхберекне пурсуьш эну, сере гъуз гирд, песеде асда-асда мугу э сифет Юсуф неденишире:

— Ихдиёрме э десме недери. Бебейму мере э гьерки до, гъэ э у мирам.\*

Марал н гофе гуфдире мунде, те ебо ишуре инжо кес дире э гоф сохдеки, совуре хуб вешенде э кул хуьшде, теретэгИди рафд эз ки эн Юсуф. У терси, юре винирегор бисдоге, духдер хуне э кук кесевоз э куче, э песой ю гоф мибу гуфдире, гъечинигеш э песой эну гоф сохдегоргъо, негъогъи деворигъой энуре гирдегоргъо кем небируьт. Э товун энугъо дануьсденбу Марал. Эз товун эни кор у омбар фикир, хижолети кеширенбу, э дуьл хуьшде ужире одомигъоре нифри, нэгІлети сохденбу.

У рафденге Юсуф е ченд минутигеш поисд э жигей хуьшде. И жугъоб эн Марал мэхътеле, глэжойблугъе жирере хуно омо эри жогъиле кук. У эз гофгъой эн Марал невераси: хуьшдени Марале воисденими эри э ю оmore, эгенер у одомигъой хуьшдере дефуьрсого э илчнети эри эну? Дузи, ихдиёри эн духдер э дес ю недери, эн бебе дери. Эгенер эз расдиш хун Марал е кем семе эри эну дуьш зерениге, у э чум эну хуш оморениге, у эхи мпёсде гуфдире: дефуьрс одомигъойтуьре э илчи э хунейму, эгенер бебейму разиниге мере э туь эри доре, меш разинуьм э туь эри оmore. Ведини, ю эз дуьли Марал нисди, имидию расд неведиромо.

Юсуф лап могъбул, сергъуз бисдо, эзу вэхдевоз гъэгърире хуно бисдо эз Марал. Е мегъ гирошде бэгъдо эзи вохурден эну э Марал, бебей Юсуфгигъо э гуж-хуш, менэхъэфигъо, серкушигъо, гъелебулеигъоревоз гъишд уре хосде келен духдер эн бирор хуьшдере. Э гъечиревоз косибе Юсуф ниет сохдебугъо эри хосде еки эз лап раче духдергъой эн шегъере, бисдо шуьвер эн бишерке, серзиеди — эн ленге глэруьс духдергІэмлей хуьшде.

Эзумогъолеревоз Марал не Юсуф ченд гиле вохурдебируьт дуь э еки, оммо е вэхдиш угъо дуь екире диндуьрмиш нисе сохденбируьт. Песеде эз Марал э Ошир Гъэзей Лугуи рафде эйло у лап кем вохурденбу э чум эну.

Руз пишнеи Марал Юсуфе э бил не чейтеневоз э душ вери

---

\* Э гІэдотевоз хъэёменде духдер гъэ ижире миёсде жугъоб доре, эгенер эзу мипуьрсиге э товун уре э шуьвер дорен.

диренге эри энү мэхьтелире хуно омо. Э де вэхдиге Марал Юсуфе мивиниге, мизе мигирошд, э зен кес э мерд кесевоз э куче поисде гоф сохде лоиггэ кор нисди. Юсуфе юре хуьшдениюре воисд. Марале диренге, хуьшдере э недиреки воноре, зенуь гирору уре. Э ёр энү гьеусэгIэт омо Марал э мэхьэлей энугьо зигьисденбугьо вегIдогьо, чуьтам у юре хосде воисденбуге, гоф кеширебуге эз ю — уре разиниге эри э ю оmore...

Юсуф недануьсде небу, чуь гуфдире оморениге э шегьер э товун Марал ве етима кук нуькер энү, уре у эри хуьшде ошне гирди гуфдире. У и рузгьо э хьэрмэхьгьой хуьшдеревоз э богьгьой энугьо кор сохденбу. Комендант эн гарнизон шегьер буйругь доребу э солдатгьой хуьшде мешет небошут гуфдире э фэхьлегьо эри дерафде дироморе э шегьер, э ветэггэгьо, богьгьо кор сохденуьтгьо, чуьнки ижире гьэдэггэи эри хуьшдени энугьош сарф небу: и кор диеш зиёдие четинигьо гIэмел миёвурд, зиёдтеш биразии мэхизунд э гьэд могоьлугь шегьер э гьэршушу.

Фэхьлегьо, э Юсуфовоз кор сохденбируьтгьо, э де ихдилотгьой-геревоз э еки э товун овхьолет э шегьер, коргьошу, дуьлесдигьошу, имидигьошу, гьемчун гоф э гоф вероморенки гуфдиренбируьт э товун имогьоине хазеин ишу Обой, чуьтам у э довгIо гьисдики сенмуьн зен энү Марал нуькер хунере ошне гирдебуге эри хуьшде, эз чуь товуне зенгьой энуре дуь э екиревоз екикишуь, муйкешигьо биребуге.

Гьовой Марал, чуьтам хундегор дануьсьедниге, гьейсэгIэт эслогь ежирейге бу. Эз гьейсэгIэт дуьл энү эз шори пур бирей, уре воисденбу пар зенуь, е куьнде дире-шинох хуьшдере чорей буге гьэл гируь, э синей хуьшде денуь. Унегуьре у гьейсэгIэт Юсуфе э куче виники ю хуьшдению огол зе, поюнд Юсуфе, пуьрси хьол-овхьол юре, руз пишнеи бил не чейтен э душ вери э же рафдеге у гьейсэгIэт.

Юсуф гьечу шоре хэнде э лов ю вери, мугу:

— Ме гьейсэгIэт э богьгошму бируьм, э вэхд кор эз хуне эриме Iэил гьуншиму хэбер овурд мере кукле бири гуфдире. Эдее тэгIди сохденим э ки лелей Обой\* эз хьисоб эн гьэггьме е кем пул хогьом эзу эри суьгIуьдо сохде, гIэсел-руьггэ восдоре эри хэшил сохде эри дедей гIэил.

— Омбаракбу куктуь, домор сохдениш гердош юре, — эз дуьли гуфди Марал, песде бирден хуьшдере э вогьнеки могоьбули веноре, сес хуьшдере э гирисдеи, мугу: — Меш эдее э хуней энү бедбэхд рафденуьм. Вой эри нэхогьтуь, туь эхьисобовоз гьеле нисе дануьсде, косибе Обой, дуразруйтуь, эзи е сэгIэт пушо куьшде омори гуфдире?

\* Э гIэдот хэлгь имуревоз гьер одоми эз хуьшде е кем келетере, э у хуььрмет гирде, уре леле енебуге холу гуфдиренбу.

— Куышде! Чуьтам? — лап э мэхьтели домунде, пуьрси Юсуф. Песде бил хуышдере эз душ вегирде, но э пушой хуышде, мугу: — Кей бире кори? Ки куышди уре?

— Ализе полковник, мерд урус э хунейму поисдигьо, у овурди эрме и беде хэбере эзи е нимсэглэт пушо. У эдее гуфдире уре е гьэчэгъ, е большевик куышди.

Юсуф энжэгъ гьейсэглэт э сер офдо Марал э тен хуышде сие партал эйчуь вокурдите. У эри хуышде гьерчуь дануьсд, ки уре гьерки бисдо эз партизангьо куышди, э гьэршуй казакгьой Бичарахов женг берденуьтгьо.

Юсуф нисе хосденбугеш Обое, оммо шиновусденге э товун куышде омореи эн у эри Обой э дуьл хуышде хьэйфбери несохдгеш, оммо комиш невегирд, шори несохд, чуьтам шори сохдуьтге эз муьрден эн у обаре гьемватанигьой эн у, эз дуьли комигьоки небу э жигей власть совети э власть Бичарахов омори гуфдире. Омбаргьо э шегьер, гьемчун Юсуф, нисе хосденбу Обое унгьэде эзу товуне нэгл, ки и омбар текебура одоми, шуьвер эн се раче зенгьо еки эз келе гюширгьой шегьери гуфдире, ченгьэдер эзу товуне, ки у э гьурлугъ эн Бичарахов дери гуфдире, э вэхд эн комики хьол эн косибгьо днеш усол бири. Оммо э товун Обой член эн «комитет миллети» бирей, Юсуф, кими гьемватанигьой хуышдере хуно, уре дивунлуь нисе сохденбу. Бешгэ эз обаре одомигьой эн могьлугъ шегьер, жогьиле батрак бовор сохденбу, ки «комитет миллети» мейл казакогьой Бичарахове гирдени э хотур эн у кор, угьо э сер хэлгъ погромгьо, таланигьо, куышдеигьо несохут гуфдире.

Юсуф и хэбере э товун куышде омореи эн Обое шиновусденге, гене бил хуышдере э душ веноре, мугу эзу пешмуре хуно:

— Дие гьечу буге ме бурам, бил, чейтенмере нуьм э хуне, биём э сер мито.

— Пой е дэгьдэгъэйгеш, Юсуф,— десе вешенде, мугу эзу Марал.

Марал расди десе доно э зир чепи гьул эн булши хуышде, вешенд эзунжо е чуькле нэхче-нэхче рангсавзелуье мохборие бобожниклере, комиреки у гьемише э хуышдеревоз гирденбу, доно э кеф дес Юсуф.

— И эз ме бэхш эри туьре кук берей. Бура э ки зентуь, глэилтуь, корбортуьре виниш, э сер мито неоморигеш глэмел миёв эзини вэхд.

Марал дуь бэхшиш и раче бобожник хуышдере до Юсуфе унгьэдер э хотур уро кук бирей нэгл. Э дуьл эн у екем бэхили, пешмуниш омо батрак эн у ю э шориревоз гуфдики юре кук бири, пешмуни, бэхили эзу товуне, ки еглни и бишерке, ленте зен эн у имогьой дедей эн дуь глэил бири, оммо имогьой эдее хьофд

сал бире у эз гIэруьс бире эйло, у гIэйлсуьзи, уре не гIэйли, не шуьвери. И пул дебугьо бобожник хуьшдере у до Юсуфе эзу хотур, ки гьовой энугь гьейсэгIэт, чуйтам хундогор данусдениге, лап шор, хуьром бу. У пулгьо до у Юсуфе чуйн содогьо э хотур ю эз муьрс, гуж, терс эн дуьшмен хуьшде — Обой хилос бирей, азад бирей, сэхьиб богьгьо, хунегьой эн муьрдигьо шуьвер хуьшде — Ошир Гьээзей Лугуи бирей. Эри энижире кор, э фикир энуревоз, у ёгьин миёсде е никие, мисвое кор сохде. Кор омо гьечи офдо, ки и мисвое коре у эн суьфде эз полковник эри энугь «шоре хэбер» овурде бэгьдо сохд эри э чум ю гьейсэгIэт оmore вохурдгьо батрак ве куьгьне шинох хуьшде. Эз елойге Марал фурмуш несохдебу, чуйтам э жогьили Юсуф «эрию муьрденбуге». Эзи кор у э дуьл хуьшде е кем шори, келегеди сохденбу.

Гьетте Марал рафде, э куче, э ён комики Юсуф гьейсэгIэт поисдебу, ротай эн казакгьо, ерэгьсуьз-туьфенгсуьз, пое сэхд нореноре, келе-келе мэгIни хунде-хунде э фитевоз, офицер э пушошу дери, эдембу э хьомум рафде. Веди бу имбуруз энугьо «руз хьомум» бу. Дуьл эн жогьиле фэхьле эдембу битоби сохде ебо эри фегьм сохде чуй дериге, ченгьэде пул дериге э юре Марал бэхш доригьо бобожник. Э чуйклеи бобожник гуьре у гурунд нушу доренбу. У дениши те ебо ротай казакгьо гиросьде, пьсде гьейсэгIэт куьнд бире эз э ён ю бугьо дуй тебэгьэи хуней сеньги, биле вено э дивор, юш чаруьсд руе дивор, теретэгIди, лэве э шорие хэнде веберде, вокурд сер бобожнике. Унжо монетгьой суьрхи дебу. Еки эзу монетгьоре у э дес вегирде, фегьм сохд. Э елой энугь сирот эн падшогь Николай вебу, эз елойгей ю — дуьсери симуьргь э тижь гьэрмэгьгоревоз. У монет суьрхире у покурд э шеи хуьшде, пьсде чуй кориге доно уре э куьф, у монетгьойгере сер гирд еки-еки эри шуморде. У эз куьф хуьшде донорьбугьо монет бэгьэй э бобожник хьофд монетгьойгей суьрхи дебу. Э и пулгьоревоз неки эри куклей хуьшде у мидануьсд келе суьгIуьдо, мило сохде, гьем-чун сертени кифлете сохде, сер зиёди е хубе гов дуьшиш восдоре эри хуне.

Батрак Юсуф гьечи мухшул бу гьейсэгIэт э и монетгьой суьрхире еки-еки эз бобожник вегирде, шуморде, ки у неди чуйтам дуй одоми э гиросьдеки оmore сессуьз э песой кемер энугь поисдуйтге. Еки энугьо фельдфебель бу, екиге — ефрейтор, каптенармус. Э кул эн каптенармус е келе бугьче вебу э сипре руйхьолови дери. Э и бугьче шушде казенни зиршейнигьо зиршеволигьо дебируьт эри гьейсэгIэт э лой хьомум рафдгьо ротай эн казакгьо. Фельдфебель е гьуйндуьре, фирегьэ хиелуье, эз сер сифет е сивпенжсале одоми бу. Сифет энугь фирегь бу, чоркуьнжире хуно бу, чумгьой ю — ранг савзи, тиж, эн назуре хуно. Э кишд ю шимшил вебу. Каптинармус эзу сар бу, лэгьэр бу, гьутинегьой сифет энугь пажи-

рере хуно бируът. Веди бу, ки у жунсогъэ одоми небу, ичку-хур бу.

Юсуф бобожнике э куьф донореки, фельдфебель гьеусэглэт эз песой энугъу буре, дес шенд, сэхд гирд эз 'билег дес' энугъу бобожник дебугъо.

— Гьей! Ди инжо ебо бобожнике, гьэчэгъ!

Юсуф хуьшдере гьеусэглэт вешенд, рангио дегиш бисдо, чаруьсд э лой энугъо, оммо бобожнике эз дес неведешенд. Эзи кор энугъу лап гьэгър омо угъоре, иллогъки ефрейторе. У бирден шенд эз кул хуьшде э сер тротуар бесде келе бухчей зири партаалгъой солдатире, муьшде гьово гирде, э е зарбевоз додо эз сифет Юсуф.

— Басурман! — э хуьршевоз гуфди у,— ди бобожнике!

Веди бу, ки э куьнди дуь мегъ инжо бируътгъо казакгъой Бичарахов шек нисе сохденбируът, киниге эз жигеие зигъисдегоргъой шегьер азербайджани, киниге эрмени, киниге егъуди.

— Белки у мисирму нисди, — армяшкан» енебуге «жиди», — э сифет эн Юсуф денишире, суьпле хэнде сохде, мугу фельдфебель.

Каптенармус, веди бу, екем эз фельдфебель «соводлуь» бу.

— Биё дан коми гьэлифоиге у,— десе вешенде, мугу у. — Гьемей энугъо э е хумней, э одомигъой ирони ухшеш зеренуът.\* Гьеркиш гьисдуът угъо — кесуът, э угъо рэхм берде герек нисди.

Эз лэглэй эн гьердуьй энугъо эдембу легьбет эн э дес кешире эрэгъи оmore. Э герме руз эн август буй эрэгъи, эз нефес энугъо оmoreмбугъо эз куьнди лап сэхд э вини одоми верафдембу.

Юсуф муьшд эн ефрейтор э сифет у расики, эз хуьрш дуьл хуьшде гьип гьирмизи бисдо. У э жигей бобожнике рэхъо доре, днеш бобожнике э дес хуьшде сэхд жарунде, хьэрекет сохд эри вешенде дес хуьшдере эз дес эн фольдфебель. Одомитгъо эз дурри эдембируът кимигъо томоше сохде э угъо денишире, кимигъойге зере гирошде, терсире э «хуьжет» энугъо гьэриш буре.

Фельдфебель веди бу лап гьувотлуе одоми бу, песде у э лешгер ченд салгъо гьурлугъ сохде одоми бу. У билег дес эн жогъиле фэхьлере гьечи жарунд э фирегъе, сенгъэ хуно сэхд бугъо дес хуьшде, бурмиш сохд, дес эн Юсуф ю гуйге эз сери хуьшде лов бисдо, бобожник гьейсэглэт офдо э хори. Фольдфебель гье у туьтем гисне керг э хори офдоре доне, дундугъ зере вегируьгъоре хуно, гьуз буре, зури-зури вегирд бобожнике, шиши э куьф хуьшде. Юсуф гьэгър э дуьл дери, вераси, ки дие эз пулгъо дес вегирде гереки, э и гьэчэгъгъо у ниворов, десе кеши бил хуьш-

---

\* Омбардеки казакгъой эн полковник Лазарь Бичарахов те ебо Дербенде, песде де шегьергъойгей эн Догъистуре ве Северни Кавказе вегирде, угъо э суьфден мегъгъой эн 1918 сал э хори эн Иран бируът.

дере эри вегирде эз ён дивор. Пиёне казакгъо гьерчуь дануьс-дуьт, ишу талан сохде одоми, хомуш небире, уре воисдени э сер ишу биле вегируь, фельдфебель гье усэглэт ведешенд эз гъоб шимшиле. Юсуф те шимшил казак э ю расире, эз бил хуьшде дес вегирде, гье эз поисде жиге э е зарбевоз видовусд вирихд э е монет суьрхи никалаевоз э куьф эн жомое шовол хуьшде дебу-гъоревоз. У вирихдеки, фельдфебель не каптенармус, лап шор бире эзи ишу гировунде «операция», лэгIэре пара сохде, э руьхшендиревоз келе-келе хэндуьсдуьт, шогъгъо зере э песой эню.

Марал э хьэёт Обой диромаренки гье усэглэт э чум эню вохурд е ченд огъурдомогъне огъиле мердгъо, поисдебируьтго э ён ёки. Э минжи хьэёт э сер эн дуь келе нетирошире сенгъгъо, эз комигъоки сохде оморебу кинле, э сер гIэтош э е келе фирегье дуре гирде серрэхъое гъэжгъуй миси эдембу герм сохде оморе гIовтен эн муьрдере эри шушде, те ебо у э хироти доноре оморе, берде эри гъовре сохде. Э зир дор эн хьэёт, э куьнди кинле норе оморебу чорпое тобут, руй комики дегирде оморебу э сие парчеревоз.

Э сер эн фирегье, дуразе сирой эн дуьтебэгъэи хуней сенгъи эн Обой нуьшдебируьт хэйли зенгъо дуь э буз еки. Угъо хуьшдере лейлум доре, зани, сине куьфде, эдембируьт гире сохде, дуь эз еки «доме вегирде».

Гьетте Марал, шуш-нефес гирде эз пилонконгъо э сиро вероморе, е келе зен э могъбуле, огъурдомогъне гъуьж дироморе сифетевоз гьелуьсди вэхишд зури-зури эз жигей хуьшде, куьнд омо эз Марал. Зенгъой Обой гьердуьеки, э сер ишу сие келэгъигъо дери нуьшдебируьт дуь э ён еки э гIэрей зенгъо. Угъо гьетте Марале дире сифет ишу дегиш, огъу вечирере хуно бисдо, дуь э гуш еки сер гирдуьт чуьниге чри гуьфдире, э е чумевоз хуни-хуни денишире-денишире э лой эн Марал. Марал гье усэглэт вини гъовой эн «хьовугъой» хуьшдере, оммо хуьшдере э дире, шек сохдеи невоно.

Келе зен эз гъул Марал гирде деберд уре э пушои утогъ эн хуне. Инжо э куьнж эн утогъ, э песой эн сипре перде кешире оморе куьнж эню норе оморебу мегъит эн Обой. Марал те имбуруз гьеле е гилеш недиребу хуней эн Обое. Гьейсэглэт у э фикир, хэёл эн де коргъойге бутгеш, у гьетте эз дер эни келе утогъ дироморе, тоб недо ебо эри ферьм сохде е пертовуш семе диворгъо, вераюндеи, дуьрлуьг эн хунере. Томом расди дивор эн хуне кешире оморебу э е лап келе ранги-берангие раче гуьле-гуьле холиревоз, э э гуьллуье чемен васали ухшеш зеренбугъо. Э сер эн холинче вебу фирегье хэнжел эн Обой э дуьм нуьгъреиревоз, кавалерийски шушкай эню ве тапинже э гъоб дери. Э де диворгъойгей эн утогъ дуь э куьнди еки веноре оморебируьт тешдгъой муьси ве бируьнжи, фиржи эри хэми, тирочу, гъэрбол, гIэрдовуж эри

Горд зере. Э ён дер норе оморебу е келе фирегье кубуте хуым лугъуи, дегь бедире Глов гирденигъо, э хуней эн соде одомигъоре хуно. Марал э фикир хуыште той сохд вераюндеи утогъгъой эн хуней хуышдереш э утогъгъой хуней эн Обоевоз. У э дуыл хуыште шори сохд, хэндусед э хъовугъой хуыште, комигъоки э ки хуыште э Глошире кифлетгъо зенде, келе биретгъо одомигъоют, оммо ченд нимейюш угъоре салигъэ нисди.

Келе зен вокоши пердере э хуышге пажире дес хуышдеревоз, бирмунде э мегъит Обой, мугу евош, э дуылсухуние сесевоз, гъул энуре рэхьо доре.

— Видогъ бош, хэлефме, э косибе шуьвертуьревоз.

Келе зен гъишд Марале тэхьно, ю вогошд э сиро э кин зенгъо. Э зверсер эн муърде эдембу лампа сухде. Те тен энуре шушде, э эхироти доноре, Обой тенбирэхьне дегердунде оморебу э сер кемер, э сер бирэхьне хори хуне. У гъейсэгІэт э дегешдеки диеш дураз, келе нушу доренбу.

Марал нуышд э зверсер энУ. У гъейсэгІэт келе мэхьтел мунд э сифет Обой денишики. Бинуыш сифет энУ гъейсэгІэт эслогъ ежирейге бу, бешгъэ бу эз зинде бугъо възд энУ. Сифет энУ э зиндеи уьткем, огъурлуй, желд бугъо, гъейсэгІэт олхогъин, саламат, эн хисире одомире хуно бу. Гуйге гъич чигърет сифет энУ нисдиге. У гуйге э муърдеки е сэгІэриш некешириге, е доне нишоной эн дерд, зэхьмет хурдеи э муърдеки гъейсэгІэт э сифет энУ невебу, энжэгъ ранг ю суьпенже бу. Э куьнжгъой ловгъой энУ, пэхьни бируьтгъо э зир эн дуразе, екем спии офдоре сие бигъгъой энУ, гуйге могъбуле-руьхшендие хэндерехуно вебу. Гуйге у э туьтем муърдеки, и зинде гІуьломе гъишдеки, э думит-фикир демунде, эри омбаре сохде коргъой хуыште пешмуре хуно биребуге. Гуйге у энжегъ э муърдеки вераси, ки э и «пенж рузине оморе-рафденигъо гІуьлом» у э эгъуьл, сабуьр хуышдеревоз незигъисди, гъемише э сике, войгей хуыште бири, чуй юре воисдиге сохди, темэхькор, текабур, бинсоф бири. Э арт энижире коргъо, хосиетгъой энУ — у юре се раче жогъиле зенгъо биреки мунд эхте сохде оморе одомире хуно, э чуйл сале томом небиреки муърд эз дес эн хуьршлемиш бисдогъо келе мерд, комиреки уре воисденбу эз гъэзгър хуьрд, элчэгъ сохде э пушой чум эн де одомигъойге.

Марал дениши э хэнжел расиребугъо жигей шуьгъэм энУ. Эз биднай шуьгъэм энУ екем зверте э дурази эн э энгуьшд гъирмизине риз вебу. Терсегогъе, хурофотие Марал, эз муърдегъо терсиренбугъо, и дес чуй кориге, денишире э мегъит эн Обой у не-терси, не негиреире хунош неомо уре эз муърде дениширен. У эдембу денишире э мегъит Обой э олхогъини, дуьшменсуьзиревоз. Гуйге гІэжел боришмиш сохд уре э муърдеревоз. Эри е дэгъдэгъэн э дуыл энУ хьэйфбери езугъберире хунош омо эри Обой, эри ко-



мики гъеле эзи е дуь-сэглэт пушо у э дуьл хуьшде шев-руз хосденбу у куьшде биёв, мируь гуфдире, терсиренбу эзу, э чум дире нисе хосденбу уре.

Марал дануьсденбу, ки чум кимигъо э лойюни, унегуьре у дуь бэхшиш эз дуьли неэгл, гъечи, хуьшдере эй бирмунде, э екем лерзиренбугъо дес хуьшдеревоз дес берд э сер хинике бигълуье сифет эн Обой, эз муй телуь-телуьре хуно бугъо исэглэт гъутинегъой эню, э сэхде чуней эню, песеде зенгъо э сиро, иллогъки «хьовутъой ю» шиновут гуфдире, сер гирд эри недуьл-недуьл, э дуьл могъбул-хъэйфбери недери эри муьрде, гирисде э вогънеки эри эню.

— Гуш вени туь, жон Обой, ме гъейсэглэт эритуь чуь гуфдиренуьмге. Эз мелле, эз глэруьс дедедейтуь, гъэгри мебош, ме туьре серкуш зеруьмге. Туь е тэглрифлуье, жоборде мерд э глэрей гъозор мердгъо бирики жиге, е тэхьно десдек, гъэлхэндчиму би-реки жиге, эйчуь туь имуре, и бедбэхде зенгъойтуьре шенди рафди, гъуй бире э тегьер эз суру мунде дурнаре хуно, рафди э песой эн е теке глэзизе бирортуь?.. Бегем бирор эритуь гъечиш глэзизте бу, ширинте бу эз муьгбеттуь э ки эни муйсуьрхие, гъутиней суьрхие бикее тов-товие зенгъойтуь, вое-е-ей!..

Песеде Марал эз заруьнжие сес хуьшде, эз гъовой ёс эн хуне, э ёр ю овурдгъо муьрдей эн бебешуре, шуьвер хуьшдре, терсгъо, билбулигъо, сэглэргъой хуьшдере, дуьл эню эз расдиш лап буланмиш бисдо, у сер гирд э вогънеки нэгл, эз расдиш эри гирисде, глэрс тигъи сохде.

Дуьл хуьшдере тигъи сохде, е кем нуьшде э звер сер муьрде, у эри хуьшде но, ки имогъой весси, ведерафде нуьшде гереки э сиро э ки эн зенгъо. Марал суьфделе вэхидебу эри эз утогъ э сиро ведерафде, бирден песово чаруьсдеки вини э пушой хуьшде гьердуь хьовугъой хуьшдере, сессуьз дироморебируьтгъо э утогъ э ки эню. Марал гъетте э сифет энугъо денишире, зэхълей ю рафдере хуно бисдо. Сифет энугъо лап глоси бу, эз гъаежони дуьл ишу, эз гъэгр, хуьрш гуйге су гирдебу. Дуьл Марал гуйге суьсд бисдо домунд э синей ю. Марал терси, ки и эз э сер ишу омо-ригъо дерд делуь-чешмише хуно биретгъо исэглэт хьовугъой эню, гъеймогъиш э хьисобовоз гьерчуь дануьсденуьт, ки Обой эз дов-гло вогошиш оmore эйло угьоре эз чум шендебу, э угьоревоз зени-шуьвери нисе сохденбу, тэхсири эни кор, еглни юни, жогъиле, гуьзеле хьовушунни. Марал терсиренбу зенгъой Обой э пушой чум эн гъеме юре охмурлуь, хуьрд, биёбур несоху, эз пилонконгъо ве-гирде пертово недует. Эзугъо гъейсэглэт гьерчуь гири бовори. Унегуьре Марал хуьшдере э недануьсден веноре чуь дериге гъей-сэглэт э дуьл энугъо, те ебо «хьовугъой» ю лэглэ вокурде, э сер ю оmore воисд эзугъо «глэмелданте» ведиров. У сер гирд э пушой энугъо эри муьрде «гъейвой-гъызар» сохде. У, чуьтам глэдот гъис-

диге эри куьнде одомигьой эн муьрде — деде, холе, зен, гІэмей энү, сер гирд хуьшдере вешенде-фушенде, сине куфде, гьутинегьой хуьшдере гьэрмэгь кешире, «гьейвой-гьызар» сохде.

Зенгьой Обой эри пузмиш несохде и гІэдоте, биёбур небиреи э пушой хэлгь, чорешу небире, э Маралсвоз э рачеберачей еки поисде, угьош сер гирдуьт эри хуьшдере вешенде-фушенде, «гьейвой гьызар» сохде, сине-гьутине куфде. Э угьо гуьре гьеме э сиро нуьшдебируьтгьо зенгьо дуй э песой еки вьхишдуьт, угьоре хуно сер-сине куфде, «гьейвой-гьызар» сохдуьт эри муьрде. Сес энугьо гьейсэгІэт эз хьэёт е сер эдембу э кучегьо рафде. Эхир е ченд зен диromo э утогь, гуфди, минет сохд э угьо «екем хомуш бошут» гуфдире, э гуж, хушевoз эз гьул гирде «хьовугьоре» бердуьт нишундуьт э кишу э сиро.

Песде Марал е кем э ки эн зенгьо нуьшде бэгьдо эз гофгьо, ихдилотгьой эн кими энугьо дануьсд э же ве чуйтам Обой куьшде омориге.

У руз Обой себэхьмунде дуй ерэгьлуье казакгьоре э хуьшдеревоз вегирде омореву э Фэхьле базари. КимэгІдо инжо эз пэхьники эн патрулгьой казаки эз куьнде ве дуре дигьгьо ранжбергьо овурденбируьт кими хурдение продуктгьо э ишуре герек гьисдигьо чигьо, молгьоревоз эри дегиш сохде.

Фэхьле-базари гьейсэгІэт энжэгь эз диремун ухшеш зеренбу э у Фэхьле-базари эзи пенж-шеш сал пушо бугьо. Инжо дие унгулуье сесгьой эн э киро гирде куклегьо огол нисе зеренбируьт муьшдеригьоре эри чи восдоре. Омбардеки тукугьо гьеме сэхд сохде оморевуьт.— Гье э у алвар сохденбируьтгьо тукугьош бегьеме чи невебу. Туз гирде рафгьо, дестуркегьо тигьи бируьт. Эз лап хуб э ёр хэлгь мундебугьо хьэлвотукуй эн Худодот эз зуревоз дие буй эн хьэлво нисе оморенбу. У куьшде оmore бэгьдо э жигей хьэлвотукуй энү гушдтуку вокурде омореву. Э сер дер эн гушдтуку е чоркуьнже левгье вебу. Э унжо шекуьл кешире омореву сер эн гов э раче нерме берхитлуье лов-бузевоз, тиже суьггьоревоз. Оммо инжо э согь рузгьоревоз гушдтуку сэхд бу.

Оммо чуьш бисдоге инжо кембиш чи бу эри фурухде. Гье э минжи эн мейду «мол хуьшдере» э сер мостовой тигьи сохде, кимигьо тара, кову, дуруп, сир, хуьшге гьурзум эдембируьт фурухде. Батракгьо пушотенигьоре хуно оморенбируьт инжо эри э кор поисде э онгурбогьгой эн сэхьиб келе богьгьо. Эз гиснеи, нэхурдеи лап зимзерд бире гІэиллегьо—гІонигьо, чубугьэ хуно хуьшг бире десгьошуре дураз сохде, шуькестгьо, бичорегьо, жуьрте, пелуь-пелуье парталгьо э тен ишу вери, дуй эз еки ветете э гофгьо, заруьнжие сесгьо, мэгІнигьо, шуькеетгьо, минетгьо, ловогьошуревоз э «хотур худо» хьэрекет сохденбируьт эри езугьбери

вэхизунде э дуыл э базар бирегоре одомигьо, е тике нун, е кепик пул «мисво», содогьо дуь гуфдире ишуре.

Э шон энижире косиби, юхсули, глонии муьгуьжуьзе коре хуно нушу доренбу инжо э базар веде биренбуге тов-товие лакированни фейтун эн келе гюшире одоми, комики фирегье кемер хуьшдере э нерме дивор фейтун ведоре, э уьткемиревоз зере мигорошдге эз гьэд Фэхьле-базари, эз ён могьбуле, юхсуле одомигьо, омбардеки комигьоки гисне, енебуге нимелитгисне бируьт.

Обой у руз э Фэхьли-базари оморенге фегьм сохд иловлере. Е э чум лонгь енебуге гумон биевгьо чи гуйге инжо небу. Бирден э чум энү вохурд е лап саре, дуь черхиглэребеле, э комики жингов бесде бу э бундругь. Э ки энү е ченд одоми поисде, эдембируьт чуьниге гуфдире дуь э екиревоз. Обой э дуь казакевоз куьнд омо э ки глэребе. Одомигьо Обое диренге э дуь ерэгьлуье казакгьоревоз гье усэглэт гьирогь доруьт хуьшдере. Сэхьиб глэребе е гьуьндуьре, е кем хиегьой кемер ю бируне ведироморе пире мерд бу, оммо эз диремун гьеле сэжде одоми бу. Дуразе бигьгьой энү сипи бируьт. Э тен энү куьгьне чухо вебу, э пойгьою тирох. Э кишд энү е келе хэнжел вебу. Гьоб эн хэнжел тэхдеи бу, э руй ю алат невебу. Келемерд нугедигьн бу. Обой гьейсэглэт эз гоф сохдей энү дануьсд, ки у эз татгьо-ёгьудигьой Хэйтогьн. Э руй глэребей энү хуьште гиёв вебу.

— Чуь овурдей? — э гьовой хьоким э уьткемиревоз пуьрси эзу Обой.

— Хуьште гиёв,— недуьл-недуьл жугьоб до нуьгедигьн, э сифет Обой неденишире.

Обой унгэде бовор несохд э пире мерд: божэхьэт у эри е гьужогь хуьште гиёв фурухде эз дигь мэхизуь миев е сер инжиге. У эри хуьште теслих сохд эри фегьм сохде гьэд глэребере, эз гиёв бэгьэй чуь вериге гене унжо. Обой десе э гьэд гиёвгьо доноки, келе мерд гьейсэглэт терси. Э сер ю кор неёв гуфдире эри и хьокиме фурмундеи, э у дургу гуфдирен, у гьейсэглэт зурн-зурн мугу эзу, ки дуь туморе глорд овурди гуфдире. Дуьлдэгьдэгьэ, дуьлпесо бире, сифет хуьшдере э менэхьэфи веберде, и огьурдомогьлуье хьоким екем нерм бу, рэхьмедуьли соху гуфдире э ю, мугу:

— Туьш, хэлефме, ники глэйлгьойтуьре винош. Чуьклеи кукме, кунчолиму, элее э шори-никиревоз домор бире, эз е ченд руз бэгьдо глэруьси энунн. Ме те песини пенжей глорде эз хуне вечирем овурдем инжо э шегьер эри мере герек гьисдигьо чигьо восдоре: е кем партал эри глэруьс не эри домор, ширине чигьо эри гьуногьгьо.

Обой э гюсии ве гьошгьоблуьиревоз дениши э пире мерд. Уре воисд нифри-офри соху келе мерде, терсуну, оммо тоб до, негуфди.

— Хуб, гьечу буге фурух э иму и дуь туморе гIорд туьре, ме эри энү туьре дуьмгьо пулгьо вессн туьре герек гьисдигьо чигьо эри восдоре,— мугу Обой.

Ранжбер гоф несохд, не «бошгу», не «нэгI» негуфди э хуьше демундере хуно.

— ГIорд имуре гереки эри хурек эн солдатгьой Бичарахов,— мугу Обой гоф хуьшдере зиёд сохде.— Иму э угьо биё кумеки сохим, большевикгьо дуборе власте э дес ишу невегируьт.

— Бэхшлемиш сох,— мугу келе мерд,— мере не э булшевикгьоревоз, не э Бичараховаз кор нисди. Ме э жигейме, угьо э жигей хуьше,— э олхогьиниревоз мугу нуьгедигьы.

Обой гене сер гирд эри гIосн бире.

— Туьре кор нисдиге, большевикгьоре кори э китуь, эн гьеме. Угьо, худосуьзгьо, гьэчэггьо оморуйгге э туь наргов, гIэребеш нигьилуь. Угьо э гьэршуй сэхьибьетини. Песде иму э казакгьой Бичарахов кумеки несохдимге, казакгьо э хэлгь иму хьэлово мибу, гуж, гьэзоб миёвт э у. Эгенер туь согьи-саламати хэлгь туьре хосдениге эзи хотур семе биё кумеки сохи э угьо.

Дуь казакгьо, э песой кемер Обой поисдебируьтгьо, нисе верасирембируьт чуй гуфдиренбуге поручик э и пире догьлурсвоз, унегуьре угьо э гевилсуьзиревоз эдембируьт денишире э иловле, гузет сохде кей мерасуьге Обой ихдилот хуьшдере э пире мердевоз.

Пире мерд поисд эз лэгIэ гоф неовурде. Э дуьл эн Обой гьечу омо, ки у дануьсд уре андуьрмиш сохде. Обой зури-зури доно десе э фирегье куьф эн френч хуьше, ведешенд е чуйклэ гьундогь пулгьой когьозире э шекуьл падшогь Николаевоз. Оммо ранжбер гьич десеш нежимунд.

— Эн Николаи? НэгI, нивегируьм. Эйчуьи мере пулгьой Николаи. Не уш, не пулгьой энүш,— э биразиниревоз мугу келе мерд.

— Туьре пулгьой Николай нисе вонсдеге, ини, ги пулгьой керенскире,— мугу Обой, гье усэгIэт эз куьфигей хуьше ведешенде е келе гьундогь пуле, кеши десе э лой келе мерд.

— Кирински? \* — гуйге мэхьтел бирере хуно, мугу келе мерд, руьхшендие жире. Ме э ингьэдеи гIуьмуьр расирем, гьеле егилеш нешиновусдем ижире пулгьо гьисди гуфдире. Мере угьо э гьовош герек нисди.

Келе мерд лап хуб дануьсденбу, ки ижире пулгьо бируьт, э кими жигегьо, гьемчун инжош э и пулевоз кимигьо доре-восдоре сохденбируьт. Оммо у хуьшдере э гьосутевоз э надани венореву. Эри энү гьейсэгIэт не Николае не Керинскире хуььрмет, гьимет небу, чуйнки гьимет небу пулгьой энугьоре, ологьолуь бируьтгьо э нум не нисд бире власть энугьоревоз.

---

\* Кир э зугьун тати гIэйбине гоф хунде оmore.

«Тэглэли», инодкори эн келе мерд, ижире руьхшенди энү э пулгьой падшоги не керенски лап э гьэгьр овурд туьндехуе Обоe. У эз хьуьрш дуьл хуьшде гьейсэглэт гьирмизи бисдо, чепи гьутиней энү э жите куьгьне дэгьмей эн хэнжелевоз, сер гирд эри жуьмуьсде, чумгьою хун вечируьт.

— Белки туьре воисдени, пире сег, дениши кей эжигей эни пулгьо монетгьой большевники мибошутге?! — хьэрой вегирд у э сер эн келе мерд, гьирмож зере-зере э зарбевоз эз кемер энү.

Обой буйругь до э дуь казак беруь гуфдире глэребей энуре э комендатура. Оммо э и коревозиш хуьрш Обой сокит небисдо. У дес кеши, гирд сэхд эз хэнжэл эн келе мерд, хьэрекет сохде эри векенде уре эз кишд энү. Сифет эн нуьгедигьги гьеусэглэт дегиш бисдо, э чумгьою глэтош жесд.

— Бур дестуьре! — муьшде гьово вегирде э сер Обой, хьэрой сохд у.

Э сес энугьо хэлгь кура бисдорут, поисдуьт э томоше э иловлей энугьо. Э пушой чум эн келе мерд и кор эн Обой неки талаш сохден бу юре э пушой чум руз, оммог гьемчун э гьэсдевоз хуьрд, элчэгь сохдеи, номус юре э хори зерен бу. И коре келе мерд ветовусде недануьсд.

Нуьгедигьго мэглумь бируьт чуьн гьуччогьэ, женгеворе, келе ерэгьдусде одомигьо. Угьо ерэгьсуьз гьич эз хуне нисе ведерафдембируьт, э жой нисе рафденбируьт. Ерэгьэ угьо эз сер хуьшде зиьдте дошденбируьт. И ерэгьдусди гьечи сэхд дебу э хосиет, дивэгл энугьо, ки неденишире э гьэдэгьэи, нугедигьго э нумазиш э кишд ишу хэнжел не харбукински\* тапинже вери оморенбируьт. Те ебо сифиртуроре моч сохде, нуьгедигьги хэнжел хуьшдере те нимелит эз гьоб ведешенде, моч мисохд эз серине тов-товие ругьэи эн дуьмбе зере пулат энү. Кимвэглдо хункигьой еки гье э гьэд эн нумаз дуь э сер еки э хэнжел не тапинжеревоз рафде, гьэгьр хунире эз еки медешендуьт.

Эри негьишде нуьгедигьгоре оmore э нумаз э ерэгьэвоз е гиле хьэзон эн нумаз э еки эз рузгьой эн миглид, нумаз одоми пур гьисдики, у сифире лов сохде э сер гьихэл, е десе э сер энү веноре, десигере гьово гирде, шувунде, сер гирд угьоре э нуминей хуьдоревоз терс доре, гуфдире: эгенер угьо терг несохдутьге и хосиет

---

\* Харбуки — даргински дигь, комики е ченд дегь километр дури эз Нуьгеди (изму Янгикент). Харбукигьо мэглумь бируьт чуьн хубе усдогьо, тапинже ве де ерэгьиге гьуьч сохдегорьго. Пушотегьо инжо эз дигь Нуьгедигь не Маджалис бэгьэи, э куьндигьой энугьо, бируьт е ченд дигьгьой татгьо-егьудигьго, эжеки угьо э садсалгьоревоз зигьисденбируьт дун э ён еки: Дигь Урмен, Дигь Хаклой, Дигь Шолуми Дигь Кардаш ве угьониге. Жиге-мемзуьл эни дигьгьоре гуфдиренбируьт «Дерей Гьэтте». И дигьго эз зуревоз нисдуьт. Э гуфдирей эн кими келемердгьой эн татгьо-егьудигьоревоз э Нальчик, Грозный, Хасавюрт зигьисденуьтгьо, биней гьемей энугьо эз «Дерей Гьэттен».

ишуре, гене эзимбэгъдойгеш оморуйтге э нумаз э хэнжел-тапин-жеревоз, худо э сер энугъо гъэзоб хуышдере тигъи мисоу: гІэтош, «дурфуй Нуувэхъ», зимилерз, мерг, гиловор мифирсуй.

Хъэзон мидениши мивинуь и ю эз нуминей худо гуфдире терс-гъо, гъелебулегъо гуйге гыч э хэпер нуьгедигъош нисди, угъо ол-хогъин нуышдет, сер зиѐди кими энугъо эдете э мигъробониревоз, сер гІэиле тимор сохугъоре хуно, тимор сохденуьт руй эн эз гІэ-рей луынгъой энугъо дуллу гысдуьтгъо дуразе фирегъе хэнжел-гъошуре. Увэхди у эзжире кор энугъо лап гІоси бире, гуфдики: худой офирогор э сер энугъо у гъейсгІэт гуфдигъо гъэзобгъо, сула-гъой эн гІэйбине жигегъой энугъоре мибесдуь гуфдире, э нумаз гъеэбо жевгъ офдо. Бирден е ченд нуьгедигъо э и туьтем лап хуьршлуь бире эзжире гъелебуле, тапинжегъоре ведешенде эз кишд ишу, сер гирдуьт э сергъови эри гуниле шенде, еГІни э и коревоз эри нушу доре, ки угъо е эз бенде, е эз худо чуьжире гъе-лебулегъо ,терсгъо бисдогеш, угъо чуьтам теимогъой э ежигеш ерэгъсуьз пой норе нисе рафденуьтге, гъечу эзимбэгъдойгеш миѐвт э нумаз э ѐрэгъэвоз. \*

Бэхш доре ерэгъ хуышде де одомигере, эри нуьгедиигъо, чуь-там эри гъеме догълуьгъо, бу нишон келе дусди, нхьдибори э ки энугъо одоми, оммо жэхьт сохден э гужевоз енебуге э хукуьм тер-сезов векенде эзу ерэгъэ — хысоб биренбу келе охмури, номус юре э хори зерей. Унегуьре нугедингъи гъемише хъозур бу сер хуышдере, жун хуышдере эри доре, ерэгъ хуышдере дорейжон э у одоми, комиреки э гужевоз вегирде восдени ерэгъ энуре.

— Бур дестуьре эдее гуфдиренуьм! Ме хуышдениме мидуьм хэнжеле э туь! — эз хуьрш нефес ю гирде, э тасире сесезов гуф-ди келе мерд эз сифет дегиш бире.

Обой гъошгъоре гъуьжунде, дес хуышдере кеши песово, дени-ши кей хуышдени энугъо мекенуь мидуьге хэнжел хуышдере э ю. Келе мерд гурунд нефес кешире-кешире, лове э шефде хэнде веберде, дес зере э гъэйш хуышде, гуйге эдее хэнжеле эз кишд хуышде векенде, бирден э е зарбевоз ведешенд хэнжеле эз гъоб, гъе у туьтем эз гъемей гъувот хуышде те дуьм хэнжели вогъунд уре э шуьгъэм эн Обой...

Обое гъовре сохдуьт гъе у руз шохъонгум. Гъоврегъо э зофруй эн догъ бу, дуь верс дури эз шегъер. Э пойней догъ э дурази эн е ченд километр ерлешмиш биребируьт онгурбэгъгъо ве богъгъой емиши.

Начальник эн гарнизон шегъер миторе эри рэхъ сохде э сер

---

\*\* И гъозиере эри автор эни книг те довгІо нхдилот сохдебируьт дуь келе мердгъо-нуьгедиигъо, Э гуфдирей энугъоревоз ишу хуышденишу э у гІэйле-жовоне вэгІдогъошу диребируьт и томошее эгъволете.

гъоврегъо доребу е отделений эн ерэгълуе казакгъоре эз дув-  
ваздегъ одоми э серберэхьи эн командир взводовоз. Унжо угъо  
гъемчун миѣсдуѣт е ченд залп туѣфенг шенде э сер гъоврей эн  
Обой. куѣшде омorigъо э «боевой пост» э бегъем сохдеки «воин-  
ски ве патриотически» гъэрдхунди хуѣшдере. Оммо чуй кор бис-  
доге э песини минут офицер негъишд казакгъоре салют доре э  
сер гъоврей эн Обой. У енебуге хъэрмэхъгъо-дусдгъой эн Обой эз  
«комитет миллети» терсируѣт сес эн залпгъой туѣфенг е шиновус-  
де э куѣнде дигъгъо, э сер эн догъ гъисдуѣтгъо базай партизангъо,  
мейл большевикгъоре гирденуѣтгъо, э пэхъники шишире неѣвт э  
сер ишу. Енебуге угъо э шегъер вогошдеки партизангъо э рэхъ  
энугъо пэхъни бире э сер энугъо гъэтош невокунут. Унегуѣре угъо  
гъетте гъовре сохде Обое сессуѣз, гуѣмсуѣз, зурѣ-зурѣ пой вече-  
ре, вогошдуѣт э шегъер, эз секонеи вирихуѣгъоре хуно.

Оммо гъе у руз, пушой чуѣшме дерафде, гъе у вэхд, кейки э  
сер гъоврей эн Обой казакгъо миѣсдуѣт салют ѣси доре, сес эн  
туѣфенг шендеи омо дур эз сер гъоворегъо, э у тарафигей шегъер,  
э песой эн гъэлебендие бору, эжеки э гуниле зере омо келе мерд  
нуѣгедигъи, эз хэнжел комики имбуруз себэхъ мунде куѣшде омо  
Обой.

Контрразведчикгъой эн Бичарахов келе мерде силис несохдуѣт  
е сэгъэтиш. Гъечинигеш веде бу, ки у соводсуѣзе, овоме одомини,  
ранжбери, э политикаревоз кор энунисди. Не у дусд эн больше-  
викгъош нисди. Обое у куѣшди офицер эн Бичарахови гуѣдире  
нэгъ. Обой ю хуѣшдению э гоѣгъо, коргъой хуѣшдеревоз э руй,  
э гъэгър ве номус веровунди и пире «вэхъшие» одомире. Оммо  
неденишире э и кор, угъо теслих сохдуѣт эришу эри э гуниле зере  
уре. Те ебо у куѣшде оmore, келе мерде э келе бирэхъмиревоз  
куѣдуѣт, хэхэ-хэхэ, е ченд дендей юре хуѣрд сохдуѣт, сифетюре  
хунерижа сохдуѣт эри бирмунде, ки гъерки э сер гъурлугъчигъой  
эн лешгер дес вегирд е эй гъэгъ, е эй негъогъ, у э ижире хъол  
овурде, песде куѣшде миѣв гуѣдире. Оммо э протокол эн кутэхъ  
силис ишу угъо нивуѣсдуѣт эри звертеи начальство, ки «пору-  
чик» куѣшде омори гуѣдире эз дес эн «гъирмизине бандит» у э  
гъурлугъ хуѣшдере э бегъем сохдеки.

Дувсдогъэ пой бирэхъне, сер бирэхъне, десгъоюре дарам пе-  
сово беседе, э е зиршейни, зиршоволиревоз се казакгъо, туѣфенгъо  
э дес дери, есеул э тапинжеревоз э пушо, бердуѣт уре эз кучей  
Барятинский э пушой чум гъеме зверо э лой Шурински гъопу-  
гъо. Сифет келе мерд вамасире, хунихэмири эз куѣде, расди чум  
эну хунрижа бу. Э сипре рушгъой энунтикегъой хун жигере хуно  
хуѣшгъ бире вемундебу. Э шеи энунтикегъой дэгъмегъой хуни  
вебу. Гъеме уре диругоргъо э сер офдорембируѣт ки келе мерде  
эдеэ эри э гуниле зере берде гуѣдире, оммо те е гиле уре э гуни-  
ле зере, э у казакгъо зурбое гуж, гъэзоб омори.

Наряд казакгъо э келе мердевоз эз Шурински гъопугъо ведиромаки, е дегъ метро зофруте эз гъопуй боруй эн гъэлебенди фураamore, э буйругъи есеулевоз, казакгъо поюндуэт уре руге кермер э ён бору, ишу хушденишу е паздегъ луынг песово вошошдуэт. Есеул буйругъ до тик гируэт гуфдире эри зере «жинуеткоре». Есеул е назуке дараме одоми бу э тен ю парталгъой черкеси вери. Э сер энуге назуке сиегъе килэхъ вебу эз звере гъэд сохде, э пойгъой ю — дараме мэхъсгъо. Темиз чире сифет энуге лэгъэр бу, огъур бу. Назуке сиегъе бигълегъой энуге звере бурмиш сохде бируэт, дуым эбрэгъэ хуно тиж ве тик бируэт.

Келе мерд хэхэе хунрижее кемер хушдере э бору ведоре, э гужевоз поисдебу э пой. Чуышме пушой э песой догъ дерафде бу. Офдои шохънгумине эдембу товуш сохде богъчегъо, бисдугъоре, бируэтгъоре э и тараф эн шегъер, рэхъэ, буйбалай эн келе мерде не жоллодгъой энуге. Вергъирмизие ригазгъой эн нимелит э песой догъ дерафдебу чуышме эдембируэт э хуние ранге хуно товуш сохде тов-тов доренбируэтгъо тиллие шыкгъой эн туьфенгъой казакгъоре, гъэлеж гирде оморебируэтгъоре э сер эн келе мерд. Эз ижире товуш диеш сегъмлуь веби биренбу гъейсэгъэт инжо гиросденбугъо гъозие.

Келе мерд э хун перде гирде оморе чум хушдеревоз песини гиле дениши э иловлей ю ерлемиш бугъо жиге, лап э келе гъаежони ве могъбулиревоз дениши э рэхъ эз комики у имбуруз себэхъмунде зу-сери э гъэребей хушдеревоз диромореву э шегъер эри гъэруьси кук хушде е кем перек гъисдигъо чигъо восдоре. Гъе эзи рэхъ у имбуруз те чуышме дерафде миесде вошоше э дигъ хушде, эжеки зен, кужгъо, духдергъой энуге, невегъо чумерэхъ энуге. Э фикир энуге омоки и рэхъ эри энуге «рэхъ гиден-гелмез бисдо» гуфдире, дуьл энуге лап сэгъэр хуьрд, эз бугъоз энуге сес зузере хуно ведирома.

Бирден келе мерд кемер хушдере эз хинике сентгъ бору зере, хушдере пушово до. Пиёне хуно лойлум хурде-хурде, хун гирде, вемасире чумгъой хушдере чарунде, сифет хушдере гъуьжунде, синей хушдере бируне ведешенде, э хъурш, нифри, нэгълетиревоз шиши омо пушово э сер эн жоллодгъой хушде. Есеул олхогъин, оммо э мэхътелиревоз чумгъоре келе сохде, дениши э лой эни «хьофджуе» сегъмлуье келе мерд. Песде те чор-пенж луынг мунде те у оморе расире э кин буз эн шыкгъой казакгъо, десе тик веберде, гъе у дэгъдэгъэ э зарбевоз фушенде, кутэхъ, келе келе мугу:

— Гъэтош!

Гъебо се гуниле эз се туьфенгъо шенде оморутгъо, гуйге грое хуно шивунд соките эвир эн шохъонгумире. Гъемин гъе и туьтем чуышме эз ние звере дерафдебугъо э песой эн куьнде догъ, пэхъни бисдо, гуйге уре невоисд винире чуь гиросдеге гъей-



сэгIэт э ён эни эз куыгънен сие тор зере, оммо муьхъкеме эн гъэд-  
мие боруй эн шегьер — гуьмлуйе шогъоди эн ченд жире девргъо,  
земонегъо, гъозиегъо.

## ШИРИНЕ ОВ

Казакгъой эн Бичарахов омбар немундуьт э Дербенд. Дуь  
мегъ гирошде бэгъдо эзугъо Дербенде вегирде, угъоре эзинжо  
сигъмиш сохде ведекирдуьт туркгъо.

Э суьфдеи довгIой гIуьломи Турция бу союзник эн Германия  
ве Австро-Венгрия. Эз довгIо сер гирде оморе эйло, гъозори нуьгъ-  
сади чордегъимуьн салевоз те имогъой у эдембу довгIо сохде э  
тараф энугъо э гъэршуй Англия, Франция, Урсиегъе де член-  
гъойгей эн Антанта. Оттоманская Турция э серберэхьи султано-  
воз увэхдигъо гъувотсуьз биреbugеш, эдембу вечаруьсдегеш, оммо  
у гьелеш бу еки эз лап келе колониальни империя э гIэрей де  
мемлекетгъойге. Эзи ченд салгъо пушо эз зир муьрс энугъо хилос  
биребируьтгеш ченд вилеетгъой эн Балкан, оммо чуйн колони-  
гъой энугъо мундебируьт гьелеш Ирак, Сирия, Хиджаз, Йемен, Па-  
лестина ве диеш.

Овхьолет эн хуьшдени эн турецкая империя усол бугеш, эконо-  
микай энугъо лап зофру бугеш, те бинеbugъоз э гъэрдгъо дебугеш  
эз де колониальни державагъо, оммо Оттоманская Турцияре эз  
зуревоз воисденбу э хуькуьм ержгъэвоз Кавказе ведешенде эз  
дес Урсиегъе, чарунде уре э еки эз провинциегъой хуьшде. Туркгъо  
гъейсэгIэт лап эдембируьт тэгIди сохде Кавказе, Догъистуре эри  
вегирде, чуйнки англичангъо э суьфдеи рузгъой эн август оморе  
расиребируьт э Боку, оккупировать сохдебируьт Бокуре. Угъо  
терсиренбируьт, ки англичангъо мифуьрсуьт гъушунгъошуре э  
кумеки эн Бичарахов, комики бу зирдеси эн англичангъо, увэхъ-  
ди угъо нидануьт эжиге оворде плангъошуре э товун Кавказ.

Дуь руз мунде те туркгъо э Дербенд шишире дироморе, Марал  
у руз поисдебу э ён эн чол хъэет, эдембу эз чол бедирей гIове  
вокошире. Бобои дергъой гъопуре вокурде, эдембу э гIэребере-  
воз эз зир гIэсбгъо вечире сергире, хокоругъой эн хъэете берде  
эри шенде э песой шегьер э гъирогъ дерьегъ.

Гъово дегирдебу, нем вечиребу, пушой ворущ оморере хуно  
бу. Руз пишнеи биребу, оммо чуй кориге полковник эз утогъ  
хуьшде нисе ведироморенбу эри э кор рафде. Ижире кор гьеле  
гъич небиребу э уревоз. Э дуьл Марал шеке хуно омо: и мерд  
урус шев э хисиреки эз некуми муьрде недомуну фэгъире шуьвер  
юре хуно? Оммо эри дарафде э утогъ эн полковник, дануьсде:  
чуйните-чуй нисдиге, чуй бириге уре, Марал жуьргIэт несохд. Эз  
елойге ижире фикиргъо э дуьл Марал омо, чуйнки полковник ди

шохьонгум э хуне вогошденге гьовой энү серсуре хуно бу, у эдем-бу пиёне хуно лойлум хурде. Марал э и вэхди э сиро поисдебу. И дес у гуйге Марале недирере хуно, сере гьуз гирде-гирде, шохьонгум эхэйрбу недоре уре, зури-зури дерафд э утогъ хуыште, дие эзу эйлеревоз Марал уре недиребу.

Ижире фикиргьо э дуьл Марал дери, у суьфделе пура бедирей г'ове эз лэглэй чол вегирде, э гьирогъ чол норебу, дуьм бедирере э дес хуыште гирде, бирден эз утогъ эн полковник е сес тапинже шенде омо. Эз сес гунле, эз сегьм жендек хуыште, Марал гьеёбо хуышдере вешенд, дес энү лерзи, гье усэглэт пура бедирей г'ов, шэгъэ хурде ээ дес энү офдо э кун эн чол.

Е минут гирошде бэгъдо, Марал екем э хуыште дироморе, э хьэроевоз ведерафд э куче. Гье и туьтем э ён гьопуй эн хьэёт э у вохурд е казацки офицер не е ерэгълуье казак. Угьоре фирсоре-бируьт эз штаб эн гарнизон полковнике эри огол зере. Эз хьэрэй эн Марал, не эз гофгьой энү «полковник! полковник!», э песой эн полковник оморегоргьо гьеусэглэт верасируьт, ки э сер полковник е кор омори. Сес Марале шиновусде, э угьоревоз дироморуьт е ченд одомигеш. Угьо гьейсэглэт теретэглди дерафдуьт э полковник зигьисденбугьо утогъ.

Полковник дегешдебу э сер шуьгъэм десгьо, пойгьойре гьеркире э ёло кешире. У э зире парталгьоревоз бу. Э куьнди расди дес энү тапинже бу. Зир энү, ён гьэбуьргъэгьой энү хун пур бу. Офицер не солдат гьейсэглэт эз гьулгьой энү гирде, чарундуьт уре э сер кемер. Шей энү гьеме гьирмизи бу эз хун. Сифет ю зим-зерд бу. Оммо полковник зинде бу. Вединики, полковник ~~жэьт~~ сохдебу гунилере э дуьл хуыште эри зере, муьрде рафде эзи г'уьлом, оммо э хьисобовоз, э песини дэгъдэгъэ дес ю чемуьсде, гунле э дуьл ю нерасиребу, э шуш ю расире, эз ён лапаткай кемер ю ведироморе, расиребу э дивор хуне. Е паздегъ минутиш неги-рошд, оморут расируьт тертэглди дуь санитаргьо э носилкагьоревоз, духдир, келе сумкай духдири э душ ю вери.

Марал эз терс, хьэлежигери недерафд э полковник яралуь дегешдебугьо утогъ. Эз е ченд минутиге бэгъдо полковнике э сер носилкагьо веноре, э сер энү сипре руйхьолви дигерде, ведировундуьт э сиро эри берде уре. Полковнике э ведебердеки, Марал вохурд э чум энү, комики поисдебу дуь десе э сине веноре, эз терс, эзижире некумие беде кор, лос бире э суьпенже зере сифетевоз. Маралиш дениши э полковник. Сер энү э сер сипре ламбалуш вебу, те ён чуней энү руй ю дегирде бу э руйхьэловиревоз. Гьемише вергьирмизи бугьо гиргине, ловхэндее сифет эн полковник гьейсэглэт сипи бу ранг эн руй болуше хуно. Марале диренки, у расди десе эз зир руйхьэлови вегирде, лове э могъбуле хэнде веберде, се энгушд хуышдере э сер өки веноре, гье эз сер насил-

кагъо хоч кеши э лой энү, егӀни, хосде эри Марал согъи, салама-ти ве кумеки эн худо.

Гье у руз эз гофгӀой эн э песой эн полковник оморебируйтгӀо, песде э юревоз гоф сохдебируйтгӀо одомигӀо, Марал дануьсд себед эн полковник и коре э сер хуьшде овурдеире. Ди эз кифлет энү зигъисденбугӀо жиге эз шегьер Новочеркасски зен полковник эри шуьвер хуьшде беде хэбер фирсоребу: е теке кук энугӀо, жогъиле офицер пуч бири э довгӀо э еки эз гъэзоблуье женгӀо э Гъирмизине Лешгер советгӀоревоз. Духдер ю, комиреки у лап гӀээиз хосденбу, комики эзи е сал пушо верасди гимназияре, песде се мегъине курсгӀой эн медсестраире, э е дусд хуьшдеревоз. большевикевоz рафди э жергегӀой эн Гъирмизине Лешгер эри женг сохде э тараф большевикгӀо, гъэлхэнд дошде советгӀоре. Ижире дерде, ведини, полковник, сэхде тарафгир эн власть падшогъети, э жун, номус хуьшде чихиш сохде недануьсд. ДуьнӀегъ энү гуйге э пушой чум энү томом вечаруьсде, бербод бисдоге. Уре воисд дие э чум хуьшде невинуь хэребеигӀой эни дуьнегъ хуьшдере, эри комики у зигъисди, гъурлугъ сохди, хуьшдере гъи-миш несохде, э хуьшде рэхъм неберде. Оммо гӀэжел неберд уре, гуйге э гъосутевоз гъишд уре винуь те эхир вечаруьсдеи энү гӀуь-ломе, комиреки у согъ гӀуьмуьр эз дуьли-жуни хуьшде гъурлугъ сохди.

Суьфдеи дуь-се рузгӀо, туркгӀо э Дербенд шишире дироморенге, угӀо э вогӀней казакгӀо, эрменигӀо, большевикгӀоре гешдеире-воз, э омбаре хунегӀо дерафде, таланигӀо сохдуьт, э кими гӀэруьс-духдер гуж сохдуьт. ДухдергӀо, жогъиле зенгӀо э ишу гуж несохут гуфдире, э зир буше, кумбологӀове чарунде оморе челегӀо, э гъэд сер дегирде хинике тонугӀо, э зир лембей эн гиьвгӀо, суь-мергӀо э говдугӀо, товлегӀо, гъомборгӀо, э маладевоз билесумол сохде гъутинегӀоревоз, пэхъни биребируьт. Расди э сеимуьн руз командванией эн гъушун туркгӀо э хуьькм эн гъелебулее прика-зовоз поюнд таланигӀо ве гуж сохдеигӀре э могӀлугъ шегьер эз тараф солдатгӀошу. Кими энугӀо эри эни кор сэхд тембихъ сох-де оморут.

Суьфдеи се руз те э шегьер сокити бире, туркгӀо э хъэьтгӀо, хунегӀой хэлгъ гешде, Марал гъишд Бобоире гъопуй хъэьт хуьш-дере сэхд сохде э келеи ве э гъолинди эн е хъэче бируьтгӀо гъи-литгӀоревоз. СуьрхгӀо, эршефигӀой хуьшдере э е бухче бесде-берде пэхъни сохдебу э кумеки эн нуькер хуьшдеревоз э товле, э чухуреки э зир эн гъолинде тэхдей эн овхур гӀэсбгӀо. Ю эри хуьшде жиге хьозур сохдебу э гъомбор шороби хъэьт хуьшде. Гъомбор энү келе бу, сенгъи бу, э лугъонди се митро э хори дебу. ПенжерелегӀой энү энжэгъ эз е тараф бируьт. УгӀо э зир бун эн гъомбор вебируьт. Эзи чуькле, е тарафлуье мегъежер кешире оморе пенжерелегӀо э гъомбор лап кем товуш дироморенбу. Э

гъэд эн гьомбор э сер эн гьитгьо, норе оморобируйтгьо э сер бирэхьне хори эн гьомбор, жерге-жерге келе, бенд кешире, эз тэхдегьой балуди сохде пура челепгьой шороб норе оморобируйт. Э доруни куьнж эн гьомбор, эжеки лал торик бу, буй эн неми бирэхьне хори нен шороб лап тиж расиренбу э вини одоми, норе оморобу е гьуьндуьре, серневерие челег эри пэхьни бирей Марал. Э фикир эн Маралевоз, эгенер туркгьо сер гирдуйтге эри гьопуре хуьрд сохде, дороморе э хьэет, у те ебо угьо дироморе, зури-зури мидарав э гьомбор, пэхьни мибу э гъэд эни сер рэхьое челег э дорун гьомбор.

Э дуймуьн руз эз расдиш эз куче е келе сес эн дер гьопуре куфдеи омо ве хьэрой эн е ченд одоми гьопуре векунут гуфдире. Эз сес, гоф энугьо ве ди бу, угьо туркгьо бируйт. Гьопу эдембу жуьмуьсде эз дуьгдуьги ве тепуькгьой энугьо. Оммо гьолинде, муьхькеме гьопу, э лап келе гьилигьоревоз эз дорун сэхд сохде оморобугьо, вокурде нисе оморенбу.

Гьетте сес эн дер гьопуй хьэет э зарбевоз куфде оmore, Марал, эз хьележигери гьемей жендек ю лерзире-лерзире, зури-зури вегирд э хуьшдеревоз е суке одиёле, видовусд дерафд э гьомбор шороби эри пэхьни бире э куьнж энугьо серневерие челег.

Оммо чуй кориге е ченд минут гирошде бэгьдо, дие не сес дер гьопуре куфдеи, не сес туркгьо неомо: е угьо эдембируйт тэгиди сохде э де хьэетиге, жигейге эри рафде, пезде дуборе эри вогошде инжо, енебуге чуйге мешет бисдорут э угьо. Чуйш бисдоге, эзумбэгьдо туркгьо жэхьт несохдуьт дуборе эри дироморе э хьэет энугьо.

Э пенжимуьн руз эз туркгьо э Дербенд дироморе эйло жигей эн полковник эн Бичарахове э хуней эн Марал гирд офицер эн турк. Уре овурд инжо еки эз членгьой «комитет миллети», чуйтам эзи е мегь пушоте Обой шебирор элу овурдебуге э хуней энугьо эри поисде полковник Бичарахове.

Марал э хьисобиревоз, чуйн зен хэйлогьин, тэхьное биё зен, миёсде гьэгьри-Гюси бире эзжире лонгьсуьзе кор эн гьемветани хуьшде, овурдигьо э хуней энугьо мерд кесигере, пезде офицер эн туркире. Оммо Марал чуй кориге турке лап э мигьровуни ве разимендиревоз гьобул сохд э хуней хуьшде. Ижире гьовой эн Марале е ченд себеб бу. Еки эзу себебгьо бу у кор, ки э фикир эн Маралевоз те туркгьо э шегьер дери, офицер эн турки э хуней энугьо дери, эри энугьо саламатини, э хуне, мол энугьо дес зерегор нибу. Эз елойге: те Обой согь бугьо эри энугьо эслогь бешгьэ небу чуй мибуге хунегьо, жигегьо, богьгьой эн шуьвер энугьо, чуйнжи шуьвер энугьо муьрде бэгьдо гьемей энугьо эн «тозе шуьвер» энугьо, эн Обой хьисоб биренбу. Имогьой эз Обой эз дес эн нуьгедигьин куьшде оmore бэгьдо, фикиргьо, гьовогьой эн Марал эслогь е

жирейге дегиш биребу. У имогьой ю хуьшдени ю бу сэхьиб эн богъгьо, хунегьой эн муьрдигьо шуьвер хуьшде. Гьеме келе хунегьо, келе богъгьо бирогоргьоре хуно э шегьер, Марал терсиренбу эз большевикгьо. Туркгьо инжо оморебируьтгеш чуьн истилачигьо, угьо э гьэршуй эн большевикгьо бируьт, унегуьре эри чуь Марални одомигьо дусд ве гьэлхэндчи бируьт.

Бу е коригеш, э хотур комики Марал гьечи э мигьорвуниревоз гьобул сохд э хуней хуьшде офицер туркире. У лап жогьил ве лап рач бу зинде шежуьле хуно. Э тен эню ковре мундир вебу э рангсуьрхие погонгьоревоз ве рангнуьгьрее аксельбантгьоревоз, э сер ю гьирмизине фес вебу э «кекуьлевоз». Добон гьуьндуьре дуразе чекмегьой эню э зонгугьой нуьгьреиревоз эдембируьт гьузгире хуно тов доре. И парталгьой эню гуйге зиьдтеш нушу доренбу рачи ве хубе буй-бухунлуьи шэхс энуре. Екем дуразкимси бугьо сифет эню сипи, темиз, гьовомер бу эн духдере хуно, дуьруьжде чумгьой эню ранг кову бируьт, екем гьэд бируьтгьо гьошгьой эню сие берхите хуно эдембируьт тов доре, екемлей гьолинд бируьтгьо гьислуье ловгьой эню гуйге э ранг гьиримизине бегли ухшеш бируьт. Эгенер э жигей эн фес э сер эню сефги дегирде миомоге, уре диругор е раче духдер, жогьиле гьэрус мидануьсд. Оммо неденишире э и рачи эн жогьиле турк, э у э тигьэтевоз дениширегоре одоми миёфд чуьиге ухшеши э нишон шилоли-гуьрги э и гуьзеле сифет эню, комиреки гье эз суьфдеи гиле дире, сечмиш сохде нисе биренбу: бешгей эн назуке шумоле вини эню скемлей гьэд бу эн шилолире хуно, сипре, дуьруьжде, сигь бируьтгьо дендугьой эню е кем бируне ведироморе звери ченей энуревоз эри одоми гьечи нушу доренбу, ки у э и сэхде, сипре дуьруьжде дендугьой хуьшдеревоз сенгьэш, гьовуреш тилиш-тилиш, тике-тике сохде мидануь. Чумгьой эню гиргине бируьт эн епологьэ хуно. Оммо и чумгьой эню эдембируьт товуш доре эн гисне, темэхькоре, беднефсе хуно.

Оммо и эз буй-бала, сер-сифет рач бугьо жогьиле турк гьемиге лап эз руй олхогьине, мигьровуне ве эдеблуье одоми ве ди биренбу. У гьетте Марале дире, расди дес хуьшдере э сер дуьл хуьшде веноре, сере гьуз гирде, э ширине сес хуьшдеревоз э хуьрметевоз рузэхэйрбу до Марале, огол зере уре «ханум-эффенди».\*

Шефик-пашаре шинохдегоргьо (гьечи нум бу турке) гуьдиренбу бируьт ки бебей энугьо е келе одомини э Стамбул э деревозей эн султан, еки эз ённуьшигьоюни. Дедей энугьо — австрийски зен немцини. У те ебо э бебей Шефик-паша э шуьвер рафде, бири

---

\* «Ханум-эффенди» — гьечи э хуьрметевоз руй биренбируьт э кин зен э Турция, эгенер и зен гьисдиге эз лап гьошире, вегирлуье кифлетгьо, гьумолетгьо.

еки эз зенгьой эн султан Абдул-Гамид II, э гарем энү дегубьо. Уре падшогь эн егьудигьо Шелми милихэ хуно гьозор зен бу. Дедей Шефик-паша э бебей энугьо эз сери хуышде нерафдебу э ённуыши эн султан. Султан и зен-немкаре бэхш дорегу уре эри у е лап келе жугьобдорлуе пэхьникие тапшуьрмиши энуре э келе усдоеи ве фегьмлуиревоз эжиге овурдебу гуфдире. Э тапшуьрмиши эн Абдул-Гамидевоз у кумеки сохдебу э султан эри ебо эз власть тоймиш сохде суьфден везир юре Мидхат-пашаре, пегде э гьэземет э пэхьники тасунде куфшдебу уре. Абдул-Гамид, комики бу гьм султан эн Турция, гьемиге хэлиф, терсиренбу эз везир хуышде ве э чум дире нисе хосденбу уре. Э хотур ижире келе дилег, тапшуьрмиши эн султане веровундеи, Абдул-Гамид эри бирмунде э у келе разименди ве согьбоши хуышдере раче сипре немкаре эз гарем хуышде бэхш дорегу уре, гьечи, чуьтам е одоме е одомиге дорениге бэхш дорениге гьэсб енебуге раче холинче.

Омбаре дусдгьой эн жогьиле офицер турки, хуб эз сифет да-нуьсденбируьтгьо, шинохденбируьтгьо Абдул-Гамиде, гуфдиренбируьт э товун келе ухшешигьой эн чигьрет сифет эн жогьиле Шефик-Паша э чигьрет сифет эн султановоз. Кимигьо гуфдиренбируьт (гьелбет дуй эеки э пэхьники), ки кимвэгьодо Шефик-паша зинде шекуьл эн султан Абдул-Гамиди, расди эзу сипини, очугьи. Оммо эгенер гьечи угьо гуфдирере хуно бугеш, э и е мэхьтеле кор недебу. Шефик-паша эз деде бирегу дуз пенж мегь гирошде бэгьдо дедей энугьо эз гарем султан ведироморе, э хуней бебей

---

\* Абдул-Гамид II султан эн Турция (1842—1918 сс.), эз тэхд венгесде оморегубгьо э 1909 сал э арт эн младотурецки революцияревоз. Песнии салгьой гуьмуьр хуышдере у, бэгьдовой сив се сал падшогьети сохден, гировундебу э дуьсдогьи, эжеки у муьрдебу.

\* Михдат-паша бу еки эз буьзуьрге государственни корсох эн Турция, реформатор ве лап мерэгьлуе, гьэлементе одоме. У келеи везир гьисдики, яратмиш сохдебу парламент ве э 1876 сал э десдин комиревоз тогьин сохде оморегу суьфден Конституцией Турция, е гьэдер кемсохденбугьо власть эн султане.

Михдат-пашаре лап келе хуьрмет бу э гьэрей эн могоьлугь эн Турция. Терсире эз реформагьой энү, эз лап келе хуьрмет энү э пушой хэлгь, султан Абдул-Гамид II, неденишире э у кор, ки у э кумеки эн Мидхат-пашеревоз нуьшдебу э тэхд эн султани, у Михдат-пашере тоймиш сохд эз везири, лов сохд парламенте, дуьсдогь сохде, куьшд омбаре тарафгиргьой эн келеи везире. Хуышдени Михдат-пашаре не домор хуышдере — министр обороной Турцияре, пегде, дургуне хьэшегьо веноре э сер энугьо, дуьсдогь сохде, фирсо угьоре э гьэземет э дуре Таиф (Аравия), комики увэхди бу еки эз колониегьой эн турецкая империя э Ближний Восток. Э и коргьоревозиш хомуш небире, гьэзоблуе султан фирсо э унжо боворине одомигьой хуышдере э пэхьники эри куьшде Михдат-пашаре не домор хуышдере. Военни министре, комики эз жендек э пегьливоне одомире хуно бу, куьшдуьт гьэйбине жигегьоюре хьэл сохде-сохде. Михдат-паша эз жендек е жонсуьзе, одомире хуно бу. Жоллодгьой эн султан уре эз тараф энү е гужуш недире, э асантиревоз тасундуьт.

Шефик-паша гьисмет биренге. У вэхди у чор мегье г1эил э шуьгьэм деде дебу. Оммо мэг1луьм нисди: дануьсденбу ми хуьшдени султан, эдее доре гуфдире эз хьэрем хуьшде еки эз зенгьо-ошнегьой хуьшдере, комики эз ю бордори, дедей эн г1эил ю биё бу? Белки недануьсдеш небу, оммо хуьшдере э недануьсдеи веноребу. Уре белки нисе воисденбу э сер энү омбаре султанзадегьо, комигьоки лап омбар бу э гьумолет энү, бу гене е султанзадейгеш, е принципеш. Гьерки энутьо, эгенер и кор э дес ишу миворомоге, хьозур бу э герек гьисдигьо вэхд эри бурра неки бугьоз эн суьгьде бироргьой хуьшдере, оммо гьемчун эн бебешуре, гьеме бироргьо ве куктг1эмлегьой хуьшдере э тэхд султан эри нуьшде. Ижире хунлуье гьознере эз торих падшогьети эн династией гьумолет хуьшде у хуб дануьсденбу. Еки эз одомигьой эн гьумолет, эн династией энү эри э тэхд эн султан нуьшде, неки куьшдебу гьеме куьнде одомигьой хуьшдере эз тараф бебен, гьемчун буйругь доребу эри батмиш сохде э г1овгьой эн Босфор гьеме бордоре зенгьоре эз гарем бебешу. Хуьшдени Абдул-Гамид вегирдебу тэхд эн султанире э кумеки гьэсдигьо, фитнеигьо ве хункие коргьо сохдеиревоз. Хуьшдени хэлгь эн туркгьо, г1оси бугьо эз бирэхьме рэхьбери Абдул-Гамид нум норебу уре «хункие султан».

Эгенер Марал э келе войге ве мигьровуниревоз гьобул сохдге оморей жогьиле пашаре, оммо нуькер энү Бобои, комиреки Марал гьетте Обой куьшде оморей гене куьнд сохдебу эз хуьшде, дие имогьой нетерсире, лап билбул ве дуьлхуьрд бу эзи кор энү. Гьетте Шефик-паша э хьэёт дироморе, дуьл энү дэгьдэгьэ хурде, шек оморере хуно бисдо. Неденишире э у кор, ки турк лап мигьрову, эдеблуь бу, лов ю гье э мигьровуне хэнде вебу, эз зир комики веде бируьт сипре тов-товие дендугьой энү, оммо Бобои, комики хуьшдере э дес вегирде нисе дануьсденбу, поисдебу ловгьоре гьужунде, дира гирде г1эиле хуно. У э жогьиле офицер эдембу э махьтели ве огьурдомогьиревоз денишире. Эз бэхилиниге э кин эни испогьие, шэхслуье раче жогьиле одоми, енебуге эз рашкиге э кин эн бикей хуьшде, чуьиге и туьрк эри энү шогь-маре хуно оморен<sup>чу</sup> комики эз руй рачи, гьовомери, ранге-ранги, сммо э зир зугьун энү огьу — г1эжел дери. Дуьл эн нуькер гьейсг1эт эдембу лап зэхьмет, сэг1эр хурде: Марал фурмунде оморей, ене-

---

\* Султан Абдул-Гамид гьечи терсиренбу эз келе хуььрмет эн Михдат-паша э г1эрей хэлгь ве гьечи э чум дирей нисе хосденбу уре, ки у хомуш небисдо э у мэг1луьм сохдутьки, у э дуьсдогьи куьшде омори ве гьовре сохде омори гуфдире. Э тапшуьрмиши эн султаневоз мегьит эн везир Михдат-пашаре эз гьовре векеде, сер энуре буррабируьт. Бурра сер везире э гьути ширмови доноре, э руй энү гьути нувьусде: «Японски безек-дузекгьо эз остгьугьой ширмови эри гьезрет султан» овурде омореву эри Абдул-Гамид, эри бирмунде э у, ки келе везир эз расдиш зинде нисди, сокит сохде дуьл энуре, эз елойге у ком вегируь гуфдирез дениширеки э бурра сер эн везир хуьшде.

буге гьейроне хуно бире э мигьробони, эдеблуыи, эз руй обурлуыи, раче томошелуые буй-бала, сер-сифет эн турк, нисе верасире чуь секонелуые одоминиге у.

Дуыл Бобои эдембу лов бире, шивен сохде, билбул бире. Уре гьейсэгІэт лап воисденбу офдонуь э пойгьой эн Марал, минет соху э у, гую: «Гьечи ихьдиборлуь ве мигьробонлуь мебош э и нолоиггэ туркевоз. Гу, хогьиш сох эзу бурав эзинжо э е жигейге эри зигьисде, имуре э жигейму динж бигьилуь. Дуылме эдее шек, гумон сохде — эз бирей энун инжо келе бедигьо мибу. Те гьеле бедигьо небире, гу у инжо непоою...»

Турк нисе дануьсденбу чуь фикиргьо, думитгьо гирошденуьтге гьейсэгІэт эз дуыл эн нуькер эни хуне. Оммо у недире небу, чуьтам у очугь э бирази, нехогьиревоз дениширенбуге э лой энун, эн дуьшмен хуьшдере хуно. И дуьшмени очугь э сиечердее, чупур-чупурие сифет эн нуькер вебу. Оммо уре гьейсэгІэт эзи гьовогьой эн нуькер эни хуне неки гьэгр нисе оморенбу, угьо гуйге эри энун хэндеире хуно оморенбу. Унегуьре эз раче сифет эн жогьиле паше шоре, гьэйгьусуьзе ловхэндеи нисе гирошденбу. У э олхогьиниревоз эдембу евош-евош гешде эри хуьшде э сиро, вози сохдере хуно, евош зере эз герден эн гьуьндуьре чекмегьой хуьшде э дес ю дебугьо гьирможевоз, дуьм комики рангиберанги бу. Гье и вэхди денщик энун, е сиечердее дануьшдее эскер, комиреки сифет эн кентуьсдони вебу, эз кул эн гІэсб офицер не гІэсб хуьшде егьертгоре вегирде, кемергьой энугьоре покурде бэгьдо, сер гирд чигьой эн Шефик-пашере эри диловунде э Марал эри энун хьозур сохдебугьо утогь, гьемин гье э у утогь, э комики те у зигьисдембу полковник эн Бичарахов. Денщик э чигьой эн Шефик-пашере э диловундеки, Марал э Бобои денишире, э чумгьоревоз бирмунд э у э денщик эн офицер кумеки соху гуьфдире, чигьой эн Шефик-пашере эри диловунде, оммо гІингьо гирдебугьоре хуно Бобои, гьогь поисде э жигей хуьшде, гьич хуьшдере э дирекиш невоно, неденишире э у, ки Марал эзи кор энун бирази мибу.

Денщик эн офицере Марал декуьрд э у тогьле э сиро, эжеки Бобои зигьисденбу. Бобои лап дуьлхуьрд, мотьбул бире, гене вогьш э куьгьне жигей хуьшде эри зигьисде, э ён товле, э ён гІэсбгьо.

Марал суьфдеи гиле э гІуьрмуьр хуьшде диребу зинде турке э чум хуьшдеревоз. Ижире гьечи мигьрову, э хуььрметевоз, эдеблуьиревоз гоф сохдеи эн Шефик-паше э юревоз гуйге эслогь ведекирд эз дуьл, фикир энун терсгьо, гьяежонигьой энуре, э дуьл энун оморенбугьоре э гьэд эн суьфдеи дуь-се руз туркгьо э шегьер дироморенте. Э гьэриш эни дуь-се руз туркгьо э омбаре хунегьо дерафде, таланигьо сохде, э кими гІэруьс-дуьхдергьо гуж сохдеи гьейсэгІэт эри Марал гьечи омо, ки угьоре е пара эскер-



гьой турки сохдет эз келегьошу эхберсуыз, ихдиёрсуыз. Дие имогьой ужире коргьо гьич нибу.

Марал гье эз суьфден сэгIэт вохурден э жогьиле туркевоз э дуьл энунекн е гумониш не омо эри энуну, у бовор сохд эзи раче, жогьиле, мэгIрифетлуье одоми э у гьич е локош, е заралиш нирасуь, унегуьре шохьонгум Шефик-паше э эдеблуьиревоз огол зеки «хонум-эффендире» диров гуьфдире э утогь ю «сифрой юре эри ярашуьгь сохде», Марал э у лап бовор, ихдибор сохде, е кем э хуьшде демунде бэгьдо, гьобул сохд теклифи энуре.

Э сер вераюнде суьфре э нуьшдеки Шефик-паше диеш хуб, гIэ-суьлменд, лап мэгIрифетлуье омо эри Марал. Унегуьре у е гофиш негуьфди Шефик-паше эз э сер суьфре эз пура гирфинкей шороб екемлей шороб декирджи э пейлей энуну, егIни «меджлуьсе» эри гирде». Шефик-паше э сер суьфре эдембу зарифате гофгьо, ихдилотгьо сохде, дуьл «хонум-эффендире» эри веровунде. Веди бу, ки гоф, ихдилот сохде уре хьэз оморенбу. Оммо е доне усоле, гIэйбижерие гоф, ихдилот, комики лоигь нисди эри гушгьой эн хьэемени эн, «хонум-эффенди», у негуьфди. Офицер гоф сохден-бугеш э зугьун хуьшде, Марал, гьеме гьемватанигьой хуьшдере хуно, зигьисденбируьтгьо э Дербенд, э е шегьер, дануьсденбу зугьун тюркире.

Э тен эн Шефик-паше гьейсэгIэт сипре, хуб ути зере руйшени вебу, э пойгьой ю нерме гьирмизине дарбигьо. Э сергьови хуне эдембу келе лампай нефти суьхде. Товуш энуну амбариш э минжи хуне, э сер эн стол, суьфре дешенде оморевугьо жиге, келе бу. Бирден э дуьл эн Шефик-паше е гоф оморере хуно, поюнд ихдилот-гоф хуьшдере, нимелит пура пейлей шороб э дес ю дери, комики эз товуш лампе гуйге эдембу ригаз шенде, тигьэтлуь, э суьпле хэндеревоз денишире э Марал, муту:

— Гьо, ханум-эффенди, гуит, э хотур худо, чуь одомини и кук, и нуькер ишму? Эз гьовогьой энуну эдее диренуьм, у мере е рашк эдее сохде э ки эн гуьзеле бикей хуьшде, енебуге у... большевики?

Офицер и гофе пуьрсиренбугьо вэхд э товун Бобои, не Шефик-паше, не Марал эри хуьшде думитиш несохдебу, ки нуькер, э товун комики гьейсэгIэт гоф веремогьо, гье э и вэхди, жигей хуьшдере гьишде, комики гьейсэгIэт эри энуну тенге, тасире ве сегьмлуье зиндоне хуно омо, ведиромореву э хьэёт. Эз битоби, билбули, гьаежони дуьл хуьшде у эдембу серсуре хуно гешде э гьэд эн хьэёт, э гьэфес гьовуни дешенде женевере хуно. Песде у э пенжерей утогь эн Шефик-паша товуше виники, комики э куьнди хисиренигьо утогь эн Марал бу, у омо э минжи хьэёт э зир тутдор э ён чол гIови вебугьо. ГьейусэгIт бежид назуре хуно верафд э сер дор. Эзинжо у, нефесе сэхд гирде, дуь чуме э тигьэтевоз, дуьшмениревоз, гьаежониревоз доно э лой пенжере. Э товуш эн

лампе эз пенжере лап хуб веде бируйт шоре, олхогыне сифет-гьой эн бикей эн у ве эн офицер-турк. Эз сер дор у эдембу дире, чуьтам э гоф сохдеки жуьмуьсденуьтге, хэндуюьсденуьтге ловгьой энугьо, гьер лой хурдеи, дес жумундеи энугьоре. Э угьо денишире, эри Бобои гьейсэгIэт гьечи оморенбу, ки у э сер лигей дор-нэгI, эн гьембиз эн суглегьой гIэтош нуьшди, эдее кобоб бире.

И пуьрсуюш офицер, неденишире э у кор, ки гуфдире оморенбу э зарифаткимсире хуно, Марале терсунд, у гьеебо гоф офде недануьсд эри жугьоб доре. У э дуьл хуьшде лап гIоси бисдо гьейсэгIэт эз Бобои, комики лап вэхьши, гьэьрегун дениширенбу э Шефик-паше, эзу товуне имогьой э дуьл энугьон гумон омори Бобои большевики гуфдире. И э пушой чум офицер, эн туркгьо келе тэхсири бу. Оммо Марал чуьтариш гири хуьшдере э дес вегирде, э гужевоз лове э хэнде веберде, мугу:

— Ишму чуь гуфдиренит, огьо, уре эз большевикгьо гьич хэбериш нисди. У лап жовони, гьемиге гьоггэ-овоме одомини. Уре э екиревозиш гIэре, куьнде дусди-шинохи нисди. Эз гIэсбгьой хуьшдере бэггэй, бовор сохит, уре э гьичиревоз кор нисди.

Шефик-паше бовор сохд э гофгьой эн Марал. Гьовой эн нуькер гьечу бирей ю оморенге, ведини эзу кори, ки у э хьисобовоз э дуьл хуьшде имидсуьз ошугьы э гуьзеле бикей хуьшде, песде, ведини, эз расдиш эз эгьуьл кутэхьы, овоми. Гьечи фикир сохде эри хуьшде, Шефик-паше э ёр овурдки, чуьтам могьбул, бирази, бедбэхд буге сифет эн нуькер ве чуьтам у шефд, хуни-хуни дениширенбуге э ю, ловгьоре дуллу сохде, дира гирдере хуно, гьеебо келе-келе шори сохдере хуно хэндуюьсд эз дуьли.

Эз шороб эз вемундеи чумгьой эн Шефик-паше хисире гирденире хуно бисдоруьт. У кемер хуьшдере э дивор стул ведоре, десе э лэгIэ веноре, лэгIэпаре сохд. Маралниш виники вэхди эри вэхьшде, ведерафде. У эз жигей хуьшде жуьмуьсд, Шефик-паше э лов хэндеревоз дениши э е кем гьирмизи биребугьо сифет эн зен-сэхьиб хуне, сере жумунде, э чумгьоревоз э лой карават бирмунде, мугу:

— Эри, вэхиз, сер-тен туьре веке, дегешдим эри хисире.

Эри Марал суьфде гьечи омо, ки турк гуйге де гофиге гуфди, оммо ю е жирейге вераси, э сер неофде, енебуге небелед зарифат сохди. Унегуьре у гьеебо бовор несохд и гофе у эз расди гуфдири. Турк виники жогьиле зен э мэхьтели домунди, гIэжоиблуьре хуно денишири э ю, гьошгьоре огьурдомогь сохд.

— Эри, эри, хонум,— сере жумунде, и дес э сер эн гоф «ханум» гоф «эффенди» невеноре э эдеблуьиревоз, оммо э тигьггэ-тевоз гуфди у.— Ме егIэлмише гоф негуфдируьм: тен ишмуре векенит — дегешдим эри хисире.

Марал эзи гофгьой энугьон хуьшдере вешенд эз некуми терсуьгьо одомире хуно, гьутинегьой энугьон диеш гуне доруьт эн силлегерме

сохугьо одомире хуно, дуьл энү верафд-фурамо. У чумгьоре келе сохд, дениши э мэхьтели ве серсуниревоз э турк. И хьэсуйзе теклифи энү, песеде гуфдире омогьо э ижире олхогьине, гьемине жиреревоз, гуйге эри е суке кор гуюгьоре хуно, гьечи сэхд кори сэхд э дуьл энү, гуйге у гьейсэгIэт эз хуьше миравге. «И чүь кори!.. Гуйге ме эри энү е эз сер-рэхь ведерафде зенуьм, унегуьре мидануь у э меревоз гьерчуь юре воисд эри сохде?!» — мугу Марал э дуьл хуьше. Номус, хьэе, гIэйб, хьэеменди зени энү — гьеме вэхьшдуьт э дуьл энү э гьэршуй эни нолоигьэ гофгьо ве войгей эн офицер. Гирошд е-дуь минут, кейки Марал э лерзире энгуьшдгьой хуьшдеревоз гирде эз куьнж эн стол, неофдону гуфдире, вэхьшд э пой, песеде эз гьаежони дуьл хуьше э лерзире севоз мугу, сере тик гирде:

— НэгI нэгI! И биренигьо кор нисди! Мере нисе воисде!..

Шефик-паша сере жумунде, э пиениревоз хэндуйсд келе-келе, гьечи и гофгьой зен-сэхьиб хуне эри энү буше, негьогьие, руьхшендие гофгьоре хуно омо. Песеде у бирден хэндэй хуьшдере поюнде, э уьткемиревоз сере тик гирде, дениши э Марал э тигь-гьэтевоз, мугу буйругь дорере хуно, лове э шефде хэнде веберде:

— Ханум! Дануьсде бошит, ме э кумеки худоревоз ве огьойме султановоз оmore гьуногь нисдуьм э хунейтуь,— мугу у келе-келе э уьткемиревоз, песеде э темэхьэвоз дениширенбируьтгьо ковре, тиже чумгьой хуьшдере гьуьжунде, мугу: — Ме — бесгьунчинуьм, офицер эн бесгьунлуье лешгер туркинуьм, туь, хонум, эн ме — ширине овме зиьдте нисди! Унегуьре воисде-невоисдейтуь эрме гьичиш нисди.

Марал гьейсэгIэт энжэгь э дуьл хуьше э сэгIэр хурдеиревоз вераси, ки и гьечи эз руй мигьровуни, эдеблуьи эни эз де хориге оmore офицер эз расд, эз дуьли небу, у лигьоб бу, бирэхьме, вэхьшие хоснет энуре пэхьни сохдембугьо, и вози эн назу бу э мушевоз э гьэрмэгь ю офдоребугьо. Имогьой, кейки и раче, непогьие жогьиле одоми, мэгIрифетлуь, хубе суьгьбетчи, дуьлшоре зарифатчи шендки эз сифет хуьше и лигьобе, у э пушой чум эн Марал садпойне бед ве секонелуь ве ди бисдо эз куьше оморигьо Обой, шебирор ю, у эз руй битоб, сабирсуьз, кубут, туьнде, гIэтоше одоми бугеш. Энү чүь э дуьл ю дебуге, гьеме э руй ю вебу — хуби, енебуге зобуни.

Эз терс, гьэгьр, гьаежони дуьл хуьше гьейсэгIэт гуйге десгьо-пойгьой Марал кут, манжар бесдере хуно бисдо. У э хьэлегьигери ве э минете хуно денишире э турк, хьэрекет сохд эз гьемей гьувот хуьше эри вирихде эз пушой чум энү. Оммо офицер эн «бесгьунлуье лешгер» верасире гьовой энуре, эзу чуме невегирде, эз зир лов хэндуйсде, юш гьебирден вэхьшд. Гьетте Марал пой норе э лой дер эри ведерафде, Шефик-паше «ширине ов» хуьшдере эри рэхьо недоре, гьеусэгIэт ведебурри пушой

энуре. Эз душгьой энү сэхд гирде, у э гужевоз куьнд овурд урс эз хуьшде э зир эн товуше лампе, ловгьой хуьшдере вено э сер ловгьой энү. Турк гьечи, жоггиле зене эз гьэл хуьшде рэхьо педоре, э гужевоз кеши уре э лой эн карават, комиреки руз Марал вечире, хьозур сохдебу эри энү, венгесд уре э зир хуьшде..

Бобои, комики дуьл юре берде-берде, дениширенбургьо эз сердор э лой энугьо, и коре э чумгьой хуьшдеревоз винники, чумгьой энү лилову хурд, эз сер ю черх рафдере хуно бисдо. У гуйге овчи зере гьуше хуно э тасире нолеревоз офдо эз дор э хори..

Сэбэхьимуьн Марал эз хов хэбер биренге, Шефик-паша э хуне недебу. У эз жендек лап хэсде, нечоггэ хуно бу. Гьовой ю лап тэхьл, гурунд бу, гьуьлом э чум ю небу, эз жун хуьшде визоре хуно бу. У сере э сер болуш чарунд э лой пенжере эри дануьсде чуй вэхдиге гьейсэггэт э буру. Пиёне Шефик-паше те пушой сэбэхь уре хисире негьишдебу, омбар инжимиш сохдебу. Руз дегирде бу, гьово нем вечирере хуно бу, унегуьре Марал недануьсд: эз пушой сэбэхь эйло у омбар хисире домундиге э хьэлов, небуге кем. Бирден э фикир энү омо, те турк э хуне вегошде, вирихуь пэхьни бу э хуней эн гьерки бисдо, эн еки энү бие зенгьо, эри энү нун буржундембириуьтгьо, партал шушденбириуьтгьо. Гьер кифлет гьобул мисохд, пэхьни мисохд уре э хуней хуьшде эз залуме эжноб, эгенер Марал руй мибисдоге э ки энугьо.

И фикир э дуьл энү омоки, гуйге гьеебо хэсден энү гирошдере хуно бисдо. Марал бирден вэхид эз хьэлов, зури-зури парталгьой хуьшдере вокурде, ведиромо э сиро, песеде гене э дуьл ю е фикириге оmore, отказ сохд эзи войгей хуьшде. У терси, хьиллее, бирэхьме энжоби, усуьз хуне жигей юре талан несоху, э дес хуьшде невегируь, эскертгьоре э хуне-бе хуне дешенде юре эри гешде, песеде офде юре, зере некишуь.

Марал омо поисд э ён михьэжр эн сиро, дениши э хьэёт, э чумевоз гешд Бобоире. У э хьэёт веди небу. Эз елойге у шори сохдере хуно бисдо гьейсэггэт не ю Бобоире, не Бобои уре невини гуфдире. Оммо Марал гьеле нисе дануьсденбу, ки чуйтам шову Бобои э сер тутдор хьэёт верафде, эзунжо дирегуге гьемере чуй гирошдге шову э гьэрей Шефик-паше ве бикей ю. Э минжи хьэёт поисдебу денщик эн Шефик-паше. Денщик лове э хэнде веберде, э дес хуьшде е тике гьовурмее гушде гирде, поисдебу э пушой э сер энү хьов-хьов сохдембугьо сег эн хьэёт. Сер ебо у эз сег куьнд оmore, гьуз бире, чепи десе кешире э лой энү, уре эри тимор сохде, сег хуьшдере песово доренбу, нисе гьишденбу э хуьшде дес зере. Марал эдембу дирe, чуйтам эскер сере жумунде, гуфдиренбуге э хоши ве серкуширевоз э сег, гуйге э одоми, недане гьэил гуюгьоре хуно:

— Ай, ай, ай! Туь гьечи бед эйчуьни? Меки зритуь зобуни нисе сохденуьм! Мере воисдени туьре е тике эзи э дуьмберевоз гьовур-

миш сохде лезетлуье гушд дуьм, э хуьшдеревоз овурдемгьо. Хурдиге мидани, чуй лезетлуьниге, пех-пех!..

Бирден эскер сере тик гирде, вини Марале э сиро. У г1эйб оморере хуно хэндуйсде, шенд тикей гушеде э пушой сег, ю куйнд оmore э ён мнхэжер эн сиро, э хуьурметевоз рузэхэйрбу доре Марале, мугу:

— Мере э дигь, э хуне сеги, гье э и сег ишму ухшеш зере, гуйге угьоре е деде зендиге. Ме уре кучукле вегирде, келе сохде-бируьм. У э ме гьечи вогосиребу, г1эйл э деде вогосугьоре хуно, — песини гофгьоре э гуфдиреки, денщик эн Шефик-паше, сере гьуз гирде, жумунд, диеш г1эйб кеширере хуно, хэндуйсд, ох кеши.

Марал вераси, ки жогьиле эскер эдее дорихмиши кешире э гьэриби эри хори, хуне жигей хуьшде. Уре белки э хуне жогьиле зен мунди, енебуге севгили.

Марале гьейсэг1эт дуьлиш небуге эри гоф сохде, дуь бэхшиш гьечи эри хотур немундеи, пуьрси эз эскер уре чуй нумиге, ченд салиге у имогьой эз хуне ведироморе. Эскер гуйге шор бисдо хонум э юревоз гоф сохдки.

— Мере, хонум, Мехмед нуми,— мугу у, песде г1эйб оморере хуно лове э хэнде веберде, мугу: — Ме гьедеш эн имогьоине султан имунуьм — Мехмед. И се сали ме эз хуне ведироморе, се сал.— Мехмед е минут гоф хуьшдере поюнде, сере думутлуь фушенд, белки э и туьтем э ёр овурде дигь, ватан хуьшдере, эри дуьл ю г1ээиз гьисдуйтгьо одомигьоре, мундетгьоре унжо. Песде у э дуьл ю е гоф оморере хуно, мугу:

— Хонум, чуй гьурлугь ишму бисдоге э хуне, э хьэёт, енебуге э базар рафдени, чи овурдени, э сер чумгьойме, гуит, ме гьемере мисохум эришму.

Марал э разимендиревоз сере жумунде, мугу:

— Согь боши, Мехмед, мере гьурлугьтуь герек бисдоге, ёгьин э китуь руй мибошум.

Эз расдиш, войгеш-невойгеш, е-дуь руз гирошде бэгьдо, чорей эн Марал небисдо, у сер гирд э Мехмед кими тапшуьрмишигьой хуьшдере эри доре, иллогьки э базар рафде, чи восдоре овурде эри хуне, эри хурде, чуйнки э Бобоиревоз эри гоф сохде гьейсэ-г1эт лап четин бу.

Бобои у шев эз дор офдоре бэгьдо, бегьдовой е ченд минутиге э хуьшде диromo. Оммо те пушой себэхь у гье э у дегешде жигей хуьшде, э сер бирэхьне хори мунд. Гьемей жендек эну эдембу дорд доре, гуйге уре э туморе донорет, э тоёгьигьоревоз куфде, хэхэ сохде. Оммо дорд дорей унгьэде уре зэхьмет нисе доренбу, чуйтам зэхьмет доренбуге шову у эз сер дор, эз товуше пенжере дире «томошей» эн э г1эрей бикей ю нен турк биребугьоре. Ким-вэг1до и «сегьне» эри эну беде хове хуно оморенбу.

Оммо у лап хуб дануьсденбу, ки, эри бедбэхди энү, и беде хов небү, э эври бире муьгIуьжуьзе кор бу. У гье э суьфдеи сэгIэт гьетте дире Шефик-пашаре э дуьл хуьшде шек, гумон сохд у секонелуье одомини гуьфдире. Оммо е у тэхсири ми эри энү шову биригьо кор? Уре гьейсэгIэт эзи товуне фикир сохде нисе воисденбу. ГьейсэгIэт гьеме гьэгьр, хуьрш энү э сер эн эжнобие офицер бу — тозе ошней эн бикей ю.

Энжэгь пушой себэхь лап сэхд хиник бисдоки, у сер гирдки эз хиники лерзире, э гужевоз межбур сохд хуьшдере вэхиде эз сер хори, пенжей чепи десе э сэхд дорд доренбугьо жигей хуьшде веноре, ленге-ленг диromo э торике бугьунтие утогь хуьшде, парталгьой хуьшдере эз тен хуьшде невенкенде, дегешд э сер тэхче.

Руз лап эз пишнеи гиросденге, Марал виники, Бобои эз себэхьэвоз егилеш веди небири, эри чи хурде не омори, у э е лугьонде бушбогь эз ди эри Шефик-паше сохдебугьо Iюш кишмиши э е ние нун тонуиревоз берд эри энү. Марал, гьелбет, нисе дануьсденбу, ки эз шовуне кор энү э Шефик-пашеревоз нуькер-ошней энуре хэбири гуьфдире.

Марал дер утогь эн Бобоире вокурденге, у дегешдебу куте хуно э сер хьэлов хуьшде, дуь чуме доноре э 'сергьови эн утогь. Гьетте Марал диromоре, у э гьэгьревоз чаруьсд э сер шуьгьэм, сифет хуьшдере э гьэд болуш пэхьчи сохде, руй эн Марале невинуь гифдире. Марал е минут поисд э пойней тэхчей энү, песде бушбогьэ э нуевоз но э сер эн чуькле саре пенжерелей энү, диеш дуьлхуьрд бире ведерафд, е гоф несохде.

Энжэгь э сенмуьн руз Бобои соере хуно веди бисдо э хьэет. Эзу руз овло согь е мегь те туркьго эз Дербенд рафде (дузире гуьфдиримге — вирихде теретэгIди), Бобои дуь гиле э руз ю мидиromo э хуне, е тике нун э гьофуневоз вегирде эри хуьшде, э Маралевоз е гоф несохде, мирафд э утогь хуьшде, енебуге ми нуьшд э ён гIэсбгьо, могьбул, сергерде хуьрде хуно.

Шефик-паше согь руз э хуне нисе дебиренбу. Кими шевгьо у лап дир оморенбу э хуне, лул-пиён, лойлум хурде-хурде. Э ижире шевгьо, у сэхд пиён оморенге, э Марал хьэлово нисе биренбу, дануьсденбу, ки у эз сер шевевоз дер хисиренигьо утогь хуьшдере сэхд сохде, хисири гуьфдире. Расди е-дубо у гьечи шев лап дир оморе, пиён-гьэмбер, жэхьт сохдебу эри шишире дерафде э утогь эн Марал, оммо Мехмед э гуж-хушевоз уре гирде, парталгьой юре векенде, э жигей ю, э утогь ю дегердунденбу эри хисире.

Марал суьфде гьерчуь дануьсденбу Мехмед э хотур эн огьой хуьшде Шефик-паше гьечи хуьрмет гирде юре чуьн ошней энү. И кор эри энү хуьрди, элчгьгьире хуно оморенбу. У песде оморе-оморе вераси, ки эз расдиш и соводсуьзе кук кентуьсдони омбар дуьлтемизе, тевзуьле, хуьрметгире одомини.

Е гиле нимешев Марал э хов дери киниге эз куче дер гьопуре сэхд кифде-куфде, «Марал! Марал!» огол зере-зере эдембу хээр ой сохде. Шефик-паше гьеле неоморевбу. Кими шев у эслогь нисе оморенбу, гье э у хурде, гешде жигегьо унжо мундембу те себэхь. Оммо денщик шевгьо э рэхь энү чум доноре, нуьшде поисдебу э сирой эн хуне, пес-песоеки папрус кешире-кешире эз битоби хуьшде: белки огьой ю омо ведиромоге. Мехмед эз куче сесе шиновусде, туьфенг хуьшдере вегирде, зури-зури омо э ён гьопу, пуьрси:

— Кини? Чувь воисде?!

Эз песой гьопу гьейсэг!эт е келе ноле зере, лово хосдере хуно сес омо:

— Гьэдйтуьре вегиром,— воку дер гьопуре, ме гьейсэг!эт э туь мугуом.

Мехмед э расди дес туьфенге сэхд гирде, э чеппи десевоз вокурд дер гьопуре. Э лэг!эй гьопу э торики шев поисдебу е денуьшдее келе мерд, сипре дуразе рушгьо, э теню сие гьобо вери, э сер ю килэхь. Чигьрет сифет энү э торики унгьэде очугь вединеbugеш, оммо ведине бу, гьаежони, битоби энү. Келе мерд гьетте эскере дире, десе э сине веноре, э минетевоз мугу:

— Хэлефме, э хотур худо, э ме бэхшлемиш сох, ишмуре шевнимешев эри инжимиш сохдеи. Мере де чорейге нисди. Эз звер худо, эз зофру ишму э ме кумек небисдоритге, хунейме хэреби.

Сес дер гьопуре, песеде сес гофе-гоф эн келе мерде э Мехмедевоз шиновусде, эз хуне, шол э сер дери, зури-зури омо раси э лэг!эй гьопу Маралиш. Марал гьетте дире келе мерде, шинохдуре. Уре Шишет нум бу, э звер кучей энугьо зигьиденбу. Келе мерд гьеми куьгьне богьбон бу, гьемиге хэретчи. Эз боглей хуьшде хэвлет бирембугьо вэг!дой энү, у эри сэхьиб богьгьо эри онгур жарунде новгьо гьуьч сохденбу эри э дуразе туморе онгур жарунде, шире сохде. Ошир Килэхь Лугуи согьинде, у эзи келе мерд е ченд нов восдоревбу.

Келе мерд гьетте Марале дире, эзуш бэхшлемиши хосде, мугу:

— Гьэруьсме эдее дерд хурде, келе зэхьмет кешире, г!эиле зенде нисе дануьсде. Рафдем эри момуй энү, оммо мому муьрдере э герде вегирдени, эри оmore, г!эиле вегирде э герде нисе вегирде, эдее гуфдире, пери шев эз ки е зенде зен э оmoreки, уре патрулгьой эн туркгьо кем мундебу зере куьшдени, ег!ни, э буйругьи комендантевоз шев гьэдэгьэи э куче эри гешде. Мому неомоте г!эиллеш, г!эруьсиш эз дес миравт. Дануьсденуьм э хунейтуь турк-офицер поисди, оmoreм, э ме е кумеки сохут, момуре э ки г!эруьсме эри берде.

— Ата! — гье усэг!эт келе мерд гоф хуьшдере верасдки, мугу Мехмед.— Ишму олхогьин бошит. Кешит э меревоз, бирмунит

хуней эн момуре, ме уре согъ саламат эз хуней энү ведировунде гье гьечу согъ саламат э хуней ю миёрум мирасунум гьич эз сер энү е муйлеш неофдоре.

Келе мерд сере э гьово тик гирде, дуь десе э сифет, э рушгьой хуьшде кешире, мугу:

— Худо рази эз ишму! Худо рази эз ишму!

Мехмед вогошд э хуне энжэгъ себэжь биренки. Гуьзгьулогъ хисиреbugьо Марал, гьетте у дер гьопуре куде, омо вокурд дер гьопуре эри энү, шори сохдере хуно эзижире кор эн Мехмед, пуьрси:

— Гьери, гьеме хуби?

Мехмед гоф несохде, сере жумунд. Марал гьейсэгIэт э сифет энү хуб денишире, мивини, сифет энү эз согъ шев нэхисирен, неки зерди, вомундеи, у могьбуле хунои. Песде эз хьэёт э лой сиро э омореки, Мехмед гуфди чуй бириге: зен э келе зэхьметевоз, четиниревоз зенди. Хьол эн зен усолиш гьисдиге, у зинде мунди, оммо гIэилле, кукле пушой зенде оморе, э герден ю руруй величире, тасири муьрде. Эгенер э вэхди ю э ки эн дерд хурденbugьо гIэруьс мому мибисдоге, гIэилле нимуьрд.

— Дануьсденит, хонум-эффенди, чу гуфдиге пире мерд, хуьсуьр эн гIэруьс, э у мэгIлуьм сохденге, ки гIэруьс ю согъ мунди, оммо гIэил муьрди? — денишире э лой эн Марал э мэхьтеле ве дуьлсхуние сесевоз мугу Мехмед.— У десгьоре лов сохде, сере тик гирде, гуфди: «Бигьил и гIовунсуьзе гIэилле, невейме, песини гьурбуни бугу эни нэгIлетлуье довгIо. Бигьил э хотур эни гIовунсуьз муьрде гIэил худо рэхьм венгенуь э дуьл эн хэлгьгьо э ки дуь еки, э и пенж рузине гIуьлом зигьуьт э шолумиревоз, хун дуь екире тигьи несохде, терс, хьэлежигери, дуьшмени, нэхогьи недануьсде...

Марале оморе-оморе лап эдембу хош оморе эз саламате ве жуьргIэтие хосиет эн Мехмед, эз рэхьмедуьли ве тевзелуьи энү. Эз гьовой энү, эзу е шуькеетие гоф нешиновусдеки э товун хьоким хуьшде эн Шефик-паше Марал эдембу дире, ки у эз руй хуььрмет гуьрденигеш огьой хуьшдере, гьер буйругъ юре томом сохденигеш э дуьруьсдиревоз, оммо эз дуьли ние хосде уре. Марал гьерчуь дануьсденбу, ки и гьечи эз дуьли нехосдеи денщик хьоким хуьшдере, э хьисобовоз, эз товун усоле хосиетгьой эн Шефик-пашаи, у эри холисе мисурму лойгъ нисдигьо коргьоре сохде гуфдире: шороб хурде, пиенискеи сохде, э беднефсиревоз зигьисде, ю эзу омбаре инжимизишгьо дире. Песде Марал дануьсд, ки себеб эни нэхогьи эн Мехмед Шефик-пашере диеш лугьондтеи, гужлуьтеи.

Е руз Марал гIэдотиней хуьшдере хуно нуьшдеху э зир тутдор э ён чол э сер дуразе тэхде, эдембу эри ебонжэгьи хуьшде русму бофде. Гье и мэхьэли Мехмед эдембу эз чол э бедирере-



воз глов вокошире, декуърде глове э ён чол бугьо келе дуразе ченэх тэхдеи песеде глэсбгьоре эз товле эри ведировунде глов доре. Глэсбгьой энугьо э е товле дебируът э глэсбгьой сехьибхуневоз.

— Мехмед, — чуме эз бофдение гьуигьгьо невегирде, мугу Марал. — Гьери гу, туьре э хуне зен енебуге севгили гьисди?

Жогьиле эскер и пуьрсуьш эн Марале шиновусдки, бедирей глове э ченэх недекирде, но э хори, фирегье сие гьошгьой хуьшдере домогьлуь сохде, чуькле чумгьой хуьшдере э сие берхитлуье мижегьоревоз гьуьжунде, э хуьшде демундере хуно поисд, песеде э Марал денишире, лове э могьбуле хэнде веберде, е ох ведешенде, мугу:

— Бу мере лап дуьлме хосденбугьо духдер-севгили, хонум...

У душгьой хуьшдере э мэхьтели домунде одомире хуно вешенд, поисд гоф несохде. Марал эз зир чум дениши э сиечердее сифет эну, хьэрекет сохде уре э гоф эри овурде, пуьрси:

— Бу! Имогьой чуь бири севгилитуьре?

Те ебо э гоф Марал жугьоб доре, Мехмед вегирд эз жигей ю пура бедирере, декуьрд э ченэх, тие бедирере э сер михьэжер эн чол норе, э Марал денишире, десе фушенде, ох кешире, мугу:

— Э-э-эгь! И е келе гьозие-гьэдери эри гуфдире. Биригьодие бири...

— Духдер э хьисобовоз е кукигере соймиш сохди, енебуге дуьлтуь эзу вогошди, хуьрд бири? — пуьрси гене Марал, воисде юре э гоф веровуну жогьиле куке.

Мехмед гуйге э уревоз рази бирере хуно хуно, сере жумунд, чуькле чумгьой хуьшдере сэхд сохд, поисд е минут гоф несохде. Веди буки, уре эз расдиш е сур гьисди, комиреки у жуьртгьэт нисе сохде эри гуфдире. Бирден жогьиле эскер юш недануьсд, чуьтам бисдоге и кор,воисд юре эри эни раче, рэхьмедуьле, эз гьисмет хуьшде яралуь гьисдигьо бике, гуь эри эну сур эн дуьл хуьшдере, комики хос небирение яраре хуно домунди э дуьл эну. Э и метлебезов у куьнд омо эз гьирогь эн тэхде-куьрси, э гьяежони ве эдеблуьиревоз, руй бире э ки Марал, мугу:

— Хонум-эффенди, глэмел миёвге, ме нишуьм э и гьирогь э кишму, ихдилет сохум эришму сурмере.

Согь е сэтгьэт жогьиле турк, ченд бо сес ю, сифет ю дегиш бире э гоф сохдеки, ихдилот сохд гьозие-гьэдери эн бэдбэхде муьгьбет хуьшдере эри Марал.

Эз гофгьой эн Мехмед Марал дануьсд, ки кифлет эну: бебе, деде, дуь чуькле бирор ве дуь чуькле хэгьер эну зигьисденуьт э дигь, комики е си верс дури эз Стамбул — столицай эн Турция. Дигь энугьгьо гьисди еки эз дигьгьой эн бебей Шефик-паше — Сулейман-паше,

Э вэхд гьеминон, иллогьки э песини салгьо, Сулейман-паше

э кифлет хуышдеревоз инжо оmore эри зигьисде, эжеки уре э минжи эн е келе богъ дуь тебэгъи шишехонен, хьомуми э э мармардеш кешире хъэвуьзевоз. Бебей эн Мехмеде хори нисди. У э гьемей кифлет хуышдеревоз согъ сал э и богъ эн бебей Шефикпаше зигьисде, гъэреул сохдени богъ, хуне жигей энуре. Сулейманпаше гьеминон оmoreнге э дигъ эри рэхъэти сохде, бебедей эн Мехмед э гьемей кифлет хуышдеревоз эз себэхъ те шохьонгум гъурлугъ сохденуьт Сулейманпаше не кифлет юре: чи сохденуьт, чи доренуьт, симовор веноренуьт. Ковхой дигъ гьер себэхъ э вэхдию эри кифлет эн паше овурде расундени тозе шир, гъэсел, гушд, гъэймэгъ — гьеме чуь герекиге. Гьер сал у е жотыле духдере эз дигъ тогъин сохдени э кумеки эри кифлет эн Мехмедигъо эри гъуллугъ сохде хуней Сулейманпашере.

Хуышдени Сулейманпаше е хьофдод сале огыле мерди. Уре кими келе, лап девлетлуье пашагьоре хуно гарем юни — хьофдзени. Оммо неденишире э огыле салгьой хуышде, чум энугьелеш э раче духдэргьо, зенгьой кес дери.

Эзи чор сал пушо те дуь мегъ довго сер гирде Сулейманпаше оmoreнге э имениехуышде, ковхо эри кумеки эн кифлет Мехмет дореду е духдер эн дигъ энугьоре Алмаз гуфдиренигьоре. Э гуфдирей Мехмедовоз духдер эз расдиш алмазе хуно эз рачи эдэмбу товуш доре. Ковхо уре э гьосутевоз фирсоревуге э хуней эн чумшуре паше, небуге, и дес нубот э кифлет бебей Алмаз буге эри кумеки сохде э ишу, уре Мехмед нисе дануьсде. Э и вэхд гьеминон Мехмед не Алмаз эеки э кор сохдеки, дуь эеки дусд бирируьт. Угьо э вогьней эн тут, бэгъли, мишмиш чире эри хонумгьой эн паше, енебуге эз билогъ тозе глов овурденевоз э сэгъэргьоревоз мимундуьт э еки э богъ, э ён билогъ, шори мисохдуьт дуь эз еки, дуьл екире эри еки очмиш мисохдуьт, шовго мидорут дуь екире те гуьмуьрлуьгъ хосдени эз дуьли-жунишу.

Сулейманпашере шохьонгумгьо э жейлее вераюнде утогъ хуышде э ён э лой богъ вокурде пенжере нуьшде, тэхьно чой хурде хъэз оmoreмбу. Чое эри энугь э пунктус нуьгъреи веноре э буйругъи пашеревоз Алмаз деберденбу э утогъ энугь. Е руз шохьонгум Алмаз эри паше чой деберденки, у дер утогъэ э очоревоз сэхд сохде, лэгъэй духдере сэхд сохде, гуж сохдебу э у. Эзи кор бире эйлеревоз, Алмаз дануьсд, ки Мехмед, севгилию, юре нихогъу, рафд э е бие мерд, комиреки чуьн тойгьой энугь уре келе гъэилгьой.

— Эзу эйлеревоз, хонум, — мугу э эхир эни могъбуле ихдилот хуышде жогъиле эскер, — дуьлме гунле нерасиреки яраи. Мере де духдеригере эри хосде, э де духдериге ошугъ бире, дуьл нисди.

Дуьл эн Маралиш лап гъэребелугъэ хуно бисдо и гъозне гъедер эн Мехмете шиновусдки. Угьо нуьшдуьт е ченд минутигеш гоф несохде, гьер мерд э фикир хуышде дерире хуно. Э иловлей

эн гъиругъ ченэх глов, пар зере, омо нуьшд е десде бэглэвечегьо. Э угыо денишики, гуйге гьейсэгIэт э ёр Мехмед омо, рафде овурде гереки гуфдире гIэсбгьоре эз товле эри глов хурде. Маралиш эз битоби дуьл хуьшде эзи гьозниере шиновусдки, вэхшд эз жигей хуьшде, дерафд э хуне.

Мехмед гьетте э товле дироморе гIэсбгьой хуьшдере эри овурде глов доре э ён чол, Бобои, гьошгьоре дуллу сохде, гьесэгIэт ведерафд эз товле. У э Шефик-паше гьэгьр сохде, э Мехмедевозиш эзу товуне гоф нисе сохденбу. Шев-руз фикир эн е кор дебу э дуьл, э мувэхь эн Бобои, чуйтам гьэгьр дуьл хуьшдере ведешенуьге эз Шефик-паше. Э дуьл энуну омо эз пэхьники эн денщик энуну дуьм гIэсб эн Шефик-пашере буру, луйжегьой герден юре гьэйчи зенуь, чинуь. И кор келе охмури, биёбури хьисоб биренбу эри эн сэхьиб гIэсб, килэхь, номус энуре э хори зерере хуно хьисоб биренбу. Оммо Бобои уреш дануьсденбу, ки у и коре сохдге, ёгьин биё эз хунегьо вирихуь, небуге Шефик-паше и гьэгьре э у нидегьилуь, мизенуь юре. Гье и кор гирдебу пушой энуре, гьэребелугь сохденбу дуьл энуре. Оммо войгей энуну эри гьэгьре ведешенде эз турк, биёбур, хуьрд сохде уре, гьечи гужлуь буки у э дуьл хуьшде рази бисдо эри вирихде эз хунегьо, гьисне, оворе, мундеш, оммо и э дуьл ю деригьо гьэгьре ёгьин эри ведешенде эз Шефик-паше. Ижире гьэсд, фикир э дуьл дери у е руз шохьонгум тевере серчире хуно тиж сохде, овурд но э куьнж утогь хуьшде, себэхь себэхьмунде, те Мехмед оморе э гIэсбгьой хуьшде эри сер кешире, бурру э теверевоз дуьм гIэсб эн Шефик-пашере, чинуь лужугьой энуре, песде зури-зури вирихуь эз хунегьо. Оммо себэхьимуьн омо ижире кор бисдо, комиреки у гьич э дуьл, фикир хуьшде эслогь гузет несохдебу: тевер уре эри дуьм гIэсб эн Шефик-пашере бурра нэгI, эри сэхьиб энуре куьшде герек бисдо.

\* \* \*

...Хуьшдени Турция увэхьди э лап келе четини дебу. Бу вэглэдо, кейки у е нимей гIуьломе вегирдебу, э гуж ерэгьэвоз омбаре вилеетгьоре, хэлгьгьоре, умогьгьоре э хуьшде муьди сохдебу. Келе падшогьетигьой Европа эз гуж ве гьувот энуну терсиренбируьт. Оммо, чуйтам гуфдирениге: эзу вэхдевоз э нуькерегьо глов омбар гиросхдебу. Османская Турция пушотенингьоре хуно немундебу. У тулок биребу. Чуйтам имогьой э сер тэхд нуьшдегьогьо огьиле, когьиле, гевилсуьзе султан Мехмед VI ухшеш нисе

\* Османская (Оттоманская) Турция — гьече у гуфдире оморенбу э нум бине норегор династией эн турецки султангьоре — Осман I Гази, рэхьбери сохдебугьо э 1300—1326 сс.

\*\* Мехмед II — султан эн Турция, нум норе оморегьогьо Фатих (Истичачи) 1432—1481 сс.

зеренбуге э жуьргIэтлуге, сегьм-терс нисе дануьсденбугьо дуре гьовум-гьедеш хуьшде Мехмед II, келе падшогьети Византияре бербод сохдебугьо, э 1453 сал столицай энуре — Константинополь э столицай хуьшде чарундебугьо — э Истамбул, гьейсэгIэ-тине Турцияеш гьечу ухшеш нисе зеренбу э пушотеине. Гьеле те лап песини султан эн Турция Мехмед VI э сер тэхд нуьшде, эз нисе зиёд пушотеине колониегьо ведерафдебируьт эз дес Турция. Расди Османская империя э суьфден довгьой гIуьломи бэхш вегирденге, гьеле увэхдиш е хейли хоригьо, колониегьо демундебу э дес энур (Ирак, Хиджаз, Палестина, Македония ва диеш), оммо э арт эни довгIо у неки вир сохд песини колониегьой хуьшдере э октябрь 1918сал, хэйли хоригьой эн хуьшдени Турция, гьемчун столицай энур — Истамбул оккупировать сохде оморебируьт э дисдин гьушунгьой Антантаревоз. Гемигьой эн бесгьунчигьо — англичангьо, французгьо ве диеш, поисдебируьт э пролив эн Босфор, лулегьой келе тупгьой энугьо гьэлеж гирде оморебируьт э тараф эн дервозей эн султан. Султан, комики гьеле и перигьо хуькм ю вебу э сер эн ченд хэлгьо, вилеетгьо, гьейсэгIэт у ю хуьшдению гуйге есире хуно бу э дервозей хуьшде. \* Терсире, ки вир мисоху неки тэхд ве гарем хуьшдере, белки сер хуьшдереш, у э ёинуьшигьой хуьшдеревоз рази бисдо эри гьул кешире, э гьеме игьролгьо, комигьоре буйругь дорут э у бесгьун доребируьтгьо державагьо. Еки эзи игьролигьо, буйругьигьо бу Турция дир несохде, э гьэд бисд чор сэгIэт ведебердени гьушунгьой хуьшдере эз Кавказ ве Догьисту.

Бесгьунчигьо-англичангьо, буйругь доребируьтгьо э туркгьо ведеберуьт гуьфдире дир несохде гьушунгьошуре эз Кавказ, уьгоре хуьшденишуре воисденбу чаруну уре э еки эз колониегьошу, жейле сохут эз Урсие совети, гируьт инжо жигей эн туркгьоре.

Гьечу е хинике руз себэхьмунде зу-сери киниге гьуьл зере э десевоз Марале э гьэд хэлов эз хов хэбер сохд. Марал серсуре хуно чумгьоре вокурд, мивини э зверсер карават ю Шефик-паше поисди. Парталгьой энур вокурден, шушке ве тапинже э кишд ю вери. Шефик-паше согь шев э хуне недебу. Марал эз сер шевевоз дер хуьшдере сэхд сохде, дегешде хисиребу. Унегуьре у мэхьтел мунд чуйтам гьейсэгIэт Шефик-паше дер утогьоре вокурде диоморевуге. Э дуьл энур шек омо: ки сер шев ю фурмуш сохдебудер утогь хуьшдере сэхд сохде? Сифет эн Шефик-паше гьейсэгIэт вомунде, эн нэхисире одомире хуно бу, лап гьэьрлугь бу. Оммо у эслогь ишор бу.

---

\* Э 1922 сал э арт кемалистски революция э Турция султанат лэгьв сохде оморенге, Мехмед VI терсире юре дуьсдогь несоху, юш песини салгьой хуьшдере те муьрде султан Абдул-Гамид II хуно э дуьсдогьни негировуну, енебуге куьшде неьв, вирихдени эз вилеет.

Гьетте Марал чумгьоре вокурде, Шефик-паше э гьаежони ве лап тэгІди сохдере хуно, зури-зури мугу эзу:

— Хонум, хонум, гьейсэгІэт эдее э шегьер нэгІлетлуье говур-тьо шишире дироморе...,— уре воисд гую англичангьо, оммо эри хуьшде ноки эри терсунде и раче жогьиле, оммо унгьэде сер учи нисе бурранигьо гІошире зене хубики эри э жигей англичангьо гуфдире — «большевикгьо»,— эри, хонум, большевикгьо. Вэхиз, тэгІди сох, бесд э бухче гьеме гьиметлуье чигьойтуьре, буррайм э меревоз.

Ховолуьи эн Марал гье усэгІэт паруьсд и гофгьой эн турке шиновусдки. У чумгьоре фирегь сохде э серегижиревоз дениши э у, чуй сохуге не дануьсде. У гьейсэгІэт эри туркгьо эзинжо рафден шор бу, оммо вогошден большевикгьош уре нисе воисденбу. Шефик-паше, комики лап эдембу тэгІди сохде, диренге, ки Марал э хуьшде домунди, нисе дануьсде, чуй сохуге, сер гирд диеш эри гьэгьр кешире, гІоси бире. У э кубутие жиреревоз эз гьул энугирде, сэхд кеши уре эз хьэлов:

— Хуьшдере екем тэгІди дие, хо-ну-ум, женгьендем жунтуь!

Марал эз дорд дорей гьул ю е хьэрой сохд. Э тен энуги шев хисиренигьо шей вебу. Синей энуги те нимелит бирэхьне бу. Марал зури-зури кеши эз сер хьэлов руй хьэловире, э дуь десевоз дегирд э синей хуьшде, рафд поисд э ён дивор хуне. Шефик-паше э гьэд е мегь инжо бирей, Марал лап хуб дануьсд дивэгІ, беде, суруле хосиет эни беднефсе одомире. Эзи одоми гьерчуь гири бовори. У юре э нимерэхьи талан, тур-темиз мисоху, мишенуь э гьержой бисдо, енебуге э ватан энуги э Турция оморенге мифуруху уре э гарем эн е пире чум шуре паше. Унегуьре Марал эри хуьшде теслих сохд: хуби инжо э ки большевикгьо, оммо э ватан хуьшде мунде э и э партал офицери веригьо гьэчэгьэвоз вирихдеижон.

— Нэ-эгІ! Нэ-э-гІ! Ме эз хунейме э е жигеш нирам! Мимируьм — нирам! — э куьнж хуне, э далдере хуно поисде, эз терс гьемей жендек ю лерзире-лерзире, божэхь дешенд Марал.

Шефик-паше вераси, ки, и зене гьейсэгІэт четини эри межбур сохде биьв гуфдире э юревоз, оммо эри э гужевоз, хушевоз э рай овуурде уре, вэхд эслогь небу. У эдембу тэгІди сохде. Шову э угьо, офицергьо, э штаб гарнизон мэгІлуьм сохдебу себэхь себэхь-мунде е минутиш дир немунде эже биь кура бошутге гьеме офицергьо э эскергьошуревоз эри эвакуировать бире э ватан ищуги. Шефик-паше дануьсденбу, ки эгенер у дир бисдоге ёгьин мофдо-ну э есири э дес дуьшменгьошу — англичангьо енебуге куьшде миьв эз дес одомигьой энинжо. Унегуьре у гьейсэгІэт эдембу лап гьэгьр кешире, дуьлдэгьдэгьэ бире. Э буйругьи энуревоз денщик энуги гьеле эзи е сэгІэт пушо гІэсбгьоре егьер зере, ведеберди э куче э ю денишири. Бирден чумгьой эн Шефик-паше эз гьэгьр дуьл ю лап гІэтош гирдере хуно бисдо. У ведешенд эз гьоб та-

пинжей хушдере гье эз поисде жигей хушде кеши э лой Марал.  
— Песини гиле эдее пурьсиренуым эз тув: оморени тув э меревоз небуге нисе оморел?

Эз хъэлежигери зугьун эн Марал кут бисдо домунд э лэгЛэй энү, гоф сохде недануьсде. У зури-зури э руйхъэловиревоз сэхд сохд сифет хушдере, эри невинире, чуьтам гьейсэгЛэт и залум э гунилеревоз мизенуьге юре, тэхьное, гьэлхэндсуьзе зене. Гье и туькем э гуш энү ченд е гром дерафд сес тапинже шенден. Э руй эн сипре руйхъэлови, эжеки синей энү дегирде бу, лов бисдо гьирмизине дэгьмей эн хун.

Эз гье усэгЛэт шуьл бире десгьой энү руйхъэлови офдо э хори э ён бирэхьне пойгьой энү, юш е хъэрой вегирде, эз хушде рафде э яралуье синеревоз офдо гье э ю поисдебугьо жиге.

Шефик-пашере гьейсэгЛэт хун, жин гирдебу. У эри хушде ноки, «хонум» эз гунилей энү дие э у гьуьломигеи, видовусд дерафд э у хунейге, сер гирд эри гуниле шенде э гьержой бисдо, э чуь чум ю вохурдге: э гузги, э гьоб, э оводунни хуне. Виники э дивор келе ранглуье сирот эн Ошир Килэхь Лугуире, комики эз гьэд эн зарзарие чорчубе дениширенигьо, чуьтам и инжо омори-гьо эжноб-оккупант гьэчэгьги сохдениге э хуней ю, Шефик-паше е гуниле шенд э сер эн сирот. У гьэлеж гирд э чумгьой энү, гьэгьр оmore уре э и э олхогьини ве тиж, тигьэтлуь дениширембируьт-гьо чумгьой энү эз сирот. Оммо гуниле раси э звери тэхдей чорчубей энү. Сирот э чорчубе гунле расиренки, зиндере хуно жуьмуьсд, лойлум хурд, песеде диворе гьэрмэгь кешире, гуйге хъэрекет сохде эз песини гуж хушде эри вомунде э жигей хушде, бирден э зарбевоз офдо э хори э пушой пойгьой эн Шефик-паше. ГьейсэгЛэт гьэзоблуь ве серсуре хуно бугьо турк эзи некумие кор, лап терсирере хуно, бирден шенд хушдере песово, гуйге э пушой энү граната енебуге бомба офдоре лов бисдоге. Оммо уре гье у туьтем гЛэйб-номус омо эзижире терсиреи хушде, у диеш хуьршу-луь, гьэзоблуь бире, эз лулей ю дуре ведироморенбугьо тапинже э дес ю дери, верафд э чекмегьой хушдеревоз э сер эн сирот, сер гирд эри зинде одомире хуно зере уре э пойгьоревоз, вешенде-фушенде хушдере, гуйге вэхьше хуно, вежегьнсденигьо э гЛэдот ишу гуьре э сер мегьит эн куьше оmore дуьшме.

Песеде офицер э буз эн тов-товние чекмей хушдеревоз пертово до зирпой, чуьлки сохде оmoreбугьо сироте, нефес ю гирде-гирде, ведерафд эз хуне.

Эзи е ченд минут пушо те и кор бире, лап ховдусд бугьо Бобои, гьемише дир эз хов хэбер биренбугьо, имбуруз у лап зу хэбер бисдо э дуьл хушде гирдигьо гьэгьре э Шефик-паше эри эжиге овурде, песеде гье усэгЛэт вирихде эз хуне. У зури-зури сер тен хушдере вокурде, тевере эз куьнж утогь хушде вегирде, эжеки у ди норе, хьозур сохдебу уре, ведиромо эз жигей хушде, дени-

ши э хьээт, э иловле. Э пушой чум екиш веди небу. Себэхь тозеле эдембу очмиш бире. Гьово серин, хиник бу. Дур, э асму гьеле вемундебу с пертовуш веди биренбугьо тикей эн менг не асарай себэхь, э ки эн, ухшеш зеренбугьо э эмблемай эн Турция. Те ебо э товле дерафде, Бобои е минут понсд э лэглэй дер, нэхуре кеши э сер лэглэй эн тевер, е гилейгеш фегьм сохд тижн эн тевере, э комиревоз у гьейсэглэт биё буру эз бине дуьм глэсб эн дуьшмен хуьшдере — Шефик-пашаре. У виники ю тевере лап хуб тиж сохди, у шори сохдере хуно, лове э хэнде веберд эри хуьшде еровурд сохде, чуьтам Шефик-паше эз гьэгьр, эз хуьрш делуь-чешмише хуно мибуге, виники дуьм бурра, луьжуь неверие глэсб хуьшдере. Э глэдотевоз и биёбури эз гуниле зерейш зиёди. Диеш хубте мибисдо, эгенер уре диругор мибисдоге, чуьтам у э кул дум бура, луьжуь неверие глэсб эз пушой хэлгь рафдениге. Уре диругор гьечи гьеме э томоше кура мибошут, михэндуйт э у э тухпоху хэндуйгьоре хуно.

Оммо Бобои э товле дирумоки не глэсб эн офицере, не эн денщик энуре э товле, э ён глэсбгьой хуьшде невини. У дануьсденбу, ки кимвэглдо Шефик-паше не Мехмед э кул глэсбгьошу венуьшде, согь руз эжеиге рафденбируьт, оммо гьечи лап зу, себэхь-мунде 'зу-сери угьо е гилеш эз хуне неведерафдет. Гье ижире фикиргьо э сохдеки, бирден э гуш эн Бобои дерафд сес тапинже шендеи не келе буьруьж эн Марал эз хуне. Эз песой эн е сес тапинже шендеи омо гене е ченд сес гуниле. Эз хов бужу бисдогье сег хьэетиш сер гирд эри равуьсде, зузе зере. Бобои гьейсэглэт тевер э дес дери, зури-зури ведиромо эз товле, шуш-нефес гирде, видовусд э лой хуне. Гьемин гье и взхди Шефик-паше, тапинжере э гьоб доноре, эдембу теретэглди фираморе эз пилонконгьой хуне. Бирден у э дарам сес сохдембируьтгьо тов-товие чекмегьой хуьшдеревоз эз пилонконгьо фирамореки, вини нуькер эн сэхьиб хунере, хуьршлуь, э чешмише сифетевоз, тевере э дес гирде, видовусденигьо э дой эн. Е дэгьэдэгьэ офицер серевире хуно бисдо, гьогь, мэхьтеле хуно поисде э жигей хуьшде. Песде э хуьшде дируморе, хуьшдере э дес вегирде, у теретэглди дес хуьшдере кеши э лой э ён гьэбуьргьэй ю э гьоб дебугьо тапинже. Оммо те ебо у эз ижире некумие вохурдеи э шуьл бире лерзире энгуьшдгьой хуьшдеревоз хьэрекет сохде эри вокурде гьоб тапинжере, ведешенде уре Бобои лап куьнд оморе эзу э зарбевоз э песой теверевоз эз сер Шафик-паше. Эз чумгьой офицер гуйге гье у туьтем журкумгьо жесдуйтге, у е келе божэхь дешенд, десгьоре лов сохд шуьл бире гьэнетгьоре хуно, гуйге хьэрекет сохде эри эз сер хори жейле бире, учмиш бире верафде э гьово, оммо гье туьтем э пара бире мазалеревоз, э хуневоз билесумол бире сер-сифетевоз офдо э сер неме, хинике хори.

Денщик эн офицер Мехмед э и взхди, нуьшде э сер глэсб

хуышде, э чепи дес хуышде гирде эз вожей эн гIэсб эн Шефик-паше э битобиревоз дениширебу э гузет эну поисде э куче э песой тьопу. Гье э и туьтем э гуш эну сесгьой тапинже шенде не буйруж эн Марал дерафд, е мнугиге бэгъдо у шиновусд божэхь эн Шефик-пашаре. Денщик гье усэгIэт вераси, ки е беде кор омори э сер сэхьиб ю. У туьфенге э кемер хуышде дуз сохде, фушенд хуышдере эз сер гIэсб эри дерафде э хьэйт. Оммо гье и туьтем эз зофруй эн шегьер омо сес туьфенггьо, шендеи, эз лой дерьегь — сес туп шендеи, гуйге э сер шегьер келе гром-гром лов бисдоге. Мехмед лап терси. Уре невоисд э песой эн офицер-сэхьиб хуышде инжо тэхьно мунде, э жун хуышде гьэсд сохде. У гье гьечу зури-зури, чуйтам фураморевуге эз кул гIэсб хуышде, дуборе э теретэгIдииревоз венуышд э кул эну, гIэсб Шефик-пашере эз жилов ю гирде, гье эз поисде жиге э чоргъезевоз учмиш бире, рафд зверо э гьирогь шегьер э рэхь богьгьо, эжеки туркгьо мийсдуьт э сер себэхь кура бире ве эзинжо сер гирде рэхь ишуре э ватан ишу.

## РЭГИД

Э бэхд эн Марал ярай эну гурунд небисдо. Гуниле э дорун синей эну недерафд. У эз гьирогь чепини пуштун эну ёново расире, зере гирошдебу. Эз се орине бэгъдо лербей ярай эну хуб бисдо, энжегь е вергьирмизие дэгъмеле вегьишд э синей эну чуйн нишон эз гьэдуьрнедане эжнобие турк.

Гье у руз себэхьмунде неденишире э шегьер деbugгьо вел-велентеретэгIди рафдеи туркгьо эз Дербенд э омбаре гIэребегьо, юкгоревоз, «э шолумиревоз» шишире диромореи эн англичангьо, омбаргьо э шегьер дануьсдуьт э товун яралуь бирей эн Марал ве куышде омореи э хуней эну поисдеbugгьо офицер э десдин нуькер эн Маралевоз.

Эзу товуне, ки туркгьо рафдуьт эз шегьер (гьелбет, э войгешуревоз нэгI), эжигей энугьо оморот англичангьо, екиш фикир недо эри фегьм сохде силис гировунде: эйчуь ве чуйтам куышде омориге Шефик-паше, э жугьобдори кешире куышдегор энуре. Э ижире вел-велен, гьэтмэгъэриши, эжигей эн е оккупантгьо де оккупантгьойге омореи — екиреш фикир, хэёл эни кор негирдебу. Э у рузгьо э шегьер эзи бедте коргьош биренбу. Песде, мэгIлуьм бу, ки хуышдени офицер тэхсир бу эри э сер эну ижире кор омореи. Эз елойге, «тозе сэхьибгьо», гирдебируьтгьо имогьой жигей эн туркгьоре, неденишире э «гьелелуьгее шолуми» э Турцией султаниривоз, угьо гьелеш дуьшмегьо хьисоб бируьт эри англичангьо. Оммо эзи кор бире эйло э хуней эн Марал, не э вэхд эн англичангьо э Дербент, не э вэхд деникингьо, гирдебируьтгьо



инжо пезде жигей эн англичангьоре, е доне одомире эз офицергьо э хуней энэ эри поисде дие неовурдуьт.

Бобои гьетте Шефик-пашере э теверевоз зере, тевере эз дес хуьше пертово доре, вирихдебу эзя хьэьтгьо, пэхьни биребу э е вечаруьсде хунегьо э гьирогь шегьер. У гьерчуь дануьсдебу Марал гье у туьтем муьрди эз гушней эн Шефик-паше. Оммо э дуьимуьн руз у эз киниге шиновусденге Марал зиндеи гуфдире, у лап келе шор бисдо. Неденишире э «хогьини» эн Марал, эз дес энэ кешире сэгIэргьо у ошней турк биребу гуфдире, дуьл энэ эдембу лап тэгIди сохде Марале эри дире. Те с гиле шев бире дуьл энэ эдембу пара бире. Гьетте шохьонгум торики бире, у ведиромо эз гьэд вечаруьсде хунегьо э куче. Не э кучегьо, не э мейдугьо ве базаргьой эн шегьер гьейсэгIэт е доне одоми ве ди небу. Энжэгь патрулгьой англичани эз дуь-се одомигьо эдембируьт гешде э туьфенгьоревоз. Бобои далде доре-доре хуьшдере, пэхьни-пэхьники, чуемчару сохде-сохде, хьэрекет сохде э чум патрулгьо эри невохурде, эдембу тэгIди сохде э ки Марал, неденишире э у кор, ки у терсиренбу: эгенер э дес патрулгьо офдоге куьше миев гуфдире.

Марал юреш имид небу у дие гьич Бобоире мивинуь гуфдире. У гьерчуь дануьсденбу, ки туркгьо уре гье усэгIэт гирдет, тикетике сохдет. Унегуьре гьэдерсуьз келе шори гиросд эз дуьл гьердуьй энугьо угьо екире дирируьтки. Марал гьетте Бобоире дире, неденишире э яра, хэсден, гьолоки хуьше эз кешире дердгьо, терсгьо, синемишигьо, э шориревоз хьэрой сэхде, гуйге юре паргьо вероморере хуно, вэхьшд эз дегешде жигей хуьше, гьэл гирд Бобоире. У э шори, нугьори, хьэсротиревоз сер гирд эри моч сохде Бобоире эз лэгьэр бире муйлуье гьутинегьой энэ, эз чумгьой ю, эз пушонию, душгьой ю. Е ченд минут угьо гирисде, хэндусде, дуь екире гьэл гирде, поисдебируьт э минжи хуне, гуйге эз еки жейле бире нисе дануьсденбируьт. Дуьл энугьо гьейсэгIэт пур бу шори, муьгьбет, суьгьди дуь эри еки. Угьо э хьэлов дегешдекиш эз некумие шори, дуьлбилбули, гьечи эеки вохурдеи гье э гоф мунде дуь эекиревоз у шев те себэхь хисире недануьсдуьт.

\* \* \*

Оммо рузгьо эдембируьт оmore рафде дуь э песой еки. Омбаре вэхд негирошд, кейки гIэрэй эн Бобои нен Марал лап дегьш бисдо. Э ёр Бобои оморенбу у рузгьо, кейки инжо зигьисдембу Шефик-паше. У э дуьл хуьше бэхшлемиш сохде нисе дануьсденбу э Марал чуь биребуге э гIэрэй энэ ве офицер эн турки, чуьтам Марал гьетте Шефик-паше оmore гьечи э хэпер юш небирере хуно дур сохдге юре эз хуьше, фирсоге эри зигьисде э

куьгъне жигей ю, э ки гӀэсбгъо. У эз пушотенинеш зиѐд эдембу рещк сохде уре нимогъой э кин эн муьрдигъо Шефик-паше.

Суьфден рузгъо эз Марал яралуь бире, Шефик-паше куьшде оmore эйло, эз шори гьердуьшуь согъ мундеи, э еки вохурдси и бейбофон, хогъини эн Марал унгъэде э дуьл, мувэхъ эню кори нисе сохденбу, уре зэхъмет нисе доренбу. Оммо и э дуьл эню е гъедер вэгӀдо сокит биреbugъо гӀэтош, туьхъмек бирден дубореден эз пушотенине зиѐд диеш зарбте, гужлутье луьп зе, дегеси. КимвэгӀдо э пушой чум эни жогъиле кук э эвреире хуно оmoreнбу у беде сегъне, комиреки у диребу у шев эз сер тутдор. КимвэгӀдо шекуьл эни кор э сэгӀэтгъоревоз эз пушой чум эню нисе рафдембу, дердежер сохденбу уре, мувэхъ юре гиж сохденбу.

Бобои гьерчуь дануьсденбу, ки Марале юре хуьшдениюре воисдебу куьнд, дуьл, ошне бире э туркевоз. Эгенер Марале нивоисдге гъич е кориш нибисдо. У эхи э чумгъой хуьшдеревоз диребу, чуьтам бикей эню ю хуьшдению оmoreбуге э утогъ эн Шефик-паше, те хэйли шев рафде нуьшдебуге э уревоз э ширине меслэхъэт, ихдилот. Марал э дуьл хуьшде недануьсде небу, ки ю шев э ки эн Шефик-паше оmoreге, э уревоз нуьшде, ихдилот сохде, шороб хурдге, эхир эни кор гъечи мибу гуьфдире. Ведини, ки Марале юре, хуьшдениюре воисденбу те Шефик-паше инжо гъисдигъо э уревоз эри ошнеети сохде.

Э дуьл Бобои ижире фикиргъо оmoreнге у э и туьтем Марале эз турк зиѐдте э чум дире нисе хосденбу, оммо уре эз хуьшдеш лап гъэгър оmoreнбу эзу товуне, ки у э дуьл хуьшде нисе вероmore, жун эню э бикей ю дери, эзу жейле бире нисе дануьсде. Эжигей у руз гьетте Шефик-пашере куьшде, вирихде рафде э дм жигегъойге, ведешенде Марале эз дуьл хуьшде, телуьре эз рим гирде яра ведешенуьгъоре хуно, у гьетте дануьсде Марал зиндеи гуьфдире, эз шори, билбули, гъаежони сере вир сохдере хуно видовусд омо э ки эню, чуьтам эгъуьлсуьзе сегле, комиреки сенгъэдуьле сэхъиб тепуьк зерени, куьфдени, пиш сохдени, оммо у эз хосден э муьдуьиревоз, мэхъэнефиревоз, сер зере-зере, э чорчengi оmoreени э ён пойгъой эн суруле сэхъиб хуьшде, гъовомер бирени э ён пойгъой эню, нисе вероmore э хуьшде эри шенде рафде уре, жейле бире эзу.

КимвэгӀдо Бобои э ижире думитгъоревоз хисире, шев-нимешев эз хов хэбер нибисдо гуйге бужу сохде оmore енебуге э хов хуьшде терсире одомире хуно. У э и вэхди дениширенге э ён ю э хъэлов, ширин, э олхониревоз хисиригъо Марале, чуькле лэгӀэй ю нимелит вокурде, хэсде дуразе муйгъой сер ю э сер сипре болуш лов бире, увэхди гуйге у эвреире хуно бирден мивини э жигей хуьшде э ён эню тов-тови доренbugъо Шефик-пашаре. Э ижире вэхдгъо у гуйге эз дуьш-дуьшие глов гъэйнор бирере хуно мэхшишд гъелуьсди эз хъэлов, неденишире э гъово, мививовусд медиромо

э хьэът, эз дуьлбитоби хуьшде жиге неофде те пушой себэхь черх михурд э иловлей хьэът серсу, дивоноре хуно.

Эзу гIэлемете шевевозов, кейки тэхьное, могъбуллуье, эз хурде шороб скем серхуш биреbugьо жогьиле бикей энун суьфдеи гиле кешире деберденге нуькер хуьшдере э хисиренигьо утогъ хуьшде, у суьфделе э гIуьрмуьр хуьшде вини, дануьсд гьэл, мигьробони эн зене. И бедбэхде кук, комики гьич эз екиш недиребу е хоши, гьэйгьуи, дуьлсухуни, вероморебу гуйге тэхьное жалуьсде куле э хуьшге биёбуе жиге, дэгIэм, мигьровуни дедее гьич недире, кумеки, дусди, гьэйгьуи эн куьнде гьовумгьой хуьшдере недире, етим, сонл, тэхьно бидогъ келе бире кук, э герме мигьробоне гьэл эн гуьзеле бикей хуьшде офдоки, дуьл энун лап сэхд вогоси э у, э дуьл ю, луьп гирде, дегеси лап келе муьгьбет э ки энун. Э товун эловлуье муьгьбет хуьшде у э екиш нисе гуьфдиренбу, э хуьшдени Маралиш. У дануьсдеш нисе дануьсденбу чуьтам гуьфдире мибуге э товун энун. Дерими э зугьун одоми ужире гофгьо, комигьоки мидануьт гуьфдире чуь жире муьгIуьжуьзе, бэхдевере, зурбое сер одоми нисе ведерафденигьо, эгьуьл одоми нисе бурранигьо чиниге муьгьбет?!

Эзу вэхдевоз у гуйге эдембу э эврие ширине хов дире, гьемей дуьл энун пур бу эз муьгьбет, шори, хуьроми дуьл энуре гьэдер небу, гуйге э зиндеи у эдее э женнет зигьисде. Оммо гьечи бу те и турк оморе гьисмет бире э инжо, комики э суридиревозов, бирэхьмиревозов зирпой, тапталамиш сохд дуьл энуре, муьгьбет энуре. Турк рафд эз гIуьлом, имогьой уре эз е кориш хэбер нисди, оммо у э дуьл энун, эн Бобои, зеригьо яра мунди гьемишелуьг, чарунди гьемей зиндегуни энуре э гьич те гIуьмуьрлугъ хос нисе биренигьо хунрижае яра. Эри Бобои гьейсэгIэт гьечи оморенбу, у гуйге дуборе етим мунди. Эри энун оморет гене у рузгьой гIэили энун, тэхьле, гурунде, гьэребелугъэ рузгьо, ки у гене гьэлхэндсуйзи, сехьибсуйзи, тэхьнои, тэхьно дор э венжире оморе вишере хуно.

Ижире дердгьо, фикиргьой энун эдембируьт хурде-вечире дуьл энуре, лап сэгIэр доре уре. Эзи дердгьо имогьой гуйге гIэсбгьой энущ, дие унгьэде э чум энун небу. У имогьой э товле дироморенге э ки энугьо пушботеингьоре хуно э шори ве эркеиревозов гIээизе «нумгьо» ве лэгьэмгьой энугьоре гирде, угьоре огол нисе зеренбу, э угьоревоз эз дуьли «гоф-ихдилот» нисе сохденбу, мэгIнигьой хуьшдере эри энугьо нисе хунденбу. Хуьшдени гIэсбгьош дие имогьой сер ебо у себэхьмунде э товле дироморе угьоре эри хорунде, тимор сохде, шори сохде шихьне нисе зеренбируьт пушотейнере хуно, сер, герме, герме бузгьошуре нисе зеренбируьт э душ, э дес, э сифет эн Бобои, гуйге эз хосдеи моч сохде уре. Угьош гуйге дануьсденбируьт, гьис сохденбируьт, ки чуьнге гьовой «сэхьиб» ишу хэреби лап, уре гьеймогьой дуьл ишу нисди.

Имогьой у э товле дироморенге гІэсбгьо сер ишуре э могьбули-  
ревоз гьуз мигирдуьт э пушой овхур, гуйге дуьлсухуни сохде эри  
эну, э уревоз э еки дерд, могьбули кешире.

Бобои лап лэггэр биребу, гуйге сэхде, хос небирение гІэзор  
эз дору эдембу хурде-вечире уре. И пушогьо чупуригьой сифет  
эну гуйге гьич веде небируьт. Имогьой эз лэггэри сифет эну чу-  
пуригьой эну лап ведироморобируьт э у гІэиле вэгІдогьой энуре  
хуно, кейки у хунесуьз, жигесуьз бу, эз хиники, гиснен сэгІэр ке-  
ширембу, омбариш куфде оморембу эри э хьэьтгьой кес дераф-  
ден шев эри хисире.

Марал эдембу дире хьол, гьовой эн 'Бобоире, чуй гирошдеге  
э дуьл эну. У хуьшдере екем тэхсиркор хьисоб сохденбу э пушой  
эну, езуггьери, дуьлсухуни сохденбу эри эну, хьэрекет сохденбу  
эз дес ю вероморере хуно эри хоши гирде, тимор сохде уре, дуьл  
доре, гьовой юре очмиш сохде. Оммо и хьэрекетигьо, дуьлхоши-  
гьой эн Марал, гуйге диеш, ярагьой энуре тозе сохденбируьт.

Марал диренге, ки хьэрекетигьо, дуьлсухунигьой эну эри гьо-  
вой Бобоире хуб сохде, дердгьо, фикиргьой хуьшдере фурмуш  
сохде, дуьл юре веровунде гьеме э негьоггьини, у сер гирд эри  
гІоси бире эзу, гэггэр кешире эз дес эну, хьозур бу эри ведекуьр-  
де уре эз хунегьо, пиш сохде, гьемишелуьг бурра гІэрей хуьшдере  
э уревоз. Гьемише имогьой гьошгьобоггьуь, ловбуз бугьо нуькер  
эну, бирази бугьо эзу э и коргьой хуьшдеревоз э серкуши, хижо-  
лети дешендембу уре, гьишденбу э ёр ю войгеш-невойгеш овурде  
у беде вэхде, кейки э хуней Марал сэхьибьети сохденбу гужсох эну  
— энжобие турк. «Эйчуь и эгьуьлсуьзе Бобои дуьлмере хэреб  
сохде э и коргьой хуьшдеревоз? — эдембу гуфдире Марал э дуьл  
хуьшде.— Эвелиминжи, э жигей хуьшде динж мегердо у турк —  
у э войгеймеревоз нэгІ, э гужевоз э меревоз зиггьисди, э ме зулум  
сохди .Ве дувиминжи, э хуьшдени Бобои чуй кори? Меки эну,  
худоре шуькуьр, зен ю нисдуьм, бдохлуй ю нисдуьм эри э серме  
гэггэр сохде эри эни кор? Ихдиёриме э десме дери чуй мере во-  
исдге эри сохде..»

Оммо гэггэр эн Марал зу гирошденбу, дуьл эну гене гье  
усэгІэт вогошденбу эри Бобон, дуьлсухуни сохденбу эри эну. У  
хуте биребу э ки эн нуькер хуьшде, комики юре эз жун хуьшде  
зиед хосденбу, гІэиле хуно э юревоз синесов биренбу. Маралиш  
э жирей хуьшде хосденбу уре. Песде Марал гьич фурмуш нисе  
сохденбу у кореш, чуйтам и гІожизе, гІэйбкеше кук гьетте шино-  
вусде сес тапинжей эн Шефик-пашере, буьруьж эн юре, э жун  
хуьшде гьэсд сохде, тевере вегирде оморевуге э сер гужки эну,  
зеребуге уре, гэггэре ведешенде эзу.

Оммо Марал гьэлэт бу, нисе верасиренбу, ки эз ело зиггьисде  
э Бобоиревоз, эз елойге пушотеннегьоре хуно денишире э у чуйн  
э нуькер хуьшде, гьисс, номус, обур энуре э гуш негирде гІэмел

оморенигъо кор нисди гуфдире. Дуз небу Марал эри хуьшде фикир сохде, ки Бобои недан, овом гьнсдигеш у биё эри хуьшде егъни верасуь: уре е ихдиёриш нисди жилов бикей хуьшдере эри гирде, талаб сохде эзу чуь сохуге, чуь несохуге. Чуьш несохдге Марал, Бобои, егъни, биё согъбоши, разименди гую эзу гьемише эри эню сохде никигъой ю.

Бобои имогъой хуьшдере нуькер хьисоб нисе сохденбу э пушой эн Марал. Эри эни кор э у тэхсири невебу. У эз дуьли-жуни хуьшде хосденбу Марале, э гьемей эни келе дуьньёг э пушой чум эню эз Марал бэгъэй дие гьичиш небу. Марал ю хуьшдению венгесди журкум эни муьгьбете э дуьл темизе, гьич теимогъой ижире гьис недануьсде жовоне кук. Тэхсири эн нуькер нисди, ки и журкум, комиреки гуьзеле бикей эню венгесди э дуьл эню, чаруьсди гуфдире э эловлуье гъэтош, гирдигъо гьемей беден энуре. У белки гье эзу товунен, ки овоми, соден гуфдире нисе верасиренбу эри комики дорени уре гьэлгъо-мочгъой хуьшдере, э е хьэлов хисирени э юревоз, ченд е чорек юш нисе хосде гуфдире юре, энжэгъ э юревоз эдее «вози» сохде, руз гировунде. У хосдени Марале у бикен, сэхьиб хуне, девлети гуфдире нэгъ. Имбуруз у вир сохдге гьеме девлет, бире-небирей хуьшдере, мундге сип-супой, тенбирэхьне, пойбирэхьне, у гье гьечу сэхд, эз дуьли-жуни мигогъу Марале, жун, нешумой хуьшдере мидуь, мисуьперуь эри эню. Оммо муьгьбет гуьле хунои: гуьл хушбуь доре, зигьисде нисе дануьсде уре э поезов шиширенге, зирпой сохденге.

Эгенер Бобоире э де одомигъойгеревоз гъэре мибисдоге, э угьоревоз рафде-оморе, гоф-гелиж, дусди-шинохи мигердундге белки дуьл эню екем мерома э угьоревоз, у гьечи лап сэгъэр ни-хурд. Оммо Бобои пушотинере хуно э де одомигъойгеревоз гъэрей ю, шинохи-дусдию небу. Томом гъуьлом эню гуйге э гъэд эни чор боруй хьэёт дебу. Чуь биренбуге, чуь рафдембуге эз боругъой хьэёт зуло э гъэвл эню недебу, уре гьаежон нисе сохденбу. Унегуьре э гьейсэгъэтинне хьол эню ижире тэхьнои лап гурунд кори сохденбу э дуьл, э гьовой эню, гуйге дуьл энуре эдее чендпуге бор шишире, сигъмиш сохде.

Оммо Марале имогъой унгъэде гьэгъригъо, гъингъонигъой эн Бобои дуьлпесо нисе сохденбу, ченгъэдер дуьлпесо сохденбируьтге уре, чуьтам э ю дениширенуьтге гьемватанигъой эню — дербендигъо. Э и гьэдимие чуькле шегъерле, эжеки зигъимденбируьт е бисд гьозор одоми зиёдте, омбардеки одомигъой эню дануьсденбируьт, ки э хуней эню бичераховский полковник зигьисди, пезде эжноби офицер-турк, комики уре эри хуьшде ошне сохдебу. Э пушой чум эн гьемватанигъой энугъо, синемиш сохдебируьтгъо гьэзобгъой эн оккупантгъой казакгъой Бичарахове ве талашигъо, гужгъой эн туркгъоре, э суьфден рузгъо, угъо инжо оморенге, и кор эн Марал лап дивинлуь ве беднумлуь бу. Эзу кор бэгъэй

улго э сер офдоренбируйт, ки Марал и овоме, бегьем сер-зугьун неверигьо естиме-нуькер хуней хуьшдере э пэхьникне ошней хуьшде чарунди, э коргьой хуьшдеревоз мунидгьо эгьуьлеш э сер энуневегьишди. Марал эри энугьо е хьэёсуьзе, хьиллес, рушдешоволию буш гьисдигьо зен нушу доренбу.

Доворигьой энун э леглэй эн омбаргьо дебу. У эз куче э гиросьдеки кими мердгьо э луттиривоз дуь екире чум зере, лово э дигиле хэнде веберде, э хэнде-руьхшендиривоз мигуфдируйт дуь эз еки:

— Инией эдее рафде гьэгьбечепел!..

— Недирейт э чуй хьол расундиге у езугьэ кукче-нуькер хуьшдере?..

— Эри ошней хуьшде-турк нисе гирисде у?

— Эгь, эри энун бешгьэ нисди: казак, турк, одоми хуьшде, енебуге эн кесиге, токи уре эри ошноети сохде одоми бу.

— Эле, э товун англичон нешиновусдейт? Чуйтам у парталгьой зенуне вокурде оморевуге эри хисире э Маралевоз? Песде уре е ченд одоми гирдебуге э ён лэглэй гьопуй энун гье у туйкем, кейки уре воисденбу дарав э пэхьники, кес недиреки э хьэёт энун?

— Чуйтам нешиновусдейм, шиновусдейм. Эдете гуфдиренуьт: Марал хуьшдениу гуфдиребу, гьэдэгьэ зереву э энгличон э кию э оморекни парталгьой зенуне вокуну биев гуфдире, егьни, кес недануь мерд хэйлогьни бирен энуре. Коргьой гуьюгьоре хуно: туйлки сер хуьшдере э куле пэхьни сохди, оммо гьерчуь дануьсдени дуьм юре винирогор кес нисди.

Гуфдире гереки, ки Марал е гилеш, е доне энгличонеш гьич э чум хуьшдеш недиребу. Оммо эз расдиш э сеимуьн руз Марал яралуь бире бэгьдо, энгличонгьо дироморе бэгьдо э Дербенд э е «партал зенуне» вокурде солдат англичаниривоз эз ён гьопуй хьэёт эн Марал э гиросьдеки э у вохурдегоргьо биреву.

Э глэрей оккупационни частьгьой эн англичангьо дебируйт гьемчун шотландски подразделениегьо. Э жигей глэдотие форма (парталгьой солдати) э сер эн жогьиле, сипре, муйзерде шотландски солдатгьо нерме, гиргине беретгьо вебируйт, э пой ишу э жигей шовол — доме-домое юбкагьо те сугьразани. Суьфдеи рузгьо дербендигьо гьерчуь дануьсденбируйт угьо жогьиле солдатгьо нисдуьт, жогьиле зенгьоют, комигьорекни англичангьо овурдет э хуьшдеревоз эри кейф солдатгьошу.

Е гиле е руз шохьонгум эз шев хэйли вэхд гиросьде е жогьиле жонлуь солдат шотланди эжеиге эри кейф сохдей хуьшде мунде, серхош, мэгьни хунде-хунде эдембу вогошде э казарма. Мегь ноябрь бугеш, гьово гьеле хиник небу. Э сер солдат гиргине берет вобу, э тен ю домо-домое юбкай пешми. Эз зир эн юбка бирэхьне занигьой энун веди бируйт. Гье и вэхди дуь мерд-дербендигьо, ичку хурдегьо, ведироморевуьт э куче эри гешдешу, неденишире

э буйругъи комендант: эз сер шев те себэхъ бире э куче гешде гъэдэгъи гуфдире эри одомигъой шегьер.

Э куче гъейсегъэт е доне инсон небу. Шегьер торик бу. И е сал зиёд бу фонаргъо э кучегъо дегесунде нисе оморенбируйт. Энжэгъ нимелите менг эдембу е пертовуш товуш сохде кучегъой э гурунде хифлет дебугъо шегьере. И две пиёне дербендигъо тьетте дирe жогъиле солдате э и торики шев э куче, эжеки е доне нешумо нисди эзишу бэгъэй, шор бисдорут. Угъо эришу гьерчъу дануьсдуьт и зени, эз зинохоней эн мадами э ён Шурински гъопу гъисдигъои, комиреки гье у руз Бичарахов шегьере вегирденге хилос сохде оморебу эз дуьсдогъи чуьн «гъурбуни эн террор большевики» ве уре доре оморебу ихдиёри эри пушотеине «хэйр-луе кор» хуьшдере гене гировунде.

Дуь пиёне мерд эз солдат куьнд оморот, сер гирдуьт уре эри десе-дес сохде, э гужевоз кешире берде э ишуревоз. Шотланди гье усэгъэт эз терс ишор бисдо, серхушию гирошд. У эз дес энугъо хуьшдере ведешенде, зури-зури видовусд э ки эз ю куьнд бугъо гъопу, сер гирд эри э кемеревоз, поевоз гъуьл зере, вокурде дер гъопуре эри дерафде пэхъни бире эз дес эни дуь пиён. И гъопу-гъопуй эн хъэёт Марал бу. И дуь лутие пиёне мердгъо видовусдуьт оморот э песой эню. Э фикир шотланди, гъелбет, неомо, угъо уре зен дануьсдет гуфдире. У гьерчъу дануьсд и дуь серхуше туземцгъо ушогъбазгъоют, эзу товуне эдее э у хъэлово биренуьт. Увэхди солдат шотланди лап хуьршлуь, гъээоблуь бире, чаруьсд э лой энугъо, э зугъун хуьшде келе-келе нифри сохде-сохде угъоре, офдо э пиёне дербендигъоревоз э сэхде женг. Веди бу ки и жонлуье шотланди дануьсденбу жирей боксерски женге. Дэгъэм эн гужлуье муьшдгъой эн жогъиле шотландире, угъо э хуьшде синемиш сохдуьтки, сифетгъо, гъэбуьргъэгъошу хэхэ бире эз пулатие муьшдгъой эню, дуь пиёнгъо дес кендуьт эзу. Увэхди угъо эришу фикир сохдуьт, ки ишу гъэлет бирет: и одоми неки зен нисди, мерди, серзиёди — холисе пегъливони.

Неденишире э ижире овхьолет, ижире кор, и гъозие гирошдебу гуфдире э ён гъопуй хъэёт эн Марал, эзу вэхдевоз кимигъо сер гирдуьт эри гуфдире, ки у солдат энгличони пэхъникие ошней эн Марал бу, ки у э гъосутевоз парталгъой зени вокурдебу э ки Марал э оморекки уре диругор шек несоху ю мерди гуфдире. Э гъечиревоз э сер ченд хэбергъо ижире гъэйбетиш верафд э сер эн гъич эзи кор хэбер небугъо Марал.

\* \* \*

...Э сер васал 1920 сал, кейки суьфде сер гирдебу эри гермие рузгъо бире, эн суьфле эз емишдоргъо э богъгъой Дербенд гуьл кендебируьт бодондоргъо, гуйге сипре партал вокурде, сер догъ-

гьой эн Жогълуре мохбере хуно дегирдебируйт тозе савзе-гиёв-гьо. Гьемин э и рузгьо эз гиснеигьо, гьэтмэгъэришигьо, сурулигьо визор, хэсде, вомунде шегьер гене омо власть советгьо...

Тозе власть мэглуым сохд, ки метлеб энугьисди — вокурден тозе жэгмиет социалисти, эжеки нибу одоми одомире эксплуатировать сохден, нибу гьечи: еки гюшир, бэхдевер зигьуь, еки — косиб, юхсул...

Оммо э суьфден салгьой ешимиши хуьшде жогьиле власть совети э хори, пул, девлет эн гюширгьой шегьер дес незе. Богъгьо, хунегьо, ветэгъэгьо вегирде оморебируйт энжэгъ эз дес энугюширгьо, комигьоки э вехд граждански довгю активлуье жире кумеки сохдегоргьо э дуьшменгьой эн большевикгьо. Унегуьре богъгьо, хуне, хьэёт, девлет эн муьрдигьо шуьвер Марал — Ошир Гьэзей Лугуи гьеме мундебу эри энугю. У пушетоинегьой хуьшдере хуно э сер фейтун хуьшде венуьшде, нуькер э пушой фейтун вери э олхогьиниревоз рафдембу эри хуьшде э богъгьой онгури хуьшде, э гьержой юре воисд.

Марал гьелеш жогьил бу, омбар рач бу. Имогьой, кейки у азаде одоми бу, эз екиш бенд небу, уре воисденбу е эз дуьлию гьисдигьо шуьвер эри офде эри хуьшде, сэхьиб глэйл, кифлет бире. Дуьл энугю эри глэйл лап нугьор, хьэсрот бу. Теимогьой у глэйб хуьшдере эри пэхьни сохде, уре нисе воисденбу глэйл зенде, чуьнки лап хуб дануьсденбу ки эри гьемватанигьой энугю нисди зиёдте элчэгъте, охмурлуьте гоф эз гоф «биж» зиёдте.

Э е доне мердевоз, э гьисмет энугю расд оморебугьоревоз, у е бегьеме шори, мозол недиребу эзугьо. Фэгьире Ошир Гьэзей Лугуи, комиреки у унгъэде нисе хосденбу, ченгъэдер хуьрмет гирденбу уре, эз гюьмуьр дуь гиле зиёд эз ю келе бу, уьсделуьге лап нечогъэ одоми бу. Эз дуьимуьн «шуьвер» энугю Обой э дуьл энугю энжэгъ терс, хьэлежигери демунди, комиреки у э чум дире нисе хосденбу. Шефик-паша гьеми жогьил, гьеми рач бу, эри мерд гьэдерсуьз рач бу. Оммо у э хуней Марал зигьисдеки э гужевоз юре эри хуьшде ошне сохдебу, гьич е тикеш хотур, хуьрмет энугю нисе дошденбу, сер зиёди пушой э ватан хуьшде э Турция вирихде гунле зере юре некуьшдегьо рэхъ гьишдебу. Нуькер ю, Бобои, гьеми жогьили, гьемиге лап хосдени юре, хьозури эри ю жун хуьшдереш эри доре, э гюв, глэтошиш эри рафде, оммо мувэхьсуьзи, е тэхде гюв берден, э хуьшде недерире хунои. Песини вэгидегьо у лап чешмиш, жингире хуно бири, эри ветовусде уре лап четини.

Хэйти възд гьич эз ёр, дуьл эн Марал нисе рафдембу ижире эгьвол, лап гьаежон сохдгьо уре, дуьл юре эз мунде жигеш хэреб, гьэреболугъ сохдгьо.

Эзи е мегъ пушо Бобои гьемишеинере хуно себэхьмунде гьэрзинкере вегирде рафдебу э базар эри чи восдоре. Е сэглэтиге



гирошде бэгъдо нуькер э пура гъэрзинкеревоз вогошд. Оммо у гьетте оморе дере э е зарбовоз вокурд, поисд э лэгIэй дер. Хуни-хуни денишире э лой Марал, у э хуършевоз пертово до пура гъэр-зинкере. Э сер хори хуне эз гъэд офдоре гъэрзинке лов-тигьи бисдо дуне, кишмиш, гушд эри гIош дунен сохде восдоре оморе-бируьтгъо.

Марал дие хуте биребу э и песини вэхдгъо э ижире дирагъо, гъошгъоблуьигъо, хуършгъой эню, оммо дуьл хуьшдере эри хэреб несохде, хъэрекет сохденбу эри э гуш негирде э и коргъой эню. Оммо имбурузинере хуно Марал уре лап гьечи гIоси-бед неди-ребу.

— Бобои, чьуни, чуь бири туьре? — э мэхьтелиревоз, оммо э нерми, хоширевоз пуьрси у эз нуькер-ошной хуьшде, куьнд омор-е эзу, денишире э сифет ю.

Бобои гуйге гье э и гоф эню дениширебу.

— Туь — гъэлифои! Нелоигъэ гъэлифои!.. — пое э хори куфде, муьшдгъой хуьшдере жарунде, шувунде, э хъэроевоз гуф-ди у.

Марал гъогъ-перте хуно бисдо мунд. Гъэгър, хуърш зе вешенд э келлей эню. У хьозур бу эри нифри, нэгIлети сохде уре, пиш сохде ведекуьрде эз хунегъо, оммо денишики э фураморе душгъо, зимзерд бире сифет эню, э сифет эн лап гурунде, хос нисе бире-нигъо нечогъ ухшеш зеренбугъо, э лугъонд дерафдебируьтгъо чумгъой эню, хуьшдере э дес вегирд. Дуьл эн Марал гье усэгIэт неки вогошд эри эню. Уре э Бобои езугъ омо, дуьл ю с'ухд эри эню. Марал хъэрекет сохд и дуьл юре бизе хуно сула сохдутгъо гофгъой эн Бобоире эри э мэхсере чарунде, боришмиши венгесде э гIэре. Лове э гужевоэ э хэнде веберде, Марал куьнд омо эзу, э хоширевоз с'еркуш зере уре, мугу:

— Бобои-жон, туь гьич фикир сохдени эритуь чуь гуфдиреге? Ки гуфдири э туь ме гъэлифоюм? — Марал э менэхъэфиревоэ дес зе э душ эню, песде бирмунде э сипре, мармаре хуно гъово-мер бугъо раче сифет хуьшде, э зарифати ве е кем клегеди сохде-ире хуно мугу: — Беге гъэлифош мере хуно гьечи рач бирени?

Марал гьерчуь дануьсд и гофгъо, менэхъэфигъой эню екем уре хомуш мисоху. Оммо э жигей хомуш бире, нуькер диеш лап хуьуршлуь бисдо. Чумгъой эню гуйге э гъофой ю верафдуьт, лап лэгъэр бире сифет эню э бируне ведироморе чупуригъой энуревоз гъьрмизи бисдо, гуйге гIэтош гирд гьелуьсди.

— Гьеме гьечу гуфдиренуьт туь гъэлифои гуфдире. Дуэ гуф-диренуьт! — эз гъэгър, хуьурш, битоби дуьл хуьшде, э гужевоэ гурунд нефес вокошире-вокошире, буьруьж дешендере хуно, гуф-ди Бобои.— Ки э туьревоэ гьисмет бирениге, эхир ю пэхуьр бире, зинде нисе мунде. Лелей Ошир чуь мерд бу?! Е озгъун, пегъли-вон! Туьре хосде бэгъдо е сал зиьд негирошд, офдо муьрд. Дуь-

имуын шувертуь — лелей Обой куьшде омо. Нолеигъэ Шефик-паше, ошнейтуь уш гьечу... Меш, меш эй зуригъо мимируьм... Туь — гӀэжелмени, гӀэзронл жунмени.— У е дегъэдегъэ поисд, нефес ю вечире, песде нефес вокошики, гене дуборе пое э хори куфде, гирисдере хуно мугу: — Эгенер туь гъэлифо нисдиге дие эйчуь туь гьечи мере бенд сохдей э хуьшде вогосундей? Эйчуь ме эз китуь рафде, вирихде нисе дануьсденуьм?! Воисдени мере, оммо нисе дануьсденуьм, нисе дануьсденуьм!. Чуь сохум ме?!

Нечире, муйверие чуней Бобои лерзи, чумгъой ю гӀэрс пур бисдоруьт. У хуьшдере гирде недануьсде, гӀэйб оmore уре эз чумгъой ю эдее гӀэрс рихде гуфдире, э десгъоревоз сэхд сохд сифет хуьшдере, чаруьсд э лой дивор, сере фушенде, сер гирд келекеле эри гирисде, душгъой ю верафде-фураморе.

Эзи гофгъой эн Бобои эри Марал гьейсӀгӀэт гьечи омо, гуйге еки вегирд э сер эну дуьшире тиен эн гӀове декирд. И гофгъой эну лап сэхд кори сохд э дуьл эн Марал, сухунд, кобоб сохд уре. У дие э хуьшде неверомо. ГӀэтош дуьл эну гуйге э чумгъой ю жесд. Хуни-хуни, э дуьшмен хуьшде денишуьгъоре хуно, у э гъэгър, хуьршевоз дениши э у, хъэрой сохде, мугу:

— Эй туь геде, элчэгъ, гъэдуьрсуьзе хъэйву! Туь кини э меревоз гьечи гоф сохдени? Вир, ибуд бош эз пушой чумгъойме. Мере дие туьре дире нисе воисде! Белтуьре екиш негирди, бура туьре э гьержой воисд!

Гье у руз Бобои рафд эз хуней Марал. У э рафдеки эри хуьшде теслих сохд дие гьич эри невогошде э ки эн бике ве ошней хуьшде.

Нуькер э минжи хъэет омо расики э лой гъопу э рафдеки. бирден у вешенд хуьшдере, сес шихьиней эн гӀэсбгъоре эз товле э шиновусдеки. Эзижире гурунде дердгъо, фикиргъой ю гӀэсбгъош гьейсӀгӀэт эз ёр эну ведерафдебу. Эри Бобои гьейсӀгӀэт гьечу омо, ки гӀэсбгъо, комигъоки е угъоют э и гӀуьлом дусдгъой эну, юре сэхд хосденуьтгъо, эдете гирисденуьт, огол зеренуьт, минет сохденуьт у нерав гуфдире. Дуьл Бобои лап гъэйнениш бисдо, езугъ оmore уре э хуьшдеш, э гӀэсбгъош. Е дэгъдэгъэ у э минжи хъэет поисде, э хуьшде домунд: вогорду-невогорду? Бирден гье усӀгӀэт э пушой чумгъой эну омо хуьршлуье сифет эн Марал, песини гофгъой эну э ю гуфдиребугъо: «Эй туь геде, элчэгъ, гъэдуьрсуьзе хъэйву! Туь кини э меревоз гьечи гоф сохдени? Вир, ибуд бош эз пушой чумгъойме! Мере дие туьре дире нисе воисде!..» И гофгъой эн Марале у э ёр овордки, межбур сохд хуьшдере эри зури-зури вирихде ведарафде эз хъэет.

Бобои мэхлес сур бисдо эз шегьер. Хэйли взгӀдо екиш нисе дануьсденбу у эжеиге, чуь бириге и сэхьибсуьзе, хунесуьзе косибекуке. Оммо э товун эну ченд жире хэбер дебу э и чуькле шегьер. Кимигъо гуфдиренбируьт, ки гуйге киниге дири уре э дуре шегьер

Самаркенд, унжо у хосди эри хуыште е духдер таджикире, кор бонно, сенгъчи сохде. Кимигъойге гуфдиренбируът, ки уре дирегор бири э Тифлис э пушой эн вогзол. Унжо у эри хуыште будкале нори, мазчи кор сохде, усол нисе зигъисде, эхирки эз ки Марал зигъисденбугъо вэГдо ченгъэдер хубте зигъисде.

Энжэгъ хэйли сал гиросше бэгъдо, кейки э гъэдимие гъэлей эн Дербенд — Нарын-Кала фэхълегъо, специалистгъо сер гирдуътки эри темиз сохде ве кими реставрационни коргъо гировунде инжо, мэглуым бисдо э товун гъисмет эни гъэребэхте жогъиле кук — Бобои. У эзинжо, эз шегьер хуыште э ежигеш нерафдебу, небиребу гъич е рузиш не сенгъчи э Самарканд не мазчи э Тифлис. Фэхълегъо сер гирдуътки эри темиз сохде эз сенгъгъо, хокоругъо гъэриш эн зиндон хонире э Нарын-Кала, комики э лугъонди ве ухшеши эн е дуразе чол бу, унжо угъо э хуърде сенгъгъоревоз, хокоругъоревоз, тор зере хирде остгъугъо, келлегъой эн эз зуревоз муърде одомигъоревоз, ведешендуът эзунжо согъ мунде остгъугъой одомире э гъэд березентови шовол ве дуразе пинжек гъе эзи мол. Веди буки, и скелет э нимелит пусире березентови парталевоз эн куыгъне дуьсдогъгъо, э девргъой эн хон зинде-зинде дешенде оморенбируътгъо э и сегъмлуе гъовре, эжеки угъо лап зу муърденбируът енебуге жингир биренбируът, эзугъо нисди. Сер гирдуътки эри хуб фегъм сохде нимелит пусире пинжеке, эз доруни гъултугъ эн у офдуът е гъуьж дироморе, кара гирде бобожник алати. Унжо э гъэрей е ченд хирде пулгъо, офдут е зерд бире когъозе эн имей ю пузмиш бире хэтгъо, нуьвуьсде оморе э тухэ мерекемевоз, э комики е пертовуш вемундебу жигей эн гиргине муьгъуьр. Чутьтамиш гири хунде бисдо э у когъоз вебируътгъо хэтгъоре. Эз э и когъоз нуьвуьсде оморебируътгъо хэтгъо веди бу ки, и шогъодетнемеи, комиреки дори Батрачком эн шегьер Дербенд э нум эн Бобои Рахманов, ки у кор сохдени гуфдире батрак эн сэхъиб богъгъо Марал...

Э хъисобовоз, гъе у руз э гъэрей Бобои нен бикей ю ижире хуьжетгъо, дуьлмундение гофгъо биренки, Бобои терсире, ки у гене э дуьл хуыште ниворов, гене дуборе могорду э ки Марал, комиреки у пушотейнегъой хуышдере хуно эз жун хуыште зиэд хосденбу, оммо и песини вэхдгъо эз елойге э чум дирe нисе хосденбу, хуышдере серзофруво шенде э сер тижe сенгъгъой эн э гъэд зиндон дебируътгъо, куышдебу. У унжо гъечу муърде домундебу. Ченд салгъо гъечи екиреш хэбер небу не эз муърдеи эн у, не эзу жите эжеиге мегъит эн у.

Суьфдеи рузгъо Бобои рафденге гуйге гъич э гуш, хэъл эн Маралиш недебу у рафди гуфдире. Гуйге гуш эн у динж, дуьл ю эхириш олхогъин бисдо эз дес эн у. Оммо е кем вэхд гирошдки у оморе-оморе сер гирд эри дорихмиши кешире эри эн у. Э ёр оворде уре, чутьтам у буте пушоте сокит, олхогъин, динже одоми, лап

эз дуьли-жуни хуьшде хосденбугьо юре. Марал гьейсэгIэт эри хуьшде вераси, ки э гьэд эни ченд сал тэхьиногьой энү, у неки хуте бири э уревоз, бири е бэхш зиндегуни энү, оммо дуьл энү хосдени уре. Ки и хосден, муьгьбет э ки энү эз зуревоз дебире-бебей э лугьонди эн дуьл энү, эзу вэхдевоз, кейки у сер гирдебу эри зигьисде э уревоз, оммо те имогьой, те у эз ки ю рафде, Марал гьеебо недануьсд и коре. Усуьз гуйге уре дуьл небу, иловлей ю тигьи, хэребе, догьуногьэ хуно бу. Э пушой чумгьой энү оморенбу гьемише чигьрет эн Бобои: шуькестлуье чумгьой энү, могьбуле сифет энү, зеки гировунде шевгьо, рузгьошу. У гьейсэгIэт э дуьл хуьшде эдембу пешмуни кешире эри гьетте Обой куьшде оmore бэгьдо эри мегьр небиреи э Бобоиревоз. Увэхди уре мибисдо шуьвер ю, гIэлгьой ю, увэхди белки Шефик-паше э у дегмиш нибисдоге, дануьсде у шуьверлуье зени гуфдире, гьемватанигьойю — дербендигьо э ю имогьой шефд нидениши, руьхшенди, охмури, хэберберигьо нисохдуьт э песой ю. Белки у э саламете, динже, рэхьмедуьле Бобоиревоз мизигьисд согь гIуьмуьр хуьшде асант, мозоллуь; мозоле эри вир сохде асанти, дуьборе эри офде — лап четини.

Оммо увэхдигьо сике, уьткеми эн гIошире, раче жогьиле зен негьишд уре мегьр бире э нуькер хуьшдеревоз, гьемиге бираче, овоме кукевоз. У э дуьл хуьшде и коре эри хуьшде элчэгьи хьисоб сохденбу. Оммо э дуьл хуьшде уре имид бу, ки Бобои фурмуш мисоху и гьэгьр, хуьжет ишуре, дуь зеки гуфдиретгьо охмурлуье гофгьоре. Бобои омбар у суьз гьэрол нигируь, дуьл энү омбар у суьз тоб нидуь, дир-зу у ёгьин гене могордуь э ки энү. Увэхди у хьэрекет мисоху э дуьл, жун хуьшде эри доноре Бобоире, э мигьробонигьо, хошигьой хуьшдеревоз хос сохде ярай дуьл энуре, бире лап боворине, гьэдуьрдане зен эри энү.

Чумгьой эн Марал шев-руз э рэхь энү дебу. Гьеме э хуне, э хьэёт у дире, дениширенбугьо чигьо э ёр энү Боборие овурденбируьт. КимвэгIдо эри энү гьечи оморенбу, ки гьейсэгIэт Бобон дер гьопуре, дер хунере мокуну мидиров, угьо дуь екире диремунде видов-видов куьнд миёвт эз еки, гьэл мидешенуьт э герденеки, синесов-мибошут дуь зекиревоз гьечи сад сал дуь эри еки тешне, нугьор мундере хуно.

Оммо рузгьо, мегьгьо, салгьо эдембируьт гирошде дуь э нубот еки, Бобои нисе вогошдембу. Сер ебо Марал эри хуьшде фикир сохде, ки Бобои э у небэхши ю э офицер туркевоз гешдеире, тэжир э ю, э хуьшдени Марал невебугеш, Бобои шенд юре, раче, гIошире зене, белки хосди эри хуьшде е зенигере, у лап сэгIэр хурденбу, хуьшдере элчэгь, пойзерере хуно хьисоб сохденбу. Имогьой у ю хуьшдению эдембу сэгIэр хурде эз бедрешк кеширеи э кин эн ю эри хуьшде веровурд сохденбугьо зен Бобои. Гуйге гьемиш гье у тиркому, э комиревоз Марал яралуь сохдебуге

дуъл эн омбар юре хосденбуго Бобоире, имогьой гье у тиркому вогоше песово гурунд яралуй сохди дуъл Марале, келе гІэзнет, негьомо доре юре.

Марал дануьсденбу, ки и гофгьоре э лэгІэй Бобои гьемватанигьой энудербендигьо дешендет, гуйге бикей энуде — сегьмлуйе зени, гьэлифон, беле-филони, еГІни, ки э уревоз куьнд, гьисмет бирогоре одоми, эхир энуде э хуби, ники гьич нивадарав, гьечи-гьечиниге. Гьелбет, у э гьейсэгІэтинегьово, хьол хуьшдеревоз бовор сохд э ижире гофгьо, хьэшегьо, э сер Марал вешенденбируьтгьо. Эхир-эхириш Марал теслих сохд эри хуьше эз гьэгьр эни серсуьзе, гьэдуьрнедане Бобои, (у гьеле нисе дануьсденбу э товун Бобои хуьшдере куьшдеи, э зиндон дешендеи) мифуруху онгурбогьгьой хуьшдере, хуне-хьэет хуьшдере, кучмиш мибу э е шегьериге, эжеки уре нисе шинохде, нисе дануьсде э товун пушотейне зиндегуни энуде. Унжу у мосдону хуне, мирав э е юре воисденигьо одоми э шуьвер, мизигьуь э олхогьиниревоз эри хуьше.

Оммо Марал сер гирдки эри эжиге овурде и метлеб хуьшдере, органгьой эн властгьой жигеи э у гуфдируьт; не фурухде, не э мироти доре онгурбогьгьой хуьшдере э е доне одоми уре ихдиер нисди, чуьнки хори, онгурбогьгьой энуде гьисдигьо жиге, — эн хьуькуьмети.

Оммо и кор энуде эз сер нерафдки, Марал гуйге пешму, дуьлхуьрд небисдо, дуьл ю рэхьэт гьомин бисдо. Э дуьл хуьше уре нисе воисденбу дес вегирде, дур бире эз богьгьой хуьше э рангзере тохсенгьиревоз, хуне, хьэет хуьшдеревоз, хуте бире жирей зиндегуни хуьшдеревоз. Песде эз елойге у де омбаре келе сэхьибдоргьоре хуно имид сохденбу э дуьл хуьше, ки дирзу гене «пушотейне бэхдевер земоногьо» миёв...

Дие имид несохде Бобои могорду гуфдире, Марал эхириш э гужевоз хомуш бисдо, дуьл хуьшдере сокит сохд. И кореш у эз гьисмет хуьше жусд: еГІни, ведини, и бедбэхдиш эз гьисмет юни гуфдире. У э песой ю деворигьо, хэберберигьо небу гуфдире, э жигей эн Бобои гирд эри хуьше фейтунчи е лап пире мерде, комики пушотегьо э гьомборгьой шороби шуьвер энуде кор сохденбугьоре. Тох сенгьире у дубореден ранг зе, тозере хуно сохд. Эри энуде и тох сенгьи бу, неденишире э гофгьо, лозунгьгьой эн тозе властгьо, нишон эн гьемишейне, муьхкеме сэхьибьети энуде э сер эни богьгьою, хуней ю, оводунию. Песде э и тох сенгьиревоз ологьолуь бу еровурди энуде, лап хубе салгьой гІуьмуьр энуде, жовони энуде, э шуьверевоз зигьисденбугьо вэхд энуде...

Оммо эз гьер салевоз муьхкем бирембугьо тозе власт гье эз сал бесал зиёдте эдембу сигьмиш сохде ихдиеригьой эн келе сэхьибгьоре, гьэриш бире э гьеме коргьой энугьо. Гье э суьфдеи салгьой эн власт совети гуьнжунде оморе батрачкомгьо тигьэтлуь денеширенбируьт хазаингьо межбур несохут фэхьлегьоре эри

эз сэгIэт хьэшд зиёдте звер кор сохде, эри зиёдте кор сохден  
зиёдте муьзд дуь гуфдире угьоре, дуьт отпуск э муьзд дореире-  
воз угьоре, эз пул эн сэхьиббогъго батракгьоре доре биёв пой-  
воку, парталгой кори. Эз гьер гектар хори эгенер эз де ранж-  
бергьойге финотдел вегирденбуге евойне налог, эз кулак вегир-  
денбу дуьвойне-севойне. Ужире келе налогго вегирденбируьт эз  
кулакгьго гьемчун у салгьош, кейки богъго, мэхьсуьлгьой энугьго  
эз гиловор, тегерг сухдетге, пуч биретге, енебуге лап кеме бе-  
гьер доретгеш. Неденишире э и овхьолет, эгенер келе сэхьиббогъ-  
го, мэхьсуьлгьго э вэхдию нидоруьтге ижире прогрессивни, ду-  
войне налоге, финотделе ихдиёр бу эз дес энугьго эри э суд доре,  
богъго, хоригьой энугьоре эри вегирде эри хуькуьмет. Унегуьре  
Марал де гIоширгьго-келе сэхьиббогъгьоре хуно лап терсиренбу  
эз агентгьой эн финотдел, э чум дирe нисе хосдембу угьоре. Э  
пушой чум эн Марал финотдел, агентгьой энугь, оморе-оморе гье  
звер сохденбируьтгьго налоггьоре э сер эн кулакгьго, бируьт «беде  
коргьой» эн тозе власти эжиге овурдегоргьго э кин эн кулакгьго,  
гIоширгьго.

Е руз поизи Марал хол-холе шол пешмире э сер душгьой хуьш-  
де дегирде, чуькле бухчелерере э дес вегирде, эдембу э хьомум  
рафде. Э куьнди эн хьомум, э пушой эн чуькле богъчей эн ше-  
гьер е хэйли одомигьго кура биребу чуьиге эдембируьт томоше  
сохде.

Марал гумонлуь ве э нохогьиревоз дениширенбу э гьемвата-  
нигьой хуьшде угьго э песой энугьго сохде, доворигьой энуре  
гирде гуфдире, э сер бире коргьго, дегьвойне небире коргьореш  
вешенденуьт гуфдире нум энуре эри беднум сохде. Унегуьре у  
хьэрекет сохденбу э чум энугьго эри кем вохурде. Оммо и дес у  
хэлгъ кура биреире виники, у тоб недо, сер шоле фушенде э си-  
фет хуьшде, ешмэгъ гирдере (хуно, омо поисд э ки энугьго эри  
дире томошере. Э«мейду» е денуьшдее мерд, фирегье хиегьго,  
гьиргьире сие муйгьго эдембу э эзир дес хуте биригьго оюревоз  
вози бирмунде. Дербендигьго, комингьгоки омбаре томошегьго нисе  
диренбируьт, эдембируьт э келе хьэвесовоз фегьм сохде и гьир-  
гьире сиечердее мерд бирмунденбугьго томошере э минжи  
куче.

Суьфде мерд не ою бирмундуьт э кура бирогоргьго, чуьтам «ке-  
ле мерд не келе зен э гIэруьси «Шолохо» вежегьисденуьтге». И  
вежегьисденигьго гьово увэгIдоигьго лап фирегь мэгIлуьм бу э гIэ-  
рей эн зигьисдегоргьой эн шегьер. Роль эн келе зене, гьэрире э  
е хэндей, томошеревоз вози ою, эн келе мерде — сэхьиб энугь. Эз  
хэндей эн кура бирогоре одомигьго, шоре сесгьой энугьго, веди бу,  
ки угьоре омбар хьээ омо эзи вози энугьго. Э репертуар энугьго  
дебу гьемчун инжире номер эз имбурузине овхьолетгьой зинде-  
гуни: «Чуьтам гIошир-кулак терсирениге эз агент эн финотдел».

Э и номер ою-шефдепойгьо эдембу бирмунде пиёне. шуьгъэм бируне ведироморе гюшире. У гуйге эдембу эз междуьс вогошде, эжеки у те буз ю вероморе хурдебу лезетлуье чигьо, шороб-эрэ-гьи, имогьой лап пиён, серхуш бу, лейлум хурде-хурде эдембу рафде эз куче. Песде «гюшир» эз сэхд пиён бирен хуьшде рэхь рафде недануьсде, дегешд э сер бирэхьне хори, сер гирд эри пих зере. Артист, роль эн «рэхьгироре» возире, э махьтелиревоз денишире э лой эн «гюшир», куьнд оmore поисдени э ки энур. У сер гирдени эри глэйб доре, серкуш зере «гюшире», гуфдире э у, егІни глэйби эри «ижире гюшире, вегирлуье одоми» э куче, э пушой чум эн рафде-оморегор дегешде, хуьшдере биёбур сохде, э хэндеи, руьхшенди венгесде, бигьил у вэхизуьгуь буравгу э хуней хуьшде, э ки эн зен, глэйлгьой хуьшде, комигьоки дениширет э у... Оммо «пиён» эслогь гуш негирд гофгьо, угутгьой эн «рэхьгироре». Увэхди эри терс доре «пиёне», межбур сохде уре эри вэхишде эз дегешде жигей хуьшде, рафде э хуне, «рэхьгирор» сер гирд эри терс доре уре э милициревоз. И десиш ою, егІни «гюшир», э гуш негирд гьелебулей эн «рэхьгироре», энжэгь э дегешде жигей хуьшде, чумгьоре невокурде, десе е пертовуш жимунд, егІни деске эз серме бура гуфдире. Песде гье усэгІэт э олхогьинеревоз чаруьсд э пэхьлуьигей хуьшде, «хиси». Увэхди артист э суьпле хэндеревоз дениши э иловле, чум зе э томоше поисдегоргьоре, песде гьуз бисдо э звер сер эн ою, мугу э гуш ю, оммо келе-келе гьеме шинову гуфдире:

— Эй гюшир, хуней бебейтуь хэреб гердо! Э китуь эдее агент финотдел оmore эз туь подходящий. налоге эри хосде!..

Гьетте «рэхьгирор» и гофе гуфдире, ою гье усэгІэт э «хов» вешенд хуьшдереь У гуйге терсирере хуно, чумгьоре вокурде, дениши э иловле, зур-зур эз жигей хуьшде вэхишде, терсе-терс чумечару сохде-сохде сер гирд енбоки-енбоки, хуьшдере лойлум доре-доре эри вирихде. И номере э фегьм сохдеки, э томоше кура бирогоре одомигьо лап келе-келе хэндуьсдуьт, ведибуки омбаргьой энугьоре лап хьзз омо эзу.

Оммо и номер неки эз дуьли эн Марал небисдо, уре гьэгьр-омо артист ижире возире бирмунд гуфдире э кура бирегоргьо. Эри энур гьечи омо, ки э и возиревоз чуьтам артист, гьемчун кура бирогоргьо э томоше, эдете э хуьшдени Марал хэндуьсде, э терсгьо, гьаежонигьо, хьэлегигеригьой энур э пушой эн финотдел ве-агентгьой энур. У и возире виники, гьечи гьэреболугь, дуьлхурде хуно бисдо, ки дие уре э хьомум эри рафде дуьл небисдо, зур-зур, э хуьшде недерире хуно вогошд омо э хуне.

Эз елойге э гозитгьо, э радио гье омбарте эдембу гуфдире оmore э товун неки сигьмиш сохдеи кулакгьоре, угьоре лэгьв сохде гереки гуфдире чуьн класс, нисд сохде хозяйством кулакгьоре, гуьнжолуь нисдигьо э глэсуьл тозе вокурде оморенигьо.

жэҕиҥиет социалисти, э товун гуьрд сохден э колхозгьо батрак-гьо, косибе ве миёнее ранжбергьоре.

Кулакгьо, сэхьиб келе боггьо, хунегьо э шегьер терсиренби-руьт, ки тозе власть неки боггьо, хунегьой энугьоре эз дес ишу мегируь, белки э ишу хуьшденишуш гъэсд мисохут. Эзижире гоф-гьо, хэбергьо Марал лап сере вир сохдебу, у шев-руз э дуьлесди дебу, э пушой келе секоней, бедбэхди дерире хуно бу. Э сер эн васал 1929 сал боггьгой энуре эн де кулакгьгойгей шегьере хуно вегирде доренки э еки эз тозе энжом сохде колхозгьо, у согъ е мегъ эз хуне неведироморегу э ёс нуьшде одомире хуно. Э дуьл эну днеш лап сэхд кори сохд, эз мунде жигеш гъэребелугъ сохд, у шиновусденге, ки суьфдеи руз э кор э вегирде боггьгой эну колхозчигьоре э бейдоггьо, лозунггьо, гьовол-зурнаревоз берде-бируьт, э мигид совети, э демонстрацияре хуно. Омбаре вэхд не-гирошд, кейки Марал эз хуне, хьэёт хуьшдеш мунд. Хуней энуре вегирдуьт эри кантур колхоз гье у руз э дер гьопуй эну веноре омо левгье, нуьвуьсде оморе э келе сэхд ранглуье хэтгьоревоз: «Колхоз Заря Востока».

Колхозчигьо — дигьне батракгьо ве косибгьо, неденишире э «бедными» эни кулаке зен, э у езуггьбере сохде, дануьсде уре эри рафде жиге нисди, беде-деде, бирор-хэгьер ю нисди, теклиф сох-дуьт э Марал, эгенер, гьелбет, у разиниге, эри зиггьсде э хунеле э ён товлей глэсбгьо (имогьгой уш, фейтуниуш эн колхоз бу), эжеки пушоте зиггьсденбу нуькер эну фэггьире Бобои. Угьо имид дорегу уре эри хуб оводу сохде у хунелере, эгенер Марал рази гьисдиге эри зиггьсде унжо. Оммо Марал э теклифи энугьоре эри хуьшде серкуши, охмурире хуно вераси, еГни, гуйге э и ко-ревоз э гловдолгьоре воисдени юре э пушошу элчэгъ, хуьрд сохут, хэндуьт э ю, ком вегируьт эзи бедбэхди эну. Эз елойге зиггьсде э и пушотеине хьэёт хуьшде, дире гьер руз э чум хуьшдеревоз и ю нэхогье дуьшмение одомигьоре, суьфде вегирдетгьо боггьо-юре, имогьгой сэхьиби сохденуьтгьоре э хуней ю, хьэёт ю, чуьтам э жигей эну, сернуьш эн колхоз венуьшде гешдениге э фейтун эну, у коре у э дуьл хушде чихиз сохде нидануь. Унегуьре у э уьт-кеми ве гъэгьр-гюси бирере хуно эз дуьли гуфдире оморегуьго теклифигьгой эн колхозчигьо нэгид, отказ сохд.

Марале, пушой уре хуней хуьшдере гьишде, ихдиёр дорут (э хьисобовоз э буйруггьн эн звери келей шегьеревоз) эри ведебер-де 'эз хуне дуь келе бухчей чигьо, оммо чуь юре воисдениге, угьо-нигере гьемеде гьишде э жигей ю. Марал эн суьфде вегирд мун-дебуггьо пулгьо, суьрхгьгой хуьшдере, тозе ве бугьолуьте бугьо парталгьгой хуьшдере, е луьхьуьф, е болуш ве е ченд чигьгойге. Гьемей энигьоре у э дуь келе сипре руйхьэловигьо доноре, бесд э дуь бухче. У э хуне и чигьоре э вечиреки, э бухчегьо донореки екиш не э песой эну омо эри гешде, фегьм сохде, не э у мешет



бирегор бисдо юре чүь воисдге эри дуь бухче вегирде эз чигьой хуьше.

Марал эз хуне э сиро ведироморенки э гьер дес ю е келе бухче дери, инжо поисдебируйт е ченд одомигьо, колхозчигьо, корсохгьой эн кантур, э глэрей энугьо—сернуыш эн колхоз— е гьуьндуре бигьлуье жэгъэрие мерд, э пой ю шевол гелифе, гердеверие чекмегьо вери. Угьо ивэхди эдембируйт дуь э екиревоз э товун чуьиге э еки келе-келе гоф-меслэхьэт сохде. Гьетте Марал э дуь келе бухчегьоревоз э пушой чум энугьо ве ди бире, угьо гоф ишуьре поюнде э тигьэт ве томошеревоз денишируйт э лой энү. Марал гьетте угьоре дире, эри дуьл энугьоре хош несохде хьэрекет сохд хуьшдере эри э дес вегирде, гьовой хуьшдере, эз дуьлюю чуь келе дерд, сэглэр гиросдените гьеймогьой э угьо эри небирмунде, хуфшдере я пушой энугьо хуьрд эри несохде. У гьеусэглэт сере тик гирде, ловгьоре шишире, э уьткеми ве охмуриревоз, е гоф эз лэглэй хуьше неведешенде, зе гиросд эз ён энугьо. Уре гуйге воисд гье и минут э пушой чум энугьо эри ве ди небире видов-видов ведарав бурав гуфдире эз хьээт хуьше, неденишире э ю кор, ки ү гьич эри хуьше гузет несохдебу ижире руз мёв гуфдире эри энү. У гьейсэглэт эз гьаежони, гьизгьини дуьл хуьше е тикелеш синемиш нисе сохденбу ю хэсден, вомунди гуфдире. Энжэгь гьетте эз хьээт, э сер куче, э песой гьопу ведироморе, у бирден эз гьувот офдорере хуно бисдо, занигьой энү гирдуьт, гурунд, гьургьушуре хуно бисдорут. У пой норе эз гьопуй эн хьээт хуьше ведиромоки дур рафде недануьсд. И дуь бухче гуйге гье эз сери хуьше офдорут эз дес энү э хори. Дуьл энү лап буланмиш, гьэйнемиш бисдо. Марал гурунд нуьшд э сер бухче, Чум руз бугеш, э куче одомигьо бугеш, эри энү гьейсэглэт гьечу омо, ки гуйге у э гьэд мерге више рэхь вир сохдегоре одомире хунои. Уре лап сегьм шиши. У чуькле духделере хуно сере э глэрей занигьой хуьше доноре, пэхьни сохде, зар доно гирисд, э пуш негирде эз э куче гиросдогоре одомигьо.

— Э Марал, и туьни? Туь инжо гьечи эйчуь нуьшдей? — шиновусд у бирден э звер сер хуьше е шинохэ сесе, оммо эз зуре воз эз ёр ю фурмиш (биригьоре. У эз глэрс тар (бугьо сифет хуьшдере тик гирде, дениши э у одоми. Э пушой энү е энгуьле-энгуьле десдечу э дес дери поисдебу е пире мерд, сипре рушгьо. Марал эз расдиш гьеебо нешинохд уре, пезде хуб денишики дануьсд. И бу гьемин у келе мерд Шишет, комики Шефик-паше э хуней Марал зигьисдинбугьо вэглдо нимешев оморебуьто, дер гьопуй энуре куфдебугьо, денщик эн офицер кумеки соху гуфдире э ю момуре эз хуне эри овурде рэхь сохде эри глэйл зенденбугьо глэруьс хуьше. Эзу вэхдевоз имогьой нуьгь сал зиьдте гиросдебу. Куьгьне богьбон, новчи лап пир биребу. Кемер энү гьэд биребу. Эз зир куьгьне сиегье гьобой энү лэгъэре хиегьой энү бируне ведироморобируйт.

Келе, шелгъэме хуно бугъо рушгъой энү, гъошгъой энү шире хуно сипи бируът. Руй пенжегъой дес ве сифет энү лап гъуъж диromo-ребируът.

Марал уре диренки зиёдтеш зар доноре гирисде, э десевоз бирмунде э лой гъопуй хъэът хуыше, мугу:

— Мере и худосуъзгъо, талавурчигъо э сер тие хори гъишдет. Суъфде богъгъоймере вегирдет, имогъой мере эз хунегъо, э и дуъ бугъчеревоз ведекирдет. Ме бегем тэхсиркоркоруъм шуъверме гъо-шире одоми бу гуфдире эри гъечи сеге хуно мере эз хунейме пиш сохде ведекирде?!... — гирисде-гирисде мугу Марал.

Оммо Марал не гуфди э Шишет, ки колхозчигъо, дигъне бат-рагъо, фэхълегъо, «худосуъзгъо, талавурчигъо» лап уре гъечи «пиш сохде» неведекуърдет гуфдире, негуфди угъо э у теклиф сохде-бируът эри зигъисде э у утогъ, э ён товле, эжеки пушоте нуъкер энү зигъисденбу, негуфди, ки уре угъо минкин доруът гъеме мун-дигъо пулгъо-суърхгъой хуышдере эри вегирде ведеберде э хуыш-деревоз.

Неденишире э ижире шуъкеети эн Марал, келе мерд э ки энү дивунлуъ несохд э тозе колхоз гуърд бире одомигъоре. У лап хуб дануъсденбу омбар гурунде хъол-овгъолет эн косибгъой Дербенде. Кире эзугъо е ним гъопо\* (ним чороке гектар) семе богъ бире-горе одоми, у хуышдере мозоллуъ хъисоб сохденбу, чуъш бисдоге, лап кемиш гъисдите, уре гъисди хорилей ю, мэгъдон эн ебототе ешемиши энү, эз гиснен нимируъ. Оммо омбаргъоре уш небу эз дгъ дес, эз дуъ пой бэгъэй, нисе дануъсденбируът себэхъ чуътам е тике нун офутге, гъэзенж сохутге эри хуыше, эри гъэйлгъошу. Омбаргъой энугъо э дэгъмее хунелегъой гилови э «Тенге мэхъле-гъо» зигъимденбируът дуъ э бинабузеки. Оммо омбаргъоре ужире хунелегъош небу, э киро зигъисденбируът.

Гъелбет, гъеме гъоширгъо эз е гъолуб вегирде неоморет, гъемей энугъо эз е хэми сохде неоморет. Э гъэрей эн гъоширгъой Дербенд дебируът ужире одомигъо эри фэхъле дуъл сухунденбируът-гъо, рэхъмедуъле одомигъо, чуън Ошир Гъэзей Лугуи, Оврогъом Нетен, фэхълере хубе муъзд ве гъемише э вэхдио пул жофоюре доренбируътгъо, терек бисдоге э ишу, кифлет ишу кумеки сохде-горгъо. Оммо келе мерд уреш хуб дануъсденбу, ки бируът ужире сэхъиб келе богъгъо, гуж сохденбируътгъо э фэгълегъошу. Фэхъле-гъоре е дегъ гиле мигъишд э пой ишу оморе, те ебо муъзд жофой энугъоре доре, э чуъ вогънеревозиш хъэрекет сохденбируът эри гирде эз муъзд энугъо. Оммо келе мерд е гофиш негуфди эз товун гъейсэгъэт э дуъл ну оморутгъо фикиргъо, шуъккетигъой эн Мара-

---

\* Гопо — е чорек гектари.

ле шиновусдки. У энжэгъ гүфди эз жогъиле раскулачивать сохде оmore зен, уре дуьл, улут, несиглэт дорере хуно:

— Гъеме э дес худо дери, хэлефме. Худо эз зверсер чуй нуь-вуйсдиге гфе у бире. Инсон э худо доре дерд хуьшде биё тоб дуь.

— Худо!? Эжи худо!?. — Глоси бирере хуно, гъирке сохде, келе-келе мугу Марал. Песде дере э лой гъопуй хъёт кешире, мугу: — Худо эйчуь зере нисе куьшде и бижогъоре, и гуж-зулуме э ме овурдетгъоре?!..

Келе мерд э дивунлуьиревоз сере жумунд:

— Мегу гъечу, хэлефме, — дэгно зерере хуно мугу эзу келе мерд Шишет. Песде дениши виники э иловлей энугъо хэйли одомигъо кура бирет, мердгъо, зенгъо, глэйлгъо, э томоше кура бугъоре хуно, кими энугъо эдете эеки пичи-пичи сохденуьт, пире мерде хъэз неомо эзи кор. У буз эн энгуьл-ээнгуьле десдечуй хуьшдере э хори зере, сере тик гирде, э биразиревоз дениши э иловлешу кура бирогоре одомигъо, песде э ки Марал руй бире, э жуьрглэтиривоз мугу:

— Туьре жиге нисдиге эри рафде, веги чигъойтуьре — жеш э хунейму. Имуре э хуне эз ме не гъэриме бэгйэй дие кес недери.

Те э хуней Шишет оmore расире Марал эз гофгъой эну дануьсд, ки келе мерд эз ю бедбэхдтен: е теке кук эну муьрди э десдей гъирмизине партизангъо э деникинигъоревоз э женг сохдеки. Зен энуре, жогъиле глэруьс хуьшдере эри шуьверсуьз, сэхьибсуьз немундеи гъишд уре э е биё мерд гъэлейхэнжелн э шуьвер рафде. Зен ю эз гирисдегъо, и ченд сал глэрс рихундеигъо кура хуно бири. И ченд сали угъо пире мерд, пире зен тэхьно-вэхьноют.

Келе мерд Шисете е чуйкле хъэётле не е чуйкле хунел бу. Э и хуне дуь утогъ дебу. Эн гьер утогъ дер ю эри дерафде-дироморе жейле бу. Э еки эзи дуь утогъгъо, эжеки пушоте муьрдитгъо кук эну э жогъиле зен хуьшдеревоз зигъисденбу, у утогъ Марале дорут эри зигъисде.

Суьфдеи салгъо богъгъо, хунегъой Марале вегирденге, у пушотеннегъой хуьшдере хуно хуб нисе зигъисденеbugеш, оммо лап усалиш нисе зигъисденбу. Гъеле уре пул, суьрх бу эри кор несохдеки зигъисдеи эну. Оммо е ченд сал гирошде бэгъдо пулгъо. суьрхгъой эну верасдуьтки, э пушой эну соей гиснеи, глониети поисдки, у лап терси сер гирд эри гъэйгъу кешире: чутам гъээнж сохуге пул эри дуланмиши хуьшде. У гъеле жогъиле, жунсогъэ зен бу. Оммо сер ебо э фикир эну оmore, ки эри е лугъэ нун гъээнж сохде у, дигъне глошире, вегирлуь:е зен, сэхьиб келе богъгъо, хунегъо, э фейтун хуьшде венуьшде гешденбугъо хуьрд соху хуьшдере, дерав э колхоз э дигъне фэхьлегъой хуьшдеревоз кор соху — хуьшдере э колхоз э дигъне фэхьлегъо, хуьшдеревоз кор соху — и фикир бизе хуне сула сохденбу дуьл энуре, эри энч келе номус,

хуьрдире хуно оморенбу. Эри гисне немунде, эз гиснеи немуьрде у сер гирд э хуне эри журуб, герме шолгьо бофде. И коре у хуб дануьсденбу. Э и кор у хуте биребу гьеле духдер, э хуней бебе гьисди. Песде у э шуьвер оmore бэгъдо гьемише эри ебенжэгъи хуьшде кор бофдеире сохденбу. И бофде чигьой энуре гье э гъэд хуне оmoreгоргьо восдорегоргьо биренбу.

Оmmo сер ебо э дуьл энугьор эн гирошде рузгьой энугьоре, э ёр ю оmore пушотейне зиндегуни энугьоре, бужу сохде дуьл энуре, у тоб недоре, гъэрол негирде мэхисд мирафд эз шегьер дур э кин эн пушотине богъгьой хуьшде. У э сэгIэтгьоревоз лос бире, мипонсд, гьейрон бирере хуно, э пушой эн рангие тох сенгьи, хубе, жогъиле, гирошде рузгьой хуьшдере э ёр оворде, веровурд сохде. Гьер гиле э ижире възд э дуьл энугьечи миомо, ки у дир-зу гене мибу сэхьиб эни богъгьо, комиреки ведешенди эз дес энугьоре Советгьо, у э ниетгьой хуьшде гене мивини хуьшдере, чуьтам у, пушотейнегьоре хуно э сер тов-товие, гъэд ю мохбер кешире фейтун хуьшде вери гирошдениге эз гIэрей гьопуй эни тох сенгьи, э онгурбогъгьой хуьшде, эз зар-суьрхине гьопуй женнет гирошдере хуно...

## ЭЖИГЕЙ ЭПИЛОГ ЕНЕБУГЕ — ЭХИР ЭН ТОХ СЕНГЬИ

Хьэшд мегь гирошде бэгъдо эз ме э Марал вохурден э ён эн тох сенгьи ве гьозиегъэдер зиндегуни энуре эрме ихдилот сохдеи пушотейне батрак энугьоре э гьирогъ серине эрх э зир энжилдор э онгурбогг.ой колхоз «Заря Востока», ме кучмиш бире оmoreум эри зигьисде э Махачкала, дарафдуьм эри кор сохде инжо э Дагестански научный исследовательский институт эн торих, зугьун ве литература. Э гъэд се сал ме инжо кор сохден кура сохдум ве ведешендуьм суьфдеи сборник «Фольклот татире, «Терминологией гофнемей уруситатире».

Гье э суьфдеи сал ме э Махачкала оmoreнге сер гирдуьм э келе войге ве хъвесевоз нуьвуьсде суьфдеи повестьмаре эзи томошее зиндегуни, гьозие-гъэдер эни гIэлемете зен. Оmmo е ченд серней эни повесте нуьвуьсденге, бирден э дуьлме зеде расирере хуно э фикирме омо, ки ме эдее э иму гьунжо, яратмиш, лоигъ нисдигьо коре сохденуьм. Эхи, неденишире э кими гIэйбгьо, кемсуьгигьой эни гIошире зен, э ме нуьвуьсденуьмгьо повесть у эдее хубе одоми нушу доре, эри энугьоре ме гуйге эдее дуьлсухуни, хьэйфбери, езугъ-бери сохденуьм? Уsole одоми нушу нисе доре гьемчун муьрдигьо шуьвер энугьоре — келе гIошир эн Дербенд Ошир Гъээей Лугуй? Угьо гьечи веде биренуьт э повестьме, чуьтам э товун энугьоре эрме ихдилот сохдебуге пушотейне батрак энугьоре, имогьой колхозчи — лелей Юсуф.

Гьисди ме увэгIдои лап жогьиле одоми бйруьмгеш, имогьой дануьсденбируьм, ки гьеме пушотеине Гюшире одомигьо зулумкоргьо ве хунхургьо небируьт. Ме чуьн еки эз боверинлуье комсомолчигьо э томом класс эн Гюширгьо э инкориревоз дениширенбируьмгеш, имогьой дануьсденбируьм, верасиренбируьм, ки э ГIэрей энугьош дебируьт неки усоле одомигьо, гьемчун хубе, рэхьмедуьле одомигьош.

Оммо эхи Марал сербинелуье «героинай» эн ме нуьвуьсденуьмгьо повести? Ихдийрими мере, лоигьими э ме эри э классови ёд гьисдигьо эриму зене бирмунде чуьн хубе одоми, гьурбуни, дуьлсухуни, хьзйфбери, езугьбери вэхизунде э кин энэ дуьл эн хундегоргьойму?

Хэйли фикир сохде бэгьдо, ме эример теслих сохдуьм: ижире кор э ме, э ананмишгьойме лоигь нисди. Оммо эри бирмунде чигьрет эни зене е жирейге, мере невоиод ве ме жужире коре сохдеш нидануьм. Э гьечиревоз ме гьишдуьм нимелит и повесте бегьем не нуьвуьсде. Мере хуьшденимере дие имид небу ме могордум гуфдире э ки эни повесть, минивисуьм гуфдире уре те эхир.

Чоримуьн сал сер гирдебу ме э Институт кор сохдеи, Келе довгюй Ватани сер гирде омогьо. Гье суьфдеи руз эн довгю мере огол зеруьт э салдати. Э гьечиревоз ме межбур бисдорум эри э жигей ГIэлем вагирде э дес шушкаре, э жигей куьрси эн биёвгьо ГIилмчи нуьшде э сер дараме егьер кавалеристи.

Э ватан э Догьисту ме вогошдум бэгьдовой чордегь салиге эз довгю сер гирдебугьо вэхд. Оммо э гьэд эни салгьо, эжеш небиремгче ме э жергегой Лешгер Совети гьисди, ме омбар э ёр омурдембируьм томошее гьозией эн Марале, комиреки эример ихдилот сохдебу гьэреулчи эн колхоз лелей Юсуф, ю хуьшдению э жогьиле салгьой хуьшде ошугь бугьо э Марал, омбаре жовонгьой Дербенде хуно увэхди. Белки ме эз расдиш гье гьечу мигьишдуьм нимелит и повесте те эхир ненуьвуьсде, эгенер э сер эн Марал э пире руз энэ ниомоге ижире тозе гурунде гьозие, э товун комики ме дануьсдуьмки, у дуьлмере эз пушотеине гьозие-гьэдер зиндегунни энэ зиёдтеш гьаэжон сохд.

Э 1955 сал ме эз лешгер вогошденге, дегь сал зиёд кор сохдуьм корреспондент эн республикански гозит э зугьун уруси «Дагестанская правда». Э хосиет корме гуьре ме омбар рафденбируьм э жуьрбежуьре районгьо, шегьергьой эн Догьисту, гьелбет э Дербендиш. Э и шегьер мере гьемише хьэз оморенбу эри оmore, инжо оmoreи гьемише мере гьаэжон сохденбу. Сер ебо э Дербенд оmore эример гьечи оморенбу, ки пуйге ме э дуре томошелуье сафар рафдем. Ки е гиле семе инжо бириге, э и э еки эз лап гьэдимие шегьергьой эн ГIуьлом, белки зиёдтеш гьэдимте эз «гьемишеине ше-

гъер» Рим енебуге Гомер э «Илиада» тэгҮриф доригъо лап гъэди-  
мие шегъер Трои, дирите э чумгъой хуышдеревоз зурбо келе гъэ-  
лебенде боругъой сентги энуре э минорегъо ве тиркашъо (бой-  
ницагъой) энуревоз, одомире лап мэхътел гъишденигъо келе гъэ-  
ле — Нарын-каларевоз, э зир энуре деруытгъо зирхонегъоревоз, геш-  
диге э хушмензерие гъиругъгъой эн шегъер, эжеки лап омбари гъэ-  
димие едигоригъой эн куыгъне гиросше девргъо, земонегъо, — у  
одоми э дуыл хуыше екемлей семе романтик гъисдите, у, гъелбет,  
мерасуь мере. Ме гъеле нисе гуфдире э товун энуре кор, чуыжире  
мэхътел, гъайрон бирениге туь верафденге э сер догъ, эзунжо эз  
зевер дениширенге э пушойтуь дегешдигъо шегъер, гуйге э кеф  
дестуь эдеь диретуре. Сер шегъер, гуйге эн э овосунегъо гуфдире  
оморенуытгъо дэве хуно, чуьн э сер болуше хуно, э сер догъ вери,  
пойгъой ю э буз эн дерьгъгъо дери, иловлей ю эз гъердуь тараф эй-  
лонмен э онгурбогъгъоревоз, гуйге э хэсде, саре савзелуье више-  
ревоз.

Песде сер ебо ме инжо э Дербенд оморе тоб нисе доренуьм ебо  
те неоморе, сер некешире э Нарын-кала, э и еки эз лап келе бэхде-  
вере муыгуыжуьз эн гуылом, оморе поисде э фикир ве могъбули-  
ревоз э гъиругъ эн лугъонде «зиндон хони», эжеки ченд жире одо-  
мигъо э (буйругъ эн залумие хоневоз зинде-зинде гъовре сохде  
оморет, эжеки езугъэ жовон Бобои, э дуыл комики эдембу дегеси-  
ре, сухунде гъемей (беден юре гІэтош муыгъбет эн Меджун э ки  
гуызеле бикей хуыше Марал офди гъемишелуыг эри хуыше хило-  
си, динжи эз бедбэхде муыгъбет хуыше.

Э еки эз нуботлуье командировкагъойме э Дербенд э минжи  
васад гъозори нугъсади хьофдод екимуьн сал, ме э Нарын-кала  
сер кешире бэгъдо, воисд мере дерам фегъм сохум музей эн ше-  
гъере. Музей увэхди э звери куьнж богъче дебу э минжи эн ше-  
гъер... Васал, гъеминон инжо одоми омбар оморе, иллогъки келе,  
отиле мердгъо. Оморенуыт инжо эри э зир серине доргъо, э сер  
дуразе скамейкагъо эри нуыше, рэхъэти вегирде, дуь зекиревоз  
ихдилотгъо сохде, ебонжэгъи вегирде. Келе мердгъоре, э дуразе  
гуымуьр ишу омбаре коргъо, гъозиегъо диретгъо одомигъоре, ом-  
баре гофгъо шиновусдегоргъоре гъемише гъисди гоф, ихдилот эри  
гуфдире дуь э еки, пуьруыш сохде, кимвэгІдо хьуьжет сохде. Чой-  
хоней эни богъиш гъемише одоми пури. Дербендигъо — чойдусде  
одомигъоют. Омбаре рузгъо жогъиле зенгъо-тербиечигъо эз куьнде  
богъчелегъой гІэили овурденуыт инжо чуькле гІэиллегъоре эри во-  
зигъо сохде э мейдулей гІэили.

Ме эз фирегъе жилгъэй эн богъче рафдеки, эжеки эз гъердуьло  
гъэйчи зере, дуз сохде савзее кулегъо бируыт, э зир серине соей эн  
гъуьндуьре доргъо, э сер ковре ранг зере дуразе скамейка, э куьн-  
ди эн музей гъисдигъо хуне нуышдебируыт е ченд пире мердгъо. Ме  
угъоре э хьуьрметевоз руз эхэйрбу доре, эдембируьм зере гиросше,  
оммо гъебо э хуыше домунде поисдуьм. Ме омбар шор бисдорум

э гээд эни э екиревоз инжо нуьшдебируьтгьо келе мердгьо винуь-руьмки куьгьне шинохмере лелей Юсуфе. Эз елойте ме омбар мэхьтел мундуьм винируьмжи — у лап кем дегиш бири эзу песини гиле ме уре диремгьо зйло. Эхи эзу вэхдевоз омбаре салгьогирошди. Оммо у э тойгьой хуьшде пуьре жуьргIэтлуь веда биренбу, нуьшдебу тик, кемере гьуз негирде, ранг мнхэкие чумгьой энупушотейнере хуно э хуши ве мигьровуниревоз дениширенбируьт э одоми. Энжэгь хэсде рушгьой энупу, увэгIдогьо сип-сиегь бу-гьо куьмуьре хуно, имогьой верфе хуно сипи бу.

— Э лелей Юсуф, руз ишму э хэйрбу! — куьнд оmore эзу э гьаежониревоз дес дорум уре, сэхд э дуьлме бовор сохде, ки ме егIэлмиш небирем, и келе мерд гьемин у Юсуфи, комики эриме гьозие-гьэдер эн Марале ихдилот сохдебутгьо.

Келе мерд десмере э дес хуьшде гирде, тэгIди несохде, вэхисд эз жигей хяуьшде, э мэхьтели, э думит домундере хуно, хэйли дениши э сифетме, хьзрекет сохде чуьнге э ёр хуьшде эри оворде. Ме бирден могьбуле хуно бисдорум, винируьмки у мере нешинохд, комиреки ме гьемей эни салгьо э ёрме оворденбирум.

— Нешинохдит? — гIэйб оморере хуно, суьпле хэнде сохде, пуьрсируьм ме.

Лелей Юсуф дир-дир ведешенд дес хуьшдере эз десме, э эдеблуьиревоз эз гьулме гирде, кеши мере э гьырогь, гене э сифетме э тигьэтевоз денишире, песде сере жумунде, мугу:

— Гуйге туь е дире одомимере хуно гьисди, оммо э ёрме нисди киниге, — сере жумунде, хэйфбери сохдере хуно эри эни фурмуши хуьшде, мугу лелей Юсуф.

Оммо гьетте ме гуфдире э у ме кинуьмге, лелей Юсуф гье усэ-гIэт сере тик гирде хуб дениши э ме, сие чердее сифет энупу эз сипере руш ю лап сиегь веда биренбугьо, шор бисдо. У гьеусэгIэт бебе эз зуревоз кук хуьшдере недиребугьоре хуно, гьечу э гIэзизе, дусдиревоз сэхд гьэл гирд мере э пушой хьэрмэхьгьой хуьшде.

— Туь мере, хэлефме, бэхшлемиш сох, келе мерде, эри туьре гьетте дире эри нешинохдеи, — тэхсире хуно, э гьаежониревоз гуфди у. — Эхи ме туьре диробируьмгьо вэгIдо туь лап жовон бири, гьейсэгIэт муйгьой серту синини эз эн ветете... Туь нумтуьре гирдики, ме е гиле туьре эз сифет нэгI, эз сестуь шинохдум. — Лелей Юсуф сере э гьово тик гирде, мугу: — Э худо шуькуьр гердо, ме туьре бэгьдовой ингьэде сал согь-саламат дирирум. Ме шиновусдебируьм туь э довгIо пуч бирей гуфдире.

— Ме эз расдиш, кем мундебу немуьрдени эз гурунде яра э довгьо, — гуфдируьм ме эз келе мерд, песде лове э хэнде веберде,

мугум: — Оммо мере хос сохдуьт. Чутьтам ишму диренитге — зиндеуьм.

Келе мерд гене гьулмере гирде, теклиф сохд мере гьейсэгIэт бурам гуфдире э юревоз э хуней ю э гьуногьлугьги Ме эдембируьм дирe, ки лелей Юсуф мере хуно лап шори эри гьечи эз некуми бэгъдовой ингъэде сал эеки вохурдеи. Эри хотур энуре негишде, ме гье усэгIэт рази бисдорум, песде эз елойге мере лап воисденбу эзу дануьсде э товун эн «раче гьэлифо» — Марал, чутьтамиге гьейсэгIэт у, зиндите у.

Лелей Юсуф э сер э скамейкай эн богъче нуьшдебируьтгьо хьэрмэхьгьой хуьшде, сер зере, эз гьулме гирде, берд мере. Иму э еки гоф-меслэхьэт сохде-сохде, ведироморим эз богъче, рафдим э лой хуней энУ.

Руз э куьнди сэгIэт дегь бу. Чувьшме э асму эдембу сэхд товуш доре. Эвир темиз, асму кову бу, е доне булут невебу э асму. Себхьмунде эз гьово екем сэхде ворущ оморебу, унегуьре доргьо гьейсэгIэт темиз, шуьшде бируьт, велгьой энугьо эдембируьт руьгь доре, енишгьой эн догьгьо, э север эн шегьер холире хуно э савзее гьивгьоревоз дегирде бируьт.

Ме э дуьлме эдембируьм тэгIди сохдегеш эри дануьсде эз лелей Юсуф чуй бириге Марале, чутьтам гиросдетге, эз иму эеки вохурде эйло рузгор, зиндегуни энУ, оммо чутьтам гIэдот гьисдиге егиле дуь эеки вохурденге, ме ебо пуьрсируьм эз келе мерд чутьтамиге гьово, жуносогьги энУ, чутьтамиге кифлет ю, чутьтам зигьисденуьтге кукгьой энУ. Ме дануьсденбируьм, ки уре се куки, дуьдуьй энугьо келеигьо — дуьдунегьоют.

Эз гофгьой эн лелей Юсуф ме верасируьм, ки колхоз гьеле эзи дегь сал пушо э келе хуьрметевоз фирсоребу уре э пенсия. Оммо э вэхд богъбуррагьо, онгур вечирегьо у, неденишире э келе мерди хуьшде, кор сохдени э колхоз э де колхозчигьойгеревоз эеки. Чуьк-леи кук энУ кор сохдени э колхоз механизатор, гьердуь келен кукгьой энУ — дуьдунеигьо э довгIо пуч бириет.

Е ченд минут у дие эз лэгIэй хуьшде гоф неведировунд, сере гьуз гирде эдембу рафде, э лугьонде фикир-хьёл деригьо одомире хуно, гуйге фурмуш сохдге ме гьейсэгIэт э уревозуьм гуфдире. Неденишире э у кор, ки хэйли салгьо гиросди эз кукгьой энУ эз довгIо новогосде, дуьл энУ омбар гурунд бисдо угьоре э ёр оворд-ки. Ме хижолети кеширере хуно бисдорум: ме недануьсдеки нэхэ-береки гуйге э ярай энУ дегмиш бисдорум, комиреки вэхд, гиросде салгьо гьелеш хуб несохдет, вединики, гьич хуб сохде нидануьт. Песде лелей Юсуф эз фикиргьой хуьшде очмиш бирере хуно, бирден е хубе, шор коре э ёр ю оморере хуно, лов хуьшдере э хэнде веберде, мугу:

— Э ёртуь мунди гозит, э комики сиротме вебу, туь мугьоле



нуувуьсдебиригъо эз гофгъойме, гъул мере веноребиригъо? Ме те имогъош дошдем у гозите, э гъэд чоршеве э зир шише донерем.

Гуюм расдире, дуьлме лап кош бисдо ме и гофе эзу шиновус-дуьмки. Э ёрме омо у жовоне вэхдгъойме, кейки мс эз дигъ эжеки колхозчи э колхоз кор сохденбируьм, оморебируьм э шегьер эри кор сохде э теклифи эн хуьшдени редакцией гозитевоз чуьн еки эз активлуьн селькоргъой эню.

— Э лелей Юсуф, гуйт эрме гьери: омореними келе зен Марал пушотенинере хуно эри сер кешире э тох сентгъи, зиндеими у гъейсэгIэт? — эхириш пуьрсируьм ме эзу и гофе, э дуьлме дебугъоре.

— Эри, оморенбу, дие имогъой ниёв, — кутэхъэ жире жугъоб до у.

— Эле, муьрди?! — э хъэйфбери, сегьмуьсдере хуно пуьрсирум ме.

Расдире пуюм, дуьлме лап турунд бисдо ме эрме фикир сохдуьмки Марал муьрди гуьфдире.

— Ме бега э туь гуьфдирум у муьрди? — мэхьтел бирере хуно мугу лелей Юсуф. — Зиндеи, э келлей пои. У гъеле хьофдоддуь сале бэгъэй нисди...

Ини чуь ихдилот сохдге эрме лелей Юсуф те иму э хуней эню оморе расире э товун педейне гъисмет, рузгор эн Марал.

Песини вэхдгъо Марал омбар нэгI, пушотенинере хуно, оммо неденишире, ки у имогъой келе зен бу, уре унгъэде гъувот, жунсогъи небугеш, гIэребир оморенбу эри сер кешире э тох сентгъи, шуьвер ю норобугъо. Рэхъ дур, четин бугеб эри ону — оморенбу.

Марал ю имогъой эслогъ ухшеш нисе зеренбу э у жогъиле вэхдгъой хуиьше. Е вэхд сип-сипи, гъовомер, руьгъ доренбируьтгъо шишее гъутинегъой эню суьпенже зеребируьт, дерафдебируьт. Темизе, мармарлуье пушони эню гъуьж дироморенбу, шевгълуье, одомире гъейрон сохденбируьтгъо чумгъой эню тор биребиребируьт. Уре екиш небу: не шуьвер, не гIэил, не неве, не гъовумгъо — тип тэхъно э гъемей эни гIуьлом. Энжэгъ е дуьлхоши бу и келе зене — гъелеш мундебугъо тох сентгъи э шекуьл шуьверюревоз ве хэтгъой эн туьроиреоз. Расди э гъопу вебируьтгъо рангъо эз зуревоз тор енебуге эслогъ пузмиш биребируьт. Эз зерде гъолинде туз чигърет сифет эн Ошир Гъэзей Лугуи ве де шекуьлгъойге унгъэде веде нисе биренбируьт. Э чухуреки эн хэтгъо гъов, гиёв вероморебируьт, имогъой четин бу эри хунде угъоре.

Оммо сер ебо Марал инжо оморе гуйге жун эню тозе биренбу. Э пушой тор бире чумгъой эню гуйге и хэзон бире, рафде рангъой эн тох сентгъи гене тозе биренбируьт пушотенинере хуно, хэтгъоре гуйге гене хунде биренбируьт гъе гъечу, чуьтам хьэрфгъой эню векеде оморебируьтге э гъуьндуре, гиргинее сутунгъой

эн сенгъи. Угъо, дуъл энуре гъаежон сохде, э ёр энү овурденбируйт гирошде бэхдевере рузгъой энуре.

И еровурдигъо дуъл энуре екем рэхъэт сохденбируйт, рихунде гӀэрсгъо дуъл эн дердименде одомире рэхъэт сохугъоре хуно. Екем вэхд эзжире еровурдигъо, фикиргъо гъовой энү хуш биренбу, вероморенбу эн ичку, тирьек хурде одомире хуно, хушдере у гуйге э е гӀуълومیге диренбу.

Омбариш Марал э пушой эни тох сенгъи поисденге э пушой энү оморенбируйт чигърет эн гӀээиз бируйтгъо эри дуъл энү — эн шуъвер ю ве ошней ю — Бобои. Марал гуйге э зинде одомигъоре хуно сер гирденбу эри гоф сохде гогъ э еки, гогъ э екигей энугъоревоз, кимвзгӀдо э гьердуьй энугъоревоз гъеebo. Э кими минутгъо гьердуьй энугъо эри энү е одомире хуно нушу доренбируйт. Биренбу гъечиш, ки кимвзгӀдо эз гӀэрей зигърэт эн шуъвер ю, менг эз зир булут ведировгъоре хуно, ведн биренбу чигърет эн бивэхдсуьз эз гӀуъллом рафдигъо жовоне Бобои, комики дениширенбу э у гогъ э келе муьгъбетевоз, хосденревоз, гогъ э келе нэхогъи, душмениревоз. Э ижире вэхд Марал гъе усгӀэт сифет хушдере э дуь десевоз пэхъни мисохд, гуйге эз неветовусдение дорд дореи, лойлум хурде, гъэмиш эз кулок лойлум хуругъоре хуно, зар доноре гирисденбу.

Песини гиле Марал оморенге эри дире тох сенгъире, уре у э жигей ю нефод. Суьфде эри энү гъечи омо, ки у, э хъисобовоз, егӀэлмиш бири, у унжо неомори, эже поисдиге тох эн сенгъи. У э и кор мэхътел небисдо: песини вэхдгъо э ёр энү унгъэде хуб чи нисе мунденбу, э ю ёрфурмуши офдоребу. Оммо у өгӀлейгеш денишики э иловле, вераси, ки у егӀэлмиш небирн, омори эже терек гъисдиге, оммо тох сенгън э жигей ю нисди. Бирден у э зэхълевежгъыревоз вини: э ён энү жиге — тох сенгъи бугъо э гъирогъ эн эрх, эжеки гъейсгӀэт гӀов недери, е ченд сенгъ мунди эз гъемей эни келе гъуьндуьре тох эн сенгъи. Э гъэд эни е ченд сенгъгъо мунди гъемчун у сенгъ, чигърет эн шуъвер ю Ошир Гъэзей Лугун веригъо. Вединики, тох сенгъире вечарундет, сенгъгъой энуре бердет эжеиге. Э эрх деруьтгъо сенгъгъо — песини сенгъгъоют, комигъореки гъеле небердет.

Е дегъ-паздегъ митро дурте эз жиге тох сенгъи, мотор ю келекеле сес сохде-сохде, эдембу гъэнов векенденигъо мошин кор сохде. Э песой рул энү нуьшдeбу е сие чердее кук, э дэгъмегъой маллад, руьгъэй мазутевоз чуьлки бире кабинзон э тен ю вери. Десгъо, сифет энүш э хок не лилевоз пури бируйт. Эз сифет у ухшеш зеренбу э лелей Юсуф э у жогъиле вэгӀдогъой энү. У эз расдиш бу чуьклен кук энү — механизатор эн колхоз.

Песини салгъо е ченд сад гектар тозе онгурбогъгъо дешенде оморебу э колхоз. ГӀов эни чуькле, тенге эрхле дие вес нисе сохденбу режим эн э вэхдию куьгъне ве тозе богъгъоре гӀов дореире

эри эжиге овурде. Унегуьре э кумеки эн гъэнов векеденегъое гуж-  
луьэ мошиневоz теслих сохде омореву куьгъне эрэх эри фирегъ  
сохде. Оммо тох сенгъи э гъирогъ эрх бу. Эри фирегъ сохде уре  
эзу поисдебугъо жиге гуйге миёсде вегирде оmore.

И гъелбет воьне бу. Тох сенгъи э и кор эслогъ мешети небу.  
Эрхэ эй хъэз гировунде мибисдо дес назере э у, эгенер е дуь-се  
метро дурте эз пушой енебуге песон тараф эн тох сенгъи гъэнов  
векенде миомоге, э гъечиревоз уре гъишде э жигей ю.

Холисе себеб эн тох сенгъире вечарундеи е кориге бу. Еки эз  
келе хъокимгъой эн район оморенге э колхоз «Заря Востока» эри  
фегъм сохде чуь.там гирошденеге план фирегъ сохдеи онгурбогъ-  
гъой эн колхозе, винире и раче, гъемей ю нэхче, арнамент гирде  
тох сенгъире, хъэз омо уре эзу. У эри хуьшде теслих сохд буйругъ  
дуь тозе ране зенуь тох сенгъире, э звер эну, э минжи венуь е ке-  
ле рангие сирот эн Леонид Ильич Бережневэ э ковре парадни  
мундир, суьрхине погонгъой маршали ве орден Бесгъуниревоз.  
Оммо у куьнд оmore дениширенки э и тох сенгъи, виники и эз  
«куьгъне девр мунде едигорини», э сутунгъой энун хэтгъой турои  
вери, э звер эн тох сенгъи шекуьл эн пушотейне сэхъиб эни боьгъ-  
гъо вери, гъемин эн у одоми, дес комиреки хуьшдени падшоьгъ Ни-  
колай II гирдебу, эн дусд хуьшдере хуно, у э Дербенд оморенки,  
э е межлуьс э уревоз биренки, оморевубуьо хъоким пешмуре хуно  
бисдо эз пушо-пушоки шори сохдеи хуьшде. У гъэдэгъэ зе э сер-  
нуьш колхоз эри вегирде «и соей эн куьгъне земонере» эз пушой  
чум. Келе хъоким эн район гъелебуле гирд эри сернуьш колхоз:  
эгенер «и соей эн куьгъне земоне» эз хори колхоз вегирде неомо-  
ге, пуьрсуьш энун э заседаний бюро райком пуьруьш сохде  
миёв.

Омбаре колхозчигъо, иллогъки келе мердгъо, э гъэрей энубо  
гъемчун лелей Юсуф рази небируьт эри и тох сенгъи биё вечарун-  
де биё гуфдире: егъни, мунди-мунди э жигей хуьшде, э ки мешети  
у? У вэхдигъо гъеле зинде бу еки эз усдегъо-бенногъо мердгъой  
эрмени, вкурдегоргъо и тох сенгъире э у лап жогъиле вэгъдой  
хуьшде, бисд-бисду сала жовон гъисди. Гъейсэгъэт у хъшдод пенж  
сало пире мерд бу. Оммо неденишире э ижире пире салгъой хуьш-  
де, гъуз бире кемер, у гъеле сэхде одоми бу. Чуьтамиге э у хэбер  
раси ки э у жовоне вэхд ю у э хъэрмэхгъой хуьшдеревоz вокурде  
тох сенгъире воисденуьт вечарунуьт. У лап дуьлпесо бире, вэхшд  
омо э кантур колхоз. Усдо омбар минет сохд э сернуьш колхоз и  
тох сенгъире невечарунуьт гуфдире, бигъилуьт гуфдире чуьн еди-  
гори эн искусство.

Сернуьш эн колхоз келе мерде эри хомуш сохде, гоф до уре э  
назар мегируь гуфдире хогъиши энуре. Гъе инжо у чум зе э кино  
поисдебугъо завхоз эн колхозе, комики омореву э ки энун чуь ко-  
гъозигере эри гъул кешире, деберуь «хуььрметлуьэ усдоре» э гъом-

бор шороби, инжо э хвэёт колхоз дебуго, эзу хубе шоробго гьу-ногълуб соху, э рэхь декинуь.

Е мегь гиросде бэгдо эзи гоф вероморе, сернуыш колхоз тап-шуурмиш сохд э и десде колхозчигь э гъэд е руз вечарунуьт тох сенгъире, сенгъгой энуре э мошинго бор сохде беруьт э ферма эри вокурде эри гуселегой колхоз вокурде оморениго говду.

Те гъеле Марал э жигей хуышде поисде, билбул, гъаежон буре эзи кор э чум хуышдеревоз винигь, эрх векендениго мошин, дир-дир, келе-келе сес сохде-сохде эдембу куьнд оmore э ю поисдебу-го жиге. Дендулубе пулатие ковш энэ э чуней эн сегьмлубе гъеж-догьо ухшеш зеренбуго, тижэ, келе дондугьой пулати хуышдере денушунде э хори, пенже зерере хуно хорире, хок энуре вегирде, шенде э гъирогъ, эдембу пушово оmore. Марал терсире, ки мошин гъейсэгъэт миёв э ковш хуышдеревоз мегируь сенгъэ э шекуьл шуьверюревоз, пертово мидуь э гъирогъ, сер юре хок пур мисоху, у дие гъич нивинуь уре, у серсуре хуно буре, вечаруьсд э иловлей эн эрх, недануьсде чуь сохуге, чуь чоре, иллож сохуге и сенгъэ эри хилос сохде. У хуышдере э сухдениго хуне э гъэд гъэтош дешенуьго одомире хуно, эри э хуне демундигьо соворе гъил хуыш-дере хилос сохде, эз гъэд лубь гъэтош уре эри ведировунде, дешенд хуышдере э гъэд эн эрх. Кун эн гъейсэгъэт глов недебуго эрх сиегъ, малади бу, лил гирдебу. Марал дуьл ю тэгди сохде сохде, лерзире пойгой ю суьрт рафде-рафде, эз теретэгди, гъае-жони, гъизгъини гъемей жендек ю эрэгъ шишире, э назуке, хуыш-де, гъилнжевор гирдере хуно энгуьшдгой дес хуышдеревоз сэхд гирд эз дуь лой хинике сенг, э комики вебу шекуьл эн муьрдигьо шуьвер энэ. Э келе четниревоз у дануьсд сенгъэ эз жиге жумун-де — мэхьтеле кор бу, эз же оmore гъейсэгъэт ижире гъувот и лэгъэре пире вомунде зене, — песеде уре суьрт кешире-кешире, ве-дировунд эз гъэд эрх, кеши берд э гъирогъ, э зир эн е тегьенг, э «секонесуьзе жиге».

Оммо гъетте Марал сенгъэ ведировнде эз гъэд эрх, э гъирогъ норе, у гъеусэгъэт лап гъолок, лап эз гъувот офдорере хуно бисдо. У гуьмлуб, э келе могъбули, дуьледерди ве гъаежониревоз поисд э сугъразани э пушой эн сенгъ. Темиз несохде э у вогосиребируьт-го лил, маладгьоре, у тэхдере хуно буре синей хуышдере вено э сер сенгъ. Э лерзире десгой хуышдеревоз сэхд гъэл гирде эз дуь тараф сенгъэ, Марал синесов буре э уревоз, гуйге эдембу хъэре-жет сохде эри герм сохде уре э нефес хуышдеревоз, нешумо дешенде э у, зинде сохде уре.

Е гъэдер вэгдо пире зен гъе гъечи мунд э сер сенгъ нежуь-муьсде, сес несохде, гуйге ю хуышдению гъейсэгъэт э сенгъэлубе шекуьл чаруьсдиге. Песеде бирден гъемей жендек ю лерзире, эз кон дуьл энэ е келе хъэрой, буьруьж ведиромо, гуйге у гъейсэгъэт эри гъемишелуьг, те гъоймей гъиемет эдее дур, жейле, видалашмиш

бире э е теке, лап гІэзиз, куьнд, сигъд Ібугъо эри энуг одоми хуьш-  
деревоз, э уревоз зеки — э суруле, фоние дуьнѣгъовоз, эжеки гье-  
мей зиндегуни энуг гиросди дуразе, турунде, гъэтмэгъэрише хове  
хуно...

*1938—1971.*

**Е ТИКЕ ЭЗ ПОВЕСТЬ  
«КУК ГУДИЛ»**

*(Эз дуймуьн бэхш энү)*

## НИЕТГЪО Э ПУШОЙ ГУЗГИ

Э гъемей дигъ Муышгуър е теке билогъ бу. У э гърогъ эн дигъ, э ён више бу. Билогъ э глэрей эн лугъонде гъуби дебу. Глов эн хиник, тип-темиз, шишере хуно бу. У эз зир эн е гъундуьре дохъори эн хоки-гилови ведироморембу. Э звер сер дохъори сара дорлегъой фундугъи, эзгили, жингъили вебируът. Глов эз зир дохъори э ведиромореки эри одоми гъечу оморенбу, гуйге у, мугъум хунде-хунде эдее ведироморе, шори сохде эз зир торике дохъори э товуши руй хори ведиромори гуфдире. Э пушой эн билогъ э фирегъе чухури гъемише глов пур биренбу.

И билогъэ унгъэде сал бу, ченгъэдер салиге дигъ Муышгуъре. Э гуфдирей муышгуъригъоревоз и билогъ вокурде омори гъе у сал, кейки инжо суьфде бине зере оморембу дигъ энугъо эзи ченд сад сал пушо.

Э глов эн чухури, э пушой билогъ бугъо, миденишириге, гуйге э гузги дирере хуно веди биренбу серзофруво лугъегъой доргъо, э сер гъэе вебируътгъо, ковре асму. Кими вэгидо глэруьс-духдер эн дигъ, эри глов э сер билогъ оморенбируътгъо, совугъошуре глов пур сохде, минуьшдуът инжо э гърогъ чухуреки, миденишируът э глов, э гузги дениширере хуно, ниетгъо, дердгъо, фикиргъошуре вогоруш сохде э пушой эни «гузги глови» э бинуьши хуьше денишире. Шохъонгумгъо, кейки эри глов э сер билогъ екиш эз глэруьс-духдер нисе оmore, небуге лап сьбэжьмунде зу-сери, кейки гъеле омбаргъо э ширине хов деруът, у вэхди евошлей-евошлей, э хьитиэтиревоз, тешнее марал эри глов хурде э гърогъ нуькере оморенигъоре хуно, кими соьмишигъо оморенбируът инжо дуй екире эри дире. Духдер-соьмиши оморенбу инжо э совуревоз э вогъной эри глов оmoreн.

Рэхъ эн омбаре зенгъо, глэруьсгъой дигъ эри глов э сер билогъ э рафдеки эз ён мейду бу, эжеки мерд-муле кура биренбу дуй э екиревоз эри гоф-меслэхъэт сохде. Кимвэгидо жогъиле глэруьсгъо, духдергъо э пура совугъой глововоз эз билогъ э вогъшдеки, келе мердгъо, э мейду нуьшдегоргъо, огол мизеруът угъоре, эз совугъой

энуго серине глов михурдуят. Глов доре тешнее одомире, чи доре, хисунде э хуней хуыште гьуногъэ жиш ве эз жеш небисдоге у, муышгуыригъо эри хуыште келе сугъоб хысоб сохденбируят.

Ини гьейсэгIэт тара совуй глов э кул вери эдембу вогошде эз сер билогъ е шаздегъ сале духдер. Жовонгъо эз мейду е кем дурте поисдбируятгъо, хуърмет гирде э сер дуразе соку нуышдебируятгъо огьилте одомигъо, гьетте у духдере дире, лос бире, чум доноре поисдуят э лой эню. Келе мердгъош, сере тик гирде, гоф-ихдилот ишуре поюнде, э мигъробониревоз денишируят э у духдер.

— Э жун худо, ме гьейсэгIэт и гуъзеле огол мизенуым эз совуй эню глов михурум, — шори сохдере хуно гуфди Офдум э сие рушогъо ве бигъгой эн комики сипии офдоребу.

Э ён Офдум, э сер соку нуышдебу келе мерд Одом, сипре рушгъо, гъуъж дироморе десгой хуышдере, э зир гъирмизине «кишди хьомоли» хуыште доноре. Зен энуре эз зуревоз гIэйл нисе биренбу, уш шувер хуышдере хуно огьиле одомибу. Оммо Одом, неденишире э и кор, кишди хьомолире эз кишд хуыште нисе векеденбу, имид сохде, ки белки эхириш юре гIэйл нарине бисдоге.

Неки кишди хьомоли, гьемчун куыгъне гъуыздермей энюш мундебу хьэрмэхъ э Одомовоз. ГьейсэгIэт герми-офдои бугеш, э сердушгой эню гене пусди вебу. У терсиренбу, гъуыздуърме гьеебо эз некуми э у оморе вепичире, уре лерз невенуъ. Э ён эню нуышдебугъо Офдум эдембу э битобиревоз гузет сохде, кей духдер э совуй глововоз эз мейду лап куынд миёвге.

— Эй Офдум, ме мэхътелуым, чуй хурдей беге туй гъечи, тешнеитуй хуърд нисе бире? Туй есэгIэтгойге э пушой чумме е ним сову глов хурдей! — суыпле хэнде сохде, пуърси эзу Одом.

— Туй нисе дануьсде беге, Одом, одоми темизе чешмере диренге, эгенер уре тешне нисдигеш, гене темэхъ оморе уре эри эз глов эню хурде, — э зарифаткимсиревоз жугъоб до Офдум.

Духдер гьейсэгIэт эз билогъ вогошденбугъо, э зир пура зерде совуй лугъи е кем гъэд бире, эз расдиш лап рач бу. Эз зир булши чит синей эню дуй гиргине шомомегъоре хуно ве дибу. Сифет эню е кем офдои зеревугеш, темиз, шумол бу. Вини духдер назук бу, чумгъойа ю сип-сигъ, гъошгой ю гуйге э гъэлемеров кешире бируят. Чумгой эню э одоми дениширенбируят гIэйбе-гIэйб, э мигъровуни ве обур гирдеиревоз. Э расди гъутиней духдер е чуккле гиргине хол вебу.

Духдер диренге, ки э мейду бирогоре мердгъо гьеме э лой ю дениширет, юре гIэйб омо, сер хуышдере гъуз гирде, пой вечи, зурри-зури эри зере гирошде эз ён мейду; оммо гъе и вэхд Офдум огол зе уре. Духдер сере диеш гъуз гирде, омо э кин эню. У совуй глове эз кул хуыште вегирде, но э пушой Офдум, ю э тевзуьлиревоз поисд э гъирогъ. Офдум совуре э буз веноре, е кем глов хурд,



песде совуре э пушой келе мерд Одом норе, гье гьечу зарифатким-си мугу:

— Ху туьш, небуге пешму мибоши!

Келе мерд е гилейгеш э хуши-мигъровуниревоз дениши э духдер. Песде э гьул хуьшдеревоз евош зере эз гъэбуьргъэй Офдум, эз некуми э дилбоширивоз пустире эз душгьой хуьшде шенде, вэ-хишд э пой, тик гирд лэгъэре кемер хуьшдере. Сипре бигъгьо, рушгьой хуьшдере тимор сохде, лове э мигъробоне хэнде веберд, у сере жумунде, дениши ебо э лой Офдум, мугу:

— Э жун худо, туь дуз гуфдире Офдум. Эз совуй эни гьузеле духдер глов хурдеш екини, эз чешмей зем-зем\* глов хурдеш.

Келе мерд Одом глов хурде бэгъдо, жовонгьореш гье усэгIэт «тешне» бисдо. Угьо дуь эз песой еки, куьнд оmore эз сову, чуме эз духдер невегирде, дир-дир, дугъ-дугъ, гIэсел хуругьоре хуно сер гирдуьт эри хурде. Энжэгъ сову эслогъ тигьи биренки угьо во-гордундуьт уре э сэхьиб ю. Чорей духдер небисдо, э тие совуре-воз гене вогошд дуборе эри глов э сер билогъ.

— Эй дуньгъ, дуньгъ! — е дуразе ох кешире, мугу келе мерд Одом. — Согъ мумундге фэгъире ИшмогIил мивини э чумгьой хуьшдеревоз чуь гьузеле духдериге уре. — Песде гене пустире э душгьой хуьшде дегирде, э мигъробони ве могъбулиривоз э лой э билогъ вогошденбугьо духдер денишире, мугу: — Пери!.. Э раче нум хуьшде верзиренигьой...

— Негьогъ кук эн ковхо Эсеф ошугъ небирики э ю, — мугу Офдум.

— Салгьо гьечи зур-зур и оmore гирошденуьт, — эри хуьшде думит сохдере хуно мугу Одом, гуйге у гьейсэгIэт Офдум луфдигьо гофгьоре нешиновусд. — Иини, имогьой дегъ сал гирошди эз фэгъире ИшмогIил муьрде эйло. Гуйге эзи дегъ сал пушо нэгI, эзи дегъ руз пушо иму уре гьовре сохдейм. Э салгьо, гIуьмуьргьой инсон гьичиш недери. Угьо паруьсдекгьой гьовоире хуно эдете оmore-рафде.

У гье э и могбуле гирде сес хуьшдеревоз евошдей хунд гофгьой мэгIнире:

Кимлер гелди, кимлер гитти

Бу дуньгьезде, бу дуньгьезде!..

Пери э хуне вогошденге э совуй глововоз, бирор эну Сосун и възди нуьшдебуге э сирой эн гьейву, э сер бирэхьне хори гилови, эдембу тирохгьо духде эри хуьшде. Э тен эну е куьгьне зерде чухо вебу. Чухо тенг бу эри фирегье душгьой эну. Гьетте у э зарбевоз

---

\* Глов зем-зем — «глов немируьм», одомире жогьил, немуьрдени сох-денигьо.

жуьмуьсде, русмуре кешире э тирох духдеки, е жигей эн чухой энэ эз тох гирде жиге лов биренбу. ГьейсэгIэт э Сосун денишире, гьич нигуфдири, ки у лэгэере гIзил бу, э сифет ю ранг неверие юхсуле кукле, комики эзи дегь сал пушо, кейки у эз шох эн луьге гирде, бебешуре э дигь гудил гердундебу эз гьово воруж биёв луфдири, э дигь лугъэ-пара вечире. У гьейсэгIэт е хиелуье, жонлуье, сие чердее жогьиле кук бу. Гьошгьой энэ сиегь, фирегь бируьт, остгьугьой эн жуьргIэтлуье сифет энэ екем бируне ведироморобируьт. Вини энэ минжи е кемлей гьэд ю, чуькле бигьле-гьой энэ сип-сиегь. Сосун лап жовониш буге, эз диромуин е кем огьур-домогаь хуно веди биренбу. Оммо чумгьой энэ гье у пушотейнегоре хуно э мигьровуни ве могьбулиревоз дениширенбируьт э одоми.

Гьетге хэгер хуьшдере дире, Сосун гьошгьоре дуллу сохд, песде нимелит духде тирохэ э гьэгеревоз шенд э сер хори, гIоси бирере хуно, мугу:

— Э жегьендем гердо ижире ковхо, ижире сэхьиб! Дуразруй бебе-дедейме, сеге хуно эдее кор сохденуьм эри энэ, оммо е хубе черм доре мере эри тирохгьо, гьимиш сохде. У черм гуселеи дори, эн тови енебуге эн гомиши нэгI. И черм велг пиёзе хуно назуки, эз е орине бэгьдо мидуру мирав, песде мере серкуш зере, мугую: «И пушогьо доремки туьре черм эри тозе тирохгьо?!...»

Тирох гьейсэгIэт эри энэ вогьне бу, гьэгер дуьл хуьшдере эри тигьи сохде. У гьейсэгIэт эз ковхо, эри комики фэхьлеети сохденбу, унгэде бирази, гIоси небу, эз хэгер хуьше бугьоре хуно. Пери гьейсэгIэт эз билогь дир нивогашдге, белки э товун тирохгьо нен ковхо у е гофиш нигуфди. Унепуьре у э хэгер хуьше э гьэгеревоз денишире, мугу:

— Те ивэхди туь э же мундебири?!

Пери гоф несохде, овурд но пура совуй гIовире э куьнж эн сире, песде эзи тэхсиркоргьоре хуно омо поисд э пушой эн бирор хуьше.

— Ме чуь сожум, мердгьо э мейду бирегоргьо ме эз билогь э вогошдеки, мере огол зеруьт, гьеме э сову дебугьо гIове хурдуьт. Де чорейме небисдо, дуборе вогоше рафдуьм э билогь эри гIов,— пуфди Пери, хуьшдере эри расд ведировунде.

Оммо э товун у хэйли вэхд нуьшдеире э ён гIов, э чигьрет хуьше денишире, томоше сохде, э гузги денуьшуьгьоре хуно, э тэхьно,и думитгьо, ниетгьо сохдеире эри хуьше, у, гьелбет, э бирор негуфди, пэхьни сохд эзу.

— Пой ебо, ме дивун туьре мидуьм! — гьелебулере хуно гуфди Сосун, екем терс доре уре. — Гье туьре диренге мердгьо э мейду эйчуь эз тешней су гирденуьт?! Эзимбэгьдо эз ён мейду маэ билогь, черх зе эзу тарафиге буре!

Сосун эз руй э хэгер хуьшдеревоз огьур-домогь гоф сохдев-

бу, сөгъм хуышдере э сер энэ эри веноре, у гьемише, чуйтам э дух-дер хуне лонгъ, гIэдот гьисдиге, хьэё-хуърмет хуышдере дануь, нум хуышдере хуърд несоху. Пери юш дануьсденбу, гьис сохденбу, ки эз руи э уревоз гьечи огъур-домога, гьечиниге эз дуыл у нерме, рэхьмедуьле бирори, у эз жан хуышдеш омбар хосде хэгьере.

— Жон гIэззиме! Ме дануьсденуьм гьелебулегойтуь эз дуьли нисдигьоре, туь гьечи эй хьэз эдег гуфдире, — мугу Пери хоши-хоши, хэндуйсде-хэндуйсде. Песде у э сугъразани э пушой бирор-нуьшде, э хоширевоз дес хуышдере вено э душ энэ, лове э мигъ-ровуне хэнде веберд. Оммо Сосун, хуышдере эзу бирази гирдере хуно, э Пери неденишире, мугу:

— Хуб, хуб, э ме мешет мебош, бура э песой корту!

Оммо Пери эз жигей хуышде нежимуьсд. У сере ён гирде, денишире поисдебу э бирор хуышде.

— Гьери гу, чуй воисде туьре? — пурьси Сосун, э сер офдоре, ки Перире эз ю чуйиге воисдени.

— Духделега имбуруз эн Руз пушой бичин чиреи эдете э богъ-кура биренуьт эри гIэбоков возире. Бигьил мере меш бурам эри вози сохе.

Сосун гьеебо жугьоб недо. У вегирд эз хори тикей чермигере, вено э сер зани хуышде, сер гирд э серчиревоз эри темиз сохде муйгой черме.

— Хуб, бура, деске эз ме, — недуйл-недуйл гуфди Сосун. Песде е кем э хуышде домунде, мугу: — Энжэгъ омбар мемун, небу-гъ ме...

Перире гуйге гье усэгIэт эз шори паргаь вероморут. У песой эн гоф Сосуне бегьем нешиновусде, зур-зур вэхид, дарафд э хуне, теретэгIди эз хуне вегирде сие назуке шол пешмире э гьирминзине гуьлгьоревоз ве дуразе лужугьоревоз, э сер хуышде дегирде, видовусд э буру.

Сосун но черме э хори, думутлуй, э хуышде домундере хуно, дениши э лой хэгьер хуышде. Пери э дери фураморенге, песде э сер эн жилгьэй богъга э варафдекиш, увэхдиш у гье э лой Пери чум доноре, фикирлуй, гьэйгуьлуй поисдебу.

И песини вэхдгаь Сосун усол нисе зигьисденбу. Эз зуревоз ги-роше варасдебу у етима, гIоние вэхдгой энэ, кейки угаь хэгьер-бирор эри е лугъэ нун михьтож бируьт. Э у вэхдгаь эгенер угаь-гогъ-бир те сурои чи михурдуьтге, у руз эри энугаь мигIиде хуно-бу. Э гIэрей фэхьлегаь эн Гьомуил Сосун лап э кор дилбош, хьэрекет сохденигаь одоми бу. Гьомуил диренге ижире хуб кор-сохдеи энуре, у уре эз солдатиш гьидебу. Увэхди э куьнди эдем-бу се сал бире довго гирошденбугаь э Германиеревоз. Кимигьо

---

\* Э Муьшгуьр пушой зимигьо дурунде е рузе мигIиде хуно гировунден-бируьт.

тойгьой Сосун эз Муышгуыр эз зуревоз э салдати бу, е ченд энугье э довго пучиш биребируйт е небуге э есири офдоребируйт.

Сосун гьейсгІэт эз зиндегуни хуыште рази бу. Оморе-оморе у гуйге фурмуш сохд куыгъне гъэгъре э товун Гьомуил э бебешу ужире зулум сохдеи, э юш. Эз ГІэилиревоз дануьсде, синемиш сохде михътожире, гиснеире, юхсулире, у эз гьисмет хуыште рази бу уре е лугъэ нун ю, шир ю, гьофун ю гьисди гуфдире. Э хотур хуб кор сохдеи энуге, ковхо уре эз говдуй хуыште е хубе говиш дори. Унегуьре Сосуне нисе воисденбу э ковхоревоз усол бу, эри комики у песини салгьо кор сохденбу гьемише.

Хъгъер энуге, неденишире э дире четинигьо, гиснеигьо, чум марасо, веремори рач, жунсогъ, дуылшор. Эзу рачте духдер гьейсгІэт э гьемей дигъ недери. Сосун эз дуыл келегеди сохденбу уре ужире хубе раче хъгъери гуфдире. Оммо и песини мегьгьо дуыл энуге эз хъгъер динж небу. Э дигъ хъгъер дебу, гуйге Пери не кук ковхо Эсеф дугъ эеки ошугъ бирет, э пэхъники дугъ э екиревоз вохурденуге. Сосун гьич бовор нисе сохденбу Гьомуил э герде мегьгьо гуфдире хъгъер энуге, духдер нэхирчире, хъгъер эн батрак хуышдере эри кук хуыште хосде. У терсиренбу э гьечиревоз нум хъгъер ю э усол невадаров, песде неденишире э рачи энуге, уре екиш нигогъу, серкуши мибу мимуну. «Бирден белки и гофгьо э товун Пери нен Эсеф расди?! — э дуыл ю зеде расирере хуно, думит сохд эри хуыште Сосун. — Песде чухъи увэгІдои?! Багем хуышдени Пери нисе варасире и кор гьич эз сер нирав? Эсеф эгъер уре эз дуыли хосденигеш, Гьомуил нигьилуь уре Перире хосде. У эри хуыште хуьрди, элчэгъи хьисоб мисоху Перире гІэруьс хуыште сохде». Песде эри юш, эри Сосуниш номуси э песой хъгъер ю лонгъсугъе гофгьо бисдоге, нум энуге э беднуми вадарафде. Эри номусугъе мерд, егІни, жун вадарафде хуыш, нум ю э бедни вадарафденжон.

Оммо эз коргьо, хосиетгьой Пери Сосун эдембу шек сохде, ки гьовой хъгъер ю эз рнсдиш е жирейгеи. У пушоте э е жигеш дир нисе мунденбу, эз Сосун буйругъсугъэ э е жигеш нисе рафденбу. Имогьойле у э жой-жиге омбар мунде, кимвэгІдо эз ю непуьрсире эз хуне рафдени. Песде у и песини ругъо гогъ дуылшор, хэндеруй бире, чорей ю буге, э рэхъ рафдеки межегъуь, гогъ сердуллу, дуылхуьрде хуно бире, гуйге, чуьтам гуфдиреге, гемигьой эни э сер дерьегъ батмиш бири. Белки, соймиш, ошугъ биренигьо духдер гьечи бире?

Муышгуьригьо, гьелбет, гуфдиренбируйт, бовор сохденбируйт муьгъбет гьисди гуфдире. Угьоре лап хъэзиш оморенбу шиновусде мэгІнигьой эни ошугъгьоре э товуней муьгъбет, ишуш хуышденишуш хунденбируйт э гІэруьсигьо, межлуьсгьо. Оммо духдергьо, хъгъергьошу ошугъ, соймиш бире угьоре хъэз нисе оморенбу. Муьгъбете угьо эри духдер терсе, секонее гІэзоре хуно хьисоб

сохденбируйт. Угьо э соймише духдер э делуье одомире хуно де-ниширенбируйт. Омбаргьой энугьо эз мэгИнигьой ошугъгьо дануьс-денбируйт э товун эловлуье муьгьбет эн Лейли ве Меджунун, Асли ве Керем, ишу хуьшденишущ хунденбируйт э хьэвосовоз у мэгИнигьоре. Оммо еки энугьореш нивонсд е хэгьер, енебуге духдер ю Лейлире хуно соймише, ошугъ бу.

Имбуруз Сосун гьемишенней хуьшдере хуно зу вэхишдебу э гов эри сер кешире, э овхур энугьо гивь декуьрде. У эз ён хьэлов эн хисиребугьо хэгьер хуьшде э гирошдеки, дениши э лой энугьо. Сие бендгьой муй энугьо лов биребу э сер болуш, ловгьой энугьо э гьейрониревоз чуьбуге эдембируйт гуфдире евош-евош. Эри Сосун гьечи омо, ки хэгьер ю э хов гуйге гьейсэгИэт нум эн кук ковхоре гирд, эри энугьо гьечи шори, ловхэндей энугьо. Хуьршгьо жингьой Сосун гье усэгИэт вероморут. Уре э и туьтем воисд гьов кенуь бурав э жуьршевоз э сер хэгьер хуьшде, гируь эз муйгьой энугьо, шувуну уре, силлегерме соху, кую-куьшуь, межбур соху уре э гьечиревоз кук ковхоре эри эз дуьл хуьшде ведешенде, фурмуш сохде. Оммо у э туьжевоз хуьшдере э дес вегирде, сабур сохд. «Бигьил хэбер биренге, ме уре э силис мигируьм, мидануьм...» Оммо хэгьер энугьо эз хов хэбер бисдоки, у лов хэнде э мигьровуни ве езугь хуно денишики э Сосун, дуьл энугьо гье усэгИэт вогошд, уре эз хуьшдени хуьшде, фикиргьой хуьшде, е сэгИэтгьойге у сохденебугьо, гИэйб омо. У сере гьуз гирде, мугу э дуьл хуьшде: «Белки гьемей эни гофгьо, хэбергьо дургунуьт? Гьисдуьт ужире одомигьо эй хьэзиш э сер одоми хьэшо, небире коргьоре вешенденуьтгьо, иллогьки эн духдер хуне. Кими зенгьо, духдергьоре эз рачи хэгьер ю бэхили оmore, чум-дуьл ишу нисе вегирде...

Э богьгьо, эйлонме гирдебируйтгьо иловлей дигье, гьейсэгИэт кура биребируйт жем-жогьил, эдембируйт гИэбоков возире. Духдергьо э вогьнеки терсирере хуно, эз ело евошлей хьэрой вегирде, эз елойге хэндуьсде-хэндуьсде эз гИэрей доргьо видовусденбируйт кукгьо э песошу э туп шендеки. Эхириш, вози варасде бэгъдо, духдергьо жейле бире эз десдей кукгьо, десде гирде эеки, келе-келе гоф сохде-сохде рафдуьт э лой эн де богьгьойге, Энжэгъ е кук не е духдер э гьесутевоз эз гьеме песо мунде поисдебируйт э зир эн е келе луьгелуье сибдор. Кук гьуьндуьр бу, сифет ю очугъ, гиргине бу, мигьрову. Кук чуь буге эдембу гуфдире э духдер, луьжей эн сие шол энуре э гуьлгьоревоз э энгуьшд хуьшде пучунде, гуйге духдере э хуьшде бесде. Кук бу — Эсеф, кук эн ковхо, духдер — Пери бу, хэгьер Сосун.

Эз гИэрей эн велгьгьой доргьо журжурегьо эдембируйт жуьр зере, гьушгьо эз е луьге, э е луьге эз сер эн е дор э сер е дориге учмиш бире Руз лап герм бугеш, инжо э богъ серин бу.

— Пери-жон, эйчуь поисдейм инжиге, — мугу Эсеф, э гьейрони ве хоширевоз денишире э сифет соймиши хуьшде. — Кеш бу-

райм э куьгъне жигейму — «кумейму» э зир шевелуьлуьгъ, нуь-  
шим унжо эриму те имуре воисде.

Пери екем э хуьшде домунд, песде гъебо лове э хэнде вебер-  
де, э размендиревоз сере жумунд. Угъо дуь эз гъул еки гирде,  
рафдуьт те эхир эн боьгъ. Песде угъо эз сер сара гъэндэгъ эн боьгъ  
гирошде, ведиромрут э чолгъу зере оморе савзелуе мерж.

Се тараф эни мерж гъеме хэсде више бу. Э минжи эн мерж сие  
кулеьгой эн шевелуе доргъо вебируьт. Иловлей эн доргъой шеве-  
луь э кулеьгой бэгъэлуьревоз вадабурра, пичиребируьт. Эсеф не  
Пери, гъилгъо эри видовусде э мейду ведироморере хуно, видов-  
видов, хэндусде-хэндусде, дуь э екиревоз бэхьс гирдере хуно,  
оморут э ён кулеьгой шевелуь. Инжо оморе расире мунде, е гиле  
хуб денишируьт э иловле, винируьтки екиш нисди э куьндигъо,  
луьгъгой доргъой шевелуьре лов сохде, зури-зури дарафде, пэхъ-  
ни бисдорут э гъэд шевелуьлугъ.

Гъетте Пери не Эсеф эз сер сара гъэндэгъ хуьшдере э гъэд  
мерж дешенде, е духдер, ранги-берангие тозе парталгъо э тен ю  
вери, пэхъни бире-бире э песой эн доргъо, эдембу э песой энугъо  
гешде. Оммо те духдер оморе э ён гъэндэгъ расире, Эсеф не Пери  
э гъэд кулей шевелуь нуьшдебируьт э рачеберачей еки.

Гъэд эн шевелуьлугъ эз гъер тараф кумере хуно сэхд бу. Сер  
эн «куме» э лигегъой эн шевелуьревоз, телуе луьгъго ве велг-  
гъой эн бэгъэлуьревоз сэхд дегирде бируьт. Инжо гъэд энуре неки  
э чумевоз дире нисе биренбу, ригаз эн чуьшмеш эз гъэрей луьгъ-  
гъой энугу э дору нисе гирошденбу. Э соймишигъо нуьшдебируьтгъо  
жиге лап серин бу, инжо гъуьндуьре гнёв ве рихъон эн чули вебу.  
Буй эн гнёв, рихъон э серине буй неме хориревоз гъэриш бире,  
варафденбу э вини одоми.

— Э жун худо, Эсеф, туь э киме биренге, дуьлме тозере хуно  
бире, — муту Пери. Песде бирден эз гъуфдире гоф хуьшде уре  
гъэйб оморере хуно, гъирмизи бисдо, сере гъуз гирде, мугу: —  
Оммо ме имбуруз э туьревоз омбар нипоюм.

— Эйчуь? — пуьрси Эсеф э мэхътели ве пешмуниревоз.

— Бирорме мере имбуруз гъелебуле доребу ме э билогъ раф-  
денге дир мундем гуфдире. Эриме оморенигъо у шек сохдени, бел-  
ки дануьсдеш дануьсдениге ме не туьни э еки соймиш бирейм гуф-  
дире, — гуфдире и гофгоре, Пери эз гъаежони дуьл хуьшде эдем-  
бу пес-песоеки велггъой рихъоне чире, шенде.

— Дануьгу, иму дуь екире хосденим гуфдире, — э олхогъини-  
ревоз гуфди Эсеф, екем келегедиш сохдере хуно. Гъечиш-гъечуш  
иму э сер поиз хосдехунд, песде гъэруьс-домор мибошим.

Духдер тик гирд сер хуьшдере, бурра шивит рихъон э дес де-  
ри, э дусди ве мигъробоиревоз дениши э сифет соймиши хуьшде.  
Песде раче сифет энугу бирден могъбул, пешмуре хуно бисдо.

— Ме дануьсденуьм туь мере лап хосдени. Оммо бешешму...

Бабешму рази мибу ме зентуь, гІэруьс ю бошум? — э екем лерзире, терсире сесевоз пуьрсн у.

— Меёр ижире гофгьоре э дуьлтуй! — елвор сохдере хуно, мугу Эсеф.

Оммо и гоф эн Эсеф дуьл духдере хомуш, сокит несохд.

— Терсиренуьм эз бабешму, унегуьре дуьлме олхогьин нисди, — мугу Пери, е лугьонде ох вокошире. — Ме е етима духдеруьм, бабейму нэхирчи бу. Ишму гІошире, вегирлуье одомигьонт. Песде гьеме дануьсдени, ки бабешму е духдеригере эритуь нишон сохди.

И дес олхогьине, гиргине сифет эн Эсеф эз некуми вежэгъуьсдере хуно бисдо.

— Пери, хосденуьм эз ту: меги нум эни коре, дуьлмере хэрэб месох...

Эз расдиш Эсеф ченд гиле шиновусдебу эз бабешу эри нумгир сохде, песде гІэруьс сохде духдер раби Шафаде эри эну. Оммо сер ебо сер эни гоф вероморе, Эсеф е хуьшдере э нешиновусдеки веноренбу, небуге вадарафденбу рафде эз хуне. Оммо у гьейсэгІэт шиновусденге и гофе эз соймиши хуьшде, э дуьл эну лап терс офдо. У эз расдиш эз бабешу лап терсиренбу, дануьсденбу хоснет энуре, комики гуфдирей хуьшдере ёгьин сохденбу. У бабешуре хосденбу, хуьрмет энуре гирденбу, чуьтам э жук лоигъ гьисдиге, оммо сегьм бебе э сер эну сэхд вебу. У бирден э дуь десевоз сер эн Перире гирде, вено э синей хуьшде, мугу э билбуле сесевоз:

— Пери, э жун худо, э жун асму, ме туьре эз жунмеш зиёд хосденуьм. Э ховиш, э эвриш туьре диренуьм. Ме туьре дирте диренуьмге, ме эрима жиге нисе офденуьм, дуьлме оворее гьуше хуно оворе бире те туьре невинуьм, сес туьре нешиновум. Ме сермере э хэнжелевоз бурраре э герде мегируьм, оммо де духдеригере эз туь бэгъэй хосдере э герде нивегирум. Туь жунмени, нешумоймени!..

Лап эз дуьли эн Пери бу и у гьейсэгІэт эз гІэзизе соймиши хуьшде шиновусденбугьо гофгьо. Эз чумгьой эну гьейсэгІэт эдембу гІэрс рихде, оммо дуьл эну эдембу шори сохде.

Бирден э и вэхд эн ширине ихдилот эн дуь соймишигьо э куьндигьой кулелугъ шевелуьи э гуш энугьо дарафд сес келе хьэрой эн духдер.

— Ой Эсеф! Туь мере куьшди! Ой Пери! Эритуь ошгуновое гьовол куфде биёво!...

Пери гьетте и хьэрое, и гофгьоре шиновусде, эз некуми терсунде оморе одомире хуно, вешенд хуьшдере, ранг ю зерд бисдо, сер хуьшдере вегирде эз сер синей Эсеф, серсуре хуно дениши э иловлей хуьшде.

— И Хонуми, духдер раби Шофади, мере гьечи гьэзвотие нифригьо сохденигьо, риз гирде чогьоле хуно э песойму гешденигьо, — мугу Пери э хуьршевоз.

Пери диренге, ки гофгьой Хонум э Эсефиш лап гурунд нуьшд, у хуьвршлуь бире эдембу вэхишде эри вадарафде, шелей эн Хонуме водоре, оммо Пери гье усэглэт гьэл гирде уре, поюнд э жигей хуьшде.

— Омон, омон, небу гьейсэглэт э гьэгьр офдоре, э пушой энугьэлифо вадарай. — У имуре инжиге пэхьни биреире дануьсдге, нуммере у перти-пурт мисоху, гьеме небире коргьоре, небире хьэшегьоре э серме мешенуь, нуммере э пушой хэлгь, эн одомигьойтуь эри хуьрд сохде. Э хотур эни кор нибисдоге, э жун синей е теке бирорме, ме уре гьейсэглэт эз дуь бенд муйгьой энугирде, эз хоригьо шумоле микешируьм те божэхь энугэ худо варафде!...

Эз ковхо бэгьдо э дигь гюшире одоми раби Шафад бу. Шафад лап пире одоми бу. Эз ченд гизилгьо, зен энугэри энугэзендебугьо, уре энжэгь е духделе мундебу — Хонум. Темэхькоре ковхоре воисденбу духдер энуре хогьу эри кук хуьшде, раби муьрденге мол-муьлк энугэ мунугэрию, сэхьни соху. Э хотур эни кор у пенинн вэхдгьо лап куьнд, дусд биребу э рабиревоз, э хуней энугерафде-оморенбу. Кимвэглдо ковхо э хуней раби Шафад оморенге, у лове э мигьровуне хэнде веберде, э сифет Хонум денишире, муьгудди:

— Туьре эдее гизруьсме сохденуьм.

Э товун эн э дуьл Гьомуил деригьо метлеб — духдер рабире эри кук хуьшде хосде, неки бебе-дедей эн Хонум, гьемчун гьемей дигьийш дануьсденбу. Хонумиш э гофгьой эн ковхо имид бире, хуьшдере одохлуй Эсеф, гизруьс Гьомуил хьисоб сохденбу. Унегуьре Хонум ковхоре, зенгьой энуре, енебуге куьнде одомигьой Гьомуиле мивиниге, чуьтам гиздот гьисдиге эри хосдехунде духдер, эз гугьо у шем гирденбу.

Хонум е ранг зерде духдер бу. Уре гьир-гьире муьгьой ранг шагьбалуди вебируьт. Вини энугэ назук бу, дураз бу, дундугьэ хуно, чуней ю тиж. Э назуке ловгьой энугэ гьемише одомире мидиге, иллогьки духдергьой дигье, диглее хэнде вебиренбу. Пушони энугэтэхдере хуно бу. Рачи эни бираче сифет чумгьой энугэ бируьт — келе, ранг эн муьгьойюре хуно, уьшуьгьлуь, э дуразе, хэсде мижегьоревоз. Оммо эз чумгьой энугэ одомире воисденбу руй хуьшдере э улойге чарунде, чуьнки чумгьой энугэ гьечи дениширенбируьт э одоми гье э у дигле хэндеревоз, гуйге эз одоми эдее е гизиб гешде, руьхшенди сохде э у. У омбар сикелуь, келегед бу. Эз беди, юхсули кес — шори сохденбу, эз шори, бэхд эн кес дуьл энугэ хэреб, пешму биренбу. Гьич э хоснетгьой эн бибешу, нерме, саламате, эдеблуье одоми неоморэбу. Неки духдергьой дигь, кукгьош хьэрекет сохденбируьт эзу хуьшдере гьирогь кешире. Иллогьки Эсеф уре э чум дире нисе хосденбу. Оммо Хонум ю эз дерд Эсеф эдембу дердежер бире. У гьемише хьэрекет сохденбу эри хуб гьеймиш бире, духдергьой дигье гьэгьр доре, э пушой чум Эсеф хуб,



рач, тимор ведн бире. Э дуъл хуьшде ю имогьой Эсефе одохлуй хуьшде хьисоб сохденбу.

Имбуруз себэхьмунде гьетте Хонум эз хов хэбер бире, вэхуьшд эз хьэлов. Гьовой энү имбуруз лап шор, хуьром бу. Ди шохьонгум ковхо э хуней энугьо оморенге, Хонум у вэхди э пушой сиро, э гьэд хьэёт эдембу симовор веноре. Ковхо рабире э пушо декуьрде, ю э Гэмелевоз поисд, песде эз Хонум куьнд бире, э гуш ю мугу:

— Худо гьишдге, э сер поизи симоворе э хунейме мени.

Эз хьэлов вэхуьшде мунде, у омо э ён келе, э ранги-барангие гьовуревоз гирде оморе сундугъ, э биней дивор хуне бугьо, вокурд сер сундугъэ. Э гьэд сундугъ е ченд дес партал дебу. Веди бу, ки бебе-дедей эн Хонум пул гьимиш нисе сохденбу эри е теке духдер ишу. Те егиле эз сундугъ партал вегирде, у е гьэдер вэГ-до поисд, думит сохд, имбуруз чуь жире партал вокурде, геймиш бире, чумгьой духдергьой дигь бубухь бубо домуну э парталгьой ю, иллогьки эн духдер нэхирчи — Пери, комиреки у э чум дире нисе хосденбу, келе дуьшмен хуьшдере хуно. Оммо лап келе войгей энү имбуруз бу Эсефе э лой хуьшде кещуь, хуьшдере эри энү ширин соху...

Сер-тен хуьшдере вокурде, геймиш бире, у куьнд омо эз гузги, хуб дениши э хуьшде. Э пой энү фирегье шовол вебу эз гьирмизине мол звруьшуьми, булши энү эз ковре мовол бу. Э сер булши бесдебу гьэиш нуьгьреи. Э гушгьой энү дуразе гушворгьой эн суьрхи дебируьт, э сер ю — сипре келэгьэи генжеи дебу.

Раче партал гуйге бирачи энуре диеш очугъ брмунденбу, оммо имбуруз уре эз хуьшде лап хьэз омо. У гьейсэгГэт э пушой гузги поисде, хуьшдере томоше, тимор сохде э дуъл хуьшде эдембу ниет, имид сохде у имбуруз мидануь гуфдире неки гоф сохде э Эсефевоз, гьемчун вогосунде уре э хуьшде Теимогьой Эсеф эзу хуьшдере дур, гьирогъ гирдеи, Хонум эри хуьшде гьечи веровурд сохденбу: Гьомуил, э хьисобовоз негуфдири э кук хуьшде, ю эдее эри энү Хонуме хосде гуфдире, ки у Хонуме имидиш дори. Эз елойге белкиш Эсеф дануьсдени, оммо эз Гэйбкеши хуьшде жуьргГэт нисе сохде эри эзу куьнд оморе гоф сохде э уревоз. Белкем е коригеш гьисди: у дануьсдени бибей энугьо юре эдее хосде эри кук хуьшде, оммо Гэмелдане Эсефе воисдени те и кор бире, екем гешде, жогьильети сохде эри хуьшде э духдер нэхирчиревоз. Хуб, бобшгу гьечу. Оммо те кей? Вес нисди беге? Те поизи лап кем мунди. Ди эхи Гьомуил э хуней энугьо оморенге э рабиревоз, у э Хонум дешиновунд, э поиз уре у Гэруьс хуьшде мисоху гуфдире.

Неденишире э пушотенне коргьой Эсеф, Хонуме имбуруз чуьиге имид бу: Эсеф ёгьин миёв э ки энү эри гоф сохде э уревоз, вокурде дуъл хуьшдере эри ю. У гьечи бирден эри хуьшде веровурд сохд, чуьтам у имбуруз гьетте э богъ оморе, духдергьой дигь, дуь

чуме буюхь сохде, э сер-тен энү дениширенуьтге. Духдер нэхирчи, гьетте тозе парталгьой энуре дире, эз бэхили, косиби, небирея хуышде, уьзуюгьэре, сергерде хуьрде хуно мибу э пушой энү. Уре э г'уьмуьр хуышдеш е раче тозе пожеш небири, мундеки ижире парталгьо. Гьеме гуфдиренуьт: духдер нэхирчи рачи». Раче э гьиче нисе веноре. И дес уре э ижире тозе бугьолуье ченд ранге парталгьо вери виниге, духдер нэхирчи эз г'эйб, бэхили, билбули дуьл хуышде ибуд мибу мирав эз мэгрскей духдергьо, жогьилгьо эз богь. Эри энү оморенигьо, Эсеф уре поюндеш нипоюну, чуюнки вэхд г'эруьси энү э Хонумевоз эдее куьнд бире. Имбуруз Эсеф э Хонум денишире, мугую э дуьл хуышде: «Чу хэр, надан бируьм ме теимогьой?! Эйчуь ме теимогьой гье э песой духдер нэхирчи видовусдем? Хонум эз сер-сифет зобу нисди, песеде эгьуьлменди, эз г'эсуьллуье, девлете хунеи. Пери кини?..»

Хонум эй хьэз, эри гьэгьр доре Эсефе, хуышдере э недиреки менуь, гьич э лой Эсеф дениреш ниденишу. Хонум, геймиш-туьй-дермиш, духдер хон э г'эрей гьэревошгьой хуышде гешдуьгьоре хуно, мигешдуь э такебуриревоз э г'эрей духдергьо. Вози г'эбоков врасденге, Хонум эз духдергьо жейле бире, гешде-гешде, сейл зерере хуно, мурав тэхьно э лой богь бебешу. Э ки чуь кори у эдее э богь б'ебешу эй гешдей хуышде рафде гуфдире? Эсеф сере гьуз гирде, миёв э песой энү. Хонум хуышдере э недиреки веноре, э олхогьиниревоз мирав рэхь хуышдере. Увэхди Эсеф тоб недоре, миёв мигируь пушой энуре, г'эйбе-г'эйб, оммо э гьаежониревоз мугую: «Хонум-жон, туь имбуруз лап рачи, эз туь чум вегирде нисе бире. Пой екем, дуьлмере эритуь вокунум, гуюм...»

Хонум э вогьнеки э у э мэхьтели ве серкуширевоз миденишуь, песеде г'эйб кеширере хуно, чуьтам лонгьиге э хьэеменде духдер э кук кесигеревоз э гоф сохдеки, руй хуышдере э гьирогь келэ-гьеиреоз кешире, гьэгьри бирере хуно мугую эз Эсеф: «И чуь гофгьои ме эз туь шиновусденуьм? Туьре г'эйб нисе оморе? Ме чуьтам э кук кесевоз э богь, э тэхьно, духдер хуне поюм гоф сожум? Ме бегем эритуь эз е пара бедг'эсуьле духдергьоюм?»

Эсеф гье усэг'эт эй хуышде марасуь ме э товун Пери эдее гуфдиренуьм, нум энуре негирдуьмгеш. Увэхди Эсеф минет сохдере хуно, мугую эзу: Жон Хонум, бигьил у гофгьойтуьре! Бегем ме нетуьни кесим эри еки? Иму одохлугьой еки хьисобим. Бегем бейму э туь непуфдири?»

Хонум увэхди лове э дигле хэнде веберде, эз зир чум денишире э Эсеф, э сике, наз-бузевоз мугую: «Уре гьеле ки дануьсде... Эгерде мегируьге сэхьибгьойме мере э туь эри доре?»

Раче сифет Эсеф дегиш мибу гье усэг'эт эн билбул бире одомире хуно. Хуьрш эн элгь эз сабур медешенуь уре. «Гьечу буге,— мугую Эсеф, — ме туьре мивирухунум, туь э ме б'эгьэй, э де одомиге гьисмет небоши гуфдире!» Эсеф лесе микешуь уре гируь

гуфдире, оммо Хонум гье усэглэт еново доре хуышдере, пэхьни мибу э песой дор. Эсеф диеш гьис ю, эшгъ ю гужлуь бире, мивидову э песой энуре э гужевоэ эри гъэл гирде. Оммо Хонум хэнде-хэнде, уре гъэгър доре-доре биз-биз сохдере хуно, мивидову эз песой эн е дор, пэхьни мибу э песой е дориге, гъоре-гъоре доре уре...

Хонум гьечи э пушой гузги поисде, эри хуышде ниетгьо, веровуирд сохде, чьуьтам у имбуруз мибурмунуге хуышдере э пушой духдергьой дигь, э пушой Эсеф, дуьл энуре омбар хош, шор бисдо. У эз шори сер гирд келе-келе эри шогъгьо зере, хэндуйсде. Э сес хэндей энуре э доруни хуне зури-зури ведиромо э дуьлпесоиревоэ дедей Хонум, е келе зен э лэгъэре зэглифе сифетевоз. У духдер хуышдере гьечи э пушой гузги э шогъгьо зере хэндусде виники, терси: кидан духдер юре садангъэлифо гиж, чешмиш сохдиге.

— Э хэлефме, дедей миро туьре! — мугу у эз духдер хуышде. — Ченд бо ме э туь гуфдирем, э гузги ингъэде медениш. Эз э гузги одоми омбар денишире одоми чешмиш бире, э у гъэлифо дери. Э гузги гъэлифо, садан недериге, гьич гузги, шише мидануьсд беге гьечи очугъ шекуьл, чигърет одомире бирмунде?

У руз Хонум вошошд эз гешдегьо э богъ лап дуьлхуьрд, могъ-могъбул, эз жун хуышде визоре хуне. Чьуьтам гуфдиреге: «Гъой-гъой рафд, вой-вой омо». Сохде ниетгьо, веровурдигьой энуре имбуруз э пушой гузги гьеме негьогъ бисдо. Эсеф имбурузиш, гьемешейней хуышдере хуно гьич э лой энуре дениширеш нисе дениширенбу. Гуйге эз Перире бэгъэй у де одомигьойгере эслогъ нисе диренбу. Духдергьош э уревоэ недуьл-недуьл гоф сохденбируьт. Оммо духдер нэхирчи лап войгелуье одомире хуно бу э глэрей энугьо.

Глэбоков вози э глэрей кукгьо ве духдергьо варасденге, Эсеф не Пери эз гьеме жейле бире, е гъэдер поисдуьт э зир сибдор, песде гоф сохде-сохде, хэндуйсде-хэндуйсде рафдуьт э лой гьендэгъ богъ, э тараф эн мерж. Хонум сер хуышдере, обур хуышдере вир сохде, эз глэйби-глэри вадарафде, дуьзде хуно, пэхьни бире-бире э песой доргьо, кулегьо рафд э песой энугьо. Оммо те Хонум э ён гьендэгъ оморе расире, соймишигьо пэхьни бисдорут э гъэриш кулегьой эн шевелуь.

Хонум э мерж ведироморенге, омбар мэхьтел мунд э гъэд эни келе мерж угьоре неофденки. Ченд бо у э иловле чумачару сохд, оммо угьо э е жигеш веде небируьт, гуйге э зир хори сур бирет. Гьич е гилеш э фикир, э дуьл энуре неомо, ки соймишигьо э гъэд кулей шевелуьлугъ пэхьни бирет гуфдире. Эхириш денишире диренге, ки угьо э иловле веде нисди, дуьл энуре эз мунде жигеш сэлэр хурд. Эз гъэгър, эз бедрашки, дуьлтэхьли, келе хуьрдире хуно оморей эриу, у бирден гурунд яралу бире одомире хуно, офдо э хори, э куьнди кулегьой шевелуьи, гилгез, чьук-чьуки сохде-сохде, гирисде, хьэрой дешенд:

— Ой Эсеф, туь мере куьшди! Ой Пери, эритуь ошгуновое гьовол куфде биёво!

Э хуне вогошденге, Хонум, юш нисе дануьсде эйчуьниге, гене омо поисд э пушой гузги. И дес уре хуьшденнуре эз сифет хуьшде хьээ неомо: у хэсде, диеш зерд, зэхьэр вечирере хуно бу. Бирден э жигей сифет хуьшде э гузги у вини сифет эн Перире, — рач, хэндеруй, дуьлшор. Сифет эн Перире эри недире у гье усэглэт э десгьоревоз сэхд сохд сифет хуьшдере, песеде эз нокуми лап келе-келе гиризд, гьирке сохде, лойлум хурде-хурде.

Э сес гириздеи духдер хуьшде зурн-зурн омо раси келе зен. У виники духдер ю, себэхьмунде э пушой гузги поисде, келе-келе хэндуьсденбугьо, имогьой — эдее зар доноре, гиризде, лап дуьлпесо бисдо. У гьерчуь дануьсд, эз расдиш, э гьэд гузги пэхьни гьисдигьо садан-гьэлифо, зери, чешмиш сохди духдер энуре.

— Э хэлефме, дедей миро туьре! — мугу келе зен э шуькеетиревоз, — Ме ченд бо э туь негуфдирем: ингьэде э гузги медениш, у эхириш туьре жингир мисоху?..

Гуфдире и гофгьоре, келе зен зурн-зурн, вегирд эз догьле гузгире, пучунд э деспоку, нифри, нэглети сохде ки ведешендиге и бэхш эн гьэлбуьс-гьэлифоре — гузгире, берд эжеиге.

## ГІЭРУЬСИ

Хьээт эн ковхо лап фирегь бу. Чор тараф энэ э боруй гуьлиревоз кешире бу. Э хьээт энэ богьчеш дебу. Э гьэрей доргьо, э гьирогьгой эн богьче вебируьт жуьр-бежуьре хушбуйлуье гуьлгьо. Себэхьгоймунде, кейки э сер велгьо, савзегьо шей эн пушойсебэхь вомунденигьо вэглдо, енабуге шохьонгумгьо, хори эз согь руз герми гьеминон лем зеренигьо вэглдо, хушбуй энугьо этире хуно лов биренбу э гьемей хьээт. Э минжи эн богьче е келе гьэребечдор вебу. Гьэребечдор гьуьндуьр бу, луьгеегьой ю лап фирегь, Оммо гьэребечдор куьгьне бу. Нимей гьобугь энэ э сутун рафдебу, э зофруи бэхш сутун энэ гьонгуши офдоребу. Оммо дор гьеле сэхд бу, гужлуь бу, муьхькем, уьткемлуь поисдебу э жигей хуьшде, хубе бегьериш деренбу. У э шон эн де доргьойгей эн богьче пегьливоне хуно веди биренбу э угьо гуьре.

Ковхоре э хэвлете вэхд хуьшде хьээ оморенбу э зир эни дор нуьшде, форигьэти вегирде, гьэйле кешире, фикир, думит сохде эри хуьшде небуге чуме э хифлет веберде. У гьейсэглэт нуьшдебу э сер е чуькле гуьле-гуьле холинче, э зир эни гьэребчдор, кемер хуьшдере э фирегье сутун энэ водоре. Э пушой Гьомуил суфре дешенде буь Э сер суфре нимелитхурде чорек шороб вебу, нун тонуй, буржунде гушд, гловгирде чигьо. Ковхо пес-песоки эдембу хурде пейлегьой шоробе, гьич закуске несохде, гьэйлере эз лэглэ неведе-

шенде. Дуъл энү гъэреболугъ бу, гъош-гъобогъ ю — дулли Эз хурде шоробгъо гъовой энү очмиш нисе биренбу, диеш гуйге эдембу вечире дегирде рузе хуно.

Гъово эдембу шохьонгум бире. Чуьшме тозеле дарафдебу, гъэргъ биребу. Эз гъирмизине ригагъой энү шише кешире гъэивон энү гуйге гІэтош гирдебу. Серине ворвори сершохьонгуми эдембу жумунде сипи бире руш энуре, шувунде велгъой эн гъэребчодоре э зверсер энү. Кими зерд бире велгъо эз дор офдоре, черх хурде, мофдорут э сер суфре, э сер зани, э сер душгъой ковхо, гуйге э гъосутевоз э ёр энү овурде, ки гъеминон giroшди, поиз сер гирди. Эз жеиге эдембу оморе сес зурнов зерей, сес заруьнжи, шуькесде. Гуйге эз зурнов нәгІ, эз кон дерде дуъл энү эдембу ведироморе и дердимендлуье гъово. Зурнов зеренбугъо Рэхьмон бу. У эз Сибирь вогошде эйлоревоз, пушотеинегъой хуьшдере хуно шохьонгумгъо э сирой хуне нуьшде эри хуьшде зурнов зеренбу.

Дуъл эн ковхо гъейсәгІәт эз расдиш лап гъэреболугъ бу. Уре е куьнде дусд небу э дуъл ю деригъо фикиргъо, хәәлтгьоре очугъ, ихъдибор сохдс гуь, дуъл хуьшдере тигъи соху, эз ю е дуълсухуне гоф шинову, е весиет нуь эри ю. Гуфдиренуьт эхи: хубе гІәбеш гъэмчил гереки, эгъуьлменде одомиреш весиет гереки. Дигъбонигъой энү нисе хосденуьт уре. Куьнде гъовумгъой энүш эз руй эри энү менэхъфи сохденуьт, оммо эз дуъл э пул ю, мол ю бәхили сохденуьт, зарали энуре хосденуьт.

Эз хуне, зенгъош дуъл энү динж нисди. Суьфдеи зен энү, эз дуьмун зен — Гъуьзуьргуьле хосде, э хуне овурде эйло, эзу гъэгъри бире, э салгъоревоз э юревоз гоф нисе сохденбу. Эн хуьшдени Гъуьзуьргуьл гириге гъошгъобогъ ю гъе дуллини, У э Гъо-муилевоз э гоф сохдеки гъич лов энү э хэнде нисе варафде, э муьгъревуниревоз э юревоз гоф нисе сохде, эз товней е жор, е хьол ю гъич нисе пуьрсире. Гъомуил ченгъәдер хъәрекет сохдебу Гъуьзуьргуьле э хуьшде эри вогосунде, у суьфдеи шуьвер хуьшдере эз ёр ведешенуьт юре эз дуьли-жуни хуьшде хогъу гуфдире. Гъе эзи хотур у э угее кук хуьшде э суьфдеи кук Гъуьзуьргуьл Шоул э суьгъде кук хуьшдере хуно дениширенбу. Эри хуьшдени Гъуьзуьргуьл у ченд жире хубе бәхшгъо, хубе парталгъо восдоребу. Неденишире э туьнде, огъурлуье хосиет энү, э Гъуьзуьргуьлевоз гъәмише э мигъровуни, ширин-ширин гоф сохденбу, Гъуьзуьргуьл уре эз дуьли хогъу гуфдире, дануь чуьтам у Гъуьзуьргуьле хосдените. Кук энуре, Шоулеш гъетте келе бире, у бердебу э шегъер норебу э «гимнази» эри хунде унжо э кукгъой беггъо, девлетлуье одомигъоревоз.

Салгъо оморут giroшдуьт эз гуьмуьргъо, рушгъой Гъомуил сипи бисдо, оммо лов-домогъ, гъош-гъобогъ эни зен эри энү гъич очугъ небисдо. ГъейсәгІәтиш у шевгъо э хәәлов, э хисиреки суьфдеи шуьвер хуьшдере Юсуфе э ёр овурде, нифри сохде хун энуре

тигын сахдегоргьоре. У э хуней Гьомуил ченд салгьо есир берде зене хуно хуышдере гьис сохденбу.

Кук энущ Шоул хубе коргьо несохд, э хэржигьо, дошдегьой Гьомуил неверзи, хундеигьо неберд уре. Раче кук, жовон, хундегор, эжигей э гурлугь падшогьи дарафде, хуб кор сохде, вегирде е раче духдере эз е гюшире хуно, хьэз эни гюыломе дире, э худосуэзе «булшевикгьоревоз» дусд бири, эз рэхь ведарафди, имогьой ченд сали эз ю е хэбер нисди. Гьомуиле воисденбу э хотур Гьуэзуьргуул эри кук энущ ники соху, вегирлук соху уре, оммо Шоул э хэтое коргьой хуышдеревоз гьемере зе вачарунд, хуышдереш э и руз гьисд. Уьсделуьге Гьуэзуьргуул зен энущ серкуш зере Гьомуиле: еГни, у берде ниноге кук юре эри хунде э шегьер, у эз сер нивадарафд, ижире коргьош ниомо э сер ю.

Оммо Гьомуил гьейсэгГэт эз гьеме зиьдте эз кук хуышде Эсеф гьэгьри бу. Имбуруз у нуышдебу э куче э сер мейду э мердгьой дигьевоз. Гьемин гье и вэхди Хумор духдер раби Шафад эдембу э пура совуь гювовоз эз билогь вогошде. Хонум Гьомуиле диренге, бел келэгьэи хуышдере кешире, гье усэгГэт шем гуьрд. Ловгьой Гьомуил э мигьровуне хэнде варафд Хуморе диренге, комиреки у э дуьл хуышде гГэрьюс хуышде хьисоб сохденбу. Гьемин уре гьейсэгГэт тешне биребу. У Хонуме э энгуышдевоз огол зе э ки хуышде эри эз совуь энущ гюв хурде.

— Жон, гГэрьюсме, — гуфди у э пушой эн гьеме э мейду бирогоргьо, десгьоре кешире, эри совуре вегирде эз дес энущ, — эз совуьтуь ди екем гюв хурум.

Те имбуруз Хонум шори сохденбу, Гьомуил уре гГэрьюс хуышде мугуфдики. Оммо гьейсэгГэт Гьомуил и гофе гуфдиренки, зерди зере гьутинегьой эн Хумор хун гирдуьт, чумгьой ю чаруьсд эн эз нокуми делук бире одомире хуно. У э дуьл, хуьрш хуышде неволоморе, гуйге фурмуш сохде ю гьейсэгГэт эжеиге, э же поисдиге, е хьэрой, шивен дешендере хуно, мугу:

— Эйчуь, эйчуь, лелей Гьомунил, туь гьемише мере «гГэрьюс-туь» гуфдире, э ме руьхшенд сохде, хэндуьсде?! Ме нисдуьм гГэрьюстуь! ГГэрьюстуь духдер эн нэхирчи, эн пудили. Кук туь жингире Меджунне хуно гьуй э песой энущ э вишегьо, дерегьой!...

Духдер и гофгьоре э гуфдиреки, бирден эз хьол офдоре, сер ю черх рафде одомире хуно, лойлум хурд, расе буш бире эз дес энущ, совуь гюв эз нокуми офдо э ён пойгьой Гьомуил, туле хуно э сесевоз лов бисдо.

Гьомуил эз гьэгьр, гГейб, биьбури гье усэгГэт вэхисд эз жигей хуышде, зури-зури, шуш-нефес гирде, вогошд э хуне. У гьечи мэхьтел, дуьлхуьрд, серсоне хуно бисдо и гофгьоре эз Хумор шиновусдики, ки гьич э фикиргьо, хьэлгьой энущ небисдо е-дуь хубе гоф гую э духдер, хомуш соху уре. Дуьл Гьомуил эдембу тэгГиди сохде, кей у ебо мивинуь Эсефе, дивун энуре мидуь, гьэгьр хуыш-

дере медешенуь. ГьейсэгIэт у эз мейду э хуне э тертэгIдиревоз э вогошдеки, э ёр энү омо, чуьтам Илогьу и пушогоьо гуфдиребуге эзу, ки Эсеф э песой духдер нэхирчи Пери эдее гешде. УвэгIдои Гьомуил э и гоф е фикириш недо, у энжэгь суьпле хэнде сохде, мулу э дуьл хуьшде: «Гердугу эри хуьшде. Коргьой пуюгьоре хүно: мих ме э дивор кесиге!...» Оммо гьейсэгIэт и гофгьой Илогьу э ёр энү омоки, у диеш дуьлпесо, дуьлдэгьдэгьэре хуно бисдо. У терси, ки кук энү э Пери ошугь бире эз Хонум нэгIд несохуге. Увэхди ижире гIошире гIэрүьс, чуьн духдер раби, е теклей бебедеде, мирос эн девлет пире бебе, мадарав эз дес Гьомуил, мидарав э дес е одомиге.

Ковхо гьетте э ён хьэёт оморе расире, дер гьопуре э гьэгьревоз лепуьк зере, вокурд. Э ён хуне оморе расиренки э гуш энү дарафд сес мэгIни хундей эн Эсеф. У эдембу саз зере, мэгIни хундери хуьшде. Дуьл Гьомуил ченгьэдер битоби сохденбугеш исэгIэт, у шишире недиромо э хуне, поисд э песой дер, гуш вено, чуь хундеге у. МэгIни, комиреки гьейсэгIэт хунденбу кук энү бу мэгIни эри муьгьбет, дузире гуфдиге, шовгIой эн муьгьбет.

И товуше гIуьлом туьсуьз, о ёр ме,  
Торике гьоврей у эриме.  
Гуьлгьой эн хори, э асму — чуьшме  
Нисдуьт гьичиш э пушой чумме...

Гьомуил, гьелбет, вараси, эри ки хундеге у мэгIнире, киниге у ёр, сер энуре гьечи гиж сохдигьо, эри комики усуьз гьемей гIуьлос э гьичиш нисе верзире. У сере э дивунлуьйревоз, гьэгьревоз жумунде, диромо э хуне.

Эсеф гьетте бебешуре дире, сазе но э гьирогь, зури-зури э пой вэхишд. Гьомуил е минут э ён дер поисде, эз зир чум дениши э кук хуьшде. У гуйге энжэгь гьейсэгIэт, и гофгьой эни у хунденбугьо мэгIнире шиновусде: вараси эри хуьшде, ки э терсезов, э женгезов божэхьэт мибу Эсефо эз духдер нэхирчи дур, рэгIд сохде, гьишде уре э герде вегирде, духдер раби Шафаде хогьу гуфдире. Э уревоз эри эни кор э хуби, э хоширевоз гоф сохде гереки. Чуьтам гуфдирениге: эгенер туьре воисдениге дайчаре жуте сохде, э кул ю эри венуьшде, э пушой энү килэхьэ э гьово вешенде, уре терсунде герек нисди.

Гьомуил куьнд омо эз нимдер, э ён дивор хуне дешенде 'бугьо, э чумезов эз Эсеф бирмунд нуьшуь гуфдире, ющ вомундере хуно нуьшд э ён кук хуьшде.

Гьомуил гьэгьр хуьшдере пэхьни сохде э пушой энү, сер тирд э нерми, хоши, менэхьэфиревоз эри гуфдире э у:

— Ме, хэлефме, гье чум доноре поисдем, кей ебо туь, енебуге хьэрмэхьгьойтуь эз нуминейтуь биёвт гуют э ме, коми духдере туь.

хосдениге, эз коми духдер туьре хьэз оморениге, хогьим уре э шори-никиревоз эритуь, г1эруьси сохим, биёрим э хуне. — Песде Гьомуил пешмунире хуно е ох вокошире, мугу: — Ме не дедешму имогьой келе мердго, келе зенгьоним. Туьш имогьой бисдуь сале куки. Э дигь иму омбардеки жогьылгьо тойгьойтуь, худо мебуро, бебей г1эзилгьон. Имуреш воисдени те чум иму рэхьо гьисдигьо, худо гьишдге, э г1эриситуь вежегьим, невере э гьужогь вегирим, шоришмуре виним.

Гьомуил поюнд гоф хуьшдере, лове э менэхьэфие хэнде веберде, оммо эз зир чум тиж, э синемиширевоз денишире э сифет кук хуьшде, чуй мугуюге у гьейсэг1эт э гофгьой эню. Эсеф сере гьуз гирде нуьшдебу, эз лэг1э е гофиш неведировунд. Гьомуил диренге, ки кук ю гоф нисе сохде, нне гуфдире, дуьл эню коми духдере хосдениге, у екем гьемин, хомуш бисдо. «Э хьисобовоз гофгьой Хумор уннгьэде дуз нисди, — мугу э дуьл хуьшде Гьомуил, — небуге Эсеф гьейсэг1эт мугуфди э ю. Ошугь бугьо одоми серхуше одомире хунои, чуй э дуьл эню дериге, э бешгей зугьун эню вери. У Хонум елэг1эзойге гуфдигьо гофгьо эз гьэгьри, эз бедрешки».

Гьомуил гьейсэг1эт э дуьл хуьшде вешмерд Хонуме. Уре гьэгьромомо, чуйтам елэг1эзойге ю э мейду хьэрой сохде, совуре э пушой чум эню, эн э мейду бирогоргьо венгесде, гуфдиребуге э гьэгьр хуьрш, гирьёревоз э товун кук ю ве духдер нэхирчи. Эгенер у е теке духдер эн бебе-дедей хуьшде нибисдоге, е теке мирос эн devlet энугьо, Гьомуил гьич и бираче духдере нихосд эри кук хуьшде.

Дениши дики кук ю э товун Пери духдер нэхирчи гьичиш нисе гуфдире, дуьл эню эслогь хомуш бисдо, очугь гуфди э дуьл ю деригьо метлебе:

— Гьечу буге, хэлефме, — э дуьл хуьшде шори сохде, мугу Гьомуил эз кук хуьшде, — туьре ужире духдер небире бэгьдо, комиреки дуьлтуь хосдени, ме эритуь е хубе духдер дирем, эз хубе кифлет. Туь дануьсдени у духдере—Хонуме, духдер раби Шафаде.

Гьетте Эсеф нум Хонуме шиновусде, сифет эню дегиш бисдо, у хуьшдере вешенд, гуйге э биней гуш эню киниге бирден нэхэбереки туьфенг, тапинже шенд. У данухсенбу дир-зу, эхириш бешу хьэлово мибу э у, сер мигируь эри межбур сохде уре духдер Шафаде хою гуфдире. Те имогьой у э дуьл хуьшде ченд гиле э бешешуревоз э хуьжет поисде, э герде нисе вегирденбу Хонуме эри хосде. Оммо гьейсэг1эт гьэгьигьэтиш у шиновусдки эз лэг1эй бешу и гофгьоре, у э серевири домундере хуно бисдо, гуйге зугьун ю э лэг1эй ю кут бисдо домунд.

— Эйчуь туь, хэлефме, жугьоб нисе доре э гофме? — э хоширевоз пуьрси Гьомуил. — Эгенер у э хунейму, э кифлет иму лоигь нисдигьо мибисдоге, усоле духдер мибисдоге, ме гьич нум энуреш нигуьрдум. Эз елойге туь дануьсдени, ки Хонум е теклей бебедеден, бебей энугьо пире одомини. Себэхь-себэхкине руз, худо



меёро, бѳбей энугъо офдоре муърдге, гъеме мол, муълк, хъѳт-бо-же эритуъ мимуну, эриму. Мере воисдени туъ эз меш гѳширте бо-ши. Эзи хубтеш кор бирени?

Эсеф гене эз лѳгѳ гѳф неведировунд гъогъ буре мунде сдоми-ре хуно. У гъейсѳгѳт эдембу э дуъл хуъше лап дерд кешире эзу товун, ки эри юре воисденигъо духдере хосде у биѳ имогъой э хуъ-жет офдону э бѳбешуревоз. Эсеф бѳбешуре омбар хосденбу, хуър-мет юре келе гирденбу, эз гѳф, игърол эну вадарафде хуте небиребу. Е гилеш у э руй бѳбешу непоисдебу, э сер гѳф эну гѳф нео-вурдебу. Оммо у гъейсѳгѳт бѳбешу гѳфдире гѳфе сохдге, у биѳ эз Пери дес вегируъ, рази бу эри хосде духдере, комиреки неки эз дуълн эну небу, уре э чум дирѳ нисе хосденбу. Келе муъгъбет э ки севгили хуъше жуъргѳт до жовоне. У эхириш сере тик гирде, э бѳбешу денишире, мугу э дуълдѳгъдѳгъѳиревоз.

— Бебе, гуюм э туъ очугъ: эгенер ме Хонуме хосдумге, ме бел-ки эз туъш гѳширте мибошум, оммо уре хосден мере бѳхдсуъз ми-соху, ме мозол, шори нивинуъм э гѳуълѳм.

Ковхо руъхшенджимси хѳндуъсд, э кук хуъше денишире.

— Эй надан, гѳшири бегем мозол нисди? Ниет эн хосиб эй гѳширини. Э овоѳунегъош гъер кечел, гъер косиб ниет, хъѳрекет сохдени э чуъ гѳѳмеловозиш, э чуъ фендевозиш бисдоге эри гѳшир-буре. Эгенер гѳшири, девлет одомире мозол, вегири нидоге, одо-мигъо эри пул, эри мол гуъргъоре хуно дуъ э еки хъѳлово нибис-дорут, бирор э бирор, гъунши э гъунши бѳхили нисохд, падшогъо дуъ эекиревоз долгъогъо нисохдуът, хун нирихундуът. Эри муъгъ-бет нѳгѳ, эри пули, девлети гъемей эни сердердигъо, екикуъшигъо э гѳуълѳм... Оммо туъ эз наданитуъ эдее гѳфдире, гѳшири одомире мозол нисе дорѳ..

Пѳсде у бирден э хуъше невороморе, э гъѳгъри, биразиравоз мозол нисе дорѳ..

— Ме эдее дирѳнуъм рачи духдер эн нѳхирчи Ишмогѳил дѳре сертуъре лап гиж сохди. Оммо дануъсде бош: рачире э гъиче нисе веноре. Пѳсде, э нум иму, э кифлет иму лоигъ нисди духдер эн нѳхирчире, эн гудиле, хѳгъер эн фѳхъле, гѳдеймере э хунейме эри дирѳвунде, гѳѳруъсме сохде.

Эсеф и гѳфгъоре шиновусдки, гъеусѳгѳт, эбрѳгъ гѳзире одоми-ре хуно вѳхишд эз жигей хуъше.

— Бебе, бѳхшлемиш сох э ме, ме эдее э сер гѳфтуъ гѳф овур-денуъм гѳфдире, — елвор сохдере хуно мугу у эз бѳбешу. — Ме Хонуме нисе хосденуъм, дуълме э сер эну невери, туъре дануъсде воисдениге, гъич э чум дирѳш нисе хосденуъм. Эгенер туъ эриме Перире нѳхосдиге, ме и дерде хъѳл сохде нидануъм, ме эз хунегъо мивируъхуъм, оворе мибошум!..

И гѳфгъой кук хуъшдере шиновусдки, гене э ѳр Гъомуил омо-есегѳѳтойге э мейду Хонум э ю э гъѳгъевоз, э гирисдеревоз гѳф-

днѣбугьо гофгьо: «... Ме нисдуьм Гѣруьстуь! Гѣрустуь духдер нѣхирчи, духдер гудили. Кук туь жингире Меджнуни хуно гъуи э песой энэ э кучегьо, дерегьо!..» Э ър энэ омо гофгьой эн мѣгІни, комиреки Эсеф эдембу хунде пушой у э хуне дироморе. Эз гъѣгьр домбуле чумгьой ковхо хун вечируьт, сифет ю эн хурузе хуно гъир-мизи бисдо. Чорей энэ мибисдоге, у гъейсѣгІэт кук хуьшдере э дес-дин дес хуьшдеревоз пара-парче мисохд.

— Ибуд, оворе бош эз пушой чумгьойме, хъэремзеде! Те ме ебо туьре гъейсѣгІэт чѣхѣлемиш сохде, жунтуьре ведешенде, сур бош эз пушой чумгьойме! — е келе хъэрой вегирде э сер Эсеф, у эз жигей хуьше э зарбевоз вѣхише, шилолире хуно гъов кенд рафд э сер энэ.

Эсеф эз хуьршгьо, гъелебулегьой бѣбешу лап терсире, гъе усѣ-гІэт песово чаруьсде, зури-зури дер хунере вокурде, вирихд вада-рафд э куче. Э сес хъэрой-хъэрой Гъомуил дуьлпесо бирере хуно, эзу хунейге диромо Гъуьзуьргуьл, е пура, раче, пенжогъ сале зен. Муьйгьой энэ нимелит сипи бѣируьт, сифет ю сипи, очугъ, митьрову, ранг кѣгьробое чумгьой энэ эн жогъиле духдере хуно эдембѣруьт уьшуьгъ доре. Оммо эз чумгьо, эз сифет у могъбуле одомире хуно вѣди биренбу.

— Хѣйр гердо, и чуь сеси, хъэрой-хъэрой? — пуьрси Гъуьзуьр-гуьл эз шуьвер хуьше, комики гІѣтош гирде одомире хуно эзилой хуне э у лойгей хуне эдембу гѣшеде, гурунд нефес вокошире-вокошире.

— Куктуьре воисдени иму эри энэ духдер нѣхирчи ИшмогІиле хогъим, — э лой Гъуьзуьргуьл неденишире, э хуьршевоз гуфди Гъомуил. — Духдер раби Шафаде эри хосде э герде нисе вегирде. Эз ме мугу: туь уре эриме хосдиге, эз хунегьо оворе мибошум ма-дарам! Вѣчѣхѣр! Вѣченазу!

— Меш мугум чуьниге э и хори! — э тѣгънимиревоз мугу Гъуь-зуьргуьл, дуьл ю сокит бѣре и хъэрой-хъэрой эри эни кори гуфди-ре. — Бошгу, дуьл кук иму кире хосдениге, иму гъе уре мишокъим эри энэ. Бигъил Перире хоюгу. Хубе, раче духдери, корки, сели-гъѣлуьни. Белки гъисмет энэ Перини, Хонум нисди. Туь нисе дануьсде метелере: «Деде хоюгьо э гъѣрогъ мимуну, кук ю хоюгьо— э гъужогъ момуну».

Гофгьой эн Гъуьзуьргуьл э гъѣчи э саламатиревоз, лов хѣнде-ревоз гуфдире омогьо э товун эни кор, ѣжигей мелхъѣм, пуйге муьнуьк декуьрдере хуно омо эри Гъомуил э сер ярай энэ. Уре воисд муьшеде гъово вегирде, зѣнуь эз пѣхьлуьй энэ, гъѣгьр хуьшде-ре тигъи соху э сер зен хуьшеде, нѣфри-офри соху уре. Оммо Гъо-муил ченгъѣдер сурул, туьндехуй бугѣш э ки эни соките, олхогъине зен э могъбуле чумгьоревоз у хъэрой-хуьшуьл сохде нисе дануьс-денбу, негуфдире э товун муьшд гъово вегирдеи э сер энэ.

— Эз гофгьойтуь эдѣе дирѣнуьм, кук туь э ме нѣгІ, э туь омори,

э хоснетгьойтуь, — энжэгъ гуфдире дануьсд у э зен хуьшде, неде-  
нишире э гъэгър, хуьрш дуьл хуьшде.

Ини нмогьой у нуьшди э зир эн юре хуно куьгъне, оммо гье-  
ле сэхд гьисдигьо гьуьндуьре лигелуье гъэребечдор эн богъчей  
хьэът, эдее э ёр оворде гьемей эни коргьоре, гофгьоре, эз тенги  
дуьл хуьшде пейле э песой пейле хурде шоробе. Сер ебо э фикир  
эну оmore: эгенер Эсеф неходсге духдер пире рабире, молгьо, муьлк-  
гьой энуре сэхьибис мисоху е одомиге, эз дорун синей эн ковхо ду-  
разе нолоре хуно е келе ох варафдембу.

Гьово эдембу торик бире. Э ковре темизе асму веди бисдорут  
шев-чирогъигьоре хуно суьфдеи асдарагьо. Сес зурнов Рэхьмониш  
дие нисе оморенбу. Э иловле гьеми торик бу, гьемиге лап сокит.  
Оммо ковхо хьэрмэхь э думитгьо, фикиргьой хуьшдеревоз нуьшде  
поисдебу э зир гъэзизе гъэребечдор хуьшде.

Бирден у сере э зарбевоз жумунде, гуйге эз гъэрише, гурунде  
фикиргьой хуьшде очмиш бире, келе-келе хьэрой сохд:

— Эй кини гунжо! Биёт гьери ебо инжо!

Сес Гьомуиле шиновусде, эз хуне видов-видов омо раси э ки  
эну е жогъиле пойбирэхънее духделе, гъэревош хуней энугьо. У  
оморе э пушой ковхо серегъуз поисденки, Гьомуил э гъэревош не-  
денишире, буйругъ до суфрере вечинух гуфдире, песде  
мугу:

— Э холей Гьуьзуьругуьл гу: вегируь э хуьшдеревоз е энгуьш-  
дери, е чорек шороб не дуь нун: иму гьейсэгъэт эдее рафденим э  
уревоз Перире, хэгьер Сосуне эри хосде.

... Е орине гиросде бэгъдо э дигъ гъэруьси нушунде омо эри  
Эсеф не эри Пери. Себэхьмунде зу-сери сес-гьовол зурнов лов бис-  
до э дигъ, рафде и сес е сер э иловлей Муьшгуьр бируьтгьо богъ-  
гьо, вишегьо. Э фирегье хьэът эн ковхо бирордоморгьой эн Эсеф  
е хубе мейду дузетмиш сохдуьт эри вежегьисде. Э дорун хьэът кей-  
вонигьо, тозе, гуьлдобонлуье келэгъэгьигьой генжел э сер ишу  
вери — бэхш эн Гьомуил, эдембируьт э келе гъэжгъугьой миси  
егъни, гъош гъэруьси душунде, э сер кинлегьо — кобобгьо биржун-  
де. Дэгъэмлуье буй эн кобобгьо, эн лезетлуье егъни гъэруьси эз  
дурине оморенбу.

Э хьэът ковхо одоми пур бу. Е ченд серпоигьо гъэре недоре  
эдембируьт оворде э пушой гьуногъгьо туькуьлмиш сохде закус-  
кагьо, шороб, нухоруш, кобоб, савзи. Гьуногъгьо лап те буз ишу  
вероморе хурде эз лезетлуье чигьой гъэруьси, эз шороб серхуш  
бире, э дуь екиревоз пейлагьо зере, эдембируьт гуфдире, хэндусде,  
зарифате гофгьо сохде дуь экиревоз. Гьеле эзи дуь сэгъэт пушо  
эри омбаргьой энугьо гуйге эз Гьомуил усолте одоми небу э гье-  
мей дигъ. Оммо гьейсэгъэт серхуш бируьтгьо гьуногъгьо эдемби-  
руьт тэгъриф доре Гьомуиле, ки у дуьлфирегье, деслове одомини,  
бебей жэгъмети, у ижире гъошир, вегирлуье одоми биреки, хэгьер

эн фэхълей хуышдере, духдер нэхирчире хосди эри кук хуышде, косибэ, етима духдере э гъечиревоз вегирлуь, гIуьзетлуь сохди.

Шохъонгум биренки домор э бирордоморгъой хуышдеревоz, э гъовой зурневоz, э э хэйли одомигъоревоз оморут э хуней гIэруьс, гIэруьсе эри берде э хуней домор. Перире сэгъдуйшгъо-хэгъергилитгъой энудевировундуьт эз хуне. Э тен гIэруьс ковре булши хэре вебу. Руй энудэ сипре дуйгуьр эвруьшимиревоз дегуьрде бу. Бел эн дуйгуьр те бузгъой пой энуде фушенде бу. ГIэруьсе гъетте эз хуне девировунде, зурновчигъо зеруьт шуькетлуье, оммо зарифатлуье гъово «Дедей вой, гIэруьсе берд!..» Е ченд жогъилгъо гъе усэ-тIэт сер гирдуьт эри хунде, вежегъисде э и гъово э пушой эн зерегоргъо:

Дедей вой, вой, гIэруьсе берд!  
Берд, берд!  
Дуьл дедее гуйге Ол берд.  
Берд, берд!  
Негъогъ, дедей, туь мекеш дерд!  
Берд, берд!  
Духдер туьр е хубе мерд.  
Духдертуьре е хубе кук  
Берд, берд!..

ГIэруьс э ён хуней ковхо оморе расиренки, Гъомуил не дуь зенгъой энудевироморут эз хьэёт э пушорэхъи эн гIэруьс. Гъомуил дуйгуьр гIэруьсе вокошире, моч сохд уре эз пушони энуде, педде гъердуь духдергъоре, гъул гIэруьсе гирденбируьтгъоре, е монет нуьгърен до гъеркишуре. Зенгъой Гъомуилиш шуьвер ишуре хуно моч сохдуьт гIэруьсе, э дес духдергъо пул доноруьт.

Еки эз серпоигъо гъул гIэруьсе гирде, дировунд уре, э мейду эри вежегъисде э доморевоз. Э иловлей гIэруьс не домор кура бирогоргъо, сер гирдуьт эри чек зере. Эз домор бэгъдо э гIэруьсевоз вежегъисд Гъомуил, зенгъой энуде. Эз угъо бэгъдо сер гирдуьт э гIэруьсевоз эри вежегъисде — одомигъой эн домор — гъовумгъой эн Гъомуил не Гъуьзуьргуьл, пулгъо доноре э дес гIэруьс э вежегъисдеки.

Гъомуил гене диromo э мейду, гъул гIэруьсе гуьрд, педде руй бире э иловлей мейду кура бире гъуногъгъо, мугу э шоре хэндеревоz:

— Вессит, гIэруьсмере хэсде сохдейт эз вежегъисде. Имогъой кире воисдениге вежегъисде вежегъуьгуь гIэруьссуьз те юре воисде!

ГIэруьсе эз ён дер хуне куьнд овурденки эри э хуне деберде, кейвони Эвшэгъ, момуй эн дигъ, энгуьшдгъой Перире э бушбогъ гIэсел доно, педде энгуьшдгъой гIэсели энуре зе э бун дер, еГини

зиндегуни эн гІэруьс э и хуне гІэселе хуно ширин Ібу гуфдире. Е зениге е пенже эрзуй шенд э сер эн домор нен гІэруьс, егІни угьоре унгъэде гІэйлгъо бу гуфдире, ченгъэдер э сер энугъо эрзуй рихдиге.

ГІэруьсе бердуйт э жейлее утогъ декирдуйт э ён утогъ эн Гъо-муил. Те е гиле э ки гІэруьс дарафде, Эсеф, чуйтам гІэдот гьисдиге, диromo э ки бешу, эри бэхшламиши хосде, комики поисдебу э гузети эну. У э сер дуй сугъразани поисде э пушой Ібешу, сер хуьшдере гъуз гуьрде, мугу:

— Жон бебе, туй эз ме вегирде инжимишигьоре, дуьлпесоигьоре, наданигьоймере э ме бэхшлемиш сох!

Гъомуил дес хуьшдере кеши э лой Эсеф. У дес бешуре э дес хуьше вегирде, моч сохд, вено э чумгъо, гъутиней хуьше. Песде Гъомуил э десевоз совусд сер энуре, кемер энуре, гІэйиле хуно тимор сохд уре. Эсеф диренге, чуйтам бешу сер юре, кемер юре тимор сохдениге, бирден гІэйилигьой эну омо э ёр ю. Дуьл эну Ібуланмиш бирере хуно бисдо. У пушони, сер хуьшдере э занигьой бешу ведоре, гьирке сохде, гирисд.

— Туй эйчуй гирисде, хэлефме? — мугу ковхо, Эсефе вэхизунде, моч сохде эз пушонию. — Ме, хэлефме, гьемере бэхшлемиш сохденуьм э туй, худош бэхшлемиш сохо. Ме сохдем воисдейпуьре, туй шори сохи гуфдире, — гуфди Гъомуил, э кеф дес хуьшдеревоз гІэрсгьой чум энуре покурде.

Песде ковхо чаруьсд песово, руе дивор, э лой эн догъле. Э догъле дуй пура пейлей эрэгъи декуьрде норе оморебу. Гъомуил эз пэхъники чуйиге е кемлей э тагьер зерде гІорде хуно бугъо чире декуьрд э еки дуй пейлей эрэгъи. Песде у дуй пейлегьоре вегирде, екире эз угъо, э комики у чуйиге декуьрдебу, до кук хуьшдере, мугу:

— Ме, хэлефме, омбар шорум, бэхдеверуьм и шоре рузе э чуммеревоз дирей. Те ебо туй э ки гІэруьс дарафде, бие журим и пейлегьоре э согъи эну.

Эсеф лап шор бисдо и гофгьой бешуре шиновусджи. Эгенер уре гІэйб нимоге, у гьейсэгІэт эзи шори, келе разименди эз бешу, гІэйиле хуно гъэл мидешенд э герден бешу, синесов мибисдо. У пейле зере э бешуревоз, хурд те эхир пейле хуьшдере эри ю гурунд буйгеш согъ е пейле эрэгъире эри хурде (э муьшгуьригъо гІэдот небу эрэгъи хурде). Ковхо сер пейлей хуьшдере зе, после дуборе но уре гене э жигей ю. Гъомуил гуьрд е дуй-се минутигеш доморе э ки хуьше, после диренге, ки у эдее лэгІэпара сохде, э гужевоз э пой поисде, зугъун ю пелтеке хуно Ібири, руьхсет до кук хуьшдере дарав гуфдире э ки гІэруьс.

Эсеф лойлум хурде-хурде диromo э ки гІэруьс. Пери нуьшдебу э сер хъэлов э е шейревоз. Эсеф гьейсэгІэт уре гуйге эз гІэрей эн булут эдембу дирей. Чумгьой эну эдембируьт лилову хурде. Уре бирден эз нокуми лап хов шиши, э гужевоз э пой поисдебу. Эсеф

е дэгъдэгъэ поисд э пушой Пери, чуйге гуфди э лап пелтек бире зугьун хуышдеревоз, пезде эзи лап хэсде, гьолок бире одомире хуно, гьечу партал невенкендеки, нуышд э сер хьэлов, сер хуышдере веноре э гъужогъ гІэруыс, е тасире ох кешире, гьеусэгІэт хиси эз гІуылом рафдере хуно.

## ЕЙЛУГЪ ХУНИ

Ковхо э пейлей эрэгъиревоз кук хуышдере хов оморенигъо дерму доре, дефирсоре бэгъдо э ки гІэруыс, ю вадарафд э хьэёт, эжеки э гІэруыси огол зере оморе гъуногъгъо нуышдериуыт э сер суыфрегъо, эдёмбириуыт кеф сохде. Зурновчигъо гьейсэгІэт э жигей эн зурнов эдембириуыт балабан зере. Эз гъэд гъуногъгъо у тешд офд кейвони Эвшэгъэ. Ковхо огол зе диловунд уре э хуне, э утогъ хуышде. Э хуне диломоренге, Гъомуил гиросд нуышд э сер нимдер, э Эвшэгъ теклиф сохд нуышуь гуфдире э сер холинче э пушой ю.

Эвшегъ нуышденге, Гъомуил те ебо лэгІэ вокурде, э хуши, мигъровуниревоз дениши э гъолинде, гиргинее, оммо эз келе зени ю эзмиш бире сифет энупеде хуышдере е кем пушо доре э ки энупе, евошлей мугу:

— Эвшэгъ, мере воисдени туь е дилег мере бегъем сохи, веровуни.

Гъеле недануысде чуй дилегиге ковхоре, Эвшэгъ э пушоки гуфди разименди хуышдере.

— Туь бош енге эри гІэруыс не эри домор, — мугу ковхо.

Э гІэдотевоз енге еки эз тараф домор, екиге эз тараф гІэруыс гъеле те доморе э ки гІэруыс дефуырсоре миёсде норе оморе. Оммо Гъомуил э гъосутевоз гъеле негъишдебу сохде и коре.

— Эз тараф одомигъой гІэруыс енге нефирсорет, бирор гІэруыс э иму ихьдибор сохдени, эз тараф иму — туь бош енге, — мугу ковхо.

Келе зен омбар шор бисдо и гофе шиновусдки. Енге бире э Муышгуыр гІуызетлуь тапшуырмаши бубу.

— Ме э гІуымуырма эри ченд гІэруысгъо, доморгъо енге бирем, эри гІэруыстуь нен куктуь, худо угъоре сад сал гІуымуыр доре, э еки пир-сир гердо, лап эз войгей дуылме мибошум. Энжэгъ... — Эвшэгъ поисд е кем э дуыл ю е гоф оморере хуно, пезде лове э шоре хэнде веберде, мугу, — э хотур эни кор туь эриме е хубе бэхш мосдони.

— Туьре воюгъо бэхш, — гъе усэгІэт э хьозуриревоз гуфди ковхо. — Эри э гІэруыси кукме туь кейвони бирей, ме туьре келэгъэн генжеи бэхш дорем, оммо ме туьре эри эни кор лап энтигъэе бэхш мидуым.

Гъомуил гоф хуышдере дураз несохде, доно десе э куыф гъобой

хуыште, ведешенд эзунжо генлей суьрхире. Те ебо доре э дес келе зен, у вежегунд генлере э пушой энун, песе доно бэшке э кеф дес энун.

Генлей суьрхире, ижире раче, бугьолуе бэшке э дес хуыште диренки, чумгьой келе зен чорчумире хуно бисдо, нефес ю эз шори варафд фурамо, э зерде екем дуллу бире гьутинегьой энун гьирминзин офдо. Бирден у эри хуыште веровурд сохд, чуьтам у и генле э герден энун дери, у э шори ве текебуриревоз гешдениге э кучегьой дигь, гЛэруьс-духдер эн дигь э темэхь ве бэхилиревоз дениширенуьтге э и яравуьшигьин энун. Чуьтам гьерсе гЛэруьсгьой энун хьэрекет сохденуьтге дуь эз еки зиьдте эри менэхьэфи сохде э пушой энун, хуышдере ширин сохде эри энун, гьерки энунгьо эри хуыште имид сохде, белки зенхуьсуьр ишу пушой муьрде и бугьолуе генле юре бэхш доге.

Эвшэгь э ижире хэьлгьо дерики, Гьомуил ведешенд эз е куьфигей хуыште е чоргъэде сохде темизе сипре ейлугьэ, но э пушой Эвшэгь.

— Ведебер и темизе ейлугьэ э пушой э гЛэруьси нуьшдегоре одомигьо, ту ки гЛэруьсе...

Песой эн гофе ковхо негуфди, гьеебо жуьргIэт несохд эри гуьфдире, имид сохде эри хуыште, белки юре гьейсэгIэт воисдени бирэхьме гофе негуфдирекиш Эвшэгь вараси. Оммо ковхо э тигьэтевоз денишире э сифет эн келе зен, варасики, у э сер неофде эйгьом эн Гьомуинле. Келе зен диеш сэхд гирде э дес хуыште генлей суьрхире, шоре хэнде э лов ю вери, оммо е кемлей мэхьтел бирере хуно дениши э Гьомуил. Колхоре гьэгьр омо эзи «анамазин» эн келе зен, унегуьре у буйругь дорере хуно, мугу эз Эвшэгь, тиж денишире э ю:

— Эдее гуьфдиренуьм: ведебер и темизе ейлугьэ э пушой эн э гЛэруьси оморе одомигьо, ту: «ГЛэруьсе чодур нисди...»

Эвшэгь е минут пушо гуйге эдембу ширине ховгьо дире, оммо гуйге садан уре терс доре, у эз нокуми, хьэлегигер бире, хэбер бисдо. «И чуь муьгIуьжуьзе гофи Гьомуил гуьфдирени?! Бегем зарифате кори, вадарафде э пушой хэлгь, жэгIмет гуьфдире: «гЛэруьсе чодур нисди!» Те э дуь чум хуышдеревоз недире, недануьсде, бегем ижире гофе гуьфдире бире, э сер хуыште ижире келе гловуне вегирде?..»

Генле евош суьруьтме офдо эз сер кеф дес энун э сер холинче, чуькле холхолие марларе хуно бурмиш бире, гуьмбезле зе э пушой энун.

— Э Гьомуил, ме миром туьре, туь гьечи тэгIди, битоби эри чуь сохде, гьэгьр кешире? — э хоши-менэхьэфиревоз мугу Эвшэгь. — Белки домор э ки гЛэруьс дарафденге, комини сурул, бирэхьм, чумнэхогь уре «энгуьл» бьседиге. Мевеги ижире гловуне э

серту, сабур сох, рэхьм бнѣвгу туьре э у етима духдер. Песде гьеме э кумеки худоревоз дузетмиш мибу мурав.

Гьеме муьшгуьригь бовор сохденбируьт, ки домор э ки гІэруьс дарнфденге эри «гелин-гиѣв» бире, эгенер е одоми бесдге э гьирогъгьой ейлугъ, енбуге э русму е энгуьл, енебуге е ченд энгуьл, домор э гІэруьсевоз «гелин-гиѣв» бире нидануь те у энгуьл енебуге энгуьлгьо векенде неѣвт.

— Эрима зиѣдие лэхуьрд мэхун! Сох ме гүфдирере: гу гІэруьсе чодур нисди! Варасири?!

Эвшэгъ э хьэлежигериревоз зүри-зүри вэхисд эз жигей хуьшде, десгьоре пушово вешенде-вешенде, пуйге эз чуйиге гьэлхэнд гирде хуьшдере.

— Бебей ме вой, туь чуй гүфдире, Гьомуил?! — э лерзире севоз гүфди Эвшегъ. — Ме келе зенуьм, е пойме э гьовре дери... НэгІ, нэгІ, ме ижре беде коре нидануьм. Эз туьш хосденуьм, мевеги э сертуь ижире гІовуне, э гІэжел меди гІовунсуьзе етима духдере. Эгере туьре воисдениге: ме хьозурум эри сефгимере э пойгьойтуь шенде\*.

— Мевеке сефгитуьре эз сертуь! Туьре рази нисдиге — ме-сох! — Песде тиж, э дуьшмениревоз денишире э сифет келе зен, мугу: — Эгенер эз товун гьейсгІэт э гІэрейму юбиргьо гоф, туь э ё доне одоми гүфдириге, туьш, жукгьойтуьш эз хуьшде журит!..

— Бошгу, бошгу, гьэдвалим, э лэгІэйме килит менуьм, э екиш е гоф нигуюм, — гүфдире Эвшэгъ, зүри-зүри вадарафд э буру.

Эвшэгъ вадарафденге, Гьомуил гьэйле кешире-кешире, э сабирсуьзиревоз эдембу рафде-оморе эзи куьнж э у куьнж хуне, гьэгьр кешире-кешире. ГьейсгІэт эз хьэет оморенбугьо сесгьой серхуш бире гьуногьгьой энү, сесгьой мэгІни хундеи э дуьл энү диеш эдем: бируьт гьэгьр вэхизунде. Э ижире фикиргьо дери, у диреш неди, чуйтам чоуш энү сара Илогьу омоге диромоге э утогъ энү. Илогьу серхош бу, ловгьой энү эдембируьт хэндүьсде.

— Ощугъ омори, эдее мэгІнигьой Лейли нен Меджунне хунде. Е рач эдее хунде, — сере жумунде, гүфди у.

Гьомуил э гофгьой энү гуш негирде, эдембу гьечи э фикир, гьэгьривоз, бежид гьэйле-кешире рафде-оморе эзи сер утогъ э у сериге. Илогьу пиен бугеш, вараси, ки гьовой ковхо ежирейгеи.

— Хэйр гердо, е кор-чи бири?

Гьомуил э биразириевоз чаруьсд э лой чоуш, воисд э сер гьэгьр пиш соху вединуь уре, бирден э дуьл ю е хубе фикир оморере хуно, у поисд, рушверие сифет энү шор бирере хуно бисдо. «Чуй пире хэруьм ме?! — Гьомуил э дуьл хуьшде нифри сохд хуьшде-

---

\* Зен сефги шенде э пой мерд — хьисоб бирембу нишон эн келе тьовгьэи, елвори эз тераф зен. Э и овхьолет, эгенер мерде е тике семе номус, ехъ гьисдиге, у миѣсде эжиге овурде хогьиши, ёлвор энуре.



ре. — Чутьтам гье эз сер бошден э ёрме, хэёлме неомори эри тапу-шуърмиш сохде и коре э и эз ме бэнд гьисдигьо, гьемише э гъур-лугъме хьозур, белли гьисдигьо чоушме? Эйчуть сер эни гофе ме веровундум э и нолоигъэ кафтаре зеневоз?!...»

Гъомуил гьечи шор бисдо гьейсэгIэт Илогъуре диренки, чорсй энунибисдоге гьэл мигирд уре эз шори. Гъомуил э у э хуширевоз денишире гурунде пенжей хушдере э дусдиревоз веноре э сер душ — энуну, — мугу:

— Мере воисдени туь енге боши эри домор не гIэруьс.

— Илогъу эз шори хэндуйсд, хьи-хьи зере, хирде, тиже дендугъой хушдере бирмунде.

Оммо Гъомуил дес деноре э куьф, сипре ейлугъэ ведешенде, доре э у, гуфдики, чуй воисдеге юре эз Илогъу, чоуш э мэхьтели ве ёлвориревоз дениши э хьоким хушде.

— Туьреш «нэгI» гуфдире воисде, гъэдуьрнадан! — жингире хуно бисдо Гъомуил. У э хуьршевоз гъуьл зе Илогъуре э лой дер, мугу: — бура гьейсэгIэт э пушой эн гьеме пу ме э туь гуфдирере! Шиновусди?!..

Илогъу гье усэгIэт невадарафд, е дэгъдэгъэ поисде э пушой дер, нмид сохде эри хушде, белки ковхо вегирд песово гоф хушдере, гуфди эзу: герек нисди?

— Пойгъойтуь кут бире, э хори вогосири бегем? — Шиновусд Илогъу гье у туьтем сес эн Гъомуиле. — Вадара мэгIлуьм сох!..

Гъомуил дере ю хушдению вокурде, гъуьл зе ведешенд Илогъуре э хьэёт.

Илогъу е ченд минут поисд э песой дер, ейлугъэ сэхд шишире э дес, нисе дануьсде чуй сохуге. И эз хоснетгъо, коргъой хушде элчэгъ бугъо одомиш, бэнд бугъо томом эз ковхо, дуьл нисе сохденбу и десине гуфдирей энуре эри сохде. Оммо у дануьсденбу, ки э улойгей дер Гъомуил поисди, гуьзгуьлогъи. У э тегьер одоми, хушдере э сегьмуье бурмише сайл эн гIов дешенуьгъоре хуно, ейлугъэ э звер сер хушде черх доре, келе-келе хьэрой сохд!

— Эй хэлгъ, хэлоигъ! Денишит! Денишит! ГIэруьсе чодур нисди! ГIэруьсе чодур нисди!

Илогъу гьейсэгIэт мэгIлуьм сохдгъо э хэлгъ гьечи кори сохд, пуйге бирден эз нукуми биренгъине э сенгъэвоз тигъи бисдоге э зверсер энугъо, хори э зир пой энугъо лерзиге. Сес мэгIни ошугъ, шоре сесгъой хэнде гье усэгIэт бурра оморут. Гьемески тертэгIди эз жигегъошу вэхишде, дуь эеки расире, дуь екире гъуьл зере, гъэтмэгъэриш бисдорут, дуь екире недирере хуно. Омо сес тирисдей гIэилгъо, хьэрой эн зенгъо. Илогъу поисде э ён дегесире боргулу эдембу гье гьечу хьэрой сохде, сипре ейлугъэ черх доре э звер сер хушде:

Денишит! ГIэруьсе чодур нисди!..

Е ченд минутиш негиросд, э хьэёт е доне одоми недомунд. Гъу-

ногъгъо, серсугъоре хуно, суфрегъо, чигъоре зирпой сохде гъеме, шишире вадарафдуът э куче. Гъе н вэхди э сер бун хуней раби Шафад духдер эну Хонум, тирочуре э ленгери миси зере, эдембу хъэрой, жар дешенде э гъемей дигъ:

— Эй хэлгъ! Эй хэлонгъ! Ведиройт э томоше, винишит: Пери — духдер нэхирчире чодур нисди!

Хонум, гъэлифо э менгине шев э сер бун вежегъуьгъоре хуно, эдембу вешенде-фушенде хуьшдере, гIэре недоре, зере тирочуре э ленгери, огол зере эри томоше сохде бедн. биёбури эн дуьшмен юре — Перире.

Гъомуил гъетте сес Илогъу э гуш эну дарафде, э хун гирде чумгъоревоз, гIэтош тирдере хуно, шиши дарафд э утогъ эн гIэруьс нен домор.

— Хъэёсуьз, гъэнжугъ! — хъэрой дешенд гъеебо ковхо э сер эн гIэруьс. — Гуш вени ебо эз товней туь чуь хъэрой, чуь жевгъ дериге э дигъ! Духдеритуьре э вишегъо кулегъо впр сохдей э кировозиге, песде оморей э кукме?!..

Домор гъеми эз ичку, вомунден, гъемиге эз келе гъэдер эн хов оморенигъо дерму, комиреки Гъомуил э пэхъники декирдебу э пейлей эну, муьрдере хуно хисиребу. Божэхъэт э ён гуш эну гъейсэ-гIэт тупиш мишендиге, у хэбер мибисдоге.

Пери гьерчуь дануьсд Гъомуиле эз нокуми жин пуьрди, эзу товуней у гъечи хъэрой сохденигъо, ижире муьрдале, охмурие гофгъо гуфдиренигъо. Е ченд минут-гирошде бэгъдо э утогъ гIэруьс шишире дироморут е ченд одоми, кешумоле ведебердуът уре э куче. эжеки хэлгъ кура биребу. Уре овурде пюндуът э пушой эн е сие хэр. Книгиге э бирэхъне хэнжелевоз бурри е бенд муй энуре. Эз гIэруьс гъеусэгIэт е нокумие буьруьж ведиромо. Песде суьсд гъолоке хуно бугъо гIэруьсе венорут э кул эн хэр кунпесово, руй ю э лой кефел, эн дуьм хэр.

— Зурновчигъо! — хъэрой сохд Гъомуил эз руй келе гъэгъри, гIоси бирере хуно, эз дуьл шори сохде. — Чуьтам гIэдот гъисдиге эри энижире гIэруьс, зенит эри эну «Ошгуновое гъовол», берит дит уре э бирор ю!..

Пери ние варасиренбу эйчуь хэлгъ кура бириге, эйчуь бенд муй энуре бурриге, эйчуь зурновчигъо э гоф эн эз нокуми жингир биригъо ковхоревоз эри эну «Ошгуновое гъовол» куфденуьтге? Дигъбонигъой эну эзи е ченд минут пушо э сер суфрей гIэруьси нуьшде, эз согъи эну нен домор пейлогъой шороб хурденбируьтгъо, эйчуь гъейсэгIэт туфи-нэгIлетн сохде уре, вешмерденуьт. Кими энугъо эдет хок, кесег шенденуьт э сер эну. ГъейсэгIэт Пери э чум хуьшдереоз диренбугъо коргъо, э гуш хуьшдереоз шиновусденбугъо гофгъо эри эну гъэрише «ховгъой гъэлифоире» хуно оморенбу. Бирден э гъэд сесгъо-жевгъгъой эн хэлгъ э гуш эну дарафд сес эн зенг ленгери зере, не сес хъэрой:

— Эй хэлгъ! Эй хэлонгъ! Ведиройт э томошей хэгьер Сосун! Эри энү эдее «Ошгуновое гъовол» куфде!..

Эри Пери гъечи омо, гуйге у и сесе шинохдени, эжеиге шиновусдебу уре. Оммо, э же? Бирден гуйге дуыл энуре дерзе сула сохд — омо э ёр энү и сес эн киниге. И сес эн Хонуми. У руз гъеминон, Пери не Эсеф э гӀэрей кулегьой шевелуь пэхъни биренге. Хонум э песой энугьо гешде, угьоре неофденге, хьэрой сохде гуфдиребу, беде лово хосде эри Пери: «Ошгуновое гъовол» куфде биёво гуфдире. Гуфдирей энү э сер Пери омори. Имогьой у эдее эз шори вежегьисде, жар дешенде, ком вегирде эз гъээзоб ковхо э Пери омориго. Имогьой ковхо ёгъин михогьу уре эри кух хуьшде, дуыл эн гьердуьй энугьо динж мибу.

Оммо дуыл эн Пери эдембу сухде, э дуыл хуьшде хьэрой сохде: эйчуь эхи э у е тэхсириш невери, у духдер хуне биреки жиге, э сер энү ижире беде хьэшо вешенуьт, ижире гъээзобе э ю биёрут?!..

Сер эн Пери эз гӀэйб, биёбури, эзи гурунде фикиргьо дуллу бирени. Бирден у эз хуьшде рафдере хуно, лсйлум хурд. У миофде эз кул хэр, эгенер киниге э сес руьхшендие хэндеревоз уре гирдогор нибисдоге. Песде киниге э жигей гьирмож, зе эз сифет энү э бенд муй энуревоз: егӀни, «динж» нуьш э жигейтуь! Э дуыл Пери омо е буьруж, е хьэрой ведешенуь эз кон гьейсӀгӀэт гъэдерсуьз сэ-гӀэр хурдениго дуыл хуьшде, э хори не асму унг расуь, гьеме эз келе те чуькле шинову, гуь, шовгӀо соху, э ю е тэхсириш невери, э сер ю, эн хэтосуьзе етима духдер хьэшо вешендет. Оммо зугьун Пери кут биребу э лӀгӀэй ю домунде «Эжи Эсеф, гӀэзизе севгилиме? Эйчуь нисе оmore, кумек нисе бире эриме?!..»

Бирден э пушой чумгьой Пери оморени, чуьтам бирор энү Сосун бовор сохде хэгьер ю духдер нисди гуфдире, гье э ён дер хьэёт ишу, э пушой эн гьеме, хэнжеле вогъунде э сердуьл эн Пери, куьшдени уре, номус ю неветовусде и биёбурире. И кор э пушой чумгьой энү омоки, Пери э дуыл хуьшде лово хосдоре хуно мугу: «Ой худойме, ой худойме! Те бирорме мере куьшде, туь жунмере восдо, хилос сох мере. Ой худой ме!...»

ГӀэруьсе э хуней домор берденге, Сосун ведиромо те дер гьопу рэхь сохд хэгьер хуьшдере. Песде гье усӀгӀэт вогошд диромо э хуне. У эз ело шор бу хэгьер ю э хубе кук, э гӀошире кифлет гьисмет бири гуфдире. Эз елойге у могьбул бу хэгьер ю эз хуне рафди гуфдире. Гьуногьгьой Сосуниш гӀэруьсе берденге, угьош рафдуьт э хунегьошу, кимигьойге э гӀэруьсевоз — э хуней домор. Сосун гьейсӀгӀэт нуьшдебу тэхьно э хуне, гузет сохде, кей эз хуней домор миёвт одомигьо э чодур гӀэруьсовоз эри бирмунде э у. Э куьнж хуне у е сову шороб не е гьоз хьозур сохде гьишдебу—бэхш эри чодур гӀэруьсе овурдегоргьо.

Сосун гъечи э чумерэхь эн эз хуней домор биёвтгьо одомигьо гьисди, бирден э гуш энү дарафд эз дурине эз куче оморенбируьт-

гъо сесгьой жевгъ, журай, сес гъовол--зурнов эн гъово, комиреки у гъеле э гъуьмуър хуьшде е гилеш нешиновусдебу. Сосун омбар мэхьтел бире, э хуьшде домунде, ведиромо эз хуне. Гье у тутьем, кейки Сосун дер хунере вокурде, ведиромо э хьэът, у расд омо э келе зен Эвшэгъ. Шуш-нефес энур гирдебу, гуйге еки уре донорогор пиш сохдегор бириге. Келе зен гьетте Сосуине дире, хуьшдере шенд э хори, офдо э пойгьой энур.

— Ошгунове гъоволе эри хьэгьертуь эдее куде, — гирисде-гирисде мугу у. — Оммо э жун муьрдегьо нен зуьндегьойме э хьэгьертуь е гъэйт, е тэхсир невери, у ковтере жуно темиз-хьололи. Э сер энур э гъэстевоз хьэшо вешенди.

Эри Сосун гьечи омо, гуйге еки вегирд э сер энур хокинтаз эн гъэтоше декуьрд. У келе зене вэхизунд, пуьрси э келе гъаежониревоз:

— Гу, зубош, холей Эвшэгъ, чуй дануьсдеге туй эз товун энн кор!

Келе зен тертэгъди, зугьун вепичире-вепичире, э иловле денишире-денишире, гудди, чуйтам Гъомуил эзу гуддиребуге ведарав гуу гъэруьсе чодур нисди гуддире...

Эвшэгъ гьетте и гофгьоре гуддире, зури-зури вадарафд, те уре инжо кес дире. Сосун е дэгъдэгъэ поисд гъогъ-перт бирере хуно, песе бирден видов-видов дарафд э хуне, ведиромо гье у минут эзунжо э е келе бирэхьне хэнжелевоз. Хэнжел э дес дери у эз гъирогъ. эн дигъ, кес невинуй пуддире уре, омо гьечу видов-видов э кин боруй хьэет эн ковхо. Э сер бору вешенде хуьшдере, Сосун диromo э хьэът. Э хьэът Гъомуил гьейсэгъэт е доне одоми недебу. У куьнд омо эз домой дер утогъ эн ковхо, э зарбевоз тепуьк зере, вокурд уре. Гъомуил тэхьно нуьшдебу э хуне э сер нимдер э гьешенне жигей хуьшде, гъэйле э лэгъэй ю дери. У Сосуине гьечи э бирэхьне хэнжелевоз диренге, ранг энур рафд, гъэйле гьеусэгъэт офдо эз лэгъэй ю. Гъомуил шуьле хуно вэхуьшд, водо хуьшдере э дивор, э хьэлежигери ве дуьшмениревоз денишире э бирор эн гъэруьс.

— Туй эйчуь оморей инжо?! Чуй вонде туйре! — э лерзире сесевоз гудди у.

— Гу гьейтсэгъэт эженге куктуь? — э фирегье кемер хуьшдеревоз пушой дере гуьрде, ковхо невирихуй пуддире, э зарбевоз гудди у.

— У эз номус, эз биьбури вирихди рафде, меш нисе дануьсденуьм эже рафдиге, — гудди ковхо.

Эзи дурпуни эн Гъомуил хуьуршгьой эн Сосун диеш зе вешенд э келлей сер ю. У дендунэгъижи сохде, хэнжеле тик гирде, куьнд омо эз Гъомуил:

— Пире сег. Нолеитъ! Ме гьейсэгъэт гъэжел туйре мидуьм!..

Гъомуил эз мунде жигеш зэхьлевежэгъ бире, у е келе хьэрой

дешенд нум кук хуышдере гуьрде, уре э кумеки огол зере, эз поис-дебугьо жигей хуыште вирихде, видовусд дарафд э доруни хуней эн суьфден тебэгъэй хуней хуыште, эжеки Эсеф дегешдебу. Сосун гье у туьтем шиши диромо э песой энун. Домор э сер хьэлов хисиребу э парталгьой доморворирево, тозе килэхь э сер вери, тозе чекмегьо — э пой. Сер энун э сер болуш невебу, э сер луьхьуьф вебу, жендек ю гьуьж дироморебу. Сифет энун олхогьин бу. Э гьырогьлов энун хэнде вебу. Белки у гьейсэгIэт э хов гIэзизе севгили хуышдере — Перире диренбу э ён хуыште, шори сохде, метлебгьой ю эжиге омори гуфдире.

Сосун диренге доморе гьечи эз хуыште рафдере хуно э хьэлов хисире, э гьувотлуье дес хуышдерево тик гуьрд уре эз ехэн ю, шу-вунд, увэхдиш Эсеф чум невокурд, сер энун дуллу, эзило э уло эдембу офдоре эз бугьоз бура керге хуно, тасире ноле, ох ведироморе эз синей ю.

— У сэхд пиёни, э хуыште недери, дес мезе э у! — э лерзире сесевоз гуфди ковхо.

Сосун пертево до уре э сер хьлов, песеде гье усэгIэт э хуьршево гьово гуьрд хэнжеле эри зере уре. Гье у туьтем Гьомуил десгьоре пушо шенде, э келе хьэроево «ба-а-лай-ме!..», шенд хуышдере э сер Эсеф, хэнжел Сосун э у нарасуь гуфдире. Эз ковхо гье усэгIэт диеш келе хьэрой, буьруьж ведиромо, хэнжел Сосун э ю расики, э хуневоз билесумол бире...

# ШИМИ ДЕРБЕНДИ

*Юмористически ве сатирически новеллазъо*

## Э ЭРЭГЪИ СЕР ЗЕНУЪГЪО, СЕРЕ ВИР МИСОХУ

Е гиле гьовой шохьонгум Шими е хэйли пул вегирде э трудо-денгьой хуьшде э кантур колхоз, шори-шори эдембу зури-зури э хуне вогошде. У эз куче, эз ён духон э гиросдеки, дуь-се жогъиле одомигьо, лутигьо-путигьо, пиёнискегьо оморуйт гирдуьт пушой энуре. Угьо шиновусдебируьт, ки имбуруз колхозчигьоре келе аванс дори пуфдире.

Угьо иловлей Шимире ведебурра, г'энгьоре хуно вепичире э у, сер гирдуьт э хоши-менэхэфиревоз сер энуре эри пучунде:

— Эй, лелей Шими, — мугу угьо эз Шими, гьул энуре гирде, — биё, туь мунош, дарайм э духон е-дуь пейле хурим э согъитуй.

Шими эз нерми хуьшде э угьо руй шенде недануьсд, дерафд э угьоревоз э духон. Лутигьо диренге нерми эн Шимире, хурдуьт, гьенжируьт те финж винишуь вероморе, те куьфгьой энуре темиз несохдуьт.

Шев эз ниме гиросдебу Шими эз духон ведироморенки. У гьечи лул-пиён бу, э поиш поисде нисе дануьсденбу. Эз пиёни, серегижки хуьшде у рэхь хунере вир сохде, недануьсд э комило 'буравге. Чорей Шими небисдо, у э куче, э зир эн е дор дегешд, э жигей эн болуш килэхь хуьшдере доно э зир сер хуьшде.

Хэбер бисдо Шими сер себэхь эз хиники, лерз венорен. Шими гьетте чум вокурде, миденишуь мивиниь, бобо вой, ю тенбирэхь-нен, э тен ю партал, шей-шовол невери. У мадан, щев инжо э зир дор э пиёни хисиренки, дуьздгьо-хэсплушгьо сер тен энуре векенде, селт бирэхьне гьишде уре, энжэгъ килэхь энуре гьишдебируьт э бонилей энур.

Шими вэхид э пой, э килэхь хуьшдеревоз пэхьни сохде г'Эй-бине жигей хуьшдере, г'Эйбе-г'Эйб чуме-чару сохд э иловле, винуь-дануь: 'белки е шинохдегор э ю расд омоге, фирсуь уре э хуне э кин зен хуьшде, партал биёру эри ю. Гьемин э гьисмет Шими гье и вэг'до гьунши энур, е келе гьэрзинке э дес дери, эдембу э 'базар рафде эри чем-чи восдоре.

— Эй гьунши! — гьетте уре дире, эз дурине хьэрой сохд Шими. — Туь мунош, е инжимиш бош, вогорд э лой хуне, ту э зенме:

ме тимтенбирэхънеуьм. Коми нолоигъэ, инсофсуьзе одомигъонге мере суймиш сохдет, сер-тен мере векендет, бирэхъне гъишдет эз деде оморере хуно. Бигъил парталгъоймере вегируь зури-зури биёвгу офугу мере э же герекиге.

Оммо Шими непуфди: зен ю э же биёвгу офуге уре. У эри хуьшде фикри сохд, ки зен эню лап унгъэде хэр нисди эри недануьсде э же гешде офде герекиге юре.

Гуфдире и гофгъоре э гъунши, Шими видов-видов тирошд кучере, дерафд э хьошум, комики э бэхд эн Шими, лап куьнд бу эзу у шев хисиребугъо жиге.

Согъ руз эз себэхъэвоз Шими битоби кешире, нуиьшде поисдебу э хьомум, чум ю э рэхъ зен ю дери, оммо зен ю гъечи оморене ведиромо. Оммо Шимире хэбер небу, ки зен ю гъетте гъуншишу и хэбере э ю доре, зури-зури парталгъой шуьвер хуьшдере э бугъче доноре, рафдебу уре эри гешде. Зен Шими негешде жиге, непуьрсирогор одоми небисдо, оммо уре э е жигеш неофд.

Эхирки, шохьонгум, лап торик биренки, Шими омо ведиромо э хуне э ки зенгъо-гъилгъой хуьшде. Э тен эню сипре хэлет вебу, э пойгъой эню — добонтэхде бире дарбигъо. Хэлет не дарбигъо доребу уре э хьомум кор сохденигъо зен. Шими дануьсденге эз зен хуьшде, ки у юре согъ руз э гъэд шегъер, куче бе куче гешди, лап гъоси бисдо эз у.

— Эй зен, э хуней бибейтуь гъэтош дераво! — э хуьршевоз мугу Шими эз зен хуьшде. — Туь э же дирей, э же шиновусдей: тенбирэхънее одомире э куче, э базар енебуге э мейду гешде герекигуфдире? Ингъэде сал э гъуьлом зигъисдей, те имогъоиш э и гъогъэ сертуьревоз неверасирей: пиёнискере э духон миофи, тен бирэхънее одомире — э хьомум?! Э жун худо, туь зен нисди, бологъи э серме!...

Зен Шимиш эзижире гофгъой шуьвер хуьшде гъэгъри, гъоси бире, мугу эзу:

— Эй мерд, шуьгъэм эню туьре зендигъо зен бологъ э серме пара гердо! Ингъэде сал туь э и гъуьлом зигъисдей, темогъоиш неверасирей: «Э эрэгъи сер зенугъо, сер хуьшдере вир мисоху». Ки тэхсири эйтуй: туь ингъэде эрэгъи луьхълуьхъуьт сохдей, неки сертуьре, ализе шоволтуьреш вир сохдей гуфдире!?

## БЭХШ ШИМИ ЭРИ ЗЕН ХУЬШДЕ

Зен Шими пушотеш лэгълэгъ, сер-гуш шуьвере берденигъо одоми бу. Оммо келе зен бире-бире у диеш эдембу зобу бире. Сер-гуш косибе Шими эз дес эню динж небу. Эри е негъогъне кор у его лэгъ-гъэ мокурдгъо, дие лэгъ-гъэ хуьшдере сэхд нисе сохденбу, керг гъуьртире хуно гъе мифигъунд. ими эз дес эню лап визор-гуьзор бу.



Е гиле Шими согъ орине э дуре богъгьой колхоз кор сохденки, рэхъ те шегьер дури гуфдире, шев унжо хисиренбу э хьэрмэхьгьой хуышдеревоз. Бэгъдовой е оринейге Шими э хуне вогошденге, зен энэ э жигей шуввер хуышдере диренге шори, мигъровуни сохде, сер гирд гене эри хьэлово (бире э у, гоф, серкуш зере э Шими).

— Эй зен, гене чыъ бири, коми глэнг, эбрэгъ гезири туьре? — дуълхуьрд бирере хуно, мугую Шими. — Ме гьеле бегьем эз дер недироморем, глэйбиш бу гуфдире, кунме гьеле э хори нерасири, туь гене э серме лэглэ вокурдей, э ехэнме венчирей! Чыъ воисде туьре эз ме?

— Эй мерд, ме дануьсденуьм, туьре гыч фикир-гьэйгъуйме негирди. Ме себэхъ офдоре муьрдуьмге, глэйбиш бу гуфдире, эз туь гыч е ворле рафдере хунош ниёв эритуь. Туь гьэдуьрмере гыч недануьсдей. Зен э гьэдуьрсуьзе мерд гысмет бирейжон, сад сал э хуне демунде, шувверсуьз мунде хуби.

— Эй зен! — диеш хьуьршлемиш бире, хьэрой вегирд Шими, — негуи чыъниге, чу воисдеге туьре!?

— Чыъни, чыъ воисде мере? — ловгьоре дигил сохде, э шефде хэнде веберде, мугу зен. — Себэхъ чыъл сали и гьэребэхде серме офдорем э зенжилтуь, э туь э шуввер оморем. Де мердиге, зен хуышдере хосденигьо, хотур, хуьрмет юре гирденигьо, эзини руз эри энэ е хубе бэхш мосдону, омбаракбу мисоху. Оммо эдее диренуьм гыч э ёргьо-хэёлгьойтуьш недери себэхъ дуз чыъл сали гуфдире и гьэребэхде серме э туь э шуввер оморем.

Шими гье усэглэт хэндуьсде, хоши гирд зен хуышдере, мугу:

— Эй зен, туьре воюгьо бэхш, э сер чумгьойме. Э жун мере офиригьо худо, ме гьейсэглэт мирам гьеме тукугьо-магазингьой Дербенде мигердуьм, те ме эз дуьлиме небугьо бэхше не офум, ме э хуне нивогордум. Ужире бэхше туь э ховтуьш нивини.

Зен омбар шор бисдо и гофгьой Шимире шиновусдки. У эри хуышде фикир сохд, ки мерд ю эз расдиш эрию лап хубе бэхш мосдону. У мерде хорунде, шороб доре, тимор сохде, ведекуьрд эз дер, чуме э рэхъ энэ доноре.

Оммо е ченд сэглэт тирошд, те Шими э хуне вогошде. Гьово лап шохьонгум бу у э хуне оморенки. Нефес Шими гирдебу. Сер сифет энуре эрэгъ шиширебу. Э расди дес энэ е келе дегьгирвенкеи парс гирде килит дебу. Шими вомундебугеш, гьовой ю шор, ловгьой ю э хэнде вебу.

— Эй мерд, и чыъни туь овурдей? — э келе мэхьтелиревоз дешире гогъ э парс гирде килит, гогъ э шуввер хуышде, пуьрси зен Шими.

— Чыътам чыъни? — Жугьоб до Шими. — Ме э туь непуфдире-бируьм, ме эритуь е бэхш мосдонум, ужире бэхше туь не э глуьмуьртлуь, не э ховтуь недирей. Инией!.. — мугу Шими, шори сохде, килите вежегьунде э (бине буз эн зен хуышде. — Овурдем! Оммо

э келе гужгъо-зэхьметгъоревоз гешдем офдем ижире килите. Э ту-кугъо, магазингъо нефденге ижире мере воисденигъо келе килите, ме, неденишире э вомундеи, келе мердиге, э хотур туь, э хотур чуй сал туь э ме э шуьвер оморен, вэхидуьм верафдуьм е сер э гъэле, эз келе гъопуй эн Нарын-Кале э келе гужевоз векендуьм овурдум и килите. Оммо туь эдее гуфдире, ме хуб нисдуьм, бе-леуьм-филонуьм...

— Эй мерд, муьгуьжуьз дераво э чумгъойтуь! Туь делуь бирей небуге э ме руьхшенд сохде? Мере и килит эричуьни?

— Чуьтам эричуьни?! И килите ме овурдем, туь уре э руз ю е-дуь сэгIэтле семе э зугъунтуь вени, лэгIэйтуй гирде биьв, — минет-елвор сохдере хуно мугу Шими эз зен хуьшде.

## УШ СНЕГЬИ...

Е гиле Шими Дербенди эз базар е чоьгъэ буд эн гусбендире восдоре овурдебу. Уре воисд эзи буд е хубе кобоб соху. Шими э хьэьт вено менгъэле, вегирд кордоре, сер гирд гушде жизле-жизле эри бурра. Сие сег эн Шими э и вэхди, чуме э лой гушд доноре, эдембу евош-евош гешде э ён эну. Шими суьфделе сер гирдебу гушде эри бурра, бирден, чум Шими э елойге гьисдики, сег эну эз некуми гье эз биней буз эн Шими буде палунде, чопгъуне хуно вирихд э куче. Шими э сер сег хуьрш сохде, э чубугъэвоз видовусд э песой сег. Сег диренге сэхьиб ю э хуьзуймиревоз эдее э песой ю видовусде, буде диеш сэхд гирде э дендугъой хуьшде, диеш э зарбевоз видовусд.

Шими вогошд э хьэьт дес тигьи, шуш-нефес ю гирде эз видовусде, гьемей ю гIов-эрэгъ. У э ён хьэьт хуьшде оморе расиренки, мивини э лэгIэй гъопушу сег ишуре хуно е сие сег поисди. Шими чубугъэ тик гирде, видовусд омо э сер сег, сер гирд сеге эри куфде, гъэгър дуьл хуьшдере эзи сег эри ведешенде. Сег хуьшдере гъуьжунде, эз терс, дорд дорен, сер гирд зузе-божэхъ зере. Зен Шими диренге и коре, омо зури-зури дес энуре гирде, мугу:

— Эй мерд, туь чуь сохде?! И фэгъире сег чуь тэхсири, туь уре куфдени? Уки гушде неберди.

Шими дес зен хуьшдере песово доре, гIоси бире эзу, мугу:

— Эй зен, туь э корме гъэриш мебош! Туь нисе дире беге и сегиш сег имуре хуно снегьи?!..

## ШИМИ Э БОЛНИСЕ

Шими келе мерд гьисдигеш, чум мерасо, жунсогъэ одомини. Оммо и пушогъо э у чуь кориге шуьгъэме дерди офдоре, оморебу

э болнисе эри дегешде. Э «приемни» э у мугу: гьейсэг!эт э болнисе хэвлете жиге нисди. Гьергой хэвлете жиге бисдо, увэхди уре миде-гердунут.

Чорей Шими небисдо, шуьгъэме тирде-гирде сер гирд эри песо-во э хуне вогошде. Гье и вэхди еке эз корсохгьой эн болнисе видо-вусд омо э песой Шими, мугу эзу:

— Эй лелей Шими, е сад монет пул ди э ме, ме гьейсэг!эт эри-туь э болнисе жиге мисохум.

Шими чоресуьз рази бисдо, до сад монете. Шимире дировунд э е палата, эжеки шеш нечогъгьо дебируьс. Шими угьоре э эдеб-луьиревоз «руз э хэйрбу доре», куьнд омо эз койкай хуьшде. Те ебо у сер-тен хуьшдере векенде, дегешде, Шими, неденишире э шуь-гъэм дорд дорен хуьшде, сер гирд э тигъэтевоз эри фегъм сохде койка, хьэлов-болуш хуьшдере. Дес зе э эдиёл пешми, фегъм сохд дуьвойне зирхьэловигьоре, куьгънеиге угьо, сула-сула нисдиге, бо-луше, руй болушире. Угьо лап тозе небируьтгеш, оммо куьгънеш небируьт. Дуьл ю гьемин бире, Шими сер-тен хуьшдере векенде, дегешд э хьэлов.

Е мегъ гирошде бэгъдо, Шими хос бире, э хуьшде диromo, шуь-гъэмдорд дореню гирошд. Оммо те ебо эз болнисе ведерафде, у э невей хуьшде тапшуьрмиш сохд эз хуне биёру келедедей э хвьёт партал вешенденигьо дуразе расере.

Гьетте невеле расере овурде, Шими э олхогъиниревоз, тэгди несохде, вегирд эз сер койка болуше, эдиёлгьоре, нимдере, сер-се-реки дечи угьоре, но э хори. Песде койкаре лов сохде, но э ён эну-гьо. Э палате дебиругоре нечогъгьо э томоше ве мэхътелиревоз де-ниширебируьт чуй сохдеге Шими. У гьемей эни чигьоре хуб э ра-серевоз бесде, эдембу э кул хуьшде веноре эри э хуне берде, гье-мин гье и вэхди нечогъгьоре эри фегъм сохде э палате дироморут начальник эн отделение, духдиргьо, медсестрагьо. Угьо дануьсдуьки Шими и чигьой болнисере эдее э хуне берде, омбар мэхътел бисдо-рут, сер гирдуьт уре эри г!эйб доре, серкуш зере.

— Эй лелей Шими, туь чуй сохде?! — мугу эзу уре хуб сохде-бугьо духдир. — Иму инжо туьре е мегъ э болнисе дошдейм, э пе-сойтуь мугъоет бирейм, хос сохдейм, туь э жигей «худо рази», «согъ боши» гуфдире, эдее чигьой болнисере э култуь веноре, э хуне берде? Гьечиш кор бирени?!..

Шими десе э сине зере, э обур, хуььрметевоз мугу эзугьо:

— Омбар согъ бошнт, худо рази эз ишму эри э гъэд эн е мегъ-мере инжо гьурлугъ сохдеи, э ме мугъоет бирей, мере эз г!эзор хи-лос, хос сохдеи. Оммо э товун эни ме э хуне берденуьмгьо чигьой болнисере гуфдиренитге, э жун сер гьемешму, гьемей эни чигьо — эн мени: ме гье у э болнисе дегешдемгьо руз сад монет нэгъде пул дорем эри эни чигьо.

Кутэхьи гоф: Шими рази бисдо эри фурухде э болнисе гьемей

эни чигьоре гье э у гьимет — э сад монет, ченгээдер ю дорбуге  
чу руз юре э болнисе дегерденбугьо.

### «Э У ЗИМИЛЕРЗИШ НИСЕ ВЕРОМОРЕ...»

Е гиле е лап герме руз эн гьеминон Шими Дербенди нуьшдебу  
э келе мердгьоревоз э серини э зир эн е келе чинордор э ён чойхо-  
не эдембу э угьоревоз гоф-суьгьбет сохде. Э вэхд эн суьгьбет омо  
гоф веромо э товун эзи ченд салгьо пушо э кими районгьой До-  
гьисту зимицерз бибребуьо. Еки эз келе мердгьо мугу эз Шими:

— Эй Шими, чуьтам оmore эритуь: кимигьо гуфдиренуьт гуйте  
зимицерзе худо фирсоре эри одомигьоре жозе-тенбихь доре эри  
сохде гловунгьошу?

Шими е кем э хуьшде демунде, песде мугу:

— Нэг I, эрме оморенигьо, инжо худолугь е кориш нисди. Ме  
дануьсденуьм е келе гловункоре одомире, э комики зимицерз е ко-  
риш нисе сохде. Эгенер худо фирсорениге зимицерзе гловункоре  
эри терсунде енебуге тенбихь доре, эн суьфде уре миёсд доре.  
Оммо э вэхд зимицерз уре гьичиш небисдо, гьич э хэпер ю бирере  
хунош небу.

Э ихдилот нуьшдебируьтгьо келе мердгьо ижире гофгьой эн  
Шимице шиновусде, диеш гуьзгьулогь бире, денишируьт, гене чуь  
мугуюге Шими.

— Э вэхд энугу зимицерз, — гоф хуьшдере зиёд сохде, мугу Ши-  
ми, — ме эри е ченд рузи э гьуногьлугьги рафдебируьм э хуней эн  
е куьгьне дусдме. У зигьисдени э е чуькле шегьерле, эжеки келе  
зимицерз бибребу. Келе гьуьндуьре дуь тебэгьэи раче хуней эни  
гловункоре, э товун комики ме гуфдиренуьм, э вэхд эн зимицерз е  
чиш небисдо, е дивор эн хуней энугу е чэх небисдо, е шэгьэ нэхурд.  
Оммо э куьнди хуней энугу бируьтгьо хунегьо, гьемчун хуней эн ко-  
сибе дусдме, е хэреб-хэсде бисдорут енебуге эслогь вечаруьсде-до-  
гьуногь бисдорут.

Эри омбардеки келе мердгьо и гоф Шими омбар мэхьтел омо.  
Еки энугьо, бовор несохдере хуно э и гоф эн Шими, пуьрси:

— Хуней энугу (бегем «тилисим» гирдеи?)

— Нэг I, — мугу Шими, — тилисим гирде нисди, эз де хунегь-  
гойге бешгьэи. У эз бинеден хуней жушдере тох гирди э лап гуж-  
луье пулатие каркагьоревоз, комигьореки э заказ энуревоз хьозур  
сохде оморобируьт э е келе завод. Унегуьре зимицерз э хуней энугу  
кори нисе сохде. Песде ме гуюм э ишму, дусдгойме, у юш хуьш-  
дениюш омбар бешгьэе одомини.

— Бешгьэе одоми чуьтам? — э руьхшендимисиревоз пуьрси  
тге у келе мерд. — Минежиб нисдики у?!

— У минежиб нисдигеш, — мугу Шими, — эз дес энугу веромо-

ренигъо коргъо, эз дес эн гьер одоми ниверов. — У меселен, эз де одомигъойге зиѣдте муъзд нисе вегирде. Оммо, неденишире э и кор, у восдори е мошин эри хуъше, е мошинниге эри нуьгъумуьн класс хунденигъо кук хуъше, сеимуьн мошин у восдори эри хосдехунд гъисденигъо духдер хуъше, чоримуьн мошин — эри жогъиле раче ошней хуъше. Дуьрлуьг хуней энэ эз эн поше, бег зиѣдтеи. Зен ю эдее тов доре «сухде» э энгуьшдгъо, гушгъо ве э синей ю веригъо бурлиантгъо. Гъеле кими одомигъо гуфдиренуьт э товун энэ: егъни, винишит, чуь зурбое, фегъмлуье, игде мердиге, дануьсдени зигъисде!..

Мэхътел мунде келе мердгъо и гофгъоре шиновусденге, гъэгр оmore ишуре, сер гирдуьт э е лэгъэ эри гуфдире:

— У угиде мерд нисди, ведини, пул, хэзиней хьуькуьмете дуьз-диругори.

— Енебуге келе спекулянти, эз пэхъники «даффисит» фурухденигъо одоми.

— Белки келе рушвехури. Эз рушвехуригъо гъошир бире одо-мини!?

Еки эз келе мердгъо, э раче берачей Шими нуьшдебугъо, лэгъэ-ре, хьире чумгъо, эз сер нечогъэ одоми бу. Эзи шиновусде гофгъой эн Шими, у делуьре хуно бире, сере шувунде-шувенде, гъелуьсди вэхисд э сер сугъразани, э дуь десевоз эз ехэн Шими гирде, сер гирд уре эри шувунде, хьэрой дешенде:

— Эй Шими, ту ебо эриме! Эйчуь у туь гуфдиренигъо одомире милиция нисе гирде, дуьсдогъ нисе сохде?!..

Гъеме инжо нуьшдебируьтгъо келемердгъойге рази бисдорут э гоф энэ, егъни у дуз гуфдире.

Шими э пужевоз векенде эз ехэн хуъше десгъой эн туьндэхуе келе мерде, э гъэгр, биразиревоз денишире э хьэрмэхъгъой хуъше, мугу:

— Эде! Чуь кенете, гъонмезе одомигъоит ишму!? Ме э ишму гъейсэгъэтле негуфдируьм бете: э у одоми зимицерзиш нисе веро-море, милиция чуьтам вероморе э у?! Погъ!..

## ГИРЬЕЙ ШИМИ ЭРИ ХЭР ХУЪШДЕ

Хэр эн Шими эз некуми офдоре муьрдебу. Муьрде хэр хуъше-ре диренге, дуьл эн Шими лап догъуногъ, буланмиш бисдо. У чорзани зере нуьшд э минжи хьэѣт, э ѣн мегъит эн хэр хуъше. Тегьер зенгъойму э ѣс хуне эри муьрде гирисуьгъоре хуно, Шими сер гирд эри зани, сине куфде, домо вокурде, гирисде.

Сес эн гирьей Шимире шиновусде, зен-зоре, мерд-мулей эн гъунши-мэхъэле дулпесо бире, гьерчуь дануьсдуьт эн Шими, худо мееро, е зен ю, небуге киниге эз кифлет ю муьрди. Унегуьре угъо гъмеееки

кор-бор ишуре шенде, кура бире оморут э хьэёт Шими эри дуйсухуни сохде. Шими угьоре диренге, э угьо денишире, зани, сине куфде-куфде, диеш сэхдте домо вокурде, гирисде, мугу:

— Шуьвер муьрде гIэруьсу, бирор муьрде хэьгерлову! Гуш венит, гьэдой гуш веноре гуштгьошму, рухунде гIэрсгьошму биёво э синей Шими. Кире ижире муй суьрхи, гьутиней суьрхи, э руз-метлеб нерасире, хьэсрот э дуьл дери муьрде, руруй дедее догъ сохде марал муьрдиге, эри энү ме гьурбунум э-э-э-й-й-й!..

Гьуншигьо-мэхьэлеигьо диренге, ки эн Шими, худоре шуькьур, екиш немурди, у эри хэр хуьшде вокурди и доморе, и заре, угьо сер гирдуьт э зир лов хэндуьсде, эз дуьл руьхшенд сохде э Шими. Е мерд гьунши, Шими эри хэр негирисуь, хуьшдере э пушой хэлгъ сук, руьхшенди несоху гуфдире, куьнд оморе эз Шими, сер гирдуре эри серкуш, дэгIно зере.

— Эй Шими, — мугу гьунши эзу, — туь, дуьргердо, гIэнл, надан бирей. Эри муьрде хэриш беге одоми гьечи зар доноре гирисдени, уш мерд хэйлогъи? Эн ме, э жигей хуьшде динж гердо, и пушогьо фэгьире зенхуьсуьрме муьрдебу, оммо ме эз чумме е дугъ гIэрсинш нерухундуьм. Э мерд гирисде лонгъ нисди. Мерд ние гирисде, э дуьл хуьшде кешире. Оммо туь эри е хэр муьрдеи зар донорей э гьемей мэхьэле эдее гирисде. Гьечи кор гIэмел ниёв, бирорме, бебейме!..

И гофгьой эн гьунши гуйге э сер ярагьой Шими муьнуьк декуьрдере хуно бисдо эри ю. Шими гьемин зенхуьсуьр хуьшдере э чум дире нисе хосденбу, чуьнки у Шимири е суке, делхэке, е тэхдей юре гIов берде одоми хьисоб сохденбу, духдер хуьшдере гьемише вомухде, э у хьэлово сохденбу. Унегуьре у гьейсэгIэт и гофгьой гьуншире шиновусди, Шими э жигей хомуш бире, диеш дуьл ю догьуногъ бире, диеш сэхдте зар доно гирисд.

— Меш пара, дердежер бире гирисденуьмгьо гье эзу корие дие, жон гьунши, — э килэхьэвоз гIэрсгьой чум хуьшдере покурде-покурде, мугу Шими. — Эн туьчуьни бэхдевер-мозоллуь зенхуьсуьр муьрде, эн чуьмени гьэребэхд-бедмозол хэр ю офдоре муьрде...

## ШИМИ НЕ ГIЭРУЬС Ю

Шими Дербенди э шори-никиревоз гьеме духдергьой хуьшдере гIэруьс, кукгьой хуьшдере домор сохде, э метлеб расунде, эз хуьшде жейле сохдебу. Э вэхд келе мерди хуьшде у гьишдебу э ки хуьшде чуьклен кук хуьшдере, и пушогьо домор биребугьоре, не жовоне зен энуре. Оммо Шими не зен ю эз гIэруьс лап омбар бирази бируьт, чуьнки гIэруьс десе э дес зере, э хуне, э хьэёт е корлеш нисе сохденбу. Гьеме коргьой хуне-боже э сер келе зен — эн зен Шими

вебу. Уьсделуьге гІэруьс э сер энугьо наз-сикеш сохденбу.

Е руз себэхьмунде Шими э хьээт ведироморенге эри э говду дерафде э овхур хэр эри жуьгь, суьмер декирде, мивинуь зен ю эзи есиргьо-эзугьгьоре хуно, десе э чуне веноре, нуьшди э сер би-рэхьне сенгь. Шими уре гьечи диренге, куьнд омо эз зен хуьшде, мугу:

— Ой зен, гемигьойтуь э сер дерьёгь батмиш бири бегем, туь гьечи себэхь-себэхь могьбул-юхсуьле хуно нуьшдей?

— Ой мерд, — мугу зен Шими, эз кон дуьл хуьшде е лугьонде ох вокошире, — чуьтам ме могьбул-юхсул небошум? Меш и бэх-девергьоре хуно э хуне гІэруьс овордем, эримеш э пире рузме е ку-меки, динжи бу. Оммо туь эдее дире, гІэруьс иму эслогь дес хуьш-дере э кор нисе зере: не гьоб-гьужоб, не партал шушде, не чи сох-де, не хьээт-божоре вечире. Эз хурде, хисирере бэгьэй гьичиш ни-се дануьсде. Гьеме коргьо э серме вери. Ини хэйли вэхд хьээт ве-чире неомори, хьэете туз, хокору вечири, оммо э туш гІэруьсиш недери. Э мэхьтелн худо домундем эз дес эни гІэруьс...

Шими и гофгьой эн зен хуьшдере шиновусде, юш могьбуле хуно бире, э хуьшде демунд. Уре э зен хуьшде езугь омо. Песде э дуьл эну е хубе гоф, фикир оморере хуно, лове э хэнде веберде, шори-шори мугу эз зен хуьшде:

— Эй зен, э жун бебейтуь, гьич фикир мекеш! Ме е хубе фенд-гІэмел офдем гІэруьс имуре эри э номус дешенде кор хуне-божере соху гуфдире, э туь езугьбери соху.

— Чуьтам? Чувь фенд, чувь гІэмел? — э мэхьтелиревоз пуьрси зен эз Шими.

— Туь хуб туш вени, ме гьейсэгІэт мугуюм э туь, — сер миги-руь Шими эри гьондурмиш сехде э зен хуьшде. — Гьетте гІэруьс иму эз хов хэбер бире вэхишде, э хьээт ведироморе, туь гье усэ-гІэт веги э дестуь жаруре, сер ги э вогьнеки хоригьой хьэете эри жару зере, «огь-угь» зере-зере. Ме гье у туьтем видовусде миём э китуь, мигируьм эз дуьм жару, мугуюм эз туь э вогьнеки: «Ой зен, туь жун бебе-дедейтуь, ди жаруре э ме, ме мизенуьм жару э жигейтуь. Туь келе зени, хэсде-мендее одомини, офдоре дегешдиге, чувь хуби песде эри эни хуне, гьемейму эз дес мирайм, ди жаруре э ме!...» Оммо туь небу жаруре эз дестуь ведешени, э ме ди: Туь жаруре диеш сэхд э дестуь гирде, гу эз ме: «Эй мерд, туь — мер-ди, э сертуь килхь вери, руш сипи сохдей, эрме гІэйб-номуси туь-ре гьишде жару зере. Эз гьуншигьо-мэхьэлегьош гІэйби, шермен-деини. Гьерки ежире гоф мугуют э песойму, беле филон...» ГІэруьс и хуьжет, гофе-гоф имуре гьечи дире, шиновусденге, уре увэхди гІэйб миёв эз хуьшде, чорей ю нибу, мегируь эз иму жаруре, сер мигируь э жигейтуь хьэете эри жару зере, песде, худоре шуькуьр, де корьойгереш мисоху.

Зен Шимире омбар хьэз миёв эзи гофгьой эн гІэмелдана шуь-

вер хуыште. Уре гуйге эз шори паргъо веромо. Угъо зен-шуьвер поисдуть эри гъэреул сохде, кей гІэруьс э хъэйт медировге.

Омбар негирошд, гІэруьс Шими, эз хов хэбер бире, ведиромо э хъэйт. Зен эн Шими, гье усэглэт жаруре э дес вегирде, угы-ноле зере-зере, сер гирд э вогънеки хори хъэйте эри жару зере. Шими гье усэглэт видовусд омо э ки зен хуыште, гирд эз дуьм жару, келе-келе мугу:

— Эй зен, туь жун бебе-дедейтуь, ди жаруре э ме, ме э жигейтуь хъэйте жару зенуьм. Туь келе зени, хэсде-мендеи, э туь хьол невери. Гьемей эни коргьой хуне э сертуь вери. Офдоре демундиге э хъэлов чуь хуби эриму, гьемейму эз дес мирайм. Ди жаруре!..

Зен Шими, чуьтам юре Шими гуфдире, хуте сохдебуте, э дес хуыште диеш жаруре сэхд жарунде, мугу:

— Нэгл, нэгл, мерд, худо мегуё! Туь чуьш гуфдиреге, ме жаруре э туь нидуьм. Туь мерд хэйлогъини, э сертуь килэхь вери, муй руштуь сипини. Эз гъуншигъо-мэхъэлегьош гІэйби, номуси, сенгъ мидуьт нэхогьоймуре сенгъэсор мисохут. Деске, рэхьо ди жаруре!..

Шими диеш «туьндлемиш» бире, жаруре э лой хуыште кешире, э хъэроевоз мугу:

— Эй зен, нэхьс мебош! Кире чуь воисдеге гуюгу эри хуыште. Туь ебо жаруре ди э ме!..

Эхирки, Шими э дуь десевоз жаруре эз ело гирде, зен ю эз елойге, тьерки э лой хуыште эдембу кешире, э екиревоз хуьжет сохде-сохде. ГІэруьс дуь дес жуьшдере э дуь бел веноре, э хэндеруьхшендиревоз эдембу томоше сохде угьоре. Песде туйге визор оморе эз дураз кеширенбугъо хьуьжет мердхуьсуьр не зенхуьсуьр ю, куьнд омо эзутъо, э е зарбевоз ведешенд жаруре эз дес энугъо. Шими не зен ю гье усэглэт шор бисдорут, лове э хэнде веберде, денишируьт дуь эёки, егІни, гуфдире гоф ишу э кумеки худоревоз э сер-бегъем омо. Оммо гІэруьс жаруре э дес гирде, гогь э Шими эдембу денишире, гогь э зен эну, чуьнге э дуьл хуыште фикир-мэхъшово сохугьоре хуно. Песде у бирден чаруьсде э лой Шими, жаруре э дес эну доноре, уре буйругъ-несиглэт дорере хуно, мугу эзу:

— Эй пахан, баракаллогъ туьре, туь лап дуз гуфдире: кире чуь воисдеге пуюгу поюгу эри хуыште. Ги жаруре, жару зе э жигей пире зентуь хъэйтгъо-жигегьоре!..

## ЕНГЕГЪОЙ ЭН ШИМИ

Шими жовоне кук гьисдики бебе-дедей эну эри Шими е духдер хосдебу эз дигь Мюшгуьр эз хуней эн е куьгъне шинох хуыште. Те шев гІэруьси домор не гІэруьс энжэгъ е гилеле диребируьт дуь екире. Шев гІэруьси, чуьтам гІэдот тьисдиге, домор не гІэруьсе де-



шенденге э жейлее утогъ эри гелин-гиёв бире, э лэглэй эн дер утогъ поисдуът дуь енге, денишире: кей домор медировуну чодур эн глэрууьсе, комиреки угъо мибирмунут э одомигъой домор, песде э ю чодуревоз миравт э ки бебе-дедей духдер, эзугъо эри бэхш вегирде.

Е ним сэглэтиш негирошд эз домор э ки глэруьс дерафдеи, енгегъо куфдуът дер утогъэ, огол зере ведировнудуът доморе.

— Эжи, чуь хэбери?! — пуьрсируът угъо э е лэглэ эз домор, гьетте ю э домой дер веди бире.

— Гьеле гьичиш... — глэйбе-глэйб жугъоб до домор, сере дуллу гирде.

— Гьечу буге, кеш э имуревоз, — мугу еки эз енгегъо.

Угъо Шимири эз дуь гъул ю гирде, э дуь бирордоморгъой энуревоз бердуът э дерьегъ. Вэхд эн поиз бу, гловиш э дерьегъ хиник бу. Оммо енгегъой эн Шими, неденишире э и кор, гьишдуът уре парталгъой хуьшдере векенде, дерафде э хинике глов, еглни, у «э хуьшде дилов». Шимири тен шушде бэгъдо овурдуът э хуне, дорут уре э дуь пейле шороб, не е-дуь жизле герме кобоб, гене декуьрдуът э ки глэруьс.

Гирошд гене е нимсэглэт, енгегъо диренге, ки Шими нисе ведироморе, гене куфдуът дере, огол зере ведировундуът уре. Диренге, ки и десиш э дес домор чодур эн глэруьс недери, угъо э бирази веогъурлуьиревоз пуьрсируът гене:

— Чуь хэбери?!

Енгегъо сер гирдуът эри глэйб доре, э номус дешенде, серкуш зере, нифри сохде доморе. Еки энугъо хуьршлениш бире е дуьсилле вено э Шими, дануьсде ки эри ижире кор доморе ихдиёр нисди эзу гъэгъри бире.

— Туь мерди, небуге эхтеи, гъурумсогъ! — мугу у э гъэгъревоз э домор э силле венореки \*. Гьеме дениширет, кей туь чодур глэруьсе медировуниге!

Енгегъо гене дуьимуьн гилеш кешируът бердуът Шимири э гьирогъ дерьегъ, э гужевозя гьишдуът уре дерафде э глов. Шими лерзире-лерзире э енгегъоревоз э хуне вогошденге, енгегъо уре терсунде, гьелебуле доре, декуьрдуът э ки глэруьс.

Омбар некеши и дес дуьимуьн гиле эз Шими э ки глэруьс дерафдеи, Шими ю хуьшдению дере вокурде, ведиромо э ки енгегъо. Угъо шор бисдоруът, гьерчуь дануьсдуът эришу, Шими и дес э чодуревоз ведиромори. Те ебо угъо эз Шими пуьрсире: эжеи чодур эн глэруьс, Шими гьелеш эз хиники эн глов дерьегъ лерзире-лерзире, донду куфде-куфде, гирисдере хуно, мугу:

— Воисдениге, берит мере гене э дерьегъ! Оммо дануьсде бошит, ме дне эзунжо нивогошдум... Э ижире, пишки-пишкииревоз гелин-гиёэн биренижон, э гьергъи ковре дерьегъ батмиш бире, домунде хубтеи...

## ИНСОН НЕ МЕЙМУ

Ебо шев зимисду Шими Дербенди, гъэйле э лэгIэ дери, нуьш-дебу э ён герме кинле, э тегьнимиревоэ эдембу гъэйле кешире. Э куьнж эн хуне дуьвздегь сале невелей энэ, книгъо, дефдергьоре э пушой хуьшде лов сохде, эдембу нубогъой хуьшдере хьозур сохде.

— Э келебебе, келебебе! — мугу гIэил ээ Шими. — Расди ми, инсон ээ мейму бири гуфдири?

Шимире лап омбар гъэгьр омо эзижире пуьрсуьш эн невей хуьшде. У гъэйлере ээ лэгIэ ведешенде, шефд дениши э невей хуьшде.

— Вогь! И чуй гофи ме ээ ту шиновусденуьм, гьурумсогь?!.. Э гуфдирейтуьревоэ, гьечи ведн бирени, ки келебебегъой эн келебебегъойму, э жигешу днж гердо, дуьмверие меймугъо бирет дие? Небуге гъэбуьргъэгъойтуьре чубугъ воисде?!..

— Тэхсирме чуьни, — гъэгьри бире ээи гьелебуле, серкуши Шими, гирисдере хуно мугу кукле. — Ме ээ хуьшде ведешендем бегем и гофе! Эриму учитил гуфдири.

Шими и гофе шиновусденге ээ гIэил, дие сес несохд. У эри хуьшде фикир сохд: «Учитил хундегоре одоми гьисдигеш, хэре, гьелете гоф гуфдири, э хьисобовоз и вэжди у серхуш бири. Пиёне одоми жингире, э эгъуьл хуьшде недерие одомире хунон. У гьер-чуй гири ээ лэгIэ пертово дорени». Оммо ээ невей хуьшде мугу:

— Гьечу буге, ме хуьшдениме себэхь миём э туьревоэ э ишкуле гоф мисохум э учитилтуьревоэ: эйчуй гуфдиреге у э ишму ижире хэре гофгьоре.

Гьемин у шев Шими э зен, кукгъо, гIэруьсгъо ве невегъой хуьш-деревоэ э пушой телевизор нуьшденге эри томоше сохде, е жогьиле зен — эстрадни артистка эдембу э сегьне хунде, вежегьисде. Сер-сине, ненегъо-синегъой энэ гьеме веди бу, гьуьлгъой ю те бине, песо-й кемер ю те кефел ю селт бирэхьне бу. Булши энэ кутэхь, те биднаю 'бу. Муйгъой сер эн артистка нимелит чире бу, телуьгъой жежуьре хуно нушу доренбируьт. МэгIни хунде, вежегьисдеи энуш лап бидэгIэти бу. Синегъо, 'будгъо-базугъой хуьшдере шувунде, вешенде фушенденбу. Сес энэ гогь э мэгI эн хуьршлуье жингов ух-шеш зеренбу, гогь э 'буьруьж жингире одоми, гогь э сес — мав зерей эн назуй вишей.

Шимире эслогь хьээ неомо эзижире чигьрет, гIорсуьзе, бидэ-гIэти хунде вежегьисдеи эни артистка. «И лап меймуни, ээ мей-муш вететей!..», мугу э дуьл хуьшде Шими.

Себэхьмунде невей эн Шими пушой э ишкуле рафде, пурси эзу:

— Эй келебебе, туь эз расдиш оморени э меревоз э ишкуле эри гоф сохде э учитилмеревоз?

Шими е кем э хуьше домунд. Э ёр энү гьейсэг!эт омо шову у э телевизор дирбугьо артисткаре, уингьо, томошегьой энуре, мугу:

— НэгI, балайме. Эриме оморенигьо учитилтуь дузи. Ме имогьой э сер офдорум эз товун чуй жире одомигьо гуфдиребуге у, ки инсон эз мейму хьэсуьл омори гуфдире...

## ДУСДИ НИМЕОЙ Ю ЭЗ ГЮВ, НИМЕОЙ Ю ЭЗ СУЬРКЕ...

Шими Дербендире е гьунши бу. У сер ебо Шимира дире, э шори, эдеблуьиревоз дуре руз э хэйрбу доре, дес энуре гирде, мугуфди:  
— Эй Шими, ме не туьни и ченд салгьо э еки гьуншигьоим, дусдгьоим. Э метелегьо гуфдирени: «Эз дуре бирор-хэгьер куьнде гьунши хуби»...

Е гиле гов эн гьунши эз гов Шими пушоте зендебу. Шими мугу эз гьунши хуьше:

— Туь мунош, гьунши, е бедире шир дефуьрс эриме, эри гIэилгьо, ме туьре э жигей шир е бедире хубе шороб мидуьм ме э десди десмеревоз хьозур сохдемгьо.

Э дуймун руз эри Шими эз расдиш эз гьунши е бедире шир омо. Оммо шире э хурдеки, Шими миденишуь мивинуь дэгIэм эн шир недери, нимей энү гIови. Шими гьич е гоф несохде, вегирд бедирей гьуншире, те ниме э у шороб декуьрд, эз ниме звер — туьнде суьрке. Шими до бедирере э дес гIэил хуьше беруь дуй гуфдире гьуншире.

Себэхьимуьн гьунши э куче диренге Шимира, эз шуьгьэм хуьше гирде, сер гирд эри шуькеет сохде, серкуш зере Шимира:

— Эй, Шими, туь гуфдиребири э жигей ме эритуь фирсуьмгьо бедирей эн шир, туь мере е бедире хубе шороб миди? Туь э жигей шороб эриме суьрке декуьрдей фирсоре, гьемейму эз шуьгьэм эдее пар-пар сохденим, ээхьмет кеширеним. Гьечиш дусди, гьуншиети бирени?..

Шими э синемширевоз денишире э сифет гьунши хуьше, мугу:

— Те дусдиму э тофовоз нэгI, эз расди, эз дуьли небу, «дусдиму» гьемеше гьечи мибу: нимей ю э гIововоз, немей ю э суьрке-ревоз...

## ЧУЪТАМ ШИМИ Э ЗЕН ХУЪШДЕРЕВОЗ КОРГЪОЙ ЕКИРЕ ДЕГИШ СОХДЕБИРУЪТГЕ

Е руз гъовой эн шохъонгум, Шими Дербенди бил э душ вери, эдембу эз кор, эз онгурбогъгъой колхоз э хуне вогошде. У э шегьер диromоренки, омо э у расд бисдо куьгъне хьовир эню, э коми-ревоз у э жогъиле вэгъдогъой хуьшде дусди гердунденбу. Шими лап шор бисдо уре диренге, жогъиле вэгъдогъой ю омо э ёр ю. Шими сер гирд уре э хуне э гъуногълугън эри огол зере.

— Туь мунош, — мугу Шими эз дусд хуьшде, — ме э зенме гуфдирем эри имишеви е хубе гъингъэр керги соху. Биё бурайм э хунейму, нуьшим, э тегънимиревоз, гъингъэр хурим э сир-суьркеревоз не шеребовоз, жогъиле вэхдгъоймуре э ёр биёрим.

Шими гъечи минет сохд э дусд хуьшде, у дие хотур Шимире эри негъишде, рази бисдо.

Шими гъетте эз дер хуне диromоре, шори-шори мугу эз зен хуьшде:

— Эй зен, шоре хэбер дераво э гуштуь: гъезизе гъуногъ, куьгъне дусдме омори э хунейму. Эриму гейсэгъэт зубош суьфре деше, гъингъэр э сир-суьркеревоз ни э пушойму, эз челег е гирфинке шоробиш деки биёр эриму.

Оммо гъовой Шими гъе у сэгъэт хэреб бисдо, у эз зен хуьшде шиновусдки, у гъингъэр несохди, эз кор хуне-жигере сохде, вечире уре можол небири. Эри Шими келе уьзуьгъэреире хуно омо э пушой эн дусд хуьшде. У гъетте дусд хуьшдере эз лэгъэй гъопу рэхъ сохде, эзу бэхшлемиши хосде, зурн-зурн, гъоси-диври диromо э хуне, сер гирд э сер зен хуьшде эри хъэрой вегирде, вешмерде, серкуш зере уре:

— Эй зен, бебейтуь су гиро, дедейтуьре глов-сайлов бери! Туь мере э пушой гъуногъ биёбур сохди! Согъ руз э хуне нуьшдей, эдее рэхъэти вегирде, туьре эри е гъингъэр сохдеш тембели гирдебу?!.. Ме эдее эз себэхъ те шохъонгум зэхъмет кеширенуьм, эрэгъ тигъи сохдннуьм, оммо туь э хьозури нуьшдей, е гъингъэр э гъингъериш не сохдей эре хурдейме. Дердмеш нисди, эз гъуногъ гъэйб-шермендеини! Гъечиш кор бирени?!..

— Меш десе э сер зани веноре, нуьшде непоисдем, — муту зен эз Шими. — Эн меш эз себэхъ те шохъонгум дуь десме э кори, меш эз коргъо-боргъой хунере, хъэте сохде хэсде-мендеуьм.

Шими ловгъоре э шефде хэнде веберде, э руьхшендиревоз мугу:

— Лап бовор сохдум рафд э гофтуь, туь мунош гъе эзу расди! Гъемей эню коргъой хунере, зенунере эри е хъэз фит зере-зере сохде мибу. Четинишму, эн зенгъой хуне — е гъэйл зендеи. Иш, кидан, гъечи четин-зэхъмет нисди ишму-зенгъо гуфдиренитгъоре хуно. Негъогъ нисе гуфдиреки э метелегъо: «Хьиллейгъо, гъэмелданигъой зене гъэребеш берде нидануь...»

Эри зен Шими лап гурунд, хуърди омо ижире гофгьо, серкуши-  
гьоре шиновусдки эз шуьвер хуьшде.

— Гьелбет, ту нмуре, зенгьоре хуно, миёсди зенде, песде мида-  
нуьсди, нму, зенгьо, э зендеки дерд-зэхьмет хурденимге, небуге э  
вогьнеки ноле, божэхь зеренимге, — ох вокошире, мугу зен Ши-  
ми. — э десме недери н кор, туьре ебо семе бигьилуьм зенде э жи-  
тейме, дани «дэгГэм» зендеире. Оммо э жигейтуь кор чули, кор  
мердире эз туь зобуте сохде нидануьм. Гьери туь миданиге сох кор  
хуней, кор эн зенире э жигейме, увэхди виним туь чуь муфугьу-  
ниге.

— Бошгу, ме разинуьм! — шори сохдере хуно мугу Шими. —  
Гье эз себэхьевоз веги бил-лапаткаре бура э жигейме э кор, ме  
поюм э хуне кор хунере эри сохде. Песде мивини туь хуьшденитуь  
чуь мифугьуниге.

Себэхьимуьн зу-сери зен хэбер сохд Шимире эз ширине хов ю.

— Эй, вэхиз! — мугу зен эз Шими, — ме эдее э кор рафденуьм  
э жигейтуь, чуьтам нму игьрол сохдеймге. Ебо эн суьфде гове дуьш  
э нэхир ведеки. Э гГэил хуб дениш, мугьоег бош, негирисуь. Э вэх-  
дию гГэиле чи ди, э гугфере дегердун, хисун. Хуинегьо-жигегьоре  
вечи, хуб жару зе. Гьобойгьой гГэиле шу веше э сер расе э хьэёт.  
Масде деки э нигьре те ме оmore нигьре зе. Куьшде, темиз сохде  
жерг э ён кинлеи, э гьэзе дери. Те ме оmore эри шохьонгуми гьин-  
гьэр керги хьозур сох...

Зен Шими гугьдире гьемей эни тапшуьрмишигьоре э шуьвер  
хуьшде, э чейтен эри хуьшде нун, гьофун доноре, э душ хуьшде  
вешенде, биле вегирде, диromo э говду, хэре ведировунд. У э кул  
хэр венуьшде, эдембу эз гьопу ведироморе, э ёр энучуьниге оmore,  
поисд, чаруьсд э лой хуне, келе-келе, Шими шинову гугьдире,  
хьэрой сохд:

— Эй мерд! Эз ёрме фурмуш бири э туь эри гугьдире: э север  
э сер хоегьо керг гьуьрти нуьшди. Небу бигьили уре эз сер хоегьо  
вэхшиде. У гьетте гьуьт-гьуьт сохде, дир несохде бер э пушой энучуь  
дон не жом глов ни. Эгенер у эз сер хоегьо вэхуьшдге, туь дануьс-  
дени, хоегьо хиник мибу, вечегьо ниведировт..

Зен гьетте эз хьэёт ведерафде, Шими эз хэлов вэхуьшд, зур-  
зури сер-тен хуьшдере вокурд, говдуше вегирде, диromo э говду  
гове эри дуьшире. Оммо гьетте у сер гирде гове эри дуьшире, гГэил  
э гугфере сер гирд эри гирисде. Шими терси: те гГэиле ебо хоши  
гирде, хисунде, песде гове дуьшире, дир мибу, нэхирчи нэхире ми-  
беруь, гов эз нэхир мимуну. Унегуьре Шими, гове недуьшире, е  
лепуьк зе эз гьэбуьргьэй эн гов, ведекуьрд уре эз хьэёт.

ГГэиле жумунде, хисунде бэггьдо, Шими сер гирд де коргьейгей  
хунере эри сохде. Эн суьфде у ебо сер гирд хьозур-безури гьин-  
гьэре эри дире: овурд тешд тэхдеире, гГорд зе э гГардовужевоз,  
хэми сохд эри гьингьэр, партгьой куьшде керге темиз сохд, жуьх до

уре э сер гІэтош, но э ён эн тешд. Песде Шими тие нигьерере овурде, но э минжи хуне э ён гуферей гІэил Э гээд нигьре чор-пенж говдуш масд декуърде, унгъэдейге гІовиш, лэгъэй чубугъи доноре э гээд ю, нуьшд э хори хуне, сер гирд э дуй десевоз нигьерере эри шувунде. Э нигьре зереки, гене гІэил э гуфере хэбер бисдо. Увэхди Шими, эз ело нигьре биёв гуфдире, эз елойге гІэил э гуфере жумунде биёв гуфдире, нигьерере бесд э кемер хуьшде, гуферере эз душ ю доно э герден хуьшде, э синей хуьшде веноре уре, сер гирд хунегьо жигегьоре эри вечире, жару зере, э гьечиревоз гьеме коргьой хунере э вэхдию соху верасуь гуфдире те зен ю эз кор оmore. Оммо гье и вэхд у хунегьоре э жару зереки, керг гьуьрти э сарай сер гирд эри гьуьрт-гьуьрт сохде. Шими гье усэгІэт жаруре шенде, рафд э сарай э пушой керг гьуьрти гІов не дон но.

Шими эз сарай эз ён керг гьуьрти ведироморенге, мивини сег эн хьэёт, эри гьингъэр шевине темиз сохде, жуьх доре керге э лэгІэ сэхд гирде, э иловле чумечару сохде-сохде эдее эз хуне ведироморе. Чумгьой Шими и коре диренге ченд е пейле бисдо. Шими эз хуьрш-гьэгьр дуьл хуьшде фурмуш сохд э и туйтем э кемер у пура нигьре, э герден ю гуфере э хисире гІэилевоз вери гуфдире. У э е хуьрш, хьэроеоз шенд хуьшдере э сер сег эри ведешенде эз лэгІэй эну керге. Оммо эз сер-суи бирден пой Шими чемуьсде, у э е зарбевоз офдо шугьомо э сер сиро, э ён эн дер. Совуй эн нигьре э хори расире, тупе хуно лов бисдо, хуьрд, лугъэ-лугъэ бисдо, гуферей эн гІэил офдо, кунбологьово чаруьсд. ГІэил хэбер бире, эз тере, зэхьлевезэгъи сер гирд эри келе-келе гирисде, божэхь дешенде. У дие нэхиси. Шими дениши виники гІэил эз гирисде нисе поисде, хомуш нисе бире, оммо уре э хуне филонгъэдер кор мунди, у э гирисдейгьо-божэхьгьой гІэил неденишире, туферере деберд но э хуне. Песде у ведиромо э хьэёт эри эз э хьэёт гешденбугьо кергьо е керг гирде, куьшде уре, темиз сохде эри гьингъэр. Оммо гьетте Шими шилолире хуно э сер кертгьо шив кенде рафде, кертгьо терсире, шогъгьо зере-зере, пар куфде-куфде вирихдуьт гьерки э ёло. Шими дениши виники, керг гирде эз дес ю ниворов, гьэгьри-гІоси бире, диромо гене э сарай. У вегирд э сер герме хоегьо хисиреbugьо керг гьуьртире, сер юре бурри эри э жигей сег бердигьо керге эри темиз сохде эй гьингъэр. Бирден э ёр эну омоки, ки керг гьуьртисуьз хоегьо хиник, пуч мибу, эзугьо песде вече ниведиров, не ю те зен ю эз кор вогошде гьечиш-гьечуш коргьой хунере сохде-верасде нидануь, у шовол хуьшдере векенде-фушенде, э бирэхьне песой хуьшдеревоэ э гьил-гьили нуьшд э сер эн север, э сер хоегьо.

Шохьонгум пушой чуьшме дерафде зен Шими вогошд эз кор, дуьлшор, ловхэнде. Оммо у э хьэёт диромоки, гфе усэгІэт перт-мэхьтел бисдо. Гов эз нэхир оmoreбу, оммо уре дуьширогор небу. Гуселе эдембу хурде шир энуре. Э ён домой дер хуне, э сер сиро лугьугьой эн хуьрд бире совуй нигьре лов-тум бируьт. Хори эн сиро

э дугъ не тозе кереревоз билесумол бу. Э гъэд хуне иловлей тешд хэмире ведебурра, э шоре межлуьс кура бирере хуно, керггьо э хурусевоз эдембируьт хэмире хурде. Э гуфере глэил эз гирисде эдембу пара бире, сес юш гирдебу. Оммо хуьшдени Шими э ё жигеш веде небу.

Зен офд Шимире э сарай. У шовеле те нимелит векеңде, нуьш-дебу э сер север, э сер хоегьо э жигей керг гъуьрти, гъэйлеш э лэ-глэй ю дери, эдембу миже куфде эз вомундеи хуьшде.

— Эй мерд, и чуь муьглуьжуьзи ме диренуьм, и чуь дербеде-гъуни э и хуне дери?! — хъэрой сохде, э гъэгрывоз пуьрси зен? — Туь э сер хоегьо э жигей эн керг гъуьрти эйчуь нуьшдей?!..

Шими чумгьоре э гужевоз вокурде, эз сер хоегьо невэхуьшде, ховолуь денишире э зен хуьшде, э хоши-менэхъэфиревоз мугу:

— Эй зен, туь жун бебейтуь, гъэгри-гюси мебош, ме гъейсэ-глэт гьемере э туь гъондурмиш мисохум. Ме эри гъингъэр хъозур сохдебируьмгьо керге сег берди. Унегуьре ме э хэъл недерие одо-мире хуно, керг гъуьртире нэхэбереки куьшдуьм эри гъингъэр сох-де. Песде э ёрме омоки: керг гъуьртисуьз хоегьо пуч мибу, ме гье-ме коргьоре гъишде, нуьшдуьм э сер эн хоегьо, угьо хиник, пуч-хэрэб небошут гуфдире.

— Текей нуьшденинин туь имогъой э сер эни хоегьо? — э гъэгр-ве руьхшендиревоз пуьрси зен эз Шими.

— Чоре чуьни, сабуьр сохде, минишуьм те вечегьо эз хоегьо ве-дироморе, е дуь-се орине, — жугьоб до Шими. — Оммо туьш хъэ-рекет сох те вечегьо эз хое ведироморе, кор хуне-жигереш сох, э жигеймеш бура э колхоз эри кор сохде.

## ЧУЪТАМ ШИМИ ЭРИ ПАДШОГЪ ЧОУШ БИРЕБУГЕ

Э у жогъиле вэглдогъой Шими, е сал мунде те падшогъ Николай эз тэхд офдоре, е гиле э гуш Шими хэбер дерафд, ки полиц-мейстер эн Дербенд эдее одоми тешде эз глэрей хэлгъ иму эри э Фэхъле базари\* чсуш поюнде. Шими и хэбере шиновусденки, ом-бар шо р бисдо: белки, худо е ники сохд, полицмейстер уре э кор-вегирд. И шеш мегъ у корсуьз бу, кифлет энугисне-тешне бу. Шими дир несохде, видов-видов омо раси э ки полицмейстер.

Шими э ён полицмейстер оморенге, у э сэхде денуьшдее буй-ба-лай эн Шими, э тиге жуьрглэтлуье чумгъой энугисне-тешне бу, уре эз Шими хош омо.

---

\* Фэхъле базари бу э Дербенд э вэхд падшогъети, гьемчуьн э суьфдеи сал-гъой эн власть советиш. Инжо оморенебируьт батракгьо, косибгьо эри э фэхълеи поисде э боггьо ве э втэгъэгъой эн жэгли эн гюширгъой Дербент. Эз елойге фэхъле базари бу жиге, эжеки кура биренбируьт косиб-кусуб эн шегьер дуь эз еки эри тозе гоф, ихдилот шиновусде.

— Ме эдее диренуым, — мугу полицмейстер десе э кемер Шими зере, — туь гьемин мере герек гьисдигьо одомини. — Гье у сэгэт доре э Шими полицейски тухмохэ не фите, мугу: — Гуш вени, жовон, эз имбурузине рузевоз туь дери э гьурлугь эн буьзурге падшогь иму. И эритуь келе гьуьзети, э и гьуьзет ве ихьдибори лоигь ведироморе гереки. Ини э туь гьэдэгьйме: чум туьре тиж, гуш туьре тиггьэт вени, дениш э парадке, чуй сохдеге, чуй гуфдиреге унжо кура бирогоре одомигьо. Эгенер гьерки бисдо эз жуьрт-пуьртгьо, унжо оморенуьтгьо, э гофовоз енебуге э эйгьомовоз сер гирдге эри элчэгьэ, охмурие гофгьо гуфдире э песой эн падшогь иму, эн гьурлугьчигьой энун, енебуге гьолмогьол, хьэройхуьшуьл сохдге, уре э зир сине дешенде дуз миьри э киме мисасуни.

Полицмейстер имид шо Шимиуре уре хубе муьзд дорени эри кор ю, эгенер у бирмундге хьэрекети ве зиреки э кор хуьшде, — уре медалиш дорени.

Шими тухмох не фит э дес дери, омо э Фэхьле базари. Уре воисд гье имбуруз эри бирмунде э полицмейстер, у чуьтам сэхд, эз дуьли поисдиге э гьурлугь падшогьети, дуьл энуре эз хуьшде шор, рази эри сохде.

Шими э фэхьле базари оморенге, мидениши мивини э е жиге хэйли одоми кура бири. У гьеусэггэт гьуьз-гьуьлогь бире, э е дес тухмохэ, э е десиге фите шишире, зури-зури куьнд омо, шиши дешенд хуьшдере э пушой эн кура бирегоре одомигьо эри дануьсде эри чуй угьо инжо кура биретге, е усоле гоф гуфдиригор гьисдиге э песой хуькуьмет, эн падшогь ве гьурлугьчигьой энун. Шими миденишуь мивинуь гьемей эни одомигьо кура бирет э иловлей эн е пире мерд, сипре рушгьо. Шими гьетте дире, шинохд уре. У бу мэггьлუმьлуме ошугь, овосунечи. Келе мерд нуьшдебу э минжи мейду, э сер эн сенгь, гьэйле э лэггэ дери. Э иловлей энун кура бирегоргьо, гьерки эз ело эдембу гуфдире у эри энугьо е хубе овосуне енебуге овозе ихдилот соху гуфдире.

Келе мерд гьйлере эз лэггэ ведешенде, э иловлей ю кура бирогоре одомигьо э мигьровуни ве хуширевоз денишире, мугу:

— Эдее диренуым, дусдгьо, те ме эришму е овосуне нехунум, ишму эз ме дес никенит... Гьечу буге гуш веенит. Хэбер эз ки дуьм ишмуре эз е падшогь. Вилеет эни падшогь келе бугеш, хэзинею ю суьрх пур бугеш, пеггьливонгьой ю лап игид бугеш, падшогь ю хуьшдению эгьуьлсуьз бу эхре хуно, бед бу гьэлифоре хуно, терсенгогь бу хэрегуше хуно...

— Гьоп! Пой! Дие песой юре негуфдиригеш, иму туьре лап хуб верасирим, — ихдилот эн келе мерде бурра, мугу эзу тозе чоуш. — Имогьой дир некешире вэхиз э меревоз бурайм э ки нечельникме — эн полицмейстер!



Келе мерд и гофгьой Шимире шиновусдки, зугьун ю гуйге кут бисдо э лэгIэй ю домунд эз терс, эз мэхьтелн.

— Эйчуь, чуй сохдем ме беге, хэлефме, мере э ки полицмейстр эри берде? — эхир лэгIэ вокурде, мугу пире мерд. — Э хотур худо деске эз ме.

Шими э сер гоф хуьшде сэхд поисде, мугу:

— Гуфдируьм э туь: кеш ебо э меревоз э ки огьо полицмейстр, — дегенегире шувунде э келлей сер эн овосунечи, буйругь до Шими. — Унжо мидани, чуьниге тэхсиритуй.

Чорей келе мерд небисдо вэхишд эз жигей хуьшде. Шими пуре э пушой хуьшде дешенд эри берде э ки полицмейстр. Э Фэхьле базари бире одомигьо диренге ижире бедхьисоби эн чоуше, сер гирдуьт эри келе-келе нифригьо, нэгIлетигьо гуфдире э песой энү, рафде э песой келе мерд. Шими эри поюнде хьэрой-хуьшуьл энүгьоре, сер гирд эри фид зере, тухмохэ шувунде, гьелебуле, терс доре угьоре э гьэземет, Сибиревоз, эгенер угьо лэгIэшуре негирдуьтге, «бунт» ишуре непоюндуьтге э гьэршуй эн гьонунгьой эн власть.

Шими омо расики э ён идорей эн полицмейстр, эз хьэлежигери шуьле хуно бугьо келе мерде э пушой хуьшде эз кемер ю гьуьлдодоре-додоре, деберд э ки энү.

— Туь э и пире гоп-гоп дениш ебо, огьо полицмейстр! — э десевоз бирмунде э эз терс лерзиренбугьо пире мерд-овосунечи, мугу Шими. — У э фэхьле базари э пушой эн гьеме унжо бируьтгьо одомигьо, эн «жуьрт-пуьрт» е беде усоле гофгьо эдембу гуфдире э песой гIээзизе буьзурге падшогь иму, зугьунме-нисе чаруьсде угьоре инжо эри вогоруш сохде.

— Гьу, метерс! — мугу полицмейстер эз Шими, — э дуьл хуьшде фикир сохде, ки у гьэллет небисдо Шимире э чоуши вегирди гуфдире. — Гу у чуй гуфдириге э песой падшогь иму, э гофгьохьшегьой энү гуьре эри жозе доре и жиноеткоре.

Шими поисд е кем э хуьшде домундере хуно, песде мугу:

— Ишму, огьо полицместр, буйругь доре бэгьдо, буьрж мени эри белли бире э гоф ишму. И пире мерд мугу: падшогь иму эгьуьлсуьзи хэре хуно, беда гьэлифоре хуно, терсентогьин хэрегушлере хуно...

Шими виники начальник ю и гофгьоре шиновусдки сифет ю шефде хуно бисдо, ранг берд ранг овурд, те келе мерд лэгIэ вокурде, сер гирд полицмейстре эри дуьл доре, олхогьин сохде.

— Ишму, огьо полицмейстр, э хотур худо, гьэгр мекешит, дуьл ишмуире хэреб месохит. Падшогь иму хэр гьисдигеш, гьечу хэр мунугу буравгу э жигей хуьшде: шефде доре дуз сохде нибу, бонгьузе гьовре дуз мисоху. Оммо ишму, ме ве уьзге гьуьлбуйрунгьой эн падшогь иму, худоре шуйкуьр, хэр нисдим...

Эдете гуфдиренуьт, эри «дуьлолхогьине» гофгьой эн Шими дуьл

эн полицмейстре кем мундебу бердени. У гье усэгIэт буйругъ до э жигей медаль сад доне шомпул зенуыт эз бирэхъне кефел эн Шими, песде уре э десднн дуь жандармеревоз беруыт дешенуыт э гъэземет эн шегъер.

## ЛОВОЙ ЭН ШИМИ

Косибе вэгIдогъой Шими бу. Е гиле у омо э нумаз эз худо эри лово хосде е кем пул дуь гуфдире юре.

— Эй худо! — мугу Шими, чумгъоре э сергъови нумаз доно-ре. — Эз себэхъэвоз э лэгIэйме е мисгъол чиш недерафди, эз гис-неи шуьгъэмме э кемерме вогосири. Ди мере е-дуь аббаси пул, бу-рам эриме е нун, е тике пени не е пейле ширине чой восдонум хурум.

Э ён Шими е гIошир поисдебу, шуьгъэм ю омбар келе. У ловой Шимире шиновусде, шефд, хуни-хуни дениши э Шими.

— Эде! Туь гье э и бинебузме оморе поисде ижире лово эричуь хосде эз худо?! Меш оморем эз худо эри лово хосде, эриме пул фирсуь гуфдире. Оммо мере пул омбар гереки: тозе богъгъо эри дешенде, коньяк сохденигъо завод эри вокурде, чоримуьн зен эри хосде. Худо шиновусдге ижире ловойтуьре, сэгъэти сохде, мере э туь гуьре унъэде пул нидуь.

— Туь мунош, — мугу Шими хоши-хоши эз гIошир, — ме эн-жэгъ эз хотуртуь эз худо омбаре пул нехосдем.

— Чуьтам эз хотурме? — мэхътел бире, пуьрсн гIошир.

— Ме денишируьм э шуьгъэмтуьш э шуьгъэммеш, — мугу Шими, — винируьмки, туьре, худо мебуро, ченд е гуьмбез эн килисе шуьгъэм вери. Уне гуьре ме эриме фикир сохдум: туьчуьни шуьгъэ-ме эри пур сохде, омбаре пул гереки. Эгенер худо ловойтуьре бе-гъем сохдге, божэхът уре дие пул мимуну мере эри доре эри е нун, е тике пени не е пейле ширине чой восдоре Iбэгъэй.

## КОСИБ КЕИ КЕРГ ВОСДОРЕ...

Э у лап косибе, михътожие вэгIдогъой эн Шими Дербенди, е руз у керг э дес дери эдембу шори-шори вогошде эз базар э хуне. Хэйли вэгIдо не у, не кифлет энду чи гIушдине нэхурдебируыт, дэгIэм эн керге гириге фурмуш сохдебируыт. Унегуьре шори эн Шими-мире гIэдэр небу у э хуне эдее керг берде гуфдире.

Шими гъечи керг э дес дери э хуне вогошдеки, е шинох энду, Шимире хуно косиб-гIони Iбугъо мерд, уре э кергевоз виниренге, поюнде э минжи эн куче, пуьрси:

— Эй Шими, чум мерасо, э хьисобовоз э дестуь пул диромори, небуге туь керг нивосдори?

— НэгI, — мугу Шими, ловехэнде, — э десме пул недиромори. И керг нечогъэ керги. Сэхьиб эни керг виники: и керг гьечиш-гьечуш эдее муьрде, у э ме и керге лап ужуз, э гьовои до рафд.

Е ченд мегь giroшде бэгъдо гье у шинохэ, косибе мерд вини гене Шимире эз базар э кергевоз э вогошдеки. Оммо Шими и дес лап сергъуз бу, эдембу суьгъруьсде-суьгъруьсде, ох-ноле зере-зере, десдечу э дес дери рэхь рафде.

— Эй Шими, туь гене э шори-никиревоз керг восдорей, — мугу шинох э бэхили сохдеи, руьхшенди ве серкуш зереире хуно. — Ведини эз гушд керг э лэгIэйтуь лап келе лезет офдори, небуге туь песини пултуьре доре керг нивосдори?

— НэгI, мере гушд керги хьэз оmore гуфдире невосдорем и керге, — э гьолоке сесевоз, нефес гирде-гирде, мугу Шими. — Мере хьол нисди, сэхд нечогъ бирем, э пой гешдеш нисе дануьсденуьм. Е кем ме э хуьшде диром гуфдире, духдир гуфдири е ченд руз пес-песоеки гIов-нухоруш эн керги хурум.

Шинохэ мерд, э гофгьой Шими бовор несохде, шогъгьо, зере, хэндуьсд.

— Мэхьтеле кори! — мугу у, сере жумунде-жумунде, — Суьфдеи гиле туь керг восдоренки мугу: керг нечогъбу, лап ужуз бу, унегуьре восдоребири, гьейсэгIэт эдее гуфдире — туь хуьшдени-туь нечогъи. Серме нисе ведерафде эзи гофгьойтуь, кей туь расдире гуфдирега, кей — дургунире.

Шими, сере тик гирде, э могъбули ве серкуширевоз денишире э у, мугу:

— Чьни беге инже эри сертуь неведедарафде? Енебуге гIэсбе хуно хьэр-хьэр зере хэндуьсде? Беге туь нисе дануьсде метелере: «Косиб керг восдоренге, дан: е керг нечогъи, енебуге косиб нечогъи»?..

## ЧУЪТАМ ШИМИ Э «ПЭХЬНИКИЕ ГIЭРУЬСИ» МЭГНИХУН БИРИГЕ

Э у лап жогъиле вэгIдогьой хуьшде Шими батрак бугьо вэгIдо омо у е гиле э ки хазеин хуьшде эри муьзд эн кор хуьшдере хосде. У согъ поиз э онгурбогъгьой энү кор сохдебу: бил зеребу, те-гьенг буррабу, лигенде дешендебу, оммо гьеле е кепик пул муьзд жофой хуьшдере эзу невегирдебу. Шими оморенге муьзд жофой хуьшдере эри вегирде, хазеин — сэхьиб онгур-богъ эй хьэзиге, не-буге эри зарифатиге, делхэке батрак хуьшдере эри синемеш сохде

(гуфдирени эхи: гиснере нун воисде, гЮшире — томоше, кейф), косибе Шимире е шогын пулиш недоре, пиш сохд фирсо уре эз лэгIэй дер хуыште.

Шимире э хуне е пенже гIордиш недебу, э куыф ю — е гъэре кепикиш. Уьсделуьге гъэрдгьо-фердгьош вебу э кул энУ. Шими дануьсденбу, ки рафде шуькеет сохде э хьоким эз дес хазени хуыште — негьогъие кори. Хьоким мейл энуре мигируь, чуьнки уре гъисди эри «руьгъэни сохде» хьокиме, оммо Шимире гъичиш нисди. «Тие десе — сегиш нисе лисире».

Шими гъечи дуьлхуьрд, могъбул бу эзи кор, ки уре дуьлиш небисдо э хуне эри рафде. У гъечи эзи оворее одомигьоре хуно гешде-гешде омо ведиромо э гъирогъ шегьер э е кура богъ. Э инжо е куьгъне, тор бире, шэгъэ хурде сарай эн тхдеи бу. Шими дерафд э гъэд сарай, хэсде-менде нуьшд э е куьнж энУ э сер хори, сер гирд думитгьо-фикиргьой хуышдере эри сохде. Гъечи уре хэбер небисдо, кей чум энУ э хов верафдге. Оммо э-дуь сэгIэт гирошде бэгъдо ю эз некуми бирден хэбер бисдо, сестгьой одомигьоре шиновусде. Вэхд дие шев бу. Гъове торик бу.

Э доруни куьнж эн сарай е буше, сер рэхъое челег бу э минжию сула дери. Шими зур-зур вэхид эз жигей хуыште, дешенд хуышдере э гъэд челег, чуме э сулай челег доноре, сер гирд эри гуш веноре. Дир некеша, дер сарай вокурде омо. Эз дер диromo е одоми э кул ю е келе бесде бухче вери. У э сарай диromоре мунде, бухчере эз кул хуыште вегирде, но х хори. Э песой энУ диromo е одомигеш. Шими э торики сечмиш несохд угьо книге, чуь одомигьонге, оммо угьо э ижире вэхд инжо омореи э шелеревоз терсунд уре, э дуьл ю сегьм венгесд. «Белки игьо дуьздгьо-гъэчэгъгъют, оморет инжо шев-нимешев дуьздире енебуге талан сохде чигьоре эри бэхш сохде э гIэрей еки? — э дуьлпесоиревоз фикир сохд Шими эри хуыште. — Эгенер, худо мееро, угьо дануьсдуьтге ме инжо пэхъни бирем — вой-волелеи эриме, эхирме бири, гIэйиллогъойме етим мимунут...»

Шими э и фикиргьо дери, бирден э сарай товуш бисдо — оморегоре одомигьо дегесундуьт шэгIме. Шими эз ело лап келе мэхьтел, эз елойге лап шор бисдо угьоре виники, дануьсдики и ю шек сохдебугьо «гъэчэгъгъо» — хуышдени хазени энУни не е пура жендеклуье жогъиле зен, э хьисобовоз — ошней ю. Шими кем мундебу эз шори, мэхьтели эни кор журай дешенде, оммо у лэгIэй хуышдере э кеф десевоз сэхд гирде, лос-гуьм поисд э жигей хуыште, чуме доноре гъиште э лой энугьо.

Хазени энУ е рушверие гъолинде мерд бу, е гъуьндурье килэхь бухорен э сер ю вери. У э сугъразани поисде, векенд энгуьл бухчере. У ебо эз гъэд бухче вегирд е чуькле холинчелере, дешенд э сер хори. Песде э сер холинчеле дешенд е сипре перзине. Песде э сер перзине но чорек эн гъирмизине шоробе, тикегъой гуше,

сибгьо, оноргьоре, дуь гуьлбенде пиёлегьоре. Вэхнше э пой, хазеин эн Шими э е темэхьэвоз сэхд гьэл гирд ошней хуьшдере.

— Эй гуьзелме, — марч сохде, е моч векенде эз тов-товне гьутиней эн жогьиле зен, муту у, — те ебо иму нуьшде чи хурде, кеф кмуре дире, биё ебо ме не туьни вежегьим, домор не гIэруьс чуйтам вежегьисденге э гIэруьсишу пушой «гелин-гиёв» бире. Имуш эриму веровурд сохим, ки ме — доморум, туь — гIэруьс.

«ГIэруьс» назли-назли гьулгьоре лов сохде, сер гирденге эри вежегьисде, черх хурде э гьэд эн сарай, «домор», неденишире э салгьо, гьолннде жендек хуьшде, дуь чуме буйхь сохде, э сер-сине, сер-сифет «гIэруьс» донере, э е зарб, хьэвесевоз вежегьисд, хори-гьо, диворгьо, бун эн сарай сер гирдуьт эри лерзире.

Шими э кеф, шори, вежегьисдей энугьо денишире, фикир сохд эри хуьшде: чуйтам бире гIэруьси чек незере, музик незере, мэгI-ни нэхунде. Шими но эри хуьшде, ки сес ю эзу жире одомире хуно гьисдигеш, э товун комики гуфдиренуьт: «Эз рачи девере хунои, эз сес — хэре хуно», у ёгьин эри энугьо гьейсэглэт биё мэгIни хуну, чек зенуь.

Шими, юре «домор» не «гIэруьс» нешиноху гуфдире, куьгьне, сула-сулае пусти хуьшдере кунпесово вокурд, килэхь гусбенди хуьшдере сэхд э сер чумгьо шиши, вэхншд э сер пой. У сер гирд гье у туьтем эри э хьэвесевоз чек зере, келе-келе хунде мэгIнире «Э шори гIэруьс-домор».

«Домор» не «гIэруьс» гьерчуй дануьсдуьт и эз некуми эз гьэд куьгьне буше челег ведироморгьо — садани, шехьитунни. Хьэле-жигер бире эзу, суьфде э е хьэрой-божэхьэвоз-вирихде ведерафд эз сарай бисембее «гIэруьс». Гье усэглэт эз песой энугь вирихде ведерафд «домор». Оммо «домор» э вирихдеки, гьуйндуьре килэхь бухорей энугь раси э бун дер эн сарай, офдо э домой дер энугь.

Себэхьимуьн Шими, гьетте чум вокурде, килэхь эн хазеин хуьшдере вегирде, омо э ки энугь э хуне эри пул хосде. Хазеин гьетте уре дире, воисд юре дигьнере хуно пиш соху Шими, оммо киэхь бухорей хуьшдере э гьултугь энугь виники, гье усэглэт зутьун хуьшдере гирд. У э сер офдо, ки дигьне «шэхьиту» батрак энугь гIэмелдане Шими биребей. Хазеин гье усэглэт э мигьровуни, менэхьэфиревоз денишире э батрак хуьшде, ведешенд эз куьф е гьолинде божнике, шуморд э Шими расиренигьо пулгьоре эри гьэгь жофой ю, до э у. Гьетте Шими пулгьоре вегирде, хазеин десе дураз сохд эри вегирде эзу килэхь хуьшдере.

— Эй, хазеин, гьечи кор эз сер нирав, — килэхьэ энугь днеш сэхд шишире э зир пултугь хуьшде, хэндуьсде, э зарифаткимсиревоз гьелебуле доре уре э энгуьшдевоз, мугь батрак. — Туь е гиле ди муьздмере ме эри шову мэгIни хундеи э гIэруьситуь э хонумевоз, песде мидуьм килэхьтуьре.

— Гьери пу, хэлефме, ченгьэдер эз ме расирениге, ме мидуьм

э сер дуй чумгойме, — э менэхьэфиревоз гуфди хазеин, компреки воисденбу, те зен ю, гІэилгьой ю дануьсде эйчуь омориге инжо себэхь зу-сери батрак Шими, у дес кенуь бурав эз ю.

— Ме эз туь зїед нихогьум. Ди мере, ченгээдер доренуьтге мэгІнихунгьоре э ГІэруьси, — мугу э тевзлуьбиревоз Шими, — Оммо, леле, чуьнки гІэруьситу нен хонум эн де одомигьойгере хуно небу, пэхьниккине гІэруьси бу, унегуьре эз туь расирени э ме дуйвойне гьэгь. Песде е коригеш гьисди. Гуфдиренуьт: э гисне шуьггэм шори сохде, мэгІни хунде нисе бире. Ме шову гьечи гисне бируьм, эгенер э десме миофдоге сер эн хуг, ме э гІовун-гуьногь неденишире, е гІэнж мекендуьм эзу. Косибе серме эришуму э гисне шуьггэмевоз шову мэгІни хундем, «ГІэруьсишмуре» мэгІрифетлуь сохдем. Эри эниш эз туь е гьэгь расирени. Е гьэгьигеш расирени эз туь, хазеин. — э домогьбиревоз мугу Шими, — эзу товуне, ки луьре божэхьэт воисдени сур эни пэхьниккине гІэриситуь нен хонуме кес дануь э гьэд шегьер. Оммо ижире суре эри дошде э дуьл, эри екиш негуфдире, дуьл одоми хэреб бире...

Эхирки, кутэхьи гоф, Шими вогордунд э хазеин хуьшде килэхь энуре, у доки уре эз гьэгь энубэггэй эри э 'бэггьгой ю кор сохдеи, гьемчун чорвойне муьзд. Е муьзд эри мэгІни хундеи «Э шори домор нен гІэруьс» э «ГІэруьси» энугьо, е муьздиге — э товун энуб кор, ки «ГІэруьси энугьо эн де одомигьойгере хуно небу, «пэхьниккине гІэруьси» бу, сеимуьн муьзд — эзу товуне, ки у э гисне шуьггэм хундебу мэгІнире э «ГІэруьси», чоримуьн муьзд эзу товуне, ки у гоф дори хэзеине и сур эн «пэхьниккине гІэруьси» энуре э хонумевоз эри екиш эри негуфдире, дошде э дуьл хуьшде...

### **ЧУЬТАМ ХЭР ШИМИ ГЪЭГЬР ХУЬШДЕРЕ ВЕДЕШЕНДЕБУГЕ ЭЗ СЭХЬИБ ХУЬШДЕ ЭРИ ЮРЕ «КРИТКОВАТЬ» СОХДЕИ**

Е гиле гьовой шохьонгум Шими Дербенди э кул хэр вери эдембу эз кор эз онгурбоггьгьгой колхоз вогошде. Шову келе ворущ оморобу уенелуьре э кими жигегьо новур, э кими жигегьо сэхде малад бу.

Гьовой Шими имбуруз хуб небу. Гь.еле себэхьмунде у э кор рафдеки уре эйчуь кориге э зеневоз хуьжет, гофе-гоф биребу. Сер зиеди имбуруз э 'боггьго вохурденки э председатель колхозевоз, гьовой энуб эз мунде жигеш хэреб бисдо.

Эзи е орине пушо э колхоз собрание биренге, Шими вэхшшебу председатель колхозе критковать сохде. Имбуруз председатель уре э боггьго диренге, у Шимире неки руз эхйрбу недо, гуйге хуьшдере э недиреки веноре, зе гиросд эз ён энуб. Эз гьово, гьошгьобогь энуб ведибубу, у эз Шими гьэгьри бири юре эри критковать

сохдеи э собрание. У имогьой е вогьне миёфу и гьэгьре эри ведешенде эз Шими.

Шими ченд тиле хуышдере гоф дорёбу зугьун хуышдере эри гирде поисде, э хьокимгьоревоз э хуьжет, э бэхьс эри непоисде, чуйнки, чуйтам гуфдирениге: «Кире саламати, олхогьини воисдениге, у биё «кар», «кур» ве «лол» «бу».

Шими гьечи э кул хэр вери, вемунде, э фикиргьой хуышде дери, сер гирд эри миже куфде, чум ю э хифлет рафде. Хэр энү шек сохде, сэхьиб ю хисри гуфдире, евош-евош эз рэхь ведиромо э гьнрогь, диromo э гьэд лухьме, сере зофруво фушенде, юш сер гирд э пой-пой эри хиспре.

Шими хэбер биренге, миденишуь мивини, хэр ю поисди, рэхь нисе рафде, поисди те сугьразани э минжи лухьме. Шими э сер хэр хьэрой сохде, э пойгьоревоз зе эз гьэбургьэгьой энү, рэхь хуышдере бурав гуфдире, оммо хэр эслогь эз жигей хуышде нежуьмуьсд. Чуйтам поисдебуге, гье гьечу поисдебу э гьэд малад, сер хуышдере дуллу гирде. Шимире лап гьэгьр омо эзи кор эн хэр. У сер гирд хэр хуышдере жинс, гьэсуьл энуре вешмерде, нэглети сохде.

— Эй нолоигьэ хэр! — хьэрой вегирде, мугу эзу Шими, — эгелер туьре воисденбуге е кем рэхьэти-форигьэти сохде, чумтуьре э хов веберде, туь гье и гьэд эн лухьме-маладе эйчуь вихде вегирдей эритуь? Бегем е хубте жиге гьэгьети бу эритуь? Негьогь нисе гуфдире, ки: «Эри гьеме дерму гьисди, эри хэр бэгьэй», «Хэр хэри хуышдере дануьсдге, мизенуь шуьгьэм хуышдере лов ми-соху»...

Гье и вэхди, кейки Шими, хуьршлуь бире эдембу гьэйбгьо, усоле хоснетгьой эн олхогьин поисдебугьо, чуме э хифлет вефердебугьо хэр хуышдере гуфдире, бирден э и туьтем э зир дуьм хэр энү омо е гиже диromo. У сер гирд хэр Шимире эри гезире, сухунде. Хэр бирден хуышдере шувунде, хэбер бисдо, дуьм энү гье у сэглэт чубугьэ хуно тим-тик бисдо эн аслане хуно хуьрш энү вероморенигьо вэглдо. Хэр сере тик гирде, лэглэре пара сохде, сер гирд келе-келе эри гьэрини зере, э зарбевок шиллогь вешенде, кефел хуышдере вешенде-фушенде. Шими эз терс гье усэглэт лэглэй хуышдере гирд, оммо е-дуь минутиш небисдо, офдо кунбологьово эз кул хэр лап э сэхде жигей эн лухьме.

Шими гьемей ю тар-малад вэхуьшд э пой, гешд э песо-пушой хуышде эри офде е чубугь, хэр хуышдере эри куфде. Оммо виники э песо-пушой ю чубугь нисди, Шими ведешенд эз куьф гьобой хуышде гьэйлей хуышдере э дуразе чуйгьэйлеревоз, сер гирд э гьэйлеревоз эри зере эз гьэбуьргьэгьой энү, э гьэгьревоз гуфдирегуфдире:

— Эй хэр кук сег, эдее диренуьм, туьреш председатель имуре хуно хьэз нисе оморе расдире э сифет туь гуфдирениге!

## ЭРИ ГИРИСДЕШ ОДОМИРЕ БИЕ ДУЫЛ БУ

Зенхуьсуьр эн Шими Дербенди муьрдебу. Зен Шими эз дерд, эз хьыйф дедешу муьрди гуфдире, эдембу дердежер бире, хуьшдере, дуразруй, зере-куьшде. У эдембу сине куфде, гьутинегьой хуьшдере гьэрмэгь-гьэрмэгь сохде, шивен-хьэрой дешенде. Оммо эн Шими гуйге гьич э хэпер юш небу. У гьич эз чум хуьшде е гIэрс-леш тигьи несохд, гуйге у э сер митой эн зенхуьсуьр хуьшде нэгI, эн кес омори. Оммо зен эн Шими э ижире хьол бугеш гьейсэгIэт вини и коре. У эри хуьшде гьелебуле гирд эри Шими, гьэгьр сохде э у: егIни, туь пой егиле, ме э туь овурденире миёрум. Унегуьре, гьетте ёс келе зен верасде, зен Шими мугу эзу:

— Эй мерд, туь чуь бигIоре, дуьлсуьзе одомини! Гьечиш кор бирени!? Фэгьире дедейму муьрденге, туь гьич е дерд некешери, эз чумтуь е дугьле гIэрсисх нерихд. Чуьш бисдоге эхи у зенхуьсуьр-туь бири, дедей эн зентуь, дедейхолуй эн гIэилгьойтуьни. Неки эз одомигьойме, эз куьнде шинохгьо-дусдогьому, куьнде гьунши-мэ-хьэлеймуш мере эри энижире бидэгIэтин кортуь гIэйб-хижолети оmore. У руз чорейме мибисдоге эзи кортуь хорире пара мисохдум э хори мидарафд — ингьэде эриме гурунд, хуьрди омо и кортуь.

Шими э тегьнимиревоз гуш вено гофгьо-серкушигьой зен хуьшдере, песде хоши-хоши мугу эз зен:

— Эй зен, э жуьн гьоврехуней бебейтуь, мере эри эни кор гIэйб месох. Одомире неки эри хэндусде, мэгIни хунде, оммо эри гирисдеш бие дуьл бу. Ме гуфдиренуьмгьо: одоми гирисдени увэхди уре е келе дерд биренге, енебуге лап келе шори. Оммо у фэгьире дешемму муьрдебугьо руз э дуьлме не келе дерд дебу, не келе шори. Ве дуьимуьн, зен, ме э туь гуьом: мере у руз не вэхд-межолити небу эри гирисде. Ме гье э видов-видов, теретэгIди бируьм эри эхироти восдоре овурде, тешт-гьэжгьу эри хьозур сохде, гIов герм сохде тен муьрде шушде биев гуфдире, гьовре хьозур сохде эри дешемму, зур-зур уре берде э жигей ю динж сохде. Унегуьре, жон зен, эз ме гилеи месох, гьэгьри мебош.

Оммо гофгьой Шими эри зен ю сук, руьхшендире хуно омо. Зен Шими гье эзу рузевоз сер гирд гуш энуре эри берде, эз серкушигьо, охмури зеренгьо визор-гуьзор Шимире овурде. Шими дие эз дес эн зен хуьшде не хурдей хуьшдере, не нуьшдей хуьшдере нисе дануьсденбу, сер-гуш Шими эдембу хурде оmore. У э бологь, дуьлесди демундебу, нисе дануьсденбу чуь фенд, чуь чоре офуге сер хуьшдере эри хилос сохде эзи гьуд-гьуьдигьо, серкушигьой эн зен хуьшде.

Эхириш Шими е чоре офд эри эни кор лэгIэй зен ю гирде биев пуфдире. Е сал зиедте гиросде бэгьдо эз зен хуьсуьр энмуьрде, Шими эри зен хуьшде е келе суьгIуьдо сохд, егIни, эз деде биригьо руз зен юни гуфдире. Сер зен хуьшдере эри руьгьэ зере, Шими



неденишире э хэржигьо, эри энү е бугьолуье бэхшиш восдо. Э суй-гуьдой эн зен хуьше у огол зе гьеме одомигьой зен хуьшдере, куьнде дусдгьо ве куьнде гьулум-гьуншире, у руз зен хуьсуьр ю муьрденге, э сер митой энү оморебируьтгьоре. Оммо дуьл Шими эдембу дорд доре эри эни сэхде хэржигьо.

Э вэхд хурде, кейф сохде вэґдо, Шими бирден гьеебо эз некуми э пой вэхише, килэхьэ эз сер хуьше вегирде, э килэхьэвоз сифет хуьшдере сэхд сохде, келе-келе зар доно гирисд. Гьуногьгьо, э межлуьс нуьшдегоре одомигьо, гьерчуь дануьсдуьт, ки Шими эз шори, эз пури дуьл хуьше эдее гирисде: еґни, э ижире шоре руз зен юре гьеме эдее омбаракбу сохде, э согьию хурде, тэґрифигьоюре доре. Шими негирисуь гуьфдире, мердгьо сер гирдуьт эри зарифатгьо сохде, мэхсерее гофгьо гуьфдире э у, оммо зенгьоре лап омбар хьэз омо эзи кор эн Шими, сер гирлуьт уре эри тэґриф доре эри у гьечи зен хуьшдере хосдеи, хушие гофгьо, комплиментгьо гуьфдире эри энү. Шими гофгьой энугьоре шиновусде, вегирд килэхьэ эз сифет хуьше, песде гьирке сохде-сохде, мугу:

— НэґI, дусдгьойме, хьэґьергьойме, ме эз товун ишму думит сохденитгьо гофгьо, коргьо нисе гирисденуьм. Ме эдее гирисденуьм, фэґьире зенхуьсуьрме, э жигей хуьше динж гердо, ченд хокгьой ю гуьмуьр гердо гьемешмуре, муьрди гуьфдире.

Э сер суьфре нуьшдегоргьо, шиновусде и гофгьой Шимире, дуь э еки денишире, перт-мэхьтел бисдорут: еґни, белки Шими гьеебо эз некуми чешмиш бири, эхи зенхуьсуьр энү эзи е сал зиёд пушо муьрди. У увэхди негирисди, имогьой э сер суйгуьдой зен хуьше эдее гирисде. Оммо Шими э мэхьтели энугьо неденишире, э килэхьэвоз гIэрсгьой чум хуьшдере покурде-покурде, гирисде-гирисде, мугу:

— Мере гIэйб месохит, гьемешму инжо нуьшдегоргьо шогьодит, дануьсденит: эзи е сал пушо, фэґьире зен хуьсуьрме муьрденге, ме негирисдебируьм. У руз мере не вэхд-межол бу, не дуьл бу эри гирисде. Оммо имбуруз мере те воисде можолиш гьисди, дуьлиш гьисди эри энү фэґьире зенхуьсуьрме эри гирисде, и тэхсире эз серме эри вегирде...

## ЭГЬУЬЛМЕНДЕ СУД ЭН ПАДШОГЬ ШЕЛМУЬРЕ ХУНО

Сернуьш эн колхоз, э комики гье эз суьфдеи руз колхоз норе оморе эйло кор сохденбу Шими Дербенди, ебо омо эз некуми нечогь бисдо. Духдиргьо эри энү меслэхьэт норут: бурав э санаторий хуьшдере эри согь сохде. Те сернуьш колхоз эз куррот вогошде, членгьой колхоз э жэґIмлуье собраниешу гьелелуьге э жигей энү вихдуьт Шимире.

Гьетте Шими э жигей сернуьш колхоз бире, у эн суьфде эри

хуыште теслнх сохд дуь бригадире эз бригадири эри вегирде. Еки эз бригадиргъо гъейни эн сернуыш колхоз бу, екигей энугъо — хэгъерзорей энугъо. Гъердуйи эни дуь бригадиргъо, ишу куйнде одомигъой эн сернуышуыт гуфдире, э пушой эн де колхозчигъойге хуыш-дере омбар уыткем гирденбируыт, э собраниегъо лэгъэй одомигъоре зеренбируыт, гофгъо, кемсуыгигъой эн сернуыш колхозе гуфдире нисе гъишденбируыт, эз хубиюре бэгъэй. Эн Шмиреш угъо ченд-бо, неденишире э келе мердию, лэгъэй юре зеребируыт, е кемсуыги энуре пуфдире нисе гъишденбируыт. Гъеле угъоре имид бу, э кумеки эн сернуыш колхозевоз днеш зверте, дохудлуые жиге эри вегирде э колхоз. Келе хъокимгъой шегъер, э комигъоревоз сернуыш колхоз куйнде дусдгъо-шинохгъо бируыт, э шуькеетгъо, эрзегъой эн колхозчигъо э товун кемсуыгигъо, бедхъисобие коргъорой энугъо, э туш нисе гирденбируыт.

Шими эри хуыште омбар фикир сохд: чуй вогъне офу те сернуыш колхоз эз куррот вогошде хэгъерзоре не гъейни энуре эз бригадири вегируыт. Вэхд эдембу гирошде, оммо Шими е ужире фонд, вогъне офде нисе дануысденбу, унегуыре эдембу лап дуьлпесои эни коре кешире. Оммо гене е ченд руз гирошденки, омо е хубе гъемеллуые вогъне ведиромо и дуь бригадире эри эз кор ишу вегирде.

Гъемин э и вэхдигъо э шегъер, э республика гозитгъо, радио эдембируыт гировунде келе пропаганда э гъэршуй келе гъэруысигъо сохден, пулгъо-севболгъо кура сохден эз гъэруыси оморегоре одомигъо. Кими эни гъэруысигъо нушунде оморенбируыт э фэхълегъо. гъууллугъычигъо кор сохденуытгъе рузгъо, эжеки кура сохде оморенбируыт те шасдсад-гъозор одоми. Э товун эн еки эннжире гъэруысигъо э гозит эн шегъер нуувуысде оморегуе е тиге фильетон. Э Шими хэбер дорогоргъо бисдо, ки и дуь бригадир эн колхоз энугъо — гъейни ве хэгъерзорей эн сернуыш колхоз бирет э и гъэруыси, келе совболиш дорет сэхъиб гъэруысире.

Шими дир несохде себэхъимуын кура сохд правлениере, огол зе э заседанней эн правление гъейни ве хэгъерзорей эн сернуыш колхозе. Суыфде э правление у сер гирд эри фегъм сохде кор эн хэгъерзорей эн сернуыш колхозе.

— Туь э у гъэруыси бири, э товун комикки э гозит «филейтун» нуувуысде оморигъо? — пуьрси Шими эз хэгъерзорей эн сернуыш колхоз.

— Бируым, чуйни беге инжо? — э уыткемиревоз мугу хэгъерзорей эн сернуыш колхоз.

— Совбол доребири сэхъиб гъэруысире? — пуьрси Шими.

— Доребируым, — мугу у эз Шими, — э туь чуй кори? Эз куыфтуь недоремки, эз куыфме дорем.

Шими эз зир лов супле хэнде сохд, э хуыршлуые гъовой сес энугъо гуш невоноре, э олхогъынниревоз мугу:

— Туь дануысдени, ки э иму гъейсэгъэт эдее гировунде омор

гъовхо э гъэршуй энижире келе гІэруьсигьо, эн совбол, чуйн эн куьгьне гІэдот. Оммо туьш э жигей поисде э гъэршуй энижире куьгьне гІэдот, э кортуьревоз гирдей мейл энуре. Гьечи бире бэгъдо, чуйтам туьре гьнше мибу э сер эн бригада, тербие дорогор членгьой бригадаре, эгенер туь хуьшденитуй э угьо усоле нишон бирмундениге?

Э теклифи эн Шмиревоз правлений э колхоз э е сес гъэрор ведешенд эри хэгьерзорей эн сернуьш колхозе эз бригадири вегирде у сэхьиб гІэруьсихунере совбол дори гуфдире.

Песде сер гирде омо эри фегьм сохде пуьрсуйш эн гъэйни сернуьш колхозе. Шими э ки энур руь бире, пуьрси:

— Туь бири э у гІэруьси? Совбол доребири?

Гъэйни эн сернуьш колхоз гье усэглэт э сер офдо чуй воисдеге Шмире, чуй метлеб дериге э дуьл энур. У э и гІэруьси бирей хуьшде хьэшо незе, чуйнки уре гьечиш-гьечуш э и гІэруьси дилогоре одомигьо бирет. Оммо севбол дорей сэхьиб гІэруьсихунере у э герде невегирд. Э гьечиревоз уре воисд и «хьиллее келе мерде» фурмуну, хэр соху, э дуьл хуьшде руьшшенд соху э у эри и метлеб энур эз сер нерафдеи. Э хотур эни кор, гъэйни эн сернуьш колхоз, хуьшдере тэГриф дорере хуно, мугу:

— Эгенер туьре дануьсде воисдениге, Шими, сэхьиб энур гІэруьсихунере ме сад монет пул доренибируьм. Духдерме э шуьвер рафденге у мере сад монет пул совбол доребу. Ме э гІэруьси кук энур оморенге неки гъэрдмере невогордундум, е кепик пулиш уре совбол недорум.

— Эйчу? — недуьл-недуьл пуьрси Шими.

Гъейни эн сернуьш шефдевоне хэндуьсде, мугу:

— Совбол недорум, мере песде серкуш зерегор небу гуфдире эри эни кор, еГни, чуйтам инжо ишму гуфдиритге, мейл куьгьне, усоле гІэдотгьоре эри гирдей.

Шими домунд э хуьшде. Уре дне туйге вогьне небисдо гъэйни сернуьш колхозе эри эз бригадири ведекуьрде. Оммо Шими верасирембу эри хуьшде, ки бригадир эдее юре фурмунде, белки э дуьл хуьшде хэндуьсдеш эдее хэндуьсде э юревоз борж берде нидануь гуфдире. Оммо эри субит сохде у эдее дургу гуфдире, у совбол дори сэхьиб гІэруьсире, у нисе дануьсденбу. Шими гьечи е кем э фикир, э думит демунде, чуй соху, чуй несохуге, бирден гьеебо хьуьршлемиш бире, муьшде зе эз сер стол, хьэрой вегирд э сер эн гъэйни эн сернуьш колхоз:

— Э и гІорсуьз, э и номуссуьз денишит ебо! — келе-келе мугу Шими, — Гьеле хуьшдере эдее расд ведировунде. Эжен номустуй, хьэйтуй?! Э гІэруьси кес бирей, те финж винитуй вероморе журдей, кейф сохдей, оммо е кепиклеш гъэрди эн сэхьибхуней эн гІэруьсире недорей. Туь ижире кор сохде бэгъдо, чуйтам туьчуни одомире гьнше мибу рэхьберчи эн е келе бригада, тербие дорогор член-

гьой эн бригадаре, эгенер туь хуьшденитуй э гьго уsole нишон бирмундениге?!..

Эхирки, э теклифи эн Шмиревоз правлений эн колхоз э е сес ведекуьрд эз бригадири гьйни эн сернуьш колхозе эри у э гьэруьси... совбол недори гуфдире.

## ЧУЪТАМ ШИМИ РУЪШВЭХУРЕ «ТЭГРИФ» ДОРЕБУГЕ Э ПУШОЙ ХЭЛГЪ

Невей Шими, гьевдегь сале духделе, э шори-никиревоз хунде верасдебу миёнее школаре, доребу документгьой хуьшдере эри дерафде э институт. Духдере лап имид бу ю э институт мидарав гуфдидире, чуьнки э школа хуб хунденбу. Оммо духдер э институт э конкурс вегирошд. Эри эни кор у эдембу келе дерд, могьбули кешире, гьемише э фикир, э думит дебу. Шими диренге гьовой эн невей хуьшдере, гуфди э кук хуьшде, э бебей энду, духдере беруь э е кор нуь гуфдире. Унжо э кор, э гьэд коллектив, эн одомигьо дуьл ю меров, фикиргьо-думитгьой ю кем-кем, оморе-оморе эз ёр ю медаров.

Себэхьимуйн бебей эн духдер омо э партал духденигьо фабрикай эн шегьер эри э кор дешенде духдер хуьшдере. Инжо омбардекиш гьеме жогьиле духдергьо, жогьиле зенгьо кор сохденбируьт. Кук Шими диromo э кабинет эн директор э эрзой духдер хуьшдеревоз уре э кор вегируь гуфдире. Директор эз диремун э чуьл сале мерд бу, э сер ю муй невебу. Уре сие, хэсде, кутэхьэ рушлегьо вебу. Э одоми у э огьур-домогиревоз дениширенбу. Гьетте эз бебей духдер шиновусде у эйчуь омориге э ки энду, сере э жуьргьэтиревоз жумунде, келе-келе мугу:

— НэгI, нэгI, ме духдер ишмуре э кор вегирде нидануьм. Жиге нисди. Мере гьейсэгIэт э фабрик эз герек гьисдигьо гьэдере одоми зиьдтен. Гуфдируьм — нидануьм!

Гуфдире и гофгьоре э бебей духдер, директор сере гьуз гирде, сер гирд э пушой ю э сер стол вебируьтгьо когьозгьоре эри хунде, гьич дие э лой эн кук Шими неденишире, гуйге у инжо гьисдиш нисдиге.

Бебей духдер лап дуьлхуьрде хуно бисдо эзижире жугьоб эн директор. У поисд е кем э думит-фикир дери, э дуьлхуьрди ве могьбулиревоз денишире э ранд зере тэхдере хуно гьовомер ве тов доренбугьо муйневерие бирэхьне сер энду. У нисе дануьсденбу чуь сохуге. Песде бебей духдер дуьл ю гьэзиет кеширере хуно, десе дено э куьф хуьшде, сифете гьуьжунде, гуйге е лап келе гурунде ве секонелуье чи ведешендере хуно, ведешенд эз куьф хуьшде руьшве — е тозе жэгьжэгьне сад монетире евош, асдале, чуметерсе хуно но э гьирогь стол эн директор. Песде гье усэгIэт

пенжей дес хуышдере э сер садмонети веноре, у евош-евош, терс-терс, юре эрэгъ шишире-шишире, сер гирд эри куынд овурде э пу-ой эн директор. У гьейсэгIэт эдембу э дуьллесои ве гьаежониревоз эри хуышде думит сохде: «мегируь небуге нивегируь?!..»

Дуьл эн бебей духдер олхогын, рэхьэт бисдо, гуйге эз кул ю е келе сенгъ дохьори офдо, виники: вегирд!

Е се мегъ гиросше бэгъдо невей Шими шинох бисдо э е хубе кукевоз, комиреки воисденбу уре хосде. Духдер рази бисдо э у э шуьвер эри рафде. Оммо кук зигьисденбу э е шегьериге. Э дуьи муьн руз гIэруьси бэгъдо у миесде э шуьвер хуышдеревоз рафде э у зигьисденигъо, кор сохденигъо шегьер. Унегуьре те гIэруьси е руз мунде бебей духдер омо раси э ки директор. И дес у э дирек-тор хогъиши сохд духдер юре эз кор мирэхэс соху, чуьнки у э шуь-вер хуышдеревоз биё э е шегьериге. Бурав эри зигьисде, гьемчун дуь духдер юре «трудова я книжка».

— НэгI, нэгI, ме духдертуйре гьейсэгIэт эз кор рэхьо доре ни-дануьм, — муйневерие сер хуышдере э жуьргIэтиревоз жумунде, келе-келе мугу директор. — Мере гьейсэгIэт э фабрик одоми вес нисе сохде. Иму э гьэд эни се мегъ духдертуйре э кор хуте сох-дейм, оммо туь эде гуфдире: эз кор рэхьо ди, гьемиге книжкой жофоиш ди уре. Денишит е гьэдер вэхд.

«Чуьтам денуьшуьм»? — эдембу гуфдире э дуьл хуышде бебей духдер. — Духдер эхи себэхь биё паруьсдеклей гьовоире хуно пар зенуь учмиш бу себэхь эз лулей эн бебе э шуьверлей хуышдере-воз?!. Уре воисд и гофгьоре э хьэрой ве сабирсуьзиревоз гую э и тэгIэле директор, оммо негуфди, чуьнки вераси, ки эзи гофгьой ю е хэйр нибу. Унегуьре у суьфдеигилере хуно, у оморенге э ки дирек-тор духдер хуышдере эри э кор дешенде, гоф несохде, ведешенд эз куьф хуышде е тозе садмонетире но э пушой эн у. И дес и сад мо-нетире но у э пушой директор нетерсире, э хуышде недомунде, да-нуьсде, ки мегируь гуфдире.

Шими дануьсд э товун эни гьозие, кейки кук эн у эз ки эн ди-ректор вогошд дуьлшор, книжкой жофои эн духдер э дес бебешу дери, э комики нуьвуьсде оморебу разименди эри «зарблuye жо-фой эн у» э фабрик.

— Эйчуь доребири туь руьшве у хьожигIэлемахуре духдертуйре унжо эри э кор вегирлеи, сер зере э у жире одоми, ижире хэре, лоигьсуьзе коре сохдей?! — э биразии ве хьуьршевоз мугу Шими эз кук хуышде. — Эйчуь туь гье эз сер бошден небердебири уре э е жигейге эри э кор дешенде?

— Чуь миёсдуьм сохде, мере дие де чорейге небу, — сер гирд эри расд ведировунде хуышдере кук Шими э пушой бебешу. — Э де жигейге эри духдере гье э ижире кор дешендеи сесад монет кемте нисе вегирде. Туь гьеле эзу согъбоши гу у сад монет пул зиёдтте невегирди невейтуйре эри э кор вегирден.

Шими шиновусденки и гофе эз кук хуыште, гоф несохд, гуйге рази бире э у гуфдиреревоз, э шолумиревоз мугу:

— Эгенер гьечу туь гуфдирере хуно гьисдиге, бэхшлемиш сох э ме, хэлефме, Э хотур эни у сохде ники себэхь теклиф сох уре э гІэруьси духдертуь, чуьн гІуьзетлуье гьуногь, ме э пушой эн гьеме ёгьин мугуом э у «согьбошимере» эри эни кор.

Себэхьимуьн э гІэруьси невей Шими оморуйт огол зере оmore гьуногьгьо, гьемчун директор эн фабрикай партал духденигьо. Директоре нишундуьт э минжи, э гІэрей эн лап хьуьрметлуье гьуногьгьо. Суьфдеи пейлере гьуногьгьо э согьн гІэруьс не домор, буьл-буьле хуно дилмож бугьо томоде эн суьфде гоф до келей эни гІэруьсихунере келебебей эн гІэруьсе Шими Дербендире.

Келе мерд Шими эн суьфде гуфди согьобоши хуышдере эз оmoreгоре гьуногьгьо э гІэруьси эн невей ю. Песде у руй бире э ки эн директор партал духденигьо фабрик гуфди э у ологьне разименди хуышдере эри э лап четине вэГдо бугьо эри невей ю у вегирд гуфдире уре э кор э фабрик, неденишире э у кор, ки директор невей энуре э кор вегирдебугьо вэГдо эри уре э кор вегирде жиге небу. Се мегь гиросше бэгьде, невей энэ э фабрик кор сохде, директор э хогьиши бебей гІэруьсевоз, неденишире э у овхьолет, ки э фабрик корсохгьо вес нисе сохденбу, э хогьиши бебей духдеревоз гье у руз неки рэхьо до духдере, гьемчун нувуьсд эри энэ книжкой жофон э разимендиревоз эри «зарблуье жофой коммунисти...»

Е дуй-пейле хурде, е кем серхош биребируьтгьо гьуногьгьо и хубе, тэГрифие гофгьой Шимире шиновусде э товун эн директор, гуйге лап шори сохде эзижире бэхдевере хосиет энэ, сер гирдуьт эри келе-келе чек зере, э е лэГэ гуфдире:

— Маладис, директор! Баракаллагь, директор! Диеш э хубе рузгьо, э келе метлебгьо расош, директор!..

Директор шори сохде эзи гофгьой эн Шими, хуш оmore юре эз гофгьо ве чеке-чекгьой эн э гІэруьси оmoreгоре гьуногьгьо, лове э шоре хэнде веберде, вэхишд эз жигей хуыште, э хьэёменди ве хуьрметевоз сер зе э нуьшдегоргьо, артист э чеке-чек э томоше оmoreгоргьо сер зенуьгьоре хуно.

Сесгьой чеке-чек сокит бисдоки, Шими, гуйге рази бире э гофгьой э гІэруьси нуьшдегоре одомигьоревоз, мугу гене:

— Гьелбет маладис, баракаллагь, директор, эгенер э фикир вегирдимге, ки эри эн гье э ижире кор вегирдеи де начальникге, ме медан, сесад монет кемте рушве нисе вегирде, оммо и директор энжэгь сад монет зиёд невегирди эри невеймере э кор вегирдеи, сад монетиге уре эз кор эри рэхьо дорен — е кепекиш зиёдте нэГ..

И дес э гІэруьси бирегоре одомигьо и гофгьой эн Шимире шиновусдуьтки, кимигьо сер гирдуьт эри гьэгьр сохде э директор,

охмурлуе гофгьо гуфдире э товун энү, кимигьойге сер гирдуът келе-келе эри хэндүьсде, кимигьойге сере дуллу сохде денишире э пушошу.

Бирден сифет не муйневерие бирэхьне сер эн директор жигь-гьэй эн бугунее керге хуно гьирмизи бисдо, дуьруьжде похлигьой эрэгь ведиромо э сер-сифет энү. Директор гене эз жигей хуьшде вэхшде, воисд чуьиге гую, лэглэй Шимире зенуь, оммо гье и туь-тем зугьун энү шуьл-кут бисдо э лэглэй энү домунд, лэглэй юш гьегьчу вокурде мунд.

Эдее гуфдиренуът: эзу рузевоз директор гьегьчу лэглэ вокурде мунди, гье хьэрекет сохдени чуьиге эри гуфдире, оммо нисе да-нуьсде...

## ШОРИ ЭН ШИМИ

Е гиле хуней эн Шими Дербендире шудгьо, кекгьо шишребу вечире. Шев гьетте э хуне товуш куьшде оmore, угьо гье усэглэт э хуне лов биренбируът, сер гирденбируът эри «венжире» э хуне деруътгьо одомигьоре. Шими согь руз э кор бире одоми, эз вомун-деи, хэсдеи хуьшде, уре шудгьо, кекгьо хурденбируътгеш, оммо сэхд хисиренбу, гуйге э хэпер энүш нисе биренбу. Оммо зен энү э шев ю ченд гиле шуьвер хуьшдере хэбер сохденбу, гьишденбу уре товуше дөгесунде, шудгьо, кекгьоре куьшуь гуфдире. Эз сербо-ти эн зең хуьшде Шими бегьем хисире нисе дануьсденбу, гьер руз ховолуь, хэсде рафдембу э кор хуьшде э боггьо. Оммо зен Шими когьли сохденбу эри рафде дерму восдоре небуге эз саниспекция одоми овурде шудгьо-кекгьоре эри телеф сохде эз хуне.

Гьечи шевгьо эз бегьем нэхисиреи, косибе Шими э вэхд кор э хьэрмэхгьой хуьшдеревоз э фориггэти вегирдеки, папрус-ггьэйле кеширеки гье э нуьшде жигей хуьшде, ггьэйле э лэглэ дерики сер мигуьрд эри миже куфде, чуме э хифлет веберде. Хьэрмэхгьой энү колхозчигьо уре гьечи э нуьшдеки жиге э хисиреки диренге, сер мигирдуът эри зарифатгьо сохде, хэндүьсде э Шими, гуфдире:

— Эй Шими, ведини, туь э вэхдию нисе хисире, э хьисобовоз те нимешев, пушой себэхь э зеневоз э кеф-вози мунде!

— Э жун худо, ме гьич эриме фикир несохдебируьм одоми э ижире салгьойтуь туьре хуно гьечи хьэвеслуь, зенсевен мибу гуф-дире.

— Ха-ха, э товун эн туьчуьни одомигьо гуфдире э метелегьо: «Э пириме медениш, э шевине дилбошигьойме дениш!»

Ггьэйбкеше Шимире эзижире лутие мэхсерегьой энигьо ггьэйб-оморенбу, руй ю гьирмизи биренбу, оммо чорей ю небире, тоб доренбу.

Оммо е гиле Шими пушой чуйшме дерафде, вемунде, сере гъуз гирде, бил э душ ю вери эдембу э хуне, э шегфер вогошде эз богъгьо. Э минжи эн куче, э лап хэлгъ омбар бугъо жиге, бирден э пушой эню, видов-видов, шуш-нефес гирде, зен эню омо ведиромо. Ранг зен рафдебу, сифет ю зэхълевежэгъэ хуно бу. У шуввер хуьшдере диренге, сере куфде-куфде шивен-хъэрой сохде, гирисде-гирисде, мугу:

— Эй мерд, вой эри мунде рузгъойме! Хунейму дегесири сухде. Мундейм хунесуьз, э сер тиегъе хори. Имуре эри сер нореш жиге нисди! Чуй хуби имогъой эриму?!..

Шими ижире хэбере эз зен хуьшде шиновусденки, э жигей дерд кешире, могъбул, гъаежон бире, биле эз душ хуьшде шенде, гъул-гъоре лов сохде, сер гирд эри шори сохде, э минжи куче, э пушой хэлгъ диги-диги зере вежегъисде, «охош, охош, жон охош!» гуфдире-гуфдире.

Зен Шими и томошей энуре диренге, суьфде перт-мэхътел бисдо мунд э жигей хуьшде. Песде у сер гирд эри гІэйб доре, серкуш зере, нифри-офри сохде шуввер хуьшдере.

— Эй мерд, сенгъ расо э мазалайту! — мугу эз Шими зен ю. — Хунейму сухди, э сер иму бун невери, туь эдее шори сохде, бешпингъоли зере-вежегъисде э гІэруьсире хуно, «охош», «охош» гуфдире?!..

Шими гъе гъечу бешпингъоли зере-зере, вежегъисде-вежегъисде э пушой зен хуьшде, мугу:

— Эй зен, чуйтам шори несохум, невежегъуьм? Э худо шуькуьр гердо, эхириш эзи шудгъо-кекгъо хилос бисдорим! Хунейму нисухдге, угъош пуч нибисдо...

## НЕДОВО

Е руз мэгІуьмей эн Кипур, гъовой шохъонгум, Шими Дербенди эз кор, эз богъгъой колхози э хуне вогошденге, те ебо у деспой хуьшдере векенде, е кем чи хурде, форигъэти вегирде, зен эню гъе усэгІэт хъэлово бисдо э у, мугу:

— Эй, мерд, себэхъ руз Кипури, гъово эдее шохъонгум бире. Те ебо базар сэхд бире, гъейсэгІэт зубош вера э базар, эри недово вечаунде восдо е хуруз эритуь е керг эриме, э сер иму черх дим, гІовунгъоймуре эз сер иму вегирим.

Шими лап вемундебу, у эз богъгъо хэсде-менде оморебу. Эз елойге уре сэхд гисне бу. Э сер эн кинле эдембу гъингъэр эн пушдине дуьшире, е хубе дэгІэмлуье буй лов сохде э хуне. Унегуьре гъейсэгІэт уре эри э базар рафде эслогъ дуьл небу. Зен эз ю дескенуь гуфдире, Шими мугу:

— Эй зен, э жун гъоврехуней бибейтуь, мере е гІовуниш нисди



не э пушой худо, не э пушой бенде. Ме гьемише жофо кеширем, нунмере э хьэлолпиревоз хурде, дуьзди, дургуни несохдем, э песой зенгьой кес негешдем, хэлггэ нефурмендем, глэзизе бирортуьре хуно. Инн у и ченд салгьо эдее э гушд туку кор сохде. Гьемише у пушд кечнире э жигей гушд гусбенди фурухде, сенмуьн сорте э жигей екимуьн сорт фурухде, хэлггэ фурмунде, гьэзенже э куьф хуьше доноре. Песде эз сер тирозуш зерени, эз кун тирозуш. Гловункор гьисдиге э пушой худо нен бенде еки уни. Ве дувимуьнжи, — мугу Шими, эз лой бугъ ведироморенбугъо гьжгьуй гьингьэр чум невегирде, — эри Гловунгьой инсонгьо хуруз чуь тэхсиркори ене-угбе керг? Гьелбет, эгенер хурузе терекиге нифри-нэглети сохде, бугъоз юре бурра, куьше уре э хотур энур кор, ки у глэйби-глори нисе дануьсде, лап уьткем, текебур, келегеди, довглокори, песде уре е зен нэгл, е ченд зени, у — бешгьэн. Оммо эз елойге денишире дириримге, падшогъ Шелмуь гьемилихэ, нум ю э ники гирде биёво, хьофсад зен сесад ошне бири. Е доне хуруз унггэде зенгьоре гьич э хов хуьшдеш недери...

Шимире воисденбу гую е ченд гофигеш эри хуьшдере расд ведировунде э пушой зен хуьше, эри нерафде э базар, оммо зен Шимире лап гьэьэр омо эзижире гофгьой энур: эз ело хуьрдигьой бирор юре гуфдирен, эз елойге э диндоглот пуьнжо, лоигъ нисдигьо гофгьоре гуфдирен. У е хьэрой, шивен дешенд э хуне, Шими эз терс гье у сэглэт лэглэй хуьшдере гуьрд. Э хуне женг, гьолмогьол небу гуфдире, Шими зурн-зурн гьэрзинкере вегирде, видов-видов рафд э базар. Восдоре е кергиш, е хурузиш эри недово, Шими тереглэди вогошд э хуне.

Гьетте э хуне оmore, Шими эз гьэрзинке э жигей хуруз вегирд керге, чор зани зере, нуьшд э минжи хуне, сер гирд уре эри черх доре э сер хуьше «зи хьэлипоти... хунде-хунде». Зен Шими диренге ки шуьвер ю э жигей хуруз эдее э сер хуьше керге черх доре, гье усэглэт омо гирд дес энуре.

— Эй мерд, — келе-келе хьэрой сохде, мугу зен эз Шими, — туь эдее э дин-месэб иму лоигъ нисдигьо бидэглэтин коре сохде: э жигей туь э сертуь хурузе черх доро, туь эдее керге черх доре? Туь гьерчуьш гьисди, мерди эхи, ализе зен нисдики?!..

Шими диеш сэхд гуьрде эз пойгьой керг, э хуьршевоз денишире э зен хуьше, хьэрой сохде э сер энур, мугу:

— Эй зен, туь жун бебе-дедейтуь деске эз серме! Эгенер ме, ализе серме, мерд мибисдорумге, эз сес-божэхьтуь терсире, хэсде, вомунде, э и гисне шуьггэмевоз э базар нивидовусдум эри хуруз весдоре, и нисдигьо Гловунгьоймере «кепоре» сохде!..

## ДУЪЛ

Е гиле зен Шими Дербенди эдембу э базар рафде эри гушд восдоре. Пушой эз хуне ведерафде у эз мерд хуыште пуьрсн: чуй гушд восдонуге — эн гови небуге эн гусбенди?

— Эриме дуъл восдо, — мугу Шими когыне бурра одомире хуно. — Гъэйгъу нисди е эн гови енебуге эн гусбенди, гъэрез дуъл бугу.

Зен Шими омбар мэхьтел мунд, чуйнки песини вэхдгьо у сер ебо э базар рафде, Шими гьемише э у гъэдэгъэ зеренбу у дуъл восдону биёру гуфдире.

— Эй мерд, — мугу эзу зен, — туй эзи гушд дуьлире хурде визор неомерей бегем? Туьре э гушд дуьли ингъэде темэхъ эйчуьни эхи?

— Темэхълугъ инжо кор нисди, — мугу Шими э зен хуыште эзи ёзутгъгоре хуно. — Туь э гъэд эни ченд-ченд салгьо эз ме туьре хосде эйло э гофгьо, гъуд-гъудигъойтуьревоз ингъэде дуьлмере хурдей, хъэл сохдей, э ме дие дуъл недемунди. Ме у гушд дуьлире эжигей де гушдиге хурденуьм екем семе дуьлмере гируьм, э хуыште биёрум, э сер эни гъиллогъойме гъонм мунум гуфдире.

## СЕ ХОСИЕТ ЭН ШОРОБ

Е руз э ки Шими Дербенди вэхидш омо е куьгъне шинох энудердгъой хуышдере эри гуфдире эри энуд.

— Эй Шими, мере гъэйбиш оморени эри гуфдире, оммо не гуфдиреш дуьлме эдее пара бире, — мугу шинох энуд, — мере се куки, оммо гьерсей энугъо э е кечеле, хъёменде, эгъуьлменде духдер ниверзуь. Ижире догъ э ме вери.

Шими мэхьтел мунд, гофгъой эн шинох хуышдере шиновусдики.

— Чуьни, дуьргердо, гъечи туй э товун кукгъойтуь гуфдирени? — пуьрсн эзу Шими.

Келе мерд сер хуышдере гъуз гирд, песде е лугъонде ох вокошире, мугу:

— Кукгъоймере ичку нисе берде, оммо эз ичку дес нисе вегирденуьт. Ини вегируьм ебо чуйклеи кукмере. У эз деде пелтеки, демунде-демунде гоф сохде. Э ишори у э кесевоз гоф омбар нисе сохде, эз пелтеки хуыште гъэйб омореле юре. Оммо гьетте ичку хурде, шороб э мазалей ю расире, уре эз лэгълэгъи, гоф омбар сохде поюнде нисе бире, э межлуьс, э нуыште жиге кесе лэгъэ вокурде нисе гъишде, гьемере эз хуыште визор овурде. Дуьимуьн кукме е сара, лэгъэре, жонсуьзе одомини. У э гъэилгъо омбаре нечогъигъо кешири. Эз хосиет лап динжи, саламети. Гъич э кесевоз уре кор нисди. Мужинереш эз хуыште инжиммиш сохденигъо одоми нисди.

Неки кес, гъирогъдеки, зен юш эз у нисе терсире, ижире гIожизе, динже жуки. Оммо туь биё виниш уре у пиён-серхуш гъисдики, гъо-гъо! Гуйге уре берди, екигере оворде э жигей эню. Хьозури э гьемеревоз эри женг-довгIо сохде. Е гиле у пиён биренге рафдебу э сер эн е пегъливон э уревовоз эри женг гирде. Оммо гьемей жендек ю, гуюм э туь, чен е гъул эню пегъливон нисди. Негъогъ нисе пуфдире: «Хэрөгүш шороб хурди, рафде э асланевоз эри женг гирде».

Имогъой, жон Шими, э товун келеи кукме гуюм эритуь. У гъечи е темизкоре, селигъэлуье одомини. Оммо гьетте пиён бире эгъуьл хуьшдере вир сохдени. Гье э у нуьшде-хурде жиге офдоре, суьсде хуно бирени, иловлей хуьшдере пури-билесумол сохдени, хуге хуно... Эз хижолети, биёбури э пушой хэлгъ эдее руьгъэре хуно хьэл биренуьм, муьрденуьм. Э кукгъой кес дениширенуьм шори сохденуьм, эн хуьшде дениширенуьм — пешму биренуьм. Гъич нисе дануьсденуьм чуь чоре сохумге эри эни феремезе кукгъойме.

Шими эри хуьшде вераси, ки шинох эню эри меслэхъэт, весиет хосде омори э ки эню. У е кем э хуьшде, демунде, пуьрси эз желе мерд:

— Гу гъери э ме: гьерки энугъо ченгъэдер шороб хурде э межлуьс нуьшдеки?

— Гуюм э туь расдире, — жуьгъоб до келе мерд, — чуьклей кукмере пелтеке унгъэде э шоробовоз гIэрей ю нисди. У е чуькле кузе зийдте шороб нисе хурде. Дуьимуьн кукме, комики пиён бире э сер пегъливон эри женг сохде рафдебугъо, эз дуь кузе кемте шороб нисе хурде. Сеимуьн хурдени те пурдали бире, э хори офдоре.

Шими эз зир лов суьпле хэнде сохде, мугу:

— Имогъойле ме дануьсдуьм кукгъойтуь э шороб хурдеки гъечи эйчуь биренуьтге. Э товун эни кор эритуь е ихдилот сохум... Ние дануьсденуьм расдиге-дургуниге, пуфдиренуьт эн суьфде эз одомигъо э руй хори зигъисдегоргъо Нувэхъ-овину бу тегъенг онгурри кошдогор. Тегъенг хуб веров, бегьер дуь гуфдире, ме шиновусдем, у егиле э биней тегъенг хун эн буьлдуьрчине декирди, дуьимуьн гиле — хун эн аслане, сеимуьн гиле — хун эн хуг вишеире. Эзумогъойлеревоз ки е кузе шороб хурдениге, зугъун эню эн буьлбуьле хуно очмиш бире, уре омбар тоф сохде лап хьэз омор. Ки дуь кузе шороб хурдениге — у аслане хуно уьткем, хуьршлу бире, ки се кузе ве зийдте шороб хурдениге у хуге хуно эз хуьрмет-обур ведерафде, эри эню сер суфреш екини, гъэд эн луьхъмеш... Унегуьре гьер шороб хурдегор биё дануь э товун эни се хосиет эню, шоробе хуру э гъэдер ю эри песде ухшеш незере не э лошунлуье буьлбуьл, не э хуьршлуье аслан, не э бинодуре хуг...

## ГЪЕР Э ТУЗ ГЮРДЕОВОЗ БИЛЕСУМОЛ БИРЕГОР ЕСИЕВЧИ НИСДИ

Е гиле е дусд эн Шими, э дигь зигьисденбугьо, уре э гЛэруьси эн кук хуьшде огол зеребу. Шими эри дес тигьи нерафдеи е хубе тозе килэхь бухорей, гьугь ю гьирмизине берхит кешире, восдоребу бэхш эри домор. У э дигь рафденге э гЛэруьси, кук хуьшдереш вегирдебу э хуьшдеревоз.

Шими килэхьэ, эри домор весдоригьоре, э зир гьултугь доноре, суьфделе э дигь дироморебу, е жогьиле кук, е мердимазар, чум ю э Шими эри домор восдоригьо килэхь демунде, эз пэхьники куьнд оморэ эз Шими, эз зир гьултугь эню килэхьэ ведешенде, вирухунд берд чопгьуне хуно. Шими не кук ю видовусдуьт э песой дуьзд. Килэхьэ вирухундебугьо кук видовусд те гьирогь дигь, дерафд э гьэд есийв. Килэхьэ э донлугь есийв пэхьни сохде, хуьшдере эз сер те ве пой э туз эн гЛордевоз билесумол сохде, юре э песой ю видовусдегоргьо нешинохут гуьфдире, ведиромо эз еснев. Оммо Шими гье усэглэт шинохд уре, сэхд гирд эз ехэн эню, мугу, гьелебуле доре:

— Е килххэ ди, енебуге гье инжиге ме жунтуьре медешенуьм!

Шими и гофгьоре э гуьфдиреки, э е зарбевоз е-дуь муьшд вено э гьэбуьргьэй эн дуьзд. У сер гирд э вогьнеки эри гирисде, хьэрой сохде. Гье и туьтем Шими дуьзде э куьфдеки, гьелебуле дореки, кук эню куьнд бире, гирд дес бебешуре, мугу:

— Э бебе, туь чуь сохде?! Туь нисе дире беге, и геде килэхьэ вирихундигьо одоми нисди, есийвчини, парталгьой эню гьеме гЛордини.

Кук Шими дес бебешуре э гирдеки, дуьзд ведешенд хуьшдере эз дес эн Шими, зур-зур-вирихд, сур бисдо эз пушой чум. Шими диренге и коре, эз мунде жигеш гЛоси, хуьршлуь бире, хьэлово бисдо э кук хуьшде, сер гирд эри куьфде уре, гуьфдире:

— Эй хэр-химбил, э беберевоз муьрде, туь беге нисе дануьсде: гьер э гьурумевоз чуьлки бирегор демирчи нисди, гьер э туз гЛордевоз билесумол бирегор, и килэхь имуре дуьздирогоре хуне, есийвчи нисдигьоре?!

## ЧУЬТАМ ШИМИРЕ ФУРМУНДЕ Э ЖИГЕЙ ГУСБЕНД Э У СЕГЕ ФУРУХДЕБУГЕ

Е гиле э суьфдеи руз эн апрель Шими Дербенди омо э базар эри е гусбенд восдоре. Гьемин гье и вэхди е жогьиле нешинохэ кук, дануьсде, ки Шими эри гусбенд восдоре омори, у е келе пура туморере эз хорн кешире-кешире, гирд пушой энуре, э иловле чуьмечару сохде-сохде, мугу:

— Эй лелей Шими, эгенер туь э шори-никиревоз э базар эри гусбенд восдоре омореиге, мере гьсиди гусбенд фурухдени, ини э туморейме дери. Оммо ме тумореймере вокурде, гусбенде э туь бирмунде нидануьм, чуьнки и гусбенде ме эз бебейму пэхьники э туморе доноре эз порогъ иму ведировундем эри фурухде. У имогь эдее э песойме гешде, мере эри офде.

Шимире нисе воисденбу те ю ебо хуб э чум хуьшдеревоз невинуь гусбенде, дес незенуь, эри восдоре, песеде уш дуьздире гусбенде. Оммо денишире диренки, кук эри гусбенд хуьше келе пул нисе хосде, эдее э ужужи фурухде, Шими темэхь сохде, рази бисдо. Оммо те ебо пул энуре доре, Шими, сер туморере невокурдеки, эз руй туморе десе-дес сохд гусбенде э гьэд туморе. Гьечи эз нишун гусбенд келе бу, жендеклуь, пешмлуь бу. Унегуьре Шими е гофе дуь гоф несохде, пул гусбенде до э кук, песеде туморере э гусбенде-воз э кул хуьше веноре, сер гирд эри фураморе эз базар э лой хуне.

Шими эз базар хэйли рэхь гиросхебу, кейки гусбенд э гьэд туморе сер гирд эри битоби сохде, гьуьр зере, кумбологьово жуьмуьсде-чаруьсде. Песеде е дуь минутиш негиросхд, «гусбенд» гье эз гьэд туморе- е сэхде г'энж векенде эз кемер Шими, э гужевоз сер хуьшдере эз туморе ведешенд, келе-кело хьов-хьов сохде-сохде, гье минжи куче, э пушой эн филонгьэдер одоми, вено пушой пойгьой хуьшдере э душ Шими, шенд хуьшдере э хори, гье гьечу хьов-хьов сохде-сохде вирихд зверо. Шими диренге, ки жогьиле кук юре фурмунди, хэр сохди, э жигей гусбенд э ю.сеге фурухди, омбар дуьлхурд бисдо, гьэгьр кеши. Эз елойге ю эдембу келе г'эйб кешире, гьечи э пушой хэлгь биеьбур, руьхшенди бисдо гуфдире.

Шимире гьейсэг'эт гьечи диросгоргьо, иллогьки жем-жогьил, кура бисдорут э иловлей Шими, сер гирдуьт эри пуьрсире: эйчуь у сеге э туморе доноре пэхьни сохде эз базар э хуне берденбуге. Шими эри энугьо ихдилот сохд э сер ю оморигьо коре, чуьтам е угьреш-мердимазар сер энуре пучунде, э жигей гусбенд э у сеге фурухдиге. Э томошей эни кор кура бире одомигьо сер гирдуьт гьерки эри е гоф гуфдире э Шими:

— Эй лелей Шими, чуьтам ишму, э сипре руш, эгьуьл ишму-ревоз, э е лути-пути бовор сохде, «гусбенде» э туморе дерики восдорейт?

— И коре гьечи гьишде мегьилит. Имбуруз у хьэремзеде-не-лоигь туьре фирмунди, себэхь у гьечи сер екигере мипучуну.

— Эгенер туь гьечи и коре гьишдиге, екиш эз туь «согьбоши» нигую!..

Оммо, екиш эзи кура бирегоре одомигьо нисе гуфдиренбу э келе мерд Шими: бие иму кумеки сохим э туь, гешдим офим и туьре фурмундигьо одомире, межбур сохим уре пултуьре э туь вогордуну. Угьо энжэгь серкуш, дэг'но зере, весиет норенбируьт эри Ши-

ми. Шими пешму бисдо э угъо эри гуфдиреи сур эни коре. У нисе дануьсденбу чуй жуьгъоб дуьге и э иловлей энун кура бирогоре одомигьоре, дес кенуь буравт гуфдире эз ю. Шими э ижире фикир-хэёл дерики, е лап жовоне кук хэнде-хэнде мугу:

— Дануьсдени чуьнге, лелей Шими. У кук зарифат, мхэсере сохди. Имбуруз суьфден руз апрели, дуь екире фурмунде, зарифат сохденигьо рузи. Имогьой э имуш кими одомигьо э и руз дуь екире фирмунденуьт. Руз екимуьн апрели гуфдире, у кук э туьревоз зарифат сохди, туьре фурмунди. Дуьлхуьрд, гъэгьри мебош. Эриме оморенигьо у ю хуьшдению песде мигешдуь миофу туьре, пултуьре могордуну, эз туь бэхшлемиши михогьу.

Шими хуьшдере э вогънеки э бовор сохден вено э гофгьой эни жовоне кук. Э ён ю кура бире одомигьо эз ю дес кенуь буравт гуфдире, мугу эзугьо:

— И жовон, ведини, эдее расдире гуфдире. Эгенер и кор э хотур эн зарифат екимуьн апрель нибисдоге, ме гьич и гъэгьре — э жигей гусбенд э ме сег фурухдеире э у нидегьишдуьм, э жун сер ишму, гье ишму луфдирере хуно мисохдуьм эри э ме, э келе мерд, ижире луб овурдеи!..

### ХУРУЗ Э ЖИГЕЙ СЭГІЭТ...

Пушой э богъгьей колхоз онгур чире, Шими эри себэхь зу-сери эз хов хэбер бире, э кор рафде, восдо е сэгІэт э зингилеровоз. СэгІэт е оринеш кор несохд, хэреб бисдо. Эри хэреб биреи энун Шими унгъаде дуьллесо небисдо, чуьнки уре э сэгІэтовоз эеки э магазин гарантийни когъоз дореду, егІни э гъэд эн е сал эгенер сІэгІэт хэреб бисдоге э гьовои э мастерской гъуьч сохде миёв.

Шими берд сэгІэте э мастерской э сэгІэтчигьо до. СэгІэте гъуьч сохде эз мастерской овурде бэгъдо, е дегь рузиш негирошд, сэгІэт гене сер гирд эри «шулухи» сохде: у гогь лап пушо рафдембу, туьнде гІэсбе хуно, шев-нимешев зингиле зере, эз ширине хов хэбер сохде Шимире, гогь лап пес мунденбу, э жигей лап себэхьмунде зингиле зере, е сер пишнен зеренбу.

Шими нифри-офри сохде заводеш, гарантийни когъоз энуреш, хьиллее сэгІэтчигьореш, е руз эз хуне пул вегирде, рафд тозе сэгІэт эри восдоре.

Гьечи е кем вэхд гІэре доре, Шими вогошд э хуне, е келе гьирмизине гІуьре хуруз э зир гьултугь гирде. Зен Шими диренге хурузе э дес энун, омбар мэхьтел мунд.

— Эй мерд, эй муьгІуьжуьз дире мундем эз дестуь, — мугу у, — туь тезе сэгІэт э зингилеровоз эри восдоре рафдебири, оммо э жигей сэгІэт туь хуруз восдоре овурдей?

Шими кекуьл хурузе тимор сохде, мугу эз зен хуьшде:

— Эй зен, э жун бебейтуь, эгенер туьре дануьсде воисдениге,

эзи заводгьойму ведешенденуьтгьо сэгIэтгьо э зингилеревоз, хуруз гьозор гиле хуби.

— Эй мерд, туь чешмиш бирей, хуруз эже, сэгIэт эже?

— Эй зен, — мугу Шими, — хуруз ужире сэгIэти: у не гьич хэреб бире, не уре гарантийни когъоз гереки уре э ки хьиллее, ильетие сэгIэчигьойму берде эри «гъуьч» сохде. Уре иму, пойгьойюре бсезде, шев миним э зверсер бонлейму. Увэхди туь хуьшденитуй мивини, чуьтам у лап дуз э вэхд ю гьич егIэлмиш небире суьфде нимешев, пезде нимешев гиросденге, сеимуйн гиле пуишой себэхь у гIуьгIуь зерениге. Унегуьре эзи «сэгIэт» дуьлме лап олхотьини...

## СУЬРХИНЕ ХОЕГЬО НИСДИГЕОШ, ГIЭЛЕТЕ ХОЕГЬОЮТ...

Э дуьимуьн руз апрель 1991 сал, хуькуьмет иму гьиметгьой чигьоре геебо лап звер сохдебугьо, келе е мерд Шими Дербенди евош-евош эдембу э богъчей шегьер рафде, унжо э келе медрдгьо— хьовиргьо-хьэрмэхьгьой хуьшдеревоз эри нуьшде, гоф-ихдилот сохде.

Шими унжо э рафдеки э рэхь эню омо еки эз куьгьне шинохгьой эню вохурд. Уш келе мерд бу, эз гушгьо кар бу. Рушгьой ю рушлегьой эн кечире хуно бу. Песой кемер эню е кем бируне ведиромореву, эз зуревоз вор гирде назуке пойгьой эню е кем гъэд, шэфд бируьт. У сере, э фикир демунде одомире хуно гъуз гирде, энгуьл-энгуьле десдечу э дес дери, эдембу евош-евош оmore. Э чепи дес келе мерд е чуькле зембилле дебу. Э гъэд зембил хэйли тозе хоегьо дебу.

Сер ебо Шими и келе мерде дире уре эз ело хэнде гирденбу, эз елойге э у езугъбери оморенбу. Эзи е ченд сал пушо зен эни келе мерд муьрдебу, э комиревоз ю пенжогъ сал зиёд хуне гирдебу, зигьисдебу. Оммо келе мерде омбар бие, тэхьно мунде невоисд. Се мегьиш негирошд эз зен эню муьрде эйло, у эри хуьшде тозе зен хосд овурд. У хосдебугьо зен эзу дуь гиле жогьилте бу. У эри хуьшде фикир сохдебу: хосде бэгъдо хуби келе зене нэгI, жогьилте зене хосде. Пезде и кечие рушлегьо вебугьо келе мерд эз хосиет гIэиле хуно бу, э гьер гоф, эгъуьл буррание гофиш нисдиге, ю бовор сохденбу. Унегуьре Шими не хьэрмэхьгьою кимвэгIдо эри хэндешу уре, чуьтам гүфдирениге, «вежегьунденбируьт» э гофгьошуревоз.

Шими эзу куьнд оморенки, руз эхэйрбу доре уре, лап келе-келе мугу э гуш эню:

— Эдее диренуьм, туь э шори-никиревоз эдее э хуне хоегьо берде. Э жогьиле зентуь гу, эри шохьенгуми хоегушд соху, ме миём ө гьуногьлугьи э хунешму.

Шинох эн Шими, гье усэглэт сере э жуьрглэтиревоз жумунде, э е келе сесевоз, гуйге у эдембу эз сер догъ гоф сохде, мугу:

— Гьурбу гердом гьуногъэш, гьуногъэ офиригьо худореш! Биэ э сер чумгьойме. — Песде у екем э хуьшде домундере хуно, мугу: — Хосденуьм эз туь, дусдме туь мере шек, ежирейге меверас, ме эри е кориге эдее гуфдиренуьм. Эни е мегъ пушо ме и хоегьоре өз магазин дегъ доноре э е монст восдоребируьм. Оммо гьейсэглэт гье эзи магазин эри гьер дегъ хое севойне зиёд вегирди. И лап бугьои. Гьечиш бегем кор бирени?! Суьрхине хоегьоои бегем и, эгьубеттуь э хэйр?!.. — э бирази, глосииревоз гуфди келе мерд.

Шими ю хуьшдению омбар мэхьтел мунд и гофе шиновусдки. Оммо Шими и дес лунгъэде эри зарифат, хэндуьсде нэгл э овоми энү, ченгъэдер уре эри дуьл доре, дуьл юре веровунде, э вогьнеки мугу эзу:

— Туь дузи, дусдме, туь восдорейгьо хоегьо суьрхи нисди, оммо не лугьо пушотейне хоегьоре хунош нисдуьт. Ме шиновусдем, имогьоине вирагьо-керггьой эн советиму оворденуьтгьо хоегьо бешгъэуьт, глэлеметлуьнуьт.

— Чув глэлемет дери беге э тозе хоегьой эн керггьойму? — э мэхьтели домунде, пурси шинох эн Шими, — Хое-хоеи дие.

Шиими екем э хуьшде домунд, песде суьпле хэнде сохде, мугу:

— Эдете гуфдиренуьт, и тозе хоегьоре хурденге, чув имуни келе мердгьоре эшгъ, хъвес эн мерди вероморе эн жогьилгьоре хуно, эн хуьшдени жогьилгьо эшгъ ишу деш зиёд бире. Имогьой вара-сири?..

Шими э дуьл хуьшде фикир сохдере хуно, и гофгьоре э гуфди-реки, келе мерд эз расдиш гье усэглэт бовор сохд. У сере жумунде, шори-шори хэндуьсд.

— Гьо-о-о! Гьечунигу дие! — хэндуьсде-хэндуьсде, мугу у. — Гьечу, туь шиновусдере хуно гьисдиге, ме разинуьм э и кор. — Келе мерд е дэгъдэгъэ гоф хуьшдере поюнд эри чуйиге думит еохдере хуно, песде э бовориниревоз э сифет Шими денишире, мугу: — Эриме оморенигьо, Шими, президент вилеет Горбачев не депутатгьой Верховный Совет, э хьисобовоз, глэлемети эни хоегьоре синемииш сохдет э хуьшде э зенгьобшуревоз, дануьсдет. Небуге эхи лап гьечи гьимет эни хоегьоре гье е бирден се войне-чор войне звер нисохдуьт. Эхи пенсией эн келе мердгьо лап чуьклен, муьзд жофой эн омбаре одомигьой вилеетиш кеми. Угьоре беге чум невери, дуьл недери, э сер ишу бегем эгьуьл невери и коре эри е негьогъи эри вегирде сохде?

Келе мерд гене сере жумунд, шори сохде-сохде, песде бирден лэгъэре, гьуьж дироморе сифет энү фикирлуь, гьяежонлуь, могьбул бирере хуно бисдо. У э Шими денишире, мугу:

— Эй Шими, бирден белки и гофгьо э товун глэлемети эни тозе хоегьо дуз нисди, дургуни, нэгъуьли, песде чуьтам?



Шими гүзет несохдебу и овоме, э гьер жире гоф-хэбер бовор сохденигъо шинох энү ижире пуърсуьш мидуь гуфдире уре. Ижире пуърсуьше Шими шиновусдки, лап э хуьшде демунд, гьебо неда-нуьсд чүь жугъоб дуьге уре. Песде Шими, песой сер хуьшдере хорусде-хорусде, дир-дир, келе-келе мугу э гуш энү:

— Э-э-э! Бигьил э гьибеттуь э хэйр! Туь пуш-пушоки дуьлпесо эричүь бире эри эни кор?! Биё е гиле иму э кумеки худоревоз хурим имбуруз шохьонгум ме э туь заказ дорумгъо хоегуьшде, песде миданим: расдуьтге и гофгъо э товун г'элементлуьи эни тозе хоегъо, небуге негъуьлиге, хэбернге...

## СИНЕМИШИ

Е гиле зен Шими Дербенди эз некуми нечогъ бире, э хьэлов дегешдегешдебу. Э у келе г'этош вебу. Шими диренге зен ю нечогъ бири, э у хьол невери, омбар дуьлпесо (бисдо, мугу:

— Эй зен, туьре чүь (бисдо гьебо? Ди туь хуб-хос бири, пелпелуиьре хуно эдембири вежегьисде, кор-бор хуне, хьэёте сохде?

Зен Шими ох, ноле зере-зере, мугу:

— Валлагъ, меш нисе дануьсденуьм чүь бисдоге мере гьебо. Э ме хьол невери, эдее муьрдenuьм.

Шими дуьл доре зен хуьшдере, мугу эзу:

— Эй зен, гьемей эни нечогъ бирегоргъо, э хьэлов дегешдегоргъо, худо меёро, мимуьрдге, э г'уьлом одомиш нимунд. Согьире сейрониш бирени. Худоре шуькуьр, согъ мибоши, мэхизи. Вэхиз е лэг'э чи ху, дуьлтуь э жиге биёв, енебуге гу дуьлтуь чүь хосдениге восдонум биёрум эритуь.

— Дуьлме гьейсэг'эт гьичиш нисе кешире, — э гьолоке сесевоз мугу зен. — Миданиге, (бура э базар е гьэрпуз весдо биёр, белки эз г'ов энү гьэрпуз г'этош дуьлме е кем серин (бисдо.

Шими гье усэг'эт вэхисд эз жигей хуьшде, мугу:

— Эритуь гьэрпуз неки, эз кун дерьёгъ жевгьер миведешенуьм, токи туь э пой вэхизи.

Шими и гофгьоре гуфдире э зен хуьшде, зур-зури ведерафд эз хуне, рафд э базар. Е сэг'эт тирошде бэгъдо, Шими дуь гьэрпузе э зир дуь гьултугъ хуьшде доноре, вогошд э хуне. Э ён домой дер эн хуне оморе расиренки, Шими э дуьл, фикир ю е гоф оморере хуно, поисзд э пушой дер хуне, э хуьшде демунде.

— Э метелегъо гуфдирени, — сер гирд Шими эри думит сохде эри хуьшде, — «Дуь мугьбете э е дуьл, дуь гьэрбузе э е дес гирде нибу». Гьелбет, дуь муьгьбет э е дуьл мидоруге небуге нидоруге эриме гьейсэг'эт э и келемерде вэхдме четини эри синемиш сохде не лоигъиш нисди. Оммо дуь гьэрпузе э е дес гирде мибуге небуге нибуге, ме гьейсэг'эт эриме синемиш мисохум».

Шими сер гирдки эри синемниш сохде и коре, гьердуй гъэрпуз эз сер дес энү офдо э хори лов-тум бисдо, э хок-тузевоз билесумол бисдо. Шими сергъуз, гъэрпуз э дес недери диромо э хуне. Зен энү диренге, ки Шими эз базар вогошди, оммо э дес ю гъэрпуз недери, уыгъ зере-зере, мугу эзу:

— Эй мерд, эжи туь овордейгъо гъэрпуз?

Шими ихдилот сохд эри зен хуьшде, чуьтам гъэрпузгъо эз дес энү офдоре хуьрд биринге э хъэет э пушой дер хуно у э синемниш сохдеки: дуь гъэрпузе э е дес гирде мибуге небуге нибуге. Зен Шими шиневусде и гофгъой шуьвер хуьшдере, э тэхьлиревоз гирисде-гирисде, мугу эзу:

— Эй мерд, хэгьбергъойтуь дердежер (бире миро мере хуно эз дестуь! Келе мерд бирей, руш сипи сохдей, теимогъоиш гье гьечу жогъиле вэгъдогъойтуьре хуно сук, делхэк, уюнчи мундей рафде? Кей одоми мибоши туь?

Шимире эз гофгъо-серкушигъой зен хуьшде хъэз неомо. Уш э зен хуьшде гъэгъри сохде, мугу:

— Бошгу, ме туь гуфдирере хуно сукум, делхэкуьм, уюнчинуьм, оммо туьш е чи нисди, е нэхъсе-тэхъсе одомни. Туь гуом нечоьгъ бирей-бирей, гье и э дуьлме ижире томошее фикир оморигъо вэгъдо туь эри эни глов гъэрпуз хъэсорот-темеруз эричуь бирей?!..

## ОВИЛИ НЕБУГЕ ГІЕРУЬСНИИ?

### Когъоз Шими Дербенди эриме

«Шолум-дугло эз ме эритуь, хэлефме!

И когъозе эдее нуьвуьсде эритуь кугъне дусд, шинохтуь — Шими Дербенди. Туь, хэлефме, э нуьвуьсде ихдилотгъо-хэбергъойтуь э товун ме, мере фендлуь, гъэмелдане, эгъуьлтиже одоми гуфдиренигеш, бирмунденигеш, чуьтам туь дануьсдениге, кимвэгъдо э серме ижире гъозие-гъэдергъо, гьигулигъо оморени, не фендлуьиме, не гъэмелданеме, не эгъуьяме чоре сохде нисе дануьсде эриме эз ижире синемнишигъо эри хилос бире, ведироморе согъ-саламет. Эгъуьлме, гъэмелданеме эз эгъуьл, гъэмелдани эн чуькле гъэилле зиьдте нисди. Э серме кимвэгъдо ижире коргъо оморени, чуьтам гуфдиреге э метелегъо: «Гьерчуь дануьсдуьм э желе гирдем, оммо диренуьм хуьшдениме э желе офдорем».

Мере воисдени э и когъозме нуьвуьсуьм и пушогоь чуь беде кор омориге э серме. Гъэйбиш оморени мере эри нуьвуьсде, оммо не нуьвуьсдеш эритуь тоб доре нисе дануьсденуьм. Гуьом эз чуь товуне.

Ме дануьсденуьм (эй серкуши нисе гуфдиренуьм, эри хуби эдее

гүфдиренуым), хэбер эн е сарб овурденмеш (шоре хэбергьо дараво э тушгьойтуь э хосдогоргьойтуьревоз) гье у сэгIэт расирени э туь. Унегуьре, эриме оморенигьо э товун эни биёбуре гьозие и пушогьо э серме омориго: чуйтам ме э овил хуне (дуразруй хунегьошму) эз эрэгъи серме екем чешмиш бире, севгилие мэгIнигьо хундемге, рушмере эри эни кор кешириге — э туь хэбер нерасире нибу. Оммо, э туь расдире: мере нисе воисденбу туь эри эни кор э гозитгьо, книггьо нуьвуьси. Нисе воисде мере э пире вэхдме э пушой эн хундегоргьойту (худой офирегор сэхьиб гIуьлом жунсогьи до гьемей энугьоре) руьхшенди ведиром, эз хьуьрмет энугьо офдонум. Эри номуслуье одомш, туь дануьсдени, миругьо хубтеи эз хьуьрмет хэлгь офдоренжон.

Чуйтам и кор э серме омориге, эз ме хубте эритуь, гьелбет, екиш ихдилот нисоху. Имогьой гуш вени.

Эзи е ченд руз пушо ме э овил эн куьгъне хьэрмэхьме рафдебируьм (нум ю э ники гирде биёво). Э у жогьиле вэгIдогьойму ме не у э боггьо не э ветэггьгьой эн гIоширгьой Дербенд фэхьлеи сохденбирим, песде гьердуьйму хэйли салгьо те э пенсия рафде э е колхоз кор сохдейм.

Ме э сер суфрой овили е жем дир оморум. Ме оморебируьмгьо вэгIдо гьеме нуьшдебируьт э сер суфре, эжеки бул-булинде, эз туь нэхуш, нухоруш, лезетлуье чигьо, закускагьо ве ичкугьо вебу. Гьуноггьо хуьшдере е кем ён доре, эримеш жиге сохдуьт э ён суфре. Угьо гьеме, хуш-хьэлол ишу эдембируьт э е ишдогьовоз хурде, гьенжире эрэгъи, каньяк, е рач ихдилотгьо сохде э екиревоз.

Э бэхдме э ёнме нуьшдебуггьо одоми е небуд, е пиёниске, е лэгъ-лэгъ бу, эхирки хэре одоми бу. Ме инжо э ки энугь нуьшдеки диеш хубте дануьсдуьм, верасируьм гьэгъи эн метелеймуре: «Э эгъуьлмендевоз эри сенгъ бурраш бура, оммо э хэревоз эри гIош руьгъэни хурдеш мера». У гьэреулчи кор. сохде э завод шороби. Гьетте ме э сер суфре нуьшде, у е пура пейлей эрэгъире но э пушойме, эз пиёни пелтек бире зугьун хуьшдеревоз (хуьшг миёсд бире зугьун энугь), мугу эз ме:

— Эй лелей Шими, эри туь э сер суфре дир омореи, туьре «иштороф» сохде гереки. Эгенер туь хьуьрмет эн муьрдере (э жигей хуьшде динж гердо) гирдените, туь и пейлере те бине биё вешени.

Ижире гофгьой энуре ме шиновусдуьмки, хьуьршме верома, воисд мере лэгIэй энуре зенуьм: «штрафной» эри хурде бега инжо шоре межлуьси енебуге гIэруьсихуней? Эз елойге, тэхсири эн дир омореи э сер суфрей эн овили э ме невебу. Пушой ме инжо оморе, зенме мугу: дуьшии кечиму эз говду, хьэёт вир бири, бура гешд офуре. Туь дануьсдени зенмере: э сер гоф энугь гоф овурде нисе бире, одоми лов бисдогеш. Хьэлово бисдо э ме, те ебо ме э овилжуне рафде кечи энуре офум биёрум гүфдире. Эгенер э жигей эн гIэзи-

зе кечи энү косибе хэрме вир мибисдоге, белки у гьечу дуьлпесон никеши эри энү, э ме хьэлово нибисдо.

Эхирки, сертуьре дорд недуьм, и пиёниске, лэгьлэгь э сер эн суфрей овили сер-гуш мере неберуь гуфдире, ме эз лэгIэйме е гоф неведировунде, фудорум те бине и зэхьримоне — пейлей эрэгьире. И э сер тие шуьгэм хурде пура пейлей эрэгьи гье усэгIэт зе э келлей серме вешенд, серме гиж бисдо, ме э хуьшде недерире хуно бисдорум. Гене ченд пейлейгеш эзу бэгьэй ме хурдемге — нисе дануьсденуьм, мере дне унгьэде эз хуьшде хэбер небу. Гье э ижире вэгIдойме омо э пушойме ведиромо... Туь э ме нихэнди, э пире дустдтуь?

Эри, гье э ижире лап серхуш бире вэхдме омо э пушойме ведиромо келе зен Сенем — суьфдеи соймшиме. У гьетте э лэгIэй дер веде бире мунде, чумгьойму э еки вохурде мунде, серме эз мунде жигеш гиж, гьэриш бисдо, э пушой чумгьойме гьеме дегиш бисдо. Ме фурмуш сохдуьм э и туьтем, ки иму имогьой гьердуьйму пире одомигьойм, муй сер иму эз зуревоз сипини, невегьойму вэхд гIэруьс, домор сохденини, иму хуьшдениму лап эзу вэхдгьоревоз кесим эри еки... Эри, е тофе бигьилуьм, е гофигере гуьм. Эриме оморенигьо, туь биё шинохи келе зен Сенеме. У лап хубе лезетлуье гIошгьо, хурекгьо сохде. Уре сэхьиб гIэруьсигьо гьемише э кейвони огол зеренуьт, имогьой — эри хурек овили сохдеш. Эриме оморенигьо, у духдерхолей эн зенхуьсуьртуь бире... Эри, туь мунош, хэлефме, гу э ме, зиндеиге зенхуьсуьртуь, несуге муьрдиге. Эгенер муьрдиге — монухьоту ковут, э жигей хуьшде динж гердо, эгенер зиндеиге, гу: келе мерд Шими эриу келе шолум-дугIо дори...

Эри, туь мунош, фурмуш сохдуьм, э товун эн чуь эдебируьм гуфдиреге... Гьо! Омо э ёрме. Гьетте ме Сенеме, суьфдеи муьгьбет-мере ме дире, эриме гьечи омо: ме э овилхуне нисдуьм, э гIэруьси эн муьрдигьо дусдменуьм (эжигей хуьшде рэхьмет гердо). Ме гуйге эзи лап куьгьне вэхдгьоймере хуно жогьилуьм, ~~ошугьум буьбуьл~~ васалире хуно. Гьовоймеш гьечи гьисди — ~~лап шор, энтигьэ, гуйге~~ ме инжо и зэхьримоне-эрэгьире нэгI, ~~гIов зуьм-зуьме хурдем~~ — пире одомире жогьил сохденигьо. Дие туь гьем жогьил-жовон гьемиге ошугь бире бэгьдо, э пушойтуь дуьл туь хосденигьо севгьилитуь бире бэгьдо, туьш песде (дуразруй хунегьойму нен ишму) э овил хуне нисди, э гIэруьси хуней, чуьтам мидануь и жогьил-жовон тоб доре?.. Меш дуь десмере, дуь гьэнет эн э гьово паруьсденигьо гьуше хуно лов сохде, э чумгьоревоз тимор сохде Сенеме, келе-келе, лап эз дуьлиме хундум мэгIни «Шир гьеширим» эн падшоьг Шелмуьре, комиреки, туь хундей, дануьсдени, эз зенгьо ве шороб лап хьэз омеренбу: «Моч ди мере эзу мочгьой лэгIэйтуь, ки хуби дусдитуь эз шороб... Дуьлмере туь э есир берди э е дениширемун чумгьойтуьревоз... Гужлуь сохит мере э шоробовоз, серин сохит мере э сибгьоревоз, чуьнки эдее гьолек биренуьм эз муьгьбет!...

Зурбои чуьн гуьмуьм, муьгьбет, гъэзоби чуьн гуьгьном, решк, тир-  
комугьой энү — титиркомугьой гIэтошини...»

Э ёр ме нисди, хэлефме, омбар хундумге ме и мэгIнире, небуге  
жем хундумге (эриме гьейсэгIэт гъеме э хов дирере хуно бу), оммо  
лап хуб э ёрмени, чуьтам ме э мэгIни хундеки, киниге э е хъэрое-  
воз, женевере хуно гъов кенд омо э серме, э сер дуь сугъразани  
поисде, э дуь десевоз сэхд гирд эз рушгьойме, сер гирд эри э зар-  
безов кешире.

— Гьн зугьунтуь хуьшг гердо, решогI, худо нэгIлет сохде!.. —  
хъэрой сохд у э гъемей хуне, рушгьоймере э зарбезов дартмиш сох-  
де, жилов эн (дуразруй бебе-дедейме) э лухьме демунде хэре  
хуно. — Инжо эритуь духон, ошхонеи беге туь ижире мэгIнигьо  
хундени?!

Эле, ме медан, и э ме хъэлово биригьо, рушмере кеширенигьо  
келе мерд шуьвер эн Сенем биребэбей! Гьелбет, севгилие мэгIни-  
гьо хундеи э сер суфрей эн овили, эгенер и мэгIнигьо эн хуьшдени  
Шелмуь-овину гьисдигеш, гIэйбекори, охмурини эри муьрде (ченд  
хокгьою гуьмуьр гердо мундегоргьоюре). Оммо, эриме оморени-  
гьо, у э серме хуьрш сохде омори, рушгьоймере эри ведешенде  
унгъэде эзу товуне вэгI. У ёгьин бедрешк сохди мере э кин эн пире  
зен хуьшде. Эз расдиш, чуьтам гуфдирениге э «Шир гьеширим»:  
«гъэзоби чуьн пуьгьном решк...»

Туь гьерчуь дануьсдени у э и коревоз хомуш бисдо? Эз же омор-  
ри! Э жунтуь, эдее гуфдиренуьм, у оmore-оморе диеш хуьршлуь  
бире, эдембу гьечи кешире рушгьоймере, мугум гьейсэгIэт жунме  
медерав. Бовор сох, э у жогьиле вэгIдогьойме мере полицмейстр  
эн Дербенд (у э жигей хуьшде динж мегердо) гьишденге сад доне  
шомпул зере эз бирэхьне кефелме эри э товун падшогь охмурие  
гоф гуфдирен (туь, ме дануьсде, э товун эни кор е гиле нуьвуьс-  
дебири), ме эз лэгIэйме е доне сес, ноле неведешендебируьм. Оммо  
гьейсэгIэт, мере гIэйб сохдигеш, эз ме е келе божэхь ведиромо, эз  
наргов э зир кордей гъэсобчи деригьоре хуно. Гене хуидо рази гер-  
до эз Сенем. Эгенер у э и туьтем э гIэрейму нидиромоге, э кумеки-  
ме ниомоге, корме четин бу, эхирме пэхуьр бу, дусдтуь мирафд эз  
гуьлом. Дие туь эри энү тозе ихдилотгьош нуьвуьсде нидануьсди.  
Енебуге у, делуь-дивоне эз бине мекенд рушгьоймере, мере кусе  
мисехд, э товун комики гуфдиренуьт: «Себэхьмунде э мейму во-  
хурде хуби, э кусе вохурдеижон».

Ини, чуь нуьвуьсде воисденбуге мере э товун и пушогьо э серме  
оморигьо гъозие.

Дануьсдени чуьиге, дусдме? Биригьо-бири. Нуьвуьс э товун эни  
э серме оморигьо гъозие, чуьтам ме эритуь ихдилот сохдемге. И их-  
дилоте хунугьо одомигьо, ме дануьсденуьм, михэндуьт э ме, чуьтам  
туь белки гьейсэгIэт хэндуьсдениге эз зир лов и когьозмере э хун-  
деки. Чуь биё сохде биёв имогьойле! Оммо гьер хундегор эни гьо-

эниере-ихдилоте, эриме оморенигъо, мерасуь, э сер мофдону, ки е ме тэхсир нисдуьм эри ижире кор э меревоз бирен. Гъич э иму пушотегъо небире ижире гІэдот суфрей овилуре э суфрей гІэруьси чаруну, эри муьрде буле, жуьрбежуьре хурекгъо, закускагъо, гІошгъо-егънигъо, дулмагъо-епрэгъигъо соху дуь, э сер суьфре шишегъой эн эрэгъи нен каньяк нуьт. Ме э вэхдию е кем турош хундем, дануьсденуьм, ки гоф «эрэгъи» нен «каньяк» эслогъ не э Туро, не э Гоморе невери. И э дин, туройму неверие гІэдоте, э гІэдот бебегъо-келебебегъойму недерие коре ведешендет эри дьткеми, келегедишу эз э шефдиревоз гъэзенж сохде пулгъо гъизмиш-гъудурмиш биретгъо, э фикир, дерд, хэл эн хэлгъ, жэгІмет недеруьтгъо. Эз еле дьгъо ведешендетгъо тозе гІэдот лонгъ нисди не э дин иму, не э гІэдотгъой эн бебегъо-келебебегъойму, эз елойге лап гурунди, догъуногъи, хуне-хэребини эри косибе кифлетгъо.

И ме эритуь нуьвуьсдемгъо гъозниере, э серме омorigъооре, гъе гъечуь нуьвуье гъуьч сох, деше э гозит. Чуьтам сохиге — уре туь эз ме хубте дануьсде...

Эри! Фурмуш месох, хэлефме: эз ме шолум-дугІо ди эри зен-хуь-суьртуь, эгенер у гъеле зиндеиге, эгенер муьрдиге — э жигей хуьшде динж, рэхъмет гердо.

Дусд туь те гІуьмуьрлугъ  
Шими Дербенди

*10 мая 1965 сал.*

## ШИМИ ДЕРБЕНДИ Э ГІЭРУЬСИ

Е гиле Шимире э гІэруьси огол зерабу. Шохьонгум, пушой э гІэруьси рафде, Шими хуб сер-тен хуьшдере вокурд, рушгъо-бигъгъой хуьшдере э пушой гузги шуне зе, тимор сохд, рафд э гІэруьси-хуне. Инжо э хъэьт столгъо вераюнде оморебируьт, э гІэруьси оmore одомигъо нуьшдебируьт жерге-жерге. Зергергъо эдембируьт зере вежегъисденигъо гъовогъо. Шимиш гиросд нуьшд э ён э гІэруьси оmoreгоре одомигъо.

Э мейду гъейсэгІэт эдембу е мерд вежегъисде. У эз гІуьмуьр гъеле жогъил бугеш, шуьгъэм ю лап гъолинд 'бу, эн бордоре зене хуно э буз ю вероморему, сифет ю тупе хуно гиргине бу. И мерд эжеиге заготовитель кор сохденбу. Э уревоз э мейду эдембу е жагъиле гІэруьс вежегъисде.

Пушой эз мейду ведироморе, гъебоне заготовитель, сере э уьт-кемиревоз тик гирде, доно гъолинде пенжей хуьшдере э куьф шовол хуьшде, ведешенд эзунжо чор садмонетире. Песде у десе тик гирде, садмонитигъоре, недоворе хуно, э зеверсер хуьшде эйлон-

миш сохд, хэлгъ, э гІэруьси биргоргъо винуь гуфдире. Эзумбэгъ-дойге у е сад монетире э е дес эн э юревоз вежегъисденигъо жогъиле зен доно, е садигере — э е десигей эню. Песде вежегъисде-вежегъисде, келе шугъэм хуьшдре шувунде-шувунде э уьткеми-текебуриревоз эз ки зерегоргъо куьнд бире, шенд велговуше хуно садигьоре шомош э сер эн э пушой энугъо бугъо поднус. Зерегоргъо еки тарчи бѹ, еки комончечи, екиге тефтчи.

Эри гъеме э гІэруьси оморе одомигъо ижире кор эн заготовитель келе гІэжонби, хижолетире хуно омо эришу, гуйге у э и кор хуьш-деревоз угъоре э номус, хижолети дешенд, охмури зе э угъо. Омбардеки э гІэруьси оморегоргъо, фэхълее, керсохе одомигъо бируьт Шимире хуно. Угъо э вежегъисдеки эз е монет-дуй монет зиѣдте-шомош нисе дешенденбируьт э пушой зерегоргъо, гъувот ишу раф-дере хуно. Оммо зерегоргъо лап шор бисдорут гъобоне заготовитель ишуре ингъаде пул шомош дори гуфдире. Угъо сер гирдуьт э лап хъэвесевоз эри зере эри эню. Тефтчи, е лэгъэре мерд, хъире чумгъо, эз шори эни кор э жигей хушде тоб недоре, э заготовитель хъуьрмет сохде, гъебирден вэхишд э пой. Гъечи э пой-пой по-исде, шори сохде-сохде, дуй чуме э дусдиревоз э у доноре, сер гирд э келе эшгъэвоз эри эню тефд зере, тефде туплере хуно вешенде-фушенде.

Оммо заготовитель ведерафдки эз мейду дие екиреш войге-гевил небисдо эри дерафде вежегъисде, гъеме лос бире э жигешу нуьшдебируьт. Шими виники ижире гъовой эн одомигъоре, огол зе серпой гІэруьсире, гъишд э зерегоргъо эри ю заказ доре вежегъисденигъо гъово «Харц». Шими рушгъо-бигъгъой хуьшдере тимор сохде-сохде, гъулгъоре гъэнете хуно лов сохде, лов хэнде, дерафд э мейду эри вежегъисде. Э Шимиревоз е раче жогъиле зене дирвундуьтки эри вежегъисде. Шими гуйге пири хуьшдереш фурмуш сохд. эзи дилбоше жогъилгъоре хуно сер гирд эри вежегъисде. Гъеме э гІэруьси бирегоргъо сер гирдуьт эри энугъо э хъэвесевоз чек зере. Пушой эз мейду ведерафде, Шимиш доно десе э куьф, ведешенд е сипре аббасире, вежегъисде-вежегъисде куьнд омо э пушой зерегоргъо. Песде Шими аббасире э туфовоз тар сохде, э келе энгуьш-девоз шишире вено уре э пушони эн тефтчи, чуьтам пушотегъо, э жогъиле вэгІдегъой Шими кими вежегъисдегоргъо сохденбируьтге. Шими диренки гъошгъобогъ эн тефтчи лап дуллу бисдо, уре не эз шомош эню, не эзижире кор эню хъэз неомо, у гъуз бисдо э биней гуш тефтчи, пуйге э пуш эню эдее гуфдире, оммо гуфди келе-келе, гъеме хэлгъ шинову гуфдиире, э лой гъобоне заготовитель э энгуьшдевоз бирмунде, мугу:

— Туь э ме бэхшлемиш сох, ме туьре унгъаде келе пул-шомош недорем гуфдире ѱ бисембее заготовителе хуно, эз е аббаси бэгъэй. Оммо э жун худо, ме туьре доремгъо аббаси э жофой десме-

ревоз гъэзенж сохде оmore пули, энү гъурумсогъэ хуно дуйздире шулухэ пулгъо нисди...

## ЧУЪТАМ ШИМИ «Э ЖИГЕЙ» ХУДО БИРЕБУГЕ

Е гие Шими э у жогъиле вэгIдогъой хуыште эричуь кориге, э зеневож женг-хуьжет гирде, гэгъри бире ведерафдебу эз хуне. Согъ руз у гъечи гешд э кучегъо. Гъово омо шохъонгум бисдо, э кучегъо е доне одоми немунд, оммо э дуьл Шими э хуне вогоште недебу. Гъечи у торики шохъонгум гешде-гешде омо ведиромо э гъирогъ шегъер. Инжо е куьгъне нумаз бу. Бун энү сар бу, гъир зере бу, дим-дуз бу тэхдере хуно.

Шими верафд э бун нумаз, килэхъэ эжигей болуш э зир сер хуыште доноре, дегешд эри хисире. Суьфделе чум эн Шими э хифлет рафдебу, бирден э пуш энү е сес дерафд. Шими хэбер бисдо, дениши э иловле, оммо э сер бун екиш невебу. Увэхди Шими э сер офдо, ки и сес эз гъэд нумаз эдее оmore. Гъемин е дуь-се пой дурте эзу дегешдебугъо жиге э сер бун е келе гиргине сула бу. Шими куьнд омо эз сула, мивини э сер гъихэл е мерд поисди. Сула гъемин э сергъови нимаз э зверсер гъихэл вебу. Эзи мерд бэгъэй э нумаз е доне нешумо недебу. Э пушой мерд э сер гъихэл эдембу е шэгIмлей муми сухде. Шими эз сулай бун хуб дениши э мерд, мивини у е лап лэгъэре одомини, чумгъой ю дерафди, рангиош зерди гилове хуно. Э тен энү е жундуре чухо вери, э пой ю — дурра тирохгъо, э сер ю — е муйрафде килэхъ гусбенди эри пуьрзе гIэмел оморенигъо. Мерд сере тик гирде, э звер денишире, эдембу э минет, божэхъэвоз гуфдире:

— Эй худойме! Эй худойме!..

Шими сер-тен, сер-сифет энуре диренки, сес энуре шиновусденки гъе усэгIэт вераси эри хуыште: и косиб-биеноре, э хъисобовоз, е келе дерд-дуьлестиюни, унегуьре омори инжо э нумаз эри э худо минет сохде. Косиб ченд гилейгеш гъечи худоре огол зеки, Шимире э у лап езугъ омо. У э дуьл хуыште фикир сохд: худо эз ю гъэгъри нибу, эри ю гIовун хъисоб нисоху, эгенер ю гъейсэгIэт и косибэ э жигей энү, эн худо жугъоб доге. Э гъечиревоз Шимирие воисд дануь дерд-дуьл эни одомире, песде эз дес ю веромоге е ку-меки соху э у.

Шими гъуз бисдо э сер эн гъирогъ сулай бун нумаз, руй бире э ки косиб э ежирейге сесевоз мугу эзу:

— Эй бендейме! Гу чуй воисдеге туьре эз ме, эз худой офиротортуь! Туь дануьсдени, ки ме гъем лап гужлуьнуьм, гъемиге лап рэхъмедуьлуьм!

Лов косиб гъе усэгIэт э шоре хэнде верафд.



— Ой худойме, шуйкүър э нумтуь, сэхьиб гIуьлом! Эхир сесме э гуштуь дерафд, — э келе гьаежониревоз гуфди косиб. — Ме ченд гилегьо туьре эзинжо огол зерем, оммо туь е гилеш мере жугьоб недорейри. Ме гьерчуь дануьсдебируьм ту, дуьр гердо, эз пушгьо куьт, эз чумгьо зэгIиф бирей. Гьелбет, зарифате кори беге: салгьойтуь шуморде верасдени нисди. Эз туь гьеле и гIуьломе офире эйло э куьнди шеш гьозор сал гирошди... У вэхдиш, нэхогьтуь гIэйилле небри...

Косиб е дэгьдэгьэ гоф хуьшдере поюнд, ох кешире, мугу гене:

— Оммо, жон офирегор, гьэьри мебош эз гофгьойме: э и туь офирейгьо гIуьлом е дузи, е хьисоби нисди. Кимигьо гисне-тешней, эз жун хуьшде визорут, кимигьойге эз пул-девлет гьизмиш-гьудурмишуьт, туь кимигьоре гIош дорей, кимигьоре ишдогь...

Косибе гене чуьнге гуфдире воисденбу эз товун э гIуьлом гьисдигьо бедхьисобигьо, оммо Шими гоф энуре бурра, мугу эзу:

— Эй бнейме, туь нешиновусдей беге: «Расе дураз хуби, гоф — кутэхь». Мере можол дуразе-гофгьо, ихдилотгьоре шиновусде нисди. Гу эриме, туьре чуь воисдеге эз ме, эз худой офирегортуь?

Косиб гье усэгIэт дуь десе э сине воноре, мугу:

— Бэхшлемиш сох, жон худойме. Туь дануьсдени: дерд бугьо одоми омбар гоф мисоху. Зиэдне гоф гуфдиремге — бэхшлемиш сох. Тогогьэйме ини э туь: ме е косиб, гIоние одоминуьм. Мере е шеле гIэйили, гисне-тешнеуьт, сер бирэхьне, кун бирэхьнеуьт. Э кулмеш е шеле гьэрд вери. Сэхьиб гьэрдгьош мере динж нисе гьишде, эдете гушмере берденуьт. ГIэйилгьойме эри е лугьэ нун эдете дур зеренуьт. Чум зенме гье гIэрсини. Эзи дердгьо-дуьлесдигьо, нэхурденгьо-неберденгьо э меш жун, хьол недемунди. Хосденуьм эз туь, жон худойме, пул ди мере, эз гьэрдгьо-фердгьо хилос бошум, гисне гIэйилгьоймере сирои сохум, гIэрс чум зенмере поюнум.

Шими и тогогьэй эн косибе шиновусдки лап э хуьшде демунд, чуьнки у ю хуьшдению у вэгIдогьо косиб-юхсул бу, э куьф энугьейсэгIэт е «гьэре шогьи» недебу. Унегуьре Шими бирден фурмуш сохд ю «худои» гуфдире, унегуьре у хижолети кеширере хуно э пушой эн косиб эзижире хьол хуьшде, мугу:

— Бэхшлемиш сох, ме туьре пул доре нидануьм. Меш косибуьм туьре хуно.

Косиб, гьелбет, бовор несохд э и гоф эн «худои». У гьечу дануьсд, худо эри хэьз хуьшде эдее гуфдире, зарифат сохде. Эгенер у гьечи мэхсере-зарифат сохдениге, ведини, гьовой энугь хуби, у ёгьин юре пул мидуь,

— Мидани, мидани! — хэнде-хэнде мугу косиб. — Туьре воисде мидани. Туь — худои, офирегор, сэхьиб эни гIуьломи. Гьеме э дестуь дери.

Косиб гьейсэгIэт э ёр Шими овурдки — у худои, Шими гене демунд э хуьше, песде мугу:

— Эй бендейме, ме худош гьисдуймге, гуфдируьм э ту: ме нидануьм туьре гьейсэгIэт пул доре. Ме э сер эн сал «эн Рош-гьешо-не» нуьвуьсденуьм, э руз «Кипур» теслих сохденуьм: «ки имисал гIошир мибуге, ки косиб мибуге, ки маравге, ки мофдонуге...» Сер сал дие гиросди, э бэхдтуь, э гьисметтуь эри имисали эритуь пул недери, ме туьре эз косиб гIошир сохде нидануьм, Дениш, тобди те салиге.

Косиб гье усэгIэт сергерде хуьрде хуно бисдо, сере дуллу гирде поисд е ченд минут. Посде у сере тик гирде, мугу:

— Гьечу буге, ой худойме, фуьрс ГIэзроиле нешумоймере бсруь. Мере э и гIуьлом зигьисде нисе воисде.

«Худо», Шими егIни, рази небисдо э и гоф эн косибиш.

— НэгI, — ме туьре имисал не гIэжелиш доре нидануьм, — мугу Шими э сулай эн бун нумаз, — чуйнки э руз Рош-гьешене ме нуьвуьсденуьм, теслих сохденуьм «ки имисал пуч мибуге, ки зенде миёвге, ки мимуьруьге, ки мимунуге...» Э дефдерме невери туь имисал биё мири гуфдире.

Косиб диеш дуьлхуьрд, могьбул, серевнре хуно бисдо.

— Гьечуи буге, ой худойме, — мугу косиб, минет сохде, — гьелелуьге, те салиге туь мере пул доре, е нике кор сох эриме, вебер мере э китуь э хьофдимуьн тебэгъэй асму. Мере э хуне гьечи дес тигьи, куьф тигьи, руй сиегь эри вогешде иллож нисди.

Э кишд эн Шими е дуразе расе вебу. У расере э кишд хуьше бесденбу сер ебо эз хуне э куче, э базар ведиромореки, белки эри гьерки бисдо э шеле кеширегор, бердегор терек бисдоге, е-дуй шоги эри гьэзенмиш сохде. И гофгой эн косибе Шими шиновусдемунде, у гье усэгIэт зури-зури векед эз киш хуьше расере. Е сер расере у э дес хуьше гирде, е серигере фушенд э гьэд эн нумаз.

— Эй бендейме, — мугу эз звер Шими, — эхир эни расере сэхд бесд э кишд туь, ме гьейсэгIэт туьре веровунум инжо э сер бун... НэгI, нэгI! э хьофдимуьн тебэгъэй асму... Садан э ёнме поисди, эдее мере чешмиш, егIэлмиш сохде... Ме туьре инжо мидекуьнуьм э генгидин, э женнет, гьич е зэхьмет некеширеки, десе э дес незереки, э согьиме, михури эритуь туьре чуй воисдге, ченгэдер воисдге, кеф мисохи эритуь. Зенсуьз гьэрол негирдиге, зениш мидуьм туьре, еки нэгI, гьозор доне, унгэде, ченгэдер дебуге э хьэрем эн Шелмуь гьёмилех — гьозор зен не сасад ошне.

Косиб зури-зури сер расере эз хори вегирд, сэхд бесд э кишди хуьше. Шими гуж зере-зере сер гирд косибе, пура бедирей гIове эз чол вокошугьоре хуно, эри вокошире уре зверо. Косиб гьейсэгIэт э фикирго, э дуьлго-хэьлгой хуьше э хьофдимуьн тебэгъэй асму бу. Оммо сер эн э муйрафде килэхьэвоз гьетте э сергьови бун эн нумаз расире, бирден расе эз некуми бурри, косиб э е ке-

— Эй бендейме! Мере лап воисденбу туьре э киме веровунум, ле хьэроевоз кунбологъово офдо э зарбевоэ э хори. Шими ю хуьшдениуш лап терси, косиб э офдореки немируь, енебуге шуькест-чулох небу. Шими хуьшдере эри расд ведиревундеи э пушой косиб, мугу:

э генгидим дешенуьм, оммо и нолоигъэ садан негьишд мере, мешет бисдо, ээ пэхьникиме бурри расере... Гу гьери винуьм, туь согъ-саламатиге, е жигейтуь шуькест-хэсде небириге?

Косиб э е гужевоз вэхишд ээ офдоре жигей хуьшде, хэхэ бире жигей кун хуьшдере э десевоз совусде-совусде, сере тик гирде, э сулай сергъови бун нумаз денишире, мугу э гъэмлуйи, серкуши ве руьхшендиревоз:

— Э-эгъ! Туьчуьни худоре чуь гуьм! Чуьжире гьемгужлуйе худон туь, эгенер туь э е тэхъное Садан нисе вероморениге? Уре чуь воисдге эдее сохде. Туьни сэхьиб, серкелле э сер эни гуьлом туь офирейгъо, небуге уни? Песде чуьжире рэхъмедуьле худон туь, эгенер чуьмени езугъ, косиб-гюнире ээ е келе дуьмбел бэгъэй э песой кун ю гьичиш доре недануьсденге?!..

## НУН НЕ ХЭНЖЕЛ

Косибе вэгидогъой эн Шими бу. Уре бегьем не эри хурде нун, не эри вокурде партал небу. Хуней энунумазе хуно тигьи бу. Оммо е гиле нимешев, Шими не зен ю э сэхде хов дери, э хуней энугъо дуьзд омореву. Э торики шев, пой дуьзд э пой эн Шими домунде, уре ээ некуми хэбер сохдебу. Шими хэбер бире мунде, дуьзд гье усэгъэт чопгъуне хуно вирихд ведерафд ээ хуней энунум. Шими зурри-зурри вэхишд ээ хэлов, омо э ён догъле, вегирд эзунжо песини нуне, ээ гьиче вегирд парс гирде куьгъне хэнжел хуьшдере, гьечи э зиршейни, зиршевлиревоз, э е дес нун дери, э е десиге бирэхъне хэнжел, видовусд э песой эн дуьзд. Шими э видовусдеки э песой энунум эдембу хьэрой сохде:

— Пой! Пой, мевирих!..

Оммо Шими ченгъэдер хьэрекет несохд, невидовусд э песой дуьзд, уре поюнде, гирде недануьсд. Шими шуш-нефес ю гирде, гьемей ю тар-эрэгъ, пешму, дуьлхуьрде хуно вогошд э хуне. У нуне гьоборе э догъле доноре хэнжеле э жигей ю э дивор э гьиче веноре, омо дегешд э хэлов э жигей хуьшде. Зен мулу эзу:

— Эй мерд, туь чуьжире томошее одомини?

— Эйчуь эхи? — жуьгъоб до Шими.

— Туь э же дирей, э же шиновусдей одоми э песой эн дуьзд э нуневоз видову?

— Эй зен, — мулу Шими, — туь гьичиш нисе верасире. Гьеме э шегьер дануьсдени, ки ме лап косибе одоминуьм, хунейме тип-

тигыни. Неки шев э торики, чум руз э товушиш э хунейме е чи ниофи эри дуьздире. Гье у дуьздиш, эриме оморенигьо, недануьсде небу, ме лап косибуьм гуфдире. Оммо неденишире э и кор, у шев-нимешев омори э дуьзди э хунейме. Ведини, ки у лап гисне бири. Эз гиснеи уре дие иллож небири, диромори э хунейме, белки енун семе офде дануьсд, гисне шуьггэм хуьшдере сирои соху. Ме песини нун имуре вегирде эз догъле видовусдебируьм э песой энун, у нун дум уре, хорунум, сирои сохум, песде е-дуь силле зере ,зу, рэхьо сохум э хубиревоз.

— Бошгу-гьо, гуюм туь нуне эзу товуне ведебердей, оммо хэн-желе эйчуь вегирдебири э хуьшдеревоз? — мугу зен Шими.

— Ме хэнжеле вегирдебируьм, — мугу Шими, — у эз хэнжелме терсире, пою, невирихуь эз ме, вегируь эз десме ме уре доренуьм-гьо нуне. Туь дануьдени, ки: одомире, оморегоре эз хуне гисне ведекуьрде — келе гЮвуни. Оммо э худо гІэёни, ки у гьечу гисне эз хунейме ведерафдеи, э ме тэхсир невери.

## ХУДО КЕЛЕИ

Е гиле э лап четине косибе вэгІдогъой эн Шими Дербенди у руз эн поизи нуьшдебу э хуне, десе э чуне веноре, эзи лап могъбуле одомигъоре хуно, эдембу фикир-думит сохде. Зен Шими диренге гьовой шуьвер хуьшдере, у гьечи могъбул, фикирлуь нуьшди, уре э у езугъ омо, мугу:

— Эй мерд, туь гьечи могъбул, дуьлхуьрде хуно эричуьни?

— Эй зен, — мугу Шими, — чуьтам ме могъбул, дердлуь-ггэм-луь небошум. — Туь эдее дире мере хэйли вэгІдо кор нисди. Э пушо зимисду-хиникигьо дери, оммо имуре э хуне е муьшд гЮрд, е сер хуььзуьм, е расе беш недери. Уьсделуьге имуре гьэрд-ферд вечири, коргъой гуюгъоре хуно: «Эз сегиш е ниме нун гьэрдхундим».

Шими сер гирд эри шуморде, кире у ченггэдер пул гьэрдхундиге.

Зен Шими шуьвер хуьшдере эри дуьл доре, мугу эзу:

— Эй мерд, хуьшдере хурде мевечи, дуьл ди хуьшдере. Худо — келеи \*, белки э дуьл энун рэхьм оmore, е chore сохд эриму.

Шими гьетте зен энун и гофе гуфдире, мугу эзу:

— Эле, э жун бебейтуь зен, ме фурмуш сохдебируьм, оммо туь гьейсэгІэт э ёрме овурди: Ме у думбура Келереш дегъ монет пул гьэрдхундуьм!..

---

\* Э гоф «келе» э иму гьемчун гьисди нум эн мердиш.

## ЭГЪУЫЛ НЕ ПУЛ

Е гиле э е кулоке руз эн поизи, Шими Дербенди э е ченд юре хуно косибе одомигьоревоз э Фэхьле базари поисдебу, денишире, Белки еки уре эз сэхьыб богъгьой эн Дербенд э кор бердогор бисдоге. Э тен Шими жундуре чухо вебу, э сер ю муы рафде килэхь пусбенди, э пойгьой ю кундура тирохгьо. Шими увэгИдогьо лап жогьил бугеш, оммо эз хиники гъуьжле дироморебу, екем эдембу лерзире. Гье и вэхди эз Фэхьле базари эдембу тирошде, герме пусти хэз э тен ю вери е жендеклуе гюшир. Э шегьер урше гьеме дануьсденбу неки чуьн лап келегеде, текебура одоми, гьемчун чуьн хьужеткор, буше, женжеле одоми. Неки гъирогъдеки, куьнде одомигьой энущ хьэрекет сохденбируьт хуьшдере эзу эри гъирогъ гирде.

Гюшир Шимире э Фэхьле базари диренки гьечи поисде, эз хиники гъуьж дироморе, хэнде-хэнде куьнд бисдо э ки энү, мугу:

— Эй Шими, туь хуьшдере е эгъуьлменде одоми хьисоб сохде, э гьеме хэндуьсдени, э чуьмени гюширгьош-вегиргьош. Эгенер туь гьечи эгъуьлмендиге, дие туь лап косиб эричуьни, э пойтуь е бегьеме тирохиш невери:

Шими дениши э синемширевоз э ю хэндуьсденбугьо уьткеме гюшир, песеде е лугьонде ох вокошире, мугу:

— Туь дузи, ме лап косибуьм, э пойме е бегьеме тирохиш невери, Оммо ме гьечи косиб бирей э эгъуьлменд бире-небирейме кор невери, чуьнки эгъуьл не пул гьеймише э е жиге расд нисе оморенуьт. Ини вегирим ме не туьнире: мере эгъуьл гьисди, оммо пул нисди, туьре пул гьисди, оммо эгъуьл нисди.

## КИШДИ ХЬОМОЛИ

Ченд салгьо Шимире пес-песоеки эдембу духдергьо бире. Уре гИэил нарине небу. Шими терсире, ки юре эзимбэгъдойгеш духдергьо бисдо, согъ гюьмуьр хуьшде гьечи хьомол мунд, у юре эри гИэил нарине бирей, чуьтам гИэдот буге, э кишд хуьшде бесд гъирмизине кишди-кишди хьомоли\*, худо эз звер сер асму кишди хьо-

\* Э гИэдот эн хэлгъ имуревоз, мерде, комиреки духдергьои, уре гИэил нарине нисди, «хьомол» гуфдиренуьт. Эри мерд согъ гюьмуьр ю хьомол мундеи келе могъбули ве дерд бу. Духдергьо-доморгьо нэгI, энжэгъ кук миьсд бире э пире руз энү уре дошдегор, дестек эри энү. Хэгьергьо, холегьо, гIэмегьой эн хьомол эри энү, эри энижире «бедбэхде гьисмет» энү эри муьрде одомире хуно гирисденбируьт. Угьо уре «э дон недерие суьмбуьл зимревоз», «э велт неверне, гуьл неверие хуьшг бире дор эн богъовоз», «гIовсуьз мунде эрхэвоз», «сухде тегьенгевоз», «эз сухде жигей хори вегирде (егIни офире омор) одомиревоз хумне сохденбируьт, лово хосде эри энү уре кук бу гуфдире. Пушоте хьомол э гИэдот гуьре э кишд хуьшде гъирмизине кишди хьомоли бесдембу, худо

моли энуре дире, э у езуьбери сохде, уре гІэил нарише дуь гуфдире. Дире-шинохдегоргьо э Шимиревоз э гоф чи сохдеки, эри энү дуьл-сухуни сохде, эзу мүгуфдируйт: «Эхиртуь ник гердо», еГіни кук гердо туьре.

Е ченд сал гирошде бэгьдо шинохгьой Шими миденуьшуьт мивинуьт, Шими э куче э тен ю кишди хьомоли невери ведиромори. Угьо шори сохдуьт, гьерчуь дануьсдуьт, Шимире, худоре шуькуьр, кукле бири, унегуьре эз кишд хуьшде кишди хьомолире векенди. Угьо куьнд оморот эз Шими, иловлей Шимире ведебурра, э хэнде, шориревоз э е лэгІэ гуфдируйт:

— Омбаракбу, эй Шими! Эдее диреним, кишди хьомоли эз тен-туь фурамори, худоре шуькуьр, эхиртуь ник бири, туь имогьой эри эни кор биё эриму е келе гьуногьлугьги сохи!

Шими лово э могьбуле, руьхшендие хэнде веберде, ох воко-шире, мугу:

— Эгенер «эхирме ник биреире» ишму хьисоб сохденитге у коре, ки зенме дие эслогь нисе зенде, неки кук, гьемчун духдериш, омбаракбу сохит ченгьэдер ишмуре воисд.

## МУЪРДЕЙ ЭН КЕС ХИСРЕ ОДОМИРЕ ХУНО ОМОРЕ

Е гиле Шими э у жогьиле косибе вэгІдогьой хуьшде пушой эн мигІид эдембу э базар рафде эри е шуьгьэмбей гови, е-дуь десде савзе не дуь нун тонуи водоре — эри де зиёдие хэржиге э куьф энү пул недебу. Шими э ён базар оmore расиренки, мивини е оз-гьуне, бигьлуье полицейский е дегь-дуьваздегь сале куклере э пу-шо дешенди, э тепик не тухмохэвоз уре зере-зере, эдее берде. Э тен кукле жундура, пелуь-пелуь сохде шеи не шовол вери, пой бирэхьнеи, рангию зим-зерди, эз виниюш эдее хун оmore. ГІэилле-ре нисе воисде рафде э полицейскиривоз. У гІэрстьой чум хуьшде-ре покурде-покурде эдембу гирисде, хьэрой сохде:

— Дедейму э хьэлов нечоьгь дери! Рэьхо дит мере! Дедейму не-чоьгь э хьэлов дери!..

Шими гирисдей эни гІэиле виники, дуьл ю тоб недо, куьнд омо ээ полицейский, пуьрси:

— Огьо полицейский, гІэмел миёвге гуит э ме, чуьни тэхсир эни езуьэ гІэил, ишму гьечи уре куфде-куфде эдее берденит?

Полицейский недуьл-недуьл поисд, э чеи десевоз сэхд гирд гьул эн куклере, у невируьхуь гуфдире, песде огьур-домогуьлуь мугу:

уре сеч сохде эз гІэрой эн де мердгьойге, э у езугьбери сохде, уре гІэил нари-не дуь гуфдире. Э уревоз гоф сохдегор, э ки энү руй бировор мигуфдируйт: «Эхиртуь ник гердо», еГіни: «Туьре кук гердо». Лап беде, суруле нифри эри хьо-мол бу: «Гьич кишди хьомоли эз кишдтуь мефураво!»

— У — дуьзди сохди. Унегуйре уре эдее э полицейски участок берденуьм.

Э ён базар бирегоре одомигьош, шиновусде хьэрой эн куклере, комиреки полицейский эз гъул сэхд гирдебу, кура бисдорут э иловлей энугьо. Кукле виники э иловлешу кура бирегоре одомигьоре, угьо э ю эзугьбери соху гуфдире, хьэлежигере хуно э иловле денишире-денишире, сер гирд эри келе-келе гирисде, хьэрой-шуькеет сохде:

— Ме эриме недуьздирем!.. Ме эриме недуьздирем!.. Дедейму нечогып!..

Эз гофгьо, бирьюжгьой эн кукле Шими не кура бирегоре одомигьо варасируьт, ки и куклере бебе нисди, дешешу грурунд нечогы э хьэлов дери. И ченд рузи угьоре э хуне е тике нун недери. Куж эз пунтуку нун э дуьздиреки, сэхьиб туку уре гирде, куфди-куьшди, сер знеди гьеле э дес эн полицейски дори.

Дуьл Шими лап гурунд бисдо и гофгьой эни гIэиле шиновусдки.

— Ёзугь биёвгу ишмуре — рэхьо дит и гIэиле. Чув дуьзди у? — мугу Шими эз полицейский.

Э иловлей энугьо гьейсэгIэт кура бирегоре одомигьош, э гоф Шими рази бире, талаб сохдуьт эз полицейский куклере рэхьо дуьгуфдире. Оммо полицейский э гьилигь поисде, мугу:

— НэгI, дуьзд-дуьзди! «Деве дуьздирогриш дуьзди, дерзе дуьздирогориш — дуьзди»!

Оммо кура бирегоргьо эз жигешу нисе жуьмуьсенбируьт, поисдебируьт, ведабурра иловлей эн полицейскире, пушой рэхь энуре гирде. Полицейскире эзи кор энугьо омбар гьэгыр омо. У эз хуьрш дуьл хуьшде гьип-гьирмизи бисдо хурузе хуно, э дес ю деbugьо тухмохэ тик гирде, рафд э сер энугьо, угьо юре рэхь дуьт гуфдире. Гье и туйтем кукле эз некуми дес хуьшдере эз дес полицейский ведешенде, дешенд хуьшдере э гIэрей эн кура бирегоре одомигьо, эзунжо вирихд э е зарбевоз.

Э томоше кура бирегоре одомигьо, дире, чуьтам эз дес хуьршлуье полицейский кукле вирихдге, шори сохде, сер гирдуьт эри хэндуьсде. Эзи кор энугьо полицейский диеш хуьршлуь, гьэзоблуь бисдо. У и дес тухмохэ гьово гирде рафд э сер Шими, гьэгыр хуьшдере э сер энуре тигьи сохде. Шими увэгIдогьо неки жогьил бу, гьемиге лап сэхде, гьувотлуье одоми бу. Те полицейский уре э тухмохэвоз зере, Шими э е зарбевоз ведешенд тухмохэ эз дес энуре, эз гьемей гьувот хуьшде зе тухмохэ эз келлей сер полицейский. Полицейский бурра кутужире хуно офдо э хори. Кура бирегоре едомигьо эз терс зури-зури гьерки э ёло вирихдуьт.

Шими мидениши мивини кор ю шифи, уре имогьой егьин е э гьэземет мидешенуьт небуге э Сибирь мифуьрсуьт, дуьл энуре омбар гьэреболугь бисдо. У дие э базар нерафд, не э хунеш нево-

гошд. У дуз омо э духон. Э ю бугъо пулгъоре гъемере хэржи сохде, хурд шороб те лул-пиён бире.

Э хуне вогошденге, Шими лойлум хурде-хурде, зугъун ю пичире-пичире гуфди э зен хуьшде э сер ю оморигъо коре, песде гъэдэгъэ зе э у: эгенер эз полиция юре эри берде омоге, пую шуьвер ю эз некуми офдори муьрде.

Гуфдире и гофе э зен хуьшде, Шими гъе јусэГэд диromo э хуне. У вегирд руйлухуьфире э куьнж эн гъиче бесд, эри хуьшде хьижле сохд. Парталгъой хуьшдере векенд, бирэхъне бисдо. Песде лампере дегесунде овурд э ён хьижле. Ю дураз бире э сер тие хори, лампере но э зверсер бонилей хуьшде, муьрдере хуно дегешд.

Е сэгІэтиш негирошд эз Шими «муьрде» эйло э хъёт су гирде одомигъоре хуно шив кенде диromорут хуьшдени полицмейстер эн шегьер, эз песой энугъемин гъе у полицейский, сер комире Шими эзи е ченд сэгІэт пушо э тухмох энуревоз чэх сохдебу. Сер полицейски бесде 'бу э е сипре читевоз, эн мендил хьожире хуно.

Полицмейстер шиновуджи эз гирисде, гъейвой-гъызар сохденбугъо зен Шими, шуьвер ю эз некуми офдори муьрде гуфдире, у бовор несохд. У зен Шимире э десевоз гъуьл зере, гІэтоше хуно диromo э хуне. Полицмейстер эз расдиш мивинуь э куьнж хуне хьижле кешире омори. У бел хьижлере вокоши, мивини Шими тенбирэхъне дес-пой дураз сохди, дегешди э сер бирэхъне хори, чумгъой ю сэхди, э звер сер юш эдее лампе сухде.

Полицмейстер гъуз бисдо, дес зе э бирэхъне жендек эн «мгъит», мижегъой чумгъой энуре вокурде, дениши товуш дериге э чумгъой энугъе, песде гуше веноре э сер синей энугъегъм сэхд дуьл эн Шими кор сохдениге. Оммо жендек эн «муьрде» герм бу, нефес ю хуб, лугъонд, дуьл ю лап соф, сэгІэте хуно эдембу кор сохде, чумгъой ю перде некеширебируьт очугъ, темиз. Полицмейстер лап хуььршлу бире, э буз эн тов-товие зенгу верие чокмей хуьшдеревоз е сэхде лэкет зе эз бирэхъне гъэбуьргъэй эн Шими.

— Э и нолеигъ денишит ебо! — хъэрой сохде, гуфди полицмейстер. — Беди, хэтокори сохди, песде хурди лухълуьхуьт те пурдали бире, хисири, хуьшдере э муьрдеки веноре.

Шими вараси, ки и нумир ю эз сер рафденигъо кор нисди, полицмейстер варасири гІэмел энуре. У гъейсэгІэт ю эз сери хуьшде «зинде бире», невэхидге, угъо уре эз пойгъо кешире, тенбирэхъне медеберуьт э куче.

Шими чумгъоре вокурде, вэхидш эз жигей хуьшде. Неденишире э и гурунде овхюлет хуьшде, уре воисд хэндуьсде э коргъой хуьшде, э и гъейсэгІэт полицмейстер э у гуфдигъо гофгъош.

— Эй огъо полицмейстер, огъо полицмейстер! — лове э могъбуле руьхшендие хэнде веберде, мугу Шими, — эгенер ме эз расдекиш мимуьрдуймге, туь увэхидш гьерчуь миданисди ме немуьрдем, энжэгъ хисирем. Чуьтам хуней кес суьхденге е суьмер суьхдере хуно



оморениге эри кесиге, гьечу муърдей эн кесиш хисире одомире хуно оmore...

## ЧУЪТАМ ШИМИ КУК ХУЪШДЕРЕ СИНЕМИШ СОХДЕБУГЕ

Е гиле сер гьеминон Шими э ён гьендэгынгьой богъ эн колхоз эдембу гиёв чолгъу зере. Э доргъо бэгли расире вэхд бу. Шими чордегъ сале куклей хуфшдереш вегирдебу э хуышдеревез. Глэйл е кем кумеки сохде бэгъдо э бебешу, рафд верафд э е келе гьуын-дуьре бэгли дор, э комики лап омбаре дуьруьжде хуб расире бэгли-лигъо вебируьт. Бирден э гуш Шими е келе хьэрой-божэхь эн глэйл ю дерафд. Шими гье усэглэт вераси: глэйл эз дор офдори, э сер ю кор омори.

Шими чолгъуре эз дес шенде, шуш-нефес гирде омо раси э кук ю офдореbugьо жиге. Шими диренге, ки кук ю э зир бэглидор дегешди мегьите хуно, эз ю нефес нисе ведироморе, э хуышде недери, зэхълей Шими рафд. У чуыш сохд кук хуышдере эри э жу овурде, синей юре совусд, кемер юре совусд, видов-видов рафд эз ерх е куже глов овурд, декуьрд э сифет ю, гене глэйл э хуышде недиромо. Дуьл Шими эдембу лов бире эз дерд и согъэ буьлдурчине глэйл ю гьечи э пушой чум эню офдо муьрд гуфдире. Шими лов сохд ехэн хуышдере, сер хуышдере тик гирде, э асму денишире, се гиле черх хурд э иловлей эн гуьмсуьз, нефессуьз дегешдеbugьо глэйл хуышде, сер гирд эз худо эри лово хосде: худо жун юре вегируь, жун куклей юре вогордуну гуфдире\*.

Шори эн косибе Шимире гъэдер небу, кейки эз расдиш е ченд минут гирошде бэгъдо, кукле чум вокурд, сер гуьрд эри гирисде эз дорд дорей, ю гьечи эз дор офдори гуфдире. Шими э хьитёти-ревоз тик гирд глэйле, «нум худой! нум худой» сохде-сохде, вено э кул хуышде эри берде э шегьер, э хуне, зури-зури чоре сохде эри эню. Хэр эн Шими э юревоз бу. Оммо у кук хуышдере э кул хэр невоно, эри глэйл гурунд мибу гуфдире. Шими вено глэйле э кул хуышде, рафд э лой шегьер. Эз богъ те шегьер э куьнди чор-пенж верс рэхь бу. Рузиш лап герм бу. Неденишире э гьизгын герми, э вемунде, Шими неки егилеш глэйле эз кул хуышде невегирд, сер зиёди согъ рэхь эри эню хубе, ширине, хошие гофгъо мугуфди, дуьл энуре эри веровунде, э лов ю хэнде эри овурде, э гьечиревоз у е кем дорд дорей, зэхьмет хуышдере фурмуш соху гуфдире.

---

\* Одомигъой хэлгъ иму бовор сохденбируьт: эгенер бебе э иловлей эн э хьолет муьрде гьисдигъо глэйл хуышде, эн гурунде нечогъ, ехэн хуышдере лов сохде, се гиле э иловлей эн хьэлов эню черх хурде, лово хосде эз худо глэйл юре эз муьрде хилос соху, худо э жигей жун эню жун юре беруь, худо и ловой энуре э жиге миёру.

Эзу вэхдевоз шеш сал giroшд. Имогьой кук эн Шими, чум ма-расо, эз шими гьуьндуьр, фирегь, сэхде жонлуье жовон бу.

Е гиле э сер гьеминон э вэхд бэгIлигьо Шими гьемин э у богъ э кук хуьшдеревоз эри кор сохде оморебу. Бирден э дуьл эн Шими омо кук хуьшдере эри синемиш сохде. У кор хуьшдере гьишде, рафд гье э у жиге, э же эзи шеш сал пушоте кук энэ эз дор офдоребуге. Шими дегешд э зир бэгIлидор, э сер гнёвгьо, сер гирд э вогънеки эри хьэрой дешенде, кук хуьшдере э кумеки огол зере. Кук Шими шиновусде мунде божэхь бешуре, шуш-нефес гирде видов-видов омо раси э ки энэ. Диренге бешу э зир дор дегешди, эдее ноле зере, лап терси. У гьуз бисдо э сер бешу, э келе гьаежниревоз пуьрси:

— Э бе, жон бебе, чуй бир.и туьре?

Шими «э гужевоз» чумгьоре вокурде, э энгуьшдевоз бирмунде э звер сер хуьшде, э бэгIлидор, ноле зере-зере, мугу:

— Мере воисд е-дуй эзи хуб расре бэгIлигьо чинуьм хурум. Варафдуьм э дор, оммо э бэгIли чиреки, ализе пойме чемуьсде, офдорум эз дор раси. Ой-ой-ой, гьэбуьргьэгьойме!...

Кук Шими, дуьл ю сухденбугеш эри бешу гьечи эри эз дор офдоре, хэхэ бирей, шиновусде и гофгьой Шими, сере э дивунлуьиревоз жумунде, уре серкуш зере, гIэйб дорере хуно мугу:

— Эй бебе, гьечиш кор гIэмел оморени?! Туь келе мерд, эгьуьл-суке гIэиле хуно э бэгIли темэхь сохде, эйчуй верафдебири э и дор?! Туь эри эни бэгIли лап гьечи тешне биребриге, гуьфдире э ме, ме мичируьруьм миёврдум эритуь... Хуб, екем тоб ди, хэре биёрум, венишунум туьре э кул хэр, дуз беруьм туьре э болнисе.

— Омон, омон, хэлефме, нэгI! — гье усэгIэт э нолеревоз мугу Шими. — Ведини, жилгьэй кемерме хэхэ бири. Э кул хэр эриме лап зэхьмет мибу, э култуь венишун бер мере.

Чорей кук Шими небисдо, венишунд бешуре э кул хуьшде, офдо э рэхь. Рэхь дураз бу. Шими гье эдембу ох, ноле зере. Гермеш эдембу гье гужлуь бире. Оммо кук Шими, нефес ю гирде-гирде, эз лэгIэ е гоф неведировунде, лов-гьош дуллу, эдембу берде бешуре.

— Эй хэлефме, — руй бире э кин кук хуьшде, мугу Шими, эз богъ е гьэдер рэхь рафде бэгьдо, — негуи эриме гьерчуь бисдо, е ихдилот несохи, дуьлмере эри веровунде, зэхьмет, дорд дорейме екем эз ёрме фурмуш бу.

Кук Шими и гофгьой бешуре шиновусденки лап гьэгьри, хуьршуь бисдо:

— Эй бебе, чуй томошее одомини туь! — хьэрей вегирде, гуьфди кук. — Кеми ме хэре хуно туьре э кулме берденуьмгьо, гьеле сер зиёди эри мухшулитуь эритуь биё ихдилотгьо, овосунегьош хунум!?. Белки эри кефтуь туь эз ме гуьфдири: э минжи эн рэхэ эри-

туь, туь э жулме вери, мэгIни хунум, вежегъуьм э мейдуй гIэруьси-  
ре хуно?!..

Шими гье усэгIэт гьишд кук хуьшдере поисде, ю фурамо эз кул  
эну, мугу, ю хуб бисдо, дие имогъой э пой хуьшдеревозиш рафде  
мидануь, е жигеюш дорд нисе доре. Бебешу эз кул ю фираморен-  
ге, кук Шими, эрэгъ пушони хуьшдере покурде, эз дуьли шори сох-  
де, оммо бовор несохде э гофгъой бебешу, мугу:

— Гьи, гьи... Мэхьтеле кори, чуьтам туь гьеебо эз некуми хос  
бисдори, дерму нэхурдеки, духдир хуб несохдеки?

Шими эз дуьл е тасире ох кешире, лове э могъбуле хэнде ве-  
берде, мугу:

— Гьич е мэхьтеле кориш нисди, туь хуьшденитуй, хэлефме, э  
гофгъо, жугъобтуьревоз эз дерму, духдир хубте мере хос-соф сохди.  
Баракаллагъ туьре, хэлефме!..

## ХЭР РАФДИ, ХЭР ВОГОШДЕ

НевегIэмлей эн Шими эз бебешу хэйли пул векенде эри е мегьи  
рафдебу э сафар эри гешдей хуьшде э хоригъой Европа, егIни,  
«гIьломе эри дире». У эз хуьшде е эгъуьлбуше, келегеде одоми бу.  
Эвунжо у вогошде оморенге, уре эз сер-ген, сер-сифет гьеебо ши-  
нохде нисе биренбу. Э тен эну е дуразе фирегье рушейни вебу. Э  
рушейни эз песо ве эз пушо шекуьлгъой эн жуьрбежуйре хэйвугъо  
вебируьт. Э пой эну эз сугъразани зевэр е кутэхъэ шовол вебу, э  
э герден ю зенжил э медальёневоз эн зене хуно, муйгъойюш муй-  
гъой кешуше хуно дураз бу, э гоф сохдеки, э куче гешдеки э лэгIэй  
ю гье сэгъгъуьз дебу.

НевегIэмле эз сафар вогошденге, Шими омо э ки эну эри хош  
омори сохде уре. Диренге ижире сер-сенбол энуре, Шими лап мэхь-  
тел мунд. Чуьш бисдоге, недуьл-недуьл хош омори сохде уре, э не-  
гиреиревоз денишире э сер-сенбол эну, пуьрси, чуьтаминге э вилеет-  
гъо, у биригъо, чуьжиреуьтге хэлгъгъой энугъо, гIэдотгъо, дивэгI-  
гъо, хосетгъой энугъо, зиндепунишу, чуь унжо, э фикир энуревоз  
хубиге, чуь усолиге? НевэгIэмлей эн Шими э и гофгъой эну жугъоб  
доре недануьсд. Оммо у, сэгъуьз хуьшдере жавуьсде-жавуьсде,  
сер гирд э келе хъвесевоз эри эну ихдилот сохде э коми духонгъо,  
ресторангъо бириге у, э же хурдиге, кеф сохдиге, чуьжире тозе ве-  
жегъисденигъо гъовогъо унжо ведиромориге э гIэрей жогъилгъо, эз  
чуьжире томошее мудгъо омбаргъой энугъоре хъэз оморениге.

Келе мерд Шими пешму бисдо эри оморей хуьшде, вохурде э у.  
У те эхир гоф энуре пуш невомере, гъош дуллу, вэхьшд ведерафд  
эз хуней энугъо.

Сезбэхьимуйн е шинох эн Шими, келе мерд, вохурде э у, пуьрси:

— Эй Шими, ме шиновусдем невэглэмлейтуь согъ е мегъ э ви-  
леетгъой Европа бири? Чув дири у унжо, чув шиновусди?

Шими гье усэглэт гъошгъоре дуллу сохде, мугу:

— Гынчиш! Гьечу чьуьтам хэр рефдиге, хэр вогошди, энжэгъ  
палан ю дегиш бири.

## ЧУЪТАМ ШИМИ ЭРИ ГІЭРУЪС ХУЪШДЕ «ЧОРЕ» СОХДЕБУГЕ

Зен эн келеи кук Шими е чоьгъэ делине бу. Зен Шимире эз шо-  
ри эни гІэруьс хуьшде жиге небу, эдембу пелпелуьре хуно э песо-  
пушой эну вечаруьсде-вежегьисде, чьунки у духдер эн кес небу,  
сигъде хэгьерзорей эн зен Шими бу. Чорей эн зен Шими мибисдо-  
ге, у гІэруьсе эз ширини, гІэзизи миберд э гьугъ мазалей хуьшде  
мено. ГІэруьсе у е чубугьлереш эзинжо э унжо вегирде норе ни-  
гьишд. Гьеме коре ю сохденбу э жигей гІэруьс хуьшде.

ГІэруьс энжэгъ дануьсденбу хурде, хисире. Песде уре, чум ма-  
расо, ченд е гомиш ишдоьгъ бу. Гьечи эз омбар хурде, хисире, гьич  
кор несохде у диеш лап чоьгъ биребу, э рэхъ рафдеки жендек эну  
эдембу лем-лем сохде. Сер-дуьл энугьечи лет гирдебу, ки эз чоьги  
у гІэилиш нисе мунденбу, чум ю гье э хов вебу.

Оммо Шими хуьшдению лап бирази бу эз гІэруьс хуьшде. Сер  
зиьди зен Шими э хоши-меэхьэфи, гуж-хушевоз гьишдембу шуьвер  
хуьшдере берде хэгьерзорей хуьшдере э ки духдиргьо-жерэхьгьо  
эри эну е чоре сохут, пигъ сер дуьл энуре е кем хьэл сохут, у гІэил  
муну гуфдире. Эз серботи эн гІэруьс Шими не зен юре э хуне гье  
гоф-гоф, дуьлмундеи биренбу. Шими визор-гизор омореву эз гІэ-  
руьс хуьшдере берде-овурде э кин духдиргьо-табибгьо, эри комики  
угьо е чоре сохде нисе дануьсденбу.

Е гиле Шими э гІэруьс хуьшдеревоз эз ки эн е духдир вогош-  
денки, у гІэруьсе э хуне декуьрде, огол зе э ки хуьшде э жейлее  
утоьгъ зен не кук хуьшдере эри э угьоревоз «пэхьние меслэхьэт сох-  
де». Шими дер-пенжерере хуб сэхд сохд, екиш нешинову гуфдире,  
чув гуфдире вонсдениге уре, омо нуьшд э пушой энугьо. Песде те  
ебо сер гофе веровунде, Шими вегирд эз сер хуьшде килэхьэ, э е  
дес э килэхьэвоз сифет хуьшдере сэхд сохде, э десигеревоз сине  
куфде-куфде сер гирд эри келе-келе гирисде. Ранг эн зен Шими ве  
эн кук ю гьеусэглэт дегиш бисдо. Угьо э дуьл ишу гье усэглэт шек  
сохдуьт е беде кор омори гуфдире э сер хунешу.

— Ой мерд, дуьлме лов бисдо, негуи чьуниге, чув гезиро омо-  
риге э сер иму?! — э зэхьлевежэгьиревоз мугу зен Шими.

— Бошгу, негуфдире чоре нисд, и коре эз ишму пэхьни сохде  
гІэмел ниьв, — килэхьх гене дуборе э сер хуьшде веноре, гьирке  
сохдере хуно, мугу Шими. — И е лэглэво ме гІэруьсе э ки духдир

бердеки, у гІэруьсе фегьм сохд, гуш вено, песде уре ведекуьрде, эз ме мугу: «Лелей Шими, хуьшдере дуьл дит, кор гІэруьс ишму омбар усолн. Жунсогъэ, жогьнле одоми уре хуно гьечи нисе вемасире. Э шуьгъэм энугуб, хос небирение гІэзор дери. Эз духдиргьотабибгьо дие эри энуге чоре нисд. Омбар мундиге эри энуге эри зигьисде энжэгъ се мегь, оммо ишмуре дер гІэил бире-небирей энугирди, чуьтам гуфдирениге э метелегьо: «Кечире дерд жун гирди, гьэсобе дерд пигь...»

И гофгьоре гуфдире версаде бэгъдо, Шими э дердимендиревоз сере жумунде-жумунде, гирисденире хуно мугу:

— Дие имогьой биренигьо бири, гІэруьсе э е жигеш берде э духдиргьо негьогъ инжимнш сохде терек нисди. Бигьил э гьэд эни се мегь эри хуьшде олхогьин хуругу, хисуьгу, чуьтам те имогьой ухуте бириге э хунейму. Оммо ме хосденуьм эз ишму: ме и э ишму гуфдире сура е доне одоми эзиму бэгъэй медануьгу...

Чуьтам э метелегьо гуфдирениге: «Се одоми дануьгьо сур-сур нисди». Е оринеш негирошд э товун Шими э зен не кук хуьшде э пэхьники гуфдире гофгьой энуге чуьтари кориге э гушгьой гІэруьс раси. Зэхьлей гІэруьс рафд эзи хэбер. Дуьл, нешумой энуге имогьой е дэгъдэгъш динж небу. Эз терс у эз се мегьнге бэгъдо мимуьруьгуфдире уре не хов оморенбу, не ишдогъ бу эри чи хурде. Руз-бе руз и чогъэ бисембее гІэруьс эдембу сухде шэгьми хуно хьэл бире. Гьечи эз терс, эз хьэлегигери эни кор э гьэд эн се мегь у лап эз жендек офдо, лэгъэр бисдо. Шими денишире диренге гІэруьс лап лэгъэр бири, гувэхди у гене огол зе диловунд э жейлее утогъ зен не кук хуьшдере эри пэхьникие меслэхьэт сохде э гьуревоз.

Угьо гьерсееки нуьшденки, Шими э угьо хуб денишире, лове э шоре хэнде веберде, мугу:

— Вессит фикир кеширейтгьо э товней гІэруьс. Уре е гІозориш нисди. Ме ишмуре фурмундем!..

И гоф шуьвер хуьшдере шиновусдки, зен Шими эз мэхьтели, бидэгьэти эни кор энуге суьфде перт-лол бисдо мунд э жигей хуьшде, песде лап хуьршлуь, гьоси бире, хьэрой вегирде э сер Шими, мугу:

— Элле, эй мерд, руш бебейтуь, муй дейтуь бурра биёво! Гьечиш кор бирени?! Ижире гофеш одоми эз хуьшде медешенуьгьемеймуре хьэлегигер мисоху? Езугъэ гІэруьсме гириге эз терс немурдегьо рэхь гьншди... Мере э туь гьнсмет сохдигьо гьич э зир сие хокгьош динж мегердо!..

Шими мидениши мивини зен ю лап э хуьрш веромори, э хоширевоз мугу:

— Эй зен, туь хуьшденитугь небири бегем сер-гуш мере берде биригьо: бер гІэруьсе э ки духдиргьо, жэрэхьгьо, угьо эри энуге чоре соху, гІэруьс лэгъэр бу, э герден ю гІэил верав?..

— Эри, гуфдиребируьм, — мугу э гьэгьревоз зен Шими. — Оммо ме негуфдиребируьмки э туь ижире эз хуьшде дургунигьо

ведешенде, имуре хъэлежигер сохи? Эзи кортуь гІэруьс кем мун-дебу муьрдени.

Шими гене сер гирд хуьшдере эри расд ведировунде э пушой зен хуьшде.

— Эй зен, гуш вени ебо, — э хоширевоз гуфди Шими. — Ме денишире диренге, духдиргъо эри хэгьерзорейтуь е чоре сохде нисе дануьсде, ме увэхди эз хуьшде ижире гоф-гІэмел ведешендуьм гІэруьс терсуь, дуьл ю гье дэгьдэгьэ бу эз терс жун хуьшде, лэгьэрбу, песеде, худо гьишдге, э герден ю гІэил верав. Имогьой, — э жуьргІэтиревоз мугу Шими, — гІэруьс иму гене э гьолинди эн е челег эри небире, туь недеворе хуно э иловлей эну вечаруьсде мепой, бигьил кор хуне-жигере соху, и гІэруьсгьо-духдергьой эн членгьой колхоз имуре хуно биеьвгу э колхоз кор сохугу эз дес ю вероморере хуно. Эз кор жубте дерму, чоре, де дермуйге, де чорейге эри гІэруьстуь нисди!..

### «МОДНИ ГІЭРУЬС»

Е гиле Шими Дербенди э хуне недереки эри чуьклен кук эну е жогьиле «модни» духдере нумгир сохдебируьт. Келе мерд Шими гьеле уре е гилеш недиребу, унепуьре у э кук хуьшде гьэдэгьэ зе себэхь эз нуминей ю теклиф соху гуфдире э хуне нумгир хуьшдере эри шинох бире э уревоз.

Себэхьимуьн гІэруьс омо раси э хьэет эн Шими. Оммо гІэруьс тэхьно неоморебу. Уре эри рэхь сохде э хуней Шими э уревоз оморерибуьт бирор не кукгІэмлей эну.

Шими гьетте шиновусде гІэруьс омори, у э хьэети, шори-шори вэхишд эз жигей хуьшде. У ю эри гІэруьс восдоревугьо бэхш — энгуьшдериере вегирде, зури-зури ведиромо э хьэет эри хош-омори, омбаракбу сохде гІэруьсе, песеде э мигьровуниревоз теклиф сохде уре э хуне.

Оммо келе мерд гьетте угьоре дире э жигей хуьшде гьогь-мэхьтел мунд. Э сер-тен энугьо денишире, Шими недануьсд сеч сохде, шинохде комини энугьо гІэруьсиге, комини бирор гІэруьсиге, комини кукгІэмлей энуниге. Муйгьой эн гьерсей энугьо дураз бируьт, э пой гьерсей энугьо е жире дуразе шоволгьо, э тен энугьо гье ежире ранги-берангие шеи, э герден гьерсешу зенжил э медальоневоз вебируьт. Гьерсей энугьо жовон бируьт, эз сер-сифетиш лап эеки ухшеш зеренбируьт.

Шими хэйли поисд э пушой энугьо, хуб э тигьэтевоз дениши э сифет ишу эри дануьсде, гІэруьс коминиге эзугьо эри омбаракбу сохде, уре, бэхш доре уре. Шими килэхьэш зверо веберд, э чум хуьшде чешмекгьош вено, эз пушош, эз песо хуб э тигьэтевоз фегьм сохд угьоре, оммо гене недануьсд сечмиш сохде комини энугьо де-

линеигеэ, комини мерд хэйлогъине. ГӀэруьс не кукгъо диренге э чуй думит, четини домундиге келе мерд, сер гирдуьт эри хэндуьсде. Шими бирден гӀоси бире, десе жимунд, энгуьшдерире доно э куьф хуьшде, э лой хуне денишире, эжеки гьейсэгӀэт кук ю эдембу э дешу кумекни сохде суфрере эри веравунде, е келе хьэрой сохде, мугу:

— Эй хэлефме! Туь э беберевоз мирош! Туь мере э чуй бологъ, серегижи дешендей? Ме эз же дагуьсденуьм эзи се одоми энигьонумневеригъо, комини энигъо ализе одохлуйтуьниге, комини бирюниге, комини гьовумюнниге. Эхи эн гьерсей эни гьэретиконгъо муй сер ишу эн оворе девруьшгьоре хуно дурази, э тен гьерсешу е жире шеи-шовол вери, э егьден ишу зенжил дери, гьерсе э еки ухшеш зеренуьт, гьерсе, гӀэйб-гӀор недануьсде, э сифетме, эн келе мерд, денишире эдете гӀэсбе хуно шихъине зере, хэндуьсденуьт. Э жун бебейме, ме неки, садан-гьэлифош угьоре дуь эз еки сечмиш нисоху, комини делинеиге, комини — наринеиге!..

## ШИМИ ВЕ ФИРДОУСИ

Е гиле э дес Шими офдоребу е книг, э комики стихигъой эн буьзуьрге шогьиргъой иронигъо, таджикгъо вебируьт. Шими э пужевоз «юхуле-будуле» хунденге у книге, бирден юреш воисд нуьвуьсде стихигъо, хуьшдере э гӀэрей шогьиргъо эри дешенде.

Те егиле у сер гирде эри стихигъо нуьвуьсде, Шими эз кухни огол зе овуирд зен хуьшдере ебо э уревоз эри меслэхъэт сохде э товун эни кор.

— Эй зен, — мугу Шими эз зен хуьшде, — зугьун ирони-таджики нен иму э еки омбар ухшеш зере. Меселен вегирим виним ижире меселей таджикгьоре. Угъо гуфдиренге: «Занро муяш дораз, эгъуьл ю кутагъ», иму хуб верасиреним гофгъо ве мэгӀной эни метелере, егӀни, эн зенгъо муй ишу дурази, эгъуьл ишу кутэхъ.

Зен Шимире хьэз неомо эзижире метеле Шими гуфдигъо эри эню. У ю хуьшдению шуьвер хуьшдере унгъэде эгъуьлменде одоми хьисоб нисе сохденбу эз товун жуьрбежуьре гӀэжоибе, томоще, делхэке жоргъой эню.

— Гьери гу бура чуй воисдеге туьре! — э бирази ве битобиревоз мугу эз Шими зен ю, — эхи э сер кинле мере гьингъэр вери...

Шими неденишире э гьэгъри бирей зен хуьшде эз товун у гьейсэгӀэт овуирдгъо метеле, э олхогъиниревоз мугу:

— Гуш вени ебо, ой зен, буьзуьрге Фирдоуси эзи гьозор сал пушо нуьвуьсди э зугьун фарси е келе десдон «Шогъ-Номе», оммо у эз зуревоз муьрдигеш, нум ю теимогъиш зиндеи, тэгӀрифлуьни э гьемей гӀуьлом. Меш эриме фикир сохдем: эгенер Фирдоуси ижире гӀэлемете десдоне яратмиш сохде дануьсдиге э зугьун хуьшде,

нуувуьсде, нум мере э гӀэрей эн шогъиргъо дешенде, ки дануьсде, белки нуммереш нум энуре хуно ме муьрде бзгъдош одомигъо э Ӏр овордуьт, тэгӀриф дорут? Чутьтам оmore эритуь?

Зен Шими соводсуьзе одоми бугеш, верасиренбу, ки эзи кор шуьвер ю гъичиш нивеиров, у негъогъ эдее сер хуьшдере дорд доре, унегуьре мугу эзу:

— Эй мерд, шогъиригъо нуувуьсдеи кортуь, гъинортуь нисди. Шогъир одоми биэ эз деде бу, коргъой гуюгъоре хуно: «Бирение вече э гъэд хое жив зере». Туь хьофдод сал зигъисдей э и гӀуьлом, руш сипи сохдей, е доне шогъири не нуувуьсдей. Те имогъой эз туь шогъир небиренге, эзимбзгъдойге гъич нибу.

Шимире хъэз неомо эзи гоф, веснет зен хуьшде. У эз зен хуьшде гъзгъри бире, фирсо уре э кухни.

— Э-э-э! Бигыл бура э жигеътуь, читуьре сох! — мугу Шими э сер зен хуьшде хъэрой вегирде. — Негъогъ нисе гуфдире э метелегъо: «Э зеневоз меслэхъэт сохдеижон, жилэхътуьре ни э пушой-туь, э уревоз меслэхъэт сох».

Шими зен хуьшдере фирсоре э кухни, вегирд гъалем, дуфдере, вено э чум хуьшде чешмекгъо, сер гирд шогъиригъо эри нуувуьсде. Оммо нуувуьсде чигъой энуре, чутьтам гуфдиреге, не сер вебу, не дуьм, еки эз догъ, еки эз дерьегъ бу. Шими ю хуьшденнюш эдембу верасире, ки нуувуьсдегъой энур — буш-буше гофгъоют, е лепе, мзгӀно э угъо недери, гофгъош эеки унгъэде гуьнжо нисе оmore-нуьт. Оммо неденишире э и кор, Шимире эз гъзгър зен хуьшдеш воисденбу гьерки бисдо и «шогъиригъой» энуре тэгӀриф дуь гуфдире. Гъе и вэхд ижире фикир э дуьл Шими дерики, дер хуней энуре вокурде, дироморут дуь одоми. Еки энугъо винодел эн колхоз бу, эжеки Шими кор сохденбу, е гъирмизине сифет гъолинде вама-сире вини, пура, чогъэ мерд, унигейге ветеренар эн колхоз бу, е жогъиле мерд, комиреки келе гиргине раче олхогъине чумгъой эн гуселеи вебируьт. Гьердуьй энугъо кефлуь, серхуш бируьт. Угъо эз гӀэруьси хуне эдембируьт вогошде э хунегъошу. Оммо гъейсэгӀэт эз Ӏн хуней Шими э гирошдеки, угъо эришу норут эри дерафде сер кешире э хуьурметлуье огъсэгъгъэл Шими Дербенди.

Шими угъоре диренге, омбар шор бисдо. У гъуногъгъоре хош омори сохде, дес ишуре гирде, огол зе нуьшунд э сер стол. Зен хуьшдере гъишд суфре дешенде, гъингъэр декуьрде, оворде е бутылка эрэгъиш норе э пушой энугъо. Угъо бутылкай эрэгъире хурденге, Шими э угъо теклиф сохд ю эри энугъо нуувуьсде шогъиригъой хуьшдере эри хунде.

— Омбар хубе шогъиригъои, лелей Шими, туь нуувуьсдейгъо, — тэгӀриф до винодель, гъирмизине сифет, вемасире вини небеледе стихигъой эн Шимире. — Э шогъиригъойту гуйге хушбуь эн шороб



«Мускат» дери, нерми эн «кагор», ширини эн «портвейн», туьнди ве палаши эн тэгҮрифлуье каньякгьой Дербенд. Расдире гуьом, ме те исэглэт, те п стихигьойтуьре эриму хунде, недануьсдем, туь гьэ-гьигьэтиш зиреке, талантлуье шогьири туьфдире.

— Пой меш гуьом фикирмере, — э жигей хуьшде э битобиревоз жимуьсде, гуьфди ветернар э раче, гиргине олхогьине чумгьой гуселевевоз. — Шогьиригьойтуьре, ме шиниренге, эриме пуйге гьугьуй эн уьткеме хуруз э пушой себэхь, шихьиней эн чогаэ бейтол э минжи савзелуье мерж-чемен, гьуьре сес эн эшгьлуье жингов э сер эн гьуьсуьре гов э рафдеки, мэгҮ зерей эн сирое гусбендгьо э этэгь ишу э вогошдеки дерафдуьт э гуьшме. Ту, лелей Шими, бебей эн шогьиргьоймуни, келегеди ве ярашугьги эни чуькле хэлгь имуни.

Шимире омбар хьээ омо эзи тэгҮрифигьой эн гьуногьгьо. У лове э шоре хэнде веберде, гене огол зе зен хуьшдере, мугу:

— Биёр ни е бутлкайгеш эрэгьги эри гьезизе гьуногьгьойму!

Гьуногьгьо дуьвимуьн бутылкай эрэгьиреш хурденге, уьго сер гирдуьт диеш зиьдте эри тэгҮриф доре нуьвуьсденгьой эн Шимире.

— Мере, лелей Шими, омбар хьээ омо эз нуьвуьсденгьойтуь, — зугьун ю пичире-пичире гуьфди винодел. — Шогьиригьойтуь э муьвэхь, э дуьл одоми эзи кьуьгьне, гьэдимие шоробгьоре хуно кори сохде, тозе сохде. Туь неки зиреке, талантлуье шогьири, гьемчун хьохмолуье шогьири.

Ветернар рази бире э гофгьой виноделевоз, э разимендиревоз сере жумунд, песде вэхишд э пой, лойлум хурде-хурде, дуь десе вено э синей хуьшде, сер зе э Шими, э падшогь сер зенуьгьоре жуно, песде гуьфди:

— Ле-лей Ши-и-ими! Чуьтав суьмуьргь эри гьеме парандегьо падшогь гьисдиге, туьш гьечу падшогь эн шогьиргьоймуни. Баракаллогь! Баракаллогь!

— Эй зен, биёр е бутылкайгеш эрэгьги! — буйругь до Шими э зен хуьшде, десе э уьткемиревоз э бел хуьшде веноре, дениши э зен хуьшде, егҮни: дениш-виниш, чуьтам тэгҮриф доренуьтге гьуногьгьо ме нуьвуьсде чигьоре?!..

Гьуногьгьо сеимуьн бутылкареш хурде верасденге, гене сер гирдуьт э лап пичире зугьуневоз эри тэгҮриф доре стихигьой Шимире.

— Хуби, хуби, лелей Шими, туь нуьвуьсде шогьиригьо, — мугу гьирмизине сифет, вемасире вини. — Ежиш гьеле эз шогьиргьойму ужире шогьиригьо не нуьвуьсди. Туь чуьшмей эн поэзиеймуни, чуьш-ме!

Гене диеш лойлум хурде-хурде э гужевоз нэхишд эз нуьшде жигей хуьшде гиргине чумгьой гуселеи.

— Эй лелей Шими, — мугу у, — гуйге хьэрекет сохде эри не-нибуми меш э зугуьнме, э зугьун тати еботе шогьиригьо семе

демунде эз винодел эй тэгАриф дорей Шимире, — Падшогы гьичиш нисди э пушойтуь. — Туь — худой эн шогьиргьоймуни! Худо!

Ветеренар шуьле хуно э сугъразани фурамо, пушони хуьшдере вено э хори э пушой пойгьой Шими. Зен Шими диренге э чум хуьшдеревоз, шиновусденге э гуш хуьшдеревоз, чуьтам оmore гьуногьго гьечи тэгАриф доренуьтге шуьвер энуре, и дес Шими негуждирекн ю хуьшдению куьнд омо эз Шими, мугу э гуш энур:

— Биёрум чоримуьн бутылкареш эри гьезизе гьуногьго?

Шими э суьпле хэндеревоз денишире э лой эз хурде эрэггьго лап гиж, лул-пиён биретгьго гьуногьго, мугу эз зен хуьшде:

— Эй зен, э жун бебейтуь, божэхьэт э гьуьмуьр хуьшде еки эз лап келе шогьиргьой гьуьлом буьзуьрге Фирдоуси шиновусдиге ижире тэгАрифгьго эри шогьиргьой хуьшде. Эзи угьо гуфдире тэгАрифгьго дие зиьдте тэгАрифи нибу. Унегуьре дие герек нисди чоримуьн бутылка эрэгьире овурде, негьогь хэржи сохде...

## ГУСБЕНД ЭРИ МЕЖЛУЬС

Нум эн келеи невей Шими нум эн бебей зен Шими бу. Унегуьре зен Шими келеи невей хуьшдере эз гьеме невегьой хуьшде омбар хосденбу. Хотур энуре эри е кориш кисе гьишдембу. У невей хуьшдере гьемише э нум юревоз огол нисе зеренбу, «Жон-Бебе» огол зеренбу. Оммо эз «Жон-Беле» екиш шор небу эз келедеде бэгъэй. У э школа лап усол хунденбу. Шохьонгумгьго э жигей э хуне нуьшде нубогьой хуьшдере эзвер, хьозур сохде те нимешевгьго э гьизилгьоревоз э кучегьго мунденбу. Нединжи омбар сохденбу. Шими енебуге кук ю эз коргьой эн «Жон-Бебе» гьоси бире, сер мигирдуьтге уре гьелебуле доре, куфде, дэгИно зере, зен Шими гье усэ-гьэт э песой невей хуьшде медиromo, нигьишд екиреш «Жон-Бебере» гьэгьри сохде».

Гьечи сикелуь, эз екиш гьизиб, терс недануьсде, недан, тембел эдембу келе бире Жон-Бебе.

Эхириш Жон-Бебе «юхуле-будуле» школаре верасденге, Шимире воисд уре вегируь э ки хуьшде э юревоз, л бригадаю э колхоз эри кор сохде, чуьнки эзу гьечиш-гьечуш хундгор нибу. Оммо зен Шими не гьизруьс энур — дедей эн Жон-Бебе шиновусдуьтки э товун энижире фикир Шими, поисдуьт э хуьжет, э женг э Шимиревоз.

— Туьре воисдени гьизилме туьре хуно гьемише бил зенуь?! — э хуьрш ве серкуширевоз мугу гьизруьс Шими дедей эн Жон-Бебе. — Гьечи хосде туь невейтуьре?!

Э гофгьой Шими неденишире, гьизруьс энур берд Жон-Бебере э коми шегьериге э пишкешгьго-рушвегьоревоз э э техникум декуьрд.

Оммо се мегънш негирошд эз Жон-Бебе э техникум хундеи, е руз эзу э сер Шими омо ижире телеграмма:

«Келебебе, коргъо усולי! Мере гъеме «дуйвойкагъои». Терсире-нуьм мере эз техникум пиш мисохут. Зу-зу веги эз хуне э хуьшдере-воз е пура совуй эн хубе шороб не е гусбенд, инжо е хубе междуьс сохум, мере герек гъисдигъо одомигъоре гъуногълугъи сохум э жигейме эри мунде. Жон-Бебе».

Гъетте ижире телеграмма оморе эз Жон-Бебе гӀэруьс Шими не зен ю э хуне е келе жевгъ, шивен сохдуьт, пуйге э хуне одоми муьрдиге. Угъо хъэлово бисдорут э Шими дир несохде вегируь э хуьшдере-воз е сову шоробе, е гусбенде эз говдушу, бурав э ки неве.

Чорей Шими небисдо, у е келе совуй лугъире шороб пур сохд, бесд уре э расере-воз э кемер хуьшде, эз говду вегирд лап чогъэ гусбенде, э сер энур расе бесде, омо э вогзол. Шимири имид бу гусбенде э «ешик сеги» миденуь, э ю венуьшугъо вогун, согъ-саламат миѐв мирасуь э шороб не гусбенде-воз э невей ю хунденигъо жиге.

Шими э вогзол оморенге гъемин уре герек гъисдигъо поезд э рэхъ поисдебу, энжэгъ чор-пенж минут мундебу те поезд э рэхъ офдорени. Шими терсире, ки те ю э очередь поисде, билет вегирде эри хуьшдеш, эри гусбендиш, поезд э рэхъ мофдону, у расере сэхд кешире-кешире, э сер гусбенд хъэрой вегирде-вегирде, э тепи-кевоз уре-зере-зере, тэгӀди-тэгӀди овурд э ки вогун. Гъетте э ѐн пилоконгъой вогун куьнд оморе, гусбенд сер гирд эри нэхъси сохде, песово доре хуьшдере, кешире берде э хуьшдере-воз Шимири. Шими уре эз суьргъо, пойгъой энур гирде э вагон э вебердеки, зен-кондуктор э хуьрше-воз пушой энуре гирде, мугу:

— Эй, пире мерд, туь чуь сохде? Эже кешире деберде туь гусбенде? И вогуни, гӀэребе нисди эритуь!

Шими э гуже-воз сэхд гирде гусбенде, воисд юре э хуби-хошире-воз гую э кондуктор, егӀни, э товун гусбенд пуфдирениге у, «холисе гусбенд» энур эдее э техникум хунде, и у э вогун веберденигъо «гушди эри кобоб, эри междуьси...». Оммо гъетте Шими лэгӀэ во-курде и гофгъоре эри пуфдире э кондуктор, нэхъсе гусбенд, е кем песово до хуьшдере, песде э е зарбе-воз гъов кенде оморе э сер Шими эз гъемей гуж-гъувот хуьшде э сер, суьргъой хуьшдере-воз зе уре эз зофруй шуьгъэм эн сэхъиб хуьшде. Расе гъе усэгӀэт рэхъо бисдо эз дес Шими. Эз Шими е келе ноле ведиромо. У десгъоре лов сохде, кутукире хуно офдо э сер гъир эн перрон вогзол э пушой эн вогун э сер кемер. Пура совуй шороб гуйге бомбаре хуно э е сесе-воз лов бисдо. Эн Шими гъемей парталгъой ю, жендек ю, иловле, у офдоробугъо жиге, тар бисдо эз шороб. Гусбенд э расере-воз гъе и туьтем мэгӀэ зере-зере вирихд видов-видов эжеиге.

Шими э гуже-воз вэхьшд э пой, эз партал ю шороб рихде-рихде,

э иловлей хуьшде буй шороб лов сохде-сохде, омо э почта, гьшнд нуьвуьсде духдер-телеграфисткаре эз нуминей хуьшде эри неве: «Жон-Бебе, коргьо усоли. Совуй шороб э рэхь хуьрд бири э хэре мазалайтуь, гусбэнд эри межлуьс вирихди, те туьре тепуьк зере ведижирде, туьш вирих бнѐ. Келебебе».

## ЧУЪТАМ ШИМИ Э ХУНЕЙ ДОМОР РАФДЕБУГЕ

Е духдер эн Шими Дербенди э шуьвер хуьшдеревоз э дигь зигьсденбу. Е гиле Шими не зен ю бэхшгьо, ширинигьо восдоре, э туморе доноре, рафдуьт э у дигь э домор-духдер хуьшде эри сер кешире, невегьошуре эри дире. Э кьундигьгой эн дигь е чуькле, омо туьнде чой бу. Шоволгьгой ю тар небу гуьдире, Шими шоволгьгой хуьшдере векенде, доно э зир гьултугь хуьшде, песде дарафд э гѐд гѐв. Оммо Шими э минжи чой диромоки, пой энэ нэхэберки чемуьсд, суьрт рафд, офдо у э гьэд гѐв. Шими э офдореки, шовол энущ офдо эз зир гьултугь энэ, гѐв берд уре. Шими мунд шоволбирэхьне. У гьечи шоволбирэхьне эз чой ведироморенки, домунд э хуьшде: чуь сохуге? Бирден э ѐр энэ омо, ки э туморе, э кул зен ю веригьо, унжо тозе гьирмизине пожей эн зен ю дери.

— Эй зен, — мугу Шими эз зен хуьшде, — туь эдее дире, ме шоволбирэхьне мундем. Ме келе мерд э ижире рушевоз чуькле гѐиле хуно шовол невери, кун бирэхьне э дигь кес, э пушой хэлгь веди бире нидануьм. Ведеше эз туморе гьирмизине пожейтуьре, вокунум э жигей эн шоволме.

— Эй мерд, — мугу зен Шими, — туь пожей зенунере вокурдиге гьеме э туь михэндуь. Туь гьечу э пушой хэлгь нимейту мерд, нимейтуь зене хуно веди мибоши. Вокү э туморе деригьо булши мереш, деги э сертуь сефдегимереш э жигей килэхьтуь, рушгьойтуьреш пэхьни сох, туьре диругоргьо гьерчуь дануьт ту мерд нисди, зени. Увэхди екиш э туь ниденишуь, нихэндуь.

Шими и гоф эн зен хуьшдере шиновусдки, у гѐси бирере хуно бисдо, эри энэ и гоф эн зен ю охмури зеренре хуно омо. Шими келегеди сохденбу у, худоре шуькьур, зен нисди, мерди, э сер энэ сефги нѐгѐ, килхь вери.

— Эй зен, — мугу Шими эз зен хуьшде, — бигьил ме нимей ю мерд, нимей ю зен бошум, томом туьре хуно зен бирейно!..

## ХЪЭЙКЕЛ

Зен Шими Дербенди э ховгьо, гьэлифегьо бовор сохденигьо одоми бу. Е гиле у э хов гьэлифоре диреду. Гьэлифо диромореду э хьэѐт энугьо, дуьме вежогьунде-вежегьунде, эдембу хуьшдере ве-

шенде-фушенде. Гъэлифо шуьвер энуреш — Шимиреш чешмиш сохде эдембу гыише уре меймуре хуно вежегынде э хуьшдеревоз. Сег домойдери энугьош э гъэлифо не сэхьиб хуьше денишире, дуьме тим-тик гирде, э дуь пой поисде, шори сохде, зузе зере-зере эдембу вежегынде э гIэрей энугьо.

Зен Шими эз хов хэбер биренге, гьелемеле олхогын бире недануьсд. Гъэлифоре э хов дирей эри эню хубе жор неомо, ченд жире фикиргьо, мэхьшевогьо омо э дуьл эню. У тоб недо, Шимири хэбер сохд, гуфди э у э дуьлпесонривоз чуьжире хов у дирите шову:

— Худо э ники ведеборо, э ники тэгIбир сохо песой эни хове. Э жун худо, терсиренуьм э сер нэхогьтуь е кор неьвге.

— Э-э-э, пой бура, туь мунош э зен! Гьемей эню ховгьо — синдила ихдилотгьои, гыч э фикиртуьш меге, — сер гирд Шими эз ховолуьи лэгIэпара сохде-сохде, эри олхогын сохде зен хуьшдере.

И гофгьоре гуфдире, Шими чумгьоре гене сэхд сохде, чаруьсд э гъэбуьргъэйге эри хисире.

— НэгI, — мугу зен, — те ме э ки фолчи нерам, у эритуь е хьэйкел ненивуьсуь эз туь дие гъэлифо куьнд неьв гуфдире, э сер нэхогьтуь е кор эри неморе, дуьлме динж нибу, Оммо э ки эню фолчи-питички дестигыи рафде гIэмел ниьв. Чорейме нисди, биё беруьм э хуьшдеревоз у е теке тургур имуре эри эню, бэхш дуьм уре, эритуь е хубе хьэйкел-тилисим нуьвуьсуь.

Гьетте Шими нум гургуре шиновусде, хов Шими гье усэгIэт паруьсд, у эбрэгь гезире одомире хуно вэхишд эз хьэлов, нуьшд э ён зен хуьше, сер гирд уре эри э «сер дешенде».

— Эй зен, — мугу Шими, — е гилейгеш эдее гуфдиренуьм э туь: гьемей эню ховгьо нэгьуьле ихдилотгьои. Хове неки одомгьо, дуразруй бебегьо-дедегьойму гьушгьо, хьэйвугьош диренуьт. Керг, меселен, гьемише э хов дон, эрзуь дире, назу — муш, сег — остгьу, хэрме гьемише э хов хуьше дуьшие хэр эн гьуншимуре дире, эхирки, эз товуней чуь фикир, ниет сохдениге, гье у оморе э хов э пушой чум. Оммо ме мэхьтелуьм туь гъэлифоре эйчуь дирейге э ховтуь. — Шими е кем домунд э хуьше, песде гене мугу: — Бошгу, дирей-дирей, гъэйгьу нисди, энжэгь хосденуьм эз туь, туь жун гьоврехуней бебейтуь, у гургур имуре эри е негьогьне кор берде меди фолчире. Туь дануьсдени ме у гургуре восдорем, э десдин десмеревоз дон, чине дорем, бисембере хуно сохдем, согьигьо гердо, эри мигIид эри куьше, оммо туь эдее берде уре эри е ногьогьи пуч сохде, э бохд доре.

Шими гуфдире гофгьо э гуш эн зен недерафд. У гьетте себэхь хуб очмиш бире, партал хуьшдере вокурде, гургуре эз сарай ве-гирде, рафд э ки фолчи. Дуь сэгIэтиш негирошд, зен Шими э е ранги-рангие лугу духде хьэйкел э дес дери, диромо э хьэёт. У лове э шоре хэнде веберде, куьнд омо эз шуьвер хуьше, хьэйкеле доре э у, мугу:

— Имогъой э шори-нижиревоз дени и хъэйкеле э гердентуь, гъэлифо дие эз туь куьнд неёв, туьре, худо мдёрo, зерe гъэсд-шуькест несоху.

Шими гъич е гоф несохде, вегирд хъэйкеле эз дес зен хуьшде, песде гъе усэгIэт эз дуьм эн сег ишу гирде, бeсд хъэйкеле э герден энy. Зэхълей эн зен рафд и коре диренки.

— Эй мерд, туьре жин гирди, чуь сохде туь?! — хъэрой сохд у э сер Шими. — Ме эри эни хъэйкел е бисембее гургуре дорем, туь уре эдее вегирде э герден сег бесде? Эй мерд, худо одомигьоре эгъуьл доренге, туь э коми песо-пушо мундебири?!..

— Эй зен, негьогъ туь гIоси эричуь бире? — э олхогьиниревоз мугу Шими. — И хъэйкел сег имуре омбарте гереки эз ме, чуьнки у гъе э гъэд хъэёт дери. Эгенер гъэлифо э хъэёт диромоге, у хъэйкеле э герден сег диремунде, гъе усэгIэт хэрегуш эз овчи вирихугьоре хуно, мивируьхуь мадаров эз хъэёт, э ме гъэсд несохде. И еки. Ве дуьминжи, зен, худо одомигьоре эгъуьл доренге, ведини, увэхди ме э туь мухшул бире, э песойтуь мундебируьм рафде. Унегуьре э ме эгъуьл нерасири. Эгенер и бедбэхде сермере эгъуьл мебисдоге, ме туьчуьни хэре, мувэхъусуьзе зене нихосдум бологъ э серме!..

## БЭХД

Е гиле э керггъо-вечегъой эн Шими гIэзор офдоре, гъемей энугъо муьрдебируьт. Э кергелуьй энy уре энжэгъ е чуькле, эблэгъэ-эблэгъэ кергле демундебу. У сохденбугъо хоеш чен е хоей эн ковтер бу. Сер зиёди и керг Шими гьетте хое сохде, мерафд э сер чапар, сер мигирд согъ е сэгIэт эри шоггъо зере, сере тик гирде, дуьме вешенде-фушенде, келе-келе жар дешенде э гъемей мэхъэле: егIни, гъеме данит, ме хое сохдем!

Е руз себэхъмунде Шими ведирома э хъэёт, мивини гомиш эн гъунши бала зенди. Тозе зенде бодогъле, гъемей ю тари, суьфделе э пой вэхиди, лойлум хурде-хурде, эдее эз пушдун дедешу шир хурде. Гомиш гъуши э бала зендеки, екиш сес энуре нешиновусдебу. Оммо гъе и вэхди керг эн Шими хое сохде, верафдебу гене э сер чапар хъэёт эдембу келе-келе шоггъо зере.

Шимире лап гъэгър омо эзи шоггъо зерей эн керг хуьшде. У эз хори вегирд е кесеге, э зарбевез шенд э сер керг хуьшде, у лэгIэ гируь гуфдире.

— Э и нефое денишит ебо! — мугу Шими э хуьршевоз э сер энy э кесег шендеки. — Гомиш эн гъунши е келе ченд е пуд гурунди бала зенди, оммо сес-суьмуьг энуре екиш нешиновусди. И кергме эриме е синдила хое сохди, э гъеме-куче-мэхъэле эдее хъэрой сохде...

## ЧУЪТАМ ШИМИ ЭЗ ХЭР ХУЪШДЕО ГЪЭГЪРИ БИРЕБУГЕ

Е гиле колхозчигъо гъовой шохъонгум пушой чъышме дерафде эз кор э вогошдеки э рэхъ богъгъо вохурдуът э Шими. Шими э кул хэр вебу, уш эдембу э шегьер вогошде. Оммо Шими э жигей пушово нуъшде, песово нуъшдебу э кул хэр. Гъовой эн хуъшдени Шимиш гъэгърире хуно 'бу, гъошгъо-гъобогъгъой ю дуллу бируът. Дирогоргъо уре гъечи э кул хэр рафдеи, эдембируът хэндуйсде. Угъо эришу норут, ки кор эз г'эжойби, томошее хоснет Шимини. Еки эзугъо куьнд оmore эз Шими, пуьрси эзу:

— Эй Шими, туь тозе г'эдот ведешендей, э жигей э сер хэр пушово нуъшде э лой сер ю, туь песово нуъшдей, э лой дуьм ю?

Шими сере тик негирде, руге э лой хэр нечарунде, э десевоз бирмунде э лой сер хэр, мугу:

— Мере э сер-сифет энугу денишире нисе воисде, ме эзу келе гъэгъринуьм.

## ГЪЕР РАСДЕ ГОФЕ МЕРД ЭРИ ЗЕН ХУЪШДЕ НИЕГУЮ

Е гиле э лап четине косибе вэг'догъой эн Шими Дербенди, е руз поиз у нуъшдебу э хуне э пушой эн хинике кинле, эдембу думитгъо, фикиргъой хуъшдере кешире. Гъово дегирдебу, эдембу сайлове хуно ворущ оmore. Эз бун хунеш э ченд жиге эдембу дэгъ рихде. И ченд рузгъо у корсуьз 'бу. Уре э хуне г'орд недебу, не э куьф ю е гъэре шогъиш недебу. Зен юш пушой зенде 'бу. У гъейсэг'эт эз хиники гъуьж дироморе, нуъшдебу э куьнж хуне. Шими э келе думит, хэъл дебу, чъытам эз сер мисохуге поизе, зимисдуре, чъытам мидоруге у кифлет хуъшдере.

Шими гъечи э пушой кинле э ижире фикиргъо дери, уре хэбер небисдо кей чум ю э хифлет верафдге. У гъечи э нуъшде жиге э хисиреки, е г'элемете хов вини. У э хов эдембу э богъ эн хазеин кор сохде, э гъирогъ гъендэгъ, э биней эн е келе гъэрэбечдор эдембу чол векенде. Э чол векендеки бирден буз бил энугу э е куьгъне гъэдимие келе сову раси. Шими сер совуре мокуну, мивинуь, совуге бине бугъоз эршефи пури.

Шев торик биренге, Шими э кул хуъшде веноре совуй эршефире, миёру э хуне пэхъни мисоху. Себэхъимуьн Шими мурав э базар, мосдону эри хуъшде эзи 'беггъой эн 'Дербенд вокурденбугъо сипре чухой пешми э суьрхине везнегъоревоз, э кишд хуъшде мибесду гъэиш салланме э хэнжелевоз э гъоб 'нуьгъреи дери, э пойгъой хуъшде мекуну тов-товие мэхъсгъо, э сер менуь е гъуьндуьре

килэхь бухорен. Шими мокуну эри хуышде е келе дуь тебэгъэн ху-не эз сипре мармардаш, э пилонконгъо, шишихонегъоревоз. Мосдону эри хуышде фейтун, дуь испогъие гIэсбгъо. У кемер хуышдере э фей-дун ведоре, луынге э сер луынг веноре, э шегъер э гешдеки, гъеме э у э мэхътели ве бэхилиревоз дениширенуьт. Хуышдени эн полиц-мейстер Дербенд, комики и пушогъо гъишдебу куфде уре эри э пей-сой падшогъ усоле гофгъо гудфдиреи, имогъой уре гъечи э сер фей-тун диренге, тик поисде, белли доре. Келей эн шегъер, комики гъеле и пушогъо нисе дануьсденбугъо Шими э коми песо-пушо, су-ла-дере деригеш, е уьткеме одоми, имогъой сер зере у э гирошдеки. Келе гIоширгъой Дербенд Оврогъом Дадашев, Сефтер Ахундов, Менешир-Огъо, Хъэнух-Огъо, эри комигъоки у эри пенж-дегъ шо-гъи гъеле и перигъо эз себэхъ те шохъонгум э богъгъо, ветэгъэгъошу кемер гъэд сохдембугъо, имогъой уре чуьн той ишу хъисоб сохден-бируьт, э гъуногълугъи огол зеренбируьт, э мигъровуни ве хуьр-метевоз э уревоз гоф сохденбируьт.

Эзи мол-дэвлет хуышде эри диеш хъээ, шори дире, Шими-ре воисд э сер зен хуышде е зениге эри овурде, эз е гIошире, гъумол-етлуье хуне е жогъиле, раче гуьзеле эри хосде. Зен эню увэхдигъо жогъил бугеш, дие имогъой у эз дуьли Шими небу.

Е оринеш негирошд, Шими эз хуней эн е тожир хосд овурд е раче духдере, сип-сипи, баде хуно. Шими-ре эз шори эни тозе жо-гъиле зен хуышде жиге небу. Суьфдеи шев Шими диренге э сер нерме хъэловгъо, нерме болушгъо пуьзеле зен хуышдере эз дуьл эню лап келе шори гирошд. У сер-тен хуышдере зури-зури векеде, омо дегешд э ки зен хуышде. Суьфделе ловгъой эн Шими э гIэселе-гъэймэгъэ ловгъой эн тозе жогъиле зен ю, эн хонум, расиренки, у сер гирд эри хъээ хуышде Шими-ре гъили-гъили доре. Шими эз гъи-ли-гъили эню сер гирд эри шогъгъо зере, хэндусде. «Куьгъне» зен Шими диреге, ки шуьвер ю э хов эдее келе-келе шогъгъо зере, хэн-дусде, у лап дуьлпесо бисдо эз товун эни кор. \* Унегуьре зен Ши-ми зури-зури вэхисд омо э ки Шими, сер гирд уре эри шувунде, эз хов хэбер сохде.

— Эй мерд, эй мерд! Нум худой! Нум худой! Чумгъойтуьре воку!..

Шими гъе усэгIэт хэбер бисдо, чумгъоре вокурд.

— Кидан туь усоле хов дирейге, садан-гъэлифо омори э ховтуь, туьре хэндунди? — э дуьлпесоиревоз, дуьлсухуниревоз пуьрси зен Шими.

Шими виниренге зен хуышдере, шиновусденге гофгъой энуре, эз

---

\* Хурафатие (суевери) одомигъой хэлгъ иму бовор сохденуьт: эгенер одо-ми э хов гирисдге, у эри шорини, оммо у э хов хэндусдге — эри бедини, усол-ини. Э фикир энугъоревоз одомире э хов садан-гъэлифо хэндунде, вохурдеи э уревоз энжэгъ хэто, беда овурде эри одоми.



расдиш вараси, ки у есэгІэтгьойге дире коргьо, сохде хьэзгьо, шоригьо — угьо гьеме э хов биребей. Дуыл энү лап гьэреболугь, пешму бисдо. Шими е лугьонде ох вокоши, песде лове э мегьбуле хэнде веберде, мугу эз зен хуьшде:

— Эй зен, э жун бейтеуь, ме диремгьо хов усале хов небу, лап хубе, гІэлемете хов бу. Екем семе эзу ме э хов диремгьо шоригьо, бэхдеверигьо э эврие мидируьруьмге, ме хуьшдере келе мозоллуь, бэхдевер хьисоб мисохдум.

Зен Шими шиновусденге и тофгьой энуре, хьэлово бисдо э Шими ёгьин ихдилот соху гуфдире эри энү и «гІэлемете хов» хуьшдере. У омбаре хурофотие одомигьоре хуно бовор сохденбу, ки кимвэгІдо одоми э хов диренигьо коргьо бегьем бирени гуфдире. Белки хов шуьвер энү э кумеки худоревоз эжиге омоге, угьо эз тенги, михьтожи хилос мнбу.

Шимире эз зен хуьшде гьич е суриш небу. У гьемише гьеме фикиргьо, коргьой хуьшдере ихдилот сохденбу эри энү. Оммо эз товун эни у гьейсэгІэт диригьо «гІэлемете» хов хуьшде Шимире э у гуфдире нисе воисденбу, терсире, ки зен ю белки эз ю гьэргьри бисдоге. Зен лап э ю руй доноки, Шими дие эзу руй шенде недануьсд, гьемере эз сер те эхир у э хов чуй дириге, чуй бириге, гьич е кореш эз зен хуьшде пэхьни несохде, ихдилот сохд эри энү.

— Эй мерд, руш бейтеуь бурра биёво! — хьэрой сохд зен энү э сер Шими. — ЕгІни, э гуфдирейтуьревоз и туь дирейгьо хов «хубе, гІэлемете хови»? Гьетте туь гІошир бире зури-зури э серме зритуь тозе зен овордебири, ме туьре дие герек небисдорум?!...

Зен Шими гІэтош-пургури гирдере хуно, келе-келе гирисде, вой зере-зере шенд хуьшдере э е гьэзевоз э сер шуьвер хуьшде, сер гирд уре назуре хуно эри гьэрмэгь-гьэрмэгь сохде, зере э дуь муьшдевоз эз дуьшгьо, кемер энү. Чорей Шими небисдо, эз хуьрш, нифригьо, хьэройгьой эн бедрешке зен хуьшде, у зури-зури вирихд ведерафд эз хуне э зир дурфуй эн келе ворущ.

Е сэгІэтиш негирошд Шими гьемей ю тар-гІов межбур бисдо эри вогошде. Оммо у эз терс зен хуьшде э хуне недирома, дерафд э сарай, хэр энү дебиренбугьо жиге. Шев бисдоки у дегешд э сер гиевгьо эри хисире, эз комигьоки буй эн гІуьш нен серги эн хэр ю оморенбу, эри герм вероморе дегирд э кул хуьшде палангьой эн хэре.

Шими гьейсэгІэт э ёр овордки, чуйтам у эзи е сэгІэт пушо э хов келе гІошир бу, эз мармардаш вокурде оmore гьундуьре хунегьо бу уре э шишиехонеревоз, э сер нерме хьэловгьой пари э эвруьшуьмие руйхьэловигьоревоз дегешдебу э жовоне гуьзеле зен хуьшдеревоз, имогьой у эз надани, эгьуьлсуки хуьшде межбури эри хисире инжо, э сер тие хори, э ён хэр, э буй гирде говду, у сер гирд хуьшдере эри нифри сохде, серкуш зере.

— Гьечи хуби зритуь, сер неверие хэр! — мугу э дуьл хуьшде

Шими, гиридендире хуно бире. — И ченд сали туь эдее э зентуьре-воз зигьнде, оммо теимогьош недануьсдей, неверасирей: гьер расде гофе мерд э зен хуьшде ние гую?!.

### «ИМПОРТНЫЙ ХЭР»

Хэр эн Шими Дербенди е нэхьс, е жингир бу. Шими эз дес эни хэр хуьшде визор-гизор, хэсде-менде бу. Кими вэгІдо у эз дес эн хэр хуьшде гьечи келе инжимиш, гІоси, визор бу, чорей энү мибисдоге эз дес энү зар мидоно мигирисд. Гьетте пой хэр энү э луьхьме дерафде, гІуьломиш диомоге у дие эзунжо ниведиромо. Ту веги сер энуре э дегенегиревоз чэх сох, э кун ю буьз вогъун — гьич э хэпер юш нисе оморенбу. Шалбуз-догъэ эз жигей хуьшде жумунде мибисдо, оммо хэр энуре эз жиге жумунде нибисдо. Увэхди дие чорей косибе Шими нисе биренбу, у эз кул хэр хуьшде мифирамо, э сугъразани гьуз бире, мидарафд э зир шуьгъэм хэр хуьшде, э кемер хуьшде веноре уре, кешире медировунд эз гъэд луьхьме.

Енебуге гуим, Шими эдее рафде э кул хэр вери хуб-хос гъэйле э лэгІэ дери, э олхогьини-тегьнимиревоз. Гье и вэгІдои эгенер хэр энү эз дурине мивиниге е хэригере, иллогьки дуьшие хэре, жингир-серсуре хуно биренбу рафде. У эз шори е келе гІэреине зере-зере, мивидовусд чопгъуне хуно, шиллогъ вешенде-вешенде, Шимири эз кул хуьшде э минжи рэхь, э минжи куче венгесде эз кул хуьшде.

Эхирки, хэр хэр небу, е худо нифри, нэгІлет сохде чи бу.

Шими виники, эзи хэр эри ю эз зарал бэгъэй е хэйр нисд, гьергой гириш и нэхьсе хэр э ижире жингире хосиетгьой хуьшдеревоз э сер энү е кор миёру, у эри хуьшде теслих сохд эри берде и хэре э е чул-пелесе шенде, вой унжо мируьгу, пуч бугу, вой сер юре гуьргьо хуругу.

Гьемин гье у руз, кейки Шими эдембу хэр хуьшдере берде эри эз шегьер ведеберде, эз пушой чум хуьшде ибуд сохде, киниге мугу эзу, гъунши энуре, эн Шимири, э базай хэвуьжи-емиши кор сохденигьоре, воисдени эри хуьшде е хэр восдону. Шими гье усэ-гІэт дие хэре э чул неберд, кешн дировунд э хьэёт эн гъунши хуьшде.

— Эй гъунши, — мугу Шими эз у, — ме шиновусдем туь эдее хэр гешде эри восдоре. Ини овордем хэрмере эри фурухде э туь.

Гъунши дануьсденбу хосиетгьо, дивэгІгьой эн хэр Шимири. Унегуьре у гье усэ-гІэт мугу эз Шими:

— Ме гьеле эз жунме, пулме визор неоморем, жингире хэртуьре эри восдоре, бологъ сохде эй серме.

Оммо Шими дануьсденбу, ки гъунши энуре эз гьержире импортни чигьо лап хьэз оmore. Эз импортни чигьо бэгъэй э пушой чум энү е чиреш хуььрмет нисди. Унегуьре гІэмелдане Шими

эри жингире хэр хуьшдере эз сер сохде, мугу эзу: хэр энү эзи жане-мане хэргьо нисди, импортни хэри. И хэре у восдори эз е эзде вилеетиге оmore турист, комики оmoreбу э Дербенд гьэдимие боругьой энуре эри фегьм сохде. Туристе пул герек бире, фурухдебу и хэре э Шими.

Гьунши бовор сохде э гофгьой Шими, э хотур хэр энү отечественни хэр небиреи, импортни хэр биреи, восдо хэре эз Шими.

Имогьой эзу вэхдевоз чуьжире синемишигьо, томошегьо дирембуге пушоте Шими эзи хэр, гье ужире синемишигьо, томошегьо диренбу эзу гьунши энү, комики э гофгьой Шими бовор сохде восдоребу уре эри хуьшде.

Гьунши Шими пушотеш унгьэде эз эгьуьл зиреке, сэхде одоми небу, оммо эз хэр Шимире восдоре эйло у лап э хуьшде недерие, чешмише одомире хуно бир.ебу. Сер-зиэди у эз хьолиш офдоребу, лэгьэр биребу, ранг-руй юш рафдебу.

Дире-шинох эн гьунши Шими томошегьой эн «импортни» хэр энуре дануьсде, эзу мипирсуьруьтге: эйчуь у пул доре восдори э сер хуьшде бологь и жингире хэре, гьунши Шими, чешмише хуно хэндуйсде, э десевоз хэр хуьшдере э мигьровуниревоз тимор сохде-сохде, жугьоб мидо:

— Гьи-гьи-гьи!.. И хэрме нэхьс-жингир гьисдигеш, отечественни хэр нисди, лап холисе импортни хэри.

## ЧУЪТАМ ШИМИ Э «ДУЪЗДИ» РАФДЕБУГЕ

Е гиле Шими эри мигид е мегь мунде е гургур восдоребу. Паргьой эн дуьм гургур энү гьирмизине ранг зере бу. Гургуре у э сарай дошденбу. У чогь, бисембе бу гуфдире, гургуре Шими эз сарай э хьэёт-буру нисе ведекирденбу, э руз ю уре ченд гиле чине доренбу, э гужевозиш э бугьоз ю дон, суьмергьэндил декирденбу. Пушой эн мигид гургур энү лап чогь, э гурунди эн е гусбэнд биребуь.

Эри мигид е руз мунде, Шими лап себэхьмунде зусери диromo э сарай гургуре эри мигиди эри куьшде. Оммо Шими гургуре э жигей ю неофд. Не э хьэёт-божеш гургур веде небу. Шими дуьлхурде хуно эдембу э хуне вогошде дерафде, бирден эз лой хьэёт эн гьунши э вини энү е лезетлуье буй эн буржунде гушд верафд.

Шими куьнд омо эз чапар эн хьэёт гьунши, мивинуь кук гьунши е бисд сало жогьиле геде э минжи хьэёт э сер эн менгьэл эдее гургур жарит сохде. Э иловлей эн менгьэл, э хори паргьой эн гургур лов-туми. Э гьэд энү паргьо ранг гьирмизие дуразе паргьош деруьт. Шими гье усэгIэт вераси эри хуьшде, ки и кук гьунши э сер гIэтош эн менгьэл буржунденигьо бисмбее гургур эн юни.

Гье и кук эн гъунши мэглуым бу э гьемей мэхъэле чьун хэспуше, гъуморцазе, луги-путие одоми.

Шими эз лэгІэй хуыште е гофлеш неведировунде, вегирд эз хуне е расере, дарафд э хьэйт гъунши. У дер гъуншире кудде, огол зе ведировунд бебе-дедей эн кукке. Угьо Шимире диренге, омбар мэхътел мундуыт эйчуь у гъечи лап себэхь зусери ишуре эз хов хэбер сохде ведировундиге.

— Себэхь ишму э хэйр бу, гІэзизе гъуншигьо, — мугу Шими э эдеблуьиревоз. — МигІид ишму омбаракбу!..

Шими угьоре гъечи омбаракбу сохде, расе э дес дери, диromo э сарай энугьо. Гъунши энуре е дуьшие кечи бу. Шими сер расре э дуразе суьрггьой кечи бесде, ведеберд уре эз сарай. У э пушой чум эн гъунши не зен ю сер гирд эй берде кечире. Угьо диренге, ки Шими эдее кечи энугьоре берде, мэхътел мунде, пуьрсируыт:

— Эй Шими, туь чухь сохде?

— Чухтам чухь сохденуым? Эдее кечире берденуым э хьэйтме эри куыште уре эри мигІид, — жугьоб до Шими.

— И кечи эн имуни, эн туь нисди, чухтам берде туь уре эри куыште? — гуфдируыт э е лэгІэ мерд не зен гъунши. Шими суьпле хэнде сохде, мугу:

— И кечи эн ишмуниге, кук ишму гьейсэгІэт э сер менггэл биржунденигьо гургур — эн мени. Гъечи данит эришму: эри мигІиди ме ишмуре, хуш хьэлол ишму, гургурмере бэхш дорем, ишму мере — кечишмуре.

## ЧУЪТАМ ШИМИ Э ПУШОЙ ХУДО УЪЗИЕГЪ БЕОДИРОМОРЕБУГЕ

Шимире пес-песоеки гье эдембу духдергьо бире, чухтам гуфдирениге: «ГІэребой духдергьо э пушой хуней энухьрд бири». Уре гьеле е гІэйллей эн наринеш небу. Унегуьре Шими лап эдембу келе дуьлпесои кешире. Зен энухь и дес бордор биренге. Шими е гиле эри хуыште э пушой худо нидир гирдебу: эгенер и дес уре кук бисдоге, у гов хуышдере эри нумаз содогьо мидуь.

Эз расдиш и дес омо Шимире кукле бисдо. Шимире эз шори юре кук бирей жиге небу. Оммо гирошд гъечи дуь-се орине, Шими чухь кориге тэгІиди нисе сохденбу э сер хуыште вегирдигьо нидире эри бегьем сохде — берде гов хуышдере содогьо доре. Энжэгъ е мегъ зиэд пироше бэгъдо Шими е руз расере вегирде, дарафд э говду, сер гове эри бесде, берде уре э нумаз э жигей эн содогьо. Пушой гове берде, Шими е гилейгеш хуб дениши, томоше сохд гов хуышдере: гов-гов нисди — е марали, чогъ, рач, муй пуст ю мохбере хуно эдее тов-гов доре. Песде гьисдигьой энухь гье и е гов бу. Шими денишире э гов, домунд э хуыште: чухтам у дуьл сохде дуь

и е теке гов хуьшдере, гІэилгьоре ширсуьз, гьофунсуьз гьишде? Эз елойге у э сер хуьшде нидир вегирденге зен эн увэхди бордор бу, унегуьре Шими э хуьшде домундебу: бирими эз расдиш е кумеки эз худо уре и гІэил нарине эри биреи, небуге небиреи?

Оммо Шими те е гиле эри хуьшде теслих сохде: беруьге гов хуьшдере эри содогьо доре небуге неберуьге, уре воисд дануьсде эз зен хуьшде: и гІэил уре э кумеки эн юревоз бириге, небуге э кумеки эн кесевоз, гІэирогьдекиревоз? Эхи у эз Шими хубте бие дануь э товун эни кор!

Оммо гьетте Шими ижире гофе эз зен хуьшде пуьрсики, зен Шими гІэтош гирд, хьуршлемиш бисдо, сер гирд эри хьэрой дешенде э сер Шими, муьрдегьо, зиндегьой энуре эри нифри сохде.

— Э кумекитуьревоз небиренге, дие э кумеки киревоз бири мере и гІэил?! — хьэрой вегирде э сер Шими, мугу зен эн у. — Нэхогьмере беге ошнегьо бири?! Ме гьемише гуфдирем, гене эдее гуфдиренуьм: э сертуь эгьуьл невери, туь е суке, э хуьшде недерие одомини. Худо мере гьэлет сохди, ме э туь э шуьвер оморем!..

Шими вараси эри хуьшде, ки худо, нум ю э ники гирде биёво, э и кор — уре гІэил нарина биреи — гьэриш нисди. Оммо неденишире э и кор, гене дуьл Шими мундебу: дуьге у содогьо небуге недуьге?

Эхириш Шими расаре эз дес шенде, куьнд омо эз куьнж эн говду. Инжо э сер гиевгьо е гьирмизине хуруз нуьшдебу. Хуруз лап пир бу. У эз зуревоз дие гІуьгІуь нисе зеренбу, э песой кергьо нисе видовусденбу. Эз пири чумгьой эн у перде кеширебу. Хуруз эз себэхь те шохьонгум куте хуно гье э куьнж эн говду нуьшде э сер суьмергьо, чум ю э хифлет вебу.

Шими хурузе эз жигей ю гьужогь зере вегирде, доно уре э зир гьул хуьшде, берд уре э жигей содогьо.

— Эри эни жире «кумеки» эз худо, ижире содогьо омбариш омбари, — дуьл хуьшдере гьемин сохде, мугу Шими.

## БЕБЕ-ДЕДЕ ЭРИ ГІЭИЛГЬОЙ, ГІЭИЛГЬО — ЭРИ ХУЬШДЕ

Е гиле чуь кориге Шими лап дуьлхуьрде хуно омо эз куче э хуне. У гьич э екиш е лоч негуфдире, сер-тен хуьшдере векенде, дегешд э хьэлов. Вэхд эн хурек пишнеинере хурде бисдоки, зен эн у огол зе Шимире эри чи хурде, оммо Шими мугу: юре чи хурде нисе воисде. Шохьонгумиш Шими э сер суфре эри чи хурде ненуьшд. Зен эн у омбар дуьлпесо бисдо.

— Эй мерд, вой эри ме, гу гьери: белки е дорд доре жигейтуь гьисди? Бурам духдире огол зенуьм биёрум? — пуьрси зен эн у.

— Е жигеймеш дорд нисе доре, — мугу Шими недуьл-недуьл.— Ме хуб-хосум. Деске, мере инжимиш месох!.

— Эгeнep туь хуб-хосигe, дие чи эйчуь нисе хурде туь? — мугу зен энугу.

— Ме эзи гугулом визор оморем, мере зигьисде нисе воисде, — жугьоб до Шими.

И гофe гуфдиренге, Шими чаруьсд э гъэбуьргъэйге, егни, уре дие гоф сохде нисе воисде.

Зен Шими, комики э гъэдэни омбаре салгъо э уревоз зигьисдеи хуб дануьсденбу гъэжоибие, томошее хосиетгъо, дивэргъой шуьвер хуьшдере, унегуьре у дие эз у е гофиш непуьрси, оммо себэхьимуьн мэглуьм сохд э кукгъо, духдeргъо ве невегъой хуьшде э товун эни кор Шими. Угъо гъеме дуьлпесо бире, вэхьшде оморут э ки энугу, нуьшдуьт э иловлей хъэлов Шими, сер гирдуьт эри минет сохде э у чи хуру, хушдере эз сери хуьшде э бохд недугу, некишуь.

Оммо Шими лэгъэ гирдeбу поисде, э е гоф энугъош жугьоб нисе доренбу. У вэхди еки эз кукгъой энугу глоси бире, гъэгъригъэгъри мугу эз у:

— Эй бебе, туьш вэхд офдей эри муьрде, кейки гъейсэгъэт гъеме чигъо лап бугъои. Кими одомигъо гъейсэгъэт унгъэде эз муьрдеи нисе терсире, ченгъэдeр терсиренуьтге, чуь жире келе хэржигъо биё сохде биёвге эри муьрдере депучунде, эри суьфрей эн овили энугу. Э и гъейсэгъэтине вэхд имуре, косибе одомигъоре, ужире хэржигъо эз же омори. Туь и коре эритуь фикир сохдени?

Гъеме гъэилгъой Шими рази бисдорут э и гофго:

Шими, гуш веноре угъоре, эз зир лов э могъбулиревоз хэндуьсд. Э ёр энугу омо гъейсэгъэт, чуьтам эзи лап хэйли салгъо пушо е гиле у лап сэхд нечогъ бире, дегешдeбуге э хъэлов. Гъэилгъой энугу вэхдигъо гъеле чуьккеле бируьт. Угъо терсире, бeбешу мимугуьруь гуфдире, сер гирдуьт эри гирисде, минет сохде э у:

— Жон бебе, мемир!.. Туь небисдориге, иму чуь мисохим, ки мидору имуре?! Мемир, жон бебе!..

Увэхьдигъо угъо гъэиллeгъо бируьт, угъоре варасире мибисдо. Оммо гъейсэгъэт гъемей энугъо келеуьт, сэхьиб кифлетуьт. Еки энугъош нисе гуфдире: «Жон бебе, иму туьре омбар хосденим. Э гъемей эни гугулом эз туь гъэизте одоми нисди эриму. Согъ боши эри гъеме туь эриму сохдейгъо коргъо, кеширейгъо жофогъо. Иму хъозурим эри сохде гъемере, чуь э дес иму дериге, туь энжэгъ зигъ согъ-саламат э и гугулом...»

Шими вэхьшд нуьшд э сер хъэлов. У э гъэилгъой хуьшде денишире, е ох вокоши, песде э могъбулиревоз мугу:

— Дуз гуфдире э метелегъойму: «Бебе-деде эри гъэилгъои, гъэилгъо — эри хуьшде». Бошгу, гуфдирешму бугу: ме нисе муьрденуьм. — Песде Шими э ки зен хуьшде руй бире, мугу: — Вэхиз, зен, суфре дешe!..

## ЧУЪТАМ ШИМИ ЗЕН ХУЪШДЕРЕ «ТОЛОГЪ» ДОРОБУГЕ

### Когъоз Шими эри ме

Шолум-дугло эз ме эритуь, гІэзизе дусдме, ХъызгІил!

Ме нисе дануьсденуьм эз чуь сер гируьмге и когъозмере, ме сере вир сохдем э сервирки домунде: гІыч нисе дануьсденуьм э ки бурам гуюмге и дерд мере. Гуюм э туь расдире, тэхсири эни э сер ме оморигоь дердгоь-дуьлесдигъо кес нисди, ализе зен мени. Негъогъ э Туро не нуьвуьсди: «Гемей эни гІовунгойму эз зени, эз серботи энуни иму э бохд рафденимгоь...»

Имогъой гуш вени зен ме чуь кор овурдиге э сер ме. Оммо коргоьй гуюгъоре хуно: е гиле е гофе бигІилуьм, е гофигере гуюм. И песини дуь сал, туь дануьсдени, ме заведиш эн фирмай молгъэреинуьм э колхоз иму. ГІысди э гІонуневоз ме эз зуревоз пенсионеруьм. Эз ело денишире винириге, туь эз ме гу: «Ой Шими, бебейтуь су мегиро, туьре чуь гІэжел дери э и коргоь? Туь келе мерди, нуьш-фитрак пой э жигейтуь, э хунейтуь, дес-пойтуь беседе! Э олхогІиниревоз кор сох эритуь э богъчелей хъэьттуь, эри мухшули-ёбонжэгъитуь вози сох э невегъойтуьревоз, пой э жигейтуь э худо доре рузтуь, воисде мэхьэл эри дуьл вероморентуь ведара гешд э куче, нуьш э ихдилот э тойгъойтуьревоз — келе мердгъоревоз». Оммо нэгІ. Мере не тоби, не сабур. Динж нуьшде поисде нисе дануьсденуьм э жигейме. Хуте бирем согъ гІуьмуьрме кор сохде, э гъэд хэлгъ-жэгІмет дебире. Бикор тоб-гъэрол гирде нисе дануьсденуьм.

Эхирки, коргоьй гуюгъоре хуно: «узун суьзуьн гІысгІэси» гІоэне-гъэдер ижиреи.

Пери себэхьмунде э кул хэрме венуьшде оморум эз ферма э хуне. Мугум: бурам я гІэилгоь, невегъойме сер кешуьм, томбоку вегируьм эри гъэйлейме, те шохьонгум бире, вогошдум э корме. Эгъ! Рэхьмере у руз миёсде худо гъэлет сохде ме эри э хуне омореи! Ме суьфделе эз кул хэр фураморе, э хъэьт дироморебируьм, мивинуьм зенме э хъэьт муьгІуьжуьз венгесди. У э е дес буьск кобобире гирди шимшиле хуно, э е десиге бейдогъэ хуно, гІэйбиш бу гуфдире эз туь, гирди гуьле-гуьле пожей эврुьшими хуьшдере, э е хуьрш, гъэзевоз эдее э песой гІирмизине гуселейму видовусде, черх зере э иловлей хъэьт э гъэд хэрмоне хуно. Гуселе эз терс гІэиле хуно эдее мэгІ-божэхь зере.

— Эй зен, и чуь кори, и чуь уюни?! — мугум эзу.

Зенме мере диренки поисзд шуш-нефес ю гирде, дениши э ме, мугу гирисденирше хуно:

— Сер энижире гуселе бурра биёво. И гуселе нисди, молкомути, молкомут бери жун энуре. Ини, дениш ебо чуь гъэзоб овурди-

ге у э пожейме. Шушдем э расе вешендем уре, оммо гуселе омори эз сер расе кешири уре, нимей юре хурди, нимейгейюре пара-пара сохди, пара-пара гердо у!...

Эз расдиш денишире диренуым, гъирогъгой эн, гЛэйбиш бу гуфдире эз туь, тозе гуьле-гуьле пожей эвруьшими эн зенме, жавусдеи, пара-параи. Те ме ебо лэгЛэ вокурде, е гоф гуфдире, зенме диеш хьуршлемиш бире, гьелебуле гирдере хуно, мугу эз ме:

— Эй мерд, ме э туь эдее гуфдиренуым: е туь гьейсэгЛэт мирай э тукугьо-магазингьо эриме е мол эвруьшими мосдони эри тозе поже духдейме э руз шори, мигЛид эри вокурде, небуге ме э и буьс-тевоз шуьггэм эни гуселере сула-сула мисохум.

Чорейме небисдо, гусолере эри э бохд недорей, хьурш зенмере эри поюндеи, рнфдуьм э магазингьо-тукугьо эри зенме, гЛэйбиш бу гуфдире эз ту, эри тозе пожей энумол эри восдоре. Оммо те ме э магазингьо-тукугьгой шегьере гешде, э хуне вогошде, песде эз хуне э ферма оморе (эз шегьер те фермайму хьэшд верс рэхь дери) омбар вэхд гиросд. Гьемин гье и вэхди те ме эз шегьер э ферма оморе расире, унжо келе томоше, келе муьгЛуьжуьз бири, одоми э ховиш ужире муьгЛуьжуьзе нивину. Ме хуьшдениме и муьгЛуьжуьзе э чуммеревоз недирем, эриме зенгьо-ширдуйшигьойму ихдилот сохди и ишу дирe гьозиере. Гуш вени имогьой чуь бириге инжо те ме эз шегьер вогошде.

Руз эн пишней, гьемин гье увэхди, кейки нэхирчи эн фермайму нэхире кура сохде эдембу э ён эрх угьоре эри гЛов доре берде, гье и туьтем уре эз шуьггэм гуьрдебу. Унегуьре у нэхире э нимерэхь гьишде, рафдебу э песой эн кулегьо кор-бор хуьшдере эри дирe. Эзини жиге гуфдире э иму: «Гуьрг э геле офдоренге, чупоне э варра гирдебу».

Молгьо э герми руз гьеминон эз тешней тоб недоре, ишу эз серишу э нэхирчи неденишире рафдебируьт э эрх эри гЛов хурде.

Э куьндигьой фермайму совхоз онгурбогьини. Совхозе завод шоробини. Гьемин молгьой эн фермайму эри гЛов хурде э эрх оморенге, э винзавод е келе цистернай эн спирте э гьэд гЛов эн эрх тигьи сохдет. Кимигьо гуфдиренуьт, ки и эз нэхэбереки бире кори, оммо кимигьойге эдете гуфдире, ки у спирт эз челег э гьосутевоз тигьи сохде омори э эрх, чуьнки э у цистерна дебригьго спирт «зиёдне» спирт бири, у э учет невебири. Э винзавод э нэхэбереки омори ревизия. Зиёдне спирт эри эз пушой чум ревизиргьо вир бири, э корсохгьой винзавод эри гоф неморей, угьо э пэхьники кран эн цистернаре вокурде, э у шланг доноре, спирте тигьи сохдет э эрх гЛов.

Э и герме руз гьеминон молгьой фермайму эз эрх э гЛов хурдеки хурдет э еки спиртеш те финж винишу вероморе. Песде угьо серхуш, делуь-серсоне хуно бире, офдорет дуь э екиревоз. Кечи



гье усэгIэт диндина вешенде, рафди эри женг гирде э гомишевоз, нарговгьо дуь екире э суьргевоз зере, сер гирдуьт дуь екире чэх-чухол сохде, говгьо гириге э е гуьмге кура бире, сер гирдет гьеме э е лэгIэ эри келе-келе мэгI зере. Гуфдиренуьт, ки угьо гьечи дураз, келе-келе мэгI зеренбируьт, кара одомиш сес энугьоре эз е верс дури мишиновусд.

Гьемин гье и вэхди э ферма гIэлбуьсе хуно оморе ведироморени председателъ эн колхоз иму. Ме э туь гуюм, у мере э чум дире нисе хосде, гуйге ме хунки энунуьм, бебей энугьоре ме куьшдем. Эз чуй товунейге у э меревоз гьечи — уреш гуюм эритуь. Ё гиле э собранией колхоз ме вэхидебируьм гьеме гIэйбгьо-кемсуьгигьой энуре гуфдиребируьм, иллогьки э товун энукор, ки молгьойму шир кем доренуьт, чуьнки силос, комбикормагьо чуьиге угьо нисе диренуьт И ченд сали эри силос векенде омориго чол гье гьечу тигьини, буши шуьгьэм эн тэгIнит гирдигьо одомире хуно. Эзулревоз председателъ эз вамасири.

Эхирки сертуьре дорд недуьм, председателъ э ферма оморенгедиренге гьечи и томошере, чуьтам молгьо лул-пиён бире дуь э екиревоз вепичиренуьтге, говгьо э гуьмге гирде, жар дешендетге, у гешдени нэхирчире, оммо нэхирчире нисе офде — вир-сури, гешдени мере — меш вединисдуьм. Увэхди чорей энунисе бире, вегирдени е дуразе шуше, хьэлово бирени э молгьо, сер гирдени угьоре эри додоре, дуь эз еки жейле сохде. Председателе воисденбу э и тегьеревоз угьоре кура сохде, берде дешенде э говду, сэхд сохде уигьоре, те угьо эз пиёни ишор бире. Эз елойге кими молгьо суьмергьэндиллугь эн колхозе, э куьнди эрх бугьоре, тапаланмиш сохдебируьт. Оммо говгьо-нарговгьой эн колхоз, нисе денуьсденуьм эз пиёниниге, небуге эз гьэгьр угьоре председателъ колхоз и ченд салгьо э гуш негирдеиниге, угьо гьемееки хьуьрш сохде, гьовкенде оморенуьт э сер энукор. Председателъ эз терс суьпуьл ю жэгь зере, шуше эз дес шенде, хэрегуш эз чоьгол вирихуьгьоре хуно, вирихде рафдени эз ферма.

У гьетте э шегьер э кантур вогошде мере эз кор вегирдени. Усделуьге говгьо, нарговгьой колхоз э пиёни тапаламиш сохдигьосуьмергьэндиле — зарали энуреш вонерени э кулме.

И кор э серме оморенки, ме лап гIоси-диври бире эз зенме, вогошденуьм э хуне. Эгенер ме э магазингьо-тукутьо эри мол гешде, гIэйбиш бу гуфдире эз туь, эри тозе пожей энунимундумге э вэхдию э ферма могошдуьмге, белки и коргьо э серме ниомоге.

Гьэгьрмере эри ведешенде эз зенме, дуьлмере эри тигьини сохде э сер энукор, ме эриме теслих сохдум уре э дин иму гуьре эри тологь доре. Ме э туь гуюм э гIэдот эн дин имуревоз зене эри тологь доре е четине кор нисди, е пейле гIов хурдере хунои. Нуьвуьс тологь э е коьгоз ди э зентуь, енебуге и коьгозе ше э пушой энукор, э комики нуьвуьсде оморени ижире гофгьо: «Туь теимогьой зенме бири, имо-

гьой мё туьре эдее рэхьо доренуьм, шенденуьм, эз хуьшде рэгІд сохденуьм...»

И когъозе э дореки э зенме, туфдирум э у, чуьниге и когъоз, чуь нуьвуьсде омориге э у. Мере, гьелбет, эз зенме жейле бире нисе воисденбу. Мере имид бу, ки зенме эзи кор митерсуь, эз ме бэхшлемиши михогъу, э герде мегируь гъэлети хуьшдере, дие ун-гъэде зобу, бед нибу. Эз же омори! У э уьткемиревоз дес хуьшдере э бел хуьшде вено, ловгьоре дигил сохде, э ме шефд, э руьхшендиревоз денишире, мугу:

— Эй пире хэр, кире туь гьечи «рэхьо доре, шенде, рэгІд сохде?...» Ме бегем гьултуьнуьм, гъэровоштуьнуьм?! Туьре воисдениге, туь хуьшденитуь рэгІд, оворе бош бура э гьержой туьре воисд, хуне эн ме, боже эн ме, гІэилгьо, невегьо эн ме!..

Дие эзу рузевоз зен мере э хуне нисе дегьишде. Э гоф екиш нисе денишире, боришмиш нисе бире э меревоз. Нисе дануьсденуьм, чуь чоре сохумге, э серевир домундем.

Эз туь омбар хосденуьм, гьетте и когъозмере вегирде, э бузтуь гІов веригеш, гІове ше, биё рас инжо, боришмиш сох зенмере э меревоз. Зенме туьре хосдени, кук, бирор хуьшдере хуно. У белки э гофгьо дэгІногьойтуь гуш веноре, дие нэхьси несохд, бэхши э ме и гъэлетимере. Имидиме гьеме э туьни.

Дие согъ-саламат боши, дусдтуь тегІуьмуьрлугь

*Шими Дербенди».*

## **«ЭРИ ГЬЕМЕ ДЕРМУ ГЬИСДИ ЭРИ ХЭР БЭГЪЕЙ»**

Е гиле Шими э говду дарафденге эри э хэр хуьшде сер кешире, эри эну э овхур ю гийёв, е-дуь пенже жуьгь декирде, мидениши мивини хэр ю э куьнж говду норе оморебугьо туморей жуьгье, сер юре лов сохде, сер донори эдее суьперде, хуьрте-хуьрт сохде-сохде Шими куьнд омо эз хэр, хьэрой вегирде э сер эну, сер гирд эри эз сер туморе пиш сохде уре. Хэре эзи кор сэхьиб хуьшде гъэгьр омо. У песой хуьшдере э лой Шими чарунде, сере эз туморе неведешенде, е сэхде шиллогь зе эз гъэбуьргъэй эну. Шими е келе божэхь дешенд, песеде гье усэгІэт суьсд бире, офдо э хори. Зен Шими божэхь эн шуьвер хуьшдере шиновусде, видовусде диromo э говду, мивини: Шими э хори дурази, эзу нефес нисе ведироморе. Зен Шими гье усэгІэт вараси, ки шуьвер юре хэр шиллогь зери, эри эну гьейсэгІэт чоре сохде немоге, худо меёро, Шими дие э хуьшде нидиров, мимуьруь. Э гьунши эн Шимигьо духдир-ветеренар дебу, молгьо-хьэйвугьоре хуб сохденигьо. Зен Шими сере куфде-куфде, хьэрой сохде-сохде видовусд э ки эну:

— Э хунейме гІэтош дери! Э сер иму кор омори! Хэр, ализе

хэр!.. — Дие э зен Шими гьирке вепичире, песой гофе гуфдире недануьсд. Ветеренар гьерчуь дануьсд: хэр Шимире е кор-чи бири. Карасдигьо, дермугьой ветеренари хуьшдере вегирде, омо зури-зури, диromo э говду. Оммо у денишире диренге, ки хэр Шими согъ саламатн, сере э туморе доноре, эдее э келе ишдогьовоз жуьгь хурде, оммо Шими э минжи говду дегешди мегьите хуно, у э хуьшде недери. Увэхди гьунши-ветеренар э ки зен Шими руй бире, э дуьл-сухуниревоз мугу эзу:

— Хэгьерме, бэхшлемиш сох, ме гьерчуь дануьсдуьм э сер хэр ишму кор омори. Эри энү ме чоре сохде мидануьсдуьм, оммо ме эри шуьвертуь чоре сохде нидануьм...

Зен Шими и гофе эз ветернанр шиновусденге, ебо те песой гоф энуре те эхир гуш веноре, сер гирд диеш сэхд эри сине куфде, хьэрой шивен сохде:

— Э хьэрой! Эй худо-бенде! — хьэрой сохде, мугу у, — Ингъэдеш одомире бедбэхди, бедмозоли мегируь?!.. Эри хэр э хэриш чоре гьисди, эри эни косибе шуьверме чоре нисди!..

Шими шивен эн зен хуьшдере шиновусденге бирден э хуьшде диromo. Диренге, ки у э жигей духдир, ветеренаре огол зери овурди эри ю эри чоре сохде, у э зен хуьшде денишире, мугу я Го-сииревоз:

— Эй зен, бебейтуь су гиро! Эри хэр эз расдиш, эгенер у нечогъ бисдоге, дерму-чоре гьисди, оммо хэригуьре хуьшдени Луьмон-хьким эз гьовре вэхиде омогеш хуб сохде нидануь.

## Э ГУШ ШИНИРЕ НЕГІ, Э ЧУМ ДИРЕ КОВИ

Е гиле гьунши Шими Дербенди шев-нимешев эз кучегьо лулпиён оморебу э хуне. Гьетте у э хуне диromоре, у сер гирд эри гьэгъ-негьогъ э зен хуьшдеревоз эри женг гирде, зене доноре куфде. Э вэхд эн женг зен гьунши е келе буруж дешенде, сер гирд Шимире эри огол зере, хьэрой сохде, шуьвер ю эдее куфде-куьшде гуфдире юре. Шими гьетте сес хьэрой зен эн гьуншире шиновусде, эз хов хэбер бире вэхид. Оммо те у э торики парталгьой хуьшдере офде, шеи-шовол хуьшдере вокурде, э хьэёт ведерафде, дие сес женге-женг, гьолмогьол, хьэрой эн зен гьунши неомо. Эри дерафде э хуней энугьо пуьрсире-дануьсде, мерд гьуншире гьэйбежер сохде, серкуш зере, у дие жуьргІэт несохд. Шими гьечи эз нимерэхьй вогошд диromo э хуне.

Е гилейте е ченд руз гирошде бэгьдо Шимире огол зе э суд э шогьоди. Шими мадан зен эн гьунши эз дес шуьвер хуьшде э суд дори шуьвер ю юре эри куфден, чуьнки и суьфдеи гиле небу шуьвер энү гьечи шев-нимешев пиён оморе, уре эри е негьогьи доноре

куфденбугь. Оммо Шими дануьсденбу, ки зен эн судья куьнде гьовум эн пиёнискее, женгесуре гьуншиюни. Неденишире э и кор, Шими гуфди э суд, чьуьтам у шиновусдебуге нимешев гьуншию зен хуьшдере э куфдеки.

— Туь э чумтуьревоз недирейки гьуншитуь зен хуьшдере э куфдеки? — э гьосутевоз пуьрси судья.

— НэгI, э чуммеревоз недирем, оммо шиновусдем э и дуь гушмеревоз, чьуьтам зен гьуншиме шуьвер энур уре э куфдеки хьэрой сохденбуге, — гуфди Шими.

Судья шекељуь хэндүүсд, песе охмурљуь денишире э Шими, мугу:

— Эз гуш те чум, чьуьтам гуфдиреге, е виже гIэре дери. Э гуш шиновусде ков нисди, э чум дире кови. Нуьш э жигейтуь!

Судья, гьелбет, недануьсде небу, чьуь одомините гьовум эн зен энур. Оммо у е гофиш не гуфди э гьунши Шими, е гьелебуле, е терс недо уре, расд ведировунде, рэхьо до.

Шими дуьлхуьрд, уьзуьгьээрере хуно вогошд э хуне, ихдилот сохд эри зен хуьшде, чьуьтам гирошдге суд, чьуьтам шогьоди энуре судья батул ведировундге.

Е-дуь орине гирошде бэгьдо гьемин гье и судья миёсде лекция хунде эри колхозчигьэ э клуб э товун пуьрсуьш «Одоми ве гьонун». У руз шохьонгум Шими э пушой лекция рафде эз зен хуьшде хосд сие чешмекьгоре, комиреки чьуклеи кук энур э вэхд гьеминон веноре гешденбу.

— Э мерд, туьре э лекция сие чешмекьго эричуьни? — э мэхьтелиревоз пуьрси зен Шими. — Туь э гIуьмуьртуь сие чешмекьго невонерейго э чумгьойтуь, э келе мерди, э пушой эни хэлгь эйчуь веноре? Гьеме э туь михэндүүт.

— Дануьсдени, зен, чьуьниге? — мугу Шими, — имбуруз лекцияре эриму судья эдее хунде. Гуфдиренуьт, у гьечи когьли-когьли лекцияре хундени одомире э лекцией энур хов гирде.

— Гьери гуьом гьечу туь гуфдирере хунои, оммо сие чешмекьго чьуь кори инжо?

Шими э биразиревоз дениши э зен хуьшде, мугу:

— Эй зен, чьуь фегьмсуьзе одомини туь!? Судья э лекция хундеки, ме денишире винируьмге мере эдее хов берде, ме гье усэгIэт и сиегье чешмекьгоре менуьм э чумме, э олхогьиниревоз михисуьм. Э чумгьойме сие чешмекьго э верики, судья эз же дануьсде ме хисирем гуфдире, чумгьойме сэхдүүт?

Шими и гофе гуфдиренки, зен энур омбар дуьлпесо бисдо.

— Эй мерд, — мугу зен Шими, — беге туь нисе дануьсде, гьетте чум туь э хов варафде, туь е пихгьэ зерени, муьрде одомире сес пихгьойтуь хэбер, бужу мисоху. Песе туь келе мерди. Чумтуь э хифлет рафдеки, кимвэгIдо эз туь, гIэйбиш бу гуфдире, келе-келе вор рафде. Судья гье усэгIэт мидануь туь э лекцией энур хисирей,

эз елойге эдее келе-келе пих зере, гьемнге вор ведешенде. Увэхди у хэбер мисоху туьре, э пушой эн гьеме гІэйб мидуь, биёбур мисоху.

— Эри эни кор гьисдиге, э жун бебейтуь, зен, гьич фикир меш, — хэнде-хэнде мугу Шими. — Ме гье усэгІэт жугьоб энуре доре, э жигей ю минишунум.

— Чутьам? — э мэхьтелиревоз пуьрси зен.

— Ме эзу мугуюм: эй судья, туьки э чумтуьревоз недирей ме хисирем гуфдире, чуьнки э чумме сие чешмекгьо вери. Туь энжэгь шиновусдей ме эдее пих зеренуьм, вор ведешенденуьм... Туь хуьшденитуь негуфдиребири э ме эри пиёнискее-женгесуре гьовум эн зен туь суд биренге: э гушевоз шиновусде нэгІ, э чумевоз дире — кови?..

## ТОЗЕ НИФРИ

Е гиле корсохгьой эн «жилуправлением» шегьер хуней Шими-ре «капитальный ремонт» сохдебируьт. Тейте угьо хуней энуре капитальный ремонт сохде варасде, дуразруй, жун Шими-ре ведешендебируьт. Ремонт сохдей хуней эну ингъэде дураз кеширебу, ки э гъэд эни вэхд э гьувот энингъэде одомигьоревоз, кор сохденбируьтгьо э хуней Шими, е келе тозе чендтебэгъзи хуне вокурде мибисдо. Корсохгьой эн жилуправление унгъэде кор нисе сохденбируьт, ченгъэдер эришу рэхъэти сохденбируьтге, рузе э папрус кешире, э лэгълэгъи сохде гировуненбируьтгье Песде у сохде кореш ильети, гьерчуьтам гири перти-питов, юхуле-будуле сохденбируьт. Сер зиёди э ченд жире вогьнеревоз гьер гиле эз Шими пул векенденбируьт эри закуска, эрэгъи хурдешу.

Эз э хуней Шими капитальный ремонт сер гирде оморе эйло, гьовой Шими лап дегиш биребу. И дуьлшоре, мэхсеречие, меслэхъэтчие одоми, могъбул, дуьлхуьрде хуно гешденбу, э екиревозиш гоф нисе сохденбу, лап огъур-домога бу. Пушоте у эри е кор-чи эз зен хуьшде гъэгъри мибисдоге, э сер эн хьэрой вегирде, мигуфди:

— Эй зен! Э хуней бебейтуь гІэтош дараво!..

— Имогьой эз корсохгьой эн жилуправлением шегьер э хуней эну капитальный ремонт сер гирде эйло у е жирейге нифри сохденбу зен хуьшдере:

— Эй зен! Э хуней бебейтуь корсохгьой эн жилуправление капитальный ремонт сохо!.

## ГЕНЕ ЕКИ ЭЗИНИ МОЗОЛ БИСДОГЕ...

И овгьолет биребу э чоримуьн сал Горбачев э гировундеки «революционни перестройкай» хуьшдере э вилеет, кейки э е гъэдер вэхд эз тукугьо, магазингьо эслога вир-сур бисдорут папрус-томбоку, сэгІбу ве де чигьойге, дие иму нисе гуфдиреним э товун гушд,

калбаси, эри омбардеки хэлгъ нугъор, ниете хуно бисдорутгъо. Гьемин э и рузгъо келе мерд Шими, гъэрзинкере э дес гирде, тие гъэйлере жуьмуьсде-жуьмуьсде, кемер, шуьгъэм хуьшдере гъутури гирде одомире хуно хорусде-хорусде эдембу гешде э кучегъой Дербенд эри гешде-офде е кем томбоку эри гъэйлей хуьшде, ве е-дуй гъолюб сэгІбу. Э гъирогъ шегъер оmore расиренки, э куьнж эн е куче, эжеки одомигъо лап кем бируьт, у вини чуйтам эз унжо бугъо магазин одомигъо, шори сохде-сохде ведироморенуьтге е ченд пачка махорка э дес дери. Шими гье усэгІэт зури-зури диromo э магазин, поисд э очередь.

Очередь одоми пур бу. Шими хэйли поисд те нубой эню оmore расире, оммо дуьл эню эдембу лап тэгІди сохде: кей мохурке мегуруьге, гъэйлей хуьшдере томбоку пур сохде, гъэйле микешуьге. И ченд руз у эдембу гье тие гъэйлере «кешире» поисде. Эзи товуне гъовой эню усол, хэребе хуно бу.

Гьетте Шими э пенж зерде пачкагъой махоркаревоз э дес дери эз магазин ведироморе, у ебо э куьнж куче поисде, эз сабуьрсуьзи дуьл хуьшде э лерзирембугъо десгъой хуьшдеревоз гъэйлере мохурке пур сохде, е-дуй гъум гъэйле кешики, сер эню эн е пура пейлей туьнде эрэгъи гье ебирден хуругъоре хуно, екем тиге хуно бисдо, дуьл ю рэхъэт. Гуьлом эри эню дие унгъэде гъэреболугъ, усол неомо, чуйтам эри эню оmoreнбуге и ченд руз уре томбоку небугъо вэгІдо эри кешире.

Гъовой Шими диеш лап хуб бисдо, кейки у эз е ченд сэгІэтиге бэ гъдо эз е магазиниге дуь кесег сэгІбу восдоре дануьсдки. Имбуруз бэхд эню гъечи эдембу хунде, э хубе хов гиросденигъоре хуно, эжеки гьер жире коргъо, ниетгъо э жиге оmoreни. Е кучейгере гиросденге, Шими мивини э ён е хурдение чигъо фурухденигъо магазин хэлгъ э очередь поисди, эжеки эдее хуьшг сохде калбаси доре, песде е калбаси нэгІ, гьеэбо дуь калбаси э е дес.

Шими, келе мерд, лап вомундебугеш, гъемейю эрэгъ величиребугеш, эз зуревоз эри сэгІбу небиреи, жендек ю лап хоре-хоре доренбугеш, сабур сохде, поисд э очередь эри калбаси.

Очередь Шими лап куьнд биренки, бирден беде хэбере хуно селов бисдо: «Калбаси эдее варасде». Э песой очередь бируьтгъо одомигъо, дуьлпесо бире, сер гирдуьт эри хъэрой сохде эз е калбаси зиьдте медуьт гуьфдире, гъемере вес соху. Э песо э куьнди Шими поисдебугъо е лэ,гъэре зен э зэгІифе сифетевоз ве келе бордоре шуьгъэмевоз, э хъисобовоз, дуьлпесо бире э ю калбаси нирасуь гуьфдире, сер гирд э гужевоз шишире дерафде э пушой эн гъеме калбаси эри вегирде. Оммо гье у туьтем э пушо, э ён дестурке поисдогъоре одомигъо, гъуьл додоре ведешендуьт уре э гъирогъ, пробка эз сер бутылка ведешенуьгъоре хуно, нифри-офри сохде уре, э сер ю хъэрой вегирде-вегирде. Е мерд, гъирмизине сифет, домбуле чумгъо гъуьундуьре бала, эз гІэрей очередь хъэрой сохде, эдембу

гуфдире: гьерки бисдо энгуыше вогъуну гуфдире э шуьгъэм эн бордоре зен.

Е келе зен, сипре мугъго, кемер ю нимелит гъэд бугъо, э бешгей виннио муйверие келе зигил вери, хуършлуь бире эзижире гоф, лэгъэре, гъуьж дироморе муьшд хуьшдере вежегъунде-вежегъунде, мугу э назуке сес ве пелтөке зугъуневоз:

— Ичму, художуьзгъо, беге леп делуь билейт, э гуьлг чалуьс-дейт эз ижиле жиндегуни! Ичмуле воичдени гъэиллей энуде чуь-кесд сохде?!..

— Белки э шуьгъэм энугъэил недери, э зир булшн энугъуьгеге дери? — гъич э хэпер ю небирере хуно, жугъоб до гъирмизине сифет.

У гоф хуьшдере эри расд ведировунде, сер гирд, хэнде-хэнде эри ихдилот сохде, чуьтам е огиле зен, имогъой и ченд сал э пенсия гъисдигъо, эри фирмунде э очередь поисде одомигъоре, егъни ю бордори гуфдире, э зир булши хуьшде бесдебу э сер шуьгъэм ламбалуш гъовире. Хыллеи энуре э пуьгъуьл ведировунд пушотейне хэгъергили энугу, э уревоз э е жиге, те э пенсия рафде, э хьомум кор сохденбугъо, э комиревоз песини вэхдгъо дуьшме бу.

Екигейге сер гирд эри ихдилот сохде е «томошее гъозиейгере», чуьтам е жогъиле зен э е чуькле эдиёлле соворе гъэиле пучунде оморевуге эри очередсуьз гушд вегирде. Гъемин гъе у туьтем, кейки гушд фурухденигъо зен эри энугу э тирозу эдембу гушд пеймунде, бирден соворе гъэил эз гисней тоб недоре, сер гирд э тур офдоре жэгъэ хуно, эри тартапил сохде, песде у гъебо келе-келе мав зерезере, ведешенд хуьшдере эз гъэд эдиёл, пеленге хуно шенд хуьшдере э сер тирозу, гъэнж гирд эз гушд, э пушой эн эзижире некуми зэхъевежэгъ бисдогъо гушд пеймунденбугъо зен...

Песде дуь сэгъэт зиёдте Шими поисд э автобус поисденигъо жиге, эри э автобус венуьше, вогошде э хуне. Автобусгъо лап дир оморенбу. Омбаре автобусгъо кор нисе сохденбируьт, бензин вес нисе сохде гуфдире. У оморенбируьтгъо автобусгъош одоми пурпури бируьт, э угъо эри венуьше лап четин бу, иллогъки эри келе мердгъо, инвалидгъо, бордоре зенгъо ве гъэилгъо. Кими автобусгъо гъечу непоисде, зере гиршдембируьт, е пассажиреш невегирде.

Эдембу шохъонгум бире, оммо Шими гъе гъечу поисдебу э автобус денишире. Оморе-оморе гъовой энугу сер гирд эри дегиш бире, Шими хэсде-менде согъ руз э очередгъо эз поисдеи, э автобус дениширей дуьл хуьрд эзу имбуруз дир коргъо, шиновусде гофгъо, шуьле хуно омо э пейде э хуне. У гъетте оморе, гъэрзинкере эз дес шенде, гъолоке хуно нуьшд э сер стул. Зен энугу диренте Шими имбуруз восдоре чигъоре: дуь калбаси, дуь кесег сэгъбу, томбоку эри гъэйлей хуьшде, лап омбар шор бисдо.

— Эй мерд! — мугу у, шори сохде-сохде, — э сертуь имбуруз бэхд-мозол омори, туь ингъэде чи...

Шими дие зен хуьшдере гоф сохде негышд. У э биразириревоз, десгоре шувунде э пушой энуп, гоф энуре бурра, пезде э килэхь хуьшдеревоз эрэгь пушони хуьшдере покурде, э могьбулиревез мугу:

— Эй зен, шори месох! Эгенер е гилейтеш э серме ижире бэхд-мозол омоге, э жуен гьоврей бебейтуь эдее гуфдиренуьм, эз ме дес веги, туь гье усэгьт бие зен мимунни!..

## ГЬЕР МЕРД ХУЬШДЕРОЕ Ю ХУБ ШИНОХДЕ

Е руз гьеминон пушой шохьонгум эз гьово ворущ поисде бэгьдо, Шими ведерафд э куче эри гешде, сейл зерей хуьше, э хьэрмэхь-гьо-дусдгьой хуьшеревоз эри вохурде, гоф-гележ сохде. Кучегьо гьеле лап тар бируьт, э кими жигегьо г'юв, чуькле новургьо бируьт.

Е гьэдер эз хуней хуьше дур бире бэгьдо, Шими мидениши мивини е пиёне мерд мегьите хуно дегешди дураз бири э ён куче, э гьэд г'юв, хисири, эдее пих зере. Э зверсер энуп поисди е жогьиле милиционер, эдее жумунде уре, гуфдире эзу вэхизуь э пой, бурав э юревоз э хуней ю, э ки кифлет ю эри берде уре. Оммо пиён гьечи пергор бу, э хуьше недебу, э биней гуш энуп таинже мишендигеш, божэхьэт у хэбер мибисдоге, эз жигей хуьше мижимуьсдге. Шими э угьо денишире, мугу эз милиционер:

— Туь негьогь уре эри чуь «нжимиш» сохде, гуфдире эзу: вэхиз, беруьм туьре э хунейтуь? Эгенер у худозере э пой вэхийше, рэхь рафде мидануьсдге, у туьзуьзиш мэхуьшд мирафд э хуней хуьше. У кур нисдики.

Милиционер дениши э Шими, мугу:

— Дие чуь сохде биёв эри эни одоми?

— Гьичиш сохде герек нисди, — жугьоб до Шими, — чуьтам у дегешдиге, гье э у дегешде жигей хуьше мунугу буравгу. Шев гьеминони, шев кутэхьи, герми. Уре гьичиш нибу. Оммо себэхьмунде у инжо хэбер бире, виниге, ки у шев э куче, э гьэд г'юв-лилов хисири, белки уре эз кес, эз хуьше г'ляйб оmore дие ижире биёбурне коре несохд.

Милиционер э хуьше демунде песой сере 'хорусде, мугу:

— Белки туь дузи, лелей Шими, оммо чуьш бисдоге, и одоми-ни, бэхшлемиш сохит, хуг-хьйэву нисди эри гьийше уре э гьэд лухьме э сер куче, одоми.

Шими э сер гоф энуп гьовурде, мугу:

— Эй хэлефме, мегу гьечу. У ю хубте дануьсде ю киниге. У э хуг ухшеши небугьо одомиш беге э жигей э хуней хуьше, э сер нерме темизе хьэловгьо-болушгьо дегешде хисире, э инжо, э сер куче, э гьэд г'юв-лухьме нихисуь.



## ХЭР ОДОМИРЕ ШИЛЛОГЪ ЗЕ ГУФДИРЕ, ОДОМИ ГЪЭГЪРИ НИБУ

Е гиле сеэхьмунде гьеминон, Шими гъэйле э лэгIэ дери эдембу э богъчей шегьер эри хуьшде гешде, темизе эвир वोкошире, э велг-гьой доргьо, гуьлгьо, савзагьой богъче денишире, э мугъум, жив-жив эн гъушгьо гуш воноре, эдембү шори сохде. Гье э и туьтем, бирден киниге э е хэндеревоз е лепуьк зе эз песой кун энү. Эзижире некумие лепуьк гъэйле гье усэгIэт офдо эз лэгIэй Шими, ю хуьш-дениюш кем мундебу неофдорени.

Шими гъэйлей хуьшдере эз хори вегирде, чаруьсд песово, мивини э пушой энү е жогъиле пиёне кук поисди. У гьетте Шимире дире, гье усэгIэт перт бисдо, сер гирд эзу эри бэхшлемиши хосде:

— Эй лелей Шими, гъэгъри мебош, бовор сох, ме туьре эз лой кемер э е шинохэ одомимеревоз егIэлмиш сохдем, э комиревоз ме чендбогьо э еки хурдейм, кейф сохдейм. Ме недануьсдем туь биреире.

Шими э огъурдомогъиревоз денишире э пиёне кук, мугу:

— Гъэйгъу нибу, меш суьфде гьерчуь дануьсдуьм мере хэр шиллогъ зери. Э шиллогъ зерен эн хэр одоми гъэгъри нибу.

## ЧУЬТАМ ШИМИ ХЭР ХУЬШДЕРЕ Э «КАПИТАЛЬНЫЙ» РЕМОНТ» НОРЕБУГЕ

Е гиле Шимире лап тертэгIди мошин герек бисдо. Бордоре гIэ-руьс энуре эз вэхд пушо сэхд дердхурдеи гирдебу. Шими эдембу терсире: худо меёро э сер гIэруьс нен гIэиллей энү е беде кор неёв. Шими зури-зури диromo э хьэёт гъунши, комиреки мошин бу, хосд эзу эри е нимсэгIэти мошин энуре, эри берде гIэруьсе э болнисе дегердунде.

— Элле, туь мунош, — мугу гъунши, э вогънеки дуьлсухуни сохде, — мошинме нечогъ бири, сарб овурде суьгъруьсдени, рэхь нисе рафде, эз диревоз ме уре э капитальный ремонт норем.

Шими дануьсденбу, ки гъунши эдее дургу гуьфдире. Эзи е сэгIэт пушо у э чум хуьшдеревоз диреху, чуьтам гъунши э сер мошин хуьшде вери э е фурсевоз бежид диromoге э хьэёт хуьшде. Шими гоф несохд, видовусд э куче эри офде е машине.

Е ченд мегъ гирошде бэгъдо гьемин гье и гъунши Шими диromo э ки энү эз Шими эри е сэгIэти хэр энуре эри хосде, эз магазин э кул энү е туморе гIорд эри овурде. И дес эз расдиш мошин энү хэреб бу, э ремонт бу.

Шими дениши э гъунши, э вогънеки пешмуни сохдере хуно, мугу:

— Элле, туь мунош, хэрмеш нечоґь бири, эдее ґье сарб овурде, суьґьруьсде, меш уре э капиталный ремонт норем.

Ғьунши ґьелбет, бовор несохд э Шими. У э ґІэйб дореи не сер-куширевоз мугу эз Шими:

— Эй Шими, мере хэр хьисоб месох. Хэр мошин нисди, хэре э капиталный ремонт нисе норе, эйчуь гуфдире туь ижире гофе?

— Эй ґьунши, туь нисе варасире, — э олхоґьиниревоз жуґьоб до Шими, — эгенер сэхьиб хэре нисе воисдеге хэр хуьшдере эри доре, у хэре э капиталный ремонттиш норе мидануь, чуьтам туь у дес сип-соґьэ мошинтуьре э «ремонт» норебириге.

## ЖЕЛЕҒЬОЙ ШИМИ

Е вэхд Шими заведиш эн керґ-вече дошдениґьо ферма бу. Э дуь тараф эн ферма више бу. Кими вэґІдо туьлкиґьо, чоґьолґьо эз више ведироморе, э далдеґьо, кулеґьо пэхьни бире, эз нэхэберки э сер керґьо оmore, кешире берденбируьт керґьой колхозе. Шими уґьоре эри тубо сохде, терс доре э керґьо-вечеґьо ґьэсд несохут гуфдире, э ґьироґь эн вишеґьо желеґьо норебу. Е ченд чоґьол, туьлки э желеґьой энү офдоре бэґьдо, уґьо дие эз терс эз фермаш куьнд нисе оmoreмбируьт. Оммо сер ебо сернуьш колхоз, енебуге эн ревизионни комиссия э ферма оmore, ґьишдембируьт Шимире е ченд керґ куьшде, кобоб сохде, эрэґи-шороб норе эришу. Кими вэґІдо сернуьш колхоз тэхьно нисе оmoreнбу, у э хуьшдеревоз е ченд дусдґьо-ґьуноґььой хуьшдереш овурденбу э хуьшдеревоз инжо э шон эн серине више, э ґьироґь эн савзелуье мержле эри хурде, кеф сохдешу.

Е гиле сернуьш колхоз пушой э хьэрмэхьґьой хуьшдеревоз э ферма оmore эри хурде, кеф сохдешу, Шими овурд но е ченд желе э сер рэхь, эжеки сернуьш колхоз мошин хуьшдере поюнде, фираморенбу эри дироморе э ферма. Э ґІэрей и дес э уревоз оmoreбириуьтґьо «ґьуноґььо» дебируьт ґьемчун кими келете хьокимґьой эн шегьериш. Сер эн желеґьоре у э велґ, ґиёвозов дегирд, э чум энугьо невохуру гуфдире.

Руз эз пишней гирошд, оммо «ґьуноґььо» чуьиге веде небу. Ғьово шохьонгум бисдоки, Шими керґьо-вечеґьоре э жигешу дешенд, дерґьоре сэхд сохд, омо нуьшд эсер тэхче. У ґьэйлере томбоку пур сохде, эдембу ґьэйле кешире, чум энү сер гирд эри э хов варафде. Ғье и вэхд э гуш Шими е ченд келе хьэрой, божэхь дерафд. Эз ґьеме келете эдембу сернуьш колхоз хьэрой-буьруьж дешенде, гуйґе киниге пуст энуре зинде-зинде эдембу кенде.

Шими суьпле хэнде сохде, вэхид эз жигей хуьшде, э ґьосуतेвоз тэґІди несохде евош-евош, лэґІэ-пара сохде-сохде, куьнд омо

эзугьо. Сернуыш колхоз не хьэрмэхьгьой ю гьетте Шимире дире, сер гирдуът эри хьэрой сохде, е пой ишу э желей гьовуни дери:

— Туь кури беге, э сер эн рэхьиш одоми желегьо минуь?!

— Туь пир бирей, эз эгьуъл чешмиш бирей?!

— Э сер эгьуъл вебугьо одомиш ижире коре мисоху!?..

Шими эзугьо лап куьнд оморенге, мугу:

— Бовор сохит, э жун ишму: не ме куриш небирем, не эз эгьуьлиш гьеле невадарафдем. Э кумеки эни желегьоревоз ме кергьовечегьоймуре эз чорпое чогьолгьо, туьлкигьо хилос сохдем, угьодие эз терс эн желегьойме э куьндигьой эн фермаш нисе оmore. Имогьой кергьовечегьой колхозе терс гьисдигьо эз чьушмуни дуьпой чогьолгьо-туьлкигьой. Унегуьре ме и желегьоре эз гьырогь више вегирдем, инжо э сер рэхь ишму норем.

## ГЬОВРЕЙ ЭН ХОН

Е руз келе мерд Шими гьемишеиней хуьшдере хуно себэхьмунде э кул хэр хуьше венише, эдембу э онгурбогьгьой колхоз рафде эри кор сохде. Оммо чьу кориге э е жиге минжи эн рэхь имбуруз э расеревоз кешире оmoreбу, кесе эзунжо гироше нисе гьишденбуь Е десе одомигьо лапаткагьо, ломгьо э дес дери эдембируьт э минжи рэхь хорире векенде. Э сер энугьо е жогьиле кук, чешмеке чумгьо вебу. Шими фирамо эз кул хэр хуьше, омо э ён кук — чешмеке чум, руз эхэйрбу доре уре, пуьрси эзу:

— Ишму инжо э сер рэхь хорире эричуй векенденит?

— Иму археологьойм, — жугьоб до чешмеке чум. — Э фикир имуревоз гье инжо иму хори векенденигьо жиге биё гьоврей эн хон бу. Иму хорире э векендеки гьеле е-дуь чи офдейм, белки имогьой гьоврей энуреш, остгьугьоюреш офдим.

Шими омбар мэхьтел мунд и гофгьоре шиновусденки. У согь гьуьмуьр хуьше, э кул хэр хуьше венуьше и рэхьэ себэхь рафди, шохьонгум вогошди, оммо у эз екиш нешиновусдебу инжо гьоврей эн хон бири гуфдире. Не эз бешешуш, келебешешуш нешиновусдебу у и гофе. Эз товун эни кор у гуфди э кук — чешмеке чум.

— И мэхьтеле кор нисди, — жугьоб до кук. — У хон зигьисди э у дуре вэхдгьо, кейки неки бешешму не келебешешму, оммо келебей эн келебешешмуш гьеле эз деде небиребируьт.

Эри эн Шими и гофгьой эни жогьиле гьилмчи лап томоше омо. У пуьрси:

— Гьери гу, туь мунош, чьужире одоми бу у хон? Ишму хундегоргьо, гьилмчигьо биё данит э товун энудие дануьсде бэгьдо эжеиге жиге гьоврей энудие.

— Эри, дануьсденим, — э эдеблуьиревоз жугьоб до гьилмчи.—

У лап зулумкоре, беднефсе темэькоре одоми бу. Хэзинеи энү суьрх-эршефи пур бу, оммо гене чум энү сирои небу. Хэзинеи хуьшдере эри зиёд сохде у медиromo э нуькергьой хуьшдереvоз э рэхь кер-вуни, эри эз де вилеетгьойге оморе севдегоргьоре, тожиргьоре эри э базар Дербенд э кервугьой девегьошуревоз овурде чигьоре фу-рухде, угьоре талан мисохд, микуьшд. Уре сад зен биреки жиге, гене э гужеvоз мегирд раче духдерегьо, гIэруьсгьой кесе, мидешенд э хьэрем хуьшде. Э сер рандбергьо келе хэржигьо, бигоргьо мено. Рэгиет эдембу ноле зере эз дес энү.

Эри Шими лап томоше, мерэгьуль омо и ихдилот эн жогьиле гIилмчи. Жогьиле гIилмчи диренге ижире гьовой Шимире, юре воисд гене гую чуй дануьсдениге э товун эни хон.

— У хон, — мугу жогьиле кук, — э сер тэхд эри нуьшде, жигей хуьшдере эри гьоим сохде, бебешуре огьу дори куьшде, бирор хуьшдере э зиндон донори, унжо э гиснеи куьшди, лелешуре эз гьугь дохьори э чилокон дешенди, шогь Индистон шогь Джагьоне хуне гьеме бироргьо. кукгIэмлегьой хуьшдере, кугьой энугьоре куьшди еки энугьош э тэхдию гьэсд енебуге темэхь несоху. Ини эзу вэхдеvоз ченд садсалгьо гирошд, нум энү фурмуш бисдо, гьоврей энү вечаруьсде, э хориревоз дуз бисдо. У пушоте гьоврей энү бугьо жиге келе рэхь бисдо, зирпой бисдо. Оммо и ченд салгьо екиш эзи рэхь гирошдегоре одомигьо нисе дануьсденбу, ки инжо э зир пой энугьо гьоврей энү хон дери гуфдире.

Шими гофгьой эн суьгьбетчи хушдере шиновусде верасденге, е ченд минут лап э хуьшде домунд, ченд жире фикиргьо омо э дуьл энү, омо гьемчун несигIтуье гофгьой эн ошугь: «Кимлер гелди, кимлер гитди, бу дуьньёгьде, бу дуьньёгьде!..» Песде бирден, лов хуьшдере э суьпле хэнде веберде, пушони хэр хуьшдере тимор сохде-сохде, мугу эз жогьиле гIилмчи:

— Ме имогьой эдее э сер офдоренуьм: эйчуь и хэрме гьетте э и жиге оморе расире, луьнгьоре лов сохде, кимвэгIдо поисденбуге. Песде те ебо эз жигей хуьшде жуьмуьсде, ебо келе гIэринe мизе, шори сохдере хуно, пишгIов мисохд, марри, песде э рэхь миофдо. Хэрме э хьисобовоз дануьсди инжо гьоврей энижире зулумкоре хон бири гуфдире...

## БУДУАР ЭРИ ГIЭРУЬС ШИМИ

Е руз Шими тозе гьобой хуьшдере вокурде, тозе килэхь хуьшдере э сер веноре, рушгьо-биггьой хуьшдере тимор сохде, э мигIид, э шори буравгьоре хуно, рафд э хуней эн е одоми духдер энү-

\* Шах Джагьан — буьзуьрге Могол (1592—1666), э вэхд падшогьети комики вокурде оморебу гIэлеметие Таджмагьал. У юш хуьшденниюш эз тэхд венгесде оморебу э десдин кук хуьшдереvоз э 1858 сал ве те муьрде дебу э дуьсдогьа.

ре эри хосде эри чуьклеи кук хуьшде. Оммо эз дуьл у лап пешму бу, гуйге эри духдер хосде нэгI, эри гъэдо-бологъ восдоре эдее рафде. Бебе-дедей эн духдер эслогъ эз дуьли Шими небируьт. Угъо э дуьзди-дургуниревоз гIошир бире одомигъо бируьт. Э пушой чум энугъо косибе, пул небугъо одомире е хъуьрметиш, е гъиметиш небу туь гIэсуьлменд, эгъуьлменд, номуслубе одоми гъисдигеш. Уьткеми, келегеди, фурс энугъореш э пушой хэлгъ гъэдер небу. Шимире эслогъ нисе воисденбу э ижире одомигъоревоз, угъо гIошир гъисдигеш, эри гъовун-гъэбиле биреь Оммо и эгъуьлсуке кук эну ошугъ биребу э духдер энугъо, эзи духдер бэгъэй е духдерш эгерде нисе вегирденбу эри хосде. Унегуьре Шими эдембу рафде эри гоф сохде э бебе-дедей духдеревоз эри э илчиети дироморе, наргов э зир бун-дуругъ буравгъоре хуно.

Хуней эн биёвгъо гъэбилегъой эну е гъуьндуьре дуйтэбэгъеи келе хуней сенгъи бу э богъовоз, хъэвуьзевоз э минжи эн келе хъэёт. Э ён хъэвуьз э тозе бугъолубе импортни мошин поисдебу, эдембу тов-тов доре.

Шими э пушой дер хуне пойвокугъой хуьшдере векенде, дере куфде, диromo э хуне. Э хуне эз дедей духдер бэгъэй екиш недебу. Дедей духдер е чогъэ гъолинде зен бу. Э тен эну е ранги-барангие хэлет вебу, сине рэхъо. Муйгъой эн зен чире бу, кутэхъ бу, эн гIэил школаире хуно, пура, гиргине сифет энугъо тух ранг зере бу, гъолинде ловгъой энугъо хуне хуно гъип-гъирмизи бируьт. Зен гъейсэ-гIэт э гъирогъ эн е сара журнальни стол нуьшде, э сер комики е гурунде, эз чутун сохде раче папрусдеки вебу, эдембу папрус кешире гъемиге е ранглубе журнал эн моде фегъм сохде.

Гъетте Шими и папрус кеширенбугъо, гъечи тух ранг зеребугъо, муйгъой сер хуьшдере лап кутэхъ сохдебугъо зене диренки, коми-реки эгенер ижире гъолинде синегъо, кефелгъо нивебисдоге, гьерчуть дануьсде мибисдо, и партал зенуне вокурде мерди, гъе у туьтем уре воисд, дере вокуну вирихуь песово. Оммо э хотур кук хуьшде, эн муьгъбет энугъо, Шими межбур сохд хуьшдере эри поисде э жигей хуьшде. У, хъзрекет сохде э сер-сифет, сер-синей зен эри неденишире, э эдеблуиревоз руз эхэйрбу до уре, пессе гуфди э чуь метлебовоз омориге э хуней энугъо. Шими уреш гуфди, ки кук не духдер эз зуревоз дуь екире шинохденуьт, хосденуьт дуй екире.

Зенеш гъе эз диремун хъэз неомо эз Шими, комики эзи куьгъне одомигъоре хуно гъобо вокурди, э сер ю тозе килэхъ веригеш, килэхъ гусбендини, куьф энугъо э хъисобово гъе тигъини, у энжэгъ э муьзд жофой хуьшдеревоз зигъиде. Эри эн зен хуьрдире хуно омо ижире одоми омори гуфдире э хуней энугъо духдер юре эри хосде. Уре не эз Шими, не эз сер-сенбол энугъо хъэз неомо. Неденишире э келе мерди эн Шими, у Шимире теклифиш несохд гирору нуьшуь гуфдире. У э гевилсуьзиревоз денишире э лой Шими, э уьткемиревоз биргмунде э гIошире дуйрлуьг эн хуней хуьшде мугу эзу:

— Духдерме хуте бири гьечи э бэхдевери зигьисде. Божэхьэт кук ишму мидануь духдермере гьечи дошде, тегьмин сохде. — Песде зен гьербмизине ловгьой хуьшдере дигил сохде, э руьхшендие хэнде веберде, мугу: — Ишмуре э хьисобовоз будуариш нисди эри гIэруьс, оммо духдермере будуар гереки э хуней эн шуьвер..

Шими гьич э гIуьмуьр хуьшде нешиновусдебу и гофе — чуьниге «будуар», оммо эри пуьрсире эз зен чуь гофиге «будуар», у жуьргIэт несохд, хуьшдере эри хуьрд несохде э' пушой эни девере хуно келегед гьисдигьо, эз гIошири хуьшде гьудуз гьисдигьо зен. Шими энжэгь гоф до уре, ки у фикир мисоху э товун эни гоф эну, омбар нэгI, эз дуй-се сэгIэтиге бэгьдо миёв жугьобе эри доре.

Гьетте эз хуней эн биёвгьо гьэбилегьой хуьшде ведироморе, Шими сер гирд эри гешде е одомире, дануьсденигьо и нешинохэ, «килитлемее» гофе — «будуар». У э рафдеки гье эдембу вогоруш сохде э зир зугьун и гофе, бирден эз ёр ю невадарав, фурмуш небу. Оммо омбар негирошд, э рэхь эну омо вохурд эз руй е интеллигентни одоми — лэгьэре, дуразе мерд, э сер ю шляпай суймери вери, э чумгьой ю — гьолинде чешмекгьо. Веди бу у екем серхуш бу э хьисобовоз эдембу эз гIэруьси небуге эз сер межлуьс оmore. Шими эзу бэхшлемиши хосде, поюнд уре, песде пуьрси: дануьсденими у чуь гофиге «будар». Шими гуфдиренге эзу эйчуь герекиге уре ёгьин мэгIной эни гофе дануьсде, интеллигенте мерд, хэндуьсде-хэндуьсде, мугу эз Шими:

— Будуар — гоф французини. «Будуаре» — гуфдиренуьт жейлее вараюнде утогьэ эри зен-гIэруьс эри гьуногьэ, шинохэ гьобул сохде, партал хуьшдере вокурде, хуьшдере ерашуьгь сохде. — Песде у, э дуразе, лэглегие пойгьой хуьшдеревоz эз пиёни е кем лойлум хурде-хурде, гьолинде чешмэекгьой хуьшдере дуз сохде э назуке вини хуьшде, эз зир лов хэндуьсде, мугу эз Шими:

— Ме э жигейтуь бире, лелей Шими, туь дануьсде бэгьдо хосиетгьо, дивэгIгьой эн биёвгьо зенгьэбилейтуьре, мугуфдирум э у: туьре разини гуфдире духдер энуре эри доре э хунейтуь неки «будуар», гьемчун — «писсуар».

Шими гьерчуь дануьсд «писсуариш» э хьисобовоз е жейлее утогьи эри гIэруьс, унегуьре у дие непуьрси, чуьниге мэгIной эни гоф, у согьбоши гуфдире эз мерд эри уе э сер венгесдеи ве меслэхьэт дорей, зури-зури вогошд э ки зенгьэбиле. Гьетте гене пойвокугьой хуьшдере э демой дер векенде, дироморе э хуне, Шими гьеусэгIэт шори, келегеди сохдере хуно, мугу эзу:

— Эй зенгьэбиле, мере эри духдертуь, эри гIэруьсме, гьисди, худо гьишдре и.. будуар. — Песде Шими лове э шоре хэнде веберде, екем эз хуьшде келегеди сохдере хуно мугу: — Эгенер туьре лап воисдениге, гIэруьс лап гьечу тэгIди нисе сохдениге, ме, бовор сохит, уре мидуьм неки туь гуфдиренигьо будуар, гьемчун писсуариш...

Гьетте Шими нум «писсуаре» гирде, у лап келе мэхьтел бисдо, диренге, чуйтам сифет эн зен гье усэг!Эт гьип-гьирмизи бисдо, чум-гьой ю чаруьсдуьт. У э е хуьршевоз эз сер стол папрусдеки чугунире вегирде, э е зарбевоз пертово до э сер Шими. Шими эз г!э-тош гирде сарай вирухуьгьоре хуно, зурн-зуру вирихд ведиромо эз хуне, эз теретэг!ди ве серевири хуьшде у чекмегьой хуьшдереш фурмуш сохд эри вокурде. У гьечи пойвокусуьз эдембу вирихде эз гьэд куче, эз ён э мэхьтилеревоз э у дениширенбируьтгьо одомигьо, гье гьечу недануьсде: эйчуь эхи эри эни хубе гоф, теклифи энуну зенгьэбиле гьечи гьээзоблуну бисдоге э сер энуну?

Хосдехунди, гьелбет, дие небисдо...

## ШОФЕР Э ЖИГЕЙ Г!ЭЗРОИЛ

Е руз себэхьмунде келе мерд Шими эдембу э такси эз Дербенд э поселок Огни рафде. Суьфдеи рузгьой эн мегь май бу. Гьово темиз, ковре эврьюшуьме жуно бу, доргьо э гуьл не велгевоз вараисде бируьт, гиёвгьо руй хорире савзее мохбере хуно дечиребируьт, ригазгьой чуьшмей себэхьмундеи гуйге эдембируьт жовогьил тигьи сохде э гьер тараф. Гьеме э иловле эдембу шевгь, хушбуй доре, мугьум хунде, дуьл одомире шор сохде. Оммо э дуьл эн Шими шори недебу, могьбули дебу. Е теке кук эн дусд энуну, зигьисденигьо э поселок Огни, э мошин э рафдеки пуч биребу. Шими эдембу рафде унжо э ки дусд-гьуногь хуьшде эри бошсогьлугьи гуьфдире, нуьшде е кем э уревоз.

Эз Шими бэгьэй э мошин де пассажириге невебу. Шофер е жогьиле, битобе, женжеле одомире хуно бу, э пушонию е келе дэгьме вебу эз куьгьне яра, е кем сорхушиш бу. Гьетте эз гьопуй эн Гьирхлер-гьопу ведироморе э гьир зере рэхь, шофер сер гирд э лап келе зарбевоз эри гьей сохде машине, зере гирошде гьеме э пушо дебируьтгьо мошингьойгере.

Шими лап дуьлпесо бисдо, терси: худо м!ёеро, и шофер э гьечиревоз э рэхь е авария несоху, э сер ю е кор неёру. Шофер диренге гьовой энуре, э лой эн Шими чаруьсде, буй эрэгьи доре-доре уре, сер гирд э зарифатие жире эри пуьрсире эзу, гьовой энуре е кем эри воровунде.

— Эй лелей Шими, ишму бовор сохденит гьисди гуьфдире э г!уьлом Г!эзроил худои комики, гуйге берденигьо жун одомигьоре, небуге э товун шэхьиту, одомире шуькест, чешмиш сохденигьо?

— Шими, гуйге шор бисдо, шофер юре ижире пуьрсуьш до гуьфдире.

— Эй хэлефме, — мугу гье усэг!Эт Шими эз шофер, — эгенер туьре дануьсде воисдениге фикирмере э товун эни кор, туь мунош, е дэгьдэгьэле поюн «ерпалантуьре» э гьирогь эни рэхь!..

Шофер гьечу дануьсд, ки келе мерде э хисобовоз сэхд э буру рафдени гирди. У гье усэгIэт мошине эз минжи рэхь ведировунд поюнд э гьырогъ рэхь.

Гьетте мошин поисде, Шими дер мошине вокурде, зури-зури ведиромо эз мошин. Песде у е кем олхогьин бире, куьнд омо э ки пенжерей шофер, гьуз бире э куьнди гуш энун, гуфди лап келе-келе, э гуш эн кард гуьгьоре хуно:

— Бовор сохденуьм, хэлефме, бовор сохденуьм гьисди гуфдире ГIэзроилиш, шэхьитуш! Оммо эзумогьойлеревоз, кейки э келе рэхьгьо-илчигьо э жигей соките гIэребегьо, раче фейтунгьо, асдее девегьо, дилбоше гIэсбгьо, динже хэргьо туьнде мошингьо бире эйло, ГIэзроил не Шэхьиту рафдет э пенсия, э форигэти, беде кор ишуре, везифешуре венорет э сер чуйшмуни мердимазаре серсоне шофергьо...

## ЧУЪТАМ ШИМИ Э ПУШОЙ ЗЕН ХУЪШДЕ РАСД ВЕДИРОМОРЕБУГЕ

Зен Шими гьеми бирач бу, гьемиге бедракш ве гьуьд-гьуьд. Унегьуре гIэрей Шими э зен хуьшдеревоз цунгэде ширин небу.

Е гиле артистгьой эн театр Дербенд норебируьт пьеса эз коргьо, гьозие-гьэдергьой эн одиначове гьемватанишу Шими Дербенди. Нум эн пьесараш гье гье гьечу норебируьт — «Шими Дербенди». Э примьер эн спектакль чуйн гIуьзетлуье гьуногъ, угьо огол зеребируьт хуьшдени Шимишеш.

Пушой егиле э театр рафде, Шими, гуйге эдее э гIэруьси рафде, вокурд тозе гьобо, тозе килэхь хуьшдере, рушгьо-бигьгьой хуьшдере тимор сохд э пушой гузги, вено э синей хуьшде медалгьоре, омо э театр.

Шими э театр оморенге, зал пур бу одоми. Шимише овурде нишундуьт э хуьурметевоз э пушой жерге, а ён э примьера теклиф сохде оморебируьтгьо одомигьо. Шими эз дуьл эдембу шори, эрк сохде, коллектив эн театр нори гуфдире пьеса э товун ю, нушунди гуфдире юре э е жерге э теклиф сохде оморе хуьурметлуье одомигьой шегьеревоз. Недиишире э и кор, Шими хьэрекет сохденбу эри небирмунде шори хуьшдере, хьёменд, саламат гирде хуьшдере э пушой э томоше оморегоре гьемватанигьой хуьшде. Оммо гьетте э сегьне перде вокошире оморе, Шими виники э вози сохдеки «хуьшдере», «зен хуьшдере», «модни гIэруьс хуьшдере», эгьуьлсуке «гьунши хуьшдере», э комики у фирмунде «делуье импортни хэр» хуьшдере фурухдебу, Шими э жигей хуьшде олхогьин, саламат нуьшде недануьсд. Э сегьне бирмунде оморенбируьтгьо гьозие-гьэдергьо эз зиндөгуни Шими эз расдиш лап томоше бируьт, эз елойге артистгьо, худо гьувот до ишуре, эдем-



бируйт лап хуб возире. Э зал нуьшдегоре одомигьо диренге то-мошее гьозие-гьэдергьой Шимире, эдембируйт эз дуьли хэндуйс-де, чек зере. Шимиш дие тоб доре недануьсд. У килэхэ песово доре, чек зере-зере, хэндуйсде-хэндуйсде гогь мэхид, гогь ми-нуьшд э жигей хуьшде, келе-келе хьэрой сохде-сохде:

— Эй туьре гуьом, Шими! Эй туьре г'энг г'эсели гезо!..

Пушой песини акт артистгьо ве э зал нуьшдебируйтгьо одо-мигьо теклиф сохдуьт Шимире э сегьне. Шими гьаенжонлуь, шо-ри-шори воромо э сегьне. У е гиле э хуьрметевоз сер зе э томоше оморегоре одомигьо, песде эз дуьли сер гирд эри гьэл гирде, моч сохде гьеме пес-песоеки артистгьо ве актрисгьоре. Лап э песини «модни г'эруьсе» э моч сохдеки, бирден килэхэ Шими офдо эз сер энэ э хори. И кор днөш шоре хэнде венгесд э зал, чеке-чекгьо днеш гужлуь бисдорут.

Шими эз расдиш у шев вогошд э хуне гуйге эз г'эруьси омо-рере хуно, эжеки у нуьшди,хурди, кеф сохди э дусдгьой хуьшде-ревоз, оммо лов-буз эн зен энэ лап дуьлу бу, гьошгьой ю огьур-домога бу. Э дуьл Шими зеде расирере хуно бисдо. Шими дени-ши э зен хуьшде, пуьрсэ э дуьлпесоиревоз:

— Эй зен, туь жун муьрдегьойтуь, гу: туьре гене чуь бири?!

— Гьичиш!— э г'осииревоз жугьоб до зен, сифет хуьшдере чарунде э улойге.

— Чуьтам гьичиш? Ме эдее диренуьм эз сифеттуь, туь бирази-ре хунои?

Зен Шими чаруьсде э лой энэ, э серкуши, биразииревоз дени-шире э шуьвер хуьшде, мугу:

— Эй мерд, туьре г'эйб нисе оморэ?! Лоигьими э салгьойтуь, э сипре руштуь варафде э сегьне, э пушой эн гьемей хэлгэ зенгьой кесе моч сохде? Туь зентуьреш гьич е вэхд моч нисе сохде, оммо имишев у жогьиле артисткаре гьечи э зарбевоз моч сохдебири, килэхьтуьш эз сертуь офдоребу э хори...

Шими э зен хуьшде денишире е ох кеши, дуьл ю пешмуре ху-но бисдо, фикир сохд эри хуьшде: эгенер зен ю е кем семе эгьуьлменд, сарафлуь одоми мибисдоге у эри эни кор э ижире шорие вэхд гьовой шуьвер хуьшдере хэреб нисход. Оммо Шими дануьсденбу, ки гуьфдири-негуьфдири гьейсэг'эт э у э товун эни-жире серкуши энэ — фойде нисди, ниварасуь. Шими хуьшдере э гьэгьри бирей невоноре, лове э зарифате хэнде веберде, мугу:

— Эй зен, э жун худо, чуьи беге инжо эри гьэгьри бирейтуь?

— Эй зен, туь жун муьрдегьойтуь, гу: туьре гене чуь бири?!

э моч сохдеки туь унжо мибисдориге, белки э нэхэбереки ме туь-реш моч мисохдум...

## ЗАРИФЕТ ЭН «ХУДО»

Э у жогъиле косибе вэгдогъой эн Шими, у е руз э минжи васал, гиёв бул вероморенигъо вэгдо, овурдебу хэр хушдере э гъирогъ шегьер, э ён билогъ, э савзелуегъ эри хорунде. Гье э и вэхд, у э хэр хушдеревоз э савзелугъ гъисдики, е келе гюшир эн Дербенд, э сер фейтун венуыште э е раче жогъиле зеневоз эдембу э богъгъо рафде. Шими е гъэдер вэхд, эз жигей хуыште нежуьмуьсте, гъйэрон, билбуле хуно дениши э лой энугъо, те фейтун эз пушой чумгъой энугъо веди небисдо. Дуьл Шими лап гурунд, могъбул бисдо. У сере тик гирде, э асму денишире, келе-келе шуькеет сохд, худо шинову гуфдире уре, мугу:

— Эй худой сэхъиб гуьлом, нум туь гъемише э ники гирде биёво, гуш вени э ловойме: е гиле семе шор сох дуьлмере, эн косибе, езугъэ! Меш эхи туь офире инсонум э руй эни хори и гъейсэгъэт э пушой ме гирошдгъо гюшире хуно! Уре э шегьер е ченд тебэгъэи келе, раче хуней сенгъини эн султане хуно, онгурбогъгъои, зен энугъо эдее эз рачи тов-тов доре, гуйге гъэсел не гъэймэгъ эдее рихде эз ловгъой ю. Оммо мере, гъеме бире-небирейме, мол-овгъотме, гъур-кефейме е пелемуьрдее, гъуьлелее хэри, е бираче гъуьд-гъуьдне зени, е сула дерне дэхмей гиловини. Эйчуь гъечи туь екире лап бэхдевер, тожвесер, сохдей, екигере, чуьмени езугъэ, хокбесер, бедмозол сохдей?

Гъечи э ижире фикиргъо, думигъоревоз Шими нуьшд э сер гиевгъо э куьнди эн хэр хуыште, чум ю э нэхэбереки э хов верафд. Гъемин гье и вэхди, кейки Шими оморебу э хэр хушдеревоз э савзелугъ, се доне лутигъой эн шегьер нуьшдебируьт э кунди билогъ, э биней эн е келе куле, эдембируьт эришу хурде, кеф сохде. Угъо шинируьт, чуьтам Шими э худо шуькеет сохденбуге. Чум Шими э хов верафденки, угъо эри хъэз ишу, гирдуьт эз вожей хэр Шими, дебердуьт уре э гъэд кулегъой эн шевелуь, э гъирогъ эн билогъ вебируьтгъо, пэхъни сохдуьт. Хэр невирихуь гуфдире, дуьуй энугъо эз гушгъо не дуьм хэр гирдуьт, екиге сер гирдуьт эри хъэрой сохде:

— Эй Шими, ме, худойтуь, э зверсер асму шиновусдем ловойтуьре! Вэхиз, воку чумгъойтуьре, вниш чуьтам ме туьре шор сохденуьмге!

Шими хисиребугеш, и сес э гуш энугъо дарафд. Эри энугъо гъечу омо, ки эз расдиш ловой энугъо гуш худо дарафди. Шими шори-шори чумгъоре вокурде, вэхид, дениши э иловле. Оммо э иловлей энугъо неки гъичиш небу, хэр юш эз бине веди небу. Шими лап сэхд дуьлпесо бисдо эри хэр хуыште. У сер гирд эри гешде гъеме куьнддерере, оммо хэр хуышдере неофд. Шими дие эз хэр хуыште дес вегирде, могъбул, дуьлхуьрд эдембу э хуне вогошде, кейки лутигъо хэр энуре рэхъо сохдуьт.

Хэр гьетте эз дес лутигьо хилос бире, келе-келе гIэринне зерезере, эз шори диндина вешенде-вешенде видовусд омо э ки сэхьиб хуьшде. Шими хэр хуьшдере дирентге, омбар шори сохд. У сер хэр хуьшдере гьэл гирде, сер гирд эри пес-песоеки моч сохде, тимор сохде уре. Песде э ёр энү омоки, у чүь лово хосдебуге эз худо, «худо» чүь гуфдиребуге эзу, чүм ю э хов верики, у сере гентик гирде, шүькеет сохде, мугу:

— Эй худой офирегтор, сэхьиб гIуьлом, гьечиш беге кор бирени?.. Ме эз туь хосдебируьм: мере е гиле семе шор сох гуфдире э и гIуьлом. Оммо ме эз туь негуфдиребируьм, ки мере эри шор сохде: туь е гиле хэрмере эз пушой чүмме сур, пэхьни сох, песде ме дне эзу дес вегирденге, эз нокуми ведировун э пушойме... Гьечиш зарифат бирени?!

## БЕДЕ ГIЭНГГЬОЙ ЭН ШИМИ

Еки эз невегьой Шими Дербенди шофер эн такси кор сохденбу э е автотранспортни корхоней эн шегьер. Директор энү келе дүьзд, келе руьшвехур бу. Эз и ченд сал инжо у кор сохден сэхьиб келе пултго, келе девлетго биребу. Эз товун ижире келе рушвэхур бирей энү, неки согь коллектив у рэхьбери сохденбугьо, гьемчун гьемей шегьериш дануьсденбу. Эзу бирази бируьтго одомигьо ченд гилегьо эрзегьо нуьвуьсдебируьт эз дес энү э келегьой шегьер, э Масков оммо у э жигей хуьшде олхогьин, муьхкем нуьшдебу, гIуьлом э хэпер юш небу.

Директор лап шор, рази бу эз зиндегунн хуьшде, энжэгь уре е дерд бу — у лап лэггэр бу, зэгIифе одомире хуно, эз руй, серсифет, буй-бала уре е шэхс, е обур невебу, гьерек, лоигъ гьисдигьоре хуно эри номенклатурни корсох, чүьнки уре зофру бире нэгI, диеш звер бире воисденбу.

Зен директор гириге эзуш ветете бу, тэхтере хуно бу, не сине, не кефел невебу уре, гьич зени гуфдиреш ухшеш нисе зернбу. Нун энугьо э гIэсел-руьггэ дебугеш, гьемесал э лап хубе курортго рафденбируьтгеш, гьеме коргьоре э хуне э киро гирде зен сохдембугеш, директор не зен ю гье гьечу хуьшге боблигьой хьшдерхуре хуно хуьшг-гьуггьуз бируьт. Э товун энижире лап лэггэр биришу эз директор ветете зен ю омбарте фикир-гьэьгьу кеширенбу.

Дануьсде э товун энижире «дерд-фикир» эн директор нен зен ю, Шимире воисд е чоре сохү эри энугьо, оммо э гьовой нэгI. Мошин эн невей Шими, э комики у кор сохденбу, лап куьгьне биребу, омбар хэреб биренбу. Э ижире мошинево одомигьоре берде терсиш-терс бу неки эри энугьо, оммо эри хуьшдени шофериш. Оммо директор уре тозе мошин нисе доренбу, дениширебу, кей

невей Шими уре келе руьшве мидуь, песеде уре тозе мошин эри доре.

Шими шиновусденге э товун эни кор, себэхьмунде вегирд е чуйкле гьути тэхдеире ведиромо э хьэйт. Инжо э зир эн емишдор-гьой эн хьэет, гьейсэгIэт э гуьл дебируьтгьо, е ченд лулегьой эн гIэнэгьой гIэсели бу уре. Шими куьнд омо эзу луле, э комики лап дуьруьжде гIэнггьой гIэсели дебируьт, эз хосиетиш угьо бедте бируьт эз де гIэнггьойге.

Шими э хьитиётгиревоз вегирд е сад эзи дуьруьжде беде гIэнг-гьо, доно угьоре э гьути. Сер гьутире хуб сэхд сохде, вегирде э хуьшдеревоз гьутире омо э ки директор эн невей хуьшде. Шими оморебугьо вэгIдо э кабинет эн директор екиш недебу эзу бэг-гьэй. Шими дироморемунде, руз эхэйрбу доре директоре, нуьшд э пушой энү, э раче-берачей энү, гьутиреш но э пушой энү.

— И чьуни?— шекељуь денишире э лой гьути, пуьрси дирек-тор эз Шими.

— Ме эришму зен-шуьвер эз е келе жерэхь е гIэлемете дерму свурдем,— мугу Шими.— Эзи дерму лэггьэри эн одоми, вой эн зен, вой эн мерд лап зу гиросдени. Эзи дерму одоми чогь бире, бисембее керге хуно, э ранг-руй оморе. Оммо коргьой гуюгьоре хуно: э ники ники расунде гереки...

Директор дие негьшд Шимире песой гоф хуьшдере гуфдире, у гье усэгIэт вараси эйгьом гоф энуре. У гоф, шовгIо до Шимири гье имбуруз, те ебо э хуне рафде чи пишнэинере эри хурде, у невей Шимири тозе мошин мидуь.

Эз расдиш, те ебо э хуне рафде, директор буйругь до э жи-тегир хуьшде еки эзи пушогоь эри корхоне оморитгьо мошингьодуь гуфдире невей эн Шимири.

Гьетте директор, хуне оморе, чекмегьоре эз пой, пинжеке эз тен хуьшде векенд, омо э кухни. Э сер стол чи норе, хьозур сох-де оморебу. Зен директор е назуке гьулневерие рангиберангие хал-лат эврьюшими вери одембу э сер стол лэггьэ-чонгол норе.

Директор те ебо сер гирде эри чи хурде, тоб недо, оворд гьу-тире, но э сер стол, зури-зури вокурд сер энуре. У суьфде мэхь-тел мунд, диренте, ки э жигей «гIэлемете дерму», э гьути е хэйли келе гIэнггьо дери. Те сер гьутире дуборе сэхд сохде, гIэнгьо жиз зере гьеэбо ведироморут эз гьэд гьути, гьов кенде рафдуьт э сер директор нен зен ю. Угьо зен-шуьвер десгьоре вежегьунде-веже-гьунде, хьэрекет сохде эри пиш сохде угьоре эз хуьшде, вирихде ведерафдуьт э хьэйт, эз хьэйт — э куче. Ченггьэдер директор не зен ю бежид вирихденбируьтте, унггьэде угьо диеш э гьэзоб оморе, эзугьо дес нисе кенденденбируьт, эдембируьт э инсофсуьзиревоз гезире угьоре. Э жендек энугьо е соггэ жиге невемундебу, угьо не гезире. Гьечи эз гезирегьой эн гIэнггьо угьо зен-шуьвер сер гир-дуьт э пушой чум эри вамасире.

Директор не зен ю эз гъэд куче, э пушой хэлгъ, вирихде-вирихде, хъэрэй сохде-сохде, г1энггъо э песошү видовусде-видовусде, оморут расируйт э гъиругъ дерьегъ. Оммо г1энггъо эзугъо дес нисе кенденбируйт, угъо э хьисобово тэхсир эз лулешү мундеи, е гъэдер вэг1до э гъути дуьсдогъгьоре хуно дешенде омореи, эз директор не зен ю жусденбируйт.

Гъеле суьфдеи рузгъой эн май бу. Гъово герм бугеш, э дерьегъ г1ов хиник бу. Директор не зен ю эз г1энггъо эри хилос биреи, эхириш угъо эз ишү дес кенуьт гуфдире, чорешу небире, э серсуиревоз дешендуьт хуьшдере э хинике г1ов...

Шими рази бу эз ю сохде кор. Невей энү эхириш тозе мошин вегирд, оммо директоре не зен юре, чуьтам у гуфдиребуге, э «г1э-лемете дермуь хуьшдеревоз» эз лэгъэри гъеебо «чогъ» сохд, расди эри е ченд рузи...

### «Э ЖУН БЕБЕЙТУЪ, ЗЕН, ТУЪШ ДУЗИ...»

Е руз гъовой шохьонгум келе мерд Шими не зен ю вэхшдуьт рафдуьт эри сер кешире э келеи кукгъой хуьшде, гоф-несиг1эт до-ре угъоре. Келеи кук Шимире е г1эил зиьдте небу. У имогъой, гъэдо мерасо наздегъ сале жовон бу, оммо уре те имогъоиш е бирор енебуге е хэгъерле семеш небу, унегуьре ижире кор эслогъ эз дуьли Шими небу. Шими не зен юре воисденбу гъеле те г1эруьс ишү, коргъой гуьгъоре хуно, «эз вэхд неведарафди» е г1эилигеш зендуь.

Шими и войгей хуьшдере гуфдики э келеи кук хуьшде, кук энү гъе усэг1эт терсире, чумгъоре келе сохд:

— Е г1эилигеш?! Худо мегуё!— келе-келе гуфди у.— Ме эз е гъисдигъо г1эилиш визорум, оммо туь эдее гуфдире — «е г1эилигеш»...

Келеи кук Шими сер гирд эри шуькеетигъой хуьшдере сохде эз кук хуьшде: у школаре шенди, э кучегъо дери, кор сохдере э герде нисе вегирде, не э бебе-деде, не э келете одоми уре е хуьрмет нисди, эз иму гъе эдее пул хосде, пучи, гъуморпази...

Кук Шими денишире диренге, ки бабешу э ю э келе мэхътели ве биразииревоз эдее гуш веноре гофгъой энуре, хуьшдере эри расд ведировунде э пушой Шими, мугу:

— Белки, бебе, туь эритуь фикир сохдени: ме э кукме хуб недениширем, э гуш негирдем, унегуьре у гъечи бедг1эсуьл, мерди-мазар келе бири? Э жунтуь, бебе, ме эри энү гъурумсогъ несохде кор, невосдоре чи негъишдем, ме кемовгъоте одоми гъисдуьмгеш, э келлей серме венорем уре, хотур энуре эри гъичиш негъишдем, гуфдирем: «—Туьре, хэлефме, джинс воисде? Э сер чумгъойме!»

«Восдорем. «—Туьре, хэлефме, дубленка воисде? Туьре воюгьо дубленка!» Восдорем. Бугьош гьисдиге, восдорем!» «—Туьре, балайме, мошин воисде? Мошин эри восдоре мере гьувот нисди, ме келе пулгьо нисе вегирденуьм. Оммо, мидарам э гьэрд-фердиш, песини шеимереш эз тенме мекенуьм, мифурухум, эритуь мошин мосдодум!» Восдореш-восдорем, туь дануьсдени.

Туьре дануьсде воисдениге, бебе,— эдембу гене гуфдире дердгьо, шуькеетигьой хуьшдере кук Шими,— ме у суьз нуьшде э сер суфре е румке эрэгьи нэхурдем. Ме хуьшденме уре э киме нишунде, э десдин десмеревоз декирдём эри энү эрэгьире, гуфдирем: «—Ху, хэлефме, хуш хьэллолуь, туь худо мебуру, эдее мерд келе бире э хуне, мерд ичкуш михуру, папрусиш микешуь... Гьемише жибхэржи дорем уре. Ижире бебе бирем ме эри энү, оммо у...

Сес келеи кук Шими гирисденире хуно бисдо. У е дэгьдэгьэ поюнд гоф хуьшдере, сере э дердимендиревоз жумунде-жумунде, гене сер гирд эри гуфдире:

— Эри, ижире бебе бирем ме эри энү, оммо у пуч, гьурумсогь ведиморо, эдее жун имуре ведешенде. У гьэил нисди — гьэжел жун бебе-дедеи. Эзижире гьэил одомире бирейнжон, хубтеи эри дуьлхоши е сег «барбосе» овурде э хуне дошде. Сег — хьэйвуш гьисдиге, гьэдуьр сэхьибе дануьсдени, оммо туь эдее гуфдире е гьэилигеш зендит...

Келе мерд Шими лап дуьлхуьрд, могьбул бисдо и гофгьой эн келеи кук хуьшдере шиновусденки. У е ченд минут поисд, гоф несохде, э хуьшде демунде. Песде ү э эзугьбери, серкуши ве руьхшендиревоз денишире э кук хуьшде, мугу:

— Эдее диренуьм, туь дузи, хэлефме. Веги эритуь, туь чуьтам гуфдириге, е сеге-барбусе, дор, келе сох э жигей гьэил.

Гьечи Шими не зен ю, пешму, могьбул рафдуьт эз хуней келеи кук ишу, оморуьт э хуней эн дуьимуьн кук не зен ю. Дуьимуьн кук энугьоре чор кук ве се духдер бу. Шими не зен ю омбар рази бируьт эз кук не гьэруьс ишу эри эни кор. Оммо угьо уреш дануьсденбируьт, ки эри кук не гьэруьс ю омбар четини ингьэде гьэилгьоре эри дошде, дие, егьни, эзимбгьэдойге герек нисди угьоре гьэил зенде, и гьисдигьоре, коргьой гуюгьоре хуно, худо доро.

Оммо дуьимуьн кук не зен энү сер гирдуьтки эри гуфдире э Шими, ки угьо эз гьэилгьошу омбар разинуьт, шори, мозол, девлет энугьо-гьеме гьэилгьои, теимогьой зендет, генеш мизендуьт те худо доренигьо, Шими э угьоревоз рази бире, лове э шоре хэнде веберде, мугу:

— Ишму дузит, балагьойме. Зендит генеш э шори-никиревоз, те ишмуре воисде.

Зен Шими диренге, ки угьо э ки кукгьошу оморебируьт

э е жирейге фикиревоз, оммо шуввер ю имогьой эслогь ежирейге эдее гуфдире э угьо, э мэхьтели ве биразииревоз мугу эзу:

— Эй мерд, шуьггэм туьре зендигьо зен пэх гердо, туь чув томошес, гIэжонбе одомнини?! Туь эз келеи кук иму мугу: «Туь дузи». Оммо игьоре, и дуьнмуьн кук имуре, инггэде гIэилгьо гьисдики, туь эдее гуфдире эзугьо: «Ишму дузит, гене зендит э шо-зи, е гIэилигеш зенденижон, е сег-барбус веги биёр э хуне эри-ри-никиривоз те ишмуре воисде». Э гуфдирейтуьривоз: гьеме дузи, кини имогьой дуз нисдигьо?

Шими дениши э зен хуьшде, песде мугу:

— Э жун бебейтуь, зен, туьш дузи!..

## ЧУЪТАМ ШИМИ Э ОВ РАФДЕБУГЕ

Е гиле эз кор хэвлет бугьо руз Шимире воисд бурав э више эри гешде, ов зере. Гьемин э мэхьзлей эн Шими е шинох энучи бу. Шими омо э ки энучи, «руз эхэйрбу доре» уре, хосд эзу эри е рузи туьфенг овчии не патрандашгьо дуь гуфдире э ю эри э ов рафде.

Шими туьфенге э душ веноре, патрандаше э патронгьоревоз э жиши хуьшде бесде, э кул хэр хуьшде венуьшде, омо э више. Э више оmore расиренки, Шими фирамо эз кул хэр, хэре бесд э биней дор, э гьирогь више, ю дарафд э више эри ов гешде. Э куьндисогь руз гешд Шими э више, оммо э у е ов расд неомо. Пушой шохьонгум бире, чуьшме дерафде, Шими вогошд э гьирогь више, хэр хуьшдере гьишдебугьо жиге, мивини,— 'бобо вой!— хэр нисди, э жигей хэр энучи пуст-остгьугьой ю мунди. У вараси, ки те ю э више э песой гьуш-женевеер гешде, гуьрггьо оморет хэр энуре хурдет.

Шими могьбул, сергьуз вогошд э шегьер. Ебо те э хуней хуьшде рафде, Шими диромо э ки овчи. Согьбоши гуфдире эзу, туьфенге э патронгьо ве патрандашевоз доре э у, эдембу рафде, овчи поюнд уре. Овчи диренге, ки Шими е доне патроне хэржи несохди, чуьтам патрангьоре бердиге, гье гьечу согь оворди, э зир лов суьпле хэнд сохде, мугу эзу:

— Эй лелей Шими, туь э ов гьичиш незерей?

Шими вини, чуьтам эз зир лов шинох энучи хэндусдениге. Шими хуьшдере э пушой энучи эри хуьрд несохде, сере тиж гирде, э уьткемиривоз, мугу:

— Зерем, эйчуь незерем! Негьогь ме беге э куьнди согь руз овчиети сохдем, вишегьо, дерегьоре сейл зерем!

— ГIэмел миевге пуьрсире,—мугу овчи,— чув зерей, кире зерей? Эхи гьеме патронгьо э жигей юни, пури?

— Кире зерем?! Хэрмере зерем?!— Гье гьечу э уьткемиривоз

гуфди Шими.— Гьечи зерем, кушдем уре, синейтуь муно, гь лч гъэлеж негирдеки, е доне гуниле хэржи несохдеки. Небуге ишмуре хуно мибу,— э руьхшендиревоз мугу Шими.— Пес-песоeki зереит, туьфенг шенденит э песой эн ов, оммо омбариш е доне гунилешму э у нисе расире, у согъ-саламат, вор ведешенде-ведешенде вирихдени эз пушой чум ишму.

Гуфдире и гофгьоре, Шими сере э уьткемиревоз тик гирде, омо э лой хуней хуьше. Зен Шими омбар дуьлпесо бире эри шуьвер гьечи дирмунден, ведироморе поисдебу э пушой гьопу э гузети энУ. Шими уре диренки э ён гьопуй хьэёт, гьовой энУ лап хэреб бисдо. У эри хуьше фикир сохд: эгенер зен дануьсдге, у эз гусесури хуьше хэре э бохд дори, у сер-гуш энуре миберуь, уре гье серкуш мизенуь. Унегуьре Шими гьетте зен хуьшдере дире, сер гирд э вогьнеки эри сэхд ленгуьсде, э е десевоз эз гъэбуьргъэй хуьше гирде, келе-келе огь-ноле зере.

Зен Шими диренге, шуьвер ю э чуй хьолиге, гье у сэгIэт терси, дуьлпесо бисдо, зури-зури оморе э пушой энУ, пуьрси:

— Эй мерд, вой эриме, туьре чуй бири? Туь эз хуне себэхь-мунде хуб-хос ведарафдебири, туь эдее ленгуьсде, эз гъэбуьргъэй-туь гирде, эдее огь-ноле зере?! Хэртуь эжеи?..

— Эй зен,— мугу Шими,— туь жун бебейтуь, нум энУ хэре гьейсэгIэт э киме меги! Гье у хэри э серме и коре овордигьо...

— Чуьтам эхи?— пуьрси зен, диеш мэхьтел мунде.

— Э жун сертуь, зен, у е шиллогъ эз пойме зери, поймере хуьрд сохди, кем мундебу ме немуьрдени. Гене худо рэхьм берди э ме, э Iгилгьойме, гьечи шуькесдиш биремге, гене согъ семе мундем.

Зен Шими и гофгьой шуьвер хуьшдере шиновусдки, омбар гъэгьр омо уре эз хэр ишу, у сер гирд хэре эри нифри-нэгIлети сохде:

— Гье у туь уре доре жуьгьгьо, суьмергьо, гиёвгьо уре гьним бире, эз чумгьой ю ведирово, беде гуьргьо хуро сер энуре.

Шимире гьейсэгIт гьемин гье и воисдембу.

— Эй зен,— мугу Шими эз зен хуьше,— э жун бебейтуь, ловойтуьре худо шиновусди: гуьргьо сер энуреш хурдет, леш энуреш, гьич дуьм энуреш негьишдет. Дие негьогъ гъэгьр кешире эз дес энУ, дуьл туьре хэреб месох.

### «ЕКИ ЭДЕЕ ХЬОВ-ХЬОВ СОХДЕНИМ, ЕКИГЕ ГИУЬГУВ ЗЕРЕНИМ»

Шими Дербенди не гьуншию омбар хуб бируьт дуь э екиревоз. Угьо сер ебо дуь зеки вохурде, хьол-руз дуь екире ~~мнпуьр~~ сируьт, э еки гьемише дарафде-дироморе мисохдуьт, герек бире



мэхьэл дуй эеки кумекки мисохдуьт. Угьо эри е кориш хотур екире нисе гьшденбируьт. Оммо е гьэдер вэхд гирошде бэгьдо, дусди энугьо э дуйшмени чаруьсд, гуйге беде гьэине раси э дусди эни дуй гьунши.

И дуйшмени энугьо сер гирд эзу вэхдевоз, кейки гьунши овурд э хьэет хуьшде е сеге, э жигей муьрдигьо сег хуьшде. И тозе сег эн гьунши эри гьэгь-нэгьэгь сер мигирдгьо эз сер шев эри хьов-хьов сохде, те согь себэхь лэгьгэй хуьшдере нисе гирденбу. Омбарш и сег мидиромо нимешев э хьэет эн Шими, э зир пенжерей эн хисиренбугьо утогь поисде, сер мигирд гьэре недоре, чогьол вишеире хуно, эри келе-келе зузе зере, гуйге э хуне муьрде дериге.

Шими дие эз зузей эни сег хисире нисе дануьсденбу, песде согьруз хэсде, гьолоке хуно гешденбу.

Ченд бо Шими э гьунши хуьшде шуькеет сохдебу эз дес сег энугьо, оммо гьунши э гуш нисе гирденбу. Е гиле нимешев сег эн гьунши э биней пенжерей эн Шими э зузе зереки, Шими гьилире вегирде, э зиршейни-зиршоволиревоз ведиром э хьэет эри куьшде сеге. Оммо сег виники гьилире, ю гьов кенд рафд э сер Шими, сэхд гьэенж гирд уре эз песой кун ю.

Себэхьмуьн гьунши Шими шиновусденге э товун эни кор, эжигей оморе эз Шими бэхшлемиши хосде, дуьлсухуни сохде эри энугьо, у днеш хьи-хьи зере, хэндуйсдени, сер зиеди э гьеме гуфдирени, ки тэхсир Шими сег гьэенж гирдеи э хуьшдени Шими вери. Эзи гофе шиновусде эйлеревоз, Шими эслогь гьэгьри бисдо эз гьунши хуьшде, келе дуйшмегьоре хуно.

Е мөгь гирошде бэгьдо эзи кор бире, е руз Шими э базар рафденге, мивини е жогьилс кук эдее э раче хуруз фурухде. Хуруз эз жинс ю лап чуйкелеле бу, оммо гьэдерсуьз рач, рангиберанти бу. Чум Шими домунд э и хуруз.

— Эз же омори туьре ижире энтигьэе хуруз?— пуьрси Шими эз жогиле кук.— Мс гьеле э гьуьмуьрме ижире энтигьэе хуруз недирем.

— Бисдогеш мибу,— жугьоб до сэхьиб хуруз.— И хуруз эз жинс — «хуруз японини», уре иму эй зарифат «самурай» нум но-рейм. Дузи, омбар раче хурузи, одомире хьэз оморе э у денишире, уре томоше сохде. Оммо, расдире гуюм, е келе гьэиб дери э и хуруз, эзу товуне ме уре эдее фурухденуьм.

— Чуй гьэиб?— э мэхьтелиревоз пуьрси Шими.

— И хуруз эз жендек чуйкле гьисдигеш, оммо сес ю лап келеи, гушгьой одоми бенг бире,— мугу жогьиле кук.— Эзу бэгьэй е коригеш гьисди. Хурузгьойму э шев ю дуй-се гиле гьуьгьуь зере: нимешев, эз нимешев гирошде бэгьдо, пушой себэхь, уш дураз нэгь. Оммо «самурайме» эз нимешев сер гирде те себэхь товуш бире э и буруже сес хуьшдеревоз гьэре недоре, гье гьуьгьуь зере.

Эз сес энү неки ме, гъуншигъоймуш шев хисире нисе дануьсденуьт.

Шими омбар шори сохд шиновусдики э товун энижире хоснет-дивэги эн хуруз. У е гофе дуь гоф несохде, до пул хурузе, восдо уре, зури-зури овурд э хьэёт хуьшде.

Шими гьетте эз базар э хурузевоз вогошде, эз тхэде е чуйкле ешик гъуьч сохде, бесд и ешиге э гъугъ эн дор э гъиругъ хьэёт ю вебугъо, э ён бун эн хуней гъунши. Гьетте шохьонгум бире, Шими мидоне «самурай» хуьшдере э гъэд ешик. У те себэхь хуб очмиш бире э сер бун гъунши ченд е буьруьж глэре недоре гье глуглугь мизе мипосид. Эз сес энү сес сег эн гъуншиш шиновусде нисе-оморенбу. Гъунши Шими дие эз сес «самурай» хисире нисе дануьсденбу.

Е руз Шими э келе мердгъой шегьеревоз нуьшдебу э богъче эдембируьт эри дуьлмухшулишу дуь эекиревоз меслэхьэт сохде. Э глэрей энугъо омо гоф ведиромо э товун гъунши, гъуншиети, э товун энү кор, ки куьнде гъунши эри одоми эз дуре бирор-хэгьер хуби. Гьер инжо нуьшдегьоргъо эдембу тэглирифигъой гъунши хуьшдере гуфдире. Е Шими гоф нисе сохденбу. Еки эз келе мердгъо экин Шими руй бере, мугу:

— Эй Шими, туь эйчуь нисе гуфдире, чуйтамиге гъуншитуйь, чуйтам зигъисденитге дуь эекиревоз, разинитми ишму дуь эз еки?

— Чуйтам зигъисденим? Сег не хурузе хуно! — гъэгъри-гъэгъри гуфди Шими.— Екиму эз нимешев те себэхь э биней гуш еки хьов-хьов сохденим, екиге эз нимешев те себэхь глуглугь зереним!..

## ЧУЪТАМ ШИМИ Э ЖИГЕЙ ХЭР ГЛЭРИНЕ ЗЕРЕБУГЕ

— Шими ю хуьшдению гуфдиренбу э кес, весиет доренбу:

— Пиёнискеи — келе бедини, пиёне одомиш екини — делуье одомиш. Эз пиёне одоми гьерчуьш гири медиров, у е э сер кес, енебуге э сер хуьшде е кор миёру эз э хуьшде недебиреи. Хуби, эгенер эслогъ глэрешму э эрэгъи-шорёбовоз небисдоге, эгенер хурдитгеш — те пиён бире мэхурит, гъэдере данит.

Оммо е гиле ю хуьшдени Шими лул-пиён бире, нэки хэр хуьшдере вир сохдебу, кем мундебу ю хуьшдению э лэглэй гуьргъо не офдоре, луч небире.

И кор биребу гьечи.

Е гиле э сер васал бригадир тапшуьрмиш сохд э Шими эри рафде э више, бурра поегъо эри тегьентгъо, хьэчье — эри кумегъо вокурде эри гъэреулчигъой колхози.

Шими э кул хэр хуьшде вери э ен више оморе расиренки, э у вохурд э гъиругъ више дуь нешинохэ одомигъо. Угъо суьфделе

э пушошу э сер тозе гиѡвгьо перзине дешенде, эдембируйт чи хурде. Э пушой энугьо е келе бутилка эрэгъиш вебу, нунгьо, закускагьо. Шими эз ён энугьо э гирошдеки, э эдеблуьиревоз руз эхэйрбу до угьоре, «хуш-хьэлел», «нуьш гердо» гуфди эзугьо. И дуь нешинохэ мердгьо, жугьоб Шимире вогордунде, вэхишдуьт, куьнд оморот эз Шими, сер гирдуьт эри минет сохде э у э ишуревоз э сер суфре нуьшде, етике нун хуру, суфрешуре пой зере, негирору.

Шими ченгъедер гуфди э угьо, уре эри нуьшде-хурде э угьоревоз вэхд-можол нисди, уре тэгиде кори, согъ-бошит, беле-фиолон, оммо угьо эз Шими дес некендуьт. Шими дие руй бура недануьсд, фурамо эз кул хэр хуьшде. Нешинохэ мердгьо чуьн глэвизе гъуиогъ нишунд Шимире э минжишу. Суьфдеи пейлей эрэгъире угьо теклиф сохдуьт Шимире эри хурде «эри шинох бирей», «дуймуьне» эри дусди». Шимире глэйб омо эз суьфдеи дуь пейле нэгI сохде. Песде е кем сер энугь герм бисдоки, Шими э гофгьо, минетгьой эн тозе шинохгьой хуьшде э сер верафде, хурд е ченд пейлейгеш.

Шими эз сер суфре вэхуьшденки, бегьем э сер пой поисде нисе дануьсденбу. Гьэл гирде, моч сохде бэгъдо тозе шинохгьой хуьшдере, Шими э гужевоз венуьшде э кул хэр хуьшде, дерафд э дорун више.

Гьетте Шими э више дироморе, э у хов вепичи. У гьечи эз кул хэр нефураморе, сере э сине фушенде, хиси. Тозе шинохгьой эн Шими дуьздгьо-хаспушгьо бируьт. Угьо э гьосутевоз Шимире пиён сохдебируьт. Шими э више дироморенге, угьо асда-асда ишуш дироморут э песой Шими. Диренге, ки Шими сэхд хисири, угьо асдалай, сессуьз, э хьитиётиревоз вегирдуьт Шимире эз кул хэр, нишундуьт э сер эн сутун эн е офдоре хуьшгь бире дор. Песде угьо хэр Шимире, у эз хуне овурде тевер, мушар, согъоте вегирде, бердуьт э хуьшдеревоз.

Е гъедер вэхд гирошде бэгъдо, Шими хэбер бисдо, оммо у гьелеш серхуше хуно бу. У гьерчуь дануьсденбу ю э кул хэр хуьшде вери. Оммо Шими чум вокурде диренге, ки ю э кул хэр нэгI, э сер сутун дор вери, суьпуьл Шими жэгъ зе, у гье усэгIэт ишор бисдо. Шими э келе дуьлпесоиревоз сер гирд хэр хуьшдере эри гешде. Э куьндигьо у хэр хуьшдере неофденки, Шими сер гирд эри хэре хуно глэринезере лал келе-келе. У эри хуьшде фикир сохд: эгенер хэр энугь шиновусдге сес глэриней эн де хэригере, уш гьеусэгIэт глэринезере мизенуь, э сес энугь мивидову миёв. Шими эз гьемей гьувот хуьшде гьечи келе-келе эдембу глэринезере, ки сес энугь эдембу э гьемей више лов бире.

Гьемин гье увэхди, кейки Шими гьечи эдембу хэре хуно глэринезере, э сес глэриней энугь е суруй эн гисне туьрггьо, э гъэд више гешденбируьтгьо, видов-видов оморе, ведабуррируьт иловлей

Шимире эз гьер тараф. Шими угьоре диренки, эз терс зэхьлей ю рафд.

Ки дануьсде, чуй мибисдоге песой эни кор, э сер Шими чуй миомоге, эгенер э гъисмет энэ э и туьтем оморе е овчи ниведи-ромоге. У диреннге Шимире гуьргъо ведабурри, у э келе секоней дери, сер гирд э сер гуьргъо эри туьфенг шенде. Гуьргъо терси-ре эз сес туьфенг энэ, вирихдуьт гьерки э ело. Овчи куьнд омо эз Шими, руй бире э ки энэ, пуьрсри:

— Гъери гуит: ишму бирит инжо хэре хуно гЪэринэ зеренби-ритгъо?

— Эри, ме бируьм,— гЪэйбе-гЪэйб, мугу Шими, сере гъуз гир-де, е лугъонде ох вокошире.

— Э жун худо,— мугу овчи,— ишму гъечи э жирей хэр гЪэринэ зеренбирит, неки гуьргъо, бэхшлемиш сохит, меш гьерчуй дануьс-дебируьм, хэри гъечи пес-песоки э више гЪэринэ зеренигъо...

— Эй хэлефме, терек нисди эз ме бешлемиши хосде,— э могъ-були, дуьлхуьрдиревоз мугу Шими.— Ме эз расдиш хэруьм. Эге-нер ме, ализе серме, хэр нибисдорумге, ме де одомигъойгере не-сигЪэт доре: эрэгъи-шороб мэхурит гуфдире те эгъуьл ишмуре вир сохде, ме хуьшдениме эз эрэгъи хурде сер мере вир нисохдум, песде э жигей хэр э согъ више эри гЪэринэ зере...

## БИЕВГЪО РУЗ ОДОМИ...

Е руз Шими ведирома э сиздегъ сале чуйклеи куклей хуьшдере-воз эри гешде э куче. ГЪэил неведунде гье эдембу гоф сохде, дес-гъоре вежегъунде-вежегъунде, чуйиге гуфдире, ихдилот сохде эри бебешу. Оммо кукле э гоф сохдеки э пушой хуьшде, э зир пой хуьшде нисе дениширенбу, унегуьре э рэхъ рафдеки пой энэ гье чемуьсденбу, э сенгъ домундебу. Гъечи у е гиле эрх офдоре э гъирогъ рэхъ, гъемей хуьшдере чуйлки сохд, е гилейге кем мун-дебу э зир мошин недемуьнде.

Шими э куклей хуьшдереваз э ён богъчей шегьер куьнд бирен-ки, у вини е пире, гъуьлелсе мерде. У лап евош-евош эдембу рэхъ рафде, десдечу э дес дери, пойгъоре э гъэд нисе биренуьтгъо за-нигъоревоз эз хори суьруьтме кешире-кешире, нефес ю вечире-ве-чире. Сифет эн пире мерд хоке хуно бу, гъемей ю гъуьж дироморе-бу, эз ранг рафде гъирмизи бире чумгъой энэ эз сери хуьшде эдем-бируьт дугъ-дугъ гЪэрс рихде, гуйге пире мерд сессуьз эдембу гир-исде эз товун исэгЪэтинэ пире шуькесде рузгъой хуьшде.

Шими гъетте дире и пире мерде, перте хуно бисдо поисд, э могъбули, гъаежониревоз денишире э лой энэ. Шими хуб шинох-денбу и мерде. У е вэгЪодо, Шими гъеле лап жовон гъисди, келе мэгЪлуьмлуье пегъливон бу, песде еки эз лап раче одомигъо бу, у

э гҮумуър хуьше диригьо. Сие чумгьой энү, э жуьргІэт ве шориревоз дениширенбируьтгьо э одоми, шевгь доренбируьт, у э хори пой нореки, гуйге хори зенг зеренбу э зир пой энү.

— Э бе, туь чуь мэхьтел бире мундей э и гьуьлелее мерд денишире?— э битобиревоз эз гьул бебешу жумунде, мугу куклей Шими, комиреки лап воисденбу гене э бебешуревоз эзи гофгьой хуьше соху.— Кеш бурайм рэхь имуре!

Шими е лугьонде ох кеши, песде э дуьлмогьбулиривоз мугу:

— Ме, хэлефме, эдее дениширенуьм э биёвгьо рузме, эгенер, гьелбет те гҮумуър эни келе мерд мунде расируьмге.

— НэгІ, бебе, туь дуз нисди!— хэндере хуно, мугу куклей Шими — биёвгьой эн гьер инсон э гҮуьлом — е тепе хоки э сенгь гьовреиривоз, эзу бэгьдо песде — не тепеини, не сенгь гьовре — гьичиш нисди...

Шими вараси эри хуьше, ки куклей ю и гофгьоре е эжеиге хунди, енебуге шиновусди, имогьой, хуьшдере эгьуьлменд хьисоб сохде, эдее э ю гуфдире.

Шимире хьэз неомо эзи гофгьой кук. У гьэгьри бире эз куж хуьше, е муьшд вено э у. ГІэил гье усэгІэт гьеми мэхьтел, гьемиге гьэгьри бире эз бебешу, дорд доре жигей хуьшдере совусдесовусде, э гирисде сесевоз мугу:

— Эйчуь зери туь мере? Чуь сохдем ме бете?!...

— Эйчуь?! Эз гьечи лап дур дениширеинжо, чуь мибуге эхир эн гьер инсон, хуб мибисдо эгенер туь гьейсэгІэт э рэхь рафдеки э зир пойтуь миденишириге эри пойтуь нежемуьсде, э эрх нефдоре енебуте э зир мошин недемуьнде,— хуьшдереш, кесеш э хэто недешенде,— э гҮосириевоз жутгьоб до Шими.

## **ЧУЬТАМ ШИМИРЕ ЖИНГИР ХУНДЕБИРУЬТГЕ**

Шимире эри э гьэд омбаре салгьо э дуьруьсди ве жуьргІэтлуиривоз кор сохдеи э колхоз, правлений колхоз доребу гьовое путовка э еки эз лап хубе санаториегьо э курортни шегьер Кисловодск. Инжо Шими эз ваннагьой нарзани, эз глов энү, эз темизе эвир догьи, хубе лезетлуье хурекгьо, холисе форигьэти лап хуб э франг-руй оморебу, эз гҮумуър хуьше жогьилте веди биренбу, гьовой ю хош, дуьлшор бу. Оммо у руз, кейки у э куьнди е меть ги рошде бэгьдо, миёсде эз сачатория э хуне вогошде, э сер энү е беде уин-томоше омо, э ховиш божэхьэт э пушой одоми ужире кор омоге.

Поезд эн Шими, э комики у миёсде венуьше э станция Кисловодск, хэйли эглен биребу. Шими эдембу битоби сохде, у гьэйле кешире-кешире эдембу гешде э пушой воззол, денишире, кей

поезд энү миёвге. Гье э и вэхди э ён е раче кисок э гъйрогъ эн вогзол е десде одомигъо кура биребу. Инжо эдембу билетгъой лотерейни фурухде. Шими гъич е гилеш э глұьмуър хуьшде э лотереевон е чи небердебу Унегуъре у хэйли салгъо е доне лотерейни билет невосдоребу. Эри лоторей доре пуле у шенде пул хъисоб сохденбу. Оммо гъейсэгІэт инжо фурухде оморенбируътгъо билетгъой лоторей э де билетгъойгей лотерей ухшеш нисе зеренбируът. У билет э дурази ве э назуки эн е энгуьшд одоми бу, э блombeвон бесде, сэхд пучунде бу. Кире воисдеге эри дануьсде у восдоре билет потерей бердиге небуге небердиге, гье инжо, э восдоре жиге, мидануьсд э товун эни кор. Эри эни у миёсде русмуре э пломбевон векенде, лов сохде билет лоторейре, винире чуь вериге унжо.

Шимиреш бирден воисд юш вослону ёки эзижире тозе билет лоторей. У куьнд омо эз пенжерей эн киоск, эжеки нуьшдебу е раче жовоне духдер, е монет пул доре, восдо эри хуьшде е билет. Шими э дуьл хуьшде фикир сохденбугеш, ки у эри эни билет лоторей доригъо монет шенде пули гуфдире, омо у эри е томоше векенд чуькле гиргине пломбере эз билет, лов сохд уре, дениши... Бирден Шими е мэхътеле, э пушой чум хуьшде е келе муьглұьжузе чире дирере хуно, дениши э билет лоторей, е ченд минут перт бире мунде э жигей хуьшде. У э чумгъой хуьшде бовор нисе сохденбу ижире бэхд омори гуфдире э сер энү: билет лотерейю берди е суке, ужуже чи нэгІ —мошин, песе уш чуь мошин — «Волга»!

Э пушой киоск кура бире одомигъо дануьсдуьтки, келе мерд «Волга» берди, гъемей энугъо вадабуррурут иловлей энуре, сигъмиш сохде уре эз гьерло, хъэрекет сохде эри э е чумевон семе денишире э и «мозоллұье билет» энү. Е жогъиле кук, руш-бигъ нечире, дуразе, похпохуе муйгъо вери, е пушой дендуй ю недери, буй эрэгъи доре-доре Шимире, гъэл гирд уре, бебей хуьшдере хуно. ЕгІни, шори сохдере хуно, у сергирд эри омбаракбу сохде Шимире, э десевон зере, тимор сохде эз синегъо, кемергъо, гъбуьргъэгъо, куьфгъой энү.

Е ченд минут гирошде бэгъдо эхир поездиш омо поисд э перрон. Шими лап шор, ловхэнде зури-зури омо э ки вогун хуьшде. У гъеле э санатория форигъэт сохдеки э пушоки вегирдебу билет э поезд. Э лэгІэй дер вогун поисдебу кондухдир — е гъуьндуьре, хиелуье, жонлуье мерд, чогъэ сифет, огъурдомогълуь. Шими десе доно э куьф гъобой хуьшде, бобожнике эри вегирде, э комики у доноребу билет хуьшдере э и поезд, э и вогун. Оммо бобожник чуь кориге э жигей ю недебу. Шими гешд гъеме куьфгъой хуьшдере — бобожник э е куьфиш недебу. Шими э келе пешмуни, дуьлхуьрдиревон вараси, ки киниге бобожник энурев э билетевон дуьздири эз куьф энү, э хъисобовон дуьздири гъемин у пиёне жогъиле кук, похпохуе муйгъо, уре э гъэл гирдеки... Шими

меке чумгъо, кутэхъэ рушгъо, эдембу книг хунде. Зевери жигегъо эз куф ю киниге ведешенди гуфдире.

— Гъэйгъу нисди,— бирден нерм, мигъровун бирере хуно мугу кондухдир,— пул билете миди, менишунум туъре, инжо нигъилим.

— Кориш гье унжо дери дие, хъовир начальник,— э дердимендие сесевоз гуфди Шими (у гьемере, э сер ки форменни шопке вериге — начальник гуфдиренбу) — Билетмере э бобжникевоз, э гьеме пулгъоревоз эз куфме дузидири, мере пул нисди.

Сифет кондухдир и гоф Шимира шиновусджи гене уьткем, огъурдомогълуь бисдо. У Шимира жугъоб недо. Шими э муьдииревоз поисдебу, дениширебу, кей ихдиёр мидуьге «начальник» юре эри э вогун венуьшде. Гье и вэхд е ченд пассажиргъо э чемодангъо, зонтикгъоревоз, кимигъо э гъэилгъоревоз оморот э ки вогун. Кондухдир э гъулевоз гъуьл додо Шимира, келе-келе, э биразиревоз мугу:

— Пушой рэхъэ меги, гражданин, мешет мебош!..

Гъетте песини пассажир э вогун венуьшде, Шими гене куьнд омо эз кондухдир, сер гирд эри э у минет сохде, гуфдире, ки ю куьгъне колхозчини, бебей эн е келе кифлети, сэхъиб кукгъо, духдергъо, невегъон. У гъетте э жигей ю оморе расире, пул билете мидуь уре, сер зиёди бхэшиш мидуь э хотур эни эри ю сохде ники. Кукгъо, духдергъой эню дануьсденуьт, ки у гьемин э и поездевоз, э и вогун биё биёв гуфдире. У нуьвуьсди эри энугъо. Угъо э пушой эн вогун эню медировт...

Кондухдир хуни-хуни дениши э келе мерд, песеде хъэрой сохдере хуно, мугу:

— Гражданин! Бурайт эзинжо! Ме билетсуьз пассажире нисе венишунденуьм!..

Шими эз мунде жигеш лап могъбул дуьлхуьрде хуно поисд э гъирогъ. Дуьл эню эз ело эдембу тэгъди сохде эри зу рафде расире э хуне, э ки гъэилгъо, невегъой хуьшде. Эз елойге у гъэиле хуно терсиренбу: чуьтам у, келе мерд, мимуну инжо, э шегъер кес, тэхъно, е кепиж пул э къуф ю недери. Эз фикир эни кор у е гъэдер вэхд э товун «мозоллуье билет лотереи» хуьшдеш фурмуш сохд. У эри хуьшде теслих сохд егъин, чуьтариш гирите эри рафде э и поездевоз, гьемин гье э и вогун.

Эри поезд э рэхъ офдоре е ченд дэгъдэгъэ мундебу. Гьемни гье и вэхди киниге куьнд омо эз кондухдир, чуьиге луьрси эзу. Кондухдир э у одсомиревоз э гоф сохде мухшул гьисди, Шими эз лэхъни эз песой кемер эню гирошде, зурн-зурн варафд э вогун, теретэгъди диromo э суьфдеи купе. Э зофруи жигегъо нуьшдебируьт е келе зен, сипре муйгъо э е чуькле духдлеревоз, э хъисобовоз, невелейюгевоз. Э рачебарачей энугъо нуьшдебу е пура мерд, чешмеке чумгъо кутэхъэ рушгъо, эдембу книг хунде. Зевери жигегъо

хэвлет бу. Шими э гужевоз варафд э еки э зевери полка, жилэхь хуышдере э бонилей хуышде доноре, руге э лой дивор вогун чарунде, дегешд э дуылдэгдэгъэиревоз. Е минутиш негирошд, поезд э рэхь офдо. Дуге-се станция гирошде бэгсэдо, дер купере вокурседе, э купе диromo кондухдир. Сифет Шими веде небугеш, кондухдир гьетте дире уре, шинохд, сер гирд эри жумунде уре. Шими хуышдере э хисиреки веноре, сер гирд э вогънеки эри пих зере. Кондухдир вараси гэмел энуре. У Шимире э гужевссз «хэбер» сохде, талаб сохд бурав гуфдире э юревоз. Шими э зэхълевесжэгъи ве дуьшмениревоз дениши э кондухдир, э Гэзроил денишугьоре хуно. Шими терси, ки кондухдир, э салгьо, келемерди энунеденишире, гье э суьфдеи станция, тепуьк зере, эз вогун неведешенуь, енебуге э дес милиция доре, э сер ю хэшо-чи невешенуь. Шими гье усэгГэт десе дено э гьултугъ гьобой хуышде. У гуйге эз хуышде е тик гушд бурраре хуно, ведешенд билет лотореи хуышдере, до э кондухдир, у эз ю дес кенуь гуфдире.

— Веги эритуь, начальник! — мугу Шими, лове э гужевоз э менэхъэфи хэнде веберде.— Мошин «Волга» эдее бэхш-пишкеш доренуьм туьре!..

Кондухдир вегирд билет лотореире, фегьм сохд уре, песде дениши э Шими, гене дуборе дениши э билет энун. У бовор несохд, ки и холисе, мошин «Волга» бердигьо, «мозолуье билет лотореини» гуфдире. У гьерчуь дануьсд у дургуне, гьэлплуье билети, келе мерд эдее фурмунде юре, хэр сохде. «Гэзроил» диеш хуьршлуь бире, хурузе хуно гьип-гьирмизи бисдо, е келе хьэрой вегирд э сер Шими.

— Туь кире фурмунде, хэр сохде, хьилле, дургу?!— билет лотореи Шимире э пушой сифет энун шувунде, мугу у келе-келе.

Шими эз мунде жигеш зэхълевежэгъ бисдо, зугьун ю лол, кут бисдо э лэгГэй ю домунд. Э сес хьэрой эн озгъуне кондухдир э суьфдеи купе шишируьт диromорут е ченд одоми эз де купагьойге. Угьо шиновусдуьтки эз кондухдир: келе мерд юре фурмунди, э пэхъники энун билетсуьз венуьшди э вогун, имогьой э жигей билет пассажири дори дургуне билет лотореи, комики гуйге берди мошин «Волга», гьемей энугьо чумгьоре буьхь сохде э Шими денишируьт. Эз жигей хуышде вэхьшд пассажир, чешмеке чум, кутэхъэ рушгьо. У кните э гьирогъ норе, вегирд эз дес кондухдир билет лотореи эн Шимире, эз чумгьой хуышде куьнд овурде, э тигъэтевоз фегьм сохд уре эз гьерло, песде лове э суьпле хэнде веберде, мугу:

— Ме хуышдениме юристуьм, этвекетуьм, гьемиге психологум. Э фикирмеревоз: эгенер и билет лотореи дургуне, гьэлпе билети-ге, и келе мерд эз расдиш куьгъне хаспуш, хьиллекор, мошеники, фальшивомонетчики, енебуге эз десдей энужире жиноеткор-



гьои. Ижире одомире, гьелбет, дуьсдогъ сохде, жозе доре гере-ки. Эгенер и билет энү эз расдиш «мозоллуье билетиге», мошин «Волга» бердигьо билетиге, оммо неденишире э и кор, и келе мерд гьечи э ловхэндеревоз, эри е хьэзе хуно э жигей дегьмонети билет пассажири эдее доре и «мозоллуье билет» хуьшдере...,—Эт-векет, психолог, е дэгьдэгъэ поюнд гоф хуьшдере, э сифет э купе дебируьтгьо одомигьо денишире, лове э суьпле хэнде веберде, сере жумунде, энгуьшде э ён пушони хуьшде бурмиш сохде, мугу: — эгенер гьечи гьисдиге, и одоми гофсуьз жингири. Жингир небугьо одоми...

Келе зен э купе нуьшдебугьо, дие недениши те юрист песой гоф хуьшдере гуьфдире варасде. У зури-зури эз гьул невелей хуьшде гирде, терсе-терс э лой Шими денишире, чумечару сохде-сохде, вегирд эз ю нуьшдебугьо жиге бугъчей хуьшдере, теретэгИди вадарафд эз купе.

Шимире эз терс глов-эрэгъ шиши. У килэхъ хуьшдере вегирде, вено э сер шуьгъм хуьшде, сифет хуьшдере гьуьж диrowунд, юре гуйге сэхд э буру рафдени гирди, фурамо эз сер полка. Билет хуьшдере гьечу э дес кондухдир гьишде, у ведиромо эз купе, рафд э эхир эн вогун, э ён гловхуне, пэхьни бисдо унжо. Гьетте поезд поисде э е чуькле станция, э е чул-пелесе, Шими зури-зури ведиромо эз гловхуне, гиrowшд эз гамбур э е вогуните, эзунжо тертэгИди, терсе-терс, песои дер вогуне вокурде, фурамо. Гьетте Шими эз вогун фираморе, у гьечи сер гирд эз терс эри видовусде, гуйге е сад гуьрге небуге согъ е десдей гьирхьэрембошигьо эдембируьт э песой энү видовусде. Энжэгъ поезд э рэхъ офдоре бэгъдо, Шими диренге, ки екиш э песой энү видовусдогор нисди, у е кем хомуш бисдо. У сер гирдки э Лер овурде, чуь бисдоге, чуь шиновусдге у э сер вогун эзи е ченд минут пушо э товун хуьшде, мугу:

— Эз расдиш, кини эз имунсеи чешмиш-жингир? И гьэроиле нелоигъэ кондухдир, и чорчуме этвекет, небуге и ализе бедбэхде серме?!..

## МЕСКЕН ШЭХЬИТУ

Шими е гиле э зен хуьшдеревоз меслэхьэт сохде, руз екишобот рафдуьт е базар эри е гов восдоре эри хуне. Угьо э базар оморенге, миденишуьт мивинуьт е мерд дербенди, дуре шинох эн Шими, эдее гов фурухде.

Шими е ченд бо черххурд э иловлей эн гов, фегъм сохд песопушой энуре, дениши э дендугьой ю, кеши эз суьргьой ю — гуйге зобуне гов нисди.

— Эй Шими,— мугу сэхьиб гов,— гов, худо мебуру, туь эдее

дире, дуьруьжде гови, кеми е паздегь пуд темизе гушд медиров эзу.

Шими, сере жумунде, мугу:

— Мере гов эри куьшде герек нисди, эри шир гереки, эри гІэилгьо, невегьойме.

Сэхьиб гов гьетте и гофгьой Шимири шиновусде, гирд э пенжеревоз эз дуразе руш хуьшде шовгІо сохде, мугу:

— Э жун худо, Шими, говме э руз ю е бедире шир доре, пезде лап динже саламате гови. Восдо, пешму нибоши.

Гове фурухдогор лап звере гьимет гуфдики эри мол хуьшде, Шимири невоисд уре восдоре, оммо зен Шими э гуш-гуши шуьвер хуьшде мугу:

— Эй мерд, э бэхьс мепой, эз гофгьой сэхьиб гов ведини, гов энз омбар хубе гови. У дурту нигуь, эдее э сер худо-бенде шовгІо сохде. Э бугьои-ужузи медениш, восдо.

Шими э гоф зен хуьшде гуш дошде, восдо овурд гове э хуне. Угьо зен шуьвер согь руз, сер шев э пушой гов тозе гиев, хуьше гиев дежирдуьт, кенеке тар сохде, дорут уре. Оммо себэхьмунде зен Шими эри шир энуре дуьшире диromoки э говду, гов е чен е кечиш шир недо. Гьеле серзиьди уре э дуьширеки, гов э жигей хуьшде динж нисе поисдембу, бедирере шиллогь зеренбу, э дуразе, сэхде дуьм хуьшдеревоз, гьирможе хуно эз герден, эз серсифет зен Шими зеренбу. Гьер руз себэхь, шохьонгум гьечи бу. Эхир-эхир зен Шими дие э герде невегирд гове эри дуьшире, у имогьой эзу эз молкомуте хуно терсиренбу.

Чорей Шими небисдо, е ченд руз гирошде бэгьдо берд гове э сэхьиб ю эри вогордунде, пул хуьшдере эзу восдоре. У э герде невегирд гове дуборе эри вегирде. Шими гІоси бире, сер гирд эри уре серкуш зере, нифри сохде:

— Туь э сер худо шовгІо сохдей говтуь хуби, динжи, шир омбар доре,— хьэрой сохде, мугу эзу Шими.—Оммо туь мере фурмундей. Туьре эз сохде шовгІойтуь, эзи дуразе руштуьш гІэиб нисе оmore?!...

— Эй Шими, туь гьечи лап хьэрой эйчуь сохде?!— мугу дуразе рушгьо, эз дуьл э Шими хэндуйсде.— Гу, ме туьре э же, э коми жиге фурмундем?

— Э коми жите? Э базар! Согь гІуьмуьрмеш ме и коре формуш нисохум!..

— Гьо-о-о! Кориш унжо дери дие — э базар!— гуйге шори сохдере хуно эзижире жугьоб эн Шими, гуфди у.— Базар, жонум, нэхьсе жигеи, мескен шэхьитуни. Э базар хуьшдени худош, неденишире э гьемей буьзуьрги энз, е кор сохде нисе дануьсде. Унжо хуьшдени шэхьитуь черх доре гьемере, чутам юре воисдениге. Унегуьре э базаргьо худо гьемере бэхширени э бендегьой хуьшде, э меш мибэхшуь ме туьре фурмундеире.

Чорей Шими нибу, пешму, сергъуз гове могордуну миёру э хьэёт хуьше.

Э куьнди е сал гирошде бэгъдо э сер поиз, руз екишобот Шими е руз гене мерав э базар эри хуьше е пусти зимисдуне эри восдоре. Кугъне пусти энэ э кими жигегъо муй ю рафдебу, э кими жигегъо сұла офдоребу. Шими гъечи э базар э гешдеки омо гъемин гене вохурд гъе э у мерд, эз комики у эзи е сал пушо гов восдоребу. И десу эдембуге хубе тозе пусти не е килэхъ фурухде.

Шими уре диренки э пусти фурухдеки, куьнд омо эзу, гъич э уревоз гуйге гъич е дуьлмундеиш небирере хуно, руз эхэйрбу до уре, хьол овхьол юре пуьрси, песе пуьрси пусти не килэхъ э чендиге. Шими вокурд э тен хуьше пустире, вено э сер хуьше килэхъш. Пусти лап хуб биренбу эри энэ. Килэхъ расди екем тенгбу эри сер Шими, оммо уре имид бу, уре е кем песе фирегъ сохде мибу гуфдире. Шими пул килэхъэ до уре, пул эн пустире мугу эзу биёв шохьонгум э хуне беруь.

Гъовой шохьонгум Шими тозе пустире вокурде, тозе килэхъе э сер веноре, ведиромо э куче э пушой хьэёт хуьше э сер соку, сер гирд э е лезетевоз эри гъэйле кешире. Обмар негирошд, омо раси сэхьиб пусти, пул эн пустире эри хосде. Шими гуйге мэхътел бирере хуно дениши э у, песе мугу, ки пул эн пустиреш, эн килэхъш у дори, унегуьре у дие е кепикиш гърдхунд нисди эзу.

— Эй Шими, туьре гъэйб нисе оmore э и салтуьревоз, э и келе мердитуьревоз дургу гуфдирени, мере фурмундени?— хьэрой сохде, э хуьршевоз мугу сэхьиб пусти.— Мевеги и Говуне э сертуь, ди пулмере, небуге худо туьре эз келлей сер мизенуь...

— Низенуь,— э руьхшендие хэндеревоз денишире, э бовориниреоз мугу Шими.— Гоф-игърол иму эже биребу? Э базар! Э базар, ту чуйтам э ме гуфдирибиреге: худо гъемере бэхширени э бендегъой хуьше. Э меш мибэхшуь...

## МУЬРДЕ ОДОМИ ГІЭСБЕ ХУНО ФИРРР ЗЕРЕНИГЪО

Духдер Шими э шори-никиревоз эз е мегъиге бэгъдо миёсде гІэруьс бире. Те гІэруьси е мегъ мунде, зен Шими хъэлово бисдо э у бурав э еки эз келе шегьергъо, восдону биёру эри духдер хуьше эри жигъиз е импортни мебел. Шимире ужире пултъо небу эри ижире бугьолуье мебел восдоре, э гъэрд-ферд дарафде.

— Эй зен,— мугу Шими эз зен хуьше,— ме не туьнире э гІуьмуьр иму импортни мебел небири, оммо э рэхъ рафдейм, хуне гирдейм, гІэилгъоре желе сохдейм. Духдер имуш э шуьвер хуьшдеревоз, худо гъишдге, мизигъуьт, э рэхъ миравт. Гъеме кор беге э мебел дери. Ишуре воисдге зен шуьвере ишу песе э муьзд жофосуьревоз мосодонут эришу.

Оммо зен Шими неки межбур сохд уре э гофгъо, елворгъой хуышдеревоз эри рафде восдоре ижире мебеле эри духдер ишу, гъемчун талаб сохд эз Шими у бирор юре, гъэйни хуышдере, беруь гууфдире э хуышдеревоз эри эни кор.

Шими эз бирор зен хуышде эз садан-гъэлифо терсуйгъоре хуно терсиренбу. У келе пиёниске, тембел, женжеле одоми бу. Шими гъемише хуышдере эзу гъырогъ кеширенбу.

— Туь келе мерди, ёрфурмушкини, туьре фурмунде асанти,— мугу зен эз Шими.— Бирорме пиёниске гъисдигеш, жогъилте, дилбоште одомини. У хуышдере фирмунде нигъилуь. У мере лап келе шовгъо дори те импортни мебел восдоре неёру э туьревоз эри гъэруьс е дугъ шороб-эрэгъиш э буз хуышде нивенуь.

Чорей Шими небисдо, вегирд э хуышдеревоз гъэйни хуышдере омо э шегъер Ростов. Руз шогъонгум бу угъо э вогъол эз поезд фираморобугъо вэгъодо. Унегуьре Шими эри хуышде теслих сохд: имбуруз э е жигеш нерафдени, имишев э мигъмонхоне рэхъэти вегирде, себэхъ гъетте нашдови сохде эри рафде гешде е гъэмеллуь импортни мебеле эри духдер хуышде.

Гъетте э гостиница жиге вегирде, гъэйни Шими э вогъней папрус восдореиревоз, вадарафд эз жи энэ эз нумир, дие невогъшд. Шими, келе мерд, эз рэхъ вомунде одоми, гъетте э нумир дироморе, сертен хуышдере векенде, дегешд хиси. Себэхъмунде хэбер биренге, Шими мивинуь карават гъэйнию дишохъонгум чуьтам вечире буге, гъе гъечу вечире мунди, не гъэйнию, не партал ю веди нисди.

Шими омбар дуьлпесо бисдо. У эдембу фикир, дуьлесди кешире: эз же миофуге у имогъой и ализе бирор зен хуышдере э и келе шегъер, эжеки дерзере эз гъэд тое офде асанти, вир бире одомире эри офде.

Шими сертен хуышдере зури-зури вокурде, эдембу э куче вадарафде, гъэйни хуышдере эри гешде, гъе и туьтем дер нумир асдалай куфде, диромо е милиционер. У э эдеблуьиревоз себэхъ эхъйрбу до келе мерде, песде хогъиш сохд эзу биёв гуфдире э юревоз. Дуьл Шими гъе усэгъэт шек сохд, ки милиционер ёгъин эз товун гъэйни энэ омори.

Шими эз лэгъэй хуышде е гоф неведировунде, омо э милиционереvoz э участка. Инжо эз гофгъой эн дежурни милиция у дануьсд, чуьтам бирор зен ю лул пиён бире шову чуьжире уин-томоше ведешендиге.

Гъэйни энэ ди шогъонгум э вогъней папрус восдореиревоз эз мигъмонхоне вадарафденге, омори э е духон. Унжо у хэгъер ю уре эри «куьф хэржи» доробугъо пулгъоре гъемере хурди, э шороб-эрэгъи хэржи сохди. Немешев э песини трамваевоз э мигъмонхоне э вогъшдеки, у эз некуми бирден офдори э сер гъужогъ эн е гъолинде зен э келе фирегъе синеревоз, песде гъе э офдоре жи-

ге, сер хуышдере э сер синей энү веноре, хисри эз хуыште рафдере хуно. Гьолинде зениш эз терс энү зэхълевежэгъ бире, хьэрой сохде, суьсд бири, эз хуыште рафди... Себэхъ биренге, гьэйти Шими э хуыште дироморенге, эзу пуьрсире дануьсденге, кини у, эз жо омори, ки эри энү зомин бире мидануь уре эри эзинжо ведеберде, эжигей энү штраф доре, гьэйти гуфдиребу нум домор ишуре —Шимири ве э коми мигьмонхоне у поисдиге.

Гьэйти ижире коре э сер Шими овурденки, дие Шимири е сэгIэтиш невоисд эри поисде э урезоз э шегьер эн кес, терсире у днеш зобуте уин невэхизуну э сер ю. Шими гье эз милицейски участка вогошд э мигьмонхоне, чигьой хуышдере вегирд, омо э вогзол. Э поезд Ростов-Боку билет вегирде эри хуышдеш, эри гьэйтиш, сер гирдуьт эри вогошде э хуне.

Шими лап гьэгьри бире эз гьэйти хуыште, э урезоз гоф нисе сохденбу. Гьэйти энү гуйге тэхсири хуышдере э герде вегирде, юш эз лэгIэй хуыште е гоф нисе ведировунденбу, оммо дуьл-жигер энү эдембу сухде эри е пейле эрэгъи, сер юш эз шовуне пиьни эдембу дорд доре.

Гьетсе шев бире, Шими дегешд эри хисире. Гьэйти э битобиревоз дениши е гьэдер вэгIдо те чумгьой Шими сэхд э хов ва рафде, пезде асдалай вэхиште эз жигей хуыште, э лерэире десевоз ведещенд эз куьф гьобой энү е хэйли пул, Шими эри импортни мебел восдоре вегирдебуьго, зури-зури рафд е воунрестаран.

Э сэгIэт эз нимешев гирошде Шими эз хов хэбер бисдо, мивини чор одоми гьэйтиюре эз десгьо-пойгьо гирде суьсд, мегьите хуно эдее э купе дирунде. Угьо уре э сер полжай вогун воноре, эз Шими, бэхшлемиши хосде,, вадарафдуьт.

Поезд, э комики Шими не гьэйти ю эдембириуьт оmore, оmore расиребу э станция Махачкала, эри э Дербенд оmore расире энжэгъ дуь сэгIэт зиьдте немундебу. Бирор эн зен Шими сэхд гьолок хисиребу, эз хуыште рафдере хуно, э хьэройгьо, жумундегьоревоз хэбер нисе биренбу. Шими дануьсденбу, ки у те э Дербенд оmore расидеш гье гьечи мибу, хэбер нибу. Унегуьре уре э пушоки (бологь гирдебу, чуьтам э Дербенд оmore расиренге, ю, келе мерд, уре э вогун медировунуге э хуне миберуьге. Э ижире фикиргьо э дуьл дери, Шими, те поезд э станци Махачкала поисде, диromo тергэгIди э пушой вогзол бугьо «почта-телеграф» до ижире зурие телеграмме э сер зен хуыште: «Эй зен, э жигей импортни мебел эдее овурденуьм мегьит бирортуьре. Вегирит э хуышдеревоз носилкагьоре ведиройт э пушой вогун...»

Зен Шими гьете телеграммаре вегирде, сер гирд эри сер-сине куфде. У гьеусэгIэт э бирор-хэгьер хуыште мэгIлуьм сохд бирор ю муьрди гуфдире. Зен Шими сие парталгьо вокурде, э одомигьой

хуышдеревоз эз болнисей шегьер е носилкагъо вегирде, э гирьешивеневоз оморут э пушорэхьи поезд.

Гьетте «мегьите» э сер несилкагъо эз вогун э буру ведировунде, у сер гирд келе-келе гӕсбе хуно эри пих-хуыр зере, гьирмизи бире гьутнигьой хуышдере пуф додоре-додоре.

— Ой мерд, э сертуь сенгъ расо! — желе-келе мугу зен Шими, комики э и туьтем нисе дануьсденбу шори сохуге небуге гьэгьр хуышдере э сер Шими тигьи сохуге.— Туь эйчуь нуьвуьсдей нэхогь бирорме муьрди гуфдире, туь мегьит энуре эдее овурде? Муьрде одомиш беге гьечи келе-келе гӕсбе хуно пих фирр зерени?»

Шими гьош-гьоболълуь дениши э зен хуышде, песде э гьэгьр-воз мугу:

— У гӕсбе хуно эдее фирр зере гуфдире, уре беге зинде, э эхуышде дерие одоми мугую? У муьрдеи э гӕрей зиндегъо, энжэгъ гьовре сохде неоморен...

## ХУН ЭН ЗЕН ШИМИ

Е гиле Шими э авария домунде, сэхд хэхэ, яралуь, бире, эз у омбар хун рафдебу. Хьол энугурунд бу, э болнисе дебу, у гьолоке хуно бу, бегьем э хуышде недебу. Зен Шими дануьсденге, ки шуьвер юре эри хилос сохде, э у хун декуьрде гереки дир несохде, у эз духдир минет сохд вегируь гуфдире эз ю эри шуьвер ю герек гьисдигьо гьэдер хун.

Шмире эз хоснетгьо дивэггьой зен хуышде хьэз нисе оморенбу. Зен энугьемише э уривоз э хуьжет, э бэхьс бу. Шими гьейсэгӕт нгьэде э хуышде недебугеш, шиновусде гоф эн зен хуышдере э духдиревоз, омбар дуьлпесо бисдо. У э гужевоз сере тик гирде, мугу эз духдир, хьэрой дешенде:

— Омон, воро-воро! Худо мегуё! Ме э муьрдеиме разинуьм, э хунме, э раггьойме хун эн зенме жегьисдеижон!..

## ЧУЪТАМ ПИРЕ МЕРД ШИМИРЕ ЭРИ «ХУЛИГАНИ СОХДЕИ» Э МИЛИЦИЯ БЕРДЕБУГЕ

Вэхд эн ваучергьо дорен граждангьой шегьере эдембу варасде, оммо келе мерд Шими чуь кориге тэгӕди нисе сохденбу эри рафде вегирде приватизационни чек хуышдере. Шими эри кес нисе гуфдирембугеш фикиргьой хуышдере э товун эни ваучер хьуькуьмет ведешендигьо, гьимет комики гьисди энжэгъ дегь гьзор ужуге монетгьо, оммо у э дуьл хуышде бовор нисе сохденбу и ваучер, э товун комики ингьэде эдее гуфдире оморе, е жем семе хуб мисоху гуфдире зиндегуни, хушхьол юре, енебуге мисоху юре сэхьиб эн мошин, пайщик эн е доходлуье акционерни корхоне.

Е эз наварасиреи хуьшде, енебуге эз фикир хуьшде Шими гьерчуь дануьсденбу ваучере ведешенди гІэлибобое Гайдер не де келетегьой хуькуьмет э хьиллеиревоэ эри и десиш фурмунде хэлгээ, бэгІэвечере эдее буьлбуьл гуфдиренуьт.

Эхириш зен, гІэилгьой Шими э гуж-менэхьфиревоэ фирсорут уре эри ваучер хуьшдере вегирде. У оморенте э ваучер доренигьо жиге, мивини э е тенге, неме, нимелиториже корридор одомигьо поисдет э келе очередь, эз хишки зимисдуи гьуьж дироморе дуь э бине буз еки. Сифет эн гьемей энугьо могоьбул, вомунде, пешмуне хуне бу. Шими дирте оморебу эз омбардеки э инжо кура биребируьтгьо одомигьо. Унегуьре у межбур бисдо эри поисде э очередь е сер те шохьонгум. Э гьэд эни вэхд Шими се гиле ведарафдебу э буру, э е кес нисдигьо далдае жиге э пэхьники эри пишгІов сохде.

Очередь Шими эхириш оморе расиренге, корсохгьо, чек доренбируьтгьо мугу эзу: у э списожгьо невери, бурав э горисполком нуьвуьсуь юре э зиёдие список.

Е ченд руз гирошде бэгьдо Шими гене омо эри ваучер хуьшдере вегирде. И десиш у э куьнди согь руз поисд. Очередь энугьо расиренге эзу мугу, зиёдие списке э е учаскайге фирсори. Э шими гуфдируьт эжеиге у учаске.

Себэхьимун Шими лап зу, бегьем себэхь небире, вэхисд рафд э у ди гуфдиребугьо жиге, гирд очередь. Е-дуь сэгІэтиш негирошд, Шими диromo э е вовуше уютгь, дуь келе пенжерегьо дери. Инжо нуьшдебируьт дуь раче жогьиле зенгьо ве дуь мерд. Э пушой энугьо э сер столгьо хэйли когьозгьо вебируьт. Пушой энугьо михьэжер тэхдеи иешире бу. Э ён дер гьул хуьшдере веноре э сер михьэжер поисдебу е гьуьндуьре жогьиле жонлуье милиционер, тапинже э кишд вери.

Шимире и дес лап имид бу у ёгьин ваучер хуьшдере мегируь. Унегуьре эри энугьо лап келе мэхьтели, гІэжоиби омо, зиёдие списке фегьм сохденбугьо зен эзу гуфдики, у э список нуьвуьсде омор мерд нэгІ, зен. Эз Шими гуфдируьт: буравгу биеругу справка, ки у зен нисди, мерди, увэхди доре миёв уре ваучер.

Гьовой Шими лап хэреб бисдо. У гене хуьшдере дуьл доре, мугу эзугьо:

— Эй гІэзизитгьойде, эйчуьи ишмуре ижире справка?— У бирмунд э десевоз э килэхь ве сипре руш хуьшде, мугу:— Бегем ишму нисе диренит ме — мердуьм, зен нисдуьм? Эгенер ишмуре воисдениге бурам э хуне зенмере, гьэримере биёрум э кишму. Эзу хубте ки дануьсде, ки шогьоди доре мидануь ме эз расдиш мердуьм. Хьофд гІэил бири эз ме зенмере.— Песде Шими лап эзи гьувотсуьзе вомунде одомигьоре хуно, шуькеетлуье жире мугу:— Се рузи эдее видовусденуьм э песой эни ализе... чуьтамиге у... ваучер, лап хэсде бирем.

Диренге, ки угьо э гофгьой энугуш нисе веноренуьт, Шимире лап гьэргьр омо. Генеш у эри хуьшде но, ки хуби э хоширевоз хьэ-рекет соху эри субит сохде э угьо, э и аннамазгьо, ки у зен нисди.

— Гпеэзизигьойме,— э эдеблуьиревоз мугу Шими,— эгенер ишму э и уьткеме килэхьме, э и обурлуье рушгьойме бовор нисе сохденитге ме мердуьм гуфдире, э список деригьо гьээлетире эри дуз сохде, ме гьейсэгIэт мибурмунум э ишму е чигере, комиреки диренге гье усэгIэт миданит, ки офирогор, нум ю э ники гирде биёво, мере зен нэгI, мерд офири. Ме эри эни кор гьер руз, чуьтам э мерд лоигь гьисдите, э нумаз себэхьмундеимеш гуфдиренуьм: «Шуькуьр э нум туь Худо, сэхьиб эн гIуьлом эри туь мере зен нефиреи».

И гофгьоре гуфдирешки Шими лов сохд белгьой пусти хуьшдере, э вогьнеки десе вено э ехэн шовол хуьшде. Зенгьо гьерчуь дануьсдуьт Шими эз расдиш эдее ехэн шовол хуьшдере лов сохде, угьо гье усэгIэт э десгьоревоз сифет ишуре пэхьни сохде, вэхишдуьт бирден эз жигешу, зури-зури видовусдуьт э лой пенжере, кемер ишуре чарунде э лой мердгьо, сер гидьут эри хьэрой сохде:

— И чуь беде муьгIуьжуьзи! И чуь бидэгIэтини! Милиционер, эйчуь поисдей гьогьо хуно?!..

Милиционер те имогьой э олхогьиниревоз поисдебу э жигей хуьшде. У э лов хэндеревоз, дуьлсухуниревоз эдембу денишире э и «томошее» келе мерд. Оммо у хьэрой эн зенгьоре шиновусди, гье үсэгIэт шенд хуьшдере э лой Шими, э е десевоз расди дес энугуш эхэн шевол ю вегирде, э чепи десевоз эз душ энугуш гирде, зури-зури кеши ведаберд Шимире, эзунжо берд уре дуз э милиция эри «хулигани сохдеи» энугуш э идорей хуькуьмети э пушой одомигьо...

Оммо омбар некеша милицейски мошин э е милиционеревоз согь-саламет овурд расунд Шимире э хуней ю. Зен Шими диренге, ки шуьвер юре э милицейски мошиневоз овурди, у лап дуьллесо бире, мугу эзу:

— Эй мерд, туь эхи эри ваучертуьре вегирде рафдебири, э милиция чуь дебу туьре?

Шими э тэхьлиревоз дес шенд, мугу:

— Эй зен, туь жун бебейтуь, нум эн ваучереш дие э кимс мегирит. Эз товун энугуш э серме омори ижире кор, чуьтам э метеле гуфдирениге: «Рафдуьм эри руш восдоре, оммо бигьгьоймереш вир сохдум...» Э жегьендем у ваучириш, уре ведешендигьо одомиш!..



## ЧУЪТАМ ШИМИРЕ ВОИСДЕНБУГЕ ЮРЕ Э ЖИНГИРЕ ХУНЕ ДЕШЕНУЪ

Э сер Шими е гиле е беде кор оморебу — е руз у гьеебо жингир биребу. Эзү эри гъирогъдеки одомингъо терс, хэто небу гуфдире, уре эз десгъо-пойгъой энү гирде, э мошин «скорая помощь» бердуът дешендуът э делуьхоне эри хос сохде. И беде кор оморебу э сер энү эзи дуь сал пушо, е ченд руз мунде те одиночове «августовски путч» бире э Масков, кейки вилест, э комики ему зигъисденим, гъеле гуфдире оморембу Союз Совети.

У руз гьеминон лап герм бу, гуйге эз гъово эдембу гІэтош рихде. Шуш-жигер, руруй-шуйгъэмбей Шими эз себэхъэвоз гуйге эдембу сохде. Шими ди сер шез те лап сурои хуьшде хурдебу гъингъэр э туьнде сир-суьркеревоз, имогъой гуйге э шуйгъэм энү гІэтош дебу. Шими эри хуьшде теслих сохд: и «гІэтоше» э гІов енебуге чоэвоз нэгІ, э серине гІов гъэрпузевоз эри куьшде. Э и фикиревоз Шими варафд э базар, восдо овурд е келе гъэрпузе.

Шими эз базар вогошденге, зен энү э хуне недебу. Шими ю хуьшдению дешенд перзинере э минжи энү, но ленгерире, вегирд келе кордей кухнире, бурри и келе гъэрпузе э дуь жиге. Шими гъечи эдембу тэгІди сохде тешней хуьшдере эри хуьрд сохде, гъич э фикир энү неомо, ки пуьлжей эн гъэрпуз лап гъолинди ве сэхди подуш эн чекмей солдате хуно, тумгъой энү лап чуьклелеуът э келеи гъэрпуз гуьре. Эз руй и тумгъо э негирее шудгъо ухшеш зеренуът. Ризгъой эн тумгъой гъэрпузиш шефде-шефди. Омбардеки эн тумгъой энү зерд бируът, неденишире э у кор, ки гъэд гъэрпуз гъип-гъирмизи бу гІэтоше хуно, гъейсэгІэт «сүхденбугъо» э шуйгъэм эн Шими.

Шими согъ немей эн гъэрпузе хурдкиш, гене тешней энү сирой небисдо. У э темэхъэвоз дениши э мундигъойгей эн немей гъэдэпуз. Суьфде уре воисденбу э и мундигъо ниме те зен ю оморе дес незенуь. Оммо Шими э хуьшде неворомо. У немейгей эн гъэрпузеш э пушой хуьшде кешире, сер гирд эри хурде.

Гъетте Шими согъ гърпузе ю тэхьно хурде варасде, уре лап сэхд э буру рафдени гирд. Оммо гъетте у э пой вэхихше, хори хуне гуйге тик варафд, диворгъо эз жигешу жуьмуьсде, сер гирдуът эри черх хурде э иловлей энү, э хуне дебируьтгъо чигъоре сечмиши сохде нисе биренбу. Шуйгъэм Шими сер гирд эри гъечи сэхд дорд доре, гуйге руруй-шуйгъэмбей энуре кинге эдее э гъэрмагъгъо, билуьнгъоревоз гъэриш сохде. Сер энү гиже хуно бу.

Шими гъечи лойлум хурде-хурде э гужевоз э ён дер хуно оморе расиренки, э пушой чум энү вохурд е келе гъуьндуьре буше гъээей лугъи. Зен Шими, эри дермуй шуйгъэм хуьшде, э и гъэзе битмиши алоэ гирденбу. ГъейсэгІэ у буш бу. Зен энү хок эн гъээере эри тозе сохде, куьгъне хос энуре шенде, гъээере темиз

шушде гьелелуьге норебу э гъирогъ дер. Шими гьейсэгІэт, комики э хуьшде недерире хуно бу, гьерчуь дануьсд и гъээей эн шевинеи. У шовол хуьшдере фушенде, нуьшд э сер эн гъэзе.

Гьемин гье у туйтем, кейки Шими э гуж зереки, э буру рафдеки, у э зарбевоз ведешенденбугьо воргьо, гуйге гьейсэгІэт ловтум мисоху диворгьой гъээере, омо диромо э хуне зен Шими. У диренге шуьвер хуьшдере гьечи, шоволе фушенде, э сер гъээей ю нуьшдере гьогъ-перт бисдо, е гъэдер вэхд е гофиш эз лэгІэй ю неведиромо.

Шими зен хуьшдере нешинохд. У эз жигей хуьшде невэхншде, гІэйб кешире, вокоши екем зеверо шовол хушдере, бирэхьне занигьой хуьшдере эри сэхд сохде, э мэхьтели ве биразириевоз дениши э лой эню. Оммо дироморигьо зен неки нисе рафденбу, поисдебу э пушой эню, чумгьоре келе сохде, дениширебу э у э муь-гІуьжуьзе хуно.

— Эй зен, туйре инжиге чуь дери, эйчуь поисдей сироте хуно э пушой чумгьойме?— э гуж зереки гуфди Шими. Оммо денишире диренки, зен нисе вадарафде, Шими э гъэгьревоз муту:— Ибуд небоши эз пушой чумгьойме, гІэйбсуьз-утанмаз!..

Шими диренге, ки «гІэйбсуьз-утанмазе» зен неки эз пушой чум эню «ибуд» нисе бире, эдее э нифри, хьэроевоз хьэрекет сохде уре эз сер гъэзе эри кешире вегирде, хьуьршгьой эню диеш вероморут. Иллогьки эдембу гъэгьр доре, эз хуьшде ведешенде Шимири, вини эню. Вини эн нешинохэ зен гогъ ухе хуно дураз биренбу э сер эню, гогъ эз некуми фит зерере хуно кутэхь биренбу чен е дугме.

Шими бирден вэхншд э пой, гье гьечу шовол хуьшдере невокошире, э пулатие дендугьой хуьшдеревоз сэхд гІэнж гирд вини эн зене. Эз зен Шими гьеусэгІэт е келе божэхь ведиромо, э гьемей хьэёт-гьунши лов бисдо...

Шимири зури-зури овурдуьт э болнисе. Инжо у домунд э куьнди дуь мегь. Э гъэд эни дуь мегь чуь бириге, чуь дириге, чуь шиновусдиге у нисе дануьсденбу, э ёр ю немундебу, э хуьшде недери бу.

Бэгъдевой дуь мегьиге Шими э хуьшде дироморенки, эгъуьл ю э ки ю вогощденки, духдиргьо э хьитиётиревоз гуфди э у чуь биребуге уре. Шими эз гофгьой энугьо вараси, ки сеbeb эни э гъэд эни дуь мегь сер эню гъэриш бирей бу гьемин у ализе гъэрпуз, комиреки у хурдебу э у лап герме руз. Э гІов эню гъэрпуз лап омбар дебири химикатгьо — нитратгьо, пестицидгьо. Химикатгьо неки зэхьэр зери э беден эню, угьо гьемчун кори сохдет э пире мувэхь эню. У эз духдиргьо дануьсд гьемчун э товун е коригеш. Омбаре бусдончигьо гьейсэгІэт эри хэйр куьф ишу ижире химикатгьо э хори омбар декуьрденуьт, кошде чигьошу келе, дуь-руьжд ве гурунд бу гуфдире.

Шимири воисд э хотур хос бирей хуьшде эри кифлет хуьшде е

суьгIуьдо сохду. Те ебо у э хуне рафде, омо э базар эри гушд гусбенди, дуне, кишмиш, руьгэ восдоре эри гIош, шороб, закуска, эри невегой хуьшде — шининьго. Э куьф энү сад монет пул домундебу. Э и сад монет пулевоз гьемей эни чигьоре восдоре мибу, сер зIеди мундеш минунд.

Шими гьейсэгIэт базаре диренки суьфде шор бисдо. Э базар туьре чуь воисдге бу. Оммо энжэгь е кор мэхтели омо эри энү: чуь фурухде оморенбуге пушоте э магазиньгой хуькуьмети, доше оморенбируьтге э складго ве базаго — гьемей энү чигьго гьейсэгIэт эдембируьт фурухде оmore инжо. Фурухденбируьт угьоре одомигьго, комигьгоки кор нисе сохденбируьт э идорегьгой алвари.

Эз Шими е ченд пой дурте э сер эн е саре стол жерге-жерге тов-товне бутылкагьгой эрэгьги, шороб, коньякгьго вебируьт, гьемчун жуьр-бежуьре пачкагьгой папрус. Шими папрусгьгоре виники, уре лап сэхд гьэйле кешире воисд. У куьнд омо эз жогьиле, жонлуье кук и чигьоре фурухденбугьго, гуфди е пачка папрус «космос» дуь гуфдире юре. Жогьиле кук, сэгьуьз жавуьсде-жавуьсде, гуфдики эз Шими пенж монет пул дуь гуфдире эри е пачка, келе мерд лап мэхтел бисдо. У гьерчуь дануьсд жогьиле кук уре эдее фурмунде, хэр дануьсде.

— Туь э ме гьенек оmore, э ме хэндуьсде?— э гIосириревоз мугу Шими.— Ме гьеле эзи дуь мегь пушо гье ижире папрусгьгоре пачкай юре э ниммонет восдоренбируьт, туь эдее гуфдире: пенж монет ди». Туьре номус гьисди?!..

— Туь и дуь мегь, пире хэр, эже бири: э менг вебири небуге э жингирехуне дебири?!— хьэрой вегирд э сер энү жогьиле кук, Песде муьшдгьгой хуьшдере жарунде, э гьелебулеиревоз мугу:— оворе бош эзинжо те рушгьгойтуь э чунейтуь вери!..

Шими эз терс лэгIэй хуьшдере гирд, рафд эз ки энү. Оммо гьимет эн чуьре у нипуьрсиге, гьеме пенж, дегьвойне звер бу эзи дуь мегь пушо бируьтгьго, те у э болнисе дерафде. Инжо э базар у эдембу дирe сергьгой пIезе чен е муьшд, келеме—э е гьужогь нидору, картушка — чен сер эн е соворе гIэйл, чугьундур — чен е кидуь. Имогьгой Шими варасиренбу, ки гьемей энугьго гьечи эз гьэдер дуьруьжд, келе эз химикатгьгоют, комигьгоки неки хорире, гIове, эвире, гьемчун одомигьгореш зэхэрлуь сохденуьт. Пушоте, те духдиргьго э болнисе гуфдире, э товун эни кор у нисе дануьсденбу. Оммо екиш э и кор фикир дорегор небу.

Э куьнди базар магазин хуькуьмети бу. Шими дарафд э магазин эри фегьм сохде чуь вериге унжо эз юре гереж гьисдигьго чигьго. Оммо рафгьгой эн магазин гьеме тигьги бируьт. Ведини, гьеме э магазин вебируьтгьго чигьго э базар кучмиш биребируьт.

Шимире воисд вадарав, оммо поисд, диренки э телевизор, э сер зофруи, эслогь тигьги гьисдигьго раф, чуьтам гирошдениге довгIо э Карабах э гIэрей эрменигьго ва азербайджанигьго, екикуь-

шигъо, э де жигегъойге, хун, мегъитгъой одомигъо, эз тупгъо, бомбагъо пожаргъо вачарунде, сухде оmore хунегъо, гирисдей гІэилгъоре, вой эн зенгъоре...

Песде э хьисобевоз корсохгъой эн телевидение эри екем семе «веровунде дуьл» эн телевизоре гьейсэгІэт фегъм сохденуьтгъо граждангъой вилесте сер гирдуьт эри бирмунде, чуйтам бирэхъне мердгъо ве зенгъо э е хьомум эеки тен шушденуьтге, э гъирогъ дерьегъ э сер герме нерме гъумгъо дегешдетге э зир офдои чуйшме.

Песде э телеэкран бирмунде омо е жогъиле зен. У нуьшдебу тимтембирэхъне, эз деде оморере хуно э хуней хуьшде, э сер диван. Э ён хуьшде нишундебу куклей хуьшдере — гІэиллей школаире. Зен эдембу ихдилот сохде эри е мерд хэйри гуфдире эри жунсогъи ве гъулои одомигъо эгенер угъо, вой мерд енеуге зен, келе ве чуйкле тенбирэхъне гешдуьтге э хуне, э куче, э базар, бисдорутге э кор, эгенер, гьелбет, гъово хиник нисдите...

Песини вэхдгъо Шими дирербу ченд жире хьэьсуьзигъоре э телевидение. Оммо имбурузинере хуно гьечи у гьеле егилеш недиребу. Эри Шими гьейсэгІэт гьечу омо: белки у имбуруз диренигъо, шиновусденигъо коргъо эз расдиш нисди, угъо гьечи э пушой чум энэ эдее оmore? Белки гьелеш э муьэхъ энэ нитрадгъо—химикатгъо эдее кори сохденуьт, увэхдинере хуне, кейки гъэзей эн гуьлире у гьерчуй дануьсдебу, гъэзей шевиней, зен хуьшдере — гъэлифои гуфдире?..!

Шими вогошд гене э базар эри э ю гьисдигъо сад монетевоз эри невегъой хуьшде е кем ширине чигъо семе восдоре. Оммо десе доноренге э куьф хуьшде, у сад монете э жигей ю неофд. Книге уре хэбер нисдики ведешебу пуле эз куьф энэ.

Шими сер гъуз, дуьлхуьрд сер гирд эри рафде э хуне, думит сохде э рэхъ э дуьл хуьшде: чуй бири эхи э гъэд эни дуь мегъ у э жингире хуне дерики хэлгъэ, вилесте? Чуй имбуруз у дириге, шиновусдиге эз болнисе ведироморе эйло, беде муьгуьжуьзгъоре хуно э пушой чум энэ оморенбу поисде. У э гушогъой хуьшде гьейсэгІэтиш гуйге эдембу шиновусде руьхшенди, охмурие гофгъой эн спекулянт базарире: «Туь и дуь мегъ, пире хэр, эже бири: э менг вебири, небуге э жингире хуне дебири?!..»

Шими эдембу хьэрекет сохде эри дануьсде, варасире: чуй бири, чуй гирошди э гъэд эни дуь мегъ. У лап хуб дануьсденбу, ки эзи дуь мегъ пушош, те у э болнисе дарафде, зиндегуней эн могълугъ унгъэде хуб небу, саламат небу. Оммо гьейсэгІэинере хуно гьечи лап зобу, лап бугъо, лап четин ве гъэтмэгъэриши небу. Э гъэд эни дуь мегъ гуйге одомигъоре шэхьитуь эз рэхъ ведешенди, чешмиш сохди. Базареш дие «Колхоз базар» гуфдире нибу. Эри энэ гьейсэгІэт лап гуьнжо мибисдо нум — «Шайтан базар».

Гъемин гье и вэхди, кейки Шими э ижире фикиргъоревоз э дуьл дери оmore э эхир базар расиренки, гье и туьтем э пушой

чум энү омо вохурд гье ү одоми, эз комики и дуь мегь пушо у вос-доребу гьэрпузе, комиреки хурде бэгъдо, эз сер гьэриш бире, э делуьхоне офдоребу. У мерд гье гьечу, чуйтам эзи дуь мегь пушо, поисдебу э ён эн келе гьембиз эн келе гьэрпузгьо, шефде кордей г'эзроили э дес дери, эдембу тэг'риф доре мол хуьшдере, муьшдери-гьоре огол зере.

...Шими гье ү руз пушой шахьонгум омо э болнисе, эз жеки уре имбуроз э хуне рэхьо доребу, сер гирд парте-парт эри куфде дер болнисере. Э сес дер куфдеи, ведиромо духдир, комиреки Шими гьеусэг'эт шинохд.

— Ишму, кидан, е чи фурмуш сохдейт, унегуьре вогошдейт? — пуьрси эзу духдир.

— Эй хэлеф ме, хосденуьм эз туь, деше мере гене э болнисешму!— ёлвор сохдере хуно, гуфди Шими.

— Ишму имогьой, худоре шуькуьр, эслогь хуб, соф бирейт,— э нерми-емишогьиревоз мугу эзу духдир.— Песде инжо санаторий нисди, г'эдотие болнисеш нисди, жингире хунеи. Инжо иму жингире, гьэрише одомигьоре хос сохденим. Эри согъэ одоми э г'эрей энугьо зигьисде терсиш терси.

Оммо Шими сесе э жуьрг'этиревоз жимунд, десе э лой диворчапар эн хьэёт болнисе бирмунде, иловлей энуре гирдебугьо, э гьаежиние сесевоз мугу:

— Нэг'I, жон духдир, холисе жингиргьо унией, эз боруй болнисешму овлои. Э г'эрей энугьо эри зигьисде, бовор сох э ме, э келе мерд, зиедте терси эз э г'эрей нечогъгьошму зигьисдеи!..

ИХДИЛОТГЪО

## «ОЙ ШОМОШ»

Боби десдечу э дес дери эдембу эз гІэруьси вогошде. Оммо гьовой энү эслогъ эн э гІэруьси бире одомире хуно небу. Гьош-гьобогъ энү дуллу бу, у дуьлхурд, пешмуре хуно бу. Э ёр энү гьейсэгІэт эдембу оморе у ю э гІэруьси дире коргьо, шиновусде гофгьо, унжо э сер ю оморе гьозие-гъэдер.

— Уф, Гевгьер, чвь гуюм ме туьре,— гІоси бире эз зен хуьшде, келе-келе гуфди Боби,— килэхьмере э хори зери, биёбур сохди мере э пушой хэлгъ, эн дусд-дуьшме, эн гьемей шегьер!..

Э пушой чум Боби гье усэгІэт омо чигьрет зен ю, эн Гевгьер. «У гьейсэгІэт олхогьин-форигъэт хисири эри хуьшде, гьич гІуьломиш э хэпер ю нисди...» Боби и думите э сохдеки, у диеш гІоси бире, досдечуре сэхд зере э хори, эз синей энү е келе, дуразе охноле ведиромо эн яралуье одомире хуно.

Гьово пушой себэхъ гьеминон бу Боби эз гІэруьси вогошден-бугьо вэгІдо. Э кучегьо-мэхъэлегьо е доне одоми веде небу. Хэлгъ гьеле э ширине хов дебугьо вэгІдо бу. Оммо серине шогьвор себэхьмунден вокурдебу. Э гІэрей эн хэсде лугьегьой эн доргьо, э дуь тараф куче вебуьруьтгьо, эдембируьт сесгьой эн эз хов хэбер бире бэгІвечегьо-муьргъгьо оморе. Асдарагьош еки-еки эдем бируьт дерафде, торик бире э гьово.

Э ёр эн эз фикир не гъэгьр серсоне хуно бугьо Боби омо гьозие-гъэдер эн гиросдигьо руз.

Ди шохьонгум Боби эз кор оморенге, дес-руй хуьшдере шушде, суьфделе нуьшдебу чой-чи эри хурде.

— Дануьсдени чьуниге, Боби?— гуфди эз Боби зен ю, е пура зен, э хэсде муйгьой сер ю сипии офдоре,— имуре имбуруз э гІэруьси огол зери.

Боби пейлей чое но э сер стол, дениши э зен хуьшде.

— Энкини гІэруьси?

— Эри кук Рэхьмон, гьеумогьойгьо э жогьили э туьревоз рангчиети сохденбугьо.

— Деш хуб,— шор бирере хуно,— гуфди Боби, пейлей чое

дуьборе эз сер стол вегуьрде.— Огол зере бэгъдо,— рафде гереки.  
Гевгьер жугъоб недо. У сере дуллу гуьрд, поисд эзи могъбул бире одомире хуно. Боби мэхътел мундере хуно дениши э сифет зен хуьше.

— Эз дуьли туь нисди беге имбуруз эри кук куьгъне шинохме гIэруьси бирей?

Гевгьер гье усэгIэт сере тик гуьрде, огьир-домогълуь бисдо. Эз гIэйб не гъэгър у гьирмизи бисдо.

— И чуй гофи туь гуфирени? — мугу у эз шуьвер хуьше.— Ме беге нехогъ эн Рэхъмон нен кук юнуьм, енебуге нэхогъме бэхили-хылети е пара одомигъоре хуно, туь и гофе эз ме гуфдирени? Ме екем хижолети эдее кеширенуьм, чуьнки дес иму гьей-сэгIэт тенги.

Боби хуни-хуни дениши э Гевгьер, эз гъэгър пейлей чое дур но эз хуьше, е ох кешире гуфди:

— Ишму, зенгъо, тэгъиет гъемише эз шуьвергъо биразинит. Э куьф ишмуш, э кешешмуш пул овурде декуьрдгеш велг вишере хуно, гене мугуит: «кеми», ишмуре пул вес нисе сохде!..

«Эйчуь гуфдире и мерд и бедхъисобие гофе?— туьндлемеиш бире, э дуьл хуьше мугу Гевгър.— И бисд сали у хуне гуьрди, ебош недири Боби волговуше хуно биёру э кешей энупул пур соху не у эз шуьвер ужире пулгъош нисе хосде. Гьер мерд э хъэлов хуьше гуьре пой мижешуь. Шуьвер энупул рангчи зиёдте нисдигеш, эри Гевгьер у эз министргъош зиёди, бибей гIэйлгъоюни, гъоймеи хуней юни. Боби пул кем овурденигеш, у, Гевгьер, серберэхьи хунере сохдени, коре э рэхъ бердени. У нисе дануьсде беге, зен селигъэлуь небисдоге, пул гуьрдегор небисдоге, дегъ одоми гъэзенж сохдегор бугу, еки пуч сохдегор, гене э пушой чум чи веде нибу. Э у кем-омбар шуьвер овурденигъо пулевоз, Гевгьер хунереш эдее э рэхъ берде, партал гIэйлгъореш сохде, эри хурдеш михътожи нисе гъишеде кифлете. У чуй соху хуней кифлете гьер руз эри хэржи пул гереки гуфдире?

Эгенер одомигъо э хурде пул хэржи несохдге, сер ишу суьрхи мибисдо, пойгъошу зар-зари. Эричуь гуфдире у э Гевгьер ижире гофгъоре? Бигил и гъононмезе шуьвер энупул, Боби, дануь, э у Боби овурденигъо пулгъоревоз хунере э рэхъ берде зарифат нисди. У э гIэруьси рафде имишев, гене е сад-дивисд монет биё векенуь эз лэгIэй гIэйлгъо, эн кифлет, беруь, эри шомош доре, сэхъиб гIэруьсире эри доре. Одоми э гьер огол зере гIэруьси вэхуьше нирав Боби шуьвер энуре хуно, эн куьнде гъовум-мирос, бирор-хэгьер, дусд-гъунши небире бэгъэй, уш э ижире кем-хэржие вэхд кифлет энугъо. Э шегьер угъоре эз бирор-хэгьер, куьнде гъунши-мэхъэле бэгъэй омбаре шинохгъои. Мегъ, енебуге орине нисди э хуней эн еки энугъо гIэруьси небу. Бугу гIэруьси — шори. Чум ю кур гердо, ки нисе хосдеге шори-ники эн кесе. Оммо, у, Гевгьер



визор омори: сер ебо гІэруьси бире, угьоре э гІэруьни огол зере, Боби е э хушевоз, е э гужевоз эз у е сад-дивисд монет векедени. Песе е дуй орине эз гъэгр эни кор дуьл эн Гевгьер дорд дорени.

Боби сере гъуз гуьрде эз зир чумгьо гъош-гъобогълуь эдембу денишире э зен хуьше, недуьл-недуьл гуш веноре гофгьой энуре. У дануьсденбутеш, ки гуфдире гофгьой эн зен ю дуз гьисдидеш, гене у гьейсэгІэт эз Гевгьер гІоси бу. «Чуьтам мирай э гІэруьси пул «шомош» неберде э хуьшдеревоз? Нирай — гъэгри мибошут».

Боби егилейгеш тиж, тигъэт дениши э сифет зен хуьше. НэгІ, эз сер-сифит, гъош-домогу ве лов-буз зен веде бу ки, у не э хоширевоз, не э гужевоз, имбуруз уре эри э гІэруьси берде пул нидуь.

Оммо вэхд эдембу гиросше. Гьово лап торик биребу. Чорей Боби небисдо, эз зен гъэгри бире, е гоф э з лэгІэй хуьше неведировунде, вэхуьшд эз сер стол, куьнд бисдо эз вешалка, вено э сер шопкей хуьшдере, вегирд десдечуре ведарафд эз хуне. «Бурам омборекбу сохум Рэхьмоне, кук юре, вогордум биём»,— мугу э дуьл хуьше Боби э куче ведироморенге.

Э иловлей хъэст столгьо, куьрсигьо, жерге-жерге норе оморебируьт. Э сер куьрсигьо нуьшдебируьт леймиш бире гъуногъгьо. Э минжи столгьо сохде оморебу мейду. Зерегоргьо: тарчи, тефтчи ве комончечи эдембируьт зере вежегьисденигьо гьовогьо. Жогьиле кукгьо, духдергьо дуй эз песой еки ведироморе э мейду межегьисдуьт. Нуьшдегоргьо чек мизеруьт эри энугьо. Э дорун хъэст э келе гъэжгъугьой муьси э сер кинлегьой сенгьи эдембируьт дуйшире лезетлуье егънитгьой гІэруси, хушбуе хуно буй лов сохде э гьемей хъэст. Э гъэд ве иловлей хъэст эдембируьт сухде келе лампегьой электри, бергулугьо. Унегуьре гъэд хъэст товуш бу рузе хуно.

Боби чумечару сохде, Рэхьмон дусд хуьшдере эй гешде диромо э минжи хъэст. Гье у туьтем серпой, е назуке жогьиле гІэйл чуькле бигьлегуь, тиже чумгьо, десгьоре лов сохде, зурри-зурри омогуьрд пушой Бобире.

— О, лелей Боби, жунме-жигерме, туь хош оморей!—десе, везир э пушой падшогу гъэд бире, десе э сине зеренигьоре хуно, э зарифетевоз дуйгъэди сохд у назуке жендек хуфшдере э пушой эн э хуьше домундебугьо Боби.— Э гІэруьси гІэйлгьойтуьш, эн кукгьо-духдергьойтуьш оморени, кеф сохдени гердойм. Эз гІэйлгьойтуьш винош и рузгьоре, эз невегьойтуьш, нишрегьойтуьш. Кеш егиле нуьш эки эн хэлгъ, эн гъуногъгьо.

— НэгІ, согъбоши, кефме нисди, ме поисде нидануьм,—гІэйбе-гІэйб гуфди Боби.

Оммо серпой гофгьой Бобире э гуш негуьрде, эз гъул ю гуьрде, берд нушунд уре э гъэд хэлгъ. Чорей Боби небисдо, нуьшд э

серпой овурде бурмундигьс жиге. Боби сере тик гуярде дениши э оморе гъуногъгьо. Хэлгъ, мердгьо, глэруьс-духдер геймиш-гей-дуьрмиш гьеме нуьшдебируьт. Э глэрей э глэруьси оморе мердгьо омборе шинохгьой эн Боби дебируьт. Э ён Боби нуьшдебу е саре сиечердее мерд, гъолинде шугъэм, келе чумгьо. Э тен энү вебу ков-ре руйшенинн эн бастон, э сер гъолине шугъэм хуьшде у дарам бесдебу фирегье гъэиш, э пойгьой энү вебу фирегье гелифе, чек-мегьой мэхьси. И сара сиечердее мерд кор сохдембу снабженец эн е завод. Снабженец гъэдерсуьз гъолинд бугеш, у дилбош, сер-суге одомире хуно бу. Гьетте э мейду тозе одоми дерафде эри ве-жегьисде, снабженец гье у туьтем гъунде хуно мивэхуьшд э кутэхьэ пойгьой хуьшдеревоз, э гъолинде муйлуье пенжегьой хуьш-деревоз э зарбевоз келе-келе чек зере, хьэрой мисохд:

— Гьерсо — о! Гьерс! Гьерс! Гьерс!..

Кими вэглдо гъолинде гъунши эн Боби десе э фирегье куьф-гьой хуьшде доноре, пул ведешенде, мидиромо э минжи мейду. Пуле э дес эн вежегьисдгоргьо доноре, чумгьоре домбул сохде, хьэрой мисохд:

— Ой шомш! Ой шомош!

Шев эдембу нимешев бире. Э пушой эн зерегоргьо е гъэм гъэд-гъуд бире пулгьо кура биребу. Хэлгъ вомундебу, эри вежегьисде дие омбаргьоре дуьл небу. Оммо назуке кефлуье серпой, веже-гьисде-вежегьисде миемо э пушой хэлгъ, э лутие-глэлбуьсе чум-гьой хуьшдеревоз мидениши э нуьшдегоргьо, микеши миведеберд гьеркире бисдо эри вежегьисде.

— Эй жэглмет, ишму э глэруьсинит небуге эжеит? Вэхизит ве-жегьит: эришмуш кеф бу, эри зерегоргьош!..

— Е-дуь гиле серпой куьнд оморебу эз Бобиш. Оммо Боби гье-чу жуьрглэтлуь сере жумундембу э десдечу бурмунде, еглни ме-ленгуьсденуьм, серпой гье усэглэт дес кендембу эзу.

Бирден чуй кор бисдоге Боби э энгуьшдевоз огол зе овурд сер-поире. У гье усэглэт видов-видов омо поисд э пушой эн Боби.

— Хьозурум э гьурлуьгъ ишму, бирорме,— дуьгъэди бире, де-се э сине зэре,— гуфди серпой.

— Гу э зерегоргьо эри ме е гьовой «Узун дере» зенуь,—буй-ругъ до Боби э серпой.

Серопи гье усэглэт чаруьсде руе зерегоргьо, десгьоре лов сохде, гуфди келе-келе:

— Зерегоргьо, зенит «Узун дере», лелей Боби вежегьисдени-ни!

Зерегоргьо зеруьт. Боби десдечуре норе э ён стул, диромо э мейду эри вежегьисде. Гьенжэгъ эз и дуь минут пушо э ёр энү бирден омо: эз диревоз э куьф энү дуь дегъ монети дери. У э ёр энү омоки, Бобире гуйге паргьо веромо. У эри хуьшде фикир сохд; «эричуй нуьшдем ме поисде эз и глужизе, сочкуе одомигьоре ху-

но, э куьф пул дерки жиге? Вэхуьзуьм мерде хуно вежегуьм, песде биём нуьшуьм э жигейме».

Серпои ведировунд эз гӀэрей десдей духдери е раче инчегеле жогъиле духделере, снетье гьошгьо, снетье чумгьоре, дешенд э мейду эри вежегьисде э Бобиревоз. «Чуь хубе гӀэселе духдери,— мугу э дуьл хуьшде Боби, денишире э духдер.— Эри кук ме ми-хосдум ире».

— Гьо! Гьо! Чек зенит, чек! Чек! Чек! — черх хурде э иловлей мейду, э пушой хэлгъ чек зере, келе-келе гуфди серпои.

Хэлгъ сер гуьрд гьеме эри чек зере. Гьунши Боби, сиечердее гьолинде мерд, домбуле чумгьо, вэхуьшд эз жигей хуьшде, э зарбевоз чек зере-зере э бугьоз гуьрде сес хуьшдеревоз, келе-келе гуфди:

— Гьерсо-о! Гьерс! Гьерс!..

Эз сесгьой чек не музик, эз шори э жовоне духдеревоз вежегьисдеи гуйге э пойгьой Боби гьэнетгьо вероморуьт. У гьейсэгӀэт чуьлпенжсале мерде хунош гуйге небуге, эз и бисд сале уьктеме жуьргӀэтлубе кукгьоре хуно эдембу бурмиш бире э мейду. Гуйге у ленгуьсдембугьо пой энугьич эз бинедениш ние ленгуьсдембу.

Э гьизгьин эн вежегьисде, Боби сере тик гуьрде э е фурсевоз десе доно э расди куьф хуьшде пуле эри вегуьрде, эри доре шо-мош э дес духдер не эри э пушой зерегоргьо дешенде. Гье у туьтем у чепи дес хуьшдере доно э чепи куьф хуьшде. Песде гье э вежегьисдеки у сер гуьрд э дуьдесевоз дуь куьф хуьшдере эри гешде. Оммо э е куьф э нуш недебу. «Бобо вой, биёбур бис дорум э пушой хэлгъ,— хьэлежингер бирере хуно, гуфди Боби э дуьлхуьшде.— Чуь бири эхи э куьф ме дебугьо пулгьоре?» Занигьой энугье усэгӀэт буш, эз гьувот бурраре хуно бисдорут, ранг Бобиш дегьис бисдо. Гьеу туьтем хэлгьийш гуйге э хьэвес офдоре эдете дуь эз еки сэхдте чек зерембуьруьт. Кутэхьэ пойгьо, домбуле чумгьо, «снабженец», гьолинде шуьгьэм хуьшдере пушово ведешенде, эдембу чек зере, гуфдире «Гьерсо! Гьерс! Гьерс!». Зерегоргьош, э шомош имид бире, гьемешу эрэгьлубе, эдембируьт зере тарпе-тарп. ГьейсэгӀэт сес чеке-чек, эн музик эдембу гуйге зэхьлегьой Бобире берде.

«Чуь бири и жегьендеме пулгьоре эз куьф ме эхи? Коми мердимазар ведешенди угьоре эз куьфмез — эдембу э дуьледэгьдэгь-эиревоз фикир сохде Боби.— Кей вегьурди бу и пулгьоре эз куьф ме Гевгьер? Чуь мугую имогьой хэлгъ э песой ме? Мугую: э куьф е шогьи недери омори э гӀэруьсихуне, уьсделуьге эри вежегьисдеш дарафди э мейду эзи суке, делхэке гӀэилгьоре хуно».

Э е дэгьэдэгьэ Боби гуйге фурмуш сохд у гьейсэгӀэт э пушой хэлгъ, э гьэд мейду дебу гуфдире, поисд э минжи мейду. Десгьой энугь бирден ведешендуьт буруне буше куфгьой энуре. Гье и туьтем

хэлгъ э гІэруьси бирегоргъо шэгъгъэ зере хэндуйсдуйт. Духдәле э Бобиревоз вежегъисдембугъо, эз зир ловгъо хэндуйсде, вирихд ведарафд эз мейду. Зерегоргъо гъе үсэгІэт поюндуьт зерейре. Тефтчи е лэгъәре жогъиле кук, буйхуьле чумгъо, тефте э сер эн зани веноре, хуни-хуни дениши э Боби.

Боби сере гъуз гуьрде эз гІэйб, хәсде, эзи эз хьол офдоре одомире хуно, омо нуьшд э жигей хуьшде.

Гирошд е нимсэгІәтигеш. Эхириш овордуйт э пушой хэлгъ дешендуйт суьфро, норуйт гІош, егъни, шоробгъо, эрэгъигъо, закускагъо. Е-дуй рюмке эрэгъи хурде бэгъдо, гъовой Боби екем очугъ бисдо, оммо у эз дуьл эдембу гІэйб-хижолети кешире. Э вэхд чи хурде, гъовой гъуногъгъо екем кефлуй бугъо вэгІдо, э мейду дировундуйт гІэруьсе, вераюнде эз сер те ве пой, эри вежегъуьнде.

Серпой е сад монети доно э дес гІэруьс, е дуй-се гиле черх хурд э иловлей энү, песде э лой гъуногъгъо чаруьсде, хьэрой сохд:  
— ГІэруьс эдее вежегъисде!..

Э гІэруьси оморегоргъо, мивэхуьшдуйт, мидоноруьт э дес гІэруьс пул. Вэхуьшд эз жигей хуьшде гудеге снабженец. У вегуьрд дуй тозе верэгъ-верэгъэ садигъоре, екире э е дес гІэруьс доно, екигере зе е десигею. У гуж зере, чумгъоре диеш буйхъ сохде, сергуьрд эри хьэрой вегуьрде, гуьфдире: «Ой шомош! Ой шомош!» Оммо эз тасире бугъоз энү э жигей гоф, гов чуйтам мэгІ зереге, ужире сес ведиромо. Чорей эн ү небисдо суьгърусде-суьгъруьсде, нуьшд э жигей хуьшде.

Боби э гъунши хуьшде — снабженец денишире гІэйб, хижолети омо эз хуьшде э куьф ю пул недери гуьфдире э дес гІэруьс эри доре. Е лэгІәзойге э мейду э пушой хэлгъ э вежегъисдеки биёбур бирейш дуьл энуре гъейсэгІәт бизе хуно эдембу сула сохде. У тәхсиркоре хуно эз гІэйб сере гъуз гирд, сифет юре екиш невинуй гуьфдире. Песде у евошлей десдечуй хуьшдере вегирде, енбоки-енбоки ведиромо эз гІәрей жергей эн э гІэруьси нуьшдегоре гъуногъгъо, чумгъоре зофру гирде-гирде, ведарафд э куче. У ленгуьсде-ленгуьсде э хуне э рафдеки, нечогъ эз хуьшде вор хунугъоре хуно, эдембу э хуьшдеревоз келе-келе гоф сохде, нифри сохде Гевгъер зен хуьшдере. Тәхсири эн имишев э гІэруьси биригъо биёбуригъой хуьшдере ү гъейсэгІәт энжэгъ эз зен хуьшде жунденбу...

1956 с.

## ЧУЪТАМ МЕ ЕБО МУЪРДЕ, ПЕСДЕ ЗУЪНДЕ БИРЕБИРУЪМГЕ

Е гиле ме муърдебируъм, оммо муърдебируъм э расдеки нэГІ, э... хов. Унегуьре гьеме э меревоз чуй биребуге, ки чуй сохденбуге, чуй гуфдиренбуге, ме гьемере диренбируъм, шиновусденбируъм.

Гьетте Гэзроил нешумоймере берде, нефес ме бурра оmore, мере дир несохде сер-тен мере векендуът, эз сер, карават, эз сер хьэлов вегирдуът (муърде э хьэлов ние дегешдуь). Жендек ме гьеле хиник небиребу, кейки мере тенбирэхьне дегердундуът э сер бирэхьне хори (имогьой гьечиш-гьечуш э ме дие не хиники, не гэзор кори нисоху). Куьнж эн хунере, э коминжо мере дегердундебируът, перде кешируът мере кес невинуът гуфдире (Гэйби эхи эри мерд, муърдеш гьисдиге, тенбирэхьне э пушой хэлгь дураз бире). Песде сер-тен мере э герме Гововоз шушдуът (ведини э у Гуйлом «санобработка» негирошде, екиреш нисе дегьишде). Песде мере э сипре эхироти доноре, э сер тобут веноре бердуът зури-зури эри гьовре сохде, гуйге тэгІди сохде мере эри эз сер ишу эз сер сохде.

Э пушой эн тобут ме эдембируът рафде хэгьергьо, холегьо, гэмегьойме, сине куфде, муй бурра, сифетгьошуре гьэрмэгь-гьэрмэгь сохде, эрме «гьейвой изар!..» сохде-сохде. Зен ме э гэйилгьоревоз мундебу э хуне. У эз дерд ме муърдеи, чуькле гэйилгьой ю етим мундеи, лап гьолок, нечоьг бу, э хуне мундебу.

Оммо эз гьеме зиэдте, эз гьеме сэхдте, неденишире э келе зени хуьшде, эдембу хуьшдере вешенде-фушенде. «гьейвой гьизар!» сохде, зенхуьсуьрме, еГІни, диругор, шиновусдегор дануьгу, винигу, чуьтам у дерд кеширениге, хьэйфбери сохдениге эри домор ю муърдеи.

Э зенхуьсуьрме денишире э ёрме омо, чуьтам у мере нисе хосденбуге, гэреймере нен зенмере гьэриш сохденбуге, эри гьэгьнегьогь духдер хуьшдере э ме хьэлово сохденбуге. Э фикир эн зенхуьсуьмеревоз, ме, еГІни, той духдер энү небируъм, ме не бируъм эзужире дилбоше, вотурене, эз мариш пешм чире дануьсденуьгьо жогьилгьо, мердгьо. Э духдер энү верзиренбу эри бикере хуно зигьисде э ужире шуьверевоз, э чуьмени соките, тевзуьле, хубе пул гьэзенмиш сохде нисе дануьсденигьо одомиревоз нэГІ.

Оммо ме эдембируъм денишире э и гьеме ме диренбируъмгьо коргьо, шиновусденбируъмгьо гофгьо, сесгьо э олхогьини ве бешгьэсуьзиревоз, чуьтам лоигь гьисдиге э муърде одоми. Оммо эз гьуьндури эн тобут ме, комиреки э душгьошу веноре, эдембируът берде дусдгьо, хьэрмэхьгьой ме, ме песини гиле денишуруьмки э кучегьой шегьер, гьейсэгІэт товушлуь бируьтгьо эз унгьэде герм небируьтгьо зар-зарие ригазгой эн чуьшмей пушойшохьонгуми, дуьл ме гьеебо лап билбул, могьбул, гаежон бисдо. И шегьер эри

ме лап гІээиз бу. Инжо, гуйге, ме келе бирем, вероморем. Инжо ме эриме одохлуъ соймиш сохдем, ошугъ бирем. Шегьер сал бе сал эдембу э пушой чумгойме келе бире, рач бире. Омбаре хунегъо э шегьер вскурде омори гьемчун э кумекимеревозиш (ме те муърде гуйге кор сохденбируым э еки эз «строительни бригадагъо», бируым бригадир энү), Ме гьейсэгІэт эдембируым денишире э и хунегъо э гІээизи ве муьгьбетевоз, чуьтам куьгьне богъбон дениширениге э гуьлишонлуье доргъой богъ хуьшде, комигьореки у дошди, веровунди э жофой дес хуьшдеревоз.

Тэхъл тэхълекире хуно, гІэтош биренгъинере хуно фикир ме э товун энү кор, ки ме гьемишелуьг, те гъоймей гьиемст эдее дур биренуым эз шегьер ме, эз зен, гІэилгъо, дусдгъо, гъовумгъойме дуьлмере лап сухунд, билбул, гъэреболугъ сохд, сер гирдуым эри келе битоби сохде. Оммо ме э гужевоз хуьшдере э дес вегирдуым, сокит сохдуым, шендуым эз дуьлме гьемей эни фикиргъоре, муьди бисдорум э тэхъле гьисметме, анмиш сохдуым э хуьшде, ки муьрде одми биё хуьшдере динж, саламат гируь, чум вегируь эз гІуьлом.

Мере овурде расундуьт э сер гъоврегъо. Тобутмере норут э гъиругъ эн тозе векенде гъовре, э коминжо эз е ченд минутиге бэгъдо мере биё дегердунут эри гьемишелуьги э, чуьтам зенгъойму э гирисдеки гуфдиренуьтге: «дер недерие, пенжере недерие тьхное торике хуне». Эзи «хуне» эдембу буй эн неми, пусирей, чуьруьши варафде э виниме. Э иловле гьеме сара тпейлетгъоре хуно гъоврегъо бируьт э сенгъгъой гъовреиревоз, сессуьз, гуьмсуьз, лос поисдебируьт э зир песини ригазгъой эн э песой догъ дарафдебугъо чуьшме. Э угъо днншире э ёр ме омо могъбуле гофгъой эн еки эз буьзуьрге гъэдниие шогъиргъо:

Имогъой туьре миденуьт э гъовре,  
Эжеки нисд не товуш, не астаре,  
Гуш вени: и сура э екиш туь мегу,  
Пажире гуьл зинде нибу дуборе...

Ме дениширем: ини гьейсэгІэт мегируьт мере эз сер тобут, миденуьт э и чухуреки, ковре асму, герме чуьшме, зуьм-зуьмие асарагъо гьемишелуьг сэхд мибошут э пушойме... Ижире могъбуле фикиргъо э дуьлме дерики, гье и туьтем киниге гуфди э товун вокурде омореи митинг ёси. Эз нуминей эн коллектив ве профсоюзни организацией эн СУМ гоф дорут бригадир эн дуьимуьн строительни бригадаре, э комиревоз э гъэд эни песини се сал бэхъс социалисти гировунденбу бригадай ме, келе мерде Дада Бадаеве.

Дуьл ме гуйге е кем сокит бисдо, кейки ме шиновусдум э товун эни митинг ёси. Мере имид бу, ки келе мерд Дада Бадаев, ко-

мере пушой э гоъвре доноре, е-дуй хубе гоф мугую эз дуьли э товун ме.

Оммо чуй пешму, чуй могъбул ме бисдорум, кейки диренге, чуй-там хуърметлуйе Дада Бадаев, эз куьф хуьшде е ченд э мошинке нувъуьсде велггьой когъозе эз куьф хуьшде ведешенде, песде э тегънимиревоз суйгъруьсде э кеф дес хуьшде, дуй чуме доноре э когъоз, домунде-домунде сер гирд эри хунде:

— Хьовирго! Э песини салгьо э гьемей буьзуьрге вилеет иму омбаре хунегьо эдете вокурде оморенуьт. Гьовхолуье девиз иму гьисди эри вокурде э бежидиревоз, ужуж ве верзуьшлуй, э дуй-руьсдиревоз э жиге овурде гьрдхундигьой социалистимуре э пушой хуьккуьмет, хьэрекет сохде эри небире не штурмовщина не коре пес гьйшдеи...

Песде оратор сер гирд эри мэгIлуьм сохде э сер гьоврегьо ку-ра бирегоре одомигьо, ченгъэдер, э коми кучегьо корсохгьойму хунегьо вокурдетге э шегьер э и песини салгьо, гуфди э товун эн кими пушолуйе корсохгьойму. Э товней ме келе мерд мугу, ме ударник эн жофой коммунистинуьм, ме е десме керпиче гирде, э е десигеревоз — карасдире э е смена дуввойне плане бегьем сох-денебируьм.

Келе мерд юш гуйге эдембу дире, у эдее гуфдире э ижире жиге гуьнжо нисдутгьо гофгьоре. У ю хуьшдению, сере биразире хуно жумунде, суйгърусде, эдембу хунде э когъоз вебугьо «доклад» хуьшдере, комини канцилярски бюрократиге нуввуйсдигьоре эри эню.

Пушой варасде, у е дэгъдэгъэ чуме вегирд эз когъоз, дениши э лойме, песде терсире э когъоз неверие гофгьоре мугую гуфдире, гене сер гирд эри хунде:

— ГIэзизе хьовир иму, Хизгил! Бигьил иму вокурдеймгьо чортебэгъи хуне э гьеме коммунални геуекигьоревоз э ён диш эн «Шайтан базар», вокурде оморигьо э бэхшвегиритуьрево, бугу эритуй едигор эри зарблуйе жофойтуь э коллектив иму. Хис олхогьин, ГIэзизе хьовир, э жигейтуь, кортгуьре иму, хьэрмэхьгойтуь, э жиге миёрим.

Ме эз зир чум денишируьм э иловлей гьоврейме кура бирегоре одомигьо. Чуй муьгIуьжуьз дируьм ме гьейсэгIэт! Неденишире э ижире могъбуле туьтем угьо эз зир лов эдембируьт хэндуйсде э жигей э ижире вэгIдо могъбули, хьэйфберишуре бирмунде э сифет ишу э товун муьрдеиме. Е мерд, келе чумгьо, гьолинде шуьгъэм гьечи лап очугъ эдембу сэхд хэндуйсде, гуйге киниге уре эй хьэз эдембу гьили-гьили доре. Эриме и кор лап гурунд, хуьрди, охмурире хуно омо. «Эйчуь ахи и хубе, рэхьмедуьле одоми, дусд ме Дада Бадаев э сер гьоврейме мийсде ижире отчетни докладе хунде?— эдембируьм гьэгьр кешире ме.— Бегем э руз шори ене-миреки муьгьровуне чумгьо вебируьт, рэхьмедуьле сес, гьейсэгIэт,

бүгэ э руз могобули гьер одоми е-дуй гоф эз хуыште, эз дуэли гуфдире нидануэ енебуге гIэмел ниёв? Чубни эз муьрдеи инсон, дусд, хьэрмэхь, шинох тэхьлте, гурунте э согь эни гIуьлом?! Бегем ме согь эни гIуьмуьр ме э е дес ме гье керпич гирдем, э е десиге — карасли?!... Бегем ме не бирем боворнине дусд, хубе хьэрмэхь, гIээизе бебе, эри хэлгь дуьлсухуне одоми? Бегем мере небири шоригьо ве могобулигьойме, имидигьо ве пешмунитгьойме, эжиге оворде неоморе ниетгьойме?! Эйчуэ э товун энугьо е гофиш гуфдире не омо?!...»

Гьобоне мерд келе дараме шуьггэм хуышдере э дуй десевоз сэхд гирде, гуйге терсирере хуно, у бирден неофдону гуфдире, гьейсэгIэт хэндуьсде нэгI, эдембу тозе хое сохде керге хуно шоггьо зере эз гофгьой эн Дада Бадаев.

Бирден мереш гье ебо хэнде гирд. Суьфде евошлей, гIэйбегIэйб, песеде оморе-оморе лап келе-келе сер, гирдуьм меш эри хэндуьсде. Гьемей жендекме эдембу жуьмуьсде эзи хэндейме. Ченгьэдер ме хьэрекет сохденбируьмгеш эри поюнде хэндеймере, эслогь лонгь, гуьнжо нисдигьо эри муьрде одоми, ме хуышдере гирде нисе дануьсденбируьм. Ме терсирембируьм, ки э сер гьоврегьо кура бире дусдгьой ме эришу фикир несохут, муьрде эдее э ишу, э зиндегьо хэндуьсде гуфдире.

Эз келе хэндейме, э сер тобутме вебугьо сие чодур гуйге эз гуж кулоке хуно эдембу врафде-фураморе. Бирден гьемере э мэхьтели венгесде, ме эз муьрде жиге зинде бисдорум. Гьечу хэндуьсде: хэндуьсде сие чодуре эз сер тобутме шенде, э пой вэхишдуьм... Ме шиновусдем: хэнде одомире эз омбаре нечогьигьо хилос сохде. Оммо и дес хэнде мере эз лап беде чи — эз уьлуьм хилос сохд.

У руз себэхьмунде хэбер биренге, ме лап шор бисдорум не муьрдем, зиндеуьм гуфдире, оммо э зен ме гьэдэггэ зеруьм:

— Эгенер ме эз туь зуте муьрдуьмге, мегьил э сер гьоврей ме митинг сохде.— Песеде е кем эри ме фикир сохде, гуфдируьм: — Эз елойге — бошгу, сохутгу. Ки дануьсде: белки чутам ме э хов эз муьрде жиге зинде биремге, гьечу э расдекиш, эзижире гофгьо, э митинг ёси гуфдире оморебируьтгьо э сер гьоврейме, ме зинде мибошум?!

1957 с.

## МЕРД БРИЛЛИАНТИ

Гьер одомире нум юни, егIни уре э екиревош егIэлмиш несоху гуфдире, меселен: Хьэсене э Хьуьсейневоз, Асадулларе э Ибадуларевоз, енебуге Ашуре э Бошуревоз. Оммо ~~чуэ бие сохде биев~~ имогьойле, эгенер, коргьой гуюгьоре хуно, худо мебуро, эз гIэре



кем мегердо, э е чуйкле дигь иму эз сад хуне гьисдигьо, нум ишу «Ашур» гьисдутьго одомигьо кеми-кемиш нэгI э куьнди е дуьваздегьи? Эз же дануь одоми, нум юре гирде, эз товун эн коми Ашур туь пуьрсиреге, хэбер вегигрдеге э нумевоз? Белки гье эзу товунен, ки гьер Ошире э дигь иму е лэгъэми: Ашур-Гьирмизине Рушгьо, Ашур-Ударник, енебуге Ашур-Дуьшпере, Ашур-Сельсовет, Ашур-ЖэгIхур? Эзи дуьваздегь Ашур энжэгь еки энугьоре — завсельмаге лэгъэм небу. Имогьой эз перине рузевоз дигьбонигьойму уреш лэгъэм дорет, уре имогьой Ашур—Мерд—Бриллианти гуфдиренуьт. Эз товун Ашур—завмаге ижире лэгъэм дорей эриме ихдилот сохдебу э киме эз дигь иму э гьуногь оморебугьо дигьбониме—Ашур-Буьбуьл. Уре «Бьлбуьл» лэгъэм доребу дигьбонигьойму уре гоф омбар сохде хьэз сморе гуфдире, лэгIэй энугьич гирде нисе бире, эже чуй бириге, ки чуй дириге, шиновусдиге — уре эз гьеме коргьо хэбер бу. Песде юш эз хуьшде э сер энубире енебуге шиновусде коргьо гоф веноре, расдире э дуртуревоз гьэриш сохде, эри гьеме э хьэвесевоз ихдилот мисохд.

— Оммо туь жунме, хосденуьм эз туь,— мугу эз ме Ашур-Буьлбуьл, минет сохдере хуно, те ебо ихдилот хуьшдере сер гирде,—э товун и ме эритуь ихдилот сохумгьо гьозие э гIэрейму домунугу.

У песой сер хуьшдере хорусде, екем э хуьшде домундере хуно, поисде мугу эз ме:

— Дануьсдени ме гьечи эйчуь гуфдиренуьмге? ГIэрейме нен Ашур—Мерд Бриллианти, чум мерасо, лап хуби, гIэсел—руьгьэре хунои. Имү э хунегьой екиш рафде-оморе, нуьшде-вэхьшде сохденим. Зенгьоймуш эеки дусди-шинохи гердунденуьт. Эзи хотур, Ашур-Мерд Бриллианти ю гьурумсогъэ, хэйр вермезе одоми гьисдигеш, эри е пара коргьо у хотур мере нисе гьшде. Гуьом бурам э туь: э магазин энү е хубе мол-чи, меселен, дефицит оморенге у эз восдорегоргьо пэхьни сохде, песде эз зир десгьо э бугьолуье гьимет фурухде, оммо э ме нэгI. Сер ебо э магазин энү ижире мол оморе, у мере эз пэхьники огол зерени, гуфдирени, егIни эриме ижире хубе мол омори, е туь, енебуге зентуь, биййт берит кес недануьсдеки. Песде э хьэлоли гуфдире гереки, у моле, чире э пеймундеки эз ме нисе зере, эз кесгьойге зеренигьоре хуно.

Ашур-Буьлбуьл гоф хуьшдере е дэгьдэгъэ поюнде, е чуме «хисунде», е чумигере диеш келе келе сохде, э синемиширевоз дениши э ме, суьпле хэнде сохде, мугу:

— Оммо расдире гуьом э туь, ме терсиренуьм: ме и ихдилоте эз товун Ашур-Мерд Бриллианти гуфдируьмге эритуь, туь мегири э товун энү е мэхсерее ихдилот енебуге е «Фильетун» минуьвуьси. Увэхди гIэрейму э Ашур-Мерд Бриллиантиревоз усол мибу...

Ме хосиетгьой эн Ашур-Буьлбуьле дануьсденбируьм: ме рази небисдорумгеш у тоб нидуь и ихдилоте эри несохде эриме. Кидан у гьеле те э киме оморе эри ченд одомигьо сохдите и ихдилот

энуре. Унегуьре ме хуьшдере э бешгъэсуьзи веноре, мугум эзу:

— Туь э ме ихъдибор нисе сохдениге — мегу.

— НэгI, нэгI, худо мегуё, ихъдибор сохденуьм эз хуьшде зи-  
ёдтеш,—зури-зури жугъоб до Ашур-Буьлбуьл,—генеш дие эдее  
гуфдиренуьм: эз туь хосденуьм эз товун эни кор гъичиш менуь-  
вувс, гуйге туь гъичиш нисе дануьсде.

Ме гоф дорум Ашур-Буьлбуьле гъичиш нинуьвуьсуьм гуфди-  
ре, увэхди у олхогъин бире, сер гирд гъечи ихдилот хуьшдере э  
товун Ошир-завмаг.

— Ме э туь гуом, Ашур-Мерд Бриллианти э жогъиле вэгIдо-  
гъой хуьшде е раче одоми бу. Уре е хубе буй-бала вебу, э сер энү  
ченд э килэхэ гусбенди муйгъо вебируьт, сифет юш хуб, испогыи.  
Имогъой туь дирейге уре: э сер энү е доне муй невери, э лэгIэй  
ю е дондуш недомунди, дондугъой энү — гъеме суьрхи-бриллиан-  
тини, шуьгъэмиюш вемасири челеге хуно, сифет юш бирач, бихур  
бири. Туь гьерчуь дануьсдени эз келемерди энүни у гъечи? Эз  
муьрдалию, хьиллеи ю. Оммо туь имогъой биё виниш у э и келе  
мерди, сер-сенбол хуьшдеревоз чуьжире уин ведешендиге!.. Э  
дигь иму е жогъиле бие зен дери Беневше гуфдиренигъо. Туь  
уре биё дани! Завмаг уре динж нисе гъишде, эдее э илоулей энү  
вежегъисде, туьлки э илоулей эн лулей муш вежегъугъоре хуно.  
Хьэлово бири э у: ~~«Биё э ме э шуьвер. Ме келе мерд гъисдуьмтеш,  
ме эзи жане-манеэ мердгъо нисдуьм, худоре шуькуьр — Мерд  
бриллиантинуьм. Э меревоз бикере хуно мизигъи, беле-филон».~~

Туь, гьелбет, верасири, у эричуь гуфдирега хуьшдере «мерд  
бриллианти?». ЕгIни, зир юр пури эз дуьздире пулгъо, эршефи-  
гъо. Гъурумоогъ гъеле келегедиш эдее сохде!

— Беневше ю чуь гуфдире?— пуьрсуьруьм ме эз дигъбониме.

— Беневше? Беневше уре гъич э чум дире нисе воисде,—гъэусэ-  
гIэт мугу Ашур-Буьлбуьл. — Эз гофгъой энү, гуом э туь, Бенев-  
шере негире гирде. Оммо Ашур-Мерд Бриллианти эзу дес нисе  
кенде. Беневше уре гъелебулеш доробу, мурав эз дес энү э Ашур-  
Сельсовет шуькеет мисоху гуфдире, эгенер завмаг юре динж не-  
гъишдге. Оммо э у гъелебулегъо-терсгъой эн жогъиле бие зен кори  
нисе сохде. У чумгъоре хисунде, сере жумунде, сер гирдени э пу-  
шой энү э гъовой шуькесде э хэре сес хуьшдеревоз эри хунде: чуь-  
там Керем эз муьгъбет Асли су гирде сухдите, Меджнун эз муьгъ-  
бет Лейли делуь буге...

Туь днуьсдени, ки дигь шегъер нисди, инжо хэбер зу лов би-  
ре. Шову гов эн ки э говду гуселе зендиге, эркег зендиге, енебуге  
дуьши зендиге, себэхьмунде э дигь гъеме дануьсдени. ГIэлибобое  
Ошир э песой жогъиле бие зен Беневше гешде, уре динжи нисе до-  
ре гуфдире — э товун эни кор эз келе те чуьклей дигь гъеме да-  
нуьсдени. И хэбер, гьелбет, э зен завмагиш, расири. Зен энуре  
гирди жин. Эз ело дуьл энү нисе ветовусде шуьвер ю э жогъиле

зен ошугъ бири, юре э гуш нисе гирде, эз елойге хуърди, гурунди оmore эри энэ гъечи э пушой дигъ-жэгмет у эдее э и келе мерди хуьшдеревоз нум хуьшдере биёбур сохде гуфдире. Уш хъэлово бири офдори э жун Ашур: «Эй, туьре гIэйб-номус нисе оmore, хуьшдере э пушой хэлгъ-хэлоигъ биёбур-руьхшенди сохдей? Туьре келе гIэйлгъои, невегъои, э келе мерди туь чешмиш бирей, не-буге жуьгътуь э кефел туь верафди?!..» Э ки гуфдире туь: э и дивор гофгъой зен энэ кори сохдениге, э Ошириш сохдени.

Ашур-Буьлбуьл гене гоф хуьшдере екем поюнде, сере жумунде, э хэндеревоз мугу:

— Имогъой гуьом эри туь эзи се руз пушо, хъэшдимуьн март-мигIид эн зенгъо чуь бириге, чуь сохдиге и пире «Меджнун» иму. Шев пушой эн хъэшдимуьн март э магазин хубе алвер биребу: мердгъо эри зенгъо, духдергъошу, жовонгъо — эри одохлуьгъо, сев-гилгъошу жуьрбежуьре бэхшгъо восдоребируьт эз магазин. Шев э куньнди нима биренки, Ашур пулгъоре гъемере эз касса вегирде, донорени э гъултугъ кутэхэ пусди хуьшде. Песде е раче гуьле-гуьле сердеги пешмире вегирде, донорени э у е ченд метро мол эврьюшуьми, ширине чигъо, шоробгъо, бесдени гъемей энугъоре э бугъче, вегирдени э хуьшдеревоз дуразе гушворгъой эн суьрхи э бриллиантевоз, уреш денорени э куьф эн пусди хуьшде. Песде пусдиге э сер душгъо вешенде, бугъчере вегирде, дер магазин сэхд сохде, рафдени. Эже рафди у имогъой туьре дануьсде воисдениге? Э хуне, э ки пире зен хуьшде, гIэйлгъо-невегъой хуьшде? Эз же омори! Э ки жогъиле зен-Беневше. Уре имид бу: у и дес жогъиле бие зен э хотур эни бугъолюье бэхшгъо, шоре шев эн мигIид, э хошие гофгъо, менэхъэфигъой энэ гуш веноре, эхириш эгерде мегуь зен ю енебуге пэхъникие ошней ю семе эри бие.

У шев гъово лап торик, менгсуьз бу. Чум одоми эз дуь-се пой дуртте чи сечмиш сохде нисе дануьсденбу. Беневше ю зигъисдени э у тарафигей нуькере, комики, туь дануьсдени, эз минжи дигъ иму гирошде.

Эдее рафде завмаг, кутэхэ пусди э душгъою вери, бугъче э дес ю дери, э зир зугъун хуьшде хунде-хунде:

Ме не туьни гьердуь еки,  
Бэхдеверим э гъэл еки,  
Жунме э жунтуь дерики...

И мэгIни, гуьом э туь гъемише э лэгIэй энэ дери. Уш гъейсэ-гIэт э фикиргъой хуьшде, э хъисобэвоз, жогъиле зене э гъэл хуьшде гирди. Оммо Ошир э ён курпи нуькере оmore расиренки, эз некуми э пушой рэхъ энэ омо е мошин ведиромо. Пой энэ гъи-рогъ куьрпи вебу, кейки мошин э дегесунде фаргъоревоз, тов-чум энуре берде, шиши омо э сер энэ. Куьрпиму тенги, песде михъэ-

жер неверини. Завмаг эз терс э зир мошин мидомуну гуфдире, гьесбо шенд хуышдере гьырогъ. Гьс и туытем э товуши эн фаргьой мошин у кунбологъово офдо эз сер куърпи э гъэд эн сайлов хинике г'ов.

Ашур-Буылбуыл е гъэдер вэхд э у хэнде вепичире меркижере хуно, гоф сохде недануысд. Песде э гужевоз хэндей хуышдере поюнде, сер гирд эри песой ихдилот хуышдере сохде. Э гуфдирей энуревоз у шев э нуыкере лап г'ов омбар омореву. Завмаг гьетте э г'ов офдоре, сайлов берд пусти энуре э гьеме пулевоз, дуразе гушворгьой суърхире э бриллиантови гъошевоз, килэхь энуре. Терсире юреш сайлов кешире, э чолекигъо дешенде батмиш несоху гуфдире, у эз хьэлезигери жун хуыше эз десдек эн куърпри гуърд сэхд, вежегъуысде г'эил эз герден дедей сэхд гируыгъоре хуно. Е хьэрой-буыруыж у дешендебу — э гьемей дигь лов биреву. Те хэлгь эн дигь э кумеки оморев расире, э мошин вебируытгъо одомигъо, дес энуре гирде, э гужевоз ведешендебируыт уре эз хинике сайлов. Кукгъо-духдергъой энурэ пушой эн гьемей хэлгь уре сер бирэхьне, пустисуыз, гьемей ю тар, кип-кову бире эз хиники, денду куде-куфде эз лерз, эз дуь гьул энурэ гирде, бердуыт завмаге э хуне. Эзу шевевоз имогъой завмаге э дигь гьеме э хэнде, руыхшенди ве комсвоз «Ашур-Мерд Бриллианти» гуфдиренуыт.

Ашур-Буылбуыл варасденге ихдилот хуышдере, вэхуынд, дес-мере гирд пушой рафде песде гене е кем э хуыше домундере хуно поисд е гъэдер э лэг'эй дер. Дуборе э лойме денишире, десе жумунде, лове э суыпле хэнде веберде, мугу:

— Дануысдени чуыниге? Э жегьендем бугу у дефицит не дусдилугъи энурэ. Лап жигеюни эри энурэ. Уре зйме оморенигъо дие э унжиге гышдеш нигъилуы эри кор сохде. Туыре воисдениге нуыуыс еки эзу мэхсерее ихдилотгъойтуы эри энурэ енебугу «филейтун». У ихдилоте енебуге «филейтунтуыре», нум ни «Ашур-Мерд Бриллианти».

## ЭСЕФ-ДУРАЗЕ РУШГЪО. /

Г'эсбон колхозе Эсефе пенж духдер бу, оммо е куклеш небу. Унегуыре гьеме уре э дигь «хьомол» гуфдиренбируыт. Эри омбаре дигъбонигъой энурэ, гуйге «хьомол» бире келе бедбэхди бу, е шуыкесди, нимелитире хуно.

Эсеф эз дуыл омбар могъбули, хижолети кеширенбу уре духдергъой, кук нисди гуфдире. Хэгьергъой энурэ эри хьомоли энурэ гирые сохденбируыт, эри муырде одоми гирые сохугъоре хуно. Дигъбонигъой энурэ э уревоз э гоф сохдеки, мугуфдируыт эзу: «Эхиртуы ник гердо», ег'ни, туыре кук гердо.

Эсеф, «эхир ю ник бу гуфдире», чуытам э дигь г'эдот буге, сер

гирд эри э кишди хуыште бесде гъирмизине кишди хьомоли,, руш вегиште, егІни, худо эз хьофдимуьн тебэгъэй асму винуь уре, сечмиш соху эз гІэрей эн де мердгьойге, кук дуй юре.

Белки эзу товуне, ки хуышдени Эсеф, чум марасо, е екелуье, гъуьндуьре, жонлуье одоми бу, рушгьой энум оре-оморе гъечи фирегъ, дураз бисдорут, гуйге э пейнлугъ вероморе гъэлэгъэне хуно. Фирегъе синей энуре у шохе хуно дегирдебу, эхир эн руш ю те сугъразанию расирембу.

Эзи жире рушгьо у эз гІуьмуьр хуыште хэйли келе веде бирембугеш, Эсеф эз дуйли шор бу ижире шелгъэме руш веромори уре гуфдире. Уре имид бу, ки эз хори те хьофдимуьн тебэгъэй асму лап дур гъисдигеш, эжеки худой офирогор нуышди э сер тэхл суьрхи хуыште, чум энум сечмиш нсохде нибу гъирмизине кишди хьомоли не эн молохэ хуно дураз ве фирегъ гъисдигъо рушогъой энуре.

Дигъбонигъой энум эзумогъоевоз э песой чум уре гъемише «Дуразе рушгьо» гуфдиренбируьт:

Эсефе лап кук воисдембу, хъэсроти бу эри энум, кук э пире вэхд эри энум кумек, дошдегор мибу гуфдире нэгІ. У гъейсэгІэтиш жогъил нисди, е-дуй салле мунди эри пенжогъи бирей энум. Тейте кук энум келе бире-вероморе, белки э сер гъоврей энум е гез савзеш меров. Гуфдирени: «Те эз дайче юргъэ бире, сэхьиб э тулок чаруьсде». Эз елойте, ки дануьсде, белки, худоре шуькуьр, у рузе у э чум хуышдеревоз виниреш-виниге. КимвэгІдо расире сиб э лигей дор вомундени, коле сиб офдоре. Зиндегуни — мэхътеле чини. Гъе у те увэгІдой зигъисде ведарафдгеш, мипоюми кук энум э дигъ э ён энум, эн пире бебе-дедей хуыште? ГъейсэгІэтине ферзендгъо парандегъой гъоворе хуноют. Эн парандегъо гІэдоти, гъетте тен ишу е бобот пар гирде, чуькле гъэнетлегъошу гъувот гирде, угъо эз лулешу учмиш бире, рафденуьт, тозе жиге, луле эри гирде эришу. Гъер земонере е тефигІэтиюни. Эз елойте, чуь сохдени э дигъ, гуим, инженер-нефтяник, летчик, мошинист, э у дигъ лап куьнде гІэзизе одомигъой энумгъо зигъисденуьтгеш.

Э товун келе мерди гуфдиренитге, гиросди ужире земонегъо, кейки ранжбер, иллогъки комиреки кук-дошдегор нисди, терсиренбу эз пире руз хуыште эз гІэжел зиёдте. Уре кук воисдени энжэгъ эри энум кор, нум «хьомоли» эз сер ю вегирде биёв гуфдире.

Гъечи э ижире ниётгъо-хэёлгъоревоз гиросд е ченд сал. Оммо э гъэд эни ченд сал зен энум неки кук, духдериш незенд. Эсеф Дуразе Рушгьо лап омбар дуьлпесо бисдо эзу товуне. У варасики эри хуыште дие эз зен ю фойде нисди, уре дие гІэйил нибу. Унегуьре у э е жогъиле бие зен Аснат гуфдиренигъоревоз куьнд бисдо, э пэхъники мегър бисдо э увезов.

Дуьимуьн зен Дуразе Рушгьо зигъисденбу э эхир дигъ. Эсеф эз ело шор бу эзи кор: хьовугъо э чум еки нивохурут, дуй э еки-

ревоз величире э пушой дигь-жэгIмет, биёбури нисохут. Эз елойге у пешму 'бу эри эни кор, чуйнки у рафденбу э ки Аснат лап шев дир 'биренге, кейки э куче-дере екиш нисди, кес нивенуь гуфдире уре, э пэхьники эри дузди сохде рафдере хуно. Оммо, коргьой гуюгьоре хуно, э кул деве венуьшде э геле пэхьни нйбу. Ченгъэде Дуразе Рушгьо хьэрекет сохдембугеш эри пэхьни бире эз кес-кимсе у э ки Аснат э рафдеки, оммо эхиржи уре диреторгьо биренбируйт, гьерки энугьо эз песой энэ е гоф гуфдиренбируйт, енебуге хэндусденбируйт, руьхшенд сохденбируйт. Кимигьо уре гьечи эри хьэз поюнде э минжи куче у э ки дуьимуьн зен хуфшде э рафдеки, э хэнде-руьхшендиревоз, мипурсуьруйт:

— Эй Эсеф, эхиртуз ник гердо, э же рафде туь гьечи шев-нимешев?

— Хэлгь э ширине хов дери, туь, Эсеф, дурггердо, лилову недерие керге хуно э кучегьо оворей?

— Э е хубе, кеф сохденигьо жиге рафдениге, туь мунош, меллереш веги э хуьшдеревоз!

Чорей эн Дуразе Рушгьо нисе бирембу, эри «дургу» неведироморей э пушой энугьо, гьемише е вогьне миёфд, гогь мугуфди эзугьо, пире холешуре эз некуми эз шугьэм гирди, эз хуней энугьо одоми оморебу, эдее э у эри сер кешире рафде: эри екиге мугуфди, данай энэ эз нэхир невогошди имбуруз, эдее э чул рафде уре эри гешде-офде те уре гуьрг-женевер хурде, эзуните мугуфди, ки эз ховсуьзи у эдее чуьк-чуьк сохде, гьечи ведиромори эри гешде. Оммо э екиш нисе гуфдиренбу, у эдее э ки дуьимуьн зен хуьшде рафде гуфдире.

Дуьимуьн зен Эсеф жогьилиш бугеш, бирач, сарле, сип-сиегь бу, домбуле чумгьо бу. Оммо уре е кефел, е гьолинде десгьо-занигьо вебу, Дуразе Руштгьоре имид бу, ки у эри энэ ченд гIэилиш мизендуь гьич хэсдеи, вомундеи недануьсде. Аснат кор сохдембу уборщица э сельмаг, уре не гIэил бу, не кес-куьмсе, ю э тэхьноле зигьисденбу.

Аснат е овоме зен 'бугеш, дануьсденбу, ки хьовуй эн шуьверлуье зен бире омбар гIэйбе кори, серкушини. У шеш мегье гIэруьс бу шуьвер энэ муьрденге. Имогьой и ченд сал у бие зен бу. Уре имид бу юре е бие мерд, бебей эн гIэйилгьо семе михогуьу гуфдире. Оммо салгьо эдембу оморе рафде у гьечу бие зен умндебу. Уре и песини салгьо дие унгъэде дерд бие зен мундеи негирдебу, дерд гIэйил нисдин хуьшде гирдере хуно. У турсирембу, ки э пире руз хуьшде у мумуну куксуьз, енебуге духдерсуьз, гьич екиш э у дениширегор хьол-руз юре дануьсдегор, хэбэрвегирдегориш белки небисдоге. Унегуьре Эсеф теклиф сохденге эзу, у дуьимуьн зен энэ бу гуфдире, Аснат энжэгь эз хотур эни кор рази бисдо э теклифи энэ.

Оммо и дуразе руш эн Эсеф, вишере хуно 'бугьо, зэхьлей эн

жогъиле зене берденбу. Сер ебо рушгъой эн Эсеф э гъутине, жендек энү расире, муй эн жендек Аснат биз-биз биренбу, гуйге э у е муйлуье вэхъш, хъэйву расиренбу. Песде, и хэсде, шелгъэме руш энү, муйгъой эн комики э гъэд эни песини салгъо нимелит сипи биребу, лап пир сохденбу Эсефе, у е дегъ-бисд сал эз гIуьмуьр хуьшде келе веди биренбу. Унегуьре гьетте э хъэлов дегешде пушой хисире, Аснат моно сер энуре э сер гъужогъ хуьшде, сер мигрд эки-эки, аста-аста сипре муйгъой руш энуре эри ведешенде, Эсеф жогъил веди бу гуфдире. Эсеф э и войге, сижей зен хуьшде дегмиш нисе биренбу. Уре имид бу, ки чуьтам хэсде више эз тектук бурра бивегъо дор э теверевоз ниварасуьге, гьечу эзу векенде сипре муйгъо руш ю сейрек нибу. Оммо е ченд мегъ гирошде бэгъдо Эсеф э дуьлпесоиревоз эдембу дире, чуьтам жогъиле зен энү э сипре муйгъоревоз ээки сие муйгъореш ведешендениге эз руш энү, лап сейрек сохде уре.

Дигъбонигъой энуре, гьелбет, хэбер небу эз ижире кор. Унегуьре, угъо диренге, чуьтам и шелгъэме руш эн Эсеф э нимелитиш немундиге, куьгъне, туьр-туьр бире жаруре хуно бириге, лап омбар мэхътел мундут. Кимигъо гьечи, недануьсде сеbeb эни коре мугуфдируьт, ки э руш эн Эсеф чум расири, эз «чум» бири у гьечу, егIни, ижире бэхдевере, шелгъмлуье руш эхир-эхириш чум-гIэинорэгI нерасире нибисдо, гье эзу товуней и руш энү э и хьол расиригъо. Кимигъойге мугуфдируьт, ки у гофгъо-хэбергъо, чум-расирегъо — гьеме дургуне ихдилотгъоют. Э хъисобевоз э руш Эсеф е гIэзор, е беде гъутури офдори, унегуьре муйгъой руш энү эз хуьшде эдее офдере гIэре-недоре, волговуш-хэзон бире велгъгой эн дор э вэхд поизире хуно. Бируьт ужирегъош, э руьхшенди-мэхсеревозиге, енебуте эз расдеки, мугуфдируьт, ки рушгъой эн Эсеф туь-туьр бири эз фикир, шев бегъем нэхисирегъо, э хуьшде зиэдие гуж-зуэхъмет венорейгъо, егIни, зарифат нисди одоми э келе мерди дуь зен хосде, сикегъо, назгъо, серкушигъо, гумегуь энугьоре шинире, вегирде, дуь зене э рэхъ берде...

Е гиле нимешев, е шеш мегъ гирошде бэгъдо эз Дуразе Рушгъо гъолинде Аснате хосде эйлеревоз, у сэхд хисиребу, э ширине хов добу, юш чуьте лап хэсдере хуно бу. Аснат гьетте у мижей чумгъой хуьшдере сэхд сохде, имишевиш, де шевгъойгере хуно, венно сер эн Эсефе э сер зани хуьшде. Оммо гьейсэгIэт э дес эн Аснат е келе гъэйчи, пешм эн гусбенде чиренигъо дебу. Аснат дениширенге диренге, ки шуьвер энү эри э гъэд эни шеш мегъ муйгъоре ведешендеи эз рушгъой энү, сейрек сохдеи уре, е доне гоф э у нисе сохде, эри энү гьечи омоки, эгенер у эслогъ темиз сохдге сифет энуре, увэхдиш Эсеф э у е гофиш нигую. Гье э ижире имидиревоз Аснат сер гирд эри э гъэйчиревоз эз бине чире руш эн Эсефе. Гье и вэхди Эсеф эдембу хов дире. Э и хов Эсеф миденишуь мивинуь е ниме-тараф руш ю сипсипини, сипре булуте хуно,

е цимейге — сипсигьы дурей эн тове хуно. Зенгьой энү гьердүь величирет э руш энү. Жогьиле зен э дүь десиревоз эдее кешире эз бине ведешенде сипи гьисдигьо нимей руш энуре, у жогьил ве-дибу гуфдире, суьфден зен ю эдее э лап келе зарбевоз кешире эз снегь гьисдигьо нимей руш энү, эз жуьк ю ведешенде, егӀни у ди-еш пир веди бу гуфдире. Неденишире э хьэройгьо, нифригьо ве гьелебулегьой эн Эсеф угьо эдембириуьт э биннсофиревоз кешире ведешенде руш энуре. Гье у туьтем, кейки Аснат песини муйгьой руш эн Эсефе эз бине э гьэичи зереки, Эсеф бирден эз некуми хэ-бер бисдо, буз эн гьэичи, гьуигьэ хуно расиреки э сифет энү. У гье усэгӀэт дес кеши э сифет хуьшеде. Денишире диренге, ки э си-фет ю эслогь руш невомунди, э иловлей сипре болуш чире му-гьой руш энү вор доре пешме хуно дечири, у гье усэгӀэт чумгьо-ре фирегь сохде, э мэхьтели ве дуьшмениревоз дениши э жогьиле зен хуьшеде. У э дес энү диренге гьэичире, гье усэгӀэт вараси чуь кор овурдиге зен э сер руш энү. Э гӀэдотевоз те у кишдире не-шенуь, хьомол руш ние чинуь.

Эсеф э дуьлпесоиревоз дес зе э сифет, чуней хуьшеде. У дануьсд-ки э сифет ю эслогь руш невомунди, гьеебо сегьм шиши уре. Эз елойге уре лап келе хуьрш веромо э сер дуьимуьн зен хуьшеде. У гьеебо, эбрэгь гезире одомире хуно, вэхишд эз жигей хуьшеде, э зарбевоз ведешенд эз дес энү гьэичире, шенд э сер Аснат, песде э нифри, хьэроевоз ведарафд зурн-зури эз хуне.

Эсеф теретэгӀди, серсуре хуно эз ки Аснат ведироморевугьо вэгӀдо, шев эзниме гирошдебү. Хурузгьо эдембириуьт гӀуьгӀуь зере. Эсеф гьетте эз ки Аснат ведироморе, сер гирд серсуре хуно, теретэгӀди эри видовусде э лой хуней хуьшеде, э кин суьфдеи зен. Э куьнигьой хуней энү, э гӀэрелугь тенге куче гьемин гье и вэгӀ-дой кура биребириуьт эз гьемей дигь сеггьо э «гӀэруьси сеги». Эсеф эз сери-суи хуьшеде видовусде-видовусде шиши дарафд э суруй эн сеггьо. Угьоре эзи нэхэберекие, чепгьуние шишире диромореи энү, лов сохдеи «гӀэруьси» энугьоре омбар гьэгьр омо. Кими сеггьо дендугьоре гьижичи сохде, гуйге хэндүьсде э Эсеф, гьов кендүьт раф-дүьт э сер энү, э хуьршевоз хьов-хьов сохде-сохде. Угьо ведебур-рурут Эсефе эз гьерло. Эсеф эз ки Аснат э видовусде ведиромо-реки, эз теретэгӀди ве билбули дуьл хуьшеде, фурмуш сохдебү гьир-мизине кишди хьомолире эри бесде э кишд хуьшеде.

Кишди гьейсэгӀэт э дес энү дебү. Эсеф терсире, сеггьо юре гӀэнже-гӀэнж мисоху, э жигей чубугь сер гирд эри э кишди хуьш-деревоз пиш сохде угьоре. Эзи кор энү сеггьо гуйге диеш муйгьой гердене, эн жежуьре хуно, тик сохде, лэгӀэре пара сохде, гьудур, хуьршлуь бисдорут. Дүь сег, лап зобу бед бируьтгьо, дендуре де-норуьт э кишли эн Эсеф, сер гирдүьт эри кешире уре, чуьтам эз е генд минут пушо э хов, зенгьой энү эз дуьло рушгьой энуре гир-де, э хуьрш ве зарбевоз кеширенбириуьтге эри эз бине ведешенде.



Чорей Эсеф небисдо, ведешенд кишди хьомоли хуышдере эз дес хуышде, дегышд э лэглэй эн хьуыршлудье сеггьо. Гьемей ю эрэгъ, шуш нефас гирде, э сифет ю руш невери, э кишдию — кишди хьомоли невери, эз песой ю сеггьой дигъ келе-келе равуысде равуысде, ү эз пушой глэжел-молжомут вирихугьоре хуно, видовусд э лой хуней хуышде, э ки кувъгъне зен хуышде...

## ВЕЗИР ЭН ХОН ТАБАСАРУ

### Ихдилот-легенда

Гьечи си-сивпенж километр дур эз гъэдимие шегьер Дербенд э тараф Юг, э глэрей хэсде вишегьо, савзелудье мержгьо ве лугьонде гъубигьо мескен зери дигъме Нуыгди (Муышгьур). Нум эни дигъ гуынжо омори эз гъушей эн дур гофгьой тати — «нуыге дигъ» — «тозе дигъ». Ки ве кей бине нориге и дигъе, эйчуь уре нум норетге «Нуыге дигъ» э товун эни кор эриме ихдилот сождебу бебейму ме гьеле глэйл гьисдики. Песде шиновусдем ченд бо эз келе мердгьой дигъ иму э товун эни глэлемете игидлудье ве трагическы гъозие, комиреки э гъэд эн ченд сад салгьо эз эрхэ те эрхэ дошдет э ёр ишу одомигьой эн дигъме. И гъозие эз зуревоз э лэглэй дигъбонигьойме-муышгьуригьой чаруысди э легенда. Оммо э гуфдирей энугьоревоз гьеме э и легенда ихдилот сохде оморенуыгьой коргьо — эз расдиш бире коргьой.

## ЗУЛУМКОРЕ ХОН

Лап эз дуре гъэдимие вэхдгьоревоз гьеле те Абумуслим — сердор эн гъушунгьой халиф Бэгъдоди оморе э гъушунгьой хуышдереvoz э Догъисту — келебебегьой эн келебэбегьойму — эн муышуыригьой зигъисденбируыт э еки эз дигъгьой эн Табасару э табасаранигьоревоз эеки.

Лап рачуыт, глэлеметуыт догъгьой эн Табасару. Эгенер э женнет гьисдуытге догъгьо, угьо э хьисобовоз ухшешуыт э догъгьой эн Табасару. Дуышгьой эну вараисдеуыт э савзелудье мохберлудье гиёвгьоревоз, жуыр-бежуыре, ранги-берангие тов-товие гуылгьой чулиревоз, гъиге дегирде оморет э раче холинчегьоревоз, бофде оморетгьо э усдое селигъэлудье десгьой эн зенгьой энинжоревоз. Вишегьой Табасаруре э вэхд васал эз гуылкенде богъгьо тефиглэйт нисохи — ингъэде э вишегьой энугьо емишдоргьо веруыт. Белки эзу товуней инжо э и вэхди эз себэхъ е пертовуш бире те лап гъэргъи шев невомунде э хъэвесеvoz хунденуыт буылбуылгьо. Белки гье эзу товуней инжо омбаруыт эшгълудье ошугъгьо, мэглнихунгьо?

Ки хурдиге глов эз билсгъгьой эн догъгьой Табасару — гуйге у глов зуьм-зуьме хурди — гьечи темиз нуьгърере хуно, палаш — гуэгире хуно, серин — вор-вори себэхъире хуно гьисди глов энугъо

Гуфдиренуьт, ки худо суьфдеч одомигъоре — Одом не Хьоворе — офиренте — женнет э асму небу, э хори бу. Ки дануьсде, белки гьемин гье у женнет догъгьой Табасару бируьт.

Дуьл хэлгъ энинжош верзирени, хумнеи э гуьлишоне хорию. Дуьл энугъо фирегъи, були, бегъерлуье доре хуно э вэхд поиз, темизи гловгъой билсгъгьой энинжоре хуно. Гъуногъдусци эн табасаранигъоре гъэдер нисди. Лап беде усоле гоф э лэгъэй энугъо гьисди: «Дер хунейтуьре гьич гъуногъ мекуё».

Келебегьгьой эн бегьгойму, зигьисденбируьтгъо э и дигъ э табасаранигъоревоз, э миллет ишу гуьре бешгъэ бируьтгеш эз угъо, оммо гьисмет зиндегуни энугъо бешгъэ небу, гье ежире бу. Дуьлесди энугъо — е дуьлесди бу — зулум, муьрс эн бирэхъме хон, зиндегуни энугъоре э и гуьзеле хори тэхъле явшоне хуне тэхъл сохденбугъо.

И гъозие-гъэдер, э товун комики ихдилот сохде оморени, биребу эзи е ченд сад сал пушо. Гьемин гье у вэхдигъо хон эн Табасаруре е ённуьшию бу эз одоми эн хэлгъ иму Довид гуфдиренитгъо. У омбар данандее одоми бу. Э гъуьмуьр хуьшде у омбаре хоригъо, вилеетгъоре гешдебу. Омбаре гъозие-гъэдергъо дануьсденбу эз торих ве зиндегуни эн жуьрбежуьре хэлгъгъо, эрхэгъо, эз товун гъэдотгъо, дивэгъгъо, вердуьшигъой энугъо. Ченгъэде у дануьсденбуге овосунегъо, мэгъинигъо, ихдилотгъо — угъоре гъэдерхьисоб небу.

Шохъонгумгъо у мухшул сохденбу хоне э раче ихдилотгъой хуьшдеревоз, э саз зерен, рач мэгъини хундеиревоз. Песде у лап хуб днуьсденбу кор табиби-жерэхъире, эз коми савзе-битмиши чужире дерму эри чужире гъэзор, эри чужире яра хьозур сохуге. Песде юш, Довид, эз сер-сифет, буй-бала е екелуье, обурлуье одоми бу, уре хубе шэхс вебу. Сифет энугъо очугъ бу, мигърову бу, оммо чумгъой ю — екем могъбуле хуно бу эз омбар дануьсдеи ве эз омбаре синемиигъо гирошдеи. Сес энуре, гоф энуре одомире шиновусде хьэз оморенбу. Эз хотур эни верзирение коргъо, хосиетгъой энугъо, хон уре эз хуьшде куьнд сохдебу, ённуьши хуьшде гирдебу уре. Э гъэд хэлгъ уре «везир» гуфдиренбируьт у везир эн хон небугеш. Гьеме уре хосденбу. Э ужире хосдеи хэлгъ у верзирениш бу.

Е гиле хон хуб хурде, кефлуь, сифет ю гуне доре эз шороб, ёнбоки дегешдебу э сер тэхче, э гуьле-гуьле холинчеревоз дегирде бугъо. Хон гъул хуфшдере э сер нерме ламбалуш веноре, эдембу гуш веноре овосунере, комиреки гьейсээт эри энугъо эдембу их-

дилот сохде Довид, чорзани зере нуьшде э хори, э сер холинче, э куьнди бонилей эну.

Шев эдембу нима буре, кейки Довид варасд ихдилот хуьшдере. У эз хон ихдире хосде, вэхуьшд э пой. Сер зере э хон, «шевтуь хуш бу» гуфдире, у омо э ён дер. У пушой эз дер утогъ эн хон вадарафде, бирден хон огол зере, поюнд уре.

— Пой, Довид, — гуфди хон.

Довид чаруьсденге э лой хон, у э тигъэтевоз денишире э сифет эну, г'эжойбе жирере хуно лове э хэнде веберде, муту:

— Довуд, ме шиновусдем туь эдее эри духдертуй г'эруьси сохде... Ме гене шиновусдем, духдертуй, иншалла, рачи Лейлире хуно?..

Эз расдиш и хон шиновусдебугъо хэбер дуз бу. Е теке духдер эн Довид гъечи рач, гъечи гуьзел бу, одоми уре е гиле диренге, е гилейгеш темэхъ сохдембу эри дире. У е теке духдер энижире бебе бугеш, текебур, сикелуй небу, хъэменд, г'эсуьлменд, кордан, кордусд бу. Оммо одохлуй энуш — Джумшуьд э у верзирени бу. У эз сифет рач бу, эз жендек — екелуй, эз дуьл — жуьрг'эт. Оммо Джуьмшуьд не дигьбони эн Довид бу, не эз умогъ эну. Уре зен табасарани зендебу. Бебе не дедей эну муьрдебируьт у гъеле чуькле г'эилле гьисдики э вэхд эн е мергие г'эзор, эз комики у салгъо омбаре одомигъо муьрдебируьт, молгъэре пуч биребу.

Бибей Джуьмшуьд куньде дусд, гъуногъ эн Довид бу. Э иму е чуь ние сохде эри куьнде дусд, г'эзие гъуногъ хуьшде. У э муьрдеки э Довид дусд хуьшде тапшуьрмиш сохдебу эри етим мунде чуькле г'эиллей ю кумек бу, э жигей бебе бу. Эзумогъойлеревоз Джуьмшуьд зигьисде, келе буребу э хуней Довид э е теке духделей энуревоз — Шушеневоз.

Угъо чуькле г'эиллегъо гьисдики, гьерчуь дануьсденбируьт ишу е бирор е хэгьеруьт. Гьердуьй энугъо Довиде бебе гуфдиренбируьт. Оммо угъо келе биренге, дануьсденге, ки ишу бирор не хэгьер нисдуьт, куьнде гъовумгъош нисдуьт. Оморе-оморе дусди энугъо чаруьсд э келе муьгъбет эн Лейли нен Меджуне хуно.

Джуьмшуьд не Шушен хъэрекет сохденбируьт эри пэхъни сохде муьгъбет ишуре эз Довид. Оммо у ужире одоми небу эри недануьсде, чуь гирошдеге эз дуьл г'эилгъой эну. У э е дес гъул эн Джуьмшуде гирде, э е десиге — гъул эн духдер хуьшдере, мугу:

— Г'эилгъойме! Ме эдее диренуьм ишму дуь екире лап хосденит. Эз гъеме бэхшгъо, никигъой эн гуьлом — муьгъбет эн севгилгъо лап келе бэхш худоини. Э ме лоигъими э гъэвл муьгъбет ишму эри недарафде, войгей эн жовоне дуьлгъошмуре эри эжиге неовурде. Эз имбурузевоз э пушой худо эдее мэг'луьм сохденуьм ишмуре одохлугъой еки. Худо гъишдге, э сер поиз г'эруьсишмуре минишунум.

Ини имогьой, кейки духдер энү миёсде бире зеп эн одохлуй хуышде, хон чүь кориге пуьрси гьейсэгIэт э товун энү.

— Эри, огьойме хон, э кумеки худоревоз ме эй зуригьо, э сер поиз эдее гIэруьси гIэилгьоймере нишунденуьм.

Хон вэхуышд нуышд э сер тэхче, э разимендиревоз жумунд сер, песеде мугу эз Довид:

— Сер поиз — омбар хубе вэхди эри гIэруьси: тозе гIорд — э кендугьо деригьо вэгIдо, тозе шоробгьо — э хуьмгьо.— Песеде хон э синемиширевоз денишире э буй-балай ённуыши хуышде, суьпле хэнде сохде, мугу: — Оммо туь фурмуш месох, Довуд худо, э товун комики туь гьейсэгIэт э ёр оворди, э звер, э асму бурра шеригIэт хуышдере, ме, хонтуь, огьойтуь — инжо, э хори.

Э дуьл Довид гье усэгIэт шек омо, зеде расирере хуно бисдо. Оммо у хуышдере э дес вогирде, хуышдере э шек несохдеи веноре, олхогьине хуно мугу:

— Бэхшлемиш сох э ме, огьойме хон: белки эз салгьо, келе мердима эгьуьлме е кем куьт бири, ме неврасируьм эйгьом гофтуьре.

Серхуше хоне гуйге хэнде омо эзи гофгьой эн ённуыши хуышде. У ён дениши э лой Довид, хэндуьсд, томошее гоф шиновусдере хуно.

— Туь, Довуд, эгьуьлменде одомини. Эри эгьуьлменде одоме э эйгьомевоз гуфдире гофиш весси эри варасире мэгIной энуре. Эгенер туь эз расдекиш наварасириге эйгьом эни гофмере, гуш вени—варасунум э туь: суьфдеи шев гIэруьси, те ебо духдертуь гелин-гиёв бире э одохлуй хуышдеревоз, уре биёрит э киме.

Ранг Довид гье усэгIэт зерд, эз сер ю черх рафдере хуно бисдо, гуйге хори лерзи э зир пой энү, у гьейсэгIэт мофдону. Оммо у хьэрекет сохд эри сэхд поисде э поисдебугьо жигей хуышде. Довид ю хуышдению неки дуьруьсде, гьемчун жуьргIэтлуье, уьткеме одоме бу. Э пушой эн е одомиш у сер нефушенди, сер незери, э пушой эн огьой хуышде — эн хон бэгьэй. Оммо э минет, э сугьразани э пушой эн хониш не поисди е гилеш. Оммо гьейсэгIэт и сегьмлуье хьэёсуьзе гофгьой хоне шиновусджи, дуьл энү лерзи, велгьой эн дор эз шэхтей кулоке хуно. У офдо э пушой хон э сугьразани, э десевоз эз сипи биренбугьо руш хуышде гирде, минет сохд:

— Огьйме, хон, омбар минет, елвор сохденуьм э туь: рэхьм бер э и сипре рушме, беднум, биёбур месох мере, гIэилгьоймере. Ме ингъэде салгьо туьре гьурлугь сохдем, угьо семе биёвгу э пушойтуь. Духдерме эз гьугь дохьор сенгьи мишенуь хуышдере э лугьонде чилокон, оммо и номусе э герде нивегируь. Домормеш, Джумьшуьд, комики эриме кукмере хуно гIээзизи, хуышдере э гIэжел мидуь, оммо ижире биёбурире эз екиш нивотову.

Довиде гене гуфдире воисденбу: «Ме хуышдениме герден эн

е теке духдермере э хэнжелевоз мизенуым, уре э китуь овурдеижон...», оммо не гуфди. Гьеле и песини гофгьореш у негуфдиреки, хон, комики хуте не бири э сер гоф ю гоф овурде биёв, войгейюре эжиге неёру, эгенер у беде, суруле войгеш гьисдиге, омбар гюси, хуьршдлемниш бисдо эз гофгьой эн Довид.

Хон вэхуьшд э пой, хуни-хуни, э бирази, дуьшмениревоз дешире э сифет Довид, мугу:

— Эгенер ме гуфдирере хуно небисдоге, сер екишмуш э герден ишму нивомуну!.. Имогьой вогорд э хунейтуь!..

Довид вогошд э хуне ранг ю рафде, гьолок, нечоггэ хуно. Джуьмшуьд э гьечи уре е гилеш недиребу. Унегуьре у э мэхьтели ве дуьпесоиревоз пуьрси:

— Бебе, хэйр гердо, туь е жирейгере хунои, э сифеттуь ранг невери?

Зугьун эн Довид нерафд эри гуфдире э домор хуьшде эз чуй товунейте гьечи ранг энү зерд, хьол энү эн нечоггэ хуно, негуфди чуй гуфдиребуге бирэхьме, чумшуре хон э у елэгIэзойге, пушой у э хуне вогошде.

Довид гьечу э у е гоф негуфдире, омо нуьшд э сер нимдер, сере дулла гирде. Джуьмшуьд виники уре гьечи, э келе дерд, хэёл демунде одомире хуно, дубореш, себореш пуьрси эйчуьниге хьол, гьовой энү гьечи.

Довиде гьувот небисдо эри гуфдире гьеме гофгьоре хон э ю, ю э хон гуфдигьоре, гуфди энжэгъ хьэёсуьзе войгей эн хоне э товун одохлуй энү.

— Бебе!— гье усэгIэт сэхд яралуь бире одомире хуно хьэрой вегирд Джуьмшуьд, хэнжеле, э кишд ю вебугьоре, эз гьоб те немелит ведешенде.— Ме гьейсэгIэт мишишуйм мидарам э дервозей хон. Ме уре себэхьэ э чум дире нигьилуьм! Имишев эзи дуь одомиму екиму биё мируь!..

Довид лап дуьлпесо бире эзи гофгьо, гьелебулей эн Джуьмшуьт, зури-зури вэхуьшд эз жигей хуьшде, дес энуре сэхд гирд.

— Пой, е кем сабур сох,— э гьаежониревоз келе-келе мугу эзу Довид.— Туь жогьили, туьнди, туьре песой эн коре дире нисе воисде. Гье гуком, туь имишев куьшди хоне, оммо гье себэхь э жигей энү миньшуь э тэхд е кук, енебуге бирор энү, туьш, одохлуйтуьш пуч мибошит.

— Мере эри эни кор дэгIно мезе!— мугу Джуьмшуд.— Ме герденмере э зир тевер миденуьм, номусмере нигьилуьм хуьрд сохде!

Довид рази бу э Джуьмшудевоз. У э жигей Джуьмшуд юш гьечу мисохд, эгенер э сер номус эн одохлуй ю, зен ю гьэсд сохдегор мибисдоге, гье гьечу мигуфди. Оммо те Джуьмшуд хоне куьшде, белки хуьшдени энү куьшде омоге эз дес нуьжергьой эн хон, эн одомигьой энү. Довид э чуй гужигьо-хушигьоревоз поюнд уре

эзижире хэтое кор, гоф, шовго до уре ёгъин хилос мисоху гуфдире одохлуй энуре эз дес зулумкоре 'беднефсе хон, чуйтам хуг вишей асмуре нисе диренге, у гъич е вэхдиш дире нидануь ёр энуре.

## СЕВДЕГЕР НЕ ТУТИГЪУШ

Эзу шевевоз giroшд се руз се шев. Хон фирсо нуькер хуьшдере э хуней Довид, буйругъ до биёв гуфдире э ки ю. Довид гъе усэгIэт гIэсб хуьшдере егъер веноре, омо раси э ки хон. Гъетте у дироморе э ки хон, сер зе э у, руз эхэйрбу до уре гъечи, гуйге эзу е бикефи, дуьлмундеи юре небирере хуно. Хон э синемиширевоз денишире э ённцъши хуьшде, суьпле хэнде сохд мугу:

— Туь, э хьисобовоз, эз ме гьелеш гъэгърини?

— НэгI, 'огъойме, хон,— жугъоб до Довид.— Худо чуйтам нуьвуьсдиге гъе гъечу биренини.

Хон и гофгъой Довиде вараси гъечу, чуйтам юре воисдениге, егIни, мибу гъе гъечу, чуйтам хон гуфдириге. У э мигъровуние севез теклиф сохд Довиде э юревоз э сер суфре эри нуьшде, пезде е «ширине ихдилот» сохде эри энугу.

Хон те сурои чи, ичку хурде бэгъдо, гене дегешд э сер гэхчей хуьшде, гьуле э сер келе нерме ламбалуш веноре, э гузетиревоз дениши э лой Довид.

— Гуш вени, огъойме хон, э е вилеет е келе севдегер зигъисденбу,— гъечи сер гирд Довид ихдилот хуьшдере.— У гьемнише эри е сали-дуь сали э кервугъой хуьшдеревоз, ченд жире молгъо бор сохде э кул энугъо, рафденбу э де вилеетгъойге эри севдегери сохде. Э унжо молгъой хуьшдере фурухде, диеш девлет хуьшдере зиёд сохде, вогошденбу э ватан хуьшде.

Е гиле у пушой гене э кервугъой хуьшдеревоз молгъо 'берде э дуре вилеетгъо, у эз зенгъо, гIэилгъой хуьшде пуьрси эри гьер энугъо чуйжире бэхш биёруге эз у рафденигъо вилеетгъо.

Э хисиренигъо вараюнде утогъ эн севдегер э гъэфес суьрхи е раче ранги-барангие тутигъуш дебу, гоф одомире варасиренигъо, одомире хуно гоф сохденигъо. Гъэфес энугу эз минжи сергъови хуне дуллу бу. Пушой рафде э сафар севдегер эзуш пуьрси, чуй бэхш биёруге эри энугу эзу дуре хоригъо.

Тутигъуш э могъбулиревоз дениши э сэхъиб хуьшде, пезде мугу:

— Согъ боши, огъойме, мере гъичиш герек нисди, шор рафде, шор 'биёвош. Энжэгъ мере е войгеи, дилеги, эгенер мидание уре бегъем сох.

— Гу, чуй дилегиге туйре, ме ёгъин бетъем мисохум,— мугу севдегер.

Тутигъуш сере жумунд, песе мугу:

— Э Индустон э гъэд дерьёгъ е гиргине хорини. Э минжи энун хори е келе фирегъе дереини. Уре «Дерей гъузуьргуули» гуфдиренуьт. Унжо бирорме зигъисде. Эз ме шолум ди эри бирорме, гу, ки ме согъ-саламагуьм, э гъэфес суьрхи зигъисденуьм.

Гирошд дуь сал, севдегер э кервугъо, гъульгъой хуьшдеревоз вогшд э ватан, э хуней хуьшде. Эри гъеме хуненгъой хуьшде у бэхш овордебу, ишу хосдебириуьтгъо. Оммо е ченд руз гирошд эз севдегор э хуне вогшде эйло, у э тутигъуш е гоф нисе гуфдиренбу. Эхир тутигъуш тоб недо, мугу эз севдегер:

— Огъойме севдегер, и ченд рузи туь эз сафар оморей, оммо туь э ме е гофиш нисе гуфдире, бирейми туь э «Дерей гъузуьргуули», дирейми туь унжо бирормере, дорейми туь эз ме э у шолум?

— Эй гъушме, мере нисе воисденбу дуьлтуьре гурунд, хэреб сохде,— ох кешире, э дуьлсухуниревоз мугу севдегер.— Ме бирем э туь гуфдиренигъо «Дерей гъузуьргууль», дирем унжо бирортуьре, гоф сохдем э уревоз, эз туь хэбер дорем уре. Оммо ме гъетте гуфдире э у туь э ме гъэдэгъэ зеребиригъо гофгъоре, у гъе усэгъэт эз луьгей дор офдо муьрд.

И жугъоб эн севдегере тутигъуш шиновусденге е келе жив зе, ноле зерере хуно, песе гъеэбо шуьл бире, офдо муьрд. Севдегер вокурд дер гъэфесе, вегирд гъуше э дес хуьшде, мивини, герден гъуш гъири, жендек ю — шуьли, чумгъой ю — сэхди, эз расдиш муьрди. Севдегер омбар мэхътел, могъбул бисдо. Дие чорей энун небисдо, ведировунд тутигъуш хуьшдере э богъчей хьэът шенд.

Гъетте севдегер тутигъуше шенде, у бирден зинде бисдо, парзере, варафд нуьшд э луьгей эн дор. Севдегер омбар мэхътел мунд.

— Эй тутигъуш,— мугу севдегер,— ме гъерчуь дануьсдуьм туь муьрдей, оммо туь — зиндеи?! Вогорд э гъэфестуь. Ме хуте бирем туьре гъемише э гъэфес суьрхиме дире, туьре томоше сохде, сестуьре, гофгъойтуьре шиновусде.

Тутигъуш мугу эз севдегер:

— Ме дануьсденбириуьм туь мере эз сери хуьшде рэхъо нидигъоре, эз гъэфес ниведекинигъоре. Оммо эри гъуш лигей эн дор эз гъэфес суьрхи зиёди. Гъэземете эз суьрх не нуьгъре вокурдигеш — гъэземети. Мере худо гъэнетгъо дори ме э гъово парзенуьм гуфдире э зир ковре асму, чумгъо дори — товуши чуьшмере винуьм гуфдире, дуьл дори — шори, хьэз эни гъуьломе винуьм гуфдире. Ме гъушиш гъисдуьмге — зинде нешумоюм. Оммо туьре дердме, фикирме негирди. Бирорме, комиреки туь диречири э «Дерей гъузуьргуули» немурдебу. Туь э у хэбермере э у доренге, у хуьшдере э пушойтуь э муьрдеки веноребу. Песе меш

уре хуно хуышдере э муърдеки венуым, туь мере шени, э и те-гьеревоз хилос бошум эз гъэфестуь...

И гофгьоре гуфдире, тутигъуш, гъэнетгьой хуышдере лов сох-де, мэгІни хунде-хунде, учмиш бисдо.

Хоне омбар хъэз омо эзи овосуне. Уре э севдегер хэнде гирд.

— Дениш ебо, и чувкле гъуш, э гъэфес деригьо, эгъуылменд ведиромо эзи гуыломе гешде, ченд хоригьо, вилеетгьоре дирегу-гьо севдегер,— сере жумунде, хэнде-хэнде гуфди хон.— Омбар энтигъее овосунеи, Довуд. Эри эни овосунейтуь ме себэхь ми-гьилуым туьре е тозе чухо э везнегьой нуьгъреиревоз бэхш доре.

## ХОВ

Гурунд бире эз хурде чигьо, шоробгьо, хон гьетте ённуышию До-вид рафде, чум ю э хов варафд. Согъ шев у эдембу жуьрбежуь-ре ховгьо дирe. Оммо пушой себэхь у е хов вини, эз комики у делуьре хуно бире, хэбер серсон бисдо, гье усэгІэт буйругъ до э нуькergьой хуышде буравт дир несохде Шушен духдер Довиде биёру э ки ю.

Хон виниребу ижире хов. У дегешдебу э тэхчей хуышде, кей-ки киниге духдер Довиде парталгьой гІэруьсвори э тен ю вери, эз гьул ю гирде, дешенд э утогъ хон, дере э песой хуышде сэхд сохд. Хон зури-зури взхуышд эз жигей хуышде, куьнд омо эз дух-дер, чодур гІэруьсвори энуре вокошире эз сифет эну, дуьл ю гье усэгІэт билбуле хуно бисдо.

— Машаллагь! Машаллагь!— дуь гиле гуфди хон, сере жумун-де, чуме эз духдер невегирде.— Туь эз ме шиновусдегьо, тэгІриф дорегьо — садвойне рачи. Э туь лоигъи энжэгъ э хъэремме, эн хон зигьисде!..

Э и гофгьоревоз хон гьулгьой хуышдере лов сохд эри гъэл гир-де уре, бирден э гІэрей гьулгьой эну духдер эз нокуми э тутиг-гъуш чаруьсде, пар зе е дуь гиле э иловлей сергьови хуне. Хон, махьтел, серсуре хуно, десгьоре гьово гирде видовусд э песой эну, песде тутигъуш омо э ён пенжере, э гъэнетевоз лет пенжерере во-курде, учмиш бисдо рафд э гьово.

Эз дервозей хон те Довид «везир» зигьисденбугьо дигъ е ним-сэгІэт рэхъ бу. ЕсэгІэтиш негирошд, хон фирсорегубгьо одомн-гьоре э песой Довид ве Шушен, шуш-нефес гирде вогощдуьт.

— Огьойму хон!— гуфдируьт угьо, э пушой эну офдоре.— Иму буйругъ туьре бегьем сохде недануьсдим. Э дигъ е доне одоми недомунди, гуйге угьоре эз келе те чувкле хори фуберди, гьич си-рогъ ишуш веде нисди.

Э дуьл хон гье усэгІэт шек омо. У ижире хэбере эз нуькergьой хуышде шиновусдки, э сер офдо гье у туьтем мэгІной шовуне ово-



суней Довиде э товун «Севдегер ве тутигъуш», эри ю ихдилот сох-дэбугъо. Гъеле сер зиѣди гуфдиребу э Довид уре себэхъ бэхш мидуь гуфдире эри эни «энтигъэе овосуне», э дуьл хуьшде хэндубу-дэбу э фурмунде оморобугъо севдегер. «Чуьтам тутигъуш севде-гере фурмундэбуге эз гъэфес энү эри хилос бире, туьш мере гьечу фурмунди, Довуд,— гъэгър кешире, дендунэгъижи сохде, эдембу гуфдире э дуьл хуьшде хон.— Оммо ме эз кун хориси миофум туьре, э гъэжел мидуьм гьемешмуре. Туь тутигъуш нисди, ме севдегер нисдуьм эритуь. Ме — хо-нум!..»

## МЕСЛЭХЪЭТ ЭН ОГЪСЭГЪГЪЭЛГЪОЙ ДИГЪ

Э дувимуьн руз Довид эз ки хон оморенте, у огол зеребу келе мердгъо-огъсэгъгъэлгъой дигъе эри меслэхъэт сохде э угьоревоз. Э гъэрей келегъой жэгъмет, комигъореки Довид огол зеребу э хуней хуьшде, дебируьт келе мердгъоймуш эн табасаранигъош.

— Хуьрметлуье келегъой дигъ-жэгъмет!— руй бире э ки энугъо гуфди Довид.—Иму гьеме — дигъ-жэгъмет екиним. Э садсалгъоревоз иму эеки зигъисдейм э руй эн е хори, э зир эн е асму. Гъисмет имуре хуно, гъэдотгъойму екини. Е шоригъо, е дуьлесди-гъои муре, е гужи э гьемейму веригъо — гуж, зулум эн хон, эн гъулпечөгъой энү. Те кей ветовим и зулуме?!..

— Эй везир, туь гуфдире гофгъо дузи,— мугу еки эз келе мердгъо,—оммо чуь сохде миданим иму э гъэршуй зулм энү? Хуькм энү гужлуьни. Хоне ерэгълуье нуькергъои, гуьргъоре хуно бедуьт, гъэзроиле хуно — бирэхъмуьт. Иму гъувотсуьзим э пушой энугъо. Имуре до чорейге нисди эз довом доре, ветовусдеи бэгъэй муьрс энуре.

— Гъисди чоре!— э боворини ве жуьргъэтиревоз гуфди Довид.—Э зофру, эз серхъэдгъой хон хэйли дур, э гъэрей нуькерегъой Самур нен Григоручой, э гъэрей буле вишегъо — хэвлете хоригъой. Угъо дурут эз беде чум эн хон, гъудузе нуькергъой энү. Биѣйт э е дуьл, э е зугъун бошим, эз пэхъники хон ве нуькергъой энү кучмиш бошим э у хоригъо...

Омбар четин бу эри одомигъой дигъ гъишде куьгъне мескен ишуре, хоригъо, хунегъо, жигегъошуре, рафде э нешинохэ жигегъо. Оммо эри гьемей энугъо эзи кор диеш четин бу зулм эн бирэхъме хоне эри ветовусде, омбардеки бэхш жофошуре доре хоне не беггъой энуре, э бигори, э гъовои кемер хуьрд сохде э муьджгъо, махъсуьлтгъой эн хон, ситгъмишигъой энуре ве эн нуькергъой энуре ветовусде.

Гъемн гье у шев, кейки Довид хундэбу эри хон ихдилос «Севдегер ве тутигъуше», мухшул сохде уре э «ширине ихдилот», одомигъой эн дигъ энү, вегирде куч-кучмол ишуре, веноре э гъэребе-

гъо, э буз эн гІэсбгъо, говгъо, гомишгъо расе бесде, угъо шихъне, мэгІ незенуѣт гуфдире, э торики шев вадарафдуѣт эз дигъ.

Довид эз ки хон ведироморобугъо вэгІдо шев эз ниме гиросхедебу. Иловле гъеме сокит гуъмсуѣз бу. Э асму асдарагъо эдебируѣт товуш доре. Угъо е ченд гъозор чумгъоре хуно дениширебируѣт эз унжо э хори.

Пушоте Довид шев-нимешев эз ки хон э хуней хуъшеде вогошденки, уре хъэз оморенбу, те ебо э дигъ дироморе, э кул гІэсб хуъшеде вери, поисде э гъиросгъ дигъ, гуш веноре э гІуѣгІуѣй хурузгъо, оморенбируѣтгъо эз гъер тараф э лугъонде хифлет дебиренбугъо дигъ, э шуѣкетлуѣе сес бирден эз хов хэбер биритъо соворе гІэнл э гуфере. Оммо гъейсэгІэт дигъ энугъо, э комики ѱ эз деде бири, келе бири, э огъиле салгъо омори расири, эжеки мунди гъоврегъой бебегъо-келебегъой энугъо, эжеки гъер сенгъ, гъер дивор, гъер хуне, гъер куънж энугъо шинохи эз гІэилиревоз, гІэизии эри дуѣл энугъо — и дигъ энугъо гъейсэгІэт буши, тигъини, сессуѣзи, гуъмсуѣзи шенде лулей гъуше хуно, сер гъоврегъоре хуно.

Дуѣл энугъо лап буланмиш эдембу бири ѱ дигъ хуъшдере гъечи диренге. ГІэрс э чум вери ѱ песини гиле эз сер гІэсб хуъшеде вери эдембу гиросхеде эз гІэрей тенге пичире кучегъой дигъ хуъшеде, гъемишелуѣгъ, те муърде руз хуъшеде эри дошеде э ёр, дуѣл хуъшеде чигърет энуре, э инжо гиросхидигъо зиндегуни хуъшдере ве эн дигъбонигъой хуъшдере, гуйге нимей дуѣл хуъшдере гъемишелуѣгъ гъишде э инжиге. Песде ѱ эзи гурунде фикиргъой хуъшеде бирден уѣгъ бирере хуно, жеши жилов гІэсб хуъшдере, э зарбевоз гъей сохд уре эри рафде расире э рэхъ дебугъо жэгІмет дигъ хуъшеде.

## ЖЕНГ Э ВЭХД ГІЭРУЪСИ

ЖэгІмет эн дигъ хэйли рэхъ каше те оморе расире э жиге тозе мескен ишу, гиросхеде эз гъэд дереигъо, хэсде вишегъо, кулегъо, гъемишлуѣгъо. Эз шев-руз непоисде омбар рэхъ рафде кун пойгъой энугъо гъэбер зереху, десгъо, сифетгъой энугъо эз телуѣгъой кулегъо, шохгъой эн доргъо гъэрмэгъ-гъэрмэгъ бируѣт, парталгъошу — жундур.

Эхирки э гІэрей фирегъе вишегъо, э гъиросгъ эн Григоринчой угъо офдуѣт эришу гІэмеллуѣе жиге эри мескен зерешу. Хори инжо четъ, бул бу. Э вишегъо омбаре жура емишгъо вебируѣт, э хори — буле гйѣвгъо эри хурдей мол-гъэре, гъемчун хурдение савзегъо: шинг, жуърмуѣсдек, шелбэгІ, сир-гъилогъи, тара. Вишегъо, чулгъой энинжо пур бируѣт эз жуърбежуѣре парандегъо ве хъэйвугъой вишеи, Григоринчой эз жэгІ—могъи, албад, кутум, шулбуд.

Инжо угъо э куънди нуъкере вокурдуѣт дигъ, чор тараф энуре

боруй гилови кешируйт, гъэлебендире хуно сохдуьт уре. Нум эн дигь угьо норут э г'уьзет эн сервор нишу «Довид-Гъэле».

Гирошд е сал эз угьо инжо вирихде оморе эйло, инжо мескен зере. Суьфден гиле бу угьо инжо эз хори бегьер, тозе гендуьм, дуне вегирдебируьтгьо. Эз сие гъуре — онгур эн жуьре тегьенггьо, комики омбар вебируьт э вишегьо, дегирде те лап звери лигегьой кици доргоре, угьо э тозе хуьмгьо, э булиревоз хьозур сохдебируьт суьрке, шороб.

Сал гирошде бэгъдо Довид нишунд г'эруьси Шушен нен Джуьмшуьде. И г'эруьси бу гьемчун миг'ид дуз е сал эз муьрс зулумкоре хон хилос бирен эн жэг'мет дигь. Се руз, се шев э дигь эдембу гъовол-зурнов куфде оморе. Се руз, се шев азаде одомигьой дигь, иллогьки жог'иле кукгьо ве духдергьо эдембируьт шори сохде, вежегьисде, хурде, кеф сохде, дуь екире омбаражбу сохде.

Оммо э сеимуйн руз г'эруьси, гьеме одомигьой дигь э г'эруьси мухшул гьисди, эз некуми шишире дироморут э дигь э кул г'эсбгьо вери е келе десдей эн нуькергьой хон э ухгьо ве бирэхьне шимшуьлгьоревоз. Согъ сал гьулпечегьой хон э буйругьци энуревоз гешдебируьт эри офде, дануьсде э же вирихдетге одомигьой эн дигь э серберэхьци «везир» Довидовоз. У келе шов'го сохдебу эри офде Довид не жэг'мет эн дигье, вирихдетгьо эз зир хуькм, огьоти энуну, гъэзоб овурде э угьо, иллогьки э Довид ве кифлет энуну.

— Бирору! — э келе хьэроеовоз гуфди Довид, руй бире э ки жэг'мет дигь хуьшде. — Эгенер иму пиш несохдимге нуькергьой хоне, хон гьемеймуре э г'эжел мидуь енебуге эз гъэгьр мундегоргьоре диеш э зиьдте муьрс мидешенуь. Имуре де рэхьиге нисди эз е рэхь бэгъэй — те лап песини нефес жун иму женг сохде э нуькергьой хоневоз!

Шоре сесгьой гъовол-зурнов г'эруьси гье усэг'лэт поисдуьт. Э жигей шоре сесгьой гъовол-зурнов, мэг'нигьо, чекгьо оморут сесгьой жевгъ, зенг шимшуьлгьо, божэхь эн зенгьо, гирисдей эн г'эилгьо, нэг'летигьо. Гьемей жэг'мет дигь, эз келе те чуькле хэнжел, ух, тевер, тогьци, буьлуьнг, бил э дес дери офдоруьт э гъэзоблуье женг э нуькергьой хоневоз.

Нуькергьой хон гужлуь, хуб ерэгълуь, э кор эн дов'го хуте бире одомигьой бируьт. Оммо одомигьой эн дигь хьозур бируьт эри муьрде, оммо хуьшдере э дес нуькергьой хон э есири энуну эри недоре.

Омбаре дигьбонигьо<sup>4</sup> Довид пуч бисдорут э и женг. Муьрд э и женг гьемчун одохлуй эн Шушен Джуьмшуьд, комики э келе сегьмсуьзиревоз эдембу женг берде э нуькергьой хоневоз. Оммо эз нуькергьой хониш хэйли одоми пуч бисдо э и женг. Неденишире э и кор, нуькергьой хон гужлуь бируьт эз дигьбонигьо. Э тиге ухгьо, шимшуьлгьошуревоз угьо гьудузе гуьртгьоре хуно раф-

денбируйт э сер эньюо, рэхьм неберде не э келе, не э чуйкле, не э зен, не э гІэил.

Кейки дигьбонигьой Довид, неденишире э жуьргІэти ве игиди энугьо дие вероморе нисе дануьсденбируйт э нуькергьой хон, эдем-бируйт эз гъувот офдоре, бирден гье и вэхди э гІэрей эн женг, сохдегоргьо э кул сие туьнде гІэсб вери, э тен ю сие парталгьой ёс вери, тиже, биренгьинере хуно товуш доренбугьо шимшуьл э расди дес ю дери, веди бисдо духдер. Сифет энү лап рач бу, оммо эзу гуйге гьейсгІэт эдембу гІэтош жесде. Э дес энү биренгьинере хуно эдембу шимшуьл тов-тов доре. ГІэсб энү тиркомуре хуно эдембу рафде эз гІэрей нуькергьой эн хон. Дуразе сие муьгой энү сие бейдогъэ хуно лов бируйт э песой кемер энү. У бу — духдер эн Довид, одохлуй эн Джуьмшуьд. Келе муьгьбет, келе дерд эн гІэзизе севгилию эз дес нуькергьой хон муьрден, желе нэхогьи э кин энугьо, эн угьоре инжо фирсоригьо зулумкоре хон, зурбое жуьргІэт, сегьмсуьзи венгесд э жовоне дуьл энү. У сие булут, кулок пиш сохугьоре хуно, эдембу рафде э сер дуьшме, зэхм зере э угьо, хьэрой, шивен дешенде-дешенде:

— Джуь-уь-ум-шу-у-у-уд!!!

Унг эн сес, буруж энү гье усгІэт лов биренбу э вишегьо, хори-гьо, деренгьо, сад войне гужлуй бире эз угьо.

Нуькергьой хон дире уре, бенг бире эз сес хьэрой энү, угьоре эз нокуми сегьм шиши, дес-пой энугьо куте хуно бисдорут. Хурофотие нуькергьой эн хон гьерчуь дануьсдуьт и духдер нисди, инсон нисди, и хуьшдени гІэзроили, чигьрет духдере вегирде, оморигьо э буйругьи худоревоз эри доре жозей энугьоре, восдоре жун ишу-ре эз товун угьо хун эн хэтосуьзе одомигьоре тигьи сохдеи. Ижире сегьм э дуьл энугьо офдоре, нуькергьой хон, шенде ерэгъ ишу-ре, вирихдуьт песово...

Шушен омбар незитгьисд эз одохлуй ю э хунлуье женг э нуькергьой хоневоз пуч бире бэгъдо. Руз, шев у э сер гьоврей энү бу. Дерд, гІэрогьо хуьшг сохд жендек энуре, чарунд э сенг э хумней ёс гирде духдер э сер гьоврей гІэзизе севгили хуьше.

Гуфдиренуьт, омбаре салгьо и духдер сенгьи гьечи мундебу э сер энү гьовре, те кейки эхир-эхириш у гьовре э хориревоз дуз небисдо, унжо э жиге гьовре кулолуьгьо невороморут. Эхи гьемишелуьг гьичиш нисди э руй эни хори. Оммо шевгьо, пушой себэхь, иллогьки эз гьово воруш омореки, э асму биренгьине жесдеки, духдер сенгьи зинде бире, гьобул сохденбу пушотейне чигьрет хуьшдере. У э тен ю сие парталгьой ёси вери, э зир ю сие гІэсб дери, эз раче сифет ю гІэтош жесде, э расди дес ю тов-товие шимшуьл дери, тиркомуре хуно мирафд, журай дешенде. Унг сес энү лов биренбу э вишегьо, дерегьо, садвойне гужлуй бире эзу-гьо. Оммо гьейсгІэтиш, кейки эз умогьоевоз ченд сад салгьо ги-рошди, расд оморенуьт одомигьо, комигьаки гуфдиренуьт, шовгю

сохденуът, дирет гуфдире шев пушой себэхь торик-товуши, чуйтам у духдер, сие парталгьо э тен вери, э кул сие гӀэсб вери гьемин гье у жиге, э комнки гиросдебу женг э нуькергьой хоневоз, эжоки пуч биребу севгили зну, э гӀэренлугъи пушой себэхьи гӀуше хуно учмиш бире рафденбуге.

Е кем вэхд гиросде бӀгъдо эз нуькергьой хоне пиш сохде эйло, зинде мундебируьтгьо одомигьой эн дигь, э сервори Дэвидовоз, гьишденуът «Довид-ГӀэelere», гиросденуът чое, фураморенуът диеш зофру, инжо э гӀэрей мерге вишегьо ве лугъонде гӀубигьой бине норенуът эришу тозе дигь. У дигье угьо нум норенуът «Нуьге дигь».

Ини гьечи, чуйтам бине норе омориге дигь иму «Нуьгди» э хоригьой Мюшгуйр.

### ОДОХЛУИ ЭН ПИРЕ ФАТЬМА

Гуюм и пушогоь э сер ме, эн келе зен, чуй кор омориге? Вахудо, шиновусдитге нэхогьошму пӀх мибу эз хӀндуьсде. Гьисди, ме шовгӀо дорем и сура э ежиш негуфдирени. Оммо ме э хуьшде вероморе дануьсденуьм беге? Зугьун мере э расе бесдигеш, гене гоф хуьшдере негуфдире тоб-довом нидуь. Ижире ализе хосиет дери мере...

Ди шохьонгум торики ме эз хуне ведарафденге, бирден дуь доне озгьуне гедегьо, шилолигьо э сер вече биёвгьоре хуно, гьовкендуьт оморуйт э сер ме. Угьо мере депучундуьт э епинжи, гӀэиллей соворе э гьобои депучунугьоре хуно, воноруьт э душ ишу — вирих!..

Ме э ишму гуюм расди гофе: мере хуьшдени мере воисдембу и дуь жогьиле кукгьо мере вирихунут гуфдире. Ишму 'белки мере эри эни кор гӀэйбиш мисохит, серкушиш мизенит, кидан, мугуйт; хок э сер чуйтуьни кафтар-гӀэери, хун зери вешенде беге э келемазалеитуй, хуьрштуь веромори беге, хьэшдод сале пире зен эже и коргьо эже? Поит ебо, гӀэдошмуре вегиром, те чой расире, поже мевекенит, те биней кор-хьоле дануьсде, нехогь мере серкуш мезенит.

Меш дануьсденуьм — ме келе зенуьм. Оммо муь негьогь сили несохдем, гӀуьмуьрмере э усали-бедиревоз негировундем. Шуькуьр э худо, е кук ме — сад сал гӀуьмуьр гердо уре э дире шиновусдегоргьоймеревоз, келе офицери, э довгӀо бири, игидигьо сохди е кукигейме — лап одлуье чупон эн колхозини. Сирот зну э е келе, шекуьл кешире тӀхде э минжи дигьиму вери. Духдерме гириге, худо мебуру, нуьгь гӀэил зенди, дегьимуьн э шуьгӀэм ю дери. Денишит, чуй жире гӀэиягьоре ме келе сохде ведировундемге?

Эгенер ишмуре дануьсде воисдениге, э жогъилиш ме е рач-сирот бируьм, дуь гуьл гъутинейме эдембу гуьл-гъуьзуьргууьле хуно су гуьрде сухде. Э ёрмени, нисдануьсденуьм, эзи пенжоғ пенж салиге, небуге шасд пенж салиге пушо, э дигъ имуе ошугъ оморебу. Омбар мэгГрифетлуье, данандее ошугъ бу, буьлдуьрчине хуно мэгГни хундембу, е хуб сазиш зерембу. У мере э мейду диренге, эри ме гье унжо мэгГни гуьнжуьндебу. Э у мэгГни хуьшде у дуь гъутиней мере э дуь нимей сибевоз той сохдебу, ловгъоймере э инжеревоз. Имогъойле эз у «инже» дуь пушой денду бэгъэй недомунди э лэгГэйме. Гьетте ме хэндуьсде и дуь донду пушого ведироморени, и е сале невелейме — гъурумсогъ э сифет ме дениширенге терсирени, гьечу дануьсдени мере воисдени гГэнж гуьрде эз нерме жигей ю.

Эри, нуьшдем ме ди гъовой шохьонгум э хуне, эдее невеймере э гуфере жумунденуьм, эри энү «ненуй-ненем» хунденуьм. Гьечи дес ме э 'сер гуфереь гГэйл верики, чумме эдее э хов верафде. Э пушой чум ме,булутгъо э сер догъго сейл зере гердуьгъоре хуно, гирошде рузгъош эдее пес-песоеки оморе гирошде. Э ёрме оморени жогъиле гуьзеле вэгГдогъойме. Дуьлмеш буланмише хуно бири мунде.

Бирден эз гъэриш хове хуно миденишуьм мивинуьм, еки дер хунеймуре вокурд, аста-аста диromo. Чуме вокурдум, мивинуьм г дироморегор — кук эн гъуншимуни — Микаили. Ме уре эз гъэд е жэгГмет одомиш гье усэгГэт мишинохум. Сифет эн у исэгГэт эн дуьлпесо, дуьлдэгъэдэгъэ биренигъо одомире хуно бу. У эдембу песово-пушово чуме-чару сохде. Мугум эз у:

— Хэйр гердо, Микаил, чуь кори туь э лойгъойму оморей, черх хурдейэ

Микаил сере гъуз гуьрди, эдее гГэйбе-гГэйб хэндуьсде, дугмейшей хуьшдере векендени дезере,— ведигъи чуьниге, эдее дуьлтенги гъаежони сохде.

— Бэхшлемиш мисохи, холей Фатма,— мугу у е гъэдер э хуьшде домунде бэгъдо,— мере э китуй е гъурлугъи. Ме дануьсденуьм, туь и гъурлугъ мере бегъем мисохи.

Меш екем мэхьтел мундум: «Чуь гъурлугъ биренини ире э меревоз?».

— Хуб, дие, сермере дорд меди,— мугум эз Микаил,— гу бура, чуь гүфдире воисдениге туьре!

Микаил нуьшд э раче-бэрачейме, э ён гуфере, гъуз бисдо, э ён гушме мугу:

— Имуре воисдени имишев е духдере вирихуним...

И гофе шиновусдемунде, хов ме гье усэгГэт парусд, хун зе вешенд э келлей ме. Ме гье усэгГэт туьндлемиш бире, вегуьрдуьм дуразе шуше-чубугъэ эри зере эз сер Микаил (ме у шуше гье-

мише норенуым э киме, керг-вече эз дер дироморенге эз жиге невэхушдеки угьоре эри пиш сохде).

— Туь чуй гуфдири?— е хьэрой вегуьрдуйм э сер Микаил.

Эз хьэрой ме глэил э гуфере гье усэглэт вешенд хушдере, е буьруьж вегуьрд. Микаилиш терси, десе пушово кешире, зурризури мугу эз ме:

— Холей Фатьма, поит, екем сабур сохит, бебей ме муно, э дуьл ме ужире хьэлгьо недери, егиле хомуш бошит, песой гофе гуш венит...

Ме шуше норум эз дес, сер гуьрдуйм глэиле эри жунумде.

— Гьери, гу,— мугум эз Микаил,— чуй гуфдире воисдеге туьре. Сер ме, мугум, эз гофгьойтуь нисе ведарафде. Егиле туь эдее гуфдире: «имуре духдере вирихунде воисде», песеде гьетте чубугьэ э дес ме дире, зугьуре чарунди, гуфдири: «нэгл, гьечини-гьечинигеи».

Эхирки эз гофгьой Микаил верасируьм, ки уре е хьэрмэхьи, Ильяс, гуфдиренигьо. Ме шинохденуьм у Ильясе, е раче, хушбуй-балае куки. Оммо небуд-негуььзи, хушдере э кор зеренигьо одоми нисди, пиёнискеи. Дедешу-фэгьир, бие зен, кор сохдени, у энжэгь сохдегьой энуре э шороб-эрэгьи дорени. Гье и небуд, пиёниске Ильяс ошугь бири э е духдер, Рукият. Ме эришму гуьом, у омбар раче гуьзеле духдери. Гьемиге эз у хубте корсох э глэрей ширдуьшгьой колхоз иму недери. Пор у, (худо гьувот до уре), гьозор трудодень гьэзенж сохди. Дуь машин тэхуьл овурди эри энур эз гьомбор колхоз. Ильяс ю пиёниске, тембелиш гьисдиге, дануьсдени, гьурумсогь, э чуй духдер ошугь буге. Валлагь у духдер мереш хьэз оморе. Эгенер ме куж мибисдорумге — ужире духдере эз десме ниведешендуйм. Э гуфдирей эн Микаилевоз, духдереш эз Ильяс хьэз оморе, оммо эри э у э шуьвер рафде э герде нисе вегуьрде, гуфдири мугу: «туь эрэгьи-шороб хурдере шендиге, э кор дерафдиге, увэхди миём э туь». Лап жигей ю гуфдире Рукият, баракаллагь, небуге пиёнискее шуьвер эйчуьни одомире

Мугум ме эз Микаил:

— Туь эйчуь нисе хосде, пардил, Рукияте, ижире раче эгьуьлменде, кордане духдере эз дес туь ведешендени?

Микаил сере гьуз гуьрде мугу:

— Ме холей Фатьма, рач нисдуйм. Э чум духдер хуш эри оморе эн суьфде биё одоми рач бу.

Мугум эз Микаил:

— Туь глэиле хуно эдее гоф сохде. Рачире одоми э гьиче нисе веноре. Эн мерд эн суьфде коргьойю не дуьл биё рач бу. Мерд беге тикмелеи. Е гофе дуь гофиш месох, бебейтуь муно, гье имишев ме хушдениме дарам э сэхьибгьой Рукиятевоз гоф сохум, бурум-бесдуйм, меш э глэруьси кейвони бире, е келегьэи бэхш ве-

гируым эз туь. Хэйф энү духдери, песде мурав э дес эн и небуде пиёенискее Ильяс миофдону.

— Дануьсдени чуйниге, холей Фатьма, угыо дуйекире хосденуьт, э гIэрей энугьыо эри гьэриш буре э ме лоигъ нисди. Ильяс хьэр-мэхьмени. У гьечиниге зобуне одоми нисди. И шороб-эрэгъи сер энуре гьэриш сохди. Мере воисдени уре э дузе рэхъ дешенуым.

Эри, Ильяс дениширени дирени, Рукият э ю эри оморе э герде нисе вегуьрде, мэхьшово сохди уре шав эри вирихунде. Э хьэр-мэхъ хуьшде Михаил хьэлово бири:

— Туь эн ме дусд, хьовириге, э ме кумеки сох, духдере эри вирихунде.

Михаил домунди э мэхьтели: гоф хьовир хуьшдере э жиге неовурдге, у эзу гьэгъри, бирази мибу, эз е тарафиге уре нисе воисде эз хотур эн и кор нум эн Рукият бибур бу, хуьрд бу...

Лап герекие гоф хуьшдере, чуй гуфдире воисдембуге уре, Михаил э чорзани вэхишде, асда-асда гуфди э гушме. Песде э жигей хуьшде нуьшде, келе-келе мугу эз ме:

Иму гьечи, холей Фатьма, и коре сохдимге, гьемин э сер духдер хэлгъ биббури ниверав, гьемиге белки э и коревоз Ильясе э сер дешенде дануьсдимге.

Ме гьеебо рази небисдорум. Е гьэдер вэхд думит сохдум, песде жугьоб дорум, разименди мере.

Шохьонгум кук ме не гIэруьс мере гьингьэр э сирсуьржеревоз дорум. Песде гьемей кифлет дегешде хисиренге, сермере дегуьрде ведарафдуьм э буру. Шев торик-зулмати бу. Э чум одоми энгуьшд доноге, одоми нисе дире. Асмуш гьечи торик гьисди, гуйге гьурум сиетов зери. Евош, дьворгьой хунегьоре гуьрде оморум, ведироморум э хьэст Рукиятигьыо. Гьетте э хьэст эн Рукият дироморе, мивинуьм, бирден чуйниге э сер ме офдо. Дес киниге ейлугьэ гье у туьтем доно э лэгIэйме, ме офдорум. Мере гье у сэгIэт пучундуьт э епинжи, венорут э душ.

— Эже берим ире?— шинируьм ме сес эн Михаиле.

— Чуйтам эже?— Беге туь нисе дануьсде?!.— ГIоси бирере хуно гуфди асда-асда Ильяс,— бер э «Мугьорей эн соймишигьыо». Зубош бер, те имуре кес дире.

«Мугьорей соймишигьыо» — е келе лугьонде мугьорей. У дери э гьэд эн гьуьндуьре гьоей сенгьи. Ингьэде у гьое гьуьндуьр гьисди, е сер эн у э асму, вери, пойнейю и кун лугьонде дохьор дери. Омбаре рузгьыо булутгьыо э гуьмге кура бугьоре хуно, кура биренуьт э иловлей келлей эн гьое. Поиз не васал, чупонгьыо гелегьоре эз догъ э гьийшлогъ фуравунденге енебуге эз гьийшлогъ э догъ вебердёнге, сайлов, ворус оморенигьыо вэгIдо угыо э и мугьоре пэхьни биренуьт. И мугьоре э куьндигьыо дигъ имуни. Уре «мугьорей соймишигьыо» эри чуй гуфдиренуьтгеш гуьм эришму. Гуфдиренуьт эзи ченд-ченд салгьыо э хьэрэм эн е хон е раче гуьзеле



жовоне духдер дебири. У духдер э дигь ишу те э хьэрем хон офдоре, соймиши эн е жовоне кук — чупон бири. Нуьжергьой хон оморенге егиле э и дигь хэрж эри вечире, диребу и раче духдере. Э гужевоз эз бeбe-дедей ю векенде, бердебу уре бэхш-пишкеш эри хон. Кук-чупон, одохлуй эн духдер дануьсде и коре, оморебу э дервозей хон, поисдебу эри эн у э нуькери. Эз инжо вирихунде бердебу одохлу-соймиши хуьшдере. Соймишигьо эз ки хон вирихденге, е гьэдер вэгIдо угьо пэхьни биребируьт гье э и мугьоре. Эзумогьойлеревоз и мугьорере хэлгь нум норет «мугьорей соймишигьо».

— Туь хьитиёт бер уре,— эдее шиновусденуьм ме сес эн Ильясе, е гьэдер вэхд эз дигь дур бире бэгьдо.— Чуьниге у эхи сесиш нисе сохде. Кидан тасунде-куьшдейге уре э теретэгIди. Туь эхи оуре хуно кубути.

Мивинуьм Микаил эдее гуфдире:

— Туь, Ильяс, фикир мекеш, Рукият сес нисе сохде — э хьисобевоз суьсд бири. Эз суьсд бирейгьо зен хэйлогьире е кориш нибу, туь олхогьин бош. Э «мугьорей эн соймишигьо», э жун сертуь, ме э чум хисирекиш мирам мирасуьм, э е доне сенгьиш пой ме нарасиреки.

Те иму рафде расире, гьово э асму екем очугь бисдо. Эз гьирогь асму эз песой догьгьо менг, тов-тов доре, веди бисдо. Ме эз гIэрей епинжи э е чумевоз эдее диренуьм чуьтам Микаил мере, э душ хуьшде веноре бердениге.

Эхириш оморим расирим э «мугьорей соймишигьо». Микаил ю вегуьрд мере эз душ, гьоб шишере хуно, э хьитиётгиревоз, коргьой гуьгьоре хуно «нум худой-нум худой» но э хори. Ильяс гье у туьтем мугу эз Микаил:

— Зубош фонаре дегесун!

Микаил фонаре дегесунд, дуре гуьрде диворгьой эн мугьоре гье усэгIэт товуш бисдо. Ильяс гье усэгIэт омо, поисд э сугьрезани, э пушой ме, мугу «Рикуят, бэхшлемиш сох, ме ижире коре эри сохден. Мере де чорейге небу, ме туьре жун-жигермере хуно хосденуьм, ме туьсуьз зигьисде нидануьм! Биё э ме э

Ме гье усэгIэт епинжире эз душгьойме шендуьм, уьз бе уьз шуьвер!».

денишире э сифет эн Ильяс, мугум: «Эгенер туь эз расдиш гьечи э ме ошугь бирейге, ме суьз зитьисде нисе дануьсдеге, бошгу, ме разинуьм эри э туь э шуьвер оморе».

Бирден Ильяс мере диренте перт-гьогь бисдо мунд, сенгь дохьорире хуно, ранг до, ранг восдо, песде екем э хуьшде диromo-ки, мугу:

— Бебей ме жон, и туьни, холей Фатьма!— Песде э пой вэхуьшде, гIоси-диври бйре, келе-келе мугу эз хьовир хуьшде: — Микаил, и чуьни?! Туь кире овурдей инжо?! Чумгьой туь э же бу?!..

— Эже бу? — туьндлемиш бире, гуфди Микаилиш. — Чумгьой-туь эжебуге, эн меш гье унжиге бу. Э торики ме сечмиш несохдем...

Ильяс сер гуьрд эри вирихде, ме гуселере эз расе гуьруьгьоре хуно, сэхд гуьрдуьм эз хьофдранге галстук энү, мугум:

— Дие вирихунде, овордей мере, биёбур сохдей э пушой эл-ви-леет, ме разинуьм эри э туь э шуьвер оmore., хогь мере, гьурум-согь.

— Эле, туь чуь гуфдире, холей Фатьма, туь эже, ме эже, ме той невегьой туьнуьм. Гьич э дуьл-хэёлгьой меш туь недебири, иму егIэлмиш биреъим, туьре неданусдеки вирихундейм!..

— Гьо!—мугум эз Ильяс, рэхь энуре ведабуре, э муьшдевоз эз синей ю зере,— Е одомигере, гIовунсуьз-хэтосуьзе духдере ви-рухунде хэёл дебү э дуьл туь?! Духдер кес бегем эритуь сиб-гIэр-муни эри эз богь кес вирихунде, небуге инсони?! Уре ехь юни, номус юни. НэгI,— мугум,— ме и коре гьечи нигьилуьм, е мере хогь, енебуге гьейсэгIэт мирам мэгIлуьм мисохум э прокурор, э сельсовет, жеми эри паздегь сали мидарай э гьээземет.

Ме э гоф сохдеки эз диворгьой мугьореш сес унг оmore, сес ме ченд е гром лов бире. Микаилиш поисди э фонаревоз э лэгIэй мугьоре, эдее э пэхьники чум зере мере, егIни: «Гу, холей Фать-ма, машаллагь, омбарте терсун уре, битгьил э эгьуьл диров». Эз душ эн Ильяс гуьрде, Микаил мугу:

— Ильяс, офдо э пойгьой эн холей Фатьма, бэхшлемиши хогь эз у, небуге кор иму шифи, хунейму гжи.

Сер ишмуре омбар дорд недуьм, игьрол сохдим гье инжо, э «Мугьорей соймишигьо», эз имбурузевоз Ильяс пиёнискеире шен-денини, дарафденини э кор эри кор сохде, чуьтам э мерд лойгь гьисдиге. Эгенер Ильяс ме гуфдирере сохдге, ме хуьшдениме ми-дарам эри энү э илчиети э ки бебе-дедей Рукият уре эри хосде ори Ильяс. Ильяс эри олохогьин сохде, ме уре гоф, шовгIо до-рум, э товун эн имишевине гьол-могьол, биёбури энү э екиш ни-гуюм гуфдире.

Оммо ме э вихьтей зугьунме невереморум, гуфдирум эришму ме э сер Ильяс оворде коре. У гофигере — эри Рукиате э илчиети дарафде хосдеире эри энү, ме ёгьин бегьем мисохум. Кор энжэгь э ю, э хуьшдени Ильяс вери имогьой.

## НОМЕНКЛАТУРНЫЙ ХЬОКИМ

Ме э ишму гуьм, ме э гIэрей эн одомигьо е одоминуьм, песде эзи жанае-манае одомигьо нисдуьм—о, номенклатурный одоми-нуьм. Оммо биёйт ишму э зенме денишит. У эз ме э жигей шори, келегеди сохде, лов-буз ю гьеммише дуллини, гьич эз ме рази

нисди, керг гъуртире хуно гье эдее фугъунде, гушмере динж нисе гъиште.

— Эз дестуь, мерд, сермс гжи, туь аслангьореш хьэл мисоху, неки мере. Туьре эз буй-бала бэгъэй е фегъм, е эгъуьл нисди. Ме туьре пенж энгуьшдмере хуно хуб дануьсденуьм, шинохденуьм, кеми-кури нэгI, бисд салм ме э туьревоз гIэзиет кеширенуьм,— гуфдирени эз ме зенме.

Буй-балайме гъэгъигъэтиш хуби, обурлуьни, ме худо мебуро, екелуье чогуэ одоминуьм. Оммо мере эз хубе, обурлуье буй-бала бэгъэй де верзирение коргьойгеймеш гъисди, меселен, диплом ме. Набуге мере э хотур э е бул-балайме «ответствени» гъурлугъгьо екиш нидо. ГъейсэгIэт ужире вэхдгьо, зомонегьо нисди. Гуьлом гъеме эгъуьлменди, хундогори. Оммо имогьой биё туь и гофс э зенме гъондурмиш сох, комики эз гIюш не дуьшпере сохдере бэгъэй, не эз дуй сал егиле гIэил зендере бэгъэй де гъичиш нисе дануьсде.

Эз ме хьолово бири:

— Туь э дипломтуьревоз эричуь келегеди сохде? Диплом эри вегуьрде асанти, одоми эри бире четини. Диплом туь эйчуьни мере, э сер туь бегъем эгъуьл недебиренге.

Диренит чуь zobуниге зенме? Эришму гурунд ниёв, ишму э гIэрей эн мердгьо е мерд биреки, зен ишму ишмуре ижире серкушигьо зенуь? Гъеле серзиёди начальникгьоймеш мере динжи нисди.

Зенме мере серкушигьо зерени, охмурие гофгьо гуфдирени, егIни мере ижире обурлуье сер-сенбол гъисдики, диплом э гъултугъ дерики, э е жиге омбор нуьште кор сохде нисе дануьсденуьм. Хуб, э зенме чуьни инжо, эгенер ме э гъэриш эни пенж сал ченд гъурлугъ дегитиш сохдемге? Суьфде ме буьруьм заведиш эн городская овощная база (сенигIэтме агроном-овощеводи). Песде бисдорум директор эн есиёв. Эз унжо мере вегирденге норут директор эн нун буржунденитгьо корхоне, песде начальник эн пожарная охрана. Э коми кор ме небирем, эз гъеме жиге мере «э выговоргьоревоз» вегуьрде э е кориге норёнуьт. Оммо зенме эзи коргьойме биразини. Ме эдее гуфдиренуьм эз у: туьре э коргьойме кор нисд, туь гIюш-дуьшперейтуьре сох, гIэилгьойтуьре зенд парти-парт. Те ме э номенклатурный список эн рэхъберчие корсохгьой эн шегьер деруьмгьо ме гъемише начальник-хьоким мибошум. Е гъурлугъ мебуту, е гъурлугъиге бугу, токи ме начальник бошум.

Оммо ме эришму'гуюм: мере эзи гъеме жиге эз кор ведекуьрденуьт, гуйге ме начальник бире энжэгъ войгеймере сохденуьм, э одомгьоревоз кубутуьм, текебурум, э коллективовоз э рэхъ нисе рафденуьм, туьндуьм, беле-филон...

Ишму вегирит винишит ебо: чуь начальникуьм ме эгенер войге, буйругъмерере корсохмере негъишдуьмге е э гуж е э хуше-

воз эжиге оворде? Дие чүь хуърмет, «абторитет» биренини мере э лушой корсох ме? Ини имогьой вегирит венишит гъозие-гъэдер эз товун э хэтой эн е моч сохдеи зен подчинениейере ме демундемге.

Песини гиле мере директор эн театр шегьер норебируът. Ме э ишму очугъ гуом пишей эн артисти гьич мере хъэз нисе омор. Эриме гьемей эни артистгьо суке-делхъэже одомигьоре хуно оморенуът. Ме рази бисдорум э театр эри рафде, чуьнки директорум-хьокимуьм, рядовой 'одоми нисдуьм.

Е гиле коллектив эн артистгьой театр йму эдембируът хьозур бире тозе пьеса-комедия эри норе. Ме эз тарафме буйругъ дорум э гьеме жигегьо афишагьо венуь, э радио мэглуьм соху эз товун эни постановка, хэлгъ омбар биев гуфдире.

Гьемин гье ү руз эн спектакль, эри перде вокурде нуьг-дегь минут мундеки, сер-суре хуно видовусде дироморени э киме режиссер эн театр, муйгьой сер хуьшдере кешире-кешире.

— Биёбур бисдорим э пушой хэлгъ, спектакль эдее эз дес рафде,— гирисденире хуно бире, гуфди режиссер.

Ме медан еки эз артистгьоре эз нскуми шуьгъэмебури гуьрде юре, э хъэжетхоне нуьшди поисде, э сегьне ведироморе нисе дануьсде. Режиссер э ме хъолово бири ме э жигей энуде ведиром э сегьне возум гуфдире. Гьисди роль эн шуьгъэмебуру гуьрдебутгьо артист келе, четине роль небу. У э спектакль нэхирчире возирембу. Нэхирчи шохьонгум нэхире эз чул овурденге, дироморени э ферма, э говду. Инжо дирени у жогьиле бие зене-ширдуйше. Хуьшдени эн нэхирчи эз зуревоз бие мерди. Чум энуде зуревоз э и бие зен дери. Нэхирчи эз шори, уре дири гуфдире, сер гуьрдени э иловлей энуде эри вежегьисде, мэгИни хунде. Песде ү куьнд бирени эз ширдуйш, хосдени эзу е моч дуь гуфдире юре, оммо жогьиде зен нисе гьисде, рази нисе бире.

Ме ченд гиле биребируьм э репетиция, дануьсденбируьм у роле чуьтам возире герекиге. Оммо эз елойге ме гьич э тлуьмуьрме э сегьне возире одоми нисдуьм, песде нэхирчи жогьиле зене диренге биё мэгИни хуну. Мереки эслогъ сес неве, сесме сес эн бидбиде хунои. Ме эз товней сес ме гуфдиренге э режиссер, у мугу:

— Диеш хуб. Туь возиренигьо роль хэндее комически роли. Э ужире сесевоз хундиге хэлгъ диеш омбарте мижэндуй.

Чорей ме небисдо рази бисдорум: е чи спектакль эдее эз дес рафде, зал одоми пури. Э серме килэхъ вонорут, э душгьой ме епинжи дегуьрдуьт, келе биггьо клей зере воноруьт э сифетме. Пушой э сегьне ведарафде, ме хуьшдере эри жургИэт доре эз ешик эн стол ме бутылкай эн коньяже вегуьрде е пура пейлей эн коньяке декуьрде, вешендуьм.

Вэхд ме омо эри ведироморе э сегьне. Э сесгьой «говгьо», гуселегьо оморек, ме дироморум э сегьне, э «говду», дирируьмки

«севгил» мере, ме лове э шоре хэнде вебердуым, бигъгьой мере хуб тимор сохдум. Песде эз шори эн дуьлме, гуйге мере пар вероморере хуно, десгоре лов сохде, сер гуьрдуым э иловлей эн жогбиле зен эри черх хурде, вежегьисде, мэгИни хунде.

Эз зир чум денишируым э зал, хэлгъ эдее хэндусьде, разини эз возиме.

МэгИни хунде варасдөнге, куьнд бисдорум эз жогбиле зен, минет сохдуым, гуфдурум е гиле, дуь гиле, песде сеимуьн гилеш мере моч дуь гуфдире те гьерки бисдо инжо оморе дироморе.

У э сеимуьнгилеш э гофме гуш невеноренки, мере моч недоренки, бирден хьуьрш зе вешенд э мазалайме. Ние дануьсдөнумь хурде пейлей коньяк кори сохдге э мувэхьме, небуте ме директор, начальник бирей у гофмере э жиге неовурден гурунд омоге эриме; эхирки, ме эз хуьшде ведарафде, чомохмере шендуым, епинжире эз душ шенде, пертово доре, килей зере бигъгьоре векенде, хьэрой сохдум э сер артистка:

— Гьистомон!— мугум ме.— Ме келейтуьнум, начальниктуьнум, туьре чуй ихидиэри эз гофме ведарай, буйругьмере эжиге ниэри, «апторитетмере» э пушой хэлгъ хуьрд сохи?!...

И гофе гуфдире, ме э зарбевоз куьнд бисдорум эзу, сэхд гьэл гуьрде уре, е моч векендуым эз ловгьой ю. Гье и момент Гьистомон, э дес комики бедире дебу, бедирере гьово гуьрде, зе эз серме, эзилойге чомох эн «нэхирчиме» э дес дери омо ведиромо э пушойме шуьвер Гьистомон, гьемин у артист юре шуьгьэме бур гирдебугьо. Дие песою чуй бисдоге ишму марасит. Спектакль лов бисдо. Э зал офдо хьэрой, хэнде, нифри... Эзилойге Гьистомон э тие бедиреревоз, шуьвер ю э чомохэвоз видовусде э песойме е сер те э хир куче пиш сохдет мере. Шуьвер Гьистомон гьемин у шуьгьэмедерд гирдебугьо артист бу.

Оморем э хуне. Инжо зен мере э хуне нисе дегьйше.

— Э киревоз эрэгьи хурдейге, гьэл-моч гуьрдейге, унжо вошош бура, номуссуьз, лоигьсуьз!— мугу эз ме, женевере хуно э серме гьов кенде оморе,

Ме медан, ме Гьистомоне э моч сохдеки э ловгьойме гьирмизине ранг вомунди, э сифетме — пудри. Зенме гьечу дануьсди ме э иловле э киревозиге гешдем, гьэл-моч гуьрдем...

Имогьой и ченд рузи Министертсвой культура мере эз кор вешенди, зенме мере — эз хунегьс. Нисе дануьсденуьм чуй сохумге. Э хори е кор нисдики, э хэтой эн е моч домундем...

## ВОХУРДЕИГЬО Э СЕР БИЛОГЪ

Омар тие бедирегьоре э дес гирде, иловлере терсе-терс чумечару сохде, кемере гьуз гирде юре невинуь гуфдире, евош-евош

фурамо зофруво эз сер жилгэ, э дереи, эжеки э зир келе сие гэзей сенгэи, мугъум хунде-хунде эдембу гузгире хуно палаше гЮв билогъ ведироморе.

Шев бу. Э асмү тикегьой жовиъиле хуно эдембируът асдарагъо тов-тов доре, миже куфде. Пура, гиргине менг эдембу товуш нуьгърере тигъи сохде э хори. Эз товуш эн менг гЮв эн билогъ эдембу руьгъ-руьгъ доре, чуйкле гиргине шумоле сенгълегъо э кон билогъ сипре монетлегъоре хуно тов доренбируът. Эз билогъ е ченд пой дурте кулелугъ бу, э савзе велгъо геймиш бире. Эзун-жо эдембу сес хундей эн буьлбуьл оморе. Э звер, эз дереи э уло, э домуней эн вишелуе догъ, веди бируът хунегъой эн дигъ. Э ки-ми энугъо товуш куьшде оморебу веди бу, ки омбаргъо э дигъ хисирет.

Э ён билогъ оморе расиренге, Омар асде но буше бедирегъоре э хори. У егилейгеш э гушелугъ поисде, чуме-чару сохд илов-лере. Диренге, ки э иловле екиш нисди, юре дирегор кес небири у э буше бедирегъоревоз э билогъ омореки эри гЮв, дуьл энү өкем олхогъин бисдо, э рэхътиревоз е лугъонде нефес вокошире, лове э хэнде веберд. Оммо гье и туьтем э ёр энү омоки, чуйтам е лэгI-эзойге зен энү э гужевоз, э женг, гьолмогъолевоз уре э тие бедирегъоревоз эз хуне ведекирдге эри гЮв овурде эз билосгъ, гьошгъой энү дуллу бисдорут, сифет ю — могъбул, бирази. У гье-ебо хэсде бире, вомунде одомире хуно нуьшд э сер эн куьгъне, гьов гирде сенгъ, э гьирсгъ эн билогъ бугъо, десе э думитевоз вено э чуне.

Э ёр Омар омо имбурузине гофгъо-хуьжетгъой энү э зен юре-воз. Гьеле себэхьмунде зен энү, Сакинат, э школе э рафдеки, мугу эзу:

— Жон Омар, ме имбуруз эз школа дир могошдум, ебо семе бу-ра эз билогъ гЮв биёр.

— Хуб, бошгу, мере визор меёр, мирам!

Зен виники шуьвер ю эдее недуьл-недуьл, некруьм-некруьм жугъоб доре юре, гъэгъри, могъбуле хуно дениши э Омар.

— Гуфдируьм — мирам, дие чуй воисде туьре?! — гЮси бирере хуно мугу Омар, э зен хуьшде денишире.

Сакинат рафденге, Омар вегирд эз сиро тие бедирегъоре, фурамо эз шефде пилонконгъой тэхдеи э хьэёт. Песде у куьнд оморе эз гьопу, э жуьргIэтевоз вокурд лет гьопуре, луьнге кеши эй вадарафде, оммо гье усэгIэт тесово до хуьшдере, зури-зури ди-ромо э дорун хьэёт, бедирегъоре э нэхэбереки э еки зере-зере. У эдембу гьечи сэхд нефес кешире, гуйге уре еки донорегор пиш сохдгор бисдоге. Пушони энү эрэгъ вешенд.

Омар дер гьопуре вокурденге у дирербу гьунши хуьшдере Мех-ти Бабаеве. У гьуьндуьре килэхъ бухорей ёнбоки э сер вери, эдем-

бу э тегьнимиревоз нимелит сипи бире бигъгьой хуышдере бурмиш сохде, эз зир чум гуйге денишире э лой Омар.

Е кем олхогьин бире бэгъдо, Омар гене куынд омо эз лэгIэй гьопу, асдалай вокурд лет гьопуре, песеде гене теретэгIди дуборе сэхд сохд уре. Э пушой чумгьой эну омо, чутьтам у гьейсэгIэт рафдениге э буше бедирегьоревоз эз кучей дигь э билогъ эри гIов овурде. Мердгьо, зенгьой диг: гьеме э томоше, хэнде ве рухшендиревоз дениширет э лой эну, гьерки эдеее е серкуши, е гоф гуфдире э песой эну:

— Э и пардил денишит ебо! Уре имогьой эз сер хуыште килэхъз вегирде, сефги венорени мунди, бесдуре веирде — гове дуьширени!..

— Эз имбурузевоз, э хьисобовоз, у э жигей зен хуыште биренини, зен эну — э жигей ю.

— Гьечи бире дие, мерд хуышдере э зир дес зен дешенденге...

Омар ижире коргьо, гофгьоре эри хуыште веровурд сохдеки, у омбар гIоси бисдо эз зен хуыште. «Нисе дануьсде бегем Сакинат иму э шагьер нэгI, э дигь зигьисденимгьоре?! Имогьой е салшими у эз шагьер э дигь иму омори эри училили сохде, нуыгь мегьи зеки эдее зигьисденим, оммо гьелеш вердиш нисе бире э хоснетгьо ве гIэдотгьой эн дигь иму. Хьэлово бири мунде э ме: «Чуь кори беге, чуь биёбурини инжо гогьбир семе мерд э жигей зен хуыште э билогъ эри гIов рафде, э жигей эну шелере э кул хуыште веноре, гове дуьшире?!..»

Омар, гьелбет, юш дануьсденбу, Сакинат дуз гуфдире, оммо э гьэршуй гIэдот рафде бире? Эгенер у Сакинат гуфдире коргьоре сохдге, неки мердгьо, зенгьош михэндуьт э ю, мердиш хьисоб нисохут юре.

Оммо расдире гуфдире воисде, ки те и песини вэгIдогьо Сакинат мигуфдигеш, серкуш мизегеш шуьвер хуышдере, оммо гьич э уревоз э хуьжет поисде, нигуфди у «кор зенунере» соху гуфдире, чуьнки э хуне келе зен, дедей Омаригьо дебу. У эз гьеме пушо, себэхьмунде мивэхилшд, гIэтош мивоно э кинле, гове мидуьши, э нэхир мидекуьрд, эри гIов мирафд. Имогьой и дуь мегьи келе зен э хуне недебу, рафдебу э е дигьиге, нечогъэ хэгьер хуышдере эри гьурлугъ бире. Имогьой гьеме коргьой хуне вомудебу э сер эн гIэруьс, эн Сакинат — бордоре зен. Эри Сакинат омбар четин бу согъ руз э школе нубо доре бэгъдо оморе коргьой хунереш сохде, те нимешев дефергьой гIизилгьоре фегьм сохде, эри урокьгой фердои хьозур бире.

Омар эдембу дире, чутьтам зэхьмет кеширениге зен ю, гурундиге эри эну. Уре э зен хуыште езугъ оморенбу. Оммо, неденишире э и кор, э шуькеетигьо, муьр-муьригьой эн зен, у эри хуыште номус хьисоб сохденбу эри э у кумеки сохде, «кор зенунере» сохде.

Имбуруз шохьонгум Сакинат эз школе вогошденге, вини э сиротие бедирегьоре, дуьл ю лап гъэреболугъ бисдо.

— Омар, туь мере фурмундей, эри глов нерафдей?!— тутндлешмиш бисдо жогъиле зен. — Э хуне е дугъле глов недери десеш эри шушде. Чужьире одомини туь?!...

Сакинат эз гъаежони ве тэхъли дуьл хуьшде дие гоф сохде недануьсд, гъирке величи э бугъоз эню. У жуьнд омо эз стол, э хуьршевоз шенд эз школе овордебугъо э хуьшдеревоз гъэм дефдере, песеде нуьшд, сере э дуь десевоз гирде, гирисд, душгъой ю, верафде, бордоре шуьгъэм ю лерзире-лерзире.

Омар гъошгъоре дуьл сохде, дениши э зен хуьшде, песеде уш э гъэгъревоз шенде э сер стол э дес ю дебугъо книге, вэхуьшд э пой, сер гирд э иловлей хуне эри гешде.

Сакинат сере тик гирде, виники, чуь книгиге хунденбугъо шуьвер ю, гъэгър ю диеш веромо.

— Эдее «Горянкай» Расул Гамзатове хунде, оммо ю хуьшдени ю пес мунде гъэдотгъоре гирде, гъеле э ки хуьшде комсомоли, зоотехники, интеллигент эн дигъи. — Сакинат э серкуши ве охмуриревоз дениши э шуьвер хуьшде.

Е ченд минут гъердуьй энугъо гоф несохде, поисдуьт. Ёрден Снкинат э зарбевоз эз жигей хуьшде вэхьшд, эз сиро вегирде тие бедирегьоре оворд до э шуьвер хуьшде, э хуьршевоз мугу:

— Эгенер туь гъейсэгъэт эри глов нерафдиге, ме эдее рафденуьм эз хуне, е дэгъдэгъэш дие ме э китуй нипоюм!..

Омар эри хуьшде вараси: гъейсэгъэт эзу «нэгI» гуьфдириге, Сакинат ёгъин гъелебулей хуьшдере эжиге миёру. Унегуьре ү эз лэгIэй хуьшде е гофиш неведировунде, вегирд бедирегьоре, ведиромо э хъёт.

Э гъово менг эдембу лампере хуно товуш доре. Омар э лэгIэй гъопу поисд, гуьзет сохд, э гъэсоириревоз денишире э асму, кей ебо менг мидаварге э песой догъ, пэхъни мибуге. Оммо менг, гуйге дануьсде, чуь фикиргъо дериге э дуьл эню, эз гъэгър эню, лос поисде э жигей хуьшде, деш зидте эдембу товуш доре бунгъой хунегъоре, пичире, тенге кучегъой дигъе, рэхъэ э лой дере э ён билогъ рафденигъоре. Омар гъич эри хуьшде думит несохдебу, ки у эз менг гIоси мибу гуьфдире.

Шори эн Омаре гъэдер небисдо, диренге, ки, чуьтам эз некуми эз лой эн догъ е келе сие буьлут, келе лов сохде сие епинжире хуно, жейле бире омоге э пушорэхъи эн менг, гирд пушой энуре, перде кеширере хуно. Хоригъо, кучегъо, гъе усэгIэт тор бире, э гъэронлугъ домундуьт.

Омар зур-зур э бедирегъоревоз ведиромо эз гъопу. Пэхъни-пэхъни, хуьшдере гъуз гирде, бедирегъоре э зир гъул шишире, э торики э гъэчэгъи буравгъоре хуно, рафд э лой билогъ. Иллогъки у э чумтерси ве дуьлдэгъдэгъэиревоз гирошд эз ён хуней эн пред-



седатель сельсовет Мехти Бабаев, комики, э хысобовоз, имбуруз дирэбу уре э бедирегьоревоз, шек сохди Омаре эри глов овузде рафде воисденбу гуфдире. У терсиренбу гьейсэглэт э нэхэбереки Мехти э ю расд неёв, лап биёбур небу э пушой энү.

Омар э дери э ён билогъ оmore расиренге, менг ведиромо эз зир торике булут, генс э иловле товуш бисдо, рузе хуно.

Бедирегьоре глов пур сохде, Омар суьфделе пой норэбу эри варафде эз дери, бирден у вини киниге эдее фураморе эз тепен э дере, э лой билогъ. Омар гье усэглэт бедирегьоре эз дес э хори норе. кемере гьуз гирде, вирихд дарафд э куьнди билогъ бугьо кулелугъ, пэхьни бисдо э гьэд энү. Буьлбуьл гье у туьтем поюнд мэГни хундей хушдере.

Омар эз глэрей кулегьо эдембу денишире, киниге, комини «дердимендиге» юре хуно шев-нимешев эри глов омorigьо э сер билогъ. Оморэбугьо одоми бу секретарь эн сельсовет, Эмин Гайдарсз, е чуьл сале лэгьэре мерд, дуразе чуне. Э е дес энү совучей муьси дебу, э е десиге — бедире. У эдембу фураморе э келе олхогьинеревоз, чуьнки, э хысобовоз, уре имид бу, ки э и вэхд нимешев эз ю бэгьэй эри глов оморегор екиш нибу гуфдире. Оммо у эз ён билогъ куьнд бисдоки, виники пура бедирегьоре, омбар мэхьтел мунд, э чуметерсиревоз дениши э иловле. Песде эз глэрей кулегьо у сес хэндэй одомире шиновусдки, гье усэглэт э сугьразани нуьшд, э пушой хуьшде чапаре хуно но совуче не бедирере, пэхьни бисдо э далдай энугьо юре невинуь гуфдире. У э гьечи э дуьлпесоиревоз чум доноре поисд э лой эн кулегьо, эзжеки сес тасире хэнде эдембу оmore. И хэнде эдембу терс, лерз венгесде э тен энү. Сер зиёди киниге эз гьэд эн куле эдембу кесепгьой хоке шенде э тараф энү. Кими энугьо э е сесевоз офдоренбу э гьэд буше бедирей эн Эмин, кимигьойге расиренбу э гьуз бире лэгьэре кемер энү. Оммо у гьич эз жигей хуьшде нисе жуьмуьсденбу, диеш гьуьж дироморе, пэхьни биренбу.

Омар денишире диренки, ки угьо гьечи те себэхь биреш дуь эз еки пэхьни мибошут, у дие тоб недоре, тик гирд хуьшдере, келе-келе хэндуьсде-хэндуьсде, куьнд бисдо эз Эмин.

— О, салам алейкум, глэзизе хьовир секретарь эн сельсовет! И чуь глэемете кори иму инжо дуь зеки вохурдеи?!—гьечу келе-келе э хэндеревоз мугу Омар.

Эмин диеш сер хуьшдере гьуз гирде, сер гирд э зир зугьун эри нифри сохде Омаре. Омар куьнд омо эз Эмин, э зарифатевоз эз кемер ю зере, мугу:

— Хуб, дие вэхиз, весси эз ме пэхьни бирейгьо!

Чорей Эмин небисдо, вэхуьшд, терсе-терс, хуни-хуни дениши э Омар э дуьшмен хуьшдере хуно.

— Имогьой гу, хьовир Гайдаров: туь омбар оmore гьечи шев-

нимешев э пэхьники э дуьзди енебуге э ки пэхьнике ошне бурав-  
гьоре хуно?

— Эде, э хотур худо, лэгIэйтуьре ги, гьечи келе-келе гоф ме-  
сох!—э гьэгьревоз мугу Эмин, сес хуьшдере чуйкле сохде. — Сес-  
туьре э дигь шиновусдогоргьо мибу — омбаргьо гьеле нэхисрет.

— Туь е гиле э ме эз туь пуьрсируьмгьо гоф жугьоб ди,—э сер  
гоф хуьшде поисде, эдембу гуфдире Омар.

— Астапрула дие!—десгьоре э базуй хуьшде зере, биггьгьоре  
вежегьунде, туьндлемиш бисдо Эмин. — Э жун ишму э инсон нэгI,  
э гьэлифо-шэхьитуй расд оморем э сер гIов. Е чи туь эз ме пушо  
инжо оморей, песе мере диренге хэрегуше хуно э гьэд куле цэхь-  
ни бирегориш туь бири.

Омар э вогьнеки гьэгьри бирере хуно бисдо.

— Ме, Эмин, те имишев недануьсдем, туь сабуьрсуйи, эз зарифа-  
те гоф гьэгьри бире,—э серкуширевоз гуфди у.

Эмин лове э шефде хэнде веберд.

— Туьш жиге, вэхд офдей эй зарифат сохде,— э биразни ве  
руьхшendirевоз гуфди Эмин. —

— Хуб, бошгу, гьэгьри мебош,—э боришмиширевоз мугу Омар.  
— Биё нуьшим екем, е папрус кешим.

Э зеневоз гофе-гоф бире эйло, Омар тэгIли нисе сохденбу эри э  
хуне рафде.

Угьо гьердуь оморе нуьшдуьт э сер савзегеи, э ён билогь. Омар  
эз куьф хуьшде ведешенде папрус до Эмине. Е-дуь минут гьер-  
дуьй энугьо гоф несохде денишируьт э менгелуье гьово, э лой ви-  
шелуье доггьго, песе Омар суьпле хэнде сохде, сере жумунде,  
мугу, дуре кеширенбуггьо папрусе э гIэрей дуь энгуьшди гирде:

— Ме э туь, Эмин, гуюм расдире, те имишев ме гьич эри гIов  
неоморем. ГьейсэгIэтиш э уьзихдиёриндеймеревоз мибисдоге гене  
ниоморум. Зен ме мере э гужевоз, э гьолмоггьолевоз эри гIов фир-  
сори. Э хотур э хуне женг небу гуфдире оморем.

Эмин эз лэгIэ, эз сулаггьой гьомбузе вини хуьшде дуре ведешен-  
денде-ведешенде, э руьхшendirевоз деенишире э сифет Омар,  
мугу:

— Ме те имишев недануьсдем туь эз зентуь гьечи терспренн  
гуфдире. — Песеде у хуьшге, лэггьэре синей хуьшдере хурузе хуно  
э уьткемиревоз бируне ведешенде, мугу: — Валлагь, зен ме нэгI,  
бебе, келебебей эн зенмеш эз гьовре вэхуьшде миомогеш, мере  
межбур сохде эри гIов фирсоре нидануьсдуьт.

— Дие эричуь оморей?—эшекевоз пуьрси Омар.

— Гм... Оморем, чуйнки зен ме и се руз гурунд нечоьг э хьэлов  
дери, гIэйлгьо э хуне гIовсуьз тешне нуьшдет, чорейме небири оморем.

Ловггьой Омар гье усэгIэт э делхэкие хэнде варафд. У лап хуб  
дануьсденбу, ки Эмин эдее дургуни гуфдире, хуьшдере э пушой эн

Омар эри «хуьрд» несохде. Имбуруз шохьонгум у диренбу зен Эмине э кантор колхоз э счетоводевоз э хуьжет сохдеки: у трудоденгьюре гуйге э книжкой ю дуз нунуьвуьсди. Зен энубешгьэ эз шуьвер хуьше, е еклеуье, жендеклеуье одоми бу, имбуруз шохьонгумиш гьемишенней хуьшдере хуно руьхлуь, жуьргIэтлуь бу.

Эмин эз чумгьо ве хэндей эн Омар варасики у э е доне гоф ю бовор нисе сохде, унегуьре омбар дуьлпесо бисдо. У э буз дуь энгуьшдевоз эз зир ховорей хуьше гирде, э минетевоз денишире э сифет Омар, мугу:

— Омар, ме миром эритуь, э е доне одоми мегу, туь мере инжодирей гуфдире эри гIов оморейре, э зентуьш мегу.

— Эйчуь?—эй хьэз пуьрси Омар, дендугьоре сипи сохде.

— Э метелегьо гуфдиренуьт: «Сур туьре э дусд туь мегу, дустуьреш — дусди».

Омар хэндьсде, сере жумунд, егIни разини гуфдире э уревоз, эри олхогьин сохде уре, песеде папрусе шенде, вэхуьшд э пой, вегирд совучей Эмине, мугу:

— Хуб, нигуьом, нигуьом, веги бедирейтуре, гIов вегирим, бурайм э хуне.

Угьо э гIов вегирдеки, Эмин чаруьсд э лой Омар, лове э дусдие хэнде веберде, э менэхьэфиревоз мугу:

— Омар, туь и пушогьо эз ме туьфенг хосдебири эри э ов рафде буьзкийгьо эри зере. Себэхь дино туьфенгеш веги, патрандашеш.

Э ёр Омар омо, чуьтам эзи е орине пушо у э Эмин вохурде эз расдиш хосдебу эз у эри е-дуь рузи туьфенг хуьшдере дуь гуфдире э ю эри э ов рафде. Эмин недо, сер зиьди муту, лове дигил сохде:

— Гьисди ужире несигIэт: не туьфенге, не гIэсбе не зентуьре э кес ихьдибор месох!

Омар гьейсэгIэт вараси, ки Эмин эри ю менэхьэфи сохде, хоши гирде юре. Дуьл энубеш олхогьин нисди, терсирени имишеvine сур энуре, э пэхьники эри гIов берде оморейре, э кес мугую гуфдире. Дуьл Эмине эри жэгIм сохде, Эмин согьбоши гуфди, имид ло уре, себэхь ёгьин мидиров гуфдире эри туьфенг.

Омар не Эмин пура гьобгьошуре вегирдебируьт эри рафде, бирден угьо винируьт, чуьтам е гьолинде мерд, бедирегьо э дес дери. э дуьзди буравгьоре хуно, э иловле чумечару сохде-сохде, эдее э лой билогь оморей.

— Пой Эмин, екигеш эдее оморей!—бедирегьоре дуборе э хориноре, десе э гьул Эмин зере, асдалай гуфди Омар.

Гьолинде мерде диренге, ловгьой Эмин гье усэгIэт э хэнде ва-рафд.

— Эле! И гIээзисе начальникменики, гьуншитуь — председа-

тель эн Сельсовет Мехти Бабаев! Ме ебо уре гье усэг!Эт эз гьуйндууре килэхь энү шинохдуым.

Бирден Мехти, э хьисобовоз, вини э ён билогъ дуй одоми поидеире: У гье е бирден чаруьсд песово, сер гирд эри вирихде, э гужевоз пой вечире-вечире.

— Эмин, видов вогордун уре, гу: не терсуь,—десе э кемер Эмин зере, гуфди Омар.

Эмин совуче не бедирере поре э хори, видовусд э песой начальник хуьшде, комики ою э лулей г'энгг'о саташмиш бире, имог'ой эз уг'о вирихдениг'оре хуно, эдембу вирихде лой хурдехурде.

— Пой, пой! Э же вирихде туь, гьузи эз гуьрг вирихуьг'оре хуно? Менуьм, имуним, де кесиге нисди, метерс!..—гуфди Эмин э тасире сесевоз э песой кемер эн Мехти.

Председатель эн сельсовет чаруьсд песово. У виники э песой ю видовусдегор эз расдиш кес нисди, секретарь юни, дуьл ю екем олхог'ин бисдо, лов ю э хэнде варафд. Буше бедиг'оре венгесде э хори, у е луг'онде нефес вокоши, песеде килэхьэ эз сер хуьшде вегирде, эрэг' пушонире покурд.

— Погь, чуй герми! — гуфди у, гьутинег'ой хуьшдере нуф додоре-додоре. — Гьемеймере эрэг' шиши.

— Гьелбет, эрэг' мишишуь,—дуьлсухуни сохуг'оре хуно, мугу Эмин. — Туь гьечи эдембири видовусде, мугум неки ме, ерпаланиш э туь нирасуь.

Эмин хуьрмет сохде э председатель, вегирд эз хори буше бедирег'ой энуре, офдо э пушо. Мехти омо э песой энү. Бирден у поюнд Эмине.

— Эле, пой!—мугу у эз Эмин, десе э кемер энү зере. — Кем мундебу фурмуш сохдени. Э жун ишму э ижире вэхд одоми нум хуьшдереш фурмуш мисоху.

Мехти сере жумунд, лово э мог'буле хэнде веберде, песеде чаруьсде еново, сер гирд кинигере эри огол зере:

— Эй, ведиро, г'ээзи, ведиро! Инжо кес нисди, гьеме — эн имуг'ой!..

Е ченд дэг'дэг'гэ тирошде бэг'до эз песой эн е келе гьуйндууре чинордор, эз жилг'э е дег'паздег' митро дур бут'о, ведиромо е дуразе мерд, секретарь эн партийни организацией колхоз Селим совуй луг'и не е бедире э дес ю дери.

Уг'о гьерсееки оморуйтки э ён билог'ъ, Омар десг'оре лов сохде, э шори ве хэндеревоз мугу:

— Гьо! Хош оморит, софо овурдит, хуьрметлуь одомиг'ой диг'жэг'мет! Энжэг' бийт зеки иг'рол сохим: эзимбэг'дойге эри г'ов берде эз билог' шев нэг'I, руз бийм!..

— Туь чуй гуфдире, Омар, эг'уьлтуьре вир сохдей?!—терсирере

хуно мугу председатель эн сельсовет, комики гьелеш бегьем э хушде недироморебу эз гьаежони эни кор.

— Эйчуь нэгI?—мейл эн Омаре гирде, гуфди парторг. — Хушдени зиндегуни эдее межбур сохде имуре эри пузмиш сохде и герексуьзе куьгьне гIэдоте.

— Хушдени зиндегуни нэгI, зенгьойме нен туьни,— э десевоз бирмунде э хушде не э парторг, э хуьрешевоз гуфди секретарь сельсовет, чумгьоре келе сохде. — Дуьм энугьо имогьой лап тик бири. Е кем дуьм энугьоре шишире, сигьмиш сохде гереки,—пое э зарбевоз э хори шишире, гуфди Эмин.

Председатель сельсовет сере жумунд, песде могьбуле хуно хэндусд.

— Эмин, хьитиёт, гьечу мегу, небуге э жигей дуьм энугьо, дуьм имуре мишишуйт,—гуфди Мехти э секретарь хушде, белки э ёр овурде гье и минут эз сер дорд дорей гье мендил бесденигьо зен хушдере, комики неденишире э келе гьурлугь эну э дигь, э гужевоз фирсори уре эри гIов э билогь.

Те председатель сельсовет не парторг колхоз, секретарь сельсовет э еки хьуьжет сохде, гIов вегирде эз билогь, Омар эдембу денишире э ковре мохбер ухшеш зеренбугьо темизе асму, э жовогьиле хуно ушшуйгь доренбируьтгьо омбаре асдарагьо, э товушлуье менг. Гьеме имбуруз бире коргьо, гьеме гьейсэгIэт чуь у диге, шиновусдге э сер эн билогь, эри эну зарифет, хэндере хуно омо. У хэндусд э ёр эну омоки елэгIэзоине терсгьо-бингьой эну, чуьтам у эри дуьзди сохде биёвгьоре хуно пэхьники-пэхьники оморебуге инжо эри гIов, эз ю бэгьдо — е ченд мердгьойгей дигьиш юре хуно, угьош песде ки?..

Гье и вэхди э кулелугь гене сер гирд буьлбуьл эри хунде. Омар лове э хэнде веберде, дениши э лой Эмин, Мехти не Селим, комигьоки пура бедирегьоре, совуре э пушошу норе, поисдебируьт э гузет эну. Песде у десе э лой товуше менг не жовогьиле астараягьой асму кешире, шори сохдере хуно, келе-келе мугу:

— Эз расдиш, дусдгьо, чуь раче, гIэлемете шеви имишев?!...

## ЧУЬТАМ МЕ ДИССЕРТАЦИЯ ЧУЬВУЬСДЕБИРУЬМГЕ

— Эй мерд, туь мунош, эйчуь ние нуьвуьсде туьш диссертация, кандидат наук ние бире? Песде, чуьтам гуфдиреге, худо келеи, докториш мибоши?—эдее гуфдире эз ме зенме э мигьровуни, маьхэнефиревоз, иму шохьонгум эри чой хурде нуьшдеки.

И пуьрсуйш эн зен ме эриме лап келе маьхтели омо. Эз маьхтели, нэхэбереки эни гоф, чой э бугьозме гьуьлчугье хуно мунд.

— Эз же омори бирден э дуьл, фикиртуь ме биё диссертация

нуйвуусуым гүфдире?—э мэхтелиревоз пуьрсируым ме эз зенме.  
— Эйчуьни мере диссертация?

— Чуйтам эйчуьни?!—дие э хоши-менэхэфиревоз нэгI, гъэгъри-гIоск бирере хуно эз гофме, гүфди зен, гъошгъобогъэ дулла сохде. — Гъери чуй хэйри эзи нуйвуусдеигъойтуь, мэхсерее ихдилотгъойтуь? Хэлгъ хундени, хэндуйсдени, оммо мере эз коргъойгуь неки дуьл хэндуйсдеи, зар доноре, гирисде воисде.

— Эйчуь эхи?

— Ме дануйсденуым эйчуьиге!—лап гIоси бире, гүфдирени зен. — Э туьревоз э и хуне е бегъем нуьшде, гоф сохде, хэндуйсде писе бире. Гъемише нуьшдени э куьнж хуне, сере э когъоз доноре, гъе эдее чуьниге думит сохде эритуь. Эгенер гIэребир туь гоф сохденигеш, э имуревоз нэгI, э хуьшдеревоз гоф сохде, эз эгъуьл чешмиш бире одомире хуно. ГIэйлгъош э туь денишире, терсиренуьт. Эгенер иму диренимге хэнде э ловгъойтуь, э сифеттуь, диреним энжэгъ увэхди, кейки туь и мэхсерее ихдилотгъойтуьре э нуйвуусдеки,—э жегъендем гердо угъо. Песде чуй бири имуре эзи нуйвуусдеигъойтуь? Имуре пули, дачи, мошини, е хубе сер-тени? Туьренум гисди, оммо э хори чи нисди, коргъой гуьгъоре хуно: «Оди вор, доди — юх», Э жун худо, зиндегуни нисди э и хуне!..— э чум гIэрсиревоз гүфдирени зенме.

Ме гуьм э ишму, и гофгъоре ме эзу ченд бо шиновусдем, оммо эз товун диссертация нуйвуусуым гүфдире суьфдеи гиле эдесе шиновусденуым. У эз расдиш негирисуь гүфдире, ме сер гирдуьм э хоширевоз эри гүфдире эзу:

— Согъ гIуьмуьрме, эз лап жовоне вэгIдо, хуб-усол, сенигIэтме и кор бири. Чуй биё сохум ме имогъой э гүфдирейтуьревоз?

— Чуй биё сохи?! Дегиш сох сенигIэттуьре, бош кандидат, доктор?! Эйчуьни туьре и сенигIэт, чуй дори туьре у?

Мере омбар гъэгър омо эз гофгъой зенме. Эриме лап гурунд омо, зенме, лап куьнде одомиме э ижире бихуьрмети, охмури ве биразиревоз эдее гүфдире э товун эни четине, хуьрметлуье сенигIэтме. Мереш воисд е-дуь дуьлхуьрдие гоф гуьм, гъэгър дуьм уре, оммо денишируьм э сер сервант вебугъо гъутилей эну, эжеки дебу ченд жире дермугъо, таблеткагъо эз сер дорд дорей, ховсуьзи, давление, ме сабур сохдуьм. Ме сер гирдуьм э хубиревоз эри варасунде э у, ки мере гъич дуьл-хъэвес нисди эри диссертация нуйвуусде, эриме диссертация нуйвуусдеш екини — э дерзеревоз э хори чол векендеш, четини.

— Гъич е четиниш нисди!—э жуьргIэтевоз мугу зенме келекеле,—песде сес хуьшдере е кем аста сохде, мугу: — Гъелбет, э гIэрей эну диссертация нуйвуусдегоре одомигъо деруьт эгъуьлменде, талантлуье одомигъо, худо гъувот до ишуре. Оммо э гIэрей энугъо гъемчун деруьт ужирегъош, комигъореки не эгъуьли, не талант.

И гоф хуышдере эри субит сохде, зенме овурд нум эн е дуре гъовум хуышдере, невезендей эн холешуре, комики, э гуфдирей энуревоз, «е буше, мувэхьсуьзе одомини».

— Оммо нуьвуьсдики диссертация, кандидатиш бири,— мугу зенме,—оморе-оморе—докториш мибу. Туь чен уш нисди?!

Эз гофгъой зенме мере унгъэде хъэз неомогеш, оммо угъо э ме кори сохдуьт. Ме сер гирдъум эри фикир сохде. Эз ело и гофгъо, мурмуригъой зенме э товун эни сенигІэтме визор мере берди, эз елойге э ёрме омо, ченгъэдер могъбулигъо, дуьлхуьрдигъо расириге э ме эз товун эни «мэхсерее ихдилотгъойме». Кими хундегоргъо гъечу дануьсденуьт, ки ме эз товун хэндее, енебуге руьхшендие хосиетгъошу, енебуге хьиллее коргъошу нуьвуьсдем угъоре, э ме э гъэгъри-гъэгъри дениширенуьт. Дирем ме ужире одомигъореш, комигъоки хуышдере хундегор, дануьсдогор хьисоб сохденуьт, оммо мэгІной эни зарифатие ихдилотгъоймеге нисе варасиренуьт, сер гирденуьт ишуре воисдере хуно егІэлмише жире гуфдире э товун энугъо. Песде эз расдиш мере е бегъеме пул небири е «зиедие» чи эри восдоре.

Гъечи эриме фикир сохде, ме эриме теслих сохдум (расдире гуюм—недуьл-недуьл) э гоф зенме денишире, диссертация эри нуьвуьсде. Ме и коре эриме гъечи фикир сохдумки, э пушойме гъе усгІэт поисд ижире пуьрсуьш: чуй тема вегируьм эри дессиргациейме, комини жирей гІилме гІошир сохум э нуфвуьсде диссертациеймеревоз? Ме омбаре темагъоре эриме веровурд сохдум, оммо эз гъемей энугъо отказ сохдум, варасируьм, ки ме э у темагъо диссертация нуьвуьсде эз сер берде нидануьм. Увэхди ме эз зсчма пуьрсируьм:

— Гъери гу винуьм: э товун чуй нуьвуьсди у «буше, мувэхьсуьзе» невезендей холейтуь диссертацией хуышдере?

— Э товун бихуьлуьгъоиге, мужинегъоиге, мур-мужакиге, эхирки — э товун гъашерет,—лове э хэнде веберде, жугъоб де зенме, шори сохдере хуно: егІни, ме эхириш э эгъуьл оморем, имогъой белки диссертация нуьвуьсдуьмге.

Гуюм расдире, и жугъоб зенмере шиновусдуьмки, гуйге ме шор бисдорум. Ме эз товун де чигъойге унгъэде нисе дануьсденуьмгеш, оммо эз товун гъашерет: молихгъо, эбрэгъгъо, шудгъо, мегезгъо, мужакгъо, пеленгъо, кекгъо лап хуб дануьсдебируьм. Ме эз деде бирем ве вереморем э е увэхдигъо лап пес мунде дигъ. Чор килей энугъо — гъеме чул-више бу, э бегъем товуш, пенжере недерие саре хуней гилови. Хунейму гъемише пур бу эз кек, мужак, мегез, шуд, эбрэгъ ве уьзге ижире чигъо. Э ёрмени, е гиле шинох иму эз гъуншише дигъ, бебеймуре руз эйхр бу доре: пуьрси:

— Довуд, чуйтами кефтуь, хьолтуь, зиндегунитуй?..

Бебейму гъемин гъе и вэхди, кутэхъэ пусти хуышдере вокурде, э пушой хъэёт иму поисдубу. Гъе и вэхди э хьисобовоз эз куьгъне

пусти энү е кек ведироморе, гІэнж гирдебу бирэхъне герден энуре. Бебейму э зарбевоз зере эз герден хуышде, кеке эри куышде, мугу:

— Зобу нисди, гъуногъ, энжэгъ и шудгъо, кекгъо эдете хурде вечеренуыт имуре.

Илдогъки э хунейму мужак не мегез омбар дебиренбу. Инжи-миши омбариш эзугъо бу. Ме эриме теслих сохдум эри нуьвуысде диссертация э товун мегез хуней. Оммо ме сер гирдуымки эри ши-нох бире чух нуьвуысде омorige эз ме пушоте э товун мегез, ме мадан, ки омбаре литература нуьвуысде омори э товун эн зинде-гуни, жинс, гІэсуьл, беден ве зарал овурдеи эри одомигъо мегез хуней. Оммо и овхьолет дуьлмере хуьрд, пешму несохд. ГІилм ас-муре хуно гъэдерсуьз келеи, уре не сери, не эхир. Ме эриме ве-гирдуым ужире темаре, комиреки те ме расире гъеле екиш нунуь-вуысди: «Бешгъэи хосиетгъой эн мегез дигъи эн хуней эз эн шегъе-ри ве чорегъо эри нисд-гъирмиш сохде угъоре».

Эри бирмунде, чухтам лап герекиге, гъиметлуьниге ижире те-ма, ме э «пушойгофи» эн диссертациейме нуьвуысдуьм, овурде тофгъой эн келе гІилмчигъоре, чух келе зарал, хэто ве секоненниге эз мегезгъой хуней, чухтам эн дигъи, гъем эн шегъери эри зинде-гуни ве жунсогъи граждангъо. Эзу товун, ки мегез гъисди лоз сох-догор жуьрбежуьре гІэзоргъоре (ме шумордуьм: э куьнди чухьл жире гІэзор лов сохденуыт угъо) ве угъо, мегезгъо, гъисдуьт э гъе-ме хоригъо-улкегъо, унегуьре гъер нуьвуысде оморе диссертация э товун мегез, гъемчун диссертациейме — гъисди лап герекуьл ве гъиметлуь чухтам эри ГІилм, гъемчун эри гъемей инсонет.

Эки эз бинелуье серней эн диссертациейме бу: «Бешгъэи хо-сиетгъой эн мегез шегъери эз эн дигъи».

Ме э и серне гуфдирум, ки эз сер-руй, жендек, буй-бала, беден, жинс ве гІэсуьл мегез шегъери гъич бешгъэ ве тефигІэтлуь нисди эз мегез дигъи. Оммо э хосиетгъой энугъо омбаре тефигІэтгъе, беш-гъэигъо деруьт. Меселен, мегез эн шегъери бежиди, дилбоши, не-динжи, гІорсуьзи, сэхде руи. Уре пиш сохдиге эз хуне, у гене сере э бигІори доноре, вогошдени песово, вогосирени э шишей пенжере, сер гирдени э шепшоиревоз зури-зури эри варафде-фураморе э сер шише, гъэрез эз хуне нисе вадарафде. У дануьсдени, ки чухтам одоми э кек гуьре пустире нисе сухундениге, эгенер у жиггир-де-луь нисдиге, гъечу екиш эз серботи эн мегез зере пенжерей хуыш-дере хуьрд нисоху, уш э гъейсэгІэтинe вэгІдо, кейки шише гъити.

Оммо мегез эн дигъи динжи, саламатлуьтеи, унгъэде бежид бигІор енебуге нервни нисди. У гъемише ховолуьре хунои, э жиггей хуышде лос поисде, думит-фикир сохде уре хъэз оморе.

Ме, гъелбет, хэйли фактгъо овурдум эри субит себеб эни беш-гъэигъой хосиетгъой эн мегез дигъире эз эн мегез шегъери. Месе-лен, бирмунде угъоре э шон эн социальни овхьолет, э комики зи-



гьисденуът ве вороморенуът мегез эн дигьи ве мегез эн шегьери. Меселен, э шегьер гьемише сес омбари, гудокьго ве сигнальгой эн мошингьои, гуш одомире кар сохденигьо сиренагьой эн гьирмизине пожарни мошингьои, одомире визор овурденигьо сесгьой мотоциклгьои, тэх-тух эн грузовикгьои. Э эвир шегьер туз, дуре омбар дери. Хунегьо гьуьндуьруът, ченд тебэгьэинуът. Э хори, э «зир пой» кем чи офд оmore эри хурдей мегез шегьери. Оммо э дигь сокитини, эвир темизи, сесгьой мошингьо унгьэде нисе оmore, эри мегез хурдение чигьо пур-пурини э хьэёт, говду, э сер пейнгьо, хокоругьо, э иловлей дигь гьисдуьтгьо богьгьо ве бисдугьо. Унегуьре мегез эн дигьи гьечу чумгисне, тундехей ве серсуре хуно нисди эн шегьерире хуно.

Оммо э фикирмеревоз лап келе хэйр ве зурбо гьиметлуьи эн диссертациейме э пушой гилм ве эн гьемей инсонет э у кор дери, ки ме э диссертациейме бирмундем лап хубе имидлуье чорегьо эри нисд-гьирмиш сохде гьеме мегезгьоре эз руй хори, вой мегез эш шегьерире вой мегез эн дигьире.

Расди те ме расиреш гилмчигьой эн ченд жире хэлгьгьо ве вилеетгьо нуьвуьсдет, чуй жире чорегьо ве дермугьо герекиге мегезгьоре эри пуч сохде. Оммо ме э диссертациейме нуьвуьсдемгьо чорегьо эслогь бешгьэуът эз энугьо. Меселен, ме э диссортациейме нушу дорем, ки чуйтам бэглэвечегьоре «межбур» сохде герекиге эри гьирмиш сохде и куьгьне ве гьэдимие дуьшмен инсонете—мегезе.

Белки ишму эз ме пуьрсирит: бэглэвечере эйчуь? Буьлбуьле, паруьсдеке эйчуь нэгл? Ини гьейсэглэт гуьом эришму. Буьлбуьл, паруьсдек не бэглэвече эз бинедан эз е жинс гьисдигеш, оммо э дивэгл энугьо лап келе бешгьэигьо деруът. Меселен, буьлбуьл не паруьсдек гьетте поиз бире, э кун ишу е кем хиники расире, дир несохде, паруьсде учмиш биренуът э дуре герме вилеетгьо. Угьо вогьшденуът э киму энжэгь гермигьо сер гирденге. Оммо бэглэвече согь сал, э гермигьо, э хиникигьош гьемише э е жигей, э е жигеш нисе рафде, мескен хуьшдере дегиш нисе сохде не э вэхд гермигьо, не э вэхд хиникигьо. Оммо эз бэглэвечегьо эри инсон унгьэде хэйр нисди эз зарал гьисдигьо. Бэглэвечегьо омбаре пучнигьс овурденуът эри богьгьо, емишгьо, тэхуьл иму. Гьеме сал угьо э хэрмонгьо, элеваторгьо, складгьо—э тэхуьл дошде оморенуьтгьс жигегьо э сад тоннагьоревоз гендуьм-тэхуьле пуч сохденуът.

Эри субит сохде'ме гьейсэглэт гуфдируьмгьо коре, ме э диссертациейме овурдуьм ижире факте (полевой материала). Э склад эн е колхоз пур те сергьови декуьрде оmoreбу гендуьм эз хэрмонгьой колхоз. Е се мегь гиросде бэгьдо э и склад оморут ревизоргьой колхоз эри фегьм сохде, чуйтам инжо дошде оморениге гендуьм, гьеме гендуьм э жигей юниге, эз бун склад дэгь-воруш нисе оmoreге. Оммо угьо гьетте дер складе вокурде, гьогь-мэхьтел

бисдорут мундуът э жигешу. Э гъэд эни се мегь э склад дебугьо гендуым эн колхоз те нимеш немундебу, неденишире э у кор, ки э гъэд эни вэхд е килограмм гендуьмиш э разнарядкай колхозе-воз э е жигеш доре неоморебу. Завсклад диренте и мэхьтели эн членгьой ревизионни комиссиере, гье усэглэт дуь энгуьшде э лэ-глэ доно, е келе фит зе. Гье и туьтем эз сес фит эн завсклад тер-сире, е десде бэглэвечегьо, нуьшдебируьтгьо э руй эн гендуым, эз жигешу паруьсде, варафде пэхьни бисдорут э сергьови эн склад, э глэрей гьитгьо.

— Иний, нимей эн э склад дебугьо гендуымгьоре э гъэд эни се мегь гьемере бэглэвечегьо хурди,— мугу завсклад.

Завсклад эзи жире кор дуьлхуьрд, могьбуле хуно бисдорутгьо-ревизоргьоре хуб гьуногьлугьи сохде, дуь э екиревоз пейле зере бэгьдо, гье инжо, э гъэд склад нуьвуьсдуьт акт. Э и акт угьс нуьвуьсдуьт, ки нимей эн э склад эзи се мегь пушо декуьрде омо-ригьо гендуым недери. Оммо тэхсири эни кор э завсклад невери Гьемей эни гендуымгьоре бэглэвечегьо хурдет, э чинедун энугьс пуч бирет.

Э и фактевоз ме бирмундум чуй жире зарали зеренуьтге бед-нефсе бэглэвечегьо э запас тэхуьл иму, межбур сохдениге хьуькуь-мет имуре эри запас суьрх хэзинеймуре доре Америкаре енебуге Канадаре, восдоре эзугьо имуре вес нисе сохденигьо тэхуьле.

Ме э диссертациейме нуьвуьсдуьм, чуйтам межбур сохде ге-рекиге бэглэвечегьоре э жигей гендуым, дон, бэгли-емиш гиде хурде энжэгь мегезгьоре, чуйтам эн шегьерире, гьемчун эн дигьире Кутэхьи гоф, хурек энугьо биё бу де чиге нэгл — энжэгь мегез.

Ме неки дорум ижире идея, гьемчун бирмундум чуйтам уре зиндени гировунде герекиге. Ме дорум теклифи эри жуьфд сохде бэглэвечере э паруьсдекевоз, э гьечиревоз бэгьдовой ченд ижире синогьигьо гировунде бэгьдо эзижире жуьфд бирейгьой энугьс глэмел оворде тозе жинс — «бэглэвече-паруьсдек».

Ме ижире теклиф дорум эзу товуне, ки паруьсдек энжэгь ме-гез-мужак хурде. Э гъэд е руз е паруьсдек филонгьэдер мегез, му-жак фуберде э паруьсдеки. Паруьсдени у гунлере хуно, э куьнди сади бисд киломежр э е сэглэт.

Э и ме гуфдируьмгьо тегьеревоз ведировунде тозе жинс «бэглэ-вече-паруьсдек», доре бэглэвечере ужире чигьретгьой эн паруьс-дек — бежид пар зерей э гьово, э жигей гендуым, емиш— хурдени энжэгь мегез, мужак. Э и коревоз иму эз ело эз мегезгьо хилос мибошим, эз елойге дон, тэхуьл имуре эз бэглэвечегьо мидорим.

Ме э вэхд диссертация нуьвуьсдеи зенме лап хуб бу э меревоз. чуйтам буге э суьфдеи бэхдевере салгьо иму эвленмиш бире бэгь-до, гьэйгьулуь, мигьрову. Глэйлгьо э хуне сер мигирдуьтге эри вози енебуге нединжи сохде, у гье усэглэт хьэрой мегирд э сер энугьо:

— Динж поит, сес месохит! Бебе эдее диссертация нуьвуьсде!

Гьетте ме диссертацияре нуьвуьсде вараде, ме ебо эн суьфде хундум уре эри зенме. Уре лап омбар хьэз омо эз диссертациейме. Меш дир несохде гье у руз фирсорум диссертациере э кафедрой биология э еки эз университетгой вилеет ему... Оммо чуй кориге те имогьоиш эз унжо е хэбер, е жугьоб нисди согъ е сал гиросш-дигеш эз ме унжо диссертациеймере фирсоре. Ме дуьлпесоюм э дуьлме гьерчуь гири оморени. Оммо зенме олхогьини. Уре сэхд имиди ме ёгьин кандидат мибошум гуьфдире, егъни, у «буше му вэхьсуьзе» невезендей холей энун кандидат бире жиге, ме худс гьийшдге, гофсуьз мибошум...

## ХЭБЕР НЕ ГЫНГЪЭР

Келе мерд Гъэзиз ведиромо эз хуне, поисд э минжи хьэёт, де ниши э иловле. Гьово эдембу торик бире. Иловлей дигье гьуйн дуьре боругьой гьэлебендире хуно вадабуррабируьтгьо догььгьс гьейсэгъэт е пертовуш веде биренбируьт эз торки. Э гьово суьф деле асдарагьо о дегесиребируьт, э хунегьо—лампагьо.

«Вэхд бири эри рафде, дие бурам»,—гуьфди э дуьл Гъэзиз. У суьфде пой норебу эри рафде, кейки эз говду бесдуй шир э дес дери, ведиромо зен энун, поисд э пушей шуьвер хуьшде. Зен Гъэзиз е дуразе лэгъэре зен бу. Е минут угьо э екиревоз гоф несох деки, поисдуьт э рачеберачей еки: гъэзиз сарле, чуйкелеле бу, лэ гьэр, зен ю—гьуйндуьр, гоз-гозе хуно.

«Дори дие худо мереш ижире зен»,—э хуьшде хэндуьсде, э дуьл хуьшде гуьфди келе мерд. У э руьхшендире воз денниши э буй-балаф зен хуьшде, гьэичи зере сипре кутэхье руш хуьшдере тимор сохде сохде. — Чуйтам хосдемге ме и зене у вэхдигьо—серме нисе ва дарафде».

Гъэзиз, неденишире э келе мерди хуьшде, дуьлшоре, зарифат хьэз оморенигьо одоми бугеш, уре гьэгьр оморенбу зен эн у гье чи э пушой ю оmore поисденге, эз гьуйндуьрибалай хуьшде дени ширенбуге э сари энун. И коре у эри хуьшде хуьрдире хуно хьисоб сохденбу.

Суьфде сер гирд эри гоф сохде зен энун.

— Эй Гъэзиз, туь гене эже рафде сер шохьонгум?—пуьрси у э шуьвер хуьшде.

— Э гьержой мере воисд эдей рафденуьм, э туь чуйни?!— хуььжет поисдере хуно, гуьфди у.

Песде келе мерд, сере тик гирде, э уьткемиревоз зе гиросш эз пушой зен хуьшде.

Келе зен э хуьшде домунде, гье гьечу поисд э минжи хьэёт, пес де гуьфди, келе-келе э песой шуьвер хуьшде:

— Кмогьой гІэилгьо эз кор биё биёвт, гьингэр э сер кинле вери, дуьшири, поисде е кем сир куфде, песде гьеме э еки чи ми хурдим дие!?

ГІээиз гьич гофгьой зене э гуш хуьшдеш негриде, пой вечи песде бирден э ёр ю е гоф оморере хуно, чаруьсд песово руге зег хуьшде, хьэрой сохде, гуфди:

— Ой зен, э метелегьо гуфдирени: «Эз хэбер гьингэр хуби» Оммо эриме эз гьингэртуй хэбер, гоф меслэхьэт ширни. Ме эле, эри меслэхьэт гуш веноре рафденуьм, тозе хэбергьо эри шивонусде.

Гуфдире мунде и гофгьоре, ГІээиз диеш зури-зури пой вечи. У э дуьл хуьшде бирази бире, вешмерд зен хуьшдере. У терсиренбу дир мибу гуфдире э рафденитгьо жигей хуьшде. У гьейсгІлэт эдембу э клуб рафде. Эз себэхьмундеревоз радиоузел эн дигь се гиле хэбер дорегу, ки э дигь лектор омори, имбуруз шохьонгум лекция эри хунде: «Чуьтам зиндеи ве инсон э гІуьлом гІэмел омори».

И дуь сал бу ГІээиз эз колхоз э пенсия рафдебу. Корсуьз у э хуне гьэррол нисе гирденбу. У гьемише оморенбу э клуб лекция эри шиновусде, енебуге собрания биренге. Имбурузине лекция бу эри э худо, э дин-догІот бовор сохденуьтгьо одомитгьо. Омбардеки эни одомитгьо э дигь келе мердгьо, келе зенгьо бируьт.

Эдее гуфдиренуьт и оморитгьо лектор лап жовони, э гІуьмуьр невегьо, нишрегьой эни кими келе мердгьои,—эдембу фикир сохде э дуьл хуьшде э рафдеки пире мерд. — Гьисди-гьисд дие жовон, жогьил. Э метелегьо гуфдирени: «Эгьуьл еште улмез, бошде улар» Кимигьоре мивини, руш сипи сохдет, омо э сер ишу эгьуьл невери, коргьой гуьгьоре хуно: «Нун хурдени, гІуьмуьр дураз сохде». Оммо э кимигьойге мидениши — жовони, гІэили, оммо — зиреки, данандеи. Негьогъ нисе гуфдире: «Биренитгьо вече эз гьэд хое жив зер».

Гьечи эри хуьшде фикир сохде-сохде, ГІээиз недануьсд кей оморе расиге э клуб.

Клуб одоми пур бу, гьеме келе мердгьо ве келе зенгьо бируьт. Э трибуна поисдебу е назуке, жогьиле кук, ранги-барангие галстук э герден ю дери, сие, хуб шуне зере, тов-товие муйгьо э сер вери. Э скамейкагьо жиге небу эри нуьшде, энжэгъ э суьфден скамейка, э пушой эн трибуна е дуь-се жиге мундебу. ГІээиз гирощд нуьшд э еки эз хэвлете жиге, сер гирд эри гуш веноре.

— Хьовиргьо!—мугу жовоне лектор, э ки э клуб оморе одомитгьо руй бире. — Те ебо эришму ихдилот сохде, чуьтам э гІуьлом зиндеи ве инсон яратмиш бириге, мере воисдени гуом э ишму чуьните хуьшдени эн зиндеи-зиндегуни.

ГІээиз жумунд хуьшдере э битобиревоз, десе э ён гуш хуьшде гирде, сер гирд эри э тигьэтевоз гуш дошде. «Гьери вним чуь

гуфдиреге и жовон эриму, эри келе мердгьо, э товун эни кор», — э дуьл хуьшде гуфди ГЭэзиз.

— Зиндегуни гьисди жирей ешемиш бирен эн белкови чигьэ,— гуфди лектор. — Биней эн процесс зиндегуни гьисди гЛэре недоре тирошдеи ассимиляция ве диссимиляцией эн зинде...

Келе мерд ГЭэзиз чумгьоре гъужунд, сере сэхд жумунд, гуйге пире мувэхь хуьшдере эри хуб э кор овурде, жендек хуьшдере е кем пушово до, хьэрекет сохде эри варасире, хуб шиновусде гофгьой эн лекторе. Оммо у тене невараси чуй гуфдиренбуге эри энугьо оморигьо лектор. Лектор гуйге фурмуш сохде эри коми одомигьо хундеге у лекцией хуьшдере, омбардеки комигьоки кем-совод енебуге эслогь соводсуьз бируьт, эдембу туькуьлмиш сохде жуьрбежуьре философски гофгьо, термингьо: агностицизм, детерминизм, мистицизм, идеализм, дуализм, анимизм, пантеизм, папсихизм, гирде нумгьой Платоне, Аристотеле, Спинозе, Гегеля, Фейрбаха, Дарвине.

« И чуй нумгьои и жовон пес-песоеки гирденигьо? — эдембу думит сохде эри хуьшде ГЭэзиз. — Кини и одомигьо э ижире нумгьоревоз? Мердгьоют угьо небуге зенгьоют, христангьоют, егьудигьоют небуге буьтперезгьоют, муьрдегьоют небуге зиндегьоют?... Белки у кефсуьзи, э у гЛэтош вери? Э одоми гЛэтош верики у неки гьерчуь гири эз лэглэй хуьшде пертово дорени, эзу гьерчуь гири бовори...»

Э ёр ГЭэзиз омо гьейсэгЛэт, чуйтам у е тиле суьтенжен бире, э хьэлов дегешденге, э у гЛэтош верики, зен эн уре э герме шир дореки эри хурде, у гьерчуь дануьсд'и зен ю нисди, гЛэзроили эри жун юре берде оморигьо. Увэхди ГЭэзиз гьеебо эз некуми эз хьэлов нечогьи вэхуьшде, хэнжеле эз гьиче вегирде, видовусдебу э песой зен хуьшде эри куьшде уре. Худо ники сохд, сес хьэрой зен энуре шиновусдогоргьо (бисдо. Угьо оморут, гирдуьт ГЭэзизе, хэнжеле восдорут эз дес эн у, э гужи-хуширевоз уре берде э хьэлов ю дегердундуьт.

ГЭэзиз э и фикиргьо'дерики у э песой кемер хуьшде бирден сес эн е келе пих зереире шиновусд. У чаруьсд песово, мивини усдодемирчи дигь Сафар, е екелуье жонлуье мерд э келе фирегье дуразе биггььоревоз, турунде пенжегьой хуьшдере э сер гъуьндуьре синей хуьшде веноре, хисири, эдее пих зере. У э пих зереки, синей эн у усдохоней эн у деригьо куьрюке хуно эдее варафде фурамо-ре. Угьониге нуьшдет недуьл-недуьле хуно. ГЭэзиз тоб недо, гоф лекторе бурра, мугу, десе тик гирде эз нуьшде жигей хуьшде:

— ГЭэмел миёв!

— НэгИ!—бирден э жигей лектор эз гьэд хов хьэрой дешенд усдо,—ме хэртуьре гьеле нэгИл незерем.

Демирчи гье усэгЛэт хэбер бире, ховолуь дениши, мижегьой чуме куфде-куфде, серсоне хуно, варасире, ки ю э усдохоней хуьшде

нисди э клуби, уре гІэйб омо. Э клуб дебирегоре одомигьо сер гирдуът эри хэндуйсде, зарифат сохде. Эхир хэнде, гофгьо поисдки, лектор, биразии хуышдере небирмунде, руй бире э ки ГІээзиз мугу:

— Ишмуре гоф пуърсире воисде? Ме гьеле лекциеймере неварасдем. — Песде у екем поисде, мугу: — Бошгу, гуит чуй гуфдире вопсденбуге ишмуре.

— Эн суьфде, балай ме, мере согьитуй воисде,—э эдеблуйире-воз мугу ГІээзиз, оммо екем э руьхшендире-воз, кутэхьэ сипре руш-легьой хуышдере тимор сохде-сохде. — Ту, балай ме, э ме, э келе мерд бэхшлемиш сох, ме гофтуьре эри зерей. Гьэйгьу нибу, шев дурази, мугуи ченгьэдер туьре воисд. Дануьсдени чуйиге? Керг хое сохдени биринге, туь уре э тапинжере-возиш терсундиге, у хой хуышдере несохде нибу. Эн меш гьечини: э дуьлме е гоф омоге, ме уре негуфдире, енебуге непуьрсире гІэмел нисе оморенуьт, тоб нисе доренуьм. Ижире хосиет дери мере...

Лектор тоб недо, пешму бисдо и пире мерде эри гоф дорей, мугу:

— Эй леле, гофтуьре куьтэхь негуи, чуй гуфдире зэисдеге туьре?

Келе мерд хуышдере э нешиновусдеки веноре, сер гирд гене гофгьой хуышдере.

— Туь, балай ме, белки шиновусдей метелеймуре: «ГІэсбе эз рафдей ю дануьсде бире, одомире—эз гоф ю». Эйчуй гуфдиренуьм ме гофе? Туь гьейсэгІэт мугу эз иму, ки зиндегуни «халам-балами», егІни, хьэпуьр-чуйпуьри. Ме и гофтуьре шиновусдумки, эри-ме фикир сохдум, туь нисе дануьсде холисе зиндегунире, гьечи гуфдире бэгьдо э товун энү...

— Ме гечу негуфдирем!—мэхьтел, гьэгьри бирере хуно мугу лектор.

— Гуфдирей, гуфдирей!—е ченд одомий жугьоб дорут эз нуьшде жигешу.

Лектор хэндуйсде-хэндуйсде, сере жумунде-жумунде мугу:

— Ме гуфдирем «ассимиляция ве диссимиляци», оммо «халам-балам» нэгІ.

— У гье екини, чутам гуфдирениге «Вой Хужа-Али, вой Али-Хужа»,—хьэрой сохдуьт эз песои скамейкагьо.

— Инией, винири!—шори сохдере хуно мугу ГІээзиз. — Гоф бэ-гІэвечере хунои, гуфдири—гирде нидани. Дануьсдени, чуйниге, балай ме, зиндегуни омбар темэхьлуье чини. Негьогь нисе гуфдире: «Зиндегуни шура гІове хунои, ченгьэдер хурди, унгьэде одомире тешне бире». Ини чуйниге, чуйтамиге зиндегуни. Ме э гІуьмуьр-ме хубигьош, зобунигьош омбар дирем. Ме имогьой келе мердуьм, неденишире э келе мердиме мере гье зигьисде воисде. Хуб мибисдо, эгенер туь мигуфдиреге эриму, чуйтам зиндегунире диеш хубте сохде гереки, гІуьмуьр одомире—дураз. Ини и пушогьо э инжо

эриму е духдир е лекция хундебу э товун пиёнискеи, зарали энү эри жунсогъи одоми. Песде пиёне одоми делуьре хунои, омбаре хэтогоь э сер пиёнискеи бире. Бебегъо-келебебегъо дуз гуфдирет: «Эгенер жингов эз пушо, хэр эз песо терсиге, пиёне одоми эз гьер тараф терси»...

— Весси, нуьшит э жигешму!—э гъэгъревоз гуфди лектор эз гІээиз. — У ишму гуфдиренитгъо гофгъо тсмай эн лекциейме нисди. — Мешет мебошит э де одомигъойге эри гуш веноре лекцияре!..

ГІээизе воисденбу гене е дуь хубе гофгъо, неси! Гэтгъой хуьш-дере гую эри эни жовоне лектор, оммо у гъэгъри, пешму бирере хуно, десе фушенде, нуьшд э жигей хуьше. У теслих сохд эри хуьше, те эхир эн лекция сабур сохде нуьшдени, е доне гоф эз лэгІэй хуьше неведиронвунде, чуьш лектор негуфдиге.

Оммо, кейки лектор э кутэхэ жире «шинох сохдки» э клуб нуьше келе мердгъо ве келе зенгъоре э эволюционни ученией Дарвиневоз, песде сери-куни гофе туьнжо неовурде гуфдики эз угъо, ки суьфдец одомигъо, эз комитгъоки иму, инсонгъо, гІэмел оморейм, эз Одом не Хьово небирет, чуьтам гуфдиренитге э Туро енебуге э Гъурон, эз э жире-хумней одоми гьисдуйтгъо меймугъо гІэмел оморейм, келе мерд ГІээиз ве угъониге лап мэхьтел, бирази ве гІосире хуно бисдорут. Омбаргъой! энугъо э гъэгъревоз «аставпирулла!» гуфдире, э битобиревоз жуьмуьсдуйт э жигегъошу.

Неденишире э и кор, жогъиле лектор эдембу туфдире э угъо:

— Еки эзижире меймугъо — гьисди орангутанг, егІни,—«одоми вишеи». Орангутанге чуьтам одомире хуно дуьм невери, э гьер дес энү пенж энгуьшд вери, э лэгІэй ю — сив дуь денду дери эн имугъоре хуно. Гъеме э жире-хумней одоми гьисдуйтгъо меймугъо — горилла, орангутанг, шимпанзе, тиббону—угъо дануьсденуьт шори сохде, гъэгър кешире, могъбул бире, томоше сохде, хэндуьсде, гирисде...

Пире мерд ГІээиз тоб недо, вэхишд эри! э хуьжет поисде э лекторевоз, оммо те у лэгІэ вокурде, э песой энү, э ён демирчи нуьшдебугъо пире, дендуневире пире зен, гофгъой эн лекторе охмурире хуно хьисоб сохд эри муьре бебегъо-келебегъой хуьше. У эз жигей хуьше вэхишде герден хуьшдере, эн хуьршлуь бире гъозе хуне дураз сохде, мугу:

— Мейму туьш гьисди, бебейтуьш! Эдее гьилогъэ хуно гъэр зере, гьерчуь э лэгІэйтуь омо пертово доре...

И нифригъоре сохде, гъэрие зен э гъэгъревоз вадарафд эз зал, э зир зутъун хуьше фугъунд-фугъунде.

Гьетте лекция варасде, ГІээиз зури-зури омо э хуне. Э хуне гъеме чи хурде, хисиребируьт эз келе зен бэгъэй. У дениширебу, кей шуьвер ю миёв, чи мидуь уре. ГІээиз лове э митгъровуние хэн-

де веберде, дениши э зен хуьше. Песде гьеебго гьошгьобогьлукь бире, мугу:

— Валлагь, зен, негьогь э гоф туь неденишируым, рафдурьм э и хэре лекция. Эзу ме гьейсэГэт шиновусдумгьо гофгьо, хэбергьо, гьингьэртукь гьозор тиле хуби. Биёр гьингьэртукьуре. Бисмиллагь!..

## ДЕРДИМЕНДИГЬОЙ ЭН ГЮНИЕ «ГОСПОДИН»

Ме э у вохурдум пор э е неме, хинике кулоке руз эн март э автобус поисденигьо жиге э ён куьгьне мигьмонхоне «Дагестан», комикн эз руй ухшеш зеренигьо э пушотеине экзотически восточни дервозе. Инжо э гузети эн автобус поисдебу хэйли одомигьо. Э гГэрей эн инжо кура бирогоргьо, чумме вохурд э е сер дес десчуй «кинволиди» хуьше, э буз ю сие гиргине ризин вери, дуьгьэди бире, поисдебу э автобус гузет сохде.

Гье эз ебо дениширемун э огьиле мерд, мере э у ёзукь омо. дуьл ме эри энусухд, ме дие эзу чум вегирде недануьсдукь, э дуьгьэдере хуно гьэд биребугьо балай энус, сэГэр хурденбугьо, кутэхьэ сипре рушверие сифет энус.

Гьечи уре, э куьнди фегьм сохдеки, эрме гьечи омо, ки у гьеле эзи е ченд сал пушо жунсогьэ одоми бири, не юксулиш небири, эхирки эз омбаре одомигьо усол незигьисди. Э сер энус е сиекимсие гьирогь фирегье велюрови шляпа вебу, э тен ю гье э ижиере ранг импортни палту, ковре шовол энус э русмуре хуно назук бируьтгьо ризгьоревоз бу. Э пойгьой энус—герме чекмегьой зимисдуне вебу. Оммо и е вэхд рач, элегантни бугьо партал энус, гьейсэГэт лап куьгьне гьуьже-гьуьж, пурдалмуре хуно бу, гуйге уре эз сер куегьо вегирде, э тен хуьше вокрдебу. Рушдегьой эн гьэд, ёнбоки бире, добон ю рафде чекмегьой энус лов бируьт. Эз сертен, эз чигьрет у э е эз чум шенде, мугьоетсуьзе, бедбэхде одомиере хуно бу.

У е ченд минутигеш гьечи дуьгьэди поисде бэгьдо, евошлей тик тирд кемер хуьшдере. Песде у э гужевоз гьэд нисе биренбируьтгьо пойгьой хуьшдере дир-дир кешире-кешире эз хори куьнд омо э ки эн е чукле хэрей сипре керпичгьо, инжо тигьи сохде оморебируьтгьо. Керпичгьо э хэсде-туз хьэкиревоз дегирде бируьт. Ме дирируьмки уре э сер керпичгьо нуьшде воисде, жешируьм э лой энус тозите, комиреки ме эзи е сэГэт пушо э киоск восдоребируьм.

— Вегирит, хьовир, и тозите, дешенит э зир ишму,—гуфдирум ме эзу.

Огьиле мерд те е гиле тозите эз десме вегирде, ебо тиж, э си-немиширевоз дениши э лойме ё вомунде, ранг шогьбалудие чум-



тхой хуышдеревоз, песе назуке ловгхой энэ э суыпле хэнде ва-  
рафдуыт.

— Согъбоши,—гозите вегирде эз десе, э эдеблуыревоз гуфди  
у, песе гуйге «гъэлетимере» дуз сохде, угут, несигIэт дорере  
хуно, мугу: — Имогхой гуфдире гереки «хъовир» нэгI,—«господин».  
Гоф «хъовир» дие куыгънеи, эн тирошде вэждгхой советини. Гъей-  
могхой э иму е девригеи, е зиидегунитеи. Имогхой гъемейму,—у дес  
кеши э лой хуышде, песе э лойме, песе э лой э автобус э гузет  
поисдебируытгъо одомигъо, мугу—имогхой гъемейму — «господа-  
тхойм»...

И гофгъоре у э расдеки гуыгъоре хуно гуфдигеш, ме э сес энэ  
шек сохдум, ки у эдее э руыхшендиревоз гуфдире. Э ки, э ки, фи-  
кир сохдум ме э дуылме, э и гIовдоле сер-тен энэ, ёзугъэ, бед-  
бэхде сер-сифет энэ текебуруа гоф «господин» лам кем гъынжуыс-  
де.

У гозите э зир хуышде доноре, нуышде бэгъдо, ме пуырсируым  
эз нешинохэ «господин» ченгъадер вэгIдой у инжо автобусе гузет  
сохденигъо?

У сесе жумунд, песе мугу:

— Мепуырс, э куынди дуз е сэгIэт гъисди. Мере яздегъимуын  
номер автобус гереки.

— Эйчуй эхи у те имогъоинш нисе омере?

Огъиле мерд э хуышде домундере хуно, душгъоре вешенд.

— Ме нисе дануысденуым,—мугу у. — Белки бинзин нисди,  
енебуте — запчастгъо, белки и рейсе дегиш сохдет... ГъейсэгIэт  
екиш гъичиш нисе дануысде. Эз Горбачев и сергъэришкие коргъой  
хуышдере сохде эйло, э иму гъеме кунбологъово чаруысди, вилеет  
гъэтмэгъэриш бири, жингире хунере хуно бири.

— Ишмуш лап гъечи сипи месохит — о,—э хъитиётиревоз гуф-  
дируым эзу.

Огъиле мерд дениши э ме э тигъэтевоз, песе гъе е бирден эз  
нокуми хэндуысд.

— Ишму дуылпесо мебошит,—бирден шори сохдере хуно му-  
гу у. — Э иму гъейсэгIэт коргъо лап усол гъисдигеш, эз елойге э  
иму желе гласность, демократире гъэдер-хъисоб нисди. Гу туыре  
чуй воисдге, сох туыре тьерчуй воисд. Небуте ме дуз нисе гуфдире-  
нуым?

Огъиле мерд дениши виники, ме е хуб, е зобу, е «эри», е «нэгI»  
нисе гуфдиренуым, у гуйге эри субит сохде гофгъой хуышдере, сер  
гирд эри ихдилот сохде ижире, чуйтам у гуфдиге, «овгъоле эз прак-  
тика».

— И пушогъо телевизорме хэрэб биребу,—сер гирд у гъечи  
ихдилот хуышдере. — Ме уре восдоребируым эзи дегъ сал пушо.  
Увэхдигъо ме э школа учитил кор сохденбируым, кейки дес эн  
гъеме «хъовиргъо» рафденбу эри юре лап терек гъисдигъо чигъо

восдоре. Телефон зеруым э сер ателье, телевизоре ремонт сохденигьо. Дуймуын руз омо э киме е жовоне кук э чуькле чемодан-леревоз. У э ме нисе денишире, эдее когыли-когыли гоф сохде э меревоз, гуйге ме э пушой энугычиш нисдуым. Мере эзижире кор энугыч омбар гыгьр омо, оммо гоф несохдум, тоб дорум. У телевизоре фегым сохд, пессе накрум-накруме хуно мугу:

— Э телевизор ишму «умножитель» хэреб бири, уре дегинш сохде гереки.

У бирмунд э ме эз ешик телевизор ведешенде детале — е гьовомере чоркуынжие зерде чини. Мугум эз у:

— Дегинш сохит уре э тозейюревоз, ме мидуым пул энуре.

Гьемин эзи дуй руз пушо ме вегирдебируым пенсиймере — сасади хышдот монет. Ме эриме фикир сохдум: э ченд бирснини еки эзини, деталь? Дегь монет, енебуге лап звер — паздегь монет! У мугу, нэги, си монети. Ме рази бисдорум эри доре си монетиш. Оммо оморигоь мастер гьегьечу накрум-накрум мугу: юре нисди и деталь, бура гешд оф эз же туьре воисдениге.

Ме неденишире э и ночогыэ пойгьойме, сер гирдуым эри гешде эзи магазин э е магазин эри восдоре и мере герек гьисдигьо детале, оммо э е жигеш неофдум. Эхир э е магазин е корсох энуре э ме езугь омере, мугу:

— Ой леле, хуышдере ишму негьогы эхымет медит. Э магазингьо ишму э е жигеш ниофит у детале, э базар гьисди.

Хуб, э базар бугу. Оморум э базар, мивинуым эз расдиш инжо у мастер гудфидебугьо «умножительгьо» ченгьедер туьре воисд гьисди. Оммо угьо инжо э си монет нисди, еки э сасад монети. Ме и гьимете шиновусдуьмки, гьовойме лап хэреб бисдо. Е «рэхь-медуьл» э ме э сасад монет нэги, э дивисди пенжогы монет фурухд у детале.

Гьетте э хуне вогашде, ебо телефон зеруым э ателье. И дес омогьо мастериш жогыл бу, оммо очугыэ сифет, ловхэнде, гоф сохде хыэз оморенигьо одоми бу. Мереш эз у лап хуш омо.

Усдо э жигей хуышде но, дузетмиш сохд «умножителе», гене чуьиге екем гьуыч сохд, вегирд эз ме эри кор хуышде хьофдод монет. Эри, ме фурмуш сохдем гудфиде, суьфдеи тиле оморевугьо мастер эри е визит хуышде эз ме вегирдебу дегь монет. Э гьечиревоз эз мегине пенсийме сери-куниш немунд.

Огыле мерд ихдилот хуышдере поюнд, э фикир дерире хуно сер гирд резин верие буз десдечуй хуышдере кешире э хори э сер гьир э пушой хуышде, пессе бирден сере тик гирде, гьоси бирере хуно, э жуьргэтовоз мугу:

— Эгенер е тилейгеш телевизорме хэреб бисдоге, мере у герек нисди. Ини э рэхь рафденуым ме гьейсэгиэт ути нисдики мере, пылесос нисдики, телефон нисдики. Э магазингьо гьейсэгиэт и чигьо фурухде нисе омере, оммо э спекулянтгьо — бэхшлемиш со-

хит,—коммерсантгъо — е уютг пенжсад монети, е телефонни аппарат — гъозори пенжсад монети. Ужире гъиметгъо эри куьф чъумуни косибе «господин» нисди.

Е ченд минут негирошд, веди бисдо гъирмизине автобус э яздегъимуьн нумиревоз. Огъиле мерд теретэгъидире хуно жуьмуьсд э жигей хуьшде, оммо виники автобус одоми пури, песеде чъутам гъетте дергъой автобус вокурде оmore, э гузет энупоисдебируьтгъо одомигъо дуь екире сигъмиш сохде, гъуьл додоре-додоре, хъэрекет сохденуьтте эри венуьшде э автобус, у эз жигей хуьшде невэхуьшд, дес шенд дуьлхуьрде хуно. Автобус рафденге, екем поисде, гене сер гирд ихдилот хуьшдере:

— Хэлгъ шекер, кере, гушд восдоре нисе дануьсде, партал мунугу гъеле. Гъиметгъо, чъутам ишму дануьсденитте, гъечи звер бири, зэхълей одоми эдее рафде. Е чъукле нун-батон, комиреки е жунсогъэ одоми э е нуьшдеревоз михуру, э шеш монети. Э шеш монетовоз те перестройка бире, се кило гушд восдоре мибисдо.

У тене пожонд ихдилот хуьшдере, кеши пушово десдечуре, дуь дес хуьшдере вено э сер десдечу, лэгъэре, муйлуье чунере вено э сер десгъо, мижегъой чумгъоре сэхд сохд, гуйте воисд юре екем э хифлет рафде. Оммо мере воисденбу ихдилот иму бурра неьв.

— Эриме оморенигъо ишмуре эзу те перестройка бугъо вэхдгъо хош оmore,—гуфдируьм ме, уре тене эри э гоф овурде.

«Косибе господин» гъе усэгъат сере тик гирде, эз зир чешмекгъой хуьшде биразире хуно дениши э лойме, песеде мугу:

— Ишму мере хэр хъисоб месохит! Эгенер ишмуре дануьсде воисдениге, э песини салгъой рэхъберьети эн Брежнев, ме у чешмише сифет энуре диренге, у пелетке пофденгъой энуре э шиновусдеки э ме аллергия вепичиренбу. Гьер сер веригъо, дуьл деригъо, хосденигъо вилеет хуьшдере дануьсденбу, варасиренбу, ки жэгъимнет вилеет имуре тозеленмиш сохде тереки. Тереки реформагъо, оммо ижире реформагъо нэгъI, кейки гъеме эдее вачаруьсде, кимигъо гъе бирден эдее миллионергъо бире, оммо омбардеки хэлгъ эдее гъони бире, э товун де коргъойге дие негуюм.

Бирден у гъечи э туьндлемиширевоз э тоф сохдеки, э у сэхде суьгъре вепичи. Тасире эз суьгъре, у эдембу лойлум хурде, десе э сине веноре, эз гъирмизи бире чумгъой энупоисде дугъ-дугъ гъэрс рихде. Эхирки суьгърей энупоисденге, у э олхогъиниревоз лугъонд нефес вокоши, песеде тене сер гирд ихдилот хуьшдере.

— Ини, вегирим, Горбачеве, комиреки э иму, ишму шиновусдейтте, нум норе омори «Хэбер Али»,—лове э шефде хэнде веберде, мугу у. — У гуфдиребу, ки э гъэд дегъ-паздегъ сал гъеме граждандгъой вилеет, комигъореки хуне нисди, эз хуькуьмет э гъовоц хуне гъобул мисохут. Кукме имогъой нуьгъ сали э дуь гъэилевоз э чъукле уютгъле э киро э хуней кес эдее зигъисде. У э завод фэхъ-

ле эдее кор сохде. Имогъой, кейки иму эз «параменде социализм» эн Брежнев дарафдейм э «капиталистически женнет» эри хунесуь-зе одомигъо дие имиди нисди эз хуькуьмет хуне эри гъобул сохде.

У гоф хуьшдере поюнд, сере жумунд, пезде сифет энугъе бо тор, могъбул бире, дуьлхуьрде хуно мугу:

— Расдире гуьом: эз гъемей эни коргъо визор оморем. Гъейбиш гъисди эри гуфдире: кимвэгъодо э дуьлме оморени, согъ е пенсней-мере хэржи сохум, восдонум е пуьтуьрке каньяк, е кило хубе гушд гусбенди, савзе, закуска, хурум тесирои, пезде э десдин дес-меревоз жунмере восдонум...

Ме э дуьлме бовор несохдум у и коре мисоху гуфдире, дузире гуьом, нисе воисденбу мере бовор сохде. Оммо и гоф энугъе — юре воисдени гуфдире хуьшдере куьше, лап э дуьлме кори сохд.

— Эйчуь биё сохит ишму и коре?—э гъеажониревоз гуфдирум ме эзу. — Бегем гъечиш зиндегуни эришму тэхъл бири? Бегем немунди эришму гъичиш ширин, гъээзиз э и зиндегуни, э хотур комики семе гереки зигъисде, тоб доре, сэгъэр кешире, имид дошде? Бегем ишму хуьшденишму е лэгъэзогъе негуфдирит, ки ишмуре невогъои?

Э товун невегъой энугъе гуфдируьмки, лов эн огъиле мерд э шоре хэнде варафд, вомунде, гъэмлуье лэгъэре сифет энугъе очугъ бисдо. Оммо е дэгъдэгъэш негирошд, гене сифет энугъе огъурдомогъалуь бисдо.

— Дуь бэхичиш, дуь бехичиш,—дуь гиле гуфди у и гофе, сере жумунде,—мере воисдени и коре сохде э хотур энугъо.—У е лугъонде ох вокоши, пезде мугу э могъбуле сесевоз: — Дануьсденит чуьиге, гъэруьсме лап эдее гъэгър кешире, э кукме хъэлово бире, гъэйилгъоре инжимиш сохде угъо э е чуькле угогъ, э хуней кес эдее э киро зигъисде гуфдире. Мере хунейме гъисди, расди е угогъини, оммо келеи. Э минжи энугъе дивор кешире омоге, эзу дуь чуьклете угогъ мибу. Кухниш чуькле нисди. Меш ченд сали тэхъноюм. Хуне эн мени, кооперативнини. Ченд гиле гуфдирем ме э кукме кучмиш бу гирору гуфдире э зен, гъэйилгъой хуьшдеревоз э киме. Мере е кем жиге гъе э кухнилеш весси. Оммо гъэруьсме э герде нисе вегирде. Уре нисе воисде, зигъисде э е хуне, чутам у э товун ме гуфдирениге «э нечогъэ, буйгирде, гъоние келе мердевоз». Оммо ме дануьсденуьм, ме муьрдуьмге у гъе усэгъэт шори-шори миёв эри вегирде сэхъиби сохде хунеймере.

Ме и гофгъой энугъе шиновусдуьмки, дуьлме буланмиш бисдо, мере диедтеш ёзугъ омо э и огъиле, мугъоетсуьзе, нечогъэ, тэхъное одоми.

— Хуб, гуьом гъэруьс эн туь кеси, кук эхи эн туьни. У чуь гуфдире?

Огъиле мерд э и гофме жугъоб недо, чарунд руй хуьшдере э

улуйге, е ченд минут гъечи поисд фикирлуь, думутлуь, эз лэгІэ е гоф неведировунде. Ме э доре пуьрсуьшме пешмуш бисдорум.

Кулок эз лой куьнде дерьёгъ сер тирд эри гужлуь бире, овурд э хуьшдеревоз е ченд дугъ хинике воруже. Веди бу, ки пушой воруш оmore, бу. Огыле мерд эз хиники гъуьж до хуьшдере, душ-гьоре вешенде, десгьоре доно э гъулгьой эн куьгьне палтуй хуьшде.

— Кей миёв ебо и жегъендемне автобус?!—э тІосиравоз мугу у.

Ме тье усэгІэт варасируьм, ки у лап вомунди, гьовой ю усולי, песде эдее дире, ки гьовош диеш эдее усол бире. Ме куьнд оморум э гъирогъ тратуар, дес кешируьм е мошине эри поюнде, берде отиле мерде э хуней ю. Оммо, гъэдой нэхьс, гьеме мошингьо, не-поисде эдембируьт зере гиросде. Ме песово чаруьсдуьм, мивинуьм тозе шинохме вэхишди эз жигей хуьшде, гене дуьгъэди бире, венори синей хуьшдере э сер десдечуй хуьшде. Ме эдембируьм лап дуьлпесои кешире э товун энуну, кейки бирден е ранг хокистере мошин «Волга» омо поисд э пушойму. Эз мошин ведиромо е жогьиле спортивни жирее кук, э тен ю раче костюм вери. У э иловле неденишире, куьнд омо эз тозе шинохме, э хуьрметевоз эз гъул энуну гирде, берд уре э ки мошин хуьшде. Ме недануьсдуьм, ки буге и кук: пушотейне ученик энуну буге, кук гъунши энуниге небуге гъечи е нешинохэ, оммо рэхьмедуьл одоминиге.

Оммо те ебо э мошин венуьшде, огыле мерд чаруьсд э лойме, дес до мере, песде мугу:

— Согъ бошит!—гудфире и гофе, у энгуьшде тик гирде, лове э могъбуле хэнде веберде, мугу: — Фурмуш месохит, эгенер десиге э еки вохурдени бисдоримге, мере «ховир» огол мезенит, огол зенит «гос-по-о-дин!»...

1992 с.

## СЕГЪМЛУЬЕ ГЪУНОГЪ

Зу себэхьмунде бауэр Ганс Гаммер ведиромо э хьэёт. Чуьшме тозоле ведиромореву: эз песой эн песой эн куьнде савзелуье боруй эн више. Гьовомере, ранг суьрхие ригазгьой энуну расируьтки э сипре бигъгьо верие сифет энуну, Ганс чумгьой хуьшдере гъуьжунд, э лов энуну е пертовуш хэнде варафд. Эз луьли энуну бу, ки имбуруз эз себэхьэвоз гьово хуби, очугъи, офдоини. Ижире рузгьо жем бире э минжи поиз. У имбуруз миёсде берде э шегьер е дегъ бисембе гирде хэрегушгьой хуьшдере э шегьер эри фурухде э шинохэ гъэсоччи, восдоре эзунжо чуй зре герекиге, песде те хурек пишнеинере хурде вогошде э хутор хуьшде.

Те ёбо у хэрегушгьоре э ешикгьоревоз э сер г'эребе веноре, эз говду ведировунде г'эсбе, эжеки дебу дуыщие г'эшг'элуе эблэг'э-эблэг'э гов энү, келс мерд куьнд омо э минжи х'эёт, поисд э ён эн э хори буг'о дуразе г'юлинде г'ыт, э ён комики десдей эн керг'о э г'ирмизине хурузевоз эдембируйт пес-пес сохде. Э чепилой х'эёт, э ён эн говду, поисдебу буше г'эребе, е г'ужог' хуыше зерде гиёв вери. Э улойтей куьнж эн х'эёт, эз будкалай хуыше сер хуышдере ведешенде э тижэ бузевоз, воноре уре э сед пушой пойг'ой хуыше, эдембу евишлей виз зере сег энү, э томоше ве дусдиревоз денишире э лой сэх'иб хуыше. Э и себэх'мундеине серине г'ово эдембу оmore эри энү эз г'эилиревоз шинох ве суьг'д г'исдиг'о буй эн неме хори, хуыше гиёв ве серги...

Ганс дир-дир нуышд э сер г'ыт. У э тег'ымиревоз вегирд эз куьф эн пинжэк хуыше г'эйлере, гиргине г'утилей г'овунире, э комики томбоку дебу, пур сохд г'эйлей хуышдере, дегесунд, э лезетевоз кешире е-дуй г'ум, дениши э иловле. Хуней энү э е г'уьндуьре тепеире хуно буг'о савзелуе жиге вебу, э куьндиг'ой эн е чуькле куьл, иловлей эн комики э г'уьндуьре г'эмишг'оревоз вадабурра бируйт, чапар кеширере хуно, э гирог' эн хутор. Э хутор энуг'о г'еме пенж хуне зиёдте небу. Хунег'о г'еме эз г'ирмизине сэхде керпич бируйт. Неденишире э у кор, ки хунег'о дуй эз еки дур бируйт, уг'о эз х'эёт эн Ганс эзинжо эз звер лап хуб ве ди биренбируйт.

Э иловлей хутор г'еме савзелуе мержг'о, мэх'суьлг'о, хэсде вишег'о бируйт. Инжо лап соките, гуьмсуьзе жиге бу. Кими вэг'Идо эри э инжо суьфде оmore г'эршу биге одоми г'ечи миёмо, ки у лап дуре ве лап сесуьзе-гуьмсуьзе жигей эн г'уьломи енебуге э песой эни э иловлей эн хутор энуг'о г'исдуьтг'о хориг'о, вишег'о дие г'ычиш нисди — не одомиг'о, не шег'ерг'о, вилеетг'о, энжэг'е и жигеи э руй эни г'уьлом. Эри хуышдени эн Гаммериш кимвэг'Идо мэх'телире хуно оморенбу, ки и жиге — е чуькле куьнжлей эн саламатсуьзе ватан энүни — эн Германия, комики э шивиш дешенди э г'уьлом, и ченд сали эдее довг'о сохде э нимей г'уьлемевоз.

Келе мерд дениширебу, чуьтам эз г'эйлей ю дуру г'ир-г'ире хуно варафдениге звер, х'эл бирениге э эвир себэх'мундеи. Оммо у эдембу фикир сохде, фикир сохде э товун довг'о, э товун энү; кей марасуьге и довг'о, кей мибуге эхир эни екикуышиг'о. Эгенерасдире г'уфдиге, Гансе х'эйф ние оmore не э англичанг'о, не э американциг'о, иллог'ки — э урусг'о. Англичанг'о нимей г'уьломе вегирдет, сэх'ибн сохдет эришу. Америкаре инг'эде суьрх г'исди, э ковшевоз вечиритеш, варадени нисди. Уружг'оре эз г'еме хэлг'ьгой г'уьлом омбарте кошдение буле, фирег'е хориг'ои, сэх'рег'ои, вишег'ои. Оммо немшг'оре хори кеми. Эри ешемиши ве параменди эн келе миллет немцг'о, песде эз г'еме миллетг'ой г'уьлом жофодусд, жоборд ве звер г'исдиг'о, хориг'о гереки

Гъечи эдее гуфдире Гитлер. Фюрер, белки, эзу хубте дануьсде и коргьоре. Ю кини, е жофоекеше ранжбер эз э коми песо-пушо дериге жес нисе дануьсденитъо хутор, э Гитлер гуьре?!

Оммо е жирейге беде фикиргъош оморени э дуьл Гаммер огъуре хуно зэхъров зерени э дуьл 'эну. Довг'ло гъуморе хунои, дануьсде нисе бире: эхир-эхириш ки миберуьге, ки утузмш мибуте. Э пушотейне довг'ло, э комики у солдат бу, Германия у десиш суьфде эдембу зере, бесгъун доре гъушунгъой 'Францияре, эн Урсиеете... Песде чуй бисдо? Э эхир союзникгъо зеруьт дербедогъун сохдуьт Германияре. Белки, худо меьро, и десиш гъечу бисдо?..

Гаммер хъэрекет сохдени ижире 'беде, зоволе фикиргъоре эри пиш сохде эз хуьшде. Чуйтам пиш мисохи угъоре, эгенер и беде фикиргъо, беде ховгъоре хуно туьре динж нисе гъишденуьтге?! Ини пор зимислу гъушунгъой эн Германия э Сталинград дербедогъун сохде омори, еки эз лап ведилуье серворгъой эн лешгер Германия маршал фон Паулюс э есири вегирде омори. Урусгъо эдее шишир' оmore пушово, сигъмиш сохде «гъинорменде солдатгъой фюрере» Чуй гуфдигеш Гитлер, Геббелс, Германия довг'оре утузмиш сохди, э дири-зун кор дери. Урусгъо оморутге э Германия, чуй мибу увэхди ватан энуре, хуьшдени немцгъоре? Мидегъилуьми урусгъо и гъэгъре э Германия эри э сер ишу э довг'оревоз оmoreире?.. Белки гъе, эз сербошден герек небу и довг'оре сер гирде?..

Песде Гаммер у кореш хуь дануьсде эз овхъолет зиндегуни хуьшде: э фронт коргъо усол биренге, эн юш песде усол бире. Эзу имогъой налутиш омбар вегирде эз пушотейне гуьре. Уре е теке кук бу. Суьфден салгъо довг'ло сер гирденге, кук энуре э солдати нисе берденбу у е теке кук эн пире бебе-деден гуфдире. Оммо гъетте э Сталинград лешгер Паулюс дербедогъун сохде оmore, согъ мунде солдатгъо, офицергъо, генералгъой энэ э есири офдоре, кук эн Гаммереш бердуьт э солдати, э довг'ло. Шеш мегъиш негирошд, хэбер омо эз у гъурлугъ сохденбугъо полк эри Гаммер кук энэ, жоборде солдат «эри фюрер ве буьзуьрге Германия» пуч бири гуфдире э довг'ло. Е мегъ негирошд эзи беде хэбер оmoreи э товун е теке кук энугъо э довг'ло пуч бирен, зен эн Гаммер, комики эз дуьл нечогъ бу, эз некуми офдо муьрд. Имогъой у мунди тэхъно доре хуно э сэхъро. Гене чуй миьвге э сер энэ, у ние дануьсде.

Келе мерд Гаммер ох вокошире, э дердимендиревоз сере жумундени, пес-песоеки гъэйлере кешире-кешире. Бирден у э ижире фикиргъо, думитгъо э сэхдеки э пушой энэ эз жеиге омо е нешинохэ, сиечердее г'лэжоибе кукле-г'лэйилле ведиромо. Г'лэйилле, сере гъуз гирде, омо дуз поисд э пушой энэ, е доне тоф негуфдире, е сесле несохде. Гаммер гъе усэг'лэт гъэйлере эз лэг'лэ ведешенде э келе махътелиревоз дениши э г'лэйилле, э сер-сифет, буйбалал энэ. Кукле эз руй е чор-пенж сала бу. Эз зуревоз нешушде, шунэ

бу. Сифет энү лэггэр, зерд бу, е дугь хун недерире хуно. Зир эн келе сие чумгьой энү екем вамасире бу. Бирэхьне пойлегьой энү муърдали, ггэрмэгь кешире бируйт. Эз зир пара-парае рушейнилей энү ве ди бу лэггэре, ранг хокне жендеклей энү — е пуст, е остгьу.

Келе мерд немц э мэхтели, охмури ве терсезов дениши э и кукле. Зури-зури герме ггэйлере эз лэггэ ведешенде, у вэхуьшд э пой. Э дугь энгуьшдевоз у э негиреиревоз гирд эз муйгьой кукле, тик гирд сер энуре, э тиггэтевоз дениши э лэггэре ранграфде сифет ггэйл, э сие, ховолуьре хуно енебуте эн муърденигьо одомире хуно бируйтгьо чумгьой энү. «Кинибу и ггэйл? Сигони? Жугьури? Э хьисобовоз—жугьури.

— Кини туь?—эз муйгьой ггэйл кешире, э оггурлуьиревоз пуьрсие келе мерд.

Оммо кукле е гоф негуфди, е гьис э сифет энү бинуьши недо. Гуйге у шиновусдеш нешиновусд пуьрсуьш эн бауэре. Кукле эдемзере неоморе, чуьлкие сие муйгьой энү ггэйсэггэт похпохуре хуно бу э тужевоз э пой поисде. Гаммер гьетте муйлегьгьой энуре рэхьодоре, ггэйлле нуьшд, дураз' бисдо э сер бирэхьне хинике хори, чумгьой хуьшдере сэхд сохд.

Ганс э мэхтели ве биразириревоз дениши э лой сег хуьше. У эз дурине гьетте юре буй кес оmore, сер гирденигьо эри э хьитиьти, ггушггэри поисде, хьов-хьов сохде, и дес чуь кориге, и ггэйлле э хьэьт диромокиш, сег е сес несохд, эз жигей хуьшде неведиромо, хьов-хьов несохд.

Гаммер вараси, ки кукле э хьисобовоз э кумеки эн киревозиге вирухунде омори эз лагерь. Белки уре ггэйсэггэт эдете генде-нуьт?

Гаммер лап хуб дануьсденбу э чуьжире дуьшмениревоз дениширенуьтте властгьой эн Германия э лагергьо дуьсдогь сохде оmore есиргьо, интернированни одомигьо, иллогьки э жугьургьо, сигонгьо ве урусгьо. Э ёр энү бирден омо, чуьтам эзи е ченд руз пушо, шев-нимешев, эз хутор энугьо екем дурте, хэлгь э ширине хов дерики, парте-парт сесгьой туьфенг, автоматгьо шенде, буйруьж, хьэрой одомигьо, равусдей эн сеггьо оморутге. Пушой себэхь гьеме сокит биренки, э сер мотоциклагьо вери э хутор оморут е ченд ерггьлуье эсэсовцигьо. Угьо кура сохдуьт мердгьой эн хуоторе, буйругь дорут вегируьт э хуьшдеревоз тевергьо, лапаткагьоре, буравт э песой куьл, э више, векенуьт унжо е чухуреки, дишенуьт унжо эз лагерь вирихде куьше оmore есиргьой урусире, сер чухурире э кокевоз дуз сохут.

Ггэйсэггэтиш беде сегьмлуье хове хуно оморенбу э пушой чумгьой эн Гаммер у руз себэхьмунде у диревутгьоре э ггэд више. Лэггэре, эз жендек, эз хьол офдоре есиргьо, зуле-зуле парталгьой есири э тен ишу вери, гьемешу хуни-хэмири офдоребируьт э ггэ-



рей доргъо, дураз бире кимигъо э сер шуьгъэм, кимигъо э сер ке-  
мер, десгъоре лов сохде, чум рэхъо, кимигъо десгъо-пойгъой хуьш-  
дере гъуьж дировунде,—гье гьечу муьрдебируьт, жуьшде оморе э  
залумиревоз.

И кор э ёр эн Гаммер омоки, у диеш чумтерс бисдо, дуьлдэгъ-  
дэгъэи кеши. Комини гъэлифо вегирди овурди и гІэиле? Гьейсэ-  
гІэт, дир несохде, гІэребере бсде гереки, берде и гІэиле э шегьер  
э полиция доре.

Эзи фикир, гъаежони гьейсэгІэт у гуйге фурмуш сохд эйчуь  
е лэгІэзойге юре рафда воисденбуге э шегьер. У егилейгеш дениши  
э сер бирэхъне хори дураз биребугъо чуькле секонелуье «гъуногъ».  
Мегезгъо кура биребируьт э сер энун, эн муьрде енебуге куьшде  
оморе моле хуно. Угъо дегирдебируьт рангхоколуье сифет энуре,  
бирэхъне конгъо, энгуьшдгъой пой энуре, оммо гІэилле гьич десеш  
нисе жумунденбу.

Келе мерд гъуз бисдо, дес зе э гІэил: белки муьрди? Оммо  
гІэилле, чумгъоре невокурде, е чуькле ноле зе. «Белки уре те ебо  
э гІэребе воноре берде э шегьер, е кем чи дуьм эри хурде?—фикир  
сохд эри хуьшде Гаммер. — Э у эслогъ жун недери. Зиндей энуре  
берде асанги, муьрдей энуре бердеижон э рэхъ».

Гаммер э хьитиётиревоз чумечару сохд э иловле: уре диругор  
нисдиге эз одомигъой хутор? Хуней энун дур, гъирогъ бугеш эзу  
чор хунейгей эн хутор, у дуьлпесо бу. Виники э иловле екиш вели  
нисди, у э асантиривоз вегирд э гъужогъ гІэиле, зур-зур деберд  
э хуне, нишунд э ён стол. Э сер стол эз шовуревоз вокурде оморе  
Библия вебу, комиреки у хунденбу гъемише пушой хисире.

Гаммер овурд эри гІэил э сипре кружкой гъовуни шир, но э пу-  
шой энун е келе кесег сие нун, но э пушой энун. Гисне гІэил гьетте  
хурдение чире э пушой хуьшде виники, буй нун нен шир э вини  
энун варафди, гъебо зинде бисдо, э битобиревоз жуьмуьсд э жи-  
гей хуьшде, оммо десе э лой нун нен шир некеша, э дуьлпесон ве  
имидиревоз дениши э фирегъ бире чумгъой хуьшдеревоэ э пеши-  
нохэ келе мерд. Гаммер куьнд овурд э пушой энун келе тикей нуне  
не кружкой шире, огъур-огъур мугу:

— Ху!

Кукле гье усэгІэт вегирд э лерзире десгъой хуьшдеревоэ круж-  
кай шире, берд э буз хуьшде. Гьетте суьфден жем шир э лэгІэй  
энун дарафде, чумгъой энун жесдуьт, гиргине бисдорут. Дендугъой  
энун э гъирогъ кружкой гъовуни расире-расире, у сер гирд э тере-  
тэгІдиревоз эри хурде, нефес ю гирде-гирде.

Гьетте шире хурде варасде, гІэилле э чуьлкие дес хуьшдеревоэ  
гъебирден сэхд гирд тикей нуне, зур-зур кеши э лой хуьшле.  
Гуйге терсире нуше эз дес ю мекенуьт гуьфдире, э дуьдесиревоз жа-  
рунде уре э дарафде синелей хуьшде, э ихьиборсуьзи ве дуьшме-  
ниривоз денишире э сэхьиб хуне. Гаммер эз расдиш, гъошгъоре

гъуьжунде, кешн десе, векенд нуне эз дес гІэил, те у нуне э лэгІэ берде.

— ГІэмел ниёв!—огъурлуй гуфди у.

Эз огъурлуйе сес эн сэхьиб хуне, эз нокуми кесег нуне эз дес ю ведешендеи, гІэйилле эз терс хуьшдере вешенд, оммо негирисд. Веди бу гъеме фикир, дуьл, нешумой энугъейсэгІэт э лой эн тикей нун бу, гъейсэгІэт э келе, добогъэ хуно бугъо кеф дес эн бауэр дебугъо. Гаммер фегъм сохд нуне, э ило э уло чарунде, песеде э дуь жиге сохде уре, нимей эн кесег нун до гІэйиле.

— И кесег весси туьре,—хьэрекет сохде эри неденишире э чорчумире хуно биребируьтгъо чумгъой гІэйил, гъэгърикимсире хуно гуфди у. — Эритуй гъеэбо ингъэде нун хурде гІэмел ниёв: вара-сирени, гІэмел ниёв. Мимири!..

Келе мерд дануьсденбу, ки гІуьмуьр эни чуькле гІэйилле гъечиш-гъечуш варасди, у имбуруз-себэхь мимуьруь е эз гиснен енебуге куьшде миёв. Оммо уре нисе воисденбу у э пушой чум энугъе мируь гуфдире эз нун:эну, э хьэлоле жофой юревоз гъэзенмиш сохде омориго. Гъуногъле невараси гофгъой эн келе мерде, оммо гъетее ниме сохде кесег нуне э ю доки, у сер гирд э келе тертэгІ-диревоэ эри хурде уре, фуберде, бегъем нежавуьсде.

Виники кукле гъе ебирден хурд нуне, Гаммер суьпле хэнде сохде, гирд эз гъул гІэйил, вэхизунд уре эз сер стул.

— Имогъой кеш бурайм!—э дуьлхошире хуно гуфди у, ю э пушо рафде э лой дер, гьерчуь дануьсде куклеш э песой ю миёв гуфдире.

Оммо гІэйилле гъич э лой сэхьиб хуне неденишире, гурунд пefес вокошире-вокошире, лойлум хурде-хурде рафд э куьнж хуне, унжо э сер тие туморегъой гІорди, кепеки руе шуьгъэм дегешд. Келе мерде хьэз неомо эзи кор эн надане гІэйилле. У куьнд омо өзугъэ эри вэхизунде берде э хуьшдеревоэ, оммо виники кукле хисирі эз хуьшде рафдере хуно, поисд думутлуй э жигей хуьшде.

«Бошгу, бигъил хисуьгу, себэхь миберуьм,—бирден нерм бирере хуно, гуфди э дуьл хуьшде Гаммер.» — Эз имбуруз те себэхь е келе тефигІэти недери. Песеде инжо э ки энугъэ гъирогъ эни чуькле хутор екиш нисе оmore».

Себэхьмунде Гаммер хэбер бисдо э е фикиревоэ — дир не сохде берде расундени гІэйиле э шегъер, эз сер хуьшде хилос сохдени. Согъ шев у дуьлпесо хисиребу кукле э хуней ю дери гуфдире. Оммо у э буру ведироморе виники, эз гъово эдее воруш оmore, дуьл энугъэ хэреб бисдо. Гъово гъечи дегирдебу, ки эслогъ имид небу воруш имбуруз мипою гуфдире. «Эй пире хэр!»—нифри сохд хуьшдере э дуьл хуьшде Гаммер, — эйчуь ме ди гъе усэгІэт берде недорум уре э полиция? Эгенер у э рэхь мимуьрдге, гІовун муьрдеи энугъэ э сер ме невери, ме чуь тэхсируьм инжо? Эм товун энугъэ ме хэрегушгъоймереш э гъэсобчи берде доре недануьсдуьм...»

У эри хуыште теслих сохд, неденишире э воруш, берде куклере э шегьер, доре э полиция, сер хуышдере хилос сохде эз бологъ энугу. У дарафд э говду, ведировунд жонлуые, хуб гъурлугъ сохде оmore ранг гъирмизие глэсб хуышдере, дуразе лубъжубгъой герден энуре тимор сохде, доно хомуте э герден ю, дебесд э глэребе. Воруш элембу э сесевоз расире э сэхде брезентови плаш энугу, зере э сифет ю. Э де вэхдиге у гыч э ижире руз эз дер э буру ниведиromo. Оммо у терсиренбу дуб руз тлэиле гыише э хуней хуыште, э полиция мэглуым несохде. Кукле гъеле хисиребу э сер мушукгъо, кефлей чубкле деслей хуышдере э зир лэгъэре гъутиней хуыште доноре, э и ворушлуые дегирде руз себэхьи сер поизи элембу ховгъо дире.

Ини э хов у эдее рафде эз фирегъе лап дуразе куче. Э и куче лап келе гъуьндуьре хунегъо всруьт, гъеле дедешуш, эз ю лап келе, лап гъуьндуьр гысдигъо, э шон энугъо е чубкеле ве ди бире. Э куче пури одомигъо, сесгъой мошин. Ини хуней энугъош. Бебе э ёр энугу оморениге гъе усэглэт мошин парталдухиш оморени э пушой чумгъой энугу. Песде бебе э жеиге эдее рафде, э хисобовоз лап дур, эри хэйли вэхд. Э песой кемер энугу е пура чубкле мушук бесден. Кей буге и кор э ёр энугу мунди, чубтам дедешу у руз бебе эз хуне э рафдеки, песде у эз хуне вадарафденгеш гъе элембу гирисде.

У руз бебей энугъо мушукле э песой кемер вери эз хуне рафденге, у шиновусд келе сесгъой эн мэглнире, комиреки элембируьт хунде е келе десдей эн мердгъо, эз куче рафдембируьтгъо. Э кемер омбаргъой энугъо гъе ижире чубкле мушукгъо вебу, у э кемер бебешу диревугъо. Угъоре у эз пенжерей гъуьндуьре хунешу элембу дире. Угъо элембируьт хунде: «Вэхиз, вилеет лап келе...» Эдете гуфдиренуьт, угъо эдете рафденуьт эри куыште, пиш сохде фашистгъо гуфдиренигъо беде гъэчэгъгъоре... Оммо киниге «вилеет», комиреки гъемей эни мердгъо эдете огол зеренуьт, у вэхизуь бурав гуфдире э ишуревоз, у нисе дануьсде. Э хисобово «вилеет» лаплап келе пегъливони, э товун комики э овосунегъо ихдилот сохденуьт. Белки эз пегъливониш келе, гужлуьни, эгенер и мердгъо усуьз нисе дануьсденуьтге рафде э женг эри пиш сохде у фашистгъоре...

Оммо е руз э сес, тарпе-тарпевоз э хуней энугъо шишире диromоруьт гъе у фашистгъо, э жирей таршук гиргине килэхгъой гъовуни э сер ишу вери, автаматгъо — э дес дери. Дедешуре не уре угъо суьруьтме кешируьт ведебердуьт эз 'хуне э жеиге.

Песде у э дедеюревоз э вогун вебируьт. Вогун одомигъо пур бу, дуб э биней буз еки бируьт, эри нуыште, дегешде жиге небу. Гъэд вогун хуьме хуно бу, бегъем нефес вокошире нисе биренбу. Вогун сес сохде-сохде гъе элембу рэхъ рафде, непоисде. Э вогун гъе торик, гъе шев бу. Чуб кориге себэхъ нисе биренбу. У ченд бо э гъу-

жогъ дедей вери, енебуге гье э сер пой хисире, хэбер биребу э гъэд эни вэхд.

Бирден вогун поисд. Келе фирегье дер вогун бирден э е зарбезов вокурде омо. Гьеме э вогун вебируйтгьо мердгьо, зенгьо гьеебо зури-зури шендубт хуышере эз дер вогун э хори, песеде тертэгИди сер гирдубт эри вирихде гьерки э ело, эз нокуми терсунде оморе десдей парандегьоре хуно. Дедей уре э гъужогъ вегирде, уш сер гирд эри вирихде эз гъэд эн е пелесе э лой хэзде више. Э асму асдарагьо лап омбар вебируйт. У гъич е тилеш недири гъечи ингъэде авсдарагьо э асму вебуре ве гъечи менг лап товуш доре. Э жегие э песой энугьо эдете сесгьой гуниле шенде оморе, дедей энугьо эз терс хуышдере вешендени, песеде диеш сэхд гъэл гирде уре, шуш нефес гирде бежид видовусдени. У эри хуышде варасирени, ки у зобуне мердгьо, э сер ишу э жирей гаршук килэхъ гьовуни веригьо эдете видовусденубт э песой дедей энугьо нен ю. Угьоре, э хысобоовоз, воисдени куышуьт юреш, дедешуреш, эйчуь—у нисе дануьде. Белки угьо одомигьо нисдубт, шэхьитубоют э хумней одомигьо?..

Менг дие веде небисдо, асдарагьош дуб э песой еки сер гирдубт эри гъэргъ буре. Угьо эз више ведироморубтки э е савзелубе мержле, гъирогъ асму сер гирд эри гъирмизи буре, руй эн сибе хуно. Э доргьо, э кулегьо сер гирдубт муьргггьгьо эри хунде, гуйге шори сохде тозе руз сер гирде омори гуфдире. У суьфдеи гилеи э чум хуышде диренбугьо, чуьтам шев э себэхъ гирошдениге.

Е кемлейгеш вэхд гирошденге, чуышмей себэхьмундеи ведиромо гье эзунжиге, эжеки гъирогъ асму гъирмизи биребу. Гьеме э иловле товуш, ярашугъ бисдо. Оммо эз хинике шей себэхьмундеи тар бируйтгьо гневгьо бирэхьне пойтгьой энуре эдембу кут сохде. Эзинжо е гъэдер дурте э сер тепеи, э гъуьндуьри ведни гъирмизине хуней керпичи э гъирмизине буневоз. Дедей э у денишире, гогъ лове э хэнде веберде, сэхд гъэл гирде уре, жарунде э синей хуышде, зури-зури моч сохдени эз пушони, эз чумгьо, гъутинегьой энугь, гогъ евошлей гъуьл зере эз песой кемер энугь, гуфдирени: «Бура, бура, гИзиллейме, э ён энугь хуне, белки э е рэхьмедуьл расд омори...» Гуфдире и гофгьоре, э десевоз бирмундени э лой гъирмизине хуне э гъирмизине буневоз.

Чуьтам гуфдире дедей ижире гофе?! Беге у нисе дануьде ю лап гиснеи, песеде ховиш гирди юре? Не дедейсуьз у э эжигеш нирав. У варасирени чуь гуфдиреге? НэгИ, ведини дедей унгъэде хуб нисе варасире, чуьнки у гИэжоиб, чешмише хунои. Чумгьой энубт гъейсэгИэт ежирейгеи, сес юш. У гъич гъечи недири ебош дедешуре те имогьой. У гъейсэгИэт өкем эз у терсиреш-терсирени. Оммо у чуьш гуфдиге у дедейсуьз э е жигеш нирав.

Дедей гене гъуьл зе уре эз песой кемер ю, и дес сэхдте, еГини,

бурав гуфдире э лой э у бирмундгьо хуне. И дес дедей уре э гьуьл зереки, у э пой поисде недануьсд, офдо руе сер э сер гиёвгьо. У эз дедешу сэхд гьэргри бире, гьейсэгЛэт мигирисуь-нигирисуь, вэ-хуьшд э пой эри е зобуне, гьэргрие гоф гуфдире э у, оммо дедей веде небу. Дуьл энэ эз терс сер гирд эн э дес гирде бэгЛэвечере хуно лерзире. Гьетте дедей эз пушой чум сур бире, э дуьл гЛэйл ченд жире терсгьо, мэхшевогьо омо. Гьеме э иловлей энэ бируьт-гьо чигьо—доргьо, кулегьо, хори, гьово—келе сегьм венгесдуьт э дуьл энэ, гуйге угьо гьейсэгЛэт бирден э дуьшмени чаруьсде э ки энэ, сигьмиш, хьэл мисохут уре эз гьер тараф, мифуберуьт, гьэж-дегьо гьурбуни хуьшдере фуберугьоре хуно, нисд мисохут уре, чуькле, кумексуьзе, тэхьное гЛэйле эз руй гЛуьлом. У эз терс, эз хьэлежигери, эз дерд офдо э хори, сифет хуьшдере э чуькле пен-желегьой хуьшдеревоз пэхьни сохд, сер гирд эри буруж, хьэрой дешенде:

— Ой де-дей! Ой деде-лей-ме!?. Ме терсиренуьм!.. Ой дедей!..

Гаммер гьуз бисдо э сер хисиребугьо кукле эри хэбер сохде уре, берде веноре э сер гЛэребе, оммо шиновусдки сес гирисде ве божэь энуре, гье усэгЛэт э тара кеф дес хуьшдеревоз сэхд сохд лэгЛэй энуре.

— Хьэрой месох! ЛэгЛэйтуьре ги! Хьэрой месох!..

Оммо гЛэйлле, гьеле эз хов бегьем очмиш небиребугьо, и дире, синемиш сохде коргьо гьелеш э ёр ю, э пушой чум ю бугьо, сер гирд куьшде вечере хуно э жигей хуьшде тартапил сохде, хьэрой сохде, э минет, елворевоз огол зере дедешуре.

Тэхьле гирьей эн гЛэйл, чуьк-чуьки сохдеигьой энуре дире, келе мерд немц э хуьшде домундере хуно, кеши хуьшдере песово. У вараси, ки кукле гьечи э келе хьэсротие гьаежоние сес хуьшдеревоз у кире огол зеренбуге. Кукле юш вэхуьшд, нуьшд э сер «хьэлов» хуьшде. У денишире э иловле, гье у сэгЛэт вараси, эжеиге у, гье у туьтем унегуьре дие хьэрой несохд, энжэгь гьирке сохде евош-евош э зир зугьун хуьшде эдембу огол зере эри эз гьеме гЛэзиз бугьо одомире э руй эни гЛуьлом—дешуре, э муьшдле-гьоревоз гЛэрсгьой чумгьой хуьшдере покурде-покурде.

— Ой худо, чуь сохум ме э и гЛэйлевоз!—э келе дуьлэсди домунде одомире хуно, гуфди у э гьирке сохденбугьо гЛэйл денишире. — Эз же омо ведиромо и э сер ме?!

Бирден уре гЛэйб, номус омо эри э фикир энэ дебугьо бирэхьме кор—берде и кумексуьзе, сэхьибсуьзе гЛэйле доре э полиция. Чуь беде, усоле кор сохди у э пушой ватан энэ, чуь терс, секо-нейни беге эзи гЛэйл эри хэлгь энэ? Бегем эзу кор, ки и гЛэйл мимуьруь енебуге зинде мимуну бэнди гьисмет эн Германия, бес-гьуни енебуге вачаруьсдеи энэ, звер бирей небуге офдореи энэ, тэгЛрифи енебуге биёбури энэ? ГЛэйл — гЛэйли эн коми миллет бисдогеш. Э дуьл энугьо неде не беде, не бэхили эри екиш. Не-

гъогъ омбаре молохгъоре э чигърет гІэилгъо шекуъл нисе кеширенуьт. ГІэилгъо кумексуьзуьт, гъэлхэндсуьзуьт. Эже, э коми серноме, э коми стих эн Евангелия нуьвуьсде омори ки худо весиет нори эри куьшде небуге э гъуьлети дешенде немцгъо, арнийцигъо нисдуьтгъо одомитгъоре, мердгъоре, зенгъоре, гІэиллегъоре? Худо э ю бэхшлемиш сохо, эйчуь эхи худо гъишди одомитгъой гІуьломе, эз е бебе, эз е деде, эз Одом не Хъово биретгъоре, э десдин дес хуьшдеревоз яратмиш сохдигъоре, бэхш, жейле бире э ченд жире миллетгъо, дуь э екиревоз э бэхьс, э хуьжет поисдетгъо? Эйчуь у гъемей энугъоре несохди э е дуьл, э е зугъун, э динбовори э хуьшде? Эйчуь у нисд несохди эз гІэрей хэлгъгъо довгъоре, дуьшменире, бу гуфдире э руй хори шолуми, ники ве дузи? Небуге эричуьни дие худо доригъо весиет, э Библия веригъо: «зендит — параменд бошит». Эйчуь эз серботи эни довгоу э и вэхд келемерди хуьшде мунди тэхьно, тэхьно гъуше хуно, куксуьз, зенсуьз, невесуьз?!

Худо эхи неки буьзуьрги, рэхьмедуьли, у гъудротлуьни. Эз дес энугъеме верморени. Весси е гоф энугъо «Бугу!»—э руй хори, э зовер асму мибу гъе гъечу, чуьтам у гуфдиге. Неофири беге у эз гъичиш, энжэгъ э е гоф хуьшдеревоз «Бугу!..» асмуре, хорире, битмишигъо ве хъэйвонете, мент, чуьшме не астарাগъоре?..

Гаммер эз ело лап келе мэхьтел бисдо э ижире нэхэбереки э дуьл энугъо фикиргъой хуьшде, эз елойге терси, у гуйге эдсе э худоревоз э хуьжет поисде, у, комики гъемише худохогъе, худотерсе одоми бири. Песде фикиргъой энугъо гене вогошд э ки эни э пушой ю нуьшдигъо, гирисденигъо кукле. У гъейсэгІэт э рэхъ дуьквервони домунде одомире хуно хуьшдере гъис сохденбу. Эз ело дуьл энугъо, нешумой энугъо эдембу гІэзиет хрде: чуьтам и гэхьное, нечогъэ, сэхьибсуьзе гІэиллере, жугъуриш гъисдиге, гьеркиш гъисдиге, э ю бовор, имид сохде, э кию омorigъоре, эри куьшде доре? Эз елойге у уре э хуней хуьшде пэхьни сохдге, белки дануьсдгор бисдо э товун эни кор (хуьшдени гъуншигъо мэгІлуьм сохдуьт э полиция, э гестапо), увэхди уре хогъин хъисоб сохде, мидешенуьт э концлагерь. Увэхди у вир мисоху гъеме э жофой дес хуьшдеревоз бире-небирей хуьшдере, белки сер хуьшдереш. Песде юш имогъой келе мерди, тэхьной, вомунде одомини, четини эри энугъо э хъэет, э муьлк-мэхьсуьл, э молгъэрей хуьшде денишире. Сер зиьди, и гІэил е доне гоф нисе варасире э зугъун немци, ю э зугъун энугъо...

Келе мерд э ижире гурунде, гъэрише фикиргъо, дуьлеснигъо дерики, бирден у э дуьл ю е жуьргІэтлуье, гъуччогъэ, хубе кор омерере хуно, кемере дуз сохд, сере тик гирде, пое сэхд норе вадарафд э хъэет. Воруш эдембу сокит бире, гъово—очугъ Гаммер векенд гІэсбе эз гІэребе, деберд э говду. Эз е ченд минутиге бэгъдо у гъе гъечу сэхд пой норе-норе, э мугъоетировоз э дес гирде

э сипре салафан бесде е куьгъне, оммо хуб мундебугъо раче тик-  
мере — ранг михэкие муйлуье чуьккле оюлоро вогошд, э хуне...

Германия, 1945 с.

## БИЖ

### Бире кор

Ме э гъосутевоз нум-  
гъой одомигъоре, э то-  
вун комигъоки гуфдире  
оморени э и ихдилэт,  
нисе бирмунденуьм.

Автор

Рэхь богъгъоре гиросде бэгъдо, у диromo э дигъ хуьшде,  
э мугъоетиревоз соворе куклей хуьшдере э гъужогъ гирде, гъун-  
догъ сохде бугъо э чуьккле герме жовре эдиёллей пешми. Оммо ю  
хуьшдению дедей эн гЭил, комики назук бу, лэгъэр бу, эз ди-  
ремун э е духделе ухшеш зеренбу, неденишире э серине вэхд  
поизи, э тен ю е назуке булши вебу эз ужуже зерде чит, э сер ю —  
ранг рафде сие сефги.

ГЭилле э гъужогъ дедешу олхогъин хисиребу. Зен э чуьккле  
вергъирмизие гъутинелей куклей хуьшде дениширенге, сиечердее,  
назуке, екем овле гирде, оммо хунширин бугъо жовоне сифст эн  
шевгълуь, шор, хьэйроне хуно биренбу, э гЭизизиревоз евошлей моч  
сохденбу уре. Гыч э лап беде ховгъой энущ гьейсэгЛэт ниомо, ки  
эз гьечи е неимсэгЛэтиге бэгъдо у э деедин дес хуьшдеревоз ми-  
жуьшуь гуфдире гЭиллей хуьшдере, э пушой чумгъой гьеме сенгэ  
хуно мишенуь нимелит бирэхъне сохде жуклере э эрх эн хинике  
гЮв есиёв.

Оммо э гъирогъ дигъ, гьечи эз хуьшде е сад пой дурте диренге  
э ён диворгъой хунегъой гуьли, э пушой чапаргъой хьэётгъо поис-  
дебируьтгъо е ченд одомигъоре, мердгъо, зенгъо, гЭилгъоре, жо-  
воне зен гье у туьтем поисд!э хуьшде домунде. Э фирегъ денишире  
сие чумгъой эну дуллпесои, терс офдорере хуно бисдо. У гье усэ-  
гЛэт вараси эри хуьшде, ки э дигъ дануьсдет у эдее оморе гуф-  
дире э соворе гЭил хуьшдеревоз. Книге хэбер расунди э угъо.

Жовоне деде е ченд минут поисд гьечи, занигъой ю гье усэгЛэт  
буш бире, думит сохде эри хуьшде: диrow э дигъ хуьшде, небуге  
вогорду, вирихуь песово? Оммо: э же?!..

Э и вэхди э гЭрей эн эз хуно ведироморебируьтгъо одомигъо,

суьфде мэхьтел, гьоггэ хуно поисдебируьтгьо, шиновусде оморут ижире сесгьо:

— Эй худо, и чуй муьгуужуьзгьои иму диреним?! Гьич тсимогьой э дигь иму небире коргьои.

— Чуйтам и гьээнжугь дуьл сохди эри оморе э биж хуьшдеревоз э дигь?!

— Имогьой биж энубиэ э гьэд эн хьэллол зенде оморе гьилгьойму келе бу дие?!

— И кор энубиэ сер дигь иму е хэто неёруте хуби!..

Эри эн киниге и гофгьо хэндере хуно омо. Сер гирд гьозе хуно шоггьо зере, келе-келе хэндусд.

Жонове зен нисе шиновусденбу гьейсэгьот гофгьой энугьоре. Оммо у шек сохденбу эри хуьше гьовой энугьоре, чуй гуфдиренубтге угьо гьейсэгьот э товун энубиэнен соворе гьил ю.

Эхириш жовоне 'зен, сефгире э пушой сифет хуьше кешире, шерм гирдере хуно эз хэлгь, гьил хуьшдере сэхдте вогосунде э синей хуьше, сере лап дуллу гирде, рафд пушово. Гьетте у э куьнди эн кура бирегоре одомигьой дигь оморе расире, угьо гьемешу эз жигешу жуьмуьсде, э сесгьо, э келе-келе гоф сохднегьоревоз, э томоше, э песой 'гудил 'буравгьоре хуно, рафдуьт э песой энубиэ. У зофруво нефурамо э куче, эжеки зигьисденбируьт беде зенбирор энубиэне эз ю чум шендигьо е теке бирор энубиэ. У не зеве рош неварафд, эжеки э гьирогь дигь 'бу хуней эн рэхьмедуьле, екелуье, жуьргьотлуье зен М., э песини мегьгьой 'бордори энубиэ, неденишире э гофгьо, дивунлуьигьой кес, жиге дореву уре э хьэет хуьше, Сенем (гьечи мугуим эзимбэгьдо нум эни жовоне зене) э ёлош нечаруьсде рафд дуз э у тарафигей дигь, омо поисд э гьирогь куьгьне хэрмон, э ён комики эдембу е лугьонде эрх рихде. Расди лой эн эрх, у поисдебугьо жиге, екем гьундуьр 'бу. Эз ишжо, э зофру э дереи, э минжи эн гьундуьре гьовогьдоргьо, велггьой комьки эз нефес поизи зерди вешендебируьт, веде бу бун гилови эн ссийь, песои дивор энубиэ, оморенбу сес пар-параи энубиэ.

Сенем гьемере эдембу шиновусде, чуй гуфдиренбируьтге э песой энубиэ зенгьо, жогьиле кужгьо. У гьейсэгьот угьоре нисе диренбугеш, эз сесгьой энугьо у дануьсденбу ки гуфдирениге и гофгьоре, руьхшендигьо, серкушигьо, нифригьоре. Имуш, надане чуйкле гьиллегьо, гьовой энубиэ келегьоре дануьсде эз товун Сенем, гьилбуьслегьоре хуно э иловлей энубиэ вежесде, э хэнде, руьхшендире хуно эдембирим келе-келе хьэрой сохде, гуфдире:

— Биж! Биж! Биж! Сенем биж зенди!.. Биж!..

Оммо жовоне зен эзи гофгьо, хьэройгьо диеш сер хуьшдере дуллу гирде, лос бире, поисдебу, гьич э екиш неденишире. Энжэгь е гиле чаруьсд у песово, дениши э иловлей ю кура бирегоре одомигьо, кейки еки эз гьилгьой дигь, хьире чумгьо, эз хосиет хуьше лап нединж, женжел, сер соне хуно бугьо, сер гирдки э



хэндэревоз эз песой булши энү эри кешире. Жогъиле зен э чепи дес хуышдеревоз гIэиле сэхд гирде, э расди дес хуышдеревоз бел булшире ведешенд эз дес эн кук, эз лэгIэ е гоф неведировунде, гуьул зе уре. Гье усэгIэт еки эз зенгьо, холей эн женжеле кук, гьирмизи бире, хьэрой вегирд э сер Сенем:

— Десгьойтуь кут гердо, эйчүь зере туь гIэиле?!— мугу у.— Туь биж сохдей гуфдире, хэлгъ чүь соху?!.

Эз дедешу бирден гьебо песово чаруьсдеиниге, сесгьо-хьрой-гьониге, небуге хов энү сирой бире, уре гисне биребуге, гIэилле чумлегьой хуышдере вокурде, чүькле сифтелей хуышдере гьужунде, пойгьо десгьоре э битобиревоз жумунде-жумунде, сер гирд эри гирисде. ГIэиле эри хомуш сохде, уре нене доре герек бу. Оммо Сенм жуьргIэт несохд эри э пушой кура бирегоргьо гIэиллере эри нене доре.

Бирден инжо е од бисдо, комики гьемере перт-мэхьтел гьншд эз некуми угьоре сегьм шиширере хуно. Жогъиле зен зурн-зурн, серсон, э хуышде недерире хуно, лов сохд ковре эдиеллей пешмире, вегирд эз гьэд энү гирисденбугьо гIэиллей хуышдере, э дүь деси, э зарбовоз шенд э гьэд хинике, лихьэе гIов эн эрх ссийв.

Едэгьдэгьэ э пушой чум эн гьеме веде бисдо чүькле жендеклей эн соворе гIэилле, кутэхьэ сипре шенле э тен ю вери, бирэхьне пойлегьо, занилегьой энү. Сес эн гIэил гье усэгIэт поисд, гьетле у э гьэд гIов офдоре.

Жовоне деде не хьэрой сохд, не гирисд, не офдоре э хори парпар сохд. Эзу э сесиш неведиромо. У поисдебу гьэргъ, сессуьз, гуьмсуьз, нежуьмуьсде, хуышг бире доре хуно, э куьте, чешмише чумгьоревоз денишире поисде э у жиге, эжеки гIов сүьперд чүькле гIэиллей энуре.

Кура бирегоре одомигьо и сегьмлуье коре дириуьтки, гуйге бирден эз сэхде пиени ишор бирере хуно, бисдорут, омбар мэхьтел, пешму, дуьлхуьрде хуно бисдорут эзи кор эн жовоне деде. ГIэиллегьош, комигьоки е лэгIэзойге эдембируьт э хэнде, руьхшендире хуно вежегьисде э иловлей энү, гьэгьр доре уре, хьэрой сохде «Биж!», «Биж!», лос бире поисдуьт э жигешу. Песде омбардеки кура бире одомигьо, иллогьки зенгьо, сер гирдуьт э серкуши. хьэйфбери, ёзугьбериревоз эри гуфдире:

— Вой! Туь эйчүь сохди и коре, художере?!...

— Биж гьисдигеш, зинде, худо доре нешумои! ГIэил мило борухо сохде миомо, уш келе мибисдо мирафд э гIэрей гIэилгьой эн дигь!

— ГIэил чүь тэхсир бу инжо?!..

Дигьбонигьойме туьнде, суеверни одомигьо бируьтгеш, рэхь-медуьл бируьт.

Омбардеки одомигьо гье усэгIэт шишире оморут э гьйрогь

эрх. Дуй жовоне кукгьо шендуьт хуьшдере э гъэд глов, ведешендуьт г1эиллере те у зофруво э зир парпарагьой есиёв офдоре оммо г1эилле зинде небу...

...Сенем етим бу. Бебе не дедей энун муьрдебируьт у гьеле чуькле г1эилле гьисдики. Уре е теке бирор бу, эзу е чор-пенж сал келете. Угьо омбардекиш келете бире, зинде мунде, вероморобируьт э у тикгьо-лугьогьревоз, комигьореки рэхьмедуьле зенгьоф гьунши-мэхьэле дренбируьт угьоре. Неденишире э нэхурдеигьо, гиснеигьо, э г1эили кешире омбаре нечогьигьо, бебесуьзи, дедесуьзигьо, гъэйгьу, шори недирен энугьо, етимгьо зинде мундуьт, келе бире ведироморут. Оммо гиснее рузгьо, салгьо гьечи негьогьти негирошд эри бирор Сенем. У е лэгъэре, жулесуьзе, синей ю дарафде кук бу, песде эз эгьулиш екем сук, когьиле, хосиет недерие одоми бу. Оммо Сенем лэгъэриш, екем сифет ю овлеи, сиечерде бугеш, хун ширин бу, жунсогь, дилбош бу.

Гьеле эзи е нимсал пушо э дигь сес дебу: эй зуригьо г1эруьси эн шаздегь сале етим Сенем нен кук дигь иму Шом (гьечи мугуим нум энуре э и ихдилот иму эзимбэгьдо) биренин. Э и чуькле дигь иму гьер г1эруьси неки эри хуьшдени домор не г1эруьс, бебегьо-дедегьо, кьунде гьовумгьой энугьо, эри гьеме келе ве чуьклей дигь шоре миг1иде хуно бу:э гьовол-зурневоз э гъэд се руз, боргулугьо, вежегьисдеигьоревоз, гьуногьулугьти сохдеигьоревоз э лезетлуье чигьой г1эруьсиревоз. Домор е сара денуьшде бисд сала кук бу, оммо эз душгьо, хиегьо фирегье, лап жонлуье, гьувотлуье одоми бу, сер г1уьре жинговеш бурмиш сохде мидануьсд — ижире гьувот дебу уре. Оммо эз хосиетгьо у уьткем, текебур, михэнете одоми бу.

Оммо г1эруьси энугьо чуь кориге нушунде неомо. И кор пешмунире хуно омо эри гьеме. Эз елойге омбаре одомигьой дигьге эз дуьли воисденбу и етиме духдер, э гужгьо-бологьоревоз, э гиснетешнеи келе бире ворморигьо э шуьвер бурав, мозоллуь, сэхьиб хуне, кифлет бу. Э дигь хэбер лов бисдо, ки Сенем — духдер нисди. Дигьигьо, жэг1метигьой эн Сенем, дануьсде хьээменди, г1эйбкеши, номуслуьи эн Сенеме, тэхсири эни коре, эни биёбурире эз хуьшдени соймиши энун жусденбируьт, комики неденишире те г1эруьси э гужевоз пуч сохди духдере э вэхд эн еки э вохурдеигьошу э песой эн дигь, иловлей эн комики гьеме богьгьо, вишегьо-кулегьо бируьт. Оммо кимигьойге, иллогьки одомигьой эн домор, тэхсирире э сер духдер вешенденбируьт, ег1ни, гуйге уре нивоисдге гьичиш нибисдо.

Бебе-дедей эн кук, комигьореки пушотеш нисе воисденбу и етиме, сэхьибсуьзе духдере хогьут эри кук ишу, э дигь хэбер лов бире эйло эслогь э герде невегирдуьт ижире, г1эруьсе э нум биёбуриревоз дирувунут э хунешу. И коре угьо эришу лап келе хуьрди, келе номус хьисоб сохденбируьт. Кук эри эз гоф бебе-

дедей хуыште невадарафеинниге, небуте дие уре эз севгили хуыште хьэз неомореи буге у духдери энуре пуч сохде бэгъдо, э герде вегирд вогей эн келетегъой хуышдере.

Е кем вэхд гиросше бэгъдо бордори эн Сенем мэгІлуым бисдо. Жуьлесуьзе, эгъуьлсуке бирор энугъи фикириш нисе сохденбу эри ведешенде эз кифлет энугъо гьэгър э хэгъер ю гуж сохдеи кук энугъоре, межбур сохде эри хосде хэгъер юре, гьелебуле гирде эри энугъо. Сер зиѐди, бирор эн Сенем дануьсенге, ки хэгъер ю бордори, э гоф зен хуыште э вор варафде, комики э чум дие нисе хосденбу шевхэгъер хуышдере, шуьвер хуышдере э у хьэлово сохде, гьышд пиш сохде ведекуьрде уре эз хунегъо.

Екиш дие э дигъ э уревоз гоф нисе сохденбу, эз Сенем дур гирденбируьт хуышдере, гуйге у гьутури, жузамли бу. Э ки энч поисде, э уревоз э е жиге нефес вокоширеш гуйге Гювун, биѐбури, хэто бу э шуьгъэм энугъи биж дери гуфдире. Энжэгъ е зен дигъ иму (гуим уре Мозол) е екелуье, жуьргІэтлуье, омбар рэхьмедуьле зен, э фирегъи ченд дуьдуьй эн назуке лэгъэре шуьвер хуыште бугъо, э гьуьндуьри е сер эзу звер, неденишире э гофгъо, лэгъ-лэгъигъо, шермендигъо э товун Сенем, жиге до уре э хьэът хуышде, э зир чорхъэчее чордогъ, э сер тону, гьер руз орине нун буржундембугъо жиге.

Е гиле зен гьуншиму огол зе мере э хьэът хуыште. Э сер тону, э гьэд тешт тэхдеи уре э сер-сереки тозе буржунде нунгъо вебу, гиргинегъо, руй ишу э зерди не тум хошхошевоз зере. Нунгъо гьеле герм бируьт, бегъем хиник небиребируьт. Зен гьунши еки эзу нунгъо, гиргине гуьнебохоне хуно бугъо, вегирде до э ме, мугу:

— Бер, хэлефме, и нуне эри художере Сенем э хьэът Мозолигъо. Оммо воро-воро эзу куьнд биѐй. Е ченд луьнг мунде эзу ше и нуне э пушой энугъи, песеде гье усэгІэт вирих биѐ песово.

Эз у вэхдевоз лап омбаре салгъо гиросшди. Омбаре коргъо эз ѐр-хэълме вадарафдет, оммо шекуьл эни кор дигъне бире коре хуно лап хуб э ермени.

Ме э ки Сенем оморенге, у нуьшдебугъу э сер бирэхъне хори гилеви э зир чордогъ, бирэхъне пойгъой хуышдере э хинике тону доноре. Э тен энугъи назуке зерде булши вебу. Эз зир булши, комики гьейсэгІэт лап тенг бу эри энугъи, веди бу, чуьтам шуьгъэм энугъи э буз ю веромориге. Сер энугъи дуьлу, э сер синей ю вебу. Хьэът холей Мозол очугъ, чапарсуьз, гьопусуьз бу, э ѐн рэхъ эн билогъ бу. Гьеме эзинжо гиросшдогоргъо, зенгъо, духдергъо э совугъошуревоз эри Гюв оворде э сер билогъ рафденбируьтгъо, уре диренбируьт, гофгъо, доворигъой энуре гирденбируьт.

Ме увэхди чуькле ГІэил школаи бируьм. Э ки Сенем э нуневоз э рафдеки эз ело мере э у денишире, томоше сохде воисденбу, песеде (иму ГІэиллегъой дигъ эз гьеме коргъой эн келетегъо хэбер-

дор бирим), эз елойге мере э у езугъбери оморенбу, оммо гофгьой зенгьой дигь имуре шиновусде, э дуьлме терсиш оморенбу эз ки энэ эри куьнд оmore. Эз расдиш ме эз у куьнд оmore-оморе мере зиедте эдембу сегьм шишире, гуйге э иловлей энэ руьхьгьо, шэхьитугьо, гъэлифогьоют, комигьоки э ме гъэсд мисохут. Унегуьре, ме е ченд луьнг эзу дур поисде, теретэгди шендуьм герме пуше э пушой энэ, э сер занигьой энэ, вирихдуьм песово э лой хунейму.

Е ченд орине гиросде бэгъдо, Сенем э хьисобовоз дануьсде вэхд гъэйил зендей ю омори гуфдире, екиш недануьсде вир бисдо эз дигь. Песде мэглуйьм бисдо, ки у рафди э шегьер, э болнисе эри зенде. Е мегьиге бэгъдо у вогошд э дигь э соворе куклей хуьшдеревоз.

Э гъэд эни вэхд пушотейне соймиши энэ зен хосд, гъэруьси сохд. Песде у гьечи гирденбу хуьшдере, гуйге е гъучие, гьинорлуье кор сохдиге, етима, сэхьибсуьзе духдере, гьечи беднум, бнэбур сохди, ижире биёбуригьоре, гезирегьоре э сер ю овурди. Куклей энэ «биж» гьечи муьрден, пуч бирейш э хэпер энэ небу.

Гъейсэгъэт э ёр овурде и трагедияре, ме эрима фикир сохденуьм: эйчуь Сенем сохд и э дивэгъ, природай эн деде э ки балай хуьшде гуьнжо нисдигьо коре? Гьисдими ужире пеймунегьо э гъуьлом эри пеймунде муьгьбет дедере э ки бала? Гьисдими ужире гъурбуни, комиреки деде неёру эри балай хуьшде, э у гъэре жун, нешумой хуьшдере?!

Белки бэгъдовой энэ синемешигьо, бедигьо э сер энэ омориго: севгилю э ю гуж сохдеи, хогьин ведиромореи, бирор юре эз хунегьо ведекуьрдеи, бордоре зен сего хуно э хьэёт, э сер тонуй кес шев руз гировундеи, охмуригьо, руьхшендигьо, нифригьо, шермендеигьо дирей у эз болнисе э гъэйилевоз э дигь хуьшде вогошденге,—гьемей энугьо э неветовусдение жире кори сохд э дуьл, мувэхь энэ? У белки эри хуьшде фикир сохд, ки гъэйил энуре дуьлхоши, дуьлдинжи, зиндегуни нибу э гъэд тойгьой энэ, эн дигьбонигьой энэ, эжеки гоф «биж» еки эз лап беде, элчэгъэ, охмуруье нифрини. Уре гьемише эз песо, э пушой чум эри гьэгъ-негъэгъ негъэгъ серкуш, шерменде, гъэйбжежер мисохут э нум «бижевоз»? Э у хуьшдению е тэхсириш неверики, энжэгъ эзу товуне у «биж» хьэсуьл омори гуфдире согъ гъуьмуьр хуьшде хуьшдере тэхсире хуно гьис мисоху, и кор дуьл, зиндегуни энуре огъуре хуно тэхьл мисоху. У белки нифри, нэгълет мисоху у рузе, у сэгъэте, у дэгъдеэгъре, кейки дедей энугьо эз уре фурмундигьо, гуж сохдигьо хогьине соймиши хуьшде, э гъэл энэ дерики, эз у эри ю бордор бири? Эз товун у «биж» хьэсуьл омореи, одомигьо дануьсденуьтгеш киниге бебей энэ, у гьемейше хуьшдере кес, ёде хуно мидануь, гьис мисоху э гъэрей энугьо. Гьечу бире бэгъдо хуб нисдими у гъейсэгъэт е мегье соворе надане гъэйилле гьисди, пуч бу, муьруь бурав эзи бирэхьме фоние гъуьлом, хилос бу эз э

пушо деригъо сэгIэргъо, дуьлхуьрдигъо, охмуригъо, хижолетигъо-ре диреинжон?

Оммо Сенем эз товун хуьшдеш недануьсде небу, ки юреш е хубе гъисмет нибу эз тэхьле гъисмет бэгъэй, у гьемише сечкуе, нумбеде, серкушие одоми мибу э гIэрей эн дигъ-жэгIмет хуьшде, е доне мерд, эгенер у шуькест, бухур-бинодур гъисдигеш рази нибу биж зендигъо духдере эри хосде, номус хуьшдере э хори зере.

Оммо биреники кимвэгIдо муьгIуьжуьзгъо э гIуьлом! Офд омо ужире мэхьтеле, гIэжоибе мерд дигъиму, песе юш эз сер-сифет, буй-бала хуб, гьеле жогъиле одоми, комики вегирд Сенеме эри хуьшде э зени.

Ини чуьтам бисдоге и кор.

Эзи пенж сал пушо те и ме ихдилот сохденуьмгъо трагедия бире, э 1922 сал э дигъ иму е тозе зен хосде жовоне батрак раче зен хуьшдире рашк сохде э кин кук эн е ворлуье одоми, эри комики у батраки сохденбу, уре зере э хэнжелевоз куьшдебу. Эри батрак суд сохде, уре фирсоребу эри дегъ сали э Сибирь, комиреки э иму «гиден-гелмезе» жиге хъисоб сохденбируьт увэхдигъо.

Хьэшд сал гирошде бэгъдо эз и батраке э Сибирь фиргоре, у рузгъой эн е рузгъо вогощд э дигъ тозе парталгъой милиционери, тов-товие гъэиш э португеевоз э тен ю вери. Форма лап хуб нуьшденбу э дараме буй-балай эню.

Э гъэд эни хьэшд у э Сибирь бирей эслогъ е жирейге одоми оморебу. Э гьемеревоз, келеревоз, чуьклеревоз э эдеблуьбиревоз гоф сохденбу, гоф пуьрсиренбу. Хуте биребу хунде, нуьвуьсдеире. Э гъэд е орине у э дигъ мундеи, омбаре одомигъой дигъ иму уре э гъуногълугъи бердебируьт. Иму гIэилгъой эн дигъ э у гьечи э томоше ве хуьрметевоз дениширенбирим, гуйге э дигъ иму милиционер нэгI, е келе генерал омори.

Оммо э гъэд согъ орине у э дигъ бирей е гилеш э лой зен хуьшде нерафд, комики гьемей эни салгъо уре гузет сохде, дениширебу э у. Е руз мунде те рафдей эню эжеите э жиге гъурлугъ хуьшде, у омо э сельсовет, овурд э хуьшдеревоз Сенемеш. Э уревоз у регистировать бире, себэхьимуьн берд Сенеме э хуьшдеревоз э у гьейсэгIэт зигъисденбуго ве кор сохденбуго жиге.

Гуфдиренуьт угъо э еки лап хуб, эз дуьли-жуни зигъисдет. Угъо хэйли салгъо дие зинде нисдуьт, оммо зиндеуьт, согъ-салатуьт гIэилгъо ве невегъой энугъо. Гуфдиренуьт гьемчун, ки юш, Шомиш, э сер етима Сенем и гулгулигъоре овордебугъо, э хубе руз немунд. Пушой довгIогъиге небуге э сер довгIоиге, киниге, эжеиге куьшди уре, гьвреюш мэгIлуьм нисди.

# КИШДИ ХЪМОЛИ

*Музыкальная комедия  
в 3 актах*

## ВОЗИ СОХДЕГОРГЬО:

М а р а л — звеньевоу колхозу, 21 сале.  
О в ш о л у м — член звено, 30 сале.  
Х у м о р — член звено, хэбьргили эн Марал, 20 сале.  
Ш е в р у ь т — член звено, хьомол, бебей эн Марал, 60 сале.  
Х о н у м — дедей эн Марал, 55 сале.  
О в р у м — алварчи, спекулянт, 45 сале.  
Г ь у ь з у ь р г у ь л — зен Оврум, 24 сале.  
З а р а н г и л — илчи, долол, 65 сале.  
О ш и р — жогьиле агроном, 27 сале.  
О в ш о р — член звено, 30 сале.

Э пьеса бирмунде оморенуьтгьо гьозиегьо, коргьо гирошденуьт э 1960 сал э еки эз онгурбогьгьой|эн колхоз Дербенд ве э шегьер Дербенд.

## СУЬФДЕИ ПЕРДЕ

Онгур богь эн колхозу. Членгьой эн звеноу Марал нуьшдет эри нун хурде, форигьэти вегирде. Э иловлей энугьо э хори бедирегьо, ченэхгьо севергьон. Хумор эз жигей хуьшде вэхишдени, лове э делхэки хэнде веберде, куьнд оморени эз Овшолум. Эз гьул энугьо гирде, ведировундени уре эри вежегьисде э хуьшдеревоз. Угьо сер гирденуьт эри вежегьисде. Гьемееки чек зеренуьт. Хумор э вежегьисдеки хундени э гьовой овшори:

Э-эй!.. Гьуьзуьргуьлгьо вараисдт инжиге,  
Рихьон, суьмбуьл буй вешендет инжиге,  
Мейво, онгур рач доренуьт инжиге,  
Э дуьлгьойму эшгь венгесдет инжиге...

Угьо э еки вежегьисдеки дироморени Марал.

М а р а л. Дуьл ишму гьемише шор гердо! Эдее диренуьм ишму инжо дезгогь вокурдейт?

Гъеме. Омбар согъ боши, Марал, согъбоши звеньевой!

Марал. Гьелбет, хунде, вежегьисде — хубе кори, оммо гьер коре вэхд юни, жигей юн.и Хуш-хьэллол ишму, нун пишнеиней иш-муре хурдейт, многой сер гирит кор ишмуре эй сохде.

Хумор (*вежегьисде-ведегьисде куьнд оморени эз Марал*). Туыш, хэгьергили, биё вежегь екём э имуревоз. Гьовой одоми шор биренге, одомире диеш хубте кор сохде воисде.

Е ченд одоми. Хумор дуз гуфдире, звеньевой. Е гиле туыш вежегь!

Марал. Межегьуым десиге. ГьейсэгIэт, хьовиргьо, вэхизит гьемеeki дарайм э кор иму: иму гоф дорейм имбуруз е гекгар богъ эри вечере.

Овшолум. (*евгирдени бедирере*). Звеньевойму дуз гуфдире. Веирит ченэхгьо, бедирегьошмуре — дарайм э кор иму.

Гьемеeki вэхиденуьт вегриденуьт бедирегьо ченэхгьошуре.

Хумор куьнд оморени эз Марал.

Хумор (*э хэнде-зарифатевоз*). Бошгу, хэгьергили, гуфдирей-туь бугу. Имбуруз нэгI, эй зуригьо, худо гьишдге, э гIэруьсигуь меженгьим те воисде.

Овшор. (*ченэхэ тефте хуно зере-зере, душгьоре вешенде-фушенде*). Э жун бебейме, гьечи межегьим, э зир пой иму хори мер-зуй!..

Овшолум (*эз Марал*). Шевруьт бебешурме унгъэде мигьил-лим вежегьисде, те рушдешовол ю бурра, шовол ю эз пой ю оф-дорре!

Гьемеeki хэндусленуьт. Шевруьт э е дес ю ссвер дерн, э е десигеревоз эз гьирмизине кишди хьомоли хуышде гирде, сере жумунде, эз зир лов хэндусдени.

Хонум куьнд оморени эз Овшолум, э зарифатевоз зерени эз душ эню.

Хонум (*эз Овшолум*). Пэх гердо дедейтуь! Туь мердмере э и гофгьойтуьревоз гьирмизи сохди гьишд!

Овшолум (*э гуш Хонум*). У, холей Хонум, эз гьирмизине кишди хьомоли хуышде гьирмизи небиренге, эзи гофгьойме гьич гьирмизи нибу.

Марал (*эз гьеме*). Дануьсденит гьейсэгIэт иму коми тэхтере биё веченимге?

Овшолум. Эри. У жиге богъ эн Оврогьом Дадашеве.

Овшор. Эн Оврогьом Дадашеве нэгIэй, эн Мешеди Жегь-фере!

Овшолум. Э и хэр, мувэхьсуьз дениш ебо! Иму тэхдей эн Мешеди Жегьфере перн вечирейм, туь э хуне хисиреки, шуьгьэм-туьре эз мунде жигеш гьобон сохдеки. (*Десе зерени э шуьгьэм эню*).

Овшор (*хуьришль бире*). Э жун бебейме, гьейсэгIэт и ченелэ



э мазалайтуь мизенуьм, сертуьре чэх мисохум. Гьобон-хуг туьш гьисди келегьойтуьш!

Гьемееки хэндусденуьт. Овшор гьэгьри бире, ченахэ чарунде нуьшдени э сер ченэх.

Марал. Э негьогьни хуьжет месохит. Дузи, у жигере пушоте богь эн Оврогьом Дадашев гуфдиренбируьт. Оммо омбаре салгьо гирошдет:эзу вэхдевоз не Оврогьом Дадашев, не Сефтер Ахундов, не Менешир Огьо, не Мешеди Жегьфер сэхьиб эни богьгьо нисдуьт, и богьгьо эн колхоз имуни. Эзи гьейсэгIэт иму / чинимгьо гэхде жобордлуье зен иму холей Гюлбогьор, сад салигеш худо гIуьмуьр до уре, эзи е ченд сал пушо эри буле бегьер вегирдеи гIуьзетлуье нум Игид Жофой Социалисти гьобул сохди. Эз имбурузевоз бийьт иму и жигере нум ним «Богь Гуьлбогьори».

Гьеме (э е лэгIэ, э разиендиревоз). Ой машаллагь, Марал! Согь боши!

Овшолум (эз Марал). Эз гофтуь, теклифтуь иму омбар разиним, лап эз дуьлимуни!

Марал! Э и коревоз иму эз ело мибирмуни гIуьзет, хуьрмет имуре э кин холей Гюлбогьор, эз елойге гьоим мисохим тэгIрифлуье нум энуре э гIэрейму.

Овшор (эз жигей хуьшде невэхшиде). Хуб-о... Эз хьокимгьо, нечальникгьо непуьрсире, разименди энугьоре невегирде, имуре эри эни кор ихдиьри?

Овшолум (э руьхшендиревоз). Эзугьо когьоз небире, хэбер невегирде эри эни кор ихдиьри, оммо эз туь хэбер невегирде, ихдиьри небире—нэгI, э жун мазалайтуь! (Хэнде).

Марал. Гьелбет, ихдиьри. (Куьнд оморени эз Овшор). Хуб, гьеме э пои, эдее э кор дарафденим, туь эричуь нуьшдей? Туь э имуревоз э кор нисе дарафде беге?

Овшор. Ме екимегеш форигьэти вегируьм, песде э кор мидарам.

Марал. ЕгIни, ингьэдеш вомундей эз кор сохде?

Овшолум. Эри, эри. У план хуьшдере имбуруз егььем сохди. Имогьой кор несохдгеш гIэмел миьв.

Марал. План хуьшдере? Коми плане? Кей?

Овшолум (бирмундени э шуьгьэм Овшор). Шуьгьэм хуьшдере, чувол хуьшдере... Эде, э кор оморени гьеле дуь сэгIэтиш нисди, оммо дуь гьэрбол энжил не согь е гьэрбол онгур хурди, луьхьлуьхуьт сохди, гьич эжей ю дарафдиеш мэгIлуьм нисди. Гьеле шуькеетиш эдее иохде, юре, фэгьирлере, гьич иштогьиш нисди. (Хэнде).

Овшор (эз жигей хуьшде вэхшиде, ченэхэ вегриде, э сьэгь-ревоз). Э жун бебейме, гьейсэгIэт и ченехэ э келлей сертуь мизенуьм. Жинжинигьоймере меверовун эдее гуфдиренуьм э туь!

Гъеме хэндуьсдени. Овшор гIоси, гъэгъи денишире э угъо, э зугъун энугъо сохдени.

Овшор. Хьэ-хьэ-хьэ-хьэ! Чьуниге беге инжо ишму гъемееки хэндуьсдени?! ГIэйбиш бу гуфдире, песой эн ки ведини инжо?!

Членгъой звено диеттеш сэхд хэндуьсденуьт. Овшор э хуьршевоз дениширени э угъо.

Марал (эз Овшор). Бэхшлемиш сохит, Овшор, гъич э сертуь эгъуьл верими, туь ижире гофгъо гуфдирени? Инжо эз туь келете одомигъош гъисдуьт.

Овшолум. Эй хэгъер, э сер эгъуьл вебугъо одомиреш бегем э и келеи шуьгъэм вебирени, ижире шуьгъэмперез бирени?

Овшор (э гIосиревоз). Астафрулла дие!.. Тфу, нэгIлет э туь шэхьитуь.

Марал. Вессит, хьовиргъо, кешит!..

Марал пой норени эри вадарафде, песе гене поисдени, чаруьсдени э лой Овшор.

Марал. Валлагъ, ме нисе дануьсденуьм, Овшор, э и коргъо, гъовогъойтуьревсоз эхиртуь чуь мибуге?

Овшолум. Эхир энучуь биренини? У вамасире гIэлибобое шуьгъэм энучуь лов-лэхьче мибу мурав гIэтоше гъэрпузгъой Муьш-гуьре хуно.

Шевруьт. Весит, вессит, кешит дарайм э кор иму.

Марал, Шевруьт, Хонум, Овшолум рафденуьт.

Хумор. (десе вежегъунде). Ну, прощай, обжор!

Овшор. Пой, пой ебо, туь мунош! (Гирдени эз гъул Хумор). Лап хуб бисдо туь э хэвлети офдори э десме. Мере эз туь е гоф пуьрсире воисде. Туь эхи мере гъемише э жигей «Овшор» «Обжор» гуфдире. Оммо е гилеш туь э ме негуфдири, э сер невенгесди: мэгIной эни гоф чьуни?

Хумор. Уре е мэгIнош нисди. Э зугъун иму туь Овшори, э зугъун уруси—Обжор, Обжора. И нум лап хуб гуьнжуьсде э туь!

Овшор. Эй маладис! туьре! Мере эзи кортуь лап хьэз омо! Эдее дуренуьм эз гъемей эни членгъой звенойму туь эгъуьлменди, туь эз гъеме чьукле гъисдигеш. Негъогъ нисе гуфдире: «Эгъуьл еште улмез, боште улер». Ме э духдERGъой урусевоз э шинох би-реки, угъо эз ме омбариш пуьрсиренуьт: «Милай Овшор, как тебе лучши обзывают по-русски!» Имогъой мугуюм эзугъо: «Бажалнса, мене обзывает — Обжор!» Эз расдиш, раче нуми.

Хумор (э зир лов хэндуйсде). Гьелбет раче нуми. Ме э туь гүфдируьмки, лап э туь гуьнжуьсденигьо нуми.

Овшор (э клегедиревоз). Ме хуьшденимеш рачуьм, шэхслуьнуьм.

Овшор ведешендени эз куьф хуьшде чуькле гузгилере, э ловхэндере оз дениширени э сифет хуьшде, гене донорени гузгире э жигей ю.

Гьери с гофигеш пуьрсуьм эз туь: эхи серме невадарафд коми жигере рафдет игьо эри вечире?

Хумор. Гюлбогьоре.

Овшор. Кире?

Хумор. Марал гүфдики, эз имбурузевоз иму вечиренимгьо тэхдере «Богъ Гюлбогьори» нум норениним. У фикир эз зуревоз дебу э дуьл звеновойму. (*Кутэхэ пауза*). Поё, туь э хуне эричуь нисе рафде?

Овшор. (*шор бирере хуно*). Ой согъ боши! Небуге гьеме эз ме пуьрсиренуьт: туь э кор эйчуь нисе ведироморе? Мере имбуруз э духдербьоревоз, чуьтам гүфдиреге уре э уруси, исвиданей.

Хумор. Угьо дануьсденуьт, ки туь э гьэд согъ сал энжэгъ дуь гиле оморе э богъгьо эри кор сохде, дузире гүфдиримге, е гиле э вэхд онгур, энжил чирегьо, е гилейге э вэхд богъ буррагьо туьлугътуьре эри пур сохде.

Овшор. Хуб, гьэгъэй, гуюм э богъчирегьо ме эри онгур, энжил хурде оморенуьм, егӀни, туь гүфдирере хуно, «туьлугъмере эри пур сохде». Э вэхд богъ буррагьо эричуь оморенуьм?

Хумор. Э богъбуррагьо туь оморени э вэхд онгур вечиренигьо туь э зир хок пэхьни сохде онгургьоре э пэхьники эри э шуьгъэмтуь декуьрде.

Овшор (*гӀоси бире*). Гьи у дилможе зугьунтуьре мар зено, шэхьитуй! Гофгьой энире дениш ебо!

Хумор хэндуйсде-хэндуйсде вадарафдени. Эз песой энү, ченехэ вегирде, вадарафдени Овшориш. (*Пауза*). Дироморени Марал.

Марал (*чуме-чару сохде*). Ки биё бу мере гьейсэгӀэт огол зеребугьо?

Дироморени Оврум. Уре кутэхэ рушлегьо вери, э тен ю стильни жогьильёне парталгьо вери. Гьовой ю е кем серхуши.

Оврум (*десе э сине'зере*). Менуьм, раче гуьзел, шогьлер гуьзели!

Марал (*э мэхьтелиревоз*). Туь? Туь кини?

Оврум. Ме Меджнумум!

Марал. Меджнун?!

Оврум. Эри, гуьзел! Ме тозе Меджнунум. (*Хундени*).

Меджнунум эз дердтуь бирсм ме дивоне,  
Гъурбунум туьчуьни жейроне, жейроне,  
Биё мекуьш чуьмени жейроне, жейроне,  
Эй дердгъойсе бош чоре, бош чоре, гъей!  
Эй дердгъойме бош чоре, бош чоре, гъей!..

М а р а л. Денишит ебо, ишму инжо гъэлет бисдорит. Ме эдее диренуьм ишму ичку хурде оморе одоминиит, оммо эри Меджнун ичку хурде, пиёнискей лоигъ нисе доре.

О в р у м. Вот иминно, дорени. У куьгъне Меджнун лезет ичкуре недануьсди. Эгенер у Меджнун э у хьол хуьшдеревоз е дивисд грамм э бугъоз мешендге, увэхди у е кордоре вегирде, шуьгъэм Ибнисаламе сула сохде, э гуж-хушевоз мегирдге эй хуьшде Лейлире, у вэхди у не делуьш нибисдо, не дивонеш, не хъэсрот Лейли э дуьл дериш нимуьрд. Варасири?

М а р а л. Бэхшлемиш сохит, эдее диренуьм, ишму гъозией Лейли нен Меджнуне хуб нисе дануьсденит, э литература, книг хундеревоз гъэрешиму нисди. Э севгил гуж сохде нисе гуьнжуьсде. Песде гъинор эн гьер одоми нисди жовоне Меджнуне хуно ошугъ бире, муьгъбете сэхд дошде эз жун хуьшде зиёдте.

Марале воисдени бурав.

О в р у м. Пой, пой, раче духдер! Туь мере унгъэде овом хъисоб месох. Ме ченгъэдер э серме веригъо муйгъо шегъергъо хундем, книггъо, журналгъо дирем. Э товней муьгъбет, ошугъ бире-небирей туьре дануьсде воисдениге: гьер одомире ихдиёри эри ошугъ бире, воисд, у одоми рач бугу, воисд бирач, воисд огъил бугу, воисд жогъил. Инией, урусгъоре е келе шогъири. Уре Пушкин нуми. Туь уре шинохдени?

М а р а л (хэндуьсдени). НэгI!

О в р у м. Эле, нисе шинохде? У гъейсэгIэтиш э Ленинград зигъисдеки? (Марал хэндуьсдени). У нуьвуьсдики: «Лубов фисе.. фисе...». Пой-пой, туь мунош, чуьтами у?

М а р а л. Ме нисе дануьсде.

О в р у м. Чуьтам нисе дануьсде?

М а р а л. НэгI! Ха-ха!..

О в р у м. Пой-пой, мэхэнд, инией булукнот. Инжо гъеме вери. Ме инжо нуьвуьсдем ченд жире гофгъо, метелегъой хэлгъире э товун муьгъбет, хосдеи-соймиш сохдеи, ошугъ бирей, гъемчун эн келе писателгъоре: «Пушкине, Лирмонтове, Толстуге, Мэхъсуьм Горкире... (вешендени велггъой блокноте) Инией, гуш вени: «Лубов... ни картушке!...» Эле, нэгI, нэгI, у нисди. (Марал хэндуьс-

*дени*). Пой, пой мэхэнд. Ме гьейсэг! Эт миофум уре. Гьо! Ини оф-дум! «Лубов фисе вузрасти покурни».

Марал. «Покурни?» Ха-ха!

Оврум. Эри, эри, вот иминно, покурни. Одоми соймиш бире э сал-гуьмуьр кор недери. Ме гьечи варасиренуьм хьовир Пушкине: эз севоре г'энл сер гирде, те нвавд сале пире гоп-гоп мидануь соймиш сохде, ошугь бире. Энжэгь, раче духдер, (*зерени десе э куьф хуьшде*), куьф одоми биё пур бу. Э Туройму негбогь ненуьвусди: «Гьекисиф ег'энит ит гьекуьл». Ег'ни э пулевоз туьре гьерчуь воисд сохде мидани. Дедей мемиро пуле!

Хундени гене:

Поиз миёв мибошум ме хэзол,  
Э чулгьо ве боггьо мофдону е зовол,  
Пуч мибу гуьмуьр, недире е мзол,  
Эй дердгьойме бош чоре, бош чоре, гьей!  
Эй дердгьойме бош чор, бош чоре, гьей!

Марал. Эй, э 'ме денишито, гражданин Меджнун! Ме эдеме дире, ки ишму неки эз шороб, гьемчун эз куьгьне пес мунде г'эдотгьо, дивзэг'гьо гиж, серхуш бире одоминит. Ишмуре эри ишор сохде омбар четини. Уни, вегирит эзи раче ширине онгургьо, емшгьой богь иму хурит, белкем увэхди похмель ишму екем гирошдге.

Оврум. Поит! Ме эз расдиш, раче духдер, эри емиш восдоре оморем. Оммо у ме восдоренуьмгьо емиш эз гьемей буьтуьн емишгьо-мейвоьой дуьньёгь ширини. Энжэгь доре-восдорей эню ширине емише э уревоз кошдигьо, веровундигьо боггьбоневоз биё гоф сохум. Чуьтам гуфдирениге: пул эн ме, мол—эн ю.

Марал. Бэхшилемиш сохит, э богь иму э пулевоз емиш нисе фурухде.

Оврум. Вот иминно!..

Сес Хумор. Марал! Ой Марал!..

Дироморени Хумор. У Овруме диренге, бирден поисдени, гоф нисе сохде.

Оврум уре диренге, дуь чуме буьхь сохде, э темэхэвоз дениширени э сифет, буйбалай эн Хумор.

Оврум (*сере жумунде-жумунде*). Пегь! Бебейтуь вой, и чуь раче чини эде, и чуь жендек, и чуь буй-балай?! Ме мадан гьемей эни чэхэ чигьо э и колхоз дебиребей! (*Эз Хумор*). Руз э хэйр бу! Издравствуй! (*Хумор жугьоб нисе доре*). Этуьревозумэй! Издравствуй—эй! (*Эз Марал*). И кари?

М а р а л. Нэг! Эри, эри!

О в р у м (*Э хэйтфбериревоз зерени эз зани хуьшде*). Хэйтф, ижире раче сер, ижире жендек кар бисдо. (*Эз Марал*). Дие согъ-боши, раче духдер, дасбидание!

Оврум рафдени. Хумор не Марал келе-келе хэндүсденуьт.

Х у м о р (*хундени*):

Гуьзуьв ойдун, хэгьергили,  
У хосде куктуь омери,  
Ме сохденуьм келе шори,  
Войгей эн дуьлтуь омери.  
Эеки ишм вохурде,  
Раче гофгьо вокурде,

Дуьлгьой екире шор схе,  
Соймиши дуьлтуь омери.  
Небу эз ёр гэгьэри бире,  
Пойле зени мозолтуьре,  
ГТэсел зе хуб зугьунтуьре,  
Шогьсенем, Ггэриб омери!

М а р а л. Ки омери, ки?

Х у м о р. Небуге туь нисе дануьсде? Ошир омери, Ошир!

М а р а л (*э мэхьтелиревоз*). Ошир?!

Х у м о р. Эри, эри! Иму э ггьирогъ ггэндэгъ э онгур вечиреки эз дур дириуьм уре. У эдембу э председатель колхозевоз гоф сохле. Мугум: видовум ебо бошорен дуьм хэгьергилимире. Ме дануьсденуьм эхи туь уре чуьтам хосдениге.

М а р а л (*ГТэйбе-гТэйб, оммо билбуле хуно*). Ме?.. Ме не уре э товун у мере хосдени гуфдире, енебуге ме уре ходенуьм гуфдире э гТэрейму е гофлеш небири. Ггечиниге э богъ киш оморени рафдени.

Х у м о р. Пой бура! Ме нисе дануьсденуьм беге: дуьлтуь ггей-сэгТэт эз шори эдее бэгТэвечере хуно вежеггисде, оммо эз лэгТэй-туь ггьерчуь гири эдее пертово доре рафде.

М а р а л. Пертово доре чуьтам? Ме э туь ггьич е гилелеш гуфдирем ме Ошире хосденуьм гуфдире? Расди ченд бо гуфдиребируьм, чуьтам у эзи дуь сал пушо пушой институте варасде оморевуге э практика э колхоз иму э се мегги, мере доргьоре ггэлем зере хуте сохдебуге, ченд жире несигТэтгьой агрономи деревуге.

Х у м о р. Э ме дениш ггей! Ме э садангьоревоз сир кошдем. Те туь ебо лэгТээ вокурде, ме ггье у туьтем дануьсдем э дуьлтуь чуь гирошдге. Оммо туь эдее эриме нэггьюл хунде. Пой инжо, ме бурам зури-зури огол зенуьм Ошире.

М а р а л. Нэг!, нэг!, огол зере меёр инжо. (*Десе зерени э ггутинегьой хуьшде, венорени э сине. Евош-евош эри хуьшде*). Эз расдиш, дуьлме эдее паруьсдеке хуно пар зере, ггутинегьойме эз некуми эдее су гирде сухденуьт. (*Эз Хумор*). Нэг! нэг!, бурам э песой корме, э сер корме поюм.

Х у м о р (*гТоси бирере хуно*). ТэгТэл бире мемун, духдер! Е ним-сэгТэт э сер кортуь непождиге, кор э чоггьол чаруьсде, э вишегьой

Муышгуыр нен Самбур нивируьхуь. Пой э жигейтуь, ме бурам огол зенуьм биёрум уре.

М а р а л. Огол мезе. Эгенер дуьл энү битоби сохдениге мере эри дире, ю хуьшдению миёв э киме.

Х у м о р (*зерени э битобиревоз эз занигьой хуьшде*). Погь, чуь тэглэле одоми биребей туь, духлер!? Э сер гофтуь гоф овурде нисе бире. Эн туь: «Гье у товугьун бир будини, бир буди!» Э жун бибеле-бирорме, гьэдо марасо, мере еки эзуни чуь Ошири соймиши миёсде бире, рач, эгьуьлменд, хундегор, ме уре э гьошгьо-чумгьоревоз, э ширине гофгьоревоз, глэсел мисохдум э хуьшде могосунд глэнг глэселире хуно.

Оморени сес мэгИни хундей Ошир.

### МЭГИНИ ОШИР:

Хундеире ме варасдем,  
Э ватанме вогошдем,  
Ере дире ме хосденуьм,

Эри энү ме хьэсротуьм,  
Эри энү ме гьейронум.

Марале воисдени вадарав, оммо Хумор гьуьл зерени уре песово, поюндени, ю зури-зури вадарафдени. Дироморени Ошир. Ошир шори-шори мэгИни хунедни гене:

Э чор тараф эни доггьо  
Варасдет раче боггьо.  
Ерме рачи эз угьо —  
Буьлбуьл э глэрей гуьлгьо.

Ере дире ме хосденуьм,  
Эри энү ме хьэсротуьм,  
Эри энү ме гьейронум.

О ш и р. Марал-жон, руз туь э хэйр бу!

М а р а л. Эгьибеттуь э хэйр! Хош оморейт!

О ш и р. Согь боши, Марал! (*Э мигьробинеревоз денишире э Марал*). Чум марасо, эз дуь сал ме туьре недире эйло, туь диеш рач бирей.

М а р а л. Туьш гьич дегьиш небирей, оммо екем лэггьэр бирей.

О ш и р. Эз дуьлпесои, эз омбар битоби сохден туьре эри дире.

М а р а л (*э серкуширевоз*). Гье эзу товуней эхьисобовоз э гьэд эни согь дуь сал туь эрме е когьозлеш ненуьвуьсдейгьо?

О ш и р. Ме тэхсируьм э пушойтуь, Марал. Оммо, бовор сох, ме эрме фикир сохдебируьм: туьре белки одохлуни, бешму туьре теимогьой э шуьвер недоре нигьилуь, у, бэхшлемиш сох, эз куьгьне глэдотгьо сер зеренигьо одомини.

Кутэхэ пауза.

М а р а л. Мере одохлуь нисди. Не ме э мере невоисде одоми гьич нирам!

О ш и р. ЕгИни?..

М а р а л (*глэйбе-глэйб*). Пой ебо! Эхи гуйге туь чпор миёсди

варасде институте? Эз туь э колхоз иму практика оmore эйло дуй сал гиросди?

Ошир. Дузи, Марал. Ме пор варасдем институте, гъбул сохдем диплом агрономире. Эгенер ме миднуьсдуймге туьре одохлу нисди, туьре э шуввер недорет, ме гье пор вогошде миоморум инжо эри кор сохде. Оммо мере ужире имиди небу, не э гIэрейму ужире гофиш небиребу. Институте варасденге, ме э профессор-меревоз эри е сали э гъуромите хоригъой Казахстан рафдебирим э у хоригъо эри тэхуьл веровунде, тозе богъгъо дешенде. Ужире келе, фирегье мейдузигъо, сэхьрегъо ме гьеле э гIуьмуьрме недирем. Мере воисденбу гене эри поисде унжо, оммо э дуьлме ватанме, Дербенд, богъгъойму, догъгъойму-офдо, туьш... Тоб, гъэрал недорум, вогошде оморум. Мере имогъой э агрономи фирсорет э колхоз ишму.

Марал (*гIэйбе-гIэйб, шори сохде*). Омбар хуб.

Ошир. Гьери гу имогъой, коргъо-боргъойтуь чуьтами? Звенойтуь чуьтам кор сохде?

Марал. Э согъитуь, хуби, зобу нисди. Эзи дуй сал пушо э туьревоз кошде, гъэлем зере доргъойме э гъирогъ участкай эн звенойме, э ён гъэндэгъ, вероморет, келе бирет. Туь гуфдирере хуно, гъэдер эн тегъенгъоре э гьер гектар зид сохдем. Бегьер иму ими салинере хуно пориш хуб бу. Э товун звенойме э гозитиш нуьвуьсде оmoreбу, э теливизориш бирмундебируьт. Эгенер туьре воисдениге, кеш бурайм фегъм сохим.

Ошир. Лап хуб. Кеш бурайм!

Марал. (*хэнде-хэнде*). Кеш!..

Марал не Ошир вадареденуьт. Дироморенуьт Зарангил, Шевруьт,  
Оврум

Зарангил (*кемере тик гирде, эз Шевруьт*). Погь! Ишмуре хьэлол гиро! Ишму и рэхъэ эз шегьер те инжо гьер руз чуьтам оmoreнит? Те инжо оmore расире, занигъойме хэсде бисдо.

Шевруьт. Жогъилгъо э мотоциклгъо, велиспедгъошуревоз оmoreненуьт, имуре, огъилте одомигъоре имогъой э мошиневоз берде-овурденуьт.

Зарангил. Кутэхьи гоф: нму духдере дирейм. Духдер, худо мебуро, э нум хуьшде верзиренини — эз расдиш е марали, гуьзели. Эхир гофтуьре гу, гъэдойтуь э ме, диройм э шори-никиревоз эри духдере гуь илчieti сохим.

Шевруьт. Лап хуб. Ме эз ишму гуфдирибуьм эзи ченд руз пушо, ишму сер эни гофе веровунденге: дит мере рэхъ пули эри духдер пенж гъозор монет нэгъде пул, богъчирегъо варасденге, худо гъишдге, диройт духдере эри хосде. Вер салам!

Ошир. (*шори-шори*). Глянус чисти, лелей Шевруьт, духдер эз расдиш лап рачи, холей Зарангил гуфдигъоре хуно, энжэгъ



екем хундеигъо, варасиреигъой ю унгъэде нисди. Гъэйгъу нисди. Мере э хуне куыгъне книгъо, журналгъо пури. Е вэгдо ме мукулатур кура сохденбируым. Эзумогъевоз е хэйли мунди, сер-сереки э сарай э ён хуызуымгъо дечиреи. Туыкуылмиш мисохум суьмере хуно э пушой ю, фегъм сохугу эри хуышде, хунугу. Э товун рэхъ-пули гуфдирениге, э сер чумгъойме. Э иму гъейсэг! Эт ужире гледотгъо недомунгидеш, глянус чисти, гынч э сер гофтуь е гоф неовурде, пенж гъозор монет рэхъпулире, тозе сади э сер сади менуым хъозур мисохум.

**Шевруьт.** Дие ишмуре гофиге нисдиге, ме бурма э песой корме. Согъ бошит!

**Зарангил.** Туш согъ-саламат боши, гъэдоволим, э доморгъо-духдергъойтуьревоз. Эхиртуь ник гердо. У кишди хъомоли эз кишдтуь фураморе, туь г!эйллей наринере э сер гуьжогъ вегирдени гердош. Омин! (*Сере тик гирде*). Ой худо!..

Шевруьт вадарафдени. Зарангил не Оврум шори-шори дениширенуьт дуй э ски. Угъо хунденуьт вежегъисде-вежегъисде:

**Зарангил:**

Ме жерэхъ, мому, илчи,  
Зугъунме гънсд буьлдуйрчи,  
Эй гьер кор гънсдуым усдо,  
Метлебгъойтуьш бегъем бисдо,  
Эй Оврум, эй Оврум!..

**Оврум:**

Офди эйме раче севгил,  
Жон туь.холей Зарангил,  
Мараш зугъунтуь эз луле,  
Медешонуь эй е хъэзле,  
Ой холе, ой холе!

**Зарангил:**

Э хотур эни г!эмелме,  
Е сади дени э десме.  
Эй!несохде гилеи,  
Мосдони келэгъэи,  
Ой Оврум, Ой Оврум!

**Оврум:**

Хок э сер энусад монет  
Туь дорей мере омонет,  
Е раче марал догъире,  
Е жовогиле духдере,  
Ой холе, ой холе!

Гьердуеки:

Шор гердо дуьлгьой иму,  
Расд биёво коргьой иму.  
ГІэруьслереш мегьиге,  
Миёрим худо гьишдге, ой Оврум, ой Оврум!  
Мпёрим худо гьишдге, ой холе, ой холе!

Гье и вэхди оморени сес эн нокумие хьэрой эн Шевруьт. Дироморени Шевруьт шуш-нефес гирде. Э кишд энугьирмизине кишди хьомоли энугь невери.

Шевруьт (*муьшде вежегьунде, келе-келе хьэрой сохде-сохде*). Э жун энугь мере офиригьо худо, хори-гьоворе милерзунум, и колхозе гилбегил мисохум, гьуьломе—дербедогьун эри э серме ижире беде коре овурдеи!..

Оврум. Эй лелей Шевруьт, хэйр гердо, чуй бири эхи? Чуйни гьечи?

Зарангил. Ники-хуби гердо, генеш чуй бири беге?

Шевруьт. Дуьздирет! Э гьосутевозиге, э хьиллеиревозиге, э зарифатовозиге — дуьздирет. Вир сохдем!

Оврум. Чуйре вир сохдей? Кире дуьздири?

Шевруьт. ГІэилмере, имидмере, толихьмере!

Оврум (*терсирере хуно*). Чуй? Духдертуьре вир сохдей? Марале дуьздири?

Зарангил. Марале? Хок э серме!..

Дироморенуьт Овшолум не Хонум.

Шевруьт (*э гьэьгьревоз эз Зарангил*). Э жегьендем Маралиш, Марале зендигьо дедеш. Мере дерд Марал негирди. Ме ферзенд-мере вир сохдем.

Овшолум (*э мэхьтелиревоз*). Ферзендтуьре? Коми ферзенд-туьре?

Шевруьт (*бирмундени э кишд хуьшде*). Кишди хьомолимере вир сохдем! Ме уре шев «нум худой, нум худой» гуьфдире э зир бонилейме доноренуьм, эз хуьшде дур нисе норенуьм дес непоке одоми нерасуь гуьфдире э у. Е лэглэзойге, эз ишму гІэйбиш бу гуьфдире, вадарафдуьм э гьирогь эн гьендэгь, э ён эрх, кишдимере эз кишдме векендуьм эри десгловмере сохде. Коми худосуьз, нолеигь, инсофсуьзиге, мере хэбер небиреки, э пэхьники эз песой кемерме, эз песой кулегьо-тегьенгьо дуьздири берди кишди хьомолимере, егІни, э ме, э бедбэхдиме эри хэндуйьсде, охмури зере. (*Э хьибр-шевоз*). Э жун худо э догьгьо-дерьёгьо су-гургури мидешенуьм, кишдимере э жигей ю овурде расундегор небисдоге!

Хонум (*э хижолетиревоз*). Эй мерд, уин мевэхизун инжо, биёубр месох имуре э пушой эн хэлгь, жэгІмет!

Зури-зури дироморени Марал, кишди бeбшy э дес дeри. э песой энy,  
эзи зир лов хэндyсдe хэндyсдe, дироморени Овшор. Марал э серкуширe-  
воз дeниширени э бeбшy.

Марал. (эз бeбшy). Эй бeбe, бэхшлeмиш сох, гьeчиш кор  
гIэмeл oморени, хуьшдeрeш биeбур сохдe, имурeш гьeчи э хижo-  
лeти дeшeндe?! Э сeрбoт эни e куьгьнe дугу э гьизгьин эн кор ши-  
виш дeшeндeй, хэлгьэ эз кор гьишдeй (*Шeндeни кишдирe э хори э  
пушой бeбшy*). Вeги, бeсд э кишдтy! Тeимoгьoй эзу дирe гIэлe-  
мeтгьo-кeрeмeтгьoрe эзимбэгьдoйгeш мивини!..

Шeврyт гьуз бирe, вeгирдeни кишдирe, тимор сохдeни

Шeврyт (э гьэгьрeвoз эз Марал). И кишди хьoмoлирe э  
кишдмe бeсдигьo—тyни, хэгьeргьoйтyни, (*бирмундeни э дeсeвoз  
э лoй Хонум*) дeдeшмyни!

Хонум (*гирисдeрe хунo*). Эй мeрд, вeсси! Сухдум, хoбoб-  
бирьeн бисдoрум эз дeстy, кoбoб-бирьeн гeрдo y ишoрoгIoe хэ-  
гьeргьoйтy эзи хьэйф-дoгьмe! Вeсси днe, вeсси!..

Шeврyт (*хуьриш сохдe oморени э сeр зeн хуьшдe*). Чyь  
вeсси?! Мe биe гуьoм эз тy: вeсси! Вeсси эримe e шeлe дyхдeргьo  
зeндeйгьo, мeрe хьoмoл гьишдeйгьo! Вeсси!

Хонум чаруьсдeни пeсoвo, гирисдeни.

Марал. Бeбe!

Шeврyт. Бур сeстyрe! Мe бeбe нисдyм! Мe бeбe мибис-  
дoрумгe э сeр фeрзeндгьoймe сeфги нэгI, килэхь мeбисдo (*бирминдeни  
э килэхь хуьшдe*) Килэхь!..

Пeрдe

Дyимyн пeрдe

Хуней Шeврyти. Э хьээт, э пушoй хунe — стoли, э илoвлeй энy e чeнд  
стулгьoи. Марал сeр стoлe эдeэ э килиeнкeрeвoз дeгирдe, мэгIни хундe:

Эй гьэмсyэзe шoрe бyльбyль,  
Дусд эн oфдo нeн гьyзyьргyль,  
Гьeчи тeмeрyз-эйчyь дyль,  
Эри вaсaли гьyзyьргyль.  
Тyь нишoни эй сeвгилгьo,  
Дусд эн гуьлгьo, бeнeвшeгьo,

Хун гьeри eбo, жон бyльбyль  
Эй хoмyши сoймишe дyль.  
Эй нeбирe дyльмe гьэбeр,  
Эз ёр эймe биёр хэбeр,  
Усyз эймe тэхьли рyзгoр,  
Уни мeрe шoр сoхдoгoр.

Марал дaрaфдeни э хунe. Дироморени Шeврyт сeрe жyмундe-жyмундe.

Шeврyт. Э жун хyдo, нисe дaнyсдeнyм и дyхдeрмeрe и  
пeсини рyзгьo чyь биригe? Е кeм э хуьшдe нeдeриe, бoдo хурдe

одомире хунои. Э и гьовогьой хуьшдеревоз е од гъэзенмиш несо-хуге эриме хуби. Гьелем кун себэхь сула небири, и эдее мэгъни хунде эри буьлбуьл не гъуьзуьргуьл, уён-буён. Ошугъ бире, э е лути-пути, мердимазаревоз вирихде нерав, биёбур несоху мере э гьемей Дербэнд э и пире вэхдме?!.. (Огол зерени Хонуме). Эй зен! Эй зе-ен! (Сес'Хонум нисе омор. Гене гоф сохдени э хуьшдеревоз). Хубчи у Оврум омо ведиромо. Дуьм духдере э у э шори никиревоз э рэхь декинуьм, эз серме сохум. Эзумбэгъдойге э шуь-вер хуьшдеревоз воисдге ишуре те себэхь бире гъуьгъуь зенуьтгу, воисд ишуре дайчаре хуно шихьне зенуьтгу. Токи ме е гиле, чуьтам гуфдируьмге, ире э шуьвер дуьм, эз еср сохум. (Гене э олъ хуне *чрауьсде*). Эй зен, э туьревозумей!.. Эй зен!

Хонум. Кар-кур, сур-сургум гердо у жуьфде-жуьфде ишородей?!

Хонум диреморени. Э синей энупушосине вери.

Шевруьт. Туь гьеле-меле жугьоб нисе доре?! Туь кар, сур-сургум бирей беге?!

Хонум. Кар-кур, сур-сургум гердо у жуьфде-жуьфде шорогое хэгьергьойтуь! И чуь хьэрои себэхь-себэхь? Кереме хуно сугирди дедейтуь?!

Шевруьт. Теимогьой су негирдемге, эзимбэгъдойге ёгъин ми-гируьм. И гофгьой энире дениш ебо! Туьш духдертуьре хуно делуьни. Негьогъ нисе гуфдиреки э метелегьойму: «Жингире гове жингире гуселе мибу».

Хонум. Жингире гов, жингире гуселе хэгьергьо, хэгьерзеро-гьойтуьни. Себэхь-себэхь чуь хьэлово бире мундей туь э и жуи-ме?

Хонуме воисдени бурав, оммо Шевруьт эз гъул энугирде, поюндени уре.

Шевруьт. Пой, эже рафде туь? Ме туьре инжо эри хэнде-возилегьо сохде огол незерем, лап фикиртуь гирди рафде мере, туь мунош гье эзу расди.

Хонум. Эйчуь? Эритуь кук незендем гуфдире? Мере хьофд духдер гьисди, мермекино, е бурра шенде нэхуьшуре э дегь небуде кукгьо нидуьм. Шеш домор мере гьисди, гьеми дэгъэм кукке доренуьт эриме, гьеми дэгъэм эн доморе. Оммо туь (гирдени эз кишди Шевруьт) и ченд салгьой худои кишди хьомоли бесдей эдее гешде. Эз хэлгъиш гъэйби, эри духдергьойтуьш; хижолетини. Туь угьоре эритуь гъэйл хьисоб нисе сохде бегем?

Шевруьт пертово дорени дес Хонуме.

Шевруьт. Гъэйл нарине небугьо мерд гъэйлсуьзе хуно хьисоби. Духдер бебе муьрденге эри энугъэдуьш нисе зере, нешумей энугъенгъидин гьисмет бу гуфдире. Ме и кишдире бесдем, худой

офирегор сэхьнб, г1уьллм эз хьофдимуьн тебэгъэй хуьшде винуь и кишди хьомолимере, э хьолме, э додме дарав, э дуьл ю рэхьм биёв эриме, э и пире рузме семе мере е кукле дуь.

Хонум (*субпле хэнде сохде*). Весси, эй мерд! Туь и кишди хьомолире бесдей гуфдире, мере эзимбэгъдойге г1эил биренини? Ме имогъой, г1эйбиш бу гуфдире, дегь сали э сер хуьшге доргьо, хуьшге эрхгьо, хуьшге тегьенггьой бебеле-г1эмлейме хуьшг бирем, мере эзимбэгъдойге г1эил биренини?

Шевруьт. Гьеме э дес худо дери. Худоре воисдге мибу. Инией э Туро э Бершит вери: Оврогьом овину, борухо нум ю, сад сале бу, зен энү—Саро навад сале Саро Исхьогъэ зенденге. Ме шасд сале зиёдте нисдуьм, туь—пенжогъ пенжи. Иму э пушой энугьо лап г1эилимки.

Хонум. Гье гьечу вери э Туро?

Шевруьт. Ме бегем, хьэсбошолум, нум худо нен туроре э негьогъи гирденуьм. Гье гьечу вери. Ме у жигере эзвер дануьсденуьм. Воисдениге хунум эритуь. (*Хундени э гьовой нумаз-туро хундеи*). «Оврогьом бу сад сале, кейки уре Исхьогъ бисдо, кук энү. Ве гуфди Саро-о-...»

Хонум бовор нисе сохде э гофгьой Шевруьт, хэндуьсдени. Шевруьт хундей хуьшдере поюнде, эз бел Хонум гирде, э гужевоз поюндени уре.

Шевруьт. (*Г1оси бире*). Эже тэг1ди сохде туь хуне, хэреб, егьертуь беге э сер г1эсб1 вери? Мере э туьревоз гофи эхи?

Хонум. Гофиге, гу бура гофтуьре, дие туь мере е сэг1эт э силс эйчуь гирдей поисде. Мере эхи э сер кинле дуьшберегьо вери, марав пуч мибу.

Шевруьт. Хуб, зурнов мезе, гуш вени. Имбуруз э хунейму илчигьо дироморениниуьт Марале эри хосде.

Хонум. Гьи?!.. Кини кук?

Шевруьт. Оврум!

Хонум. Оврум кини?

Шевруьт. У Оврум дие... Э пэхьники, э ошгори алвар сохденигьо, «дафиситни» молгьо фурухденигьо. Пенж гьозор нэгъде пулиш эдее доре имуре рэхь-пули эй г1эруьс.

Хонум. У Оврум кук Ситгьил Хьофдфадихургьо небугьо? У хэрхимбил, лути-бимбули, рушлегьой кечи веригьо юре? Те увэг1дой немунди Оврум э мундигьо кесгьой, хуьшдеревоз ме вегируьм е бэхдевере духдермере дуьм э у.

Шевруьт. Эйчуь?

Хонум. Валлагь, мерд, эз дестуь догъ бисдорум рафд. Гьеле эйчуьш эдее гуфдире! У кини ме духдермере э шуьвер дуьм. Ме г1эилмере бегем эз кучегьо офдем! Эвелиминжи у эз духдерме филонгъэдер келеи. Песде уре ченд зен бири. Уре е сениг1эт ю, е кор ю нисди. Э песой пул, алвери муьрди домунде э и рэхьгьо,

шегьергьо: Масков туьре — Харьков мере, Тифлис туьре— Генже мере. Спекулянти — сенигІэт нисди. Эз спекулянти сохде пулгьоревоз бэгъэй чуьни уре? ГІэсуьли, эгъуьли, е хундеини, е хубе сенигІэти?

Шевруьт. Хундеи, сенигІэт энугъуьни туьрег Токи одоми пул гъэзенж сохде дануь. У эдее э пулевоз вежегъисде. У Марале бикере хуно мидору. Ме у кореш фикир сохденуьм эхи.

Хонум. Ме эзи гофгъойтуь сукъденуьм рафде дие! ГІэйбиш бу гуфдире, пул не, моле бегем одоми э кише доноре?.. Хун одоми биё эри одоми дуьш зенуь, эз дуьли еки бошут. Варасири?

Шевруьт. Имуре бебегъо-дедегъойму эри еки хосденге, лап хунме эритуь дуьш зеребу рафде, туь мунош гъе эзу расди! Инией, дуьл екире зереймгеш и чуьл сал зиёди эдее эеки зигъисденим. Угъош мизигъуьт миравт.

Хонум (э могъбулиревоз). Э жун худо, ме э уьз ихдиёриней-ме мибисидорумге, ме э туь гъич гъисмет нибисдорум. Худо гІовун хъисоб месохо эришу, мере е сиздегъ-чордегъ сале сер-зугъун недане гІэиле бебегъо-дедегъойме доругъ э ишму, сукъндуьт. (Э сифет Шевруьт денишире). Ме э туь гуьом: дуььлтуь эри гІэилгъойтуь е тикелеш дорд нисе доре, небуге...

Шевруьт (гІоси ирбе). Чуь небуге?!.. Туь гуфдиренигъо, ме нисе хосденуьм духдертугъере? Хосденуьм, энжэгъ унгъэде нэгІ, чуьнки у духдери, кук нисди!.. Менуьм сэхьиб эни хуне, эни кифлет! Мере э гъерки воисд гъе э у мидуьм духдере. (Э энгъуьшдевоз гъелебуле гирдени). Воро э у маре 'зугъунтуьревоз э лэгІэй гІэил гоф дешенде, дуьл энуре эз Оврум хуьрд сохи!..

Хонум э зир зугъун хуьшде чуьниге гуфдире-гуфдире, десгъоре вешенде-вешенде вадарафдени. Э песой энугъуьни вадарафени Шевруьтиш. Эз дорун хуне бирден оморени сес Хонум.

Сес Хонум. Гъейвой! Дуьшперегъойме варафд пуч бисдо!.

Дироморенуьт Зарангил не Оврум. Э зир шол эн Зарангил чорекей шороб дери. Оврум дениширени э лой пенжерей хуне.

Оврум. Эжеи и шогълер марали, генже гуьзели? (Думит сохдере хуно). НэгІю, эз гъовогъо эдее диренуьм: и омбар сикелуье духдери. Сикей эни е сер эдее эз Самбур гІов хурде. ГІэдоти, раче духдер енебуге пуллуье одоми сикелуь мибу. Оммо уре рачинниге, жогъилиниге, мере, худо мебуру, пули. (Зерени э десевоз э куьф хуьшде). Дедей мемиро пуле, гъич холей Зарангил?

Зарангил. Гъелбет, гъэздоволим! Э пушой пул ки, чуь довом доре!

Оврум (э шори-келегедиревоз, бешпингъоли зерезере). Негъогъ нисе гуфдире: «Дэнги есть--милай мой дэнги нет — иди думой!»

З а р а н г и л. У ч у ъ г о ф и, х о л е м и р о з р и т у ъ ?

О в р у м. У ш т у ъ г ѡ е й с ѡ г л ѡ т г у ф д и р и г ѡ г о ф е х у н о н... И м о г ѡ й, х о л е й З а р а н г и л, г ѡ е л е д у ѡ г е в е г и ч о р е к е й ш о р о б е, н и э з и р с т о л, о г о л з е с ѡ х ѡ й б г ѡ й д у х д е р е.

З а р а н г и л. Х о н у м! Э й Х о н у м! И н ж и м и ш б и с д о р и т г е ш, е д ѡ г ѡ д ѡ г ѡ в е д и р о й т э Ш е в р у ѡ т е в о з!

С е с Х о н у м (э з д о р у н х у н е). Г ѡ! О м о р у м! О м о р у м!

Ш е в р у ѡ т н е Х о н у м в е д и р о м о р е н у ѡ т.

Ш е в р у ѡ т (э в е д и р о м о р е к и э з х у н е э Х о н у м). Ш и н о в у с д и? Э п у ш о й и л ч и г ѡ э с е р г о ф м е г о ф м ѡ ѡ р. (Э з З а р а н г и л н е О в р у м). Р у з и ш м у э х ѡ й б у, х о ш о м о р е й т!

З а р а н г и л. С о г ѡ б о ш и, г ѡ д в о л и м! Г ѡ м и ш е э ш о р и г ѡ - н и к и т ѡ б и ѡ в о й м э х у н е й т у ѡ.

Н у ѡ ш д е н у ѡ т г ѡ м е е к и.

Ш е в р у ѡ т. Г у н т г о ф и ш м у р е.

З а р а н г и л. С е р н ѡ х о г ѡ и ш м у р е э р и о м б а р д о р д н е д о р е, г у ю м б у р а м к у т ѡ х ѡ м е т л е б о м о р е и м у р е. (Д е с к е ш и р е н и э л о й О в р у м). Д е н и ш и т, г ѡ д в о л и м, и м е р д, и к о с и б т е р у ш с и п и с о х д е д у ѡ г и л е н г е, с е г и л е и г е э г и л г у л и о ф д о р и.

О в р у м. Г л я н у с ч и с т и, л е л е й Ш е в р у ѡ т, г ѡ м е д у ѡ г и л е л е.

З а р а н г и л. Е з е н э н и, д у р а з р у й, э с е р з е н д е и м у ѡ р д и, д у ѡ л ю р е О л е б е р д и, г ѡ и л л е к ш, д у р а з р а й г ѡ и л г ѡ ш и м у, э г ѡ л д е д е й д а р а ф д и. Д у ѡ м у ѡ н з е н э н и г и р и г е, ' а л и з е д у х д е р П е т ѡ х ѡ э н г у д е г е О ф д у м М и р о т и г ѡ е э з с е р б е з м у ѡ й э н г ѡ р у ѡ с и, г ѡ и ѡ б и ш б у г у ф д и р е э з Ш е в р у ѡ т — у ш б и р о р м е р е х у н о, о ш у г ѡ б и р и э г е д е й г ѡ н ш и р е в о з в и р и х д и э з к и э н и.

О в р у м. О ш у г ѡ н е б и р и о — о (д у ѡ э н г у ѡ ш д е л о в с о х д е, ж у ѡ ф д с о х д е н и), ж у ѡ ф т б и р е т, ж у ѡ ф д. Э р и д и е, о ш у г ѡ б и р и...

Х о н у м. Г о ф т у ѡ ш м у н д г е, З а р а н г и л, э з у м о г ѡ в о з х ѡ б е р - ч и н и с д и э з д у х д е р П е т ѡ х ѡ г у д е г е О ф д у м М и р о т и? Г ѡ ч н е о м о р и э и х о р и г ѡ?

О в р у м (х у ѡ р ш л у ѡ б и р е, в ѡ х и ш д е н и). Б и ѡ в г у - б и ѡ в г у, в е д и р о в г у, г л я н у с ч и с т и, с е р э н у р е г ѡ ч и э х ѡ н ж е л е в о з ш и р п с о х д е м и б у р у м, с е р п и ѡ з е х у н о.

З а р а н г и л (э б и р а з и р е в о з э з О в р у м). П о й б у р а!.. Т у ѡ е м у ж и н е р е ш к у ѡ ш д е н и г ѡ о д о м и н и с д и, е д н и ж е, с а л а м е т е о д о м н и. (Э з Ш е в р у ѡ т н е Х о н у м). Э с е р г ѡ з ѡ р, г ѡ т о ш г ѡ р ч у ѡ б и с д о э д е е г у ф д и р е р а ф д е.

О в р у м. (Э ж и г е й х у ѡ ш д е н у ѡ ш д е). Д о г ѡ д о н о р и э х и у э р у р у ѡ м е! Б и ѡ б у р с о х д и м е р е э г ѡ м е й ш е г ѡ р, к и л ѡ х ѡ м е р е э х о р н з е р и!..

З а р а н г и л. Э р и, и м о г ѡ й х ѡ ф д с а л и и к о с и б х у д о т ѡ х ѡ н о й. Э х у н е н е х у ѡ с у ѡ р д е р и, н е ш е в х ѡ г ѡ р э з г ѡ р у ѡ с г и л е и с о х у, с е р к у ш

зенуь: егІни, гьечи ненуьшди, гьечи не вэхуьшди, гьечи негуфдири, гьечи несохди, беле-филон. Кими зенхуьсуьргьоре, гІэйбиш бу гуфдире эз Шевруьт, э шуьверевоз э хисире-вэхишдей эн гІэруьсовош кори, хун косибе гІэруьсе эдете хурденуьт. Эри, песде и мерде, худо мебуро, 'хуней ю гьисди, мол ю гьисди, оммо хурдегор ю нисди. Коргьой гуьгьоре хуно: хуне хэвлет, боже девлет Дит духдер ишмуре э и мерд, биёв сэхьйиби соху хуне, жигей эни мерде, дуьл эни фэгъириш динж, олхогьин бу.

Шевруьс. Туь, Зарангил, эзи дуь орине пушо и гофе зеро-вунденки, ме э туь гуфдируьм: мере разини духдремере э Оврум эри доре. Энжэгъ, чуьтам иму игърол сохдебиримге, пенж гьозор монет рэхъ-пули дугу мере.

Оврум. (*Гле усэгІэт вэхишде эз жигей хуьшде*). Лелей Шевруьт, глянус чисти, гье имбуруз пул ишму — пенж гьозор монет — мирасуь э ишму, е ме хуьшдениме миёрум, енебуге мифирсуьм э дес е куьнде одомиме.

Зарангил вегирдени чорекей шоробе эз зир стол.

Зарангил. Имогьой чуьтам гІэдот гьисдиге гьуьдиш сохим, омбаракбу-ники сохим. Бэхшгьо, парталгьоре эри гІэруьс, худо гьишдге, песде миёрим.

Шевруьт (*эз Хонум*). Вэхиз зен гьерчуь бисдо биёр эй хурде. (*Хонум э гуш нисе гирде, сифет эну гьошгьобогълуьни*). Эй зен, вэхиз гьерчуь бисдо биёр гуфдируьм! (*Хонум вадарафдени*). Хосиет дедегьои: угьо э ховиш эри духдергьошу шуьвер гешденуьт, оммо оmore шуьвер офд оморенге, дуьл ишу гурунд бире, домогълуь биренуьт.

Зарангил. Дедеи дие. Эхтуьр, дуь сал гиросшебу эз гІэруьс бирейме, оммо гІэрс чумгьой эн фэгъире дедейму, ченд хокгьой ю гІуьмуьр гердо гьемешмуре, гьич хуьшг нисе биренбу, ме э пушой чум ю нисдуьм гуфдире.

Дироморени Хонум. Норени э сер стол пейлегьо, нун, савзе. Оврум пур сохдени пейлегьоре, норени э пушой гьеме. Пейлегьоре вегирде, зеренуьт э еки.

Зарангил. Омбарак бу, сэгІэт ю ник бу. Э гІэрсисуш хурдени гердойм. Сад сал э екиревоз пир-сир гердо ишу!

Шевруьт. Омин!

Хурденуьт, оммо Хонум э пейлей хуьшде дес нисе зере.

Зарангил (*эз Хонум*). Туь эйчуь нисе хурде пейлейтуьре, духдер?

Хонум (*э, вогънеки*). Ме имбуруз тэгІнит гирдем!

Зарангил. Гьо! У ойру меселе!

Шевруьт (*зарифаткимси*). Зарангил, эдете гуфдиренуьт, туь э жогъили лап рач бири?



Оврум (э хэндеревоз). Эде, рачи зен гьейсэг!этиш э сифет ю вери, нисе дирент?! Э гьиче веноре, томоше сохденини.

Зарангил. Туь дуз гуфдире, Шевруьт. Ме э жогьили эз расдиш гьэдерсуьз рач бируьм, шэг!ме хуно эдембируьм товуш доре. Мерд хэйлогьи мере мидиге нешумой ю гилгул-билубул биренбу рафде эз рачиме, эз ме чум вегирде нисе дануьсденбу. Дедей Ол, чуьтам дуьл зендезенгьоре берденбуге, гьечи шэхсме, рачиме дуьл эн мердгьоре, иллогьки эн жогьилгьоре берденбу рафде.

Хонум (э руьхшендиревоз). Вош, ёзугьэ мердгьо! Кидан гьеме э у вэхдгьо эз дуьл гирде, эз сине хэреб бире муьрдетгьо мердгьо, жовонгьо, гьеме эз рачи эни зен, дуразруй, гунле незереки, хэнжел нерасиреки пес-песоеки офдорет муьрде. (Зерени эз зани хуьшде). Вош езугьгьо!

Зарангил (хуьшдере э нешиниреки веноре). Эри, хэбер эн рачиме гьечи лов биребу э гьеме жигегьо, эз Шуре, эз Г!энжи, эз Гурузие, эз Гьуьбе, эз Ширвон, эз Варташан, ме дие Дербенде нисе гуфдиренуьм, мере эри хосде одомигьо оморембируьт. Г!энгьо, мегезгьоре хуно, илчигьо эриме эз дериш эдембируьт шишире дироморе, эз пенжереш. Оммо фэгьире бебейму мере э екиш недо, э дербенди э гушбура Офдум кук эн демирчи Эте-Пете э шуьзер до. Гьисмет ме у бисдо. Гьич эз гьисмет вадарафде нибу. Унегуьре гуфдире э метелегьо: «Тэхдимден гьэчим, бэхдимден гьердо гьэчим?!»

Шевруьт. Рэхьмет э бебейтуь. У гофтуь дузи. Гьер мерде гьисмет юни.

Зарангил (эз Шевруьт не Хонум). Дие иму бурайм. (Зарангил не Оврум вэхшденуьт). Согь бошит! Худо пешму месохо екишмуреш! Эхиртуь ник гердо, Шевруьт! худой офирегор (сере тик гирдени зеверо), Худой офирегор, туьре э ёр оворде, нум хьомолире эз сертуь вегиро! Омин! Худо шиново и ловоймере эзи поке лэг!эйме.

Хонум (песово чаруьсде). Лэг!эйтуй поки зуьлгьие кун керг гьуьртире хуно.

Шевруьт. Хош оморит, софо оворд!

Шевруьт не Хонуиш вэхшденуьт. Зарангил не Оврум э вадарафдеки.

Оврум (эз Зарангил). Кеш туь вадара э пушо!

Зарангил. Нэг! нэг! Туь вадара э пушо! Туь мерди.

Оврум. Нэг! нэг! Туь эз ме келеи, туь кеш э пушо!

Зарангил. Мерде э песо гьишде, зен пушо нивадарав. Туь кеш!

Гьердуь энугьо екире э рэхь дореки, э еки расиренуьт, вадарафденит дуь екире сигьмиш сохде-сохде.

Хонум. Ме нисе дануьсденуьм эхир эни коргьо чуйтам мибуге?

Шевруйт. Эз духдергьо зенде, жинжинигьоймере веревунде бэггэй дие чуй дануьсде туь? Ингъэде вэгдо э гуйлом зигьисдей, муй сипи сохдей, оммо те имогьоиш у коре нисе дануьсде, ки г'эсб эн гьей сохдегори, пул эн кейф сохдегори, духдер эн хосдогор. Токшуйвер ю хуб бу эрию. Ченгъэдер духдер э шуйвер зу рафд, унгъэде эри бебе-деле сердинжини, дуьл динжини. Эзи зуте миьсдим доре иму Марале э шуйвер. (*Э дуьлпесоиревоз дениширени э зен хуьшде*). НэгI, эдее диренуьм, эз туь фойде нисди. Ме хуьшденеме гоф мисохум э Маралевоз.

Шевруйт гъэгьри-гъэгьри вадарафдени э куче. Хонум вечирени сер столе, дарафдени э хуне. Дироморенуьт Оврум не Ошир. Э дес Оврум хунчай гъуьзуьргууьлгьо дери. Ошир екем песо мундени.

Оврум. Гьери инжо куьнд биь, дир месох.

Ошир. Эй леле, ебо гу винуьм туь мере инжо эйчуй овурдей?

Оврум. ГьейсэгIэт, бирорзере, гьемере э туь гьондурманни мисохум. Ги ебо и'десдей гуьле. (*Дорени*). Имогьой э ме хуб гушвени. И десдей гъуьзуьргууьле миди э одохлуйме. У инжо зигьисде. Мере эз туь пэхьни сохде нисе воисде. Духдер эз ме хэйли чуйк-лех, жогьили, рачи, оммо ом'ар сикелуьни. Бебешу рази бири духдере э ме эри доре, ме э уревоз гоф-игьрол имуре сохдейм, оммо эз хуьшдени духдер дуьлме динж нисди, не мере э уревоз гофиш небири э товун 'хосден. (*Ошир сере гъуз гирде, суьпле хэнде сохдени*). Туь э гофгьойме гуш дошдени, небуге фикиргьой-туь э елойгей?

Ошир (*сере тик гирле*). НэгI, нэгI, леле, фикиргьойме э туь-ревози.

Оврум. Эри энужире духдер, у колхозчи гьисдигеш, ме истарамудни одоминуьм, эз сер-тен нэгI, гьечиниге. Ме гьейсэгIэтине жогьиле духделегьоре хъэз оморенигьоре хуно ужире литературни, культурни гофлегьо, ихдилотлегьо нисе дануьсденуьм — нехундем. Туь э духдеревоз шинох бош, биь-бура сох э хунешу, мухшул, ебонжэгъи сох уре э культурни гофлегьо, книглегьоревоз, г'эре-бир тэгIрифимереш ди эрию, ег'ни, лелейму хуби, деслови, рэхь-медуьли, туьре гуьле хуно э сер дес мигируь, зир рихде пойтуьре мечинуь, э келлей сер, э гъугъ мазалай хуьшде менуь, бурлианте э пембе доругьоре хуно мидору туьре. Эз ме гуфдире, те туь гуфдире кор, тефигIжт омбар дери. Э пушой чум энуре мере еки эзи туьчуьни абрзувунни, энтеллигентни бирорзере бирени, туь мере гьечи тэгIриф дорени, глянус чисти, келе кори. Эз хотур туь духдере эз ме хъэз миьв, дуьл ю э ме могосу, рази мибу э ме э шуйвер эри оmore.

Ошир. Хэндуьсдени, сере жумунде-жумунде. Омбар четине

везифеи туь э серме венорегой, леле. Ме нисе дануьсденуьм чуйтам мибуге и кор... Оммо, вообще, мерещ воисдени дануьсде, ки биренинге зенгIэмлейме.

О в р у м. Лап хуб. (*Ведешендени гъундогъ пуле, дорени э Ошир*). Десдей гуьле э духдер, э одохлуйме миди, гъундогъ пуле— э бебешу. Ме э бебей духдер гуфдирем э товун пул.

О ш и р (*мэхьтелире хуно*). Кидан и рэхь-пулиниге, калымиге? Ме нидуьм. Ме у коре сохде нидануьм.

О в р у м (*фурмундени*). НэгI, нэгI, бирорзере, глянус чисти, и пуле бебей духдер эз ме э гъэрд хосди эри хэржи гIэруьси.

О ш и р. Гьечу гьисдиге хуб. Эри, э ёр туь мундиге, леле, ме пирор инжиге э практика оморенге ме э туь гьозор монет гъэзенж сохде пулмере доребируьм. Меш эриме е духдер дирем, соймиш сохдем, мере имогьой у пул лап гереки. Миданиге гьейсэгIэт у пул-мере ди.

О в р у м (*гIоси бирере хуно*). Э жун ишму, эзини жиге гуфдирегьо: «Кечире, мугу, дерд жун гирди, гъэсобе—дерд пигъ», «Мен не севлерем, домбирум не сейлеюр». Эде, ме э сер гIов, геми верие мэхьэл и овурд гоф гьозор монете ведешенд инжо. (*Виники, Ошир эдее гъэгъри бире, э менэхьэфиревоз*). Мидьум, мидуьм. (*Э десе-воз тимор сохдени гъутиней Ошире*). Туь мунош эйме, мидуьм. Егиле э шори-никиревоз гIэруьсе биёрум, динж, рэхьэт бошум, ме хуьшдениме мидарам э илчиети эри хосде туь соймиш сохдейгьо духдере. Дие кини туьре эз ме бэгъэй: не дедеи, не бебей, не бирор. Етим келе бирей.

Оврум е кем думутлуь поисдени, песе э Ошир ленишире, хундени:

Имогьойле туь дануьсди  
Сур дуьлмере, бирорзере,  
Сохдуьм э туь тапшуьрмиши,  
Муьгьбетмере, бирорзере.

2 гиле.

Иши э туь гъэдэгъэйме:  
Сэхд лонгъ бош, бирорзере,  
Эй эз муьгьбет хэсде дуьлме,  
Чоре мунош, бирорзере.

Руьхь дуьлме инжо мунди,  
Дануьсдебош, бирорзере,  
Э ме гьолок невомунди,  
Туьлле мунош, бирорзере...

Дие ме бурам. Гьечи ги коре, кешире зэхьметгьойме, сохде хэржигьойме э пучи-гьичи невадарав.

Оврум вадарафдени. Ошире воисдени э десдей гъуэуьргууэлевоз дарав  
э хуне, гье и туьтем ведироморени Марал.

М а р а л. Ошир?!

О ш и р. Марал?! И... хунешмуни?

М а р а л (э суьпле хэндеревоз). Нэхогъошму егІэлмиш бири бе-  
гем?

О ш и р. Валлагъ, Марал, ме бедануьсдем и хунешму биреире.

М а р а л (гъэгърикимси, э десдей гуьл денишире). Эгенер эз  
расдиш егІэлмиш, эшипке бирейтге, оморе рэхъ ишмуре гье гьечу  
рафде миданит.

О ш и р (э хуьшде домунде). Марал, мере инжо лелейму овур-  
ди. И гуьлгьореш у дори э ме. У мугу: ме игІэре е духдер соймши  
сохдем, э бебешуревоз гоф-игъролиш сохдем. И гуьлгьоре, мугу, эз  
ме, эз нуминейме миди э духдер, пенж гьозор монете э...

М а р а л (серсуре хуно). Чуь?! Чуь?! Бебеймуре эз ме бэгъэь  
э хуне э шуьвер доррение духдер недери. Огь!.. И чуь гофгьой ме  
шиновусдениуьм!..

Марал вегирдени эз дес Ошир десдей гуьле пертово дорени э хори, после  
пертово чаруьсде, сере гъуз гирде, десгьоре э сифет венорени. Ошир куьнд  
оморени эз Марал.

О ш и р. Марал, мегирис! Туьре невоисдге, екиш туьре э шуь-  
вер доре нидануь.

Марал десгьоре вегирде эз сифет хуьшде, чаруьсдени э лой Ошир.

М а р а л. Меш дануьсденуьм э мере новоюгъо одоми екиш мере  
э гужевоз э шуьвер доре нидануь. Оммо эриме гурунд, хуьрди  
оморе, чуьтам мере бебейму, эз ме хэберсуьз, е гофлеш непуьрсире  
гов-гуселере хуно э киниге фурухдиге, дедейму э и кор, чуьтам  
рази бириге?! Пой ме гьейсэгІэт дедеймуре огол зенуьм инжо,  
жугьоб дугу мере!..

О ш и р. Марал, герек нисди, хосденуьм эз туь! Дуьлтуьре  
негьогъ;гъэреболугъ месох. Иму екире хосденим. Иму, севгилгьо,  
э е гоф, э е дуьл бисдоримге, екиш э гъисмет, э муьгьбет иму мешет  
бире нидануь.

Марал екем хомуш бирени, лове э шоре хэнде вебердени.

М а р а л. Бошгу, ме туь;гуфдирере хуно мисохум.

Ошир не Марал, десгьой екире гирде, э дусди, мигъробониревоз зеки дени-  
шире, хунденуьт:

Ме хосденуьм туьре эз дуьли,  
Туь эриме лап гІээизи, севгили!

Рачи гуъли, шох суьмбуъли,  
Туь эриме лап гӀээизи, севгили...

Эй лой куче оморени сес суьгърей эн Шевруьт.

Марал. Эле, бебейму эдее одоморе!

Ошир. Бебешму? Лап хуб. (*Тик гирдени хуьшдере*). Ме гьейсэгӀэт э уревоз гоф мисохум, мугуюм э 'у: иму екире хосденим гуфдире!

Марал. НэгӀ, нэгӀ, гьеле вэгӀдой энү кор нисди. Песде.

Ошир. Дие чүь сохум э гуфдирейтуьревоз?

Марал. Мере нисе воисде у туьре гьейсэгӀэт инжо виниреш. Бүра э песо, э у далдай хьэџт пэхьни бош!

Ошир пэхьни бирени. Марал эз хори десдей гуъле вегирде, венеронеи э сер стол. Шевруьт э лов суьпле хэнде вери, дироморени.

Шевруьт. Ту гуйге е лэгӀэзойге э кировозиге эдембири гоф сохде? (*Дениширени э лой стол, дирени десдей гьуьзүьргуьльгоре*). Гьо! Э сер офдорум. Гье уни. Ме эз сес шинохдум у киниге. Туь уре теимогьой гьич дире-чи бирей, вохурдей гоф сохдей э уревоз?

Марал (*гӀэйбе-гӀэйб*). Эгенер туь э товун эн елэгӀэзойге э меревоз гоф сохденбугьо кук гуфдирениге, эри бебе.

Шевруьт. Лап хуб (духдерме. Мере гьемин э товун энү э туьревоз гоф сохде воисденбу туь э у бурай гуфдире.

Марал (*гӀэйбе-гӀэйб, шори-шори*). Ме разинуьм, бебе, э у кук эй рафде.

Шевруьт. Духдерме, имогьой хун, вежегь ченгъэдер туьре воисд. Расди у эз туь хэйли, келеи, песде туь энү сеимуьн, чоримуьн зенигеи. Оммо эз зурезоз супое одомини. Уре екиш нисди, пул юш омбари. У бикере хуно мидору туьре. Эхирки, ме лап разинуьм, духдерме, домор эз дуьлитуь бирени, небуге мере лап фикир эни кор гирдебу. Меш э гӀэриситуь, худо гьишдге, межегьуьм те вомунде.

Марал. Бебе, туь чүь гуфдире? Комини сеимуьн, чоримуьн зен? У гьелеш е гилеш зен нэхосди, гьээзэгъэ одомини.

Шевруьт. Уре, духдерме, эз туь гӀэйб омори, унегуьре лэхьни сохди бие мерд бирени хуьшдере. Ме и гофе гуфдиренуьм э туь, хэлефме, э гуштуь гоф-хэбер дарафдге э товун эни кор, гьич э гуш меги, э вор мавара, чүьнки эз бэхилиш гифдирегоргьо, э зир гьэжгьу гӀэтош дешендегоргьо бирени. Эри, эри! Ме э туь гуюм, духдерме, э е пара жогьилгьо, э куьф ишу эз диплом инжинери, духдири, училили-мучитили бэгъэй гьичиш недеригьо, вотурене мерд гьозор гиле хуби эри зен.

Марал. Бебе, бэхшлемш сох, туь зарифат сохде, небуге мере эдее эй хьэз синемеш сохде?

Шевруът. НэгI, байлаиме, гье ме гуфдирере хунои. Ю хушдени ю э ме гуфдири.

Марал (э келе мэхтелиревоз). Ю хушдению?!

Шевруът. Эри, (ю хушдению. Гье гьечу гьисдигеш, чуьни имогьой инжо?. Э сер мерд кор омори, унегуьре ченд гиле зен хосди. Эй хьээ хушде нехосдики? Ю хушдению песде эритуь ихдилот мисоху. Оммо гене е гилейгеш, духдерме, э туь эдее гуфдиренуьм: э у'гофгьо, коргьо денишире, э мозолтуь пой мезе.

Марал (э гъэгьр, хуьршевоз). Эгенер гьечу гьисдиге мере гофгьо э товун энүш герек нисди, не ю хушдениюш Буравгу, имогьой пенжимуьн зене хоюгу эри хушде, е чуьн той хушдере!..

Шевруът (гIоси бире). Делуь мебош! Ме уре гоф дорем. Туь биё бурай, э у!

Марале воисдени бурав. (У э рафдеки эз пэхьни бире жигей хушде ведироморени Ошир, видовусдени э песой Марал.

Ошир. Марал! Бовор сох!..

Шевруът (эри хушде э келе мэхтелиревоз). И кини?! И эз же омф ведиромо гьейсэгIэт садане хуно?

Ошир. Марал, бовор сох, ме э туь е доне дургуне гоф негуфдирем. Ме э пушойтуь гьич е тикеш тэхсир нисдуьм.

Марал (гирисдере хуно). Весси! Э ме дие гьич мугу!..

Марал гене рафдени.

Ошир (э песой Марал). У ме нисдуьм бешму гуфдиренигьо. Ме гьемгьемере себэхэ э туь андурмиш мисохум, Марал!..

Марал дарафдени э хуне. Шевруът куьнд оморени эз Ошир, хуни-хуни дениширени э сифет энү.

Шевруът. Эде, туь кини, гьурумсогь?! Туьре инжо, э хьейт кес, э духдер хуно деригьо жиге чуь гIэжел дери?! (Хьэрой сохдени э лой хуне). Эй, зен! Гьери ведировун гьили песой дерире, ме гьэбуьргьезгьой эни угьреше, э хьейт иму пэхьни биригьоре, екем тимор иохум!

Ошир (терсе-терс, песово рафде-рафде). Ме?.. Ме? Ме?

Перде

### СЕИМУЬН ПЕРДЕ

Хьейт Шевруьти. Гье у декорещиен э дуьимуьн перде бугьо. Э хьейт ведироморени Шевруът, э песой ю — Хонум.

Шевруът. Туьш гоф сох э духдартуьревоз. Мерде гоф дорем. Килэхьмере э хори зере, гофмере дургу ведировунде, мере биёбур месохугу.

Хонум. Мерде туь гоф дорей, туь бурра-бесдей, э духдertyу-  
ровозиш туь гоф сох.

Шевруьт. Зугьунтуь хуьшг-кут бире э лэгIэйтуй домунди  
беге? Зугьун туь мара хуно, шуьгьэтымуйш чуволе хуно гоф пури.  
Зугьунтуь небуге эримени шеш гез дураз?!  
Хонум. Мара зугьун хэгьергьо(хэгьерзорогьойтуь бугу. Ме э  
туь гуфдируьмки: ме э духдеревоз гоф нисохум.

Шевруьт. Эзу гьичиш могуэй! Гу, бебе илчигьоре гоф дори,  
туьш рази бош бура!

Хонум. Эй мерд, гьейсэгIэт у куьгьне девргьо, земонегьо нис-  
дией. Духдере эз ю непурьсире, бебе-дедей ю эз гьул ю гирде э  
гьерки ишуре воисд доре—дие у коргьо нисди, немунди, чьтам  
мере, те тилте гIэиле э ишму вегирде, доробуге. ГьейсэгIэт егиле  
биё эз хуьшдени духдер разименди вегирде биёв, песде гоф дуь  
илчигьоре. Ве дуьминжи...

Шевруьт. Пой, пой! Белки духдере э е небуд, э е хэспуш  
рафде воисденбу, э е лути-пути? У жогьили, гьеле нисе варасире  
унгьэде э чьужире одоми сарфиге эри рафдей ю э шуьвер.

Хонум. Эзу Оврум зиёдтеш хэспуш, лути-пути бирени? Хэс-  
пуши энугье э сифет энугье верики. Рушлегьой кечии энугье, туь нисе  
дире, ха-ха-ха. (*Келе-келе хэндуйсдени*).

Дироморени Зарангил. Десе э бел веноре, кемере тик гирдени.

Зарангил (*шори сохдере хуно*). Гьечи гьемише ишмуре зен  
э шуьверевоз гьечи э хэнде, шори, э кеф, хьэз вином. Эдем дире,  
худоре, шуькуьр, кеф ишму хуби, чум марасо!

Хонум (*эз Зарангил*). Ижире кеф, хьэзе гьемише э хосде-  
горгьойтуьревоз винош!

Зарангил. Омин! Худо шиново эз лэгIэйтуй, гьэдволим.  
(*Кемере эз вомундеи диедтеш тик гирде*). Уф-ф! Гьечи теретэгIди  
оморем, гIов шуьгьмме эдее дуьшире.

Хонум (*э руьхшендиревоз*). Эз гараж ведироморенге туь  
э хьисобовоз хуб шуьгьэмтуьре, чьтам гуфдиреге, «заправит»  
несохдей?

Зарангил. Неварасируьм туь чуй гуфдириге?

Хонум. Мугум: чой гьеле недуйшири.

Зарангил. Гьэйгьу нисди миденишуьм те дуьшире, тэгIди  
сохдение жигейме нисди. (*Эз шевруьт*). ГIэруьсире кей нишунде-  
нит, худо гьишдге?

Шевруьт (*э хуьшде демундере хуно*). Те гIэруьси шушо е  
коригеи.

Зарангил (*дуьльёсоре хуно*). Чуй кориге? Небуге гофтуьре  
дегиш сохдей, е гоф-чи шиновусде бирей?..

Шевруьт. НэгI, нэгI. Гофме — гофи. Энжэгь хуьшдени Ов-  
рум теимогьоиш рэхь-пулире нефирсори.

З а р а н г и л. Туь чуй гуфдире, мерд? Оврум пенж гьозор монете сади э сер сади веноре эзи е ченд руз пушо э дес бирорзерей хуышде доре фирсоребу эри э туь доре. Гье эзу расди гофме муно Оврум э шиновусдегоргьоймеревоз, эхиртуь ник гердо.

Х о н у м (эз *Шевруьт*). Э мерд, у перигьо оморебугьо жогъиле кук, э хьисобовоз, бирорзерей эн кечи бири?..

Ш е в р у ь т. Эн коми кечи? Чуй гуфдире туь?!

Х о н у м. Эн кечи нэгIэй, эн Оврум.

Ш е в р у ь т, (э *мэхьтелиревоз*). Дие пуле эйчуй овурде недо у э ме?

Х о н у м. Туьре воисденбу э сер эн у тоёгъи вегири, дие пуле чуйтам миёсде доре у э туь? Уш терси, нум 'пулеш негуьрд, врхд вадарафд.

Ш е в р у ь т. Ме эз же дануьсденбируьм уре Оврум фирсори гуфдире. Ме кеф десмере буй некеширебируьм. Ме мугум у е хэспушин бири хэспушиге, чогъол вишере хуно шев торики диромори э хьэёт кес...

З а р а н г и л. Ме гьелэгъи э Оврум гуфдирум: пуле туь хуышденитуй бер ди э сэхьиб духдер. Э хьисобовоз юре, Овруме, гIэйб омори хуышдению эри овурде пуле доре, э бирорзерей хуышде тапшуьрмиш сохди.

Х о н у м (*песово чаруьсде*). Туь мунош гьезурасди. Еки туьни гIэйб-гIор дануьсдегор, екиге Оврум.

Ш е в р у ь т (эз *Зарангил*). Гьечу буге, чойтуьре ху, бура гу э Оврум биёв, пенж гьозор монет рэхьпулиреш биёругу э хуышдеревоз. Те у оморе, меш бурам э кантур, э правлений колхоз, сер кешуьм биём, дануьм, кей дорениниге имуре аванс э трудоденгьойму.

Те Шевруьт вадарафде, оморени Марал э парталгьой кори хуышдеревоз.

М а р а л. Руз ишму э хэйр бу!

З а р а н г и л. Эгъиббеттуь э хэйр бу, духдерме.

Х о н у м (эз *Марал*). Туь имбуруз лап зу вогошдей эз кор?

М а р а л. Э телефоневоз хэбер дори, ме зу-зу э райком биём гуфдире.

Х о н у м. Хэйр гердо, духдерме, чуй кори? Рафдебири?

М а р а л (*бирмендени э сер-тен хуышде*). Гьечи чуйтам рафденуьм ме э парталгьой кориревоз, дедей? Эз райком вогошденге мидани.

Марал дарафдени э хуне эри партал дегиш сохде.

Ш е в р у ь т (эз *Зарангил*). Вэхиз зу бура, Овруме огол зе

З а р а н г и л (*когъли-когъли*). Вэхиз гуфдири? Мэхизуьм дие.

Е худой! (*Вэхиишдени*).



Хонум. Эле, чуй тэгди сохде туь, Зарангил, нуьшде е пейле чой хурде, песде мирафди дие?

Зарангил. Гьери? (*Дуборе нуьшдени*). Бошгу, гьэдволим, веги биёр чойтуьре э миробой энжилиревоз, эгенер гьисдиге, нисдиге — эн бэглиревоз.

Хонум. Тух биёрум, небуге очугъ?

Зарангил. Очугъ нэгл. М тухэ чой хурденуьм.

Хонум. Эле, туь келе зени, тухэ чой э туь гурунд минишуь, э дуьл туь кори мисоху.

Зарангил. Гьечуниге очугъэ чой биёр.

Хонум. Очугъ хурдиге шуьгьэмтуь эз мунде жигеш дуьши мизенуь, пойбуру мибоши.

Шевруьт (*глоси бире, эз Зарангил*). Вэхиз бура дие, эгъибеетуь эхэйр, те духдер э хуне деригьо. И тенбели бири тенбел гьеле чой невонори, фурмуш сохди.

Зарангил. Гьери?.. Бирени, бирени гьечу: одоми куьнде, дусде одоми хуьшдере диренге э у ёр фурмуши офдоре.

Хонум (*э руьхшендиревоз*). Гье у туь гуфдирие, Зарангил!

Зарангил. Бошгу, гьэдволим. Худо рази гердо эз туь. У руз гердо, ки худо Шевруьте э ёр биёро, кишди хьомолино эз теню фураво! Омин! Бурам дие Овруме фирсуьм.

Шевруьт (*диетдеш глоси бире*). Эй духдер, и дуь сэгIэт туь рафденуьм-рафденуьм эдее гуфдире, оммо эз жигейтуь нисе жуьмуьсде. Вэхиз бура рафдениге дие!..

Зарангил (*гене вэхиишдени*). Хуб, эдее рафденуьм, гьэдволим. Э сер чумгьойме. '

Зарангил рафдени. Хонум э песой энужгьили вонорени.

Хонум. Худо чумгьойтуьре векенде, э сер туь сенгъ зено!

Шевруьт. Эйчуь нифри сохде туь гьечи фэгьире?

Хонум. Фэгьир? Герден энужгьире-гьир! Еки туьни фэгьир, екиге у. У ченд духдергьоре фурухди, ченд мердгьоре эз зенгьошу жейле сохди эри хэйр куьф хуьшде.

Шевруьт. Астафрулла дие!

Хонум. Бошгу, бигьил Овруме огол зенуьгу биёругу инжо. Эгенер духдерме рази бисдоге эри э шуьвер рафде э у рушверие кечи, э у мейму, гудил, гье эз лэгIэй дер пиш несохдге уре, ме э и пире вэгIдойме и бендгьой муймере мибурум.

Шевруьт. У «меймуре» духдертуь дири, гоф сохди э уревоз. Иму недануьсдейм, эзи се руш пушо у эри Марал гуьлгьош оворди. Духдер ю хуьшдениюш гуфди э ме( юре разини гуфдире эри рафде э Оврум. Энжэгъ ме э у гуфдируьмки, уре пушоте зенгьо бири, екем сер гирд эри тиракуьсде, гьэгьри бире. Оммо эз гьовогьо винируьм, духдере э Оврум рафде разини, туь эдее гуфдире —

у кечини, меймуни, беле-филони. Ирониго чуйтам гуфдирениге: «Кур гьаст, кечел гьаст, гьобул гьаст». Туь—«кечи», «мейм»;...

Хонум. Туь чуйш гуфдириге, ме э у кор бовор нисохум. нисохум. У гьич бирениго кор нисди.

Шевруьт. Эгенер туь бовор нисе сохдегье э ме, туь хуьшденитуй веги пуьрс эз духдертуь.

Хонум. Ме непуйрсирекш дануьсденуьм, у нибугьо кори.

Шевруьт. Эй аннамазин гьуьзи, аннамаз! Эдее гуфдиренуьм—гьечуни.

Хонум (*огол зерени Марале*). Марал! Марал! Е минут инжо ведиро гьери! (*Эз Шевруьт*). Эгенер туь гуфдире дуз бисдоге, ме духдер бебейме нисдуьм, и бендгоймере небурурумге. Туьре, хуьшденитуйре мигьилуьм бурра.

Шевруьт. Мерё эйчуь? Ме доллок, парикмахир нисдуьм.

Дироморени Марал.

Хонум. Чуйни, дедей?

Хонум. Духдерме, эзи се руз пушо туь... у куке дирей, гоф сохдей?

Марал. Ме гьичиш нисе дануьсденуьм.

Хонум. Духдерме, дие и небисдоки. Жугьоб ди: е «эри», е «нэг!».

Шевруьт. Е «эри», е «нэг!».

Марал. Эри!.. Вохурдем... У себэхьинминиш оmore э киме, гьемере э ме варасунди. Дие пуьрсирение гоф ишму нисдиге, мере гирде мегьилит. Ме эдее тэгиди сохденуьм. (*Зури-зури дарафдени э хуне*).

Шевруьт (*шори сохдере хуно*). Гьо! Дирири?! Имогьой бура э парихмахир, муйгьойтуьре гьэйчи зенуь, эзи фир-фире зен гьоре хуно кутехэ муйгьо соху туьре.

Шевруьт э руьхшендиревоз э тегьер «фир-фире» зеньго сохде, рафдени.

Эз хуне ведироморени Марал, тозе костюм э тен ю вери.

Хонум. Пой, мара, мере э туьревоз гофи.

Марал. Жон дедей, ме эдее дир биренуьм эхи?

Хонум. Е гофлейгеш пуьрсуьм эз туь. Туь у куке пушоте шинохденбири?

Марал. Эри, эзи дуь сал пушо.

Марале воисдени вадарав, е жогьиле зен, э гьужогь ю гьэйл вери дироморени.

Гьуьзуьргуьл. Руз ишму э хэйрбу!

Марал. Эгьиббеттуь э хэйр!

Гьуьзуьргуьл. И хуней эн Хонумигьой?

Марал. Эри. Диройт, диройт, гьэйб меевгу туьре. (*Марал рафдени*).

Гъуьзуьргууьл. Холей Хонум ишмунит?

Хонум. Эри, менуьм. Хэйр гердо, гъурлугъ ишму?

Гъуьзуьргууьл. ГъейсэГэт эзинжо рафдгьо духдер ишму бу?

Хонум. Эри, духдермени. Чуьни бегем?

Гъуьзуьргууьл. (*Е лугъонде ох вокошире*). Гъичиш, холе.

Хонум. Туь эхи э дуьл гоф дерие одомире хунои? Эри илчнети ти сохдеиниге, духдере эри дире оморейниге, екем дир бирейт, духдер (*е ох вокоширени*) хосдэхунд сохде омор.

Гъуьзуьргууьл. Эри, дир бирем. Ох, дуьлме!.. Холе, инжи-миш бисдоритгеш, е дугъле Глов дит мере.

Хонум. ГъейсэГэт (*дарафдени э хуне*), песеде ведироморени э пейлей Глововоз. Ини, Глов овордем эритуь (*Гъуьзуьргууьл. Лове хурдени*).

Гъуьзуьргууьл. Согъ бошит, холе. Гэмел миёвге экемлей инжо дегешдуьм, рэхъэти сохум, песеде метлеб омореймере мугуюм эришму. ГъейсэГэт дуьлме гене эдее сэхд дорд доре.

Хонум. Э хъэёт хуб нисди, духдерме, Вэхиз дарайм э хуне, унжо дегерд, рэхъэти сох.

Гъуьзуьргууьл. Гъувот нисди мере, занигъойме э хуьшде недеруьт.

Хонум. Ме э туь кумеки мисохум, вэхиз, Гэиле ди э ме.

Хонум Гэиле вегирде, эз гъул Гъуьзуьргууьл гирде, дебердени уре э хуне.

Дироморени Зарангил. Эз песой энундироморени Хумор.

Хумор (*э песой Зарангил*). Пой ебо, куьпек, ме э туь чуь луб биёрумге!

Зарангил. Хонум! Ой Хонум!.. (*Эри хуьшде*). Э хуне кес недери беге? Гъи?! (*Чаруьсдени песово, дирени Хуморе*). Туь гуйге чуьнге гуфдири?

Хумор. Бэхшлемиш сохит, ме э ишмуревоз нисдуьм.

Зарангил (*хуб томоше сохдени Хуморе*). Пэгъ, пэгъ, и чуь чини! Лап чум муьшдери гирдение чини. Эри ижире Глэруьс офде хэйли пул векенде мибу эз духдер хосдогор. Э жун худо, ме эри энижире мол е сер э пейде Кислорудскиш мирафдуьм. (*Эз Хумор*). Эз кигъои туь, хэлефме?

Хумор (*и десиш хуьшдере э кари веноре*). Э меревози туь, холе?

Зарангил (*лове э шоре хэнде веберде*). Эри Глэсел, бадбад, тикей эршефи. Эз кигъои туь?

Хумор. Эри, холе, Марале эри дире оморем.

Зарангил (*эри хуьшде*). Эле, бобовой, хунейме вачаруьсд! И бирден кар небугъоГ?. (*Эз Хумор*). Ме эдее пуьрсиренуьм эз туь: туь духдер эн кини, эз кигъои?

Хумор. Э кучей Таги-заде шестнадцать зигъисденуьм.

Зарангил. Эле, хок э серме! И гуйге лап эз каргыош карикки! (*Лап куьнд оморени эз Хумор, келе-келе*). Ме эдристуьре нисе пуьрсиренуьмей. Эдеме пуьрсиренуьм: эз кигьои туь, духдер кини?

Хумор. Ме?

Зарангил. Эри, эри, гьэдоволим, туь.

Хумор. Ме, холе, э есиёв кор сохденуьм.

Зарангил (*гЛОСИ бире*). Эле, туьре вином э зир бенд. э зир сенгь есиёв домунош. Бугьозме лов бисдоки! Эй каруьн бири кар! Ме эз туь эдее пуьрсиренуьм: шуьвер бешешму, зен эн дедешму кини? Эз кигьои туь?!

Хумор. НэГІ, гьеле э шуьвер нерафдем!

Зарангил (*занигьой хуьшдере куфде-куфде*). Эле, туьре вином, гьич э шуьвер меравош, хьэсроте дуьл мирош, ошгуновое гьовол куфде Чиёве эритуь! Погь! Нефесме буррики. Нефес туьре, руруйтуьре худо бурро, гьэригьой!..

Водироморени Хонум.

Хонум. И чуй хьэрои? Э Хумор, чуй бири бегем?

Хумор. Руз э хэйр бу, холей Хонум. Гьич е кориш нисди. Иму э клуб колхоз хоровой кружок вокурдейм. Эдембируьм сес эни холере синемиш сохде: гІэмел миёвге эри кружок иму.

Зарангил. Чуй хэребе кружке? Хэреб-хэсде гердо ю!..

Хонум. Хэребе кружке нэГІэй, хоровой кружке, театр еГІни. Воисденбу туьре эри э театр возире беруь.

Зарангил. Тфу! Не юш, не тиатир юш, не хуьшдениюш, не биремун'юш!

Хумор. Холей Хонум, Марал гьеле невогошди?

Хонум. Эз е нимсэГІэтиге миёв. Биё нуьш е пейле чой, ху те у оmore.

Хумор. Согь бошит, холей Хонум. Ме биё бурам, песде мидиром. (*Эз Зарангил, десе жумунде*). Пока!..

Зарангил (*эз Хумор*). Пой, пой ебо! Инжо куьнд биё. Имогьой гу: димелуь, туь мере э дес дешендебири, еГІни, нэхогь-мере хэр сохдебири? Тут теимогьой э меревоз гьечи эйчуй гоф несохди?

Хумор. Э туьревоз е жирейге гоф лонгь нисди.

Хумор вадарафдени.

Зарангил (*э песой Хумор*) Тфу! Шуьгьэм туьре зендигьозен, пара-пара, лэхьче-лэхьче гердо гьэригьой! (*Эз Хонум*). Гьери е пейле чой биёр эриме э мироборевоз! Бугьозгьойме пара бисдо эз дес эни ализи-сиегьы, э деде-холеревоз муьрде.

Хонум. Туь мунош, чой гъеле недуьшири, хуьзуьмгьо неми, хуб ние сухде, унегуьре чойник гъелемеле нисе дуьшире.

Дироморени Шевруьт.

Шевруьт. ГъейсэгIэт эзинжо вадарафдгьо духдер Хумор бу? У эдембу Марале пуьрсире. Чуй кориге, омбаргьо, иллогьки эз одомигьой колхоз иму имбуруз эдее Марале пуьрсире.

Зарангил. Духдер ужире чини, вэхд э шуьвер рафде биренки, гъеме уре пуьрсирени.

Хонум (э хуьуришевоз) лэгIэйтуре темиз дор. Гофе дан, песде гу. Уре э келе жиге огол зери.

Зарангил. Эхтер, ме инжо е усоле гоф гуфдирум, дуьр гердо?!

Шевруьт (эз Хонум) Весси, зурновI мезе, туь жун худойтуь! Э келе жиге огол зери гуфдире духдертуре, чуй келе кор, келе гьинор сохди беге у?!

Хонум. Песг и гьинор нисди? Эз план зиьди звеной энупенжогь тон онгур вегирди!

Шевруьт. У кор худоини. Худоре воисдге пенжогь нэгло, садиш мидуь.

Хонум. Валлагь, гуж, жофо, фегьм невоноре, худе е гуьле онгуриш нисе доре.

Шевруьт. Хуб, хуб, весси лэхуьрттуре. (Эз Зарагил). Эжи Оврум?

Зарангил. Дирем Овруме, мугу: туь бура, ме гъейсэгIэт миём.

Дироморени Марал. Э синей энупорден вери. Гъеме дениширенуьт э Орден энуп.

Марал. Руз ишму э хэйр бу!

Гъеме. Эгъуьбеттуь э хэйр!

Хонум гье усэгIэт куьнд оморени эз Марал, дес зерени э Орден энуп, гъэл гирдени эз душгьой духдер хуьше. Куьнд оморени Шевруьтиш, томоше сохдени.

Хонум (шори-шори). Орден дори туьре, хэлефме? Эри эни кор огол зеребу туьре?

Марал. Эри, дедей. Эз Махачкала Председатель Президиум Верховный Совет омореву. Кеелгьой район, актив—гъеме бируьт. И мере доригьо Орден эн Жофой Гъирмизине гIэлеми. Холей Гюлбогьориш унжо бу. У эхи член эн Президиум Верховный Совет Догъистуни. У гъэл гирд мере, омбаракбу сохд, э десдин дес хуьшдеревоз дезе и Ордене э синейме. Гъеме мере унжо омбаракбу сохдут.

Хонум (гъэл гирдени Марале, моч сохдени). Омбаракбу, хэлефме!

Шевруьт. Димелуь, Орден Жофой Гъирмизине гІәлем... туь-  
ре эри хубо келе жофойтуь дори дие?

Марал. Эри, бебе. Туь дануьсдени, ки иму пориш эз участкай  
звенойму келе бегьер вегирдейм.

Шевруьт. Бошгу, хэлефме, омбаракбу. Худо гъувот дешено э  
гъулгъойтуь.

Марал (*шори-шори*). Согъбоши, бебе!

Зараңгил куьнд оморени эз Марал. Гье э и възд дироморени Оврум.

Зарангил. Омбаракбу, духдерме. Пушой эн гІәриситуь э сер  
домор биёругьо бэхшгъо, иш е бэхши эритуь. Шоре безмугъо зе-  
нош!

Оврум (*э уьткемиревоз, келе-келе*). Офорим, одохлу! Омба-  
рак бу!

Зарангиле воисдени гъэл гируь Марале, оммо Хонум э десевоз поюндени  
уре. Эз Марал куьнд оморени Оврум.

Марал (*э гумонлуьиревоз*). Чуь-чуь, «тозе Меджнун»?! Туь-  
ре инжо чуь дери?! (*Эз бебешу, гъэзъри-гъэзъри*). Бебе!..

Шевруьт (*эз Марад*). Чуьтам чуь дери!?

Оврум\* (*эз Шевруьт не Хонум*). Ишму э ме бовор сохдейт  
духдер ишмуре дорейт. Ишмуш бовор сохит: гъич пешму нибо-  
шит эри эни кор! Духдер ишму э хунейме бикере хуно мизигуь,  
чуьнки ме уре эз гъемей буьтуьн дуьньёгъ хуб хосденуьм. Пулме,  
молме, жунме—гъеме эри энугъурбуни.

Гье и туьтем ведироморени Гъуьзуьргууьл гІәил э гъужогъ вери.  
У шинирени-гофгъой Овруме.

Гъуьзуьргууьл (*хъэрой сохде*). Дургуни! У дургуни!..

Гъуьзуьргууьл дорени гІәиле э Хонум, ю куьнд оморени эз Оврум.

Оврум. (*Эри хуьшде*). И эз же омо ведиромо, уш, гъэдой  
нэхьс, гъэ эзини вэгІдо?!

Гъуьзуьргууьл (*эз Оврум*). Дургу эдее гуфдире туь! Туь е  
вэгІдо гье ижире гофгъоре эримеш гуфдиребири.

Шевруьт (*э мэхьтелиревоз*). И кини?..

Оврум. Ме туьре нисе шинохденуьм!

Гъуьзуьргууьл. Гъелбет, туь мере гъейсэгІэт «нишинохи»,  
чуьнки э туртуь тозе ов офдори. (*Эз Марал*). Эдсм э туь минет  
сохде, бовор, сохде э и мара зугъун энугуь, ширине гофгъой энугуь  
хуьшдере бедбэхд, бебе-дедейтуьре езугъ месох.

Марал. И чуь гофгъои ме шиновусденуьмгъо, и чуь коргъои  
ме диренуьмгъо?

Оврум\* (*эз Марал*). Нисе дире зен делуьни?

З а р а н г и л. Эхтер, нисе дирени зен эз хвьшде гоф нисе сохде, э хувшде недери?

Гъуьзуьргуьл (эз *Оврум*). Эри, ме эзи; чор сал пушо дель бируьм, э гофгьойтуь бовор сохде, э туь э шуьвер оморенге. Туь мере э загсиш небьрди, мегьре сохди, еГни, песе мере шендиге э гИэилевоз эри е кепикиш недоре.

О в р у м. Ме гуфдируьмки, ме туьре нисе шинохденуьм.

Гъуьзуьргуьл вегирдени эз гъужогъ Хонум гИэиле, куьнд оморени эз Оврум.

Гъуьзуьргуьл. И куклейтуьре чуьтам? Иреш нисе шинохде?! Эгенер туь бебегьойгере хуно минсбдориге, у «бебел», «бебел» гуфдире, эз шори пелпелуьре хуно вежегьисде, э гъэлтуь мишенд хувшдере, оммо у эз туь эдее песово чаруьсде!

Э песой сэгне оморени е ченд сесгьо. Дироморенуьт дуй э песой еки членгьой звено: Хумор, Овшолум, Овшор, гьемчун тозе агроном колхоз Ошир ве е колхозчи.

Х у м о р (*гьетте дироморе*). Холей Хонум, Марал омори? (*Дирени Марале*). Гьо! Омбаракбу, Марал!

М а р а л (э *Орден хувшде бирмунде*). И Орден е тэхьно бэхш эн ме нисди, эн гьемешму гьисди. Ишму э ме кумеки нибисдоритге, эз дуьли кор нисохдитге, ме и Ордене гьобул нисохдум.

О в ш о р (*гИэйб омерере хуно*). Меш эзимээгьдойге хьэрекет мисохум де членгьойгей звеноймуре хуно эри кор сохде, эз угьо песо немунде.

Х у м о р (эз *Овшор*). Милый Обжор, это очень мило с твоей стороны. Баракаллагъ туьре! (*Хэнде*).

О в ш о л у м. Эхириш гуйге э эгъуьл омори. (*Хэнде*)

Гьемей энугьо куьнд оморенуьт эз Марал, омбаракбу сохденуьт уре. Хумор гъэл гирдени, моч сохдени Марале. Эз гьеме бэгьдо куьнд оморени Ошир.

О ш и р. Марал, омбаракбу! Ме гьечи шорум, гуйге и Орден мере дориге.

М а р а л (э *дусди ве мигьробониревоз*). Омбар согьбоши, Ошир. Ме дануьсденуьм.

О в р у м (эз *Ошир*). Пой ебо, гьери, бирозере! Гу эриме: пенж гьозор монете ме э туь доремгьо эжей?

О ш и р. Э мени, оммо ме имогьой нисе дануьсденуьм э ки дуьмге у пулгьоре.

М а р а л (эз *Ошир*). Э ме дит у пулгьоре!

З а р а н г и л. Баракаллагъ, духдерме, Баракаллагъ!

Х о н у м. Марал! Туьре дедей миро, чуь сохде туь?!

Шевруьт поисдени э хувшде домундере хуно.

Марал (эз Ошир). Гуфдируым: дит пулгьоре э ме.

Ошир. Марал! Туь чуй гуфдире?

Оврум (эз Ошир). Эри, бирорзере. У пулгьоре ди э одохлуй ме! Урэхьпулини. Бигьил у пулгьоре э десдин дес хуьшдеревоз дуьгу э сэхьиб хуьшде.

Марал вегирдени пулгьоре эз Ошир.

Марал (эз Оврум). Туь гуфдирере хуно, ме и пугьлоре эдее доренуьм э сэхьиб ю. Сэхьиб эни пульго (бирмундени э Гьуьзуьргууьл не гьэиллей ю) и зени не и гьэили.

Марал куьнд оморени эз Гьуьзуьргууьл, донорени гьундогь пуле э дес энэ, оммо уре нисе воисде вегирде.

Гьеме, (эз Зарангил не Оврум бэгьэй). Веги! Веги, духдер!

Оврум (эз Марал). Туьре чуй ихдиёри пулгьоймере э у эри доре?!

Марал (эз Оврум). Эри эни гофгьойтуь и гьэил э народный суд жугьоб мидуь. Имогьой хосденуьм эз ишму, «тозе Меджнун», чуйтам оморейтге рэхь ишмуре, гье гьечу вогордит!

Оврум хуььрш сохде оморени э сер Марал.

Оврум. Екиреш ихдиёр нисди пулмере эри сэхьиб сохде! (Десе гьово вегирдени э сер Марал). Ме туьре!..

Шевруьт (э хьэроевоз эз Оврум). Пой, гьурумсогь! (куьнд оморени эз Оврум, хуни-хуни дениширени э у. Бирмундени э, гьэиллей). Ме и бисд сали и кишди хьомолире бесдем эри еки эзини гьэиллей нарине хьэсротум гуфдире, оммо туь, номусуьз, утанмаз, суьгьде куклейтуьре шендей, гьишдей бебесуьз, чоресуьз, э михьтожи, хьижрони!? (Векендени эз кишди хуьшде кишдире, шендени э гьээгьревоз э сер Оврум). Дегь туьчини кукгьо бирейнжон мерде, еки эзини гьэсуьлменде, эгьуьлменде, сарафменде, жофодусде духдерме гьозор гиле хуби. (Куьнд бирени эз марал, гьэал гирдени уре. Эз Оврум). Имогьой ибуд бош эз инжо!

Хонум (эз Зарангил). Туьш ебо хьэкутуьре вор ди эзинжо!

Гьеме хуни-хуни дениширенуьт э лой Оврум. Оврум хуьшдере песово песово доре, песде гье е бирден чаруьсде э лой дер хьэёт вирихдени. Эз песой Оврум, чуме-чару сохде-сохде, зур-зур вадарафдени Зарангил.

Хэнде. Марал тик гирдени гьэиле.

Марал. Денишит, чуй раче гьэилиге!.. Ки дануьсде, белки и гьэилле келе биренге, Юрий Гагарина хуно э космос варафденбу, енебуге гьемватаниму Гавриил Илизарова хуно келе табиб бире, э гьемей гьуьлом тэгьрифлуь биренбу!..



Гъемееки кура бире, хуьндөнуйт:

Бирмундим эришму томоше  
Эз товун хуби ве зобунн.  
Согъ гердо э гЪулом гъемише,  
Жофо, муьгъбет, боворини!..

Перде (Эхир).

1961 с.

>

# ГЮЛБОГЬОР

*(Поэма. Э е гъэдер кутэхь сохде омор).*

---

Эри тэгРифлуье зен дигьиме, Игид Жо-  
фой Социалисти, дедей эн дуй э Келе Доа-  
глой Ватани мунде кукгьо, дедей эн Ру-  
вин хьэрмэхье — Гюлбогьор Давыдова.

**АВТОР**

### **ГЮЛЬБОГЬОР**

Шев нимен эз зуревоз,  
Гьемей гуьлом э хифлет де,  
Не сеси, не унг, не овоз,  
Гуйге нисди гьич е зинде.

Энжэгь э асму эдей жесде  
Менг, чуьн гьоз э руй дергьёгь,  
Симов зере, эдей рафде  
Гьич хэберсуьз эзи дуьньёгь.

Гуйге гьечи гьозор чумгьо  
Батмиш бире э хэёлгьо,  
Асдарагьо эзу дури,  
Дениширет э руй хори.

Гюлбогьориш эз зуревоз  
Э тэхьное хуней хуьшде,  
Чуме гьечи э гужевоз,  
Хисире э хов веберде.

Бирден гуйге э гуш эну  
Сес пенжере кифде омо,  
Рувин, Довид—кукгьой эну  
Огод зеруьт сэхд гьеебо:

— Эдей! Дедей! Вэхиз, метерс.  
Иму омореим лап эз дури,  
И ченд салгьо бирей чумгIэрс.  
Дуьл иму гье э лойтуь бири.

Вэхиз виним ебо туьре, ой дедей!  
Гьэл дешеним э гьэл еки, жон дедей!  
Хьэсрот бала нен дедере, ой дедей!  
Вегириим иму дуь эз еки, жон дедей!..

Хов келе зен гье е бирден  
Учмиш бисдо эз чум энү,  
Чуьн руьхь инсон эз гьэд беден,  
Чуьн паруьсдек эз лулей ю.

Сер-су, билбул вэхишд э пой,  
Видовусд у э ён эн дер,  
Гуйге эз шэх эн туьнде чой,  
Гиж рафд пире, вомунде сер.

Гьулгьоре чуьн дуь гьэнет  
Лов сохде э рэхь энугьо,  
Э дуьл дери хьэсрот-ниет,  
Омо э сес эн балагьо.

«Ой худой ме! И чуь кори?!..  
Э дер-боже екиш нисди,  
Э дуьлме деш огьи-зари  
Эз мунде жигеш венгесди!..»

Гюлбогьор вогошд э хуне  
Гуйге э зир келе шеле,  
Сер ю гьуз, дес э чуне  
Поисд э ён эн пенжере.

Шев сокити. Е нешумош  
Э пушой чум нис вохурде,  
Энжэгъ кулок евош-евош  
Пенжерере эдей кифде.

Товуш эн менг эдей рихде  
Э сер сипре муйгьой энү,  
Эз мунде жигеш зиёдте  
Сипи бире муй сер энү.

Сие черде сифет томом  
Диеш снег, могъбул бири,  
Гуйге гъэмгъой гъемей г'уъллом  
Э дуъл хуьшде у вечири.

Эз келе довго варасде,  
Омбаре салгъо гиросди,  
Оммо шев-руз чум эн деде,  
Э рэхъ балагъо домунди.

У лугъокде чухуригъо  
Эз бомбагъой эн дуьшме,  
Эз зуревоз томом угъо,  
Пур бирет эслогъ гъеме.

Ваچارуьсде шегъергъо  
Дуборе оводу бирет.  
Гъэлпе бире хоригъо  
Э богъ мэхъсуъл чаруьсдет.

Ярагъой эн солдатгъо  
Эз зуревоз хос бирет,  
Энжэгъ э жигей энугъо  
Ковре дэгъмегъо вомундет.

Оммо ярай эн дуъл деде  
Э довго кук вир сохдигъо,  
Гъечи э дуъл зери зеде,  
Хос нис бире гъич е вэхдгъо.

И ченд салгъо шевгъо э хов  
Гюлбогъор бирден бужу бире,  
Гъуй зерени у эз хъэлов,  
Кукгъой ю э ёр ю оmore.

Угъо ченд-ченд гиле,  
Гуйге э хов нэГ, э эвреи,  
Э ён эн дер, эн пенжере,  
Кукгъой хуьшдере у дири.

Оммо салгъо нубот еки  
Эдете зере гиросде,  
Эз дуь кукгъо семе еки  
Тегъелемиш нис вогошде.

Шев эз ниме giroшди,  
Менг э асму эдей жесде,  
Гюлбогъор э гъэм домунди,  
Э ён пенжере поисде.

Э пушой чум эн Гюлбогъор  
Чуьн кервугъо жерге-жерге,  
Омо giroшд рузгъо эз ёр,  
Мугър венгесде э дуьл гуйге...

\* \* \*

Гюлбогъор бу гъеле гIэил  
У эз бебе етим мундгъо,  
Лап тэхъл бу эй етим-соил  
Э у четине земонегъо.

Чуьтамиш гири хэгъерлегъо  
Оморе келе бисдорут,  
Дуь эз песой еки угъо  
Э гъисмет ишу рафдуьт.

Бу эз дигъбон Хошмемзил  
Довид—косиб шуьвер энугу,  
Дуь екире угъо эз дуьл,  
Хосденбируьт—гъэдер небу.

Гуфдиренуьт и дигъбоне,  
ЕгIни, хуш бу мемзуьл ишу,  
Гъетте ебо бине норе,  
Келе мердгъо эз дуьлишу

Нум норут уре «Хошмемзил»,  
Зиндегуни э и туьпрогъ.  
Рач бу чуьн гуьл, пур чуьн суьмбуьл  
Э гьер хуне, э гьер порогъ.

Оммо чуьтам э гьер жиге,  
Зиндегуни гуйге бигор  
Эй косибгъо бу инжиге,  
Эз жун, гъисмет бируьт визор.

Негирошд ним салиш гъеле  
Эз Гюлбогъор гIэруьс бире,

Гъдузе падшогы лап келе  
Сохдут довгIой гIуьломире.

Бердут э довгIо Довиде,  
Жогъиле гIэруьс тэхьно мунд.  
Шев, руз гIэрс рухунде,  
Э дерд-хэёл шуьвер домунд.

Небу гъедер шорире,  
Е руз Довиде диренге,  
Эз сер сохде у довгIоре,  
Согъ э хуне у вогошденге.

Е сал гирошде угьоре  
Бисдо гIэиллей нарине,  
Рувин норут нум энуре,  
Шори омо э и хуне...

Эгъ! Эйчуь гъечи эхи гъисмет  
И беде коре туь сохди?  
Э дуьл энугъо ниет дери,  
У ниете зере куьшди?

Гъеле си салеш небу  
Довид офдоре муьрденки,  
Э Гюльбогъор гъэзоб вебу,  
Дедей эн етим мунденки.

Уьсделуьге бу зен бордор,  
Пенжмегъе гIэил э шуьгъэм,  
Сер-дуьл косибе Гюлбогъор  
Пур бисдорут эз дерд не гъэм.

Бугеш гъейсэгIэт зен бордор,  
Эз жун хуьшде гуйге визор,  
Куьшд хуьшдере лап Гюлбогъор,  
Пара бире тэхьэр онор.

Гъечи чор мегъ гирошде  
Кукле бисдо гене уре,  
Э хотур шуьвер хуьшде  
Довид нум но соворлере.

Гуфдире неварасдени  
Бу хьол-овхьол эн Гюлбогъор,

Эз ижире дерд-четини  
Довом нидо сенгъ не дохьор.

Эз сер себэхъ те шохьонгум  
Гъэтро мизе эри кесгьо.  
Э жун хуыште рэхъм неберде,  
Мисохд зиёд кор эз мердгьо.

Шохьонгумгьо хэсде-менде  
Э хуне у вогошденки,  
Форигъэти эй вегирде,  
Небу уре гъич минкини

Э тегьер мэгІни заруьнжи  
У «Ненуй-ненем» михунд,  
Гуйге у мэгІни нисд—буружи,  
Гъечи у дуьле мисухунд.

Гуйге гофгъой эни мэгІни  
Дуьле бирьён сохденигьо,  
Лап эй гъисмет эни зени  
У эй гІэил хунденигьо:

«Тир незереки—торкомулуье дедей,  
Шимшил нерасиреки—яралуье дедей,  
Ойлеруьн боши, гъэмлеруьн юлдашие, дедей...»

Гуфдиренуьт эз гуьлиш  
Одоми буш, михэнети,  
Оммо эз сенгъ эн дохьориш  
Лап сэхди, у, чуьн пулати.

Чуьн сенгъ, пулат и зен  
Сэхд ве муьхъкем ведиромо,  
Гуйге руьхъ эну ве беден  
Эз сенгъ, пулат куфде омо.

Гьер руз у гъэтро кешире,  
Э хуыште рэхъм неберде,  
Дуь гІэзизе кук хуышдере  
Эдембу у келе сохде...



Эн Гюлбогъор гьердуй кукгьо  
Оморе келе биребу,  
У гурунд-четине рузгьо  
Фурмуш бире рафдебу.

Э дуьл дедей ниет дебу,  
Эри Рувин гIэруьс хосде,  
Дуьрлуьг-партал восдоребу  
Эри гIэруьс хьозур сохде.

Оммо гьемин гье и вэхдгьо  
Э дуьл деде, эн Гюлбогъор  
Дерики шоре ниетгьо  
Омо э сер хэлгъ беде кор.

ГIэтош эн келе довгIоре  
Дегесундуьт фашистгьо,  
Билесумол хоригьоре  
Эй сохде эз хун инсонгьо.

Секонеи лап бу келе  
Э сер хэлгъ иму омогьо,  
Дебируьт э вой-ноле,  
Дуьшме вегирде хоригьо.

Лов бисдо э согъ вилеет  
Гофгьой гьовхо чуьн келе зенг:  
«Вэхиз буьзуьрге вилеет,  
Вэхиз э гьэзоблуье женг!..»

Омбаре кукгьой ватани,  
Ерэгъ э дес сэхд шишире,  
Недануьсде сегьм, четини  
Бирмундуьт келе игидире.

Рувиниш рафд э довгIо,  
Дедее у сэхд гьэл гирде,  
Э шир дедей у сэхд шовгIо,  
Ватане гьэлхэнд эри дошде.

Дедей хуьшдере дуьл доре,  
Эз чум е гIэрсиш нерихунд,

Эз пэхьники дуьл энуре,  
ГӀэрсгьо сула сохде сухунд.

Гьечи е сал гиросше  
Э Довидиш нубо раси,  
У э пушой дедей поисде,  
Хьол энуре лап вараси...

Бирден э дуьл лерз офдо,  
Э гушгьо дарафд шивиш:  
«Белки эзи дуь кукгьо  
Невогосд гьич е киллеиш?!..»

Эзи дуь кук бэгъӀй мере  
Нисди эхи э руй гӀуьлом,  
Вир сохдумге ме угьоре,  
Тэхьно гьушум э и гӀуьлом!..»

Воруше хуно эз чумгьо  
ГьеусӀгӀэт эз дерди дуьл,  
Рухунд дедей шура гӀэрсгьо,  
Нешумой ю бире билбул.

Пушой куке у рэхь сохде,  
Дуьл ю сэхд буланмиш бире,  
Э герден кук гьӀл дешенде,  
Гирисд дедей, зар доноре...

Гюлбогьор э и вэхдигьо  
Э Дербенд у кор сохденбу,  
Э колхоз э десдей зенгьо  
Уре звеновой норебу.

Чун гьемей хӀлгъ эн мемлекет  
Эни колхоз одомигьо,  
Э кор доре сэхд хьӀрекет,  
Мисохдуьт гьемей энугьо.

Эри фронт кумеки бу  
Онгур ве тэхуьл энугьо,  
Эй дутьше гунле-барут бу  
Зарбе жофой колхозчигьо.

Омбардеки эн жогьилгьо  
Гьеме э довгӀо бируьт.

Зенгъо, огьилгъо, гІэилгъо,  
Э кор колхоз мухшул бируът.

Эз довго эри омбаргъо  
Гьер руз хэбер оморенбу:  
«Муърди чуьн ек эз игидгъо,  
ГІэизе кук, шуьвер ншму...»

Дуьл Гюлбогъор бу дэгъ-дэгъэ  
Шев-руз э думит эн кукгъо,  
Гуйге лап хьэл мисохд сенгъэ,  
Неки дуьле у фикиргъо.

Э эври еде э хов  
Э пушой чум эн деде,  
Дуьл энуре лап сохде лов,  
Оморенбируът поисде:

Синемишигъо ченд жире  
Э гъэд довго, гунле-барут,  
Беде чигърет дуьшменгъоре,  
Чуьтам шишире оморот.

Гогъ дирени у Рувине,  
Чуьтам туьфенг э дес дери,  
Зерениге у дуьшмене,  
Нисд сохде уре эз руй хори.

Бирден гунле э гъэд эн женг  
Э Довид раси э зарбевоз,  
Эз дес эну офдо туьфенг,  
Билесумол э хуневоз.

Эз Гюлботъор буьруьж-хъэрой,  
Ведиromo чуьн е шивен,  
Э жигей кук пире дедей  
Рафд у э сер беде дуьшмен.

Эз дуьлпесои эн гІэилгъо  
Ченд гиле у э ховгъо,  
У серсоне хуне бире,  
Эй энугъо кумек бире.

Эз хуьрш, гъэзоб эн дуьл хуьшде  
Э сер фашистгъо мирафд,

Муышдгьоре сэхд жарунде,  
Хьэрой ю э асму марафд.

Хори, гьово милерзи  
Эз сес божэхь, буруж энү,  
**Дуышменгьо лап митерси,**  
Вирихде эз сегьм энү.

Гьечи эз хьэрой хуышде  
Ченд бо эз гьэд эн сэхде хов,  
У хэбер бире вэхуышде,  
Гьемей ю хэсде ве тар-гIов.

У дие нидануьсд хисире  
Эз дуьлпесой эн балагьо,  
Себэхь гьечи э чум дире,  
У мирафд-э кор, э богьгьо

Воисдени лап мере  
Эй туь гIээзизе хундогор,  
Дануьм эри гуфдире  
Хэбердор эз дуьл Гюлбогьор.  
Чуьтам пар-пар сохденбуге,  
Невэхуышде эз сер хори,  
Сие хэбер оморенге:  
Э довгIо кукгьо пуч бири...

Гуйге гьеме гунлегьо  
Гьеебо угьо бирден,  
Э довгIо дуьшме шендетгьо  
Раси эни зен э беден.

Нисд ужире гьувот мере,  
Дердгьо, хьэйфгьой Гюлбогьоре,  
Эришму лап гьемере  
Дануьм угьоре гуфдире.

Энжэгь гуьом: эз зуревоз  
Ченгьэдер асанти бу муьрде,  
Э ижире хьэйф-дердовоз  
Э и гIуьлом зигьисде.

Энжэгь э кор, э богьгьо  
Е кем дуьл энү меромо,

Э гъэд зенгъо, хьэрмэхьгъо  
Гуьлом лап тэхьл ниёмо.

Лап шор бу хэлгъ—варасд довго!  
Омо э гуьлом шолуми,  
Оммо чуьн Гюлбогъор дедегъо  
Бируьт шор, могбулиш гъеми.

Кимвэгдо чуьтам зимицерз  
Хори-гъоворе шувундеге,  
Менгесд э дуьл энун лерз,  
Кукгъо э ёр оморенге

Увэхди у вокурдени,  
Сер эн сэхде сундугъэ  
Эй гIэруьс сохде дуьрлуьге  
Еки-еки дечирени.

Угъоре гъечи чарунде,  
Нуьшдени гIамор сохде,  
Песде домо вокурде,  
Сер гирдени эй гирисде.

У э ки кукгъой хуьшде  
Руй бире, гуфдирени,  
Шуькеетгъой дуьле сохде,  
Гуйте серкуш зерени:

«Текей мунум ме чумерэхь,  
Неоморит гъич екишмуш,  
Дуьл зерени буруж-божэхь  
Сес нисди гъич эз екишмуш.

Не кук, не гIэруьс э хуне,  
Не духдер, не неве неде,  
Тэхьно пире келе зене,  
ГIэмел ниёв гъечи гъишде.

Екиллей семе вогордит  
Э и тэхьное хунейме,  
Дуьл дедее шор сохит,  
Гъурбун ишму гердом ме.

Эз ишму расире гунле  
Небуге дуьл-нешумойме,

Чуьн яралуье гъуш эз луле  
Учмиш мибу эз синейме...

Энжэгъ эз гьер рузине кор  
Эз дердгъой неварасдени  
Миди эй хуьшде Гюлбогъор  
Гъечи е кем олхогъини.

Те себэхъ ебо чум вокурде,  
Гюлбогъор ебо чум мокурд,  
Тикей нун, гъофун вегуьрде,  
Дер хунере зу мокурд...

Э богъ э десдей хьэрмэхъгъо,  
Э кор мухшул у биренки,  
Е кем семе у фикиргъо,  
~~Фурмуше хуно бирени.~~

Песде э гъэд хьэрмэхъгъой ю  
Омбар бируьт ужирегъо,  
Е кук, шуьвер, бирор ю  
Эз довгю неоморетгъо...  
Эз себэхъ те торик бире  
Гъечи звеньевой Гюлбогъор,  
Фикир зэхъмет хуьшдере,  
Мидо неведунде э кор.

Тегъенгъо хуб бегьер гируь,  
Хориш бу темиз ве чога,  
Буле онгургъо вегируь  
Эз участкай хуьшде э богъ.

Е се сал гирошде бэгъдо  
Гъечи эз довгю варасде,  
Вегир, игид жофо бисдо,  
Асдарай суьрхи вегуьрде.

Дануьсджи хэлгъ, вилеет  
Э товун гуьзет, жофой эню,  
Эз гъемей куьнжгъой вилеет  
— омбаракбугъо эри эню

Фирсорут урус ве эрмени,  
Одомигъой ченд миллетгъо:

«Эриму келе шорини  
Эз туьчуьни зен—игидгьо...»

\* \* \*

Чуьтам кукгьойтуь э довгЮ,  
Э кор бирмундей игиди,  
Бирей туь дуз, расд э шовгЮ,  
Лоигъ бирей э гЮьзети.

Ченд салгьо, эй зен пулати,  
Э рач асдарай эн суьрхи,  
Вебири нишон депутати  
Э синейтуь — векил хэлгьи.

Шиновусдем ме ченд бо  
Гофгьойгуьре э митинггьо:  
«Мебугу дие гьич довгЮ,  
ЧумгЮэрс небошут дедегьо.

Угьо зенденуьт кукгьо  
Эри шори, зиндегуни,  
Оммо нэгI эслогъ эри довгЮ,  
Эри женггьо ве дуьшмени.

Ме дануьсденуьм ёгьин  
И метелере дедегьо,  
Ведешендет угьо гьемин  
Эз дуьлишу гьисдигьо:

«Чуькле гIэиллей эн севор  
Офдорөинжо эз гуфере,  
Бигьил падшогъ-довгЮокор  
Офдонугу эз тэхд хуьшде»

Шолуми бугу э руй хори  
Эй вечире мейво, мэхьсуьл  
Сохим хэлггэ рази, шори,  
Веровунде буле тэхуьл...»

\* \* \*

...Шев нимеи эз зуревоз,  
Гьемей гЮьблом э хифлет де,  
Не сеси, не унг, не овоз,  
Гуйге нисди гьич е зинде.

Гуйге гьечи гьозор чумгьо  
Асдарагьо эзу дури,  
Батмиш бире э хэёлгьо,  
Дениширет э руй хори.

Эз келе довгю варасде  
Омбарае салгьо гирошди,  
Энжэгъ шев-руз чум эн деде  
Э рэхь эн кукгьо домунди.

Шев эз ниме гирошди,  
Менг э асму эдей жесде,  
Гюлбогьор э гьэм домунди,  
Э ён пенжере поисде...

Ме денишире э и зен,  
Гогь сохденуым шори-гьоми,  
Гогь туйге руухь эз беден  
Рафдени эн ме эз некуми.

Гогь эз игиде коргьой эню  
Дуълме хунде чуьн буьлбуьл,  
Гогь эз дердгьо, гьэмгьой эню  
Ме биренуым лап билбул.

Гогь мере воисдени  
Эри эню десдон хунум,  
Гогь э уревоз зеки  
Зар доноре гирисуым.

Оммо гьер вэхд мере,  
Э шори э могьбули,  
Воисде эзу гуфдире  
Ижире гофгьо лап эз дуьли:

— Шорум эз туь зен дигьиме,  
Бирмундей хубе нишоне,  
Эйтуь дедей эн хьовирме,  
Нуьвуьсдем ме и десдоне.

Согь гердош туь э пушойму,  
Игид жофо, гуьл эн богьор,  
Келегеди, тэҮрифиму,  
Жон туь, жолей Гюлбогьор!  
1964 с.



## СЕРНОМЕ

Зен бирор ( <i>повесть</i> ) .....	13
Кук Гудил ( <i>е бэхш эз повесть</i> ) .....	157
Шями Дербенди. ( <i>Новеллагьо</i> ) .....	189
Ихдилотгьо: .....	317
Пьеса .....	397
Қишди хьомолн. ( <i>Музыкальная комедия эз 3 актгьо</i> )	397
Поэма «Гюлбогьор» ( <i>э кутэхь сохде оmore</i> ) .....	433

*Хизгил Давыдович Авшалумов*

### ЖЕНА БРАТА

На татском языке

Редактор *Н. Гилядов*

Художник *И. Задера*

Худож. редактор *Э. Лубьянов*

Технич. редактор *В. Гаджиева*

ИБ 2861

Сдано в набор 10. 06. 94. Подписано в печать 05. 09. 94.  
Формат 60x84<sup>1</sup>/<sub>16</sub>. Бумага офсетная № 2. Гарнитура «Литературная». Печать высокая. Усл. печ. л. 26,04. Уч.-изд. л. 29,1. Тираж 200. Заказ 43. Цена договорная.

Дагестанское книжное издательство  
Министерства информации и печати РД  
367025, Махачкала, ул. Пушкина, 6.

Типография им. С. М. Кирова  
Министерства информации и печати РД  
367025, Махачкала, ул. Маркева, 51.

